


Chyoiyúng
chyumlaiká:
dangshikaq asik; Zaiwa



New Testament in Zaiwa

Chyoiyúng chyumlaiká: dangshikaq asik; Zaiwa New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files dated 29 Jan 2022

23f9fc55-a8a4-59ef-9513-707ec336b0ee

Contents

Mahte	1
Markuq	40
Lukaq	65
Yohan	107
Lagyo	139
Romaq	177
1 Korinhtuq	194
2 Korinhtuq	211
Galatiq	222
Ehpesu	228
Hpilipi	234
Kolose	238
1 Htesaloni	242
2 Htesaloni	246
1 Timohti	248
2 Timohti	253
Tituq	256
Hpilemon	258
Hebre	259
Yakuq	272
1 Petruq	277
2 Petruq	282
1 Yohan	285
2 Yohan	290
3 Yohan	291
Yude	292
Shing-rán	294

MAHTE é Gabú Danglù Laiká (The Gospel of Matthew)

*Yesuq É Byùxik Shap Kyô É Hkyô
Luk 3:23-38*

¹ Abraham é awut ashín, Dawiq é yhangzo yhangshu,* Yesuq Hkrisduq é byùxik labaù gi, a-ô mã é eq rajung za nghut lhê.

² Abraham gi, Isak lé hkû; Isak gi, Yakup lé hkû; Yakup gi, Yudaq eq yhanggu yhangmâng pé lé hku é nghut lhê; ³ Yudaq gi, Hparet eq Zera lé hkû, haù nhik é yhângnu gi, Tamar nghut ri.

Hparet gi, Hesrun lé hkû; Hesrun gi, Ram lé hkû;

⁴ Ram gi, Aminada lé hkû; Aminada gi, Nashon lé hkû;

Nashon gi, Salamun lé hkû; ⁵ Salamun gi, Buaq lé hkû;

Buaq é yhângnu gi, Rahap nghut ri. Buaq gi, Obet lé hkû;

Obet é yhângnu gi, Ruhtaq nghut ri. Obet gi, Yese lé hkû;

⁶ Yese gi, Hkohkâm Dawiq lé hkû; Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

⁷ Sholumon gi, Rehoboam lé hkû; Rehoboam gi, Abiyaq lé hkû;

Abiyaq gi, Asa lé hkû; ⁸ Asa gi, Yehoshaphat lé hkû;

Yehoshaphat gi, Yoram lé hkû; Yoram gi, Uzi-aq lé hkû;

⁹ Uzi-aq gi, Yohtam lé hkû; Yohtam gi, Ahaza lé hkû;

Ahaza gi, Hezekiaq lé hkû; ¹⁰ Hezekiaq gi, Manase lé hkû;

Manase gi, Amon lé hkû; Amon gi, Yosiaq lé hkû;

¹¹ Yosiaq gi, Babelon má shúm dut huí é hkûn, Yehkoniaq eq yhanggu yhangmâng pé lé hku é nghut ri.

¹² Babelon má shúm dut huí é htâng má, Yehkoniaq gi, Shalahtila lé hkû;

Shalahtila gi, Zerubabelaq lé hkû; ¹³ Zerubabelaq gi, Abiut lé hkû;

Abiut gi, Eliakim lé hkû; Eliakim gi, Azor lé hkû;

¹⁴ Azor gi, Zaduk lé hkû; Zaduk gi, Ahkim lé hkû;

Ahkim gi, Eliut lé hkû; ¹⁵ Eliut gi, Eliaza lé hkû;

Eliaza gi, Mahtan lé hkû; Mahtan gi, Yakup lé hkû;

¹⁶ Yakup gi, Mariq é yhanglâng Yosep lé hku é nghut ri;

Mariq gi, Hkrisduq gâ é Yesuq lé hku é sù nghut ri.

¹⁷ Haù mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

*Yesuq Hku Lé Lo É Hkyô
Luk 2:1-7*

¹⁸ Yesuq Hkrisduq hku lé lo é hkyô gi, a-ô mã é eq rajung za nghut ri: Yesuq é yhângnu Mariq gi, Yosep eq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogúng dut bê nghut ri. ¹⁹ Yhâng é yhumsing hpó Yosep gi, dingmán sù nghut luí, yhang lé byu pé hí má hoq a kâm lhoq hpu nau é yanmai, tsik za lhoq kâng pyám rà dà ri.

²⁰ Nghut kôlhang, yhang haù su myit nyi é hkûn, yhupmoq má, haù Yhumsing é mau-mang lagyo gi, yhang lé, lé htoq shit luí, "Dawiq é yhangzo yhangshu Yosep é, haù náng é yhumsing myhí Mariq lé hâng yù rà hkyô lé, hkâ-myt chiq; haí mù gâ le, yhang wun tô é zoshâng gúng gi, Chyoiyúng Woi-nyí dông lo é nghut lhê. ²¹ Yhang gi, yuqzo rayuq hkû rà nghut luí, nàng gi, zoshâng haù lé, Yesuq nghú mying myhíng byi ra rà nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù rà sù nghut lhê." ga tai ri.

²² Shí hkyô banshoq gi, Garai Gasâng èq, haù myightoi dông tai é dang lé lhoq dik é nghut ri. ²³ Myightoi dang haù gi, "Haù zomyi gyíng gi, zogúng dut luí, yuqzo rayuq hkû rà nghut lhê; Yhâng é mying lé gi, Emanuelaq ga kó rà nghut lhê." gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

²⁴ Yosep gi, yhup bún lo é hkûn, haù Yhumsing é maumang lagyo tai é eq rajung za, Mariq lé, yhangmyi dông yhúm má shuí yù bê nghut ri. ²⁵ Nghut kôlhang, yhang gi, yuqzo haù hku é hkûn jé shoq, Mariq eq gungsho a zùm nghut ri. Yuqzo haù lé, yhang gi, Yesuq ga myhíng byí ri.

2

Buihtoq Hkyam Mã É Hpaqchyí Bò Bang

¹ Herut hkohkâm up nyi é u lé, Yuda mau mã é Betlehem wà mã Yesuq lé hku é nghut ri. Hau htâng, buihtoq hkyam mã é hpaqchyí bò bang gi, Yerusalem wà mó mã jé lé kômù, ² "Haù hku lé lô bê Yudaq byu pé

* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tò lhê. † **1:17** Grik dong Hkrisduq gâ é gi, xù but huí Sù gâ é lichyúm nghut mù, Hebre dong Mesaia gâ é eq rajung za nghut lhê. ✨ **1:23** Esai 7:14

é Hkohkâm gi, hkâmá nghut lhê lúh? Yhâng é kyí lé, buihtoq hkyam má ngamoq myàng luí, Yhang lé noq rá matú jé lé é nghut lhê." ga luí, myí akô nghut ri.

³ Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wá mó má é lhunglhang bang le, myit myô bum akô nghut ri. ⁴ Haú mù luí, yhang gi, byu pé é hkyangjong agyi pé eq tará sará pé banshoq lé, jì tsing yù mù, haú Hkrisduq hkâmá hku lé lò rá nghut é hkyô lé myí ri. ⁵ Haú hkûn, yhangmoq gi, "Yuda mau Betlehem wá má nghut lhê. Hkâsu mù gâ le, shí hkyô eq séng luí, haú myiqhtoi kâ tó é má,

⁶ Yudaq mau má é Betlehem wá ê, nàng gi, Yudaq mau má é wá pé má, je tiq sú a nghut;

hkâsu mù gâ le, ngá é Israelaq byu pé lé upzúng rá Zau gi, náng chyáng mai htoq lò rá nghut lhê."^{*}

ga bo tô ri." ga tù taí akô.

⁷ Hau htâng, Herut gi, haú hpaqchyí bò bang lé haq jì yù mù, kyí lé htoq shit é ahkyíng lé, yhangmoq chyáng mai hkyak wó myí sé yù bê nghut ri. ⁸ Haú mù, yhang gi, "Nungmoq, zoshâng haú lé rago é ho wú keq. Ngò le, Yhang lé é wó noq rá matú, Yhang lé nungmoq é myàng eq yhang, ngo lé lo shit kyo keq." ga taí luí, haú bang lé Betlehem wá shut nhang kat bê nghut ri.

⁹ Yhangmoq gi, haú hkohkam é dang lé gyô yu é htâng má, htoq e ló bekô nghut ri. Haú buihtoq hkyam má yhangmoq myang é kyí gi, haú zonú nyi é ahtoq ang ang má ló nô é jé shoq, yhangmoq é hí má e ló byí ri. ¹⁰ Yhangmoq gi, kyí haú lé myàng jáng, gyai yhang gabú bum akô nghut ri. ¹¹ Yhangmoq gi, haú yhûm má wang e ló kô é hkûn, zonú eq yhângnu Mariq lé myàng kómù, hkyih-put htuq luí, haú zonú lé noqkuq akô; hau htâng, yhangmoq é sutdek pé lé le hpóng luí, hîng, namngón jung loban eq mura^{*} pé lé yù mù, Yhang lé chyunguq byí akô nghut ri. ¹² Yhangmoq gi, Herut chyáng a dum taú ló rá matú, yhupmoq má, yhangmoq lé sidiq byí é huí kômù, hkyô gó hkat đông yhangmoq é mau shut taú ló bekô nghut ri.

Egutúq Míng Shut Hpang E É Hkyô

¹³ Yhangmoq ló byuq é htâng má, haú Yhumsing é maumang lagyo rayuq gi, Yosep lé yhupmoq má htoq shit mù. "Toq aq! Haú zoshâng eq yhângnu lé, Egutuq míng shut shuí hpang é aq. Ngò, nang lé dum jì yu é ahkyíng jé shoq, haú má nyi nyi keq. Haí mù gâ le, Herut gi, zoshâng haú lé sat rá matú, ho nyi bê nghut ri." ga taí ri.

¹⁴ Haú mù, yhang gi, toq luí, myín lé yhang, zôshang me lé shuí chùng mù, Egutuq míng shut e ló bê nghut ri. ¹⁵ Yhangmoq gi, Herut shí é jé shoq, haú má nyi nyi akô. Haú gi, "Ngá zo lé, ngò, Egutuq míng mai wut htoq yù bê nghut lhê."^{*} ga, haú Yhumsing eq myiqhtoi đông taí é dang lé lhoq dik é ru nghut lhê.

¹⁶ Herut gi, yhang lé, hpaqchyí bò bâng eq mhaú pyám tô é lé sé jáng, nhikmo-yo bê nghut ri; haú mù, yhang gi, haú hpaqchyí bò bâng chyáng mai wó sé yu é ahkyíng lé sôn wú mù, Betlehem wá eq hau é awui ayám má é wá pé má nyi é, í zân mai a-ô má é yuqzo pé banshoq lé, sat pyám nhang ri. ¹⁷ Haú gi,

"Ramaq gâ é jowò má, yón kuq é eq ngau garú é hté lé wó gyô ri;

Rahkelaq gi, yhang zô pé a nyi byuq lo kô é yanmai, ngau nyi é eq nhik a wó ting dut ri."^{*}

ga luí, ¹⁸ myiqhtoi Yeremiaq đông taí tô é dang lé lhoq dik é nghut ri.

Nazaret Wá Má Dum Taú Lo É Hkyô

¹⁹ Herut shí byuq é htâng, Egutuq míng má, haú Yhumsing é maumang lagyo gi, Yosep chyáng yhupmoq đông lé htoq shit mù. ²⁰ "Toq aq, haú zôshang me lé shuí chùng mù, Israelaq míng má taú ló aq; hkâsu mù gâ le, haú zoshâng lé sat naú bang shí byuq bekô nghut ri." ga taí ri.

²¹ Haú mù, Yosep gi, zôshang me lé shuí chùng mù, Israelaq míng shut taú ló bê nghut ri. ²² Nghut kôlhang, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jáng, haú má a wám ló lo nghut ri. Yhupmoq má sidiq byí é huí é eq rajung za, yhang gi, Galile mau shut e ló mù, ²³ Nazaret gâ é wá má ló nyi nyi bê nghut ri. Haú mù, "Yhang lé, Nazaret wá byú ga rá nghut lhê." ga luí, haú myiqhtoi pé đông taí tô é dang lé lhoq dik é nghut ri.

3

Wui-myhup Sará Yohan Shuí Hen É Hkyô Mrk 1:1-8; Luk 3:1-18; Yhn 1:19-28

¹ Haú yoq má, Wui-myhup Sará Yohan htoq lò mù, Yuda mau má é yoso má hko kyô é gi, ² "Myit lhing keq; hkâsu mù gâ le, mauhkúng mingdán gi, chyáng lò bê^{*} nghut ri." gâ ri. ³ Haú yuq gi,

"Haú yoso má, byú rayuq garú taí é hté gi, 'Haú Yhumsing é matú, hkyô hen to keq;

Yhâng é matú, hkyô lhoq nyhang to keq.' gâ ri."^{*}

ga myiqhtoi Esai-aq taí tô é sù yuq nghut ri.

^{*} 2:6 Mihka 5:2 ^{*} 2:11 Mura gi, chi wó kut jung xú nghut lhê. ^{*} 2:15 Hos 11:1 ^{*} 2:17 Yer 31:15 ^{*} 3:2 Mauhkúng mingdán gi, chyáng lò bê gâ é lichyúm gi, Garai up rá ahkyíng chyáng lò bê gâ é nghut lhê. ^{*} 3:3 Esai 40:3

⁴Yohan gi, gola-uq shomaú èq sai é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-í pé nghut ri. ⁵Yerusalem wà mó má é bang, Yuda mau banshoq má é bang eq Yodan làng awui mayam lhunglhang má é bang gi, yhâng chyáng htoq e bum akò. ⁶Yhangmoq gi, yhumsing é mara lé yín yú kôluí, yhâng chyáng mai Yodan làng má wui-myhup hkâm yu bum akò nghut ri.

⁷Nghut kôlhang, yhang gi, yhang wui-myhup hkâm byí é jang má, Hparishe pé eq Saduke pé myo myo lé lo nyí kô é lé myàng jáng, yhangmoq lé tai é gi, "Duq htân lhangmuí amyú pé ê, jé lô rà yubak dam mai wó hpang lut kó sháng gaq ga, nungmoq lé ó yuq tai pún é lúh?" ⁸Myit lhing hkyô eq gingdán é ashi pé zui keq. ⁹'Ngamoq gi, Abraham é yhangzo yhangshú pé nghut lhê.' nghú luí, yhumsing é i-myt unghkaú má hkâlum to kó. Hkâsu mù gà le, ngò, nungmoq lé tai kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. ¹⁰Ahkuí lhâng, Garai Gasang gi, Yhâng é wazung lé hau síkgám wang pé má tô to bê nghut ri; hau mù, ge é ashi a zui é agàm hkangmó lé gi, htuq lhêng pyám mù, myi má dú kat pyám rà nghut lhê.

¹¹Ngò gi, nungmoq myit lhing kó sháng gaq nghú, wui eq za wui-myhup hkâm byí lhê. Nghut kôlhang, ngá htoq má wum-o a-tsam je bo é sù rayuq, ngá htàng má jé lé lô shirâ nghut luí, ngò gi, Yhâng é hkyí-tsung chùng byi rà lhâng a gingdán; Yhang gi, Chyoiyung Woi-nyí má le, myi má le, nungmoq lé wui-myhup hkâm byi rà nghut lhê. ¹²Yhang gi, loq má byò chung to mù, guq chyârâng má é guq bùm lé hik sân pyám luí, já é guq cham lé gi, guqchyí má tsing kat to mù, guqsôm lé kúm gi, hkâ-nhám le shí byuq a sê é myí èq nyhê hkyô pyám rà nghut lhê." ga ri.

Yesuq, Wui-myhup Hkâm Yu É Hkyô
Mrk 1:9-11; Luk 3:21-22

¹³Hau hkûn, Yesuq gi, Yohan chyáng wui-myhup hkâm yù rà ga, Galile mau mai Yodan làng má jé lé lo ri. ¹⁴Nghut kôlhang, Yohan gi, "Ngò sheq Náng chyáng wui-myhup hkâm yù rà sù ru nghut lhê nhing! Náng sheq ngá chyáng lé lo lhê lúh?" ga luí, lhom tai hkûm ri.

¹⁵Hau hkûn, Yesuq gi, "Dingmán hkyô banshoq lé, nga-nhúng lhoq dik rá é yanmai, Ngo lé wui-myhup hkâm byi laq." ga tú tai ri. Hau mù, Yohan le, gyo byi bê nghut ri.

¹⁶Yesuq gi, wui-myhup hkâm yù eq yhang, wui mai htoq lo ri. Hau hkûn, mauhkung bóng lô mù, Garai Gasang é Woi-nyí gi, hpungkyui gunghyáng sù é dông mai,

Yhâng ahtoq má lé gyó nô tô é lé, Yhang myang kat ri. ¹⁷Hau hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkung mai danghtê htoq lo ri.

4

Yesuq, Gunglau Hui É Hkyô
Mrk 1:12-13; Luk 4:1-13

¹Hau htàng má, Chyoiyung Woi-nyí gi, Yesuq lé, nat Tsadán eq gunglau é hui nhâng rà matú, yoso shut shuí é ri. ²Yesuq gi, zoshuq gám é myi xê nyí myi xê myin jé jáng, zòmput hui bê nghut ri. ³Hau hkûn, gunglau sù gi, Yhâng chyáng lé mù, "Náng, Garai Gasang é Yhangzo nghut le gi, luqgok shí pé lé muk dut nhâng aq." ga tai ri.

⁴Hau jáng, Yesuq gi, "Byù gi, muk eq za asak dù rà a nghut; Garai Gasang é nhut mai htoq lo é mungdang hkangmó eq sheq asak dù rà nghut lhê." ga luí, Chyúmdang má kâ tô ri." ga yhang lé tú tai ri.

⁵Hau hkûn, nat Tsadán gi, Yesuq lé, chyoiyung myuq* má shuí é mù, noqkuq yhum je myhang é shúhtàng htoq má yap nhang to luí, ⁶"Náng, Garai Gasang é Yhangzo nghut le gi, byam gyó kat wú aq. Hkâsu mù gà le, 'Náng é matú, Garai Gasang gi, Yhâng é mau-mang lagyô pé lé tai to rà nghut mù, luqgok má Náng é hkyí a ló htung shoq, yhangmoq é loq eq Nang lé lhom bún yú kó rà nghut lhê." ga luí, Chyúmdang má kâ tô ri." ga tai ri.

⁷Nghut kôlhang, Yesuq gi, "Hau Yhumsing, nungmoq é Garai Gasang lé, wó chyam wú rà a nghut." ga luí le, Chyúmdang má kâ tô ri." ga, yhang lé tú tai ri.

⁸Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq hau pé é hkikhkâm hkyô lé tún shit ri. ⁹Hau htàng, yhang gi, "Náng hkyihput htuq mù, ngo lé noq é nghut jáng, shí pé banshoq, Nang lé ngò byi rà." ga, Yesuq lé tai ri.

¹⁰Hau hkûn, Yesuq gi, "Tsadán nang, ló byuq aq! Hkâsu mù gà le, 'Hau Yhumsing náng é Garai Gasang lé za, nang noqkuq dojaú ra rà nghut lhê." ga luí, Chyúmdang má kâ tô ri." ga, yhang lé tai ri.

¹¹Hau mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akò nghut ri.

Yesuq Mungdang Hko Hi Lô É Hkyô
Mrk 1:14-15; Luk 4:14-15

¹²Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum tau ló bê nghut ri. ¹³Yhang gi, Nazaret wà mai htoq ló mù, Zebulun eq Nahtali mau

* 4:4 Tarâ Pun 8:3 * 4:5 chyoiyung myuq gi, Yerusalem lé gà lhê. * 4:6 Hkya-on 91:11-12 * 4:7 Tarâ Pun 6:16 * 4:10 Tarâ Pun 6:13

mâ é nhông yàm má joq é Kaperna-um wà má ló nyi nyi ri. ¹⁴ Haú gi, myiqhtoi Esai-aq laiká má,

¹⁵ "Zebulun mau eq Nahtali mau, wuimau mâ é hkyô, Yodan làng yàm, tungbaù pé nyi é Galile mau é,

¹⁶ mauchut hkaù má nyi nyi é bang, maubó mó lé myàng bê nghut ri;

shí wup hkaù má nyi to bâng é matú, maubó lô bê nghut ri."^{*}

ga kâ tô é dang lé lhoq dik râ matú nghut ri.

¹⁷ Haú hkùn mai, Yesuq gi, "Myit lhing keq! Mauhkúng mingdán gi, chyàng lò bê nghut ri." ga, mungdang hko hi e ló bê nghut ri.

Yesuq É Chángzo Hí Dut Bang

¹⁸ Yesuq gi, Galile nhông yàm má hkyô sô wún é hkùn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dú nyi akô nghut ri. ¹⁹ Haú mù, Yhang gi, haú nhiktâng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga tai ri. ²⁰ Haú hkùn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

²¹ Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhangwa Zebedi eq rahá, lhai hkaù má gùn hpo nyi akô. Yhangnhik lé, Yesuq wut kat jáng, ²² yhangnhik gi, radá dâm, yhangnhik é yhangwa eq lhai haú lé, tô pyâm to kôluí Yesuq htâng cháng bekô nghut ri.

Nò Bang Lé, Yesuq Lhoq Gê Byí É Hkyô Luk 6:17-19

²³ Yesuq gi, Galile mau ramau gón má htoq ê mù, tarajong pé má, mhoqshit luí, mauhkúng mingdán eq sêng é gabú danglù lé, hko kyo uchyang, byu pé chyáng má é nôhpyo ajung jung hui bang eq noli nojàng amyú myú dap bang lé, lhoq gê byí wún ri. ²⁴ Yesuq eq sêng é hkyô ludang gi, Suriq ramau gón má byo myin ló mù, byu pé gi, awáng nôhpyo ajung jung huí é bang, hké-nhó jamjaù nyi é bang, nat gang wang jùng é bang, mhúngtuq tuq é bang, gúngium shi é bang lé, shuí lé lô kôluí, Yhang gi, haú bang lé lhoq gê byí ri. ²⁵ Galile mau, Dekapoli,[†] Yerusalem, Yuda mau eq, Yodan làng tú tap má é byù moq mó gi, Yesuq htâng châng bum akô nghut ri.

5

Hkungsô Wó É Tará Luk 6:20-23

¹ Yesuq gi, byù moq mó lé myàng jáng, bùm má doq ló luí, ló zung tô ri. Haú hkùn, Yhâng é chángzô pé gi, Yhâng chyáng lé lô kôjáng,

² Yhang nhut hkum hpóng luí, yhangmoq lé mhoqshit é gi;

³ "Woi-nyí má, asho awui dut é bang gi, hkungsô wó nyi ri; hkâsu mù gà le, mauhkúng mingdán gi, yhangmoq é mingdán nghut nyi ri.

⁴ Myit iyon huí é bang gi, hkungsô wó nyi ri; hkâsu mù gà le, yhangmoq gi, nhik lhoq tng é hui kó râ nghut lhê.

⁵ I-myit nú-nhâm é bang gi, hkungsô wó nyi ri; hkâsu mù gà le, yhangmoq gi, mingkan lé wó sng kó râ nghut lhê.

⁶ Dingmán hkyô lé mut shit nyi é bang gi, hkungsô wó nyi ri; hkâsu mù gà le, yhangmoq gi, nhik dik shoq myàng zo kó râ nghut lhê.

⁷ Shogyo nhikmyin myit bo é bang gi, hkungsô wó nyi ri; hkâsu mù gà le, yhangmoq gi, shogyo nhikmyin yu é hui kó râ nghut lhê.

⁸ Myit sansêng é bang gi, hkungsô wó nyi ri; hkâsu mù gà le, yhangmoq gi, Garai Gasang lé myàng kó râ nghut lhê.

⁹ Nguingón hkyô sô xoq byí é bang gi, hkungsô wó nyi ri; hkâsu mù gà le, yhangmoq gi, Garai Gasâng é yhangzô pé gà é hui kó râ nghut lhê.

¹⁰ Dingmán hkyo é yanmai zing-ri huí é bang gi, hkungsô wó nyi ri; hkâsu mù gà le, mauhkúng mingdán gi, yhangmoq é nghut nyi ri.

¹¹ Ngá é yanmai, byu pé eq, nungmoq lé rhoi é, zing-rí é, a teng a mán é dong agé ashop é dang amyú myú tai tso kô é hkùn, nungmoq hkungsô wó nyi ri. ¹² Nguingón gabú nyí keq, hkâsu mù gà le, nungmoq é matú kô é chyunghuq gi, mauhkúng mingdán má joq tô ri. Nungmoq é hí lhê é myiqhtoi pé lé le, yhangmoq gi, háu dong zing-rí lai lo wú bekô nghut ri.

Xo Eq Maubó

Mrk 9:50; Luk 14:34-35

¹³ Nungmoq gi, myidám htoq mâ é xo nghut nyi lhê. Nghut kôlhang, xo gi, mán kân byuq jáng, haú lé hai eq dum wó lhoq ngam yú râ lú? Shinggan shut dú pyâm mù, byu pé eq nâng pyeq pyâm é mai lai luí, hai akyú le bò râ a nghut lo.

¹⁴ Nungmoq gi, mingkân é maubó nghut akô; bùm htoq mâ é myuq lé gi, wó nghop to râ a nghut. ¹⁵ Myibung lé tap mù, mung eq nghop tô é ó a kut wú kó; haú su kut râ malaí, yhúm hkaù má lúng tô é bang yuq hkangmó myoq wó myàng râ matú, tsungjang má kúm tsung to râ nghut lhê. ¹⁶ Haú eq rajung za, byu pé gi, nungmoq é ge é muzô pé lé byu-myàng luí, mauhkúng htoq mâ é nungmoq

^{*} 4:16 Esai 9:1-2 [†] 4:25 Dekapoli gâ é gi, Grik dong myuq raxê lé gà lhê.

é Íwa lé hkya-on kó sháng gaq, nungmoq é maubó lé yhangmoq é hí má duq nhang to keq.

Tarâ Lhoq Dik É Hkyô

¹⁷ Ngò gi, myiqhtoi pé é dang eq jep é tarâ lé lhoq hpyoq pyám rà matú, jé lé é nghut nhò hkâ-ngâm kó; hau pé lé lhoq dik rà matú sheq jé lé é ru nghut lhê. ¹⁸ Ngò, nungmoq lé teng za tái kôlé, mauhkúng eq myigúng byuq byuq le lhang, hau pé a ban lhoq dik dik gi, jep é tarâ má é tiq dik é dangjí eq myihkyet zo ralhuh lhang byuq byuq rà a nghut. ¹⁹ Jep é tarâ shí pé má é tiq dik é dang rahkun lé lu lai luí, góbang lé le, hau su kut rà matú mhoq byi é sù ó yuq nghut kôle, mauhkúng mingdán má tiq dik sù gâ é hui rà nghut lhê; nghut kôlháng, jep é tarâ shí pé lé châng kut luí, mhoq byi sù kúm gi, mauhkúng mingdán má, hkik sù gâ é hui rà nghut lhê. ²⁰ Ngò, nungmoq lé tái kôlé, nungmoq dingmán é hkyô má, hau Hparishe pé eq tarâ sará pé dingmán é htoq je a gyaú le gi, mauhkúng mingdán má, nungmoq wó wáng kó rà a nghut.

Byù Hkâsat

²¹ Byù hkâsat, sat é sù gi, jéyáng é hui rà nghut lhê' ga, hí hpyang lhê é bang lé tái tô é dang, nungmoq wó gyô wú bê nghut lhê. ²² Nghut kôlháng, Ngò, nungmoq lé tái kôlé, gumang rayuq yuq lé nhikjum yô é sù gi, jéyáng é hui rà nghut lhê. Hau htoq agó, gumang hpó lé, 'Byù gang*' ga tái é sù gi, Yudaq byin tú wapdoq má jéyáng é hui rà nghut lhê; 'Byù bam é' ga wut é sù gi, ngaraí myi eq gingdán nyi ri.

²³ Hau mù, hkungga gyap má, nàng hkungga nhông rà dà é hkún, náng é gumang rayuq yuq, nang lé mara hun é hkyô rajung jung joq é lé, myit bún kat é nghut jáng, ²⁴ náng é hkungga lé, hau hkungga gyap hí má tô pyám to mù, náng é gumang hpó hau yuq eq hí nguóngn hkyô ló yù luí sheq, hkungga lé nhông byi aq.

²⁵ Nang lé yui tsuq sù gi, nang lé tarâ rùng má dé e ló é hkún, hkyô má ru nghut nyi ashí u lé, yhang eq nguóngn hkyô hí hân yù aq. Hau a nghut jáng, hau yuq gi, nang lé, tarâ agyi chyáng é ap pyám mù, hau tarâ agyi gi, nang lé htóng hkyô pyám rà matú, htóng suwún hpó é loq má ap pyám rà nghut lhê. ²⁶ Ngò, nang lé teng za tái lé, yuichyín hau a ban xap xap gi, htóng hau mai nàng wó htoq ló rà a nghut.

Su-myi Sulàng Lú É Hkyô Eq Séng Lúí Mhoqshit É Dang

²⁷ 'Su-myi sulàng hkâlú' gâ é dang lé, nungmoq wó gyô wú bê nghut lhê. ²⁸ Nghut

kôle, Ngò, nungmoq lé tái kôlé, myiwe rayuq lé shut nau é myit eq wú é sù gi, yhâng é myit hkaú má, myiwe hau yuq eq su-myi sulàng lú hkyô kut é sù nghut bê. ²⁹ Hau mù, náng é loqyo myoq eq, nang lé mara kut shut nhang é nghut le gi, hau lé lap choq yù mù, dù pyám aq. Hkâsu mù gâ le, náng é ragúngdu gón ngaraí ming gyó rà htoq má, náng é gungsho rajung jung za htên byuq é nghut le gi, náng é matú je ge ri. ³⁰ Hau eq rajung za, náng é loqyo loq eq, nang lé mara kut shut nhang é nghut le gi, hau lé hpyit yù mù, dù pyám aq. Hkâsu mù gâ le, náng é ragúngdu gón ngaraí ming gyó rà htoq má, náng é gungsho rajung jung za htên byuq é nghut le gi, náng é matú je ge ri.

Myi Làng Gâng É Hkyô Eq Séng Lúí Mhoqshit É Hkyô

Mht 19:9; Mrk 10:11-12; Luk 16:18

³¹ Yhumsing é yhangmyi lé kàng é sù gi, lhoq kang laiká byi rà dut lhê.^o gâ é dang joq lhê. ³² Nghut kôlháng, Ngò, nungmoq lé tái kôlé, myiwe đông mai làng shut é a nghut é za, yhumsing é yhangmyi lé kàng é sù gi, myiwe hau lé sulàng lú sù dut nhâng bê nghut ri; hau htoq agó, yhumsing yhanglàng eq gang bê myiwe lé hàng yu é sù le, su-myi lú é sù dut bê nghut ri.

Danggidiq

³³ Hau htoq agó, 'Danggidiq a zùng hkâmú; Yhumsing lé byi tô é danggidiq eq rajung za cháng aq.' ga luí, hí hpyang lhê é bang lé, tái tô é dang lé nungmoq wó gyô wú bê nghut lhê. ³⁴ Nghut kôlháng, Ngò, nungmoq lé tái kôlé, hai eq le hkâdakâm kó: mauhkúng lé lang luí le, hkâdakâm kó; hkâsu mù gâ le, hau gi, Garaí Gasáng é zùng tangkuq nghut lhê; ³⁵ myigúng lé lang luí le, hkâdakâm kó; hkâsu mù gâ le, hau gi, Garaí é hkyi nang jang nghut lhê; Yerusalem lé lang luí le, hkâdakâm kó; hkâsu mù gâ le, hau gi, Hkohkâm mó é myuq nghut lhê. ³⁶ Hau htoq agó, yhumsing é ulhúm eq le, hkâdakâm kó; hkâsu mù gâ le, xâm rahkat lé lhang hpyù shoq noq shoq, náng wó kut é a nghut. ³⁷ Náng é dang lé, 'nghut lhê' lé gi, 'nghut lhê' nghú, 'a nghut é' lé gi, 'a nghut' nghú, tái aq; hau mai lai é gi, hau agé ashop su chyáng má é nghut ri.

Lató Hpuq É Hkyô

Luk 6:29-30

³⁸ 'Myoqjí matú myoqjí xap, zui matú zui xap' gâ é dang lé, nungmoq wó gyô wú bê nghut lhê. ³⁹ Nghut kôlháng, Ngò, nungmoq lé tái kôlé, agé ashop kut é sù lé lató hkâhpuq. Náng é loqyo bowâm má pyuq byi sù lé, loqpaí hkyam le hkâm byi shi aq. ⁴⁰ Byù rayuq yuq, nang lé mara tsuq mù, náng é

☆ 5:21 Htoq Ló 20:13

* 5:22 Byù gang gâ é lé, Grik đông "Raka" gâ lhê.

☆ 5:27 Htoq Ló 20:14

☆ 5:31 Tarâ

Pun 24:1

☆ 5:38 Htoq Ló 21:24

buzo lé yu pyám byí é nghut jáng, bumó lé le, hkyut byi shí aq. ⁴¹ Byù rayuq yuq, nang lé zik mù, radéng ê nhâng jáng, yhang eq rahá í déng châng ê byi aq. ⁴² Nang lé dung sù lé, byi aq; nàng chyáng mai chyí naù sù lé le, nunghtáng hkálhik pyám.

Gyè Lé Chyitdap Rá É Hkyó
Luk 6:27-28, 32-36

⁴³ 'Náng é chyangnâm mâ é bang lé gi, chyitdap mù, náng é gyè lé gi, a jú kut aq⁴⁰ gâ é dang lé, nungmoq wó gyò wú bê nghut lhê. ⁴⁴ Nghut kôlhang, Ngô, nungmoq lé tái kôlé, nungmoq gi, mauhkúng htoq mâ é nungmoq é Íwâ é yhangzô pé wó dut kó sháng gaq, nungmoq é gye pé lé chyitdap mù, nungmoq lé zing-ri bâng é matú kyúdung byi keq; ⁴⁵ hkâsu mù gâ le, Yhang gi, agè ashop bâng é ahtoq má le, gè bâng é ahtoq má le, bui tsò byi nhâng mù, dǐngmán bâng é ahtoq má le, a dǐngmán bâng é ahtoq má le, mau wó byi nhâng Sù nghut ri. ⁴⁶ Nungmoq lé chyitdap é bang lé za chyitdap kô le gi, nungmoq é matú hai chyunghuq wó kó rá lú? Kang guq bang lhang, haù su kut lhê a nghut kó lú? ⁴⁷ Hau htoq agó, nungmoq é gumang wui lé za shi-kyám kô le gi, nungmoq kut é muzó gi, góbbàng htoq má hai wá laklai rá lú? Tungbaù pé lhang haù su kut lhê a nghut kó lú? ⁴⁸ Haù mù, mauhkúng htoq mâ é nungmoq é Íwa gumjup é su, nungmoq le gumjup nyi keq.

6

Alu Byí É Hkyó

¹ Nungmoq dǐngmán é hkyó lé, byu pé myàng sháng gaq nghú, byu pé hí má a kut shít loshoq, sidiq nyi keq. Haù su kut é nghut jáng, mauhkúng htoq má é nungmoq é Íwâ chyáng mai, chyunghuq wó yú kó rá a nghut.

² Haù mù, haù gegùn labyoq kut bang gi, byu pé eq shigyau é hui sháng gaq ga, tarajong pé hká, hkyó pé hká kut é su, nàng gi, alu byí é hkún, tut htê su hkálhoq htoq. Ngô, nungmoq lé teng za tái kôlé, haù bang gi, yhangmoq é chyunghuq lé hkúm shoq wó yú bekò nghut lhê. ³ Ra chà tò bang lé nàng alu byí é hkún, náng é loqyo loq kut é hkyó lé, loqpai loq lé lhang hkâsê nhâng. ⁴ Haù hkún, nàng alu byí é lé, ó a châng sé rá nghut lhê. Haù jáng sheq, ó a sé loshoq kut é hkyó lé myang é sù, náng é Íwa gi, nang lé chyunghuq shigyau rá nghut lhê.

Kyúdung É Hkyó
Luk 11:2-4

⁵ Nungmoq kyúdung le, gegùn labyoq kut bang su hkákut kó; hkâsu mù gâ le, yhangmoq gi, byu pé byu-myàng shoq ga, tarajong

pé eq hkyó kang pé má yap mù, kyúdung rá ô nau akò. Ngô, nungmoq lé teng za tái kôlé, haù bang gi, yhangmoq é chyunghuq lé wó yú bekò nghut ri. ⁶ Nghut kôlhang, nàng kyúdung le, náng é gok hkaù má wang ló mù, hkum myhí pyám luí, a byu-myang é náng é Íwâ chyáng dung aq. Haù jáng, ó a byu-myang é lé myàng sù, náng é Íwa gi, nang lé jeju dum tau byi rá nghut lhê. ⁷ Haù mù, kyúdung le, tungbaù pé su kut luí, dang puq hkáhtau kó; hkâsu mù gâ le, yhangmoq gi, dang hǐng chín luí dung jáng sheq, gyo byi nhò ngam akò nghut ri. ⁸ Haù bang su hkákut kó; hkâsu mù gâ le, nungmoq é Íwa gi, nungmoq rá é hkyó lé, nungmoq a dung shí mai sé tò Sù nghut lhê.

⁹ Haù mù, nungmoq kyúdung le, 'Mauhkúng htoq tsáng myhàng mâ é ngamoq é Áwa ê,

Náng é mying gi, chyoiyúng nyí sháng gaq,

¹⁰ Náng é mingdán jé ló sháng gaq,

Nàng ô nau é hkyó, mauhkúng htoq má dik é su, myigúng htoq má le dik sháng gaq ô.

¹¹ Ngamoq nyí wui rá é zoshuq lé, ngamoq lé hkú-nyí byi laq.

¹² Ngamoq lé shut é bâng é mara lé ngamoq hkyut pyám byí é su,

ngamoq é mara lé le hkyut pyám byi laq.

¹³ Ngamoq lé, agúng alaú hkyó má a wàng nhang é za,

agè ashop jang mai hkyi yú laq ô.

(Hkâsu mù gâ le, kó dik é up sǐng hkyó, a-tsam eq hpungwup shǐngkang gi, pyat dedu ahtum abyuq Náng chyáng ru joq nyi ri ô! Amen.)^{*}

ngú dung keq. ¹⁴ Supé eq, nungmoq lé kut shut é mara lé, nungmoq hkyut pyám byí é nghut le gi, mauhkúng htoq mâ é nungmoq é Íwa le, nungmoq lé mara hkyut pyám byi rá nghut lhê. ¹⁵ Nghut kôlhang, haù bâng é mara lé, nungmoq a hkyut pyám byí é nghut le gi, nungmoq é Íwa le, nungmoq é mara lé hkyut pyám byi rá a nghut.

Zoshuq Gám É Hkyó

¹⁶ Nungmoq gi, zoshuq gám é hkún, gegùn labyoq kut bang su myoqdong hkálhoq nyhui kó; hkâsu mù gâ le, haù bang gi, yhangmoq zoshuq gám é hkyó lé, tǔn shít rá matú myoqdong lhoq nyhui shít akò nghut ri. Ngô, nungmoq lé teng za tái kôlé, haù bang gi, yhangmoq é chyunghuq wó yú bekò nghut ri. ¹⁷ Nungmoq kúm gi, zoshuq gám é hkún, nungmoq zoshuq gám é hkyó lé, byu pé hí má de de a dut é za, nungmoq a byu-myang é Íwa za myàng sháng gaq, myoq chí pyám luí, u xú but keq; ¹⁸ haù jáng sheq, ó a sé loshoq kut é hkyó lé myang é Sù,

✧ 5:43 Nhong 19:18

* 6:13 Chyúmlaiká ra-am má, shí tǔm a bo é nghut lhê.

nungmoq é İwa gi, nungmoq lé chyunghuq shigyaú rá nghut lhê.

Mauhkûng Htoq Mã É Sutzè
Luk 12:33-34

¹⁹ Jàngkon, jogyik èq wó lhoq htên pyâm é eq hkaú su èq le wó wang hkaú yu pyâm byi é myigùng htoq má, nungmoq é matú, sutzè lé hkâhkong to kó. ²⁰ Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byi é mauhkûng htoq má sheq, nungmoq é matú sutzè hkong to keq. ²¹ Hkâsu mù gà le, náng é sutzè joq jang má, náng é i-mytit le jé nyi rá nghut lhê.

²² Myoqji gi, gungdú é myibung nghut nyi ri. Náng é myoqji ge é nghut le gi, náng é gungdu gôn má maubó bying mui to rá nghut lhê. ²³ Nghut kôlhang, náng é myoqji a ge é nghut le gi, náng é gungdu gôn gi, mauchut tuq dut nyi rá nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-i yhang htú rá lhâ!

²⁴ Ó yuq nghut kôle, yhumsing í yuq lé wó dojaú rá a nghut. Hkâsu mù gà le, yhang gi, rayuq lé a jú kut mù, rayuq lé gi, chyitdap rá nghut lhê; haú a nghut jáng, rayuq lé lhumzui mù, rayuq lé gi, hpau a tap kut rá nghut lhê. Nungmoq gi, Garai Gasang lé le, ngunzè lé le, radá dâm wó dojaú kó rá a nghut.

Hkâ-mytit Chiq Kó
Luk 12:22-31

²⁵ Haú mù luí, Ngó, nungmoq lé tai kôle, nungmoq é asak matú hai zo hai shuq rá eq nungmoq é gungdú matú hai wut hai tsang rá lé, hkâ-mytit chiq kó. Asak gi, zoshuq htoq má, gungdu gi, mebú htoq má, je ahkyak lhê a nghut kó lhú? ²⁶ Maulat mã é nghoqzô pé lé wú wú keq; yhangmoq gi, kyô hkyó kyô shu a kut é htoq agó, chyí pé má le hai a tsing kat to kó é nghut le lhang, mauhkûng htoq mã é nungmoq é İwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó lhú? ²⁷ Nungmoq má, ó yuq wá, myit chiq é èq, yhumsing é asak lé radúng kó wó jat yú kó rá lhú?

²⁸ Haú nghut le nhing, hai mù, mebú matú myit chiq akô lhú? Myigùng má yuq tó é htutbó ban pé hkâsu kut kó lo é lé, myit wú keq. Haú pé gi, mù le a zui, hkying le a duí kó nghut ri. ²⁹ Nghut kôlhang, Ngó, nungmoq lé tai kyo kôle, hkohkam Sholumon hpung kô dik u lé wut é mebú lhang, ban haú rabó lé a hkyit nghut ri. ³⁰ Lumjing myit tiq é bang é, hkú-nyí joq mù, napmá myihkyóm má dú kat pyâm hui rá nghut é yosó mhan pé lé za lhang, Garai Gasang haú su kut hut é nghut le gi, nungmoq lé je riyhang hut rá a

nghut kó lhú? ³¹ Haú mù, 'Hai zo rá lhí?' 'Hai shuq rá lhí?' 'Hai wut rá lhí?' nghú hkâ-mytit chiq myhing kó. ³² Tungbaú pé kúm gi, haú pé banshoq lé cháng hkak ho nyi akó; nghut kôlhang, mauhkûng htoq mã é nungmoq é İwa gi, haú pé lé nungmoq rá é hkyó, sé byi nyi lhê. ³³ Nghut kôlhang, Yhâng é mingdán eq dingmán hkyô lé hí hô keq, haú jáng, haú pé banshoq, nungmoq lé puq byi rá nghut lhê. ³⁴ Haú mù, napmá lhê é matú hkâ-mytit chiq kó; hkâsu mù gà le, napmá gi, yhang é yhang myit chiq rá nghut lhê. Hkú-nyí é wuihke hkyó gi, hkú-nyí é matú gé bê nghut ri.

7

A Jéyang Râ Hkyô
Luk 6:37-38, 41-42

¹ Nungmoq jéyang é a hui kó sháng gaq, ó lé le, hkâjéyang kó. ² Hkâsu mù gà le, nungmoq jéyang é su, nungmoq le, jéyang é hui kó rá nghut é htoq agó, nungmoq lik byi é bung èq, nungmoq lé dum lik byi rá nghut lhê.

³ Yhumsing myoq hkaú má lúng tó é siktúm lé lhang a myit wú é nhing, hai mù luí, nunggu nungmâng é myoqwàng lé myang lhê lhú? ⁴ Yhumsing é myoq má siktúm lhung to lui nhing, 'Náng myoq má lúng tó é myoqwàng lé, ngó choq pyâm byi lé.' nghú luí, náng é gumang hpó lé hkâsu wó tai rá lhú? ⁵ Gegun labyoq kut sú è, náng é myoq má lúng tó é siktúm lé hí choq pyâm aq. Haú jáng sheq, nunggu nungmâng é myoq má wang tó é myoqwàng choq pyâm byi rá matú, nang san za myàng rá nghut lhê.

⁶ Hkui pé lé, yunglô é zé hkâbyi kó; waq pé hí má, nungmoq é palhé wuizo lé hkâdu byi kó. Haú su kut jáng, haú bang gi, zé haú pé lé nâng pyeq pyâm mù, nungmoq lé dum tau ngat lò rá nghut lhê.

Dung Keq, Hô Keq, Hkum Má Kok Keq
Luk 11:9-13

⁷ Dung keq, haú jáng, nungmoq lé byi rá nghut lhê; hô keq, haú jáng, nungmoq myàng kó rá nghut lhê; hkum má kok keq, haú jáng, nungmoq lé hpóng byi rá nghut lhê. ⁸ Hkâsu mù gà le, ó yuq nghut kôle, dung sú wó rá; hô sú myàng rá; hkum kok sú lé gi, hpóng byi rá nghut lhê.

⁹ Nungmoq má, ó yuq wá, yhumsing yhangzo muk dúng le, luqgok byi kó rá lhú? ¹⁰ Ngozo dúng le, lhangmui* byi kó rá lhú? ¹¹ Agé ashop é bang nungmoq lhang gi, nungmoq é zo wui lé, ge é chyunghuq dat byi kô le nhing, mauhkûng htoq tsáng myhâng mã é nungmoq é İwa gi, Yhang lé dúng é bang lé, je riyhang ge é chyunghuq byi rá nghut lhê! ¹² Haú mù, hai hkyô má

* **7:10** Garai Gasang gi, lhangmui a zo rá matú, Yudaq byu pé lé hkunmó hkyó tó é nghut lhê.

nghut kôlhang, nungmoq gi, yhumsing ô nau é dông supé lé kut nhâng nau é su, yhangmoq lé le kut byi keq. Haí mù gà le, haú gi, jep é tará eq myiqhtoi pè é dang lo jup tô é nghut ri.

*Chyap É Hkúmdong Eq Lam É Hkúmdong
Luk 13:24*

¹³ Chyap é hkúmdong mai wàng keq. Hkâsu mù gà le, lam é hkúmdong eq hkyô mó gi, htên byoq hkyô shut shuí e é nghut mù luí, haú dông wàng bang gi, myô akô nghut ri. ¹⁴ Chyap é hkúmdong eq hkyô wó kúm gi, asak hkyô shut shuí e é nghut mù luí, haú lé myang ho é bang gi, shaú akô nghut ri.

*Agàm Eq Ashi
Luk 6:43-45*

¹⁵ Nungmoq chyáng jé lé lo é myiqhtoi pyoq pé lé, sidiq nyi keq; yhangmoq gi, saukwut wut mù, nungmoq chyáng jé lé kôlhang, myaq zo myaq shuq nau é wamhkuí pé nghut akô. ¹⁶ Yhangmoq é muzó jizó lé wú mù, nungmoq gi, yhangmoq lé wú sé kó rá nghut lhê. Zubypar mai tsibiyiq shi, zugâm mai maihpáng-shi wó yu wú akô lúh? ¹⁷ Ge é agàm gi, ge é ashí zui mù, a ge é agàm gi, a ge é ashí za dat zui ri. ¹⁸ Ge é agàm gi, a ge é ashí a wó zui, a ge é agàm le, ge é ashí a wó zui nghut ri. ¹⁹ Ge é ashí a zui é shigâm hkangmó lé gi, htuq pyám mù, myi má dú kat pyám rá nghut lhê. ²⁰ Haú mù, yhangmoq é muzó jizó lé wú mù, nungmoq gi, yhangmoq lé wú sé kó rá nghut lhê.

²¹ Ngo lé, 'Yhumsing ê, Yhumsing ê,' ga, wut é bang yuq hkangmó gi, mauhkung mingdán má myang wàng kó rá a nghut; haú mauhkung htoq má é Ngá Wa ô nau é dông kut sù za sheq, myang wàng rá nghut lhê. ²² Haú buinyi má, byu myo myo gi, 'Yhumsing ê, Yhumsing ê, Náng é mying mai, ngamoq gi, myiqhtoi le htoi bé; nat gang lé hkat htoq bé; laklaí kumlhá ajung jung lé, kut bé a nghut lúh?' ga luí, Ngo lé myi kó rá nghut lhê. ²³ Haú hkûn, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.' nghú, yhangmoq lé san za tú tai kat rá nghut lhê.

*Hpaqchyi Bò Sù Eq Ngok Sù
Luk 6:47-49*

²⁴ Haú mù, Ngá é dang shí pé lé wó gyô yù luí, châng kut é sù gi, hpaqchyi bò mù, lunghtân htoq má, yhúm sai é sù eq wuí nyi ri. ²⁵ Mau wô, wuí je, laidun lò mù, yhúm haú lé lo htung kôlhang, yhúm haú gi, a htên byoq byuq rá nghut lhê; hkâsu mù gà le, yhúm haú gi, lunghtân htoq má tsuq tô é yanmai nghut ri. ²⁶ Nghut kôlhang, Ngá é dang lé, wó gyô yù mù, a châng sù gi, semu-jàng má, yhúm sai é byu ngok eq wuí nyi rá nghut lhê. ²⁷ Mau wô, wuí je, laidun wô

yup dut lò mù, yhúm haú lé lo htung jáng, yù wuí a mù loshoq htên byoq byuq rá nghut lhê." gà ri.

²⁸ Yesuq mungdang ban tai é hkûn, shiwa byu pé gi, Yhang mhoqshit é hkyô lé maúhong bum akô; ²⁹ hkâsu mù gà le, Yhang gi, yhangmoq é tará sará pé eq a pung é za, ahkáng ayá wó sù rayuq su, mhoqshit é yanmai nghut ri.

8

*Manggâm Dap É Byù Rayuq
Mrk 1:40-45; Luk 5:12-16*

¹ Yesuq gi, bùm htoq mai gyô lo é hkûn, byù moq mó gi, Yhâng htâng châng bum akô nghut ri. ² Haú hkûn, manggâm dap é byù rayuq gi, Yhâng é hí má, lé mù, hkyihput htuq luí, 'Yhumsing ê, Nàng dóng é nghut le gi, ngo lé Nàng wó lhoq sân-yúng byi rá nghut lhê.' ga tai ri.

³ Yesuq gi, loq lhám kat mù, haú yuq lé é záng luí, 'Ngò dóng lhê, sân-yúng aq hkoi.' ga tai kat ri. Haú hkûn jáng, haú yuq é manggâm gi, ge byuq bê nghut ri. ⁴ Haú hkûn, Yesuq gi, 'Nàng, shí hkyô ó lé le hkâtai kyo. Nghut kôlhang, náng é gungdu lé, hkyangjong hpô chyáng ló tún shit mù, yhangmoq é matú saksé dut sháng gaq, Mosheq tai tô é eq rajung za, hkungga ló nhông byi aq.' ga haú yuq lé tai kat ri.

*Gyezau Hpô É Lumjing Myit
Luk 7:1-10; Yhn 4:43-54*

⁵ Yesuq, Kaperna-um wá má wang e ló le, Romaq gyezau hpô rayuq gi, Yhâng chyáng lé jé mù, ⁶ 'Yhumsing ê, ngá é dui-nhâng zoshâng gi, gungjum shi é htoq agó, yhúm má gyai no jamjaú leq tô ri.' ga garúm lé dung ri.

⁷ Haú hkûn, Yesuq gi, yhang lé, 'Ngò, lé lhoq gè byi rá.' ga tai kat ri.

⁸ Gyezau hpô haú, Yhang lé dum tú tai é gi, 'Yhumsing ê, Nàng, ngá é laishin-htâng má, lé nang rá lháng ngò má a gingdán. Nàng, dang rahkun za tai kat laq; haú hkûn, ngá é dui-nhâng zoshâng ge ló rá nghut lhê. ⁹ Hkâsu mù gà le, ngo le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê; rayuq lé, 'È aq!' nghu le, yhang é ló lhê; góyuq lé, 'Lò aq!' nghu le, yhang lo lhê; ngá jún lé le, 'Shí kut aq!' nghu le, yhang kut lhê.' gà ri.

¹⁰ Yesuq gi, dang haú lé wó gyô jáng, maú byuq luí, Yhâng htâng châng bang lé, 'Ngò, nungmoq lé teng za tai kôlê, Israelaq amyú má lháng, shí í lumjing é sù lé, Ngò, rayuq lé le a myàng wú é nghut lhê. ¹¹ Ngò, nungmoq lé tai kôlê, buihtoq buiwàng hkyam má é byu pé myo myo gi, mauhkung mingdán má, Abraham, Isak, Yakup pé eq rahá, zoshuq poí mó má myang zùng kó rá nghut lhê. ¹² Nghut kôlhang, mingdán haú má wàng âng é bang kúm gi, shinggan mauchut hkaú shut

dú pyâm é hui luí, hau jowò má ngaubyi ngaú nhap eq zui kyik kyik shoq hpuzò nyi bùm bekò rá nghut lhê." ga tai ri.

¹³ Hau htâng, Yesuq gi, gyezau lé, "Ló aq hkoí! Nàng lumjǐng é eq rajung za, dut rá nghut lhê." ga tai ri. Háu-u má yhang, hau dui-nhâng zoshâng gi, ge byuq bê nghut ri.

Byù Myo Myo Lé Lhoq Gê Byì É Hkyô
Mrk 1:29-34; Luk 4:38-41

¹⁴ Yesuq gi, Petruq é yhùm má jé wang e é hkùn, Petruq é yhâng-aumò gyai yhang no leq tò é lé, é myang ri. ¹⁵ Yesuq gi, yhâng é loq má é záng kat é hkùn, Petruq yhâng-aumò gi, nòhpyo ge byuq mù, toq luí, Yhang lé wó gai tso gai huq bê nghut ri.

¹⁶ Myinhâng mauchut lò jáng, nat gang wang júng nyi é bang myo myo lé, Yhâng chyáng shuí lé lo akò. Yhang gi, agè ashop é nat gâng pé lé dang èq hkat htoq pyám mù, nòhpyo huí é bang banshoq lé lhoq gé byì ri. ¹⁷ Háu gi,

"Yhang gi, nga-nhùng é noli nojàng lé yu pyám byi mù, nga-nhùng é noli nojàng lé, wùn waq pyám byi bê nghut ri."¹⁸ ga, myightoi Esai-aq tai tò é dang lhoq dik rá matú nghut ri.

Yesuq Htâng Cháng Râ Bang
Luk 9:57-62

¹⁸ Yesuq gi, Yhâng é lhìngkhyuq má byù moq mó zup míng nyi é lé myàng jáng, Yhâng é chángzò pé lé, nhông hé hpoq shut gù dap é sháng gà ri. ¹⁹ Háu hkùn, tará sará rayuq gi, lé lò mù, "Sará è, ngò gi, Nàng hká e le hká cháng rá nghut lhê." ga Yhang lé lé tai ri.

²⁰ Háu jáng, Yesuq gi, "Wamhkuí pé gi, hkyúng wó akò; nghoq pé le, nghoqsut wó akò. Nghut kòlhang, hau Byu Yhangzo gi, u nghe jowò lhang a wó nghut ri." ga lhom tai kat ri.

²¹ Háu hkùn, chángzo rayuq gi, "Yhumsing é, ngá wa lé lò yhùm pyám rá ahkáng hí byì shílaq." ga tai kat ri.

²² Nghut kòlhang, Yesuq gi, "Shí bê bang gi, shí bê bang yhangchang yhùm lhum kó sháng gaq, nàng gi, Ngá htâng cháng aq." ga dum tau tai ri.

Laidun Lhoq Zim É Hkyô
Mrk 4:35-41; Luk 8:22-25

²³ Hau htâng, Yesuq lhai hkaú má wàng mù, Yhâng é chángzò pé le, Yhâng htâng châng wàng bekò nghut ri. ²⁴ Háu hkùn, nhông má byodan-htik laidun mó lò mù, wuilhêng pé gi, lhai má bat ùm lò bê nghut ri. Nghut kòlhang, Yesuq gi, yhup myhì tò ri. ²⁵ Chángzò pé gi, Yhâng chyáng jé é mù, Yhang lé nhau pun luí, "Yhumsing é, hkyi yù laq ô! Nga-nhùng myup lò nyi ri." ga tai akò.

²⁶ Yhang gi, "Lumjǐng myit shaú é bang è! Háu mù, hau-í gyuq bum akò lhu?" ga tai

kat ri. Hau htâng, Yhang gi, toq luí, laidun eq wuilhêng pé lé tân kat jáng, banshoq zím byuq bê nghut ri.

²⁷ Byù hau bang gi, maúhong byuq kômù, "Shí yuq gi, hkasù é byù lha? Lai eq wuilhêng pé lhang gi, Yhâng é dang lé gyoi byì ri myhì-nhung!" ga luí, rayuq eq rayuq myí lhum bum akò nghut ri.

Nat Wang Júng Su Nhik Lé, Lhoq Gê Byì É Hkyô

Mrk 5:1-20; Luk 8:26-39

²⁸ Yesuq gi, Gadara byu pé é mau hpoq má jé dap lò jáng, nat gang wang júng é byù í yuq gi, lupdùng mai htoq lé lo kômù, Yhang lé lé huí akò. Háu nhik gi, hau hkyô mai ó lhang a wám lai loshoq wuí é su nhik nghut akò.

²⁹ Yhangnhik gi, Yesuq lé, "Garaí Yhangzo é, Nàng, ngamoq eq hai sêng lhê lhu? Ahkyíng a jé shimá, ngamoq lé zing-ri rá matú jé lé lo é nghut lhê lhu?" ga tai garú akò.

³⁰ Háu mai a lùm wé é jowò má, waq rajùm mó gi, myí dù but zò nyi bum akò nghut ri. ³¹ Nat gâng pé gi, Yesuq lé, "Nàng, ngamoq lé hkat htoq rá nghut jáng, hé waq pé chyáng wàng nhâng laq." ga dùng akò.

³² Yesuq gi, "Htoq lò keq!" ga tai kat ri. Háu mù, yhangmoq gi, htoq lò luí, waq pé chyáng wàng mù, waq hau jùm gi, gampyoq mai nhông hkaú shut din yán wang lò kòlú, wuí hkaú má myup shi byuq bekò nghut ri. ³³ Waq zúng bang gi, myuq hkaú shut hpang din wang lò kômù, dut lai lo é hkyô banshoq lé le, nat gang wang júng huí su nhik hkásu dut é hkyô lé le, lò tai kyo akò nghut ri. ³⁴ Háu mù, rawa bang gi, Yesuq lé huí rá matú htoq lé lo bùm kômù, Yhang lé myàng jáng, yhangmoq é mau mai htoq lò byuq rá matú, chòm dùng tóngbán akò nghut ri.

9

Gungjum Shí Sù Lé Lhoq Gê Byì É Hkyô
Mrk 2:1-12; Luk 5:17-26

¹ Yesuq gi, lhai má wàng mù, yhumsing é wá shut jì dap lò bê nghut ri. ² Byù ra-am gi, gungjum shí sù rayuq lé, taphkang mai Yhâng chyáng waq lé lo akò. Yesuq gi, yhangmoq é lumjǐng myit lé byu-myàng jáng, hau gungjum shí sù lé, "Ngá zo è, nhik hká-ngé; náng é yubak mara lé hkyut pyám byi bê." ga tai ri.

³ Háu hkùn, tará sará pé ra-am gi, yhang-moq é i-myit hkaú má, "Byù shí yuq gi, Garaí Gasang lé rhoi dang tai nyi ri." ga myit nyi bum akò nghut ri.

⁴ Yesuq gi, yhangmoq myit nyi é hkyô lé sé mù, "Nungmoq é i-myit hkaú má, hau su agè ashop é đông hai mù myit nyi akò lhu?" ⁵ "Náng é yubak mara lé hkyut pyám byi bê." nghu tai rá eq "Toq luí, hkyô so aq." nghu tai

râ má, hká hkun je tái lui lâê lúh? ⁶ Nghut kôlhang, haú Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lâê." ga tái lui, haú gúngjum shí sù lé, "Toq aq, náng é taphkang yu chúng lui, yhùm taú lô aq hkoi." ga tái kat ri. ⁷ Haú mù, haú yuq gi, toq mù, yhùm shut lô byuq bê nghut ri. ⁸ Byù hpúng mó gi, haú hkyô lé myàng kôjáng, gyuq mau kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

Mahte lé shuí yu é hkyô

Mrk 2:13-17; Luk 5:27-32

⁹ Yesuq gi, haú jowò mai sô é ló é hkùn, kang guq zúm má zung tô é Mahte ga sù lé myàng mù, "Ngá htàng cháng aq." ga tái jáng, haú yuq gi, toq lui, Yhâng htàng cháng bê nghut ri.

¹⁰ Yesuq gi, Mahte é yhùm má myinzang zô nyi é hkùn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. ¹¹ Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haí mù lui, kang guq bang eq yubak dap bang eq rahá zo shuq nyi lâê lúh?" ga myí akô.

¹² Yesuq gi, haú su ga kô é lé wó gyo jáng, "Wángzán bang gi, chí sará a ra kô; nõhpýo hui bang za sheq ru râ lâê. ¹³ "Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lâê."¹⁴ gá é lichyúm lé mhoq yú keq. Hkásu mù gá le, Ngò gi, dingmán bang lé wut yú râ matú jé lé é a nghut, yubak dap bang lé jì yú râ matú sheq jé lé é ru nghut lâê." ga tái kat ri.

Zoshuq Gám É Eq Sêng É Hkyô

Mrk 2:18-22; Luk 5:33-39

¹⁴ Hau htàng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lâê; nghut kôle, Náng é chángzô pé gi, haí mù a gám kô é lúh?" ga lui, lé myí akô.

¹⁵ Haú mù, Yesuq tái tái é gi, "Bing pé gi, lusik eq rahá nghut nyi to ashí hkùn, hkásu ge yón kô râ lúh? Lusik lé, yhangmoq chyáng mai shuí yu pyám é hkyíng jé râ nghut lâê; haú hkùn kúm gi, yhangmoq zoshuq gám kô râ nghut lâê.

¹⁶ Ó yuq lé, mebu xau má pán sik eq a lhaq hpo wú kô; hkásu mù gá le, pán sik kun byuq jáng, mebu xau le je lhoq cheq pyám râ nghut lâê. ¹⁷ Tsibiyiq wing asik lé lé, shokuq htúng axau má ó a kat wó kô. Kat é nghut jáng, tsibiyiq wing asik soq htân lui, htúng buq goq byuq mù, tsibiyiq wing le yui shun byuq, htúng le htén byuq, dut râ nghut lâê. Haú mù, tsibiyiq wing asik lé, shokuq htúng

sik má kat jáng sheq, haú í júng é a hten rá nghut lâê." gá ri.

Shí Bê Myiwe Zo Eq No É Myiwe Myhi

Mrk 5:21-43; Luk 8:40-56

¹⁸ Yesuq haú su ga tái nyi é hkùn, suwún rayuq jé lé lô mù, Yhâng é hí má hkyihput htuq lui, "Ngá zo byizo gi, ahkuí za shí byuq bê. Nghut kôlhang, Náng lé mù, yhâng é ahtoq má loq lé ke byi laq, haú jáng, yhang, asak dum dui lò râ nghut lâê." ga tái ri. ¹⁹ Yesuq gi, toq mù, Yhâng é chángzô pé eq rahá, haú yuq htàng cháng e lô akô.

²⁰ Haú hkùn, raxe í zân yhang, suí yui nyi é myiwe myhi rayuq gi, Yhâng é nunghtáng má lui lé mù, Yhâng é bushi htàng má é záng kat ri. ²¹ Myiwe myhi haú gi, yhang gúng yhang, "Ngò, Yhâng é buhtàng má é wó záng jáng gi, ge byuq râ nghut lâê." ga, wó myit é yanmai nghut ri.

²² Yesuq gi, lhing wú kat lui, yhang lé myàng jáng, "Ngá zo é, nhik hkâ-ngé, náng é lumjng myit gi, nang lé lhoq gê byi bê nghut ri." ga tái ri. Haú hkùn jáng yhang, myiwe myhi haú gi, ge byuq bê nghut ri.

²³ Yesuq gi, suwún hpò é yhùm má jé wang lô é hkùn, sampyí mut bang eq garu garin dut nyi é bang lé, é myàng mù, ²⁴ yhangmoq lé, "Hui keq. Myiwe zo gi, shí byuq é a nghut, yhup myhi tô é sheq ru nghut lâê." ga tái jáng, yhangmoq gi, Yhang lé wuizui kut pyám byi akô. ²⁵ Yesuq gi, byù hpúng lé, shinggan shut htoq lô nhâng mù, Yhang wang é lui, myiwe zo haú lé loq eq zui kat jáng, myiwe zo haú gi, dum dui toq lo ri. ²⁶ Haú hkyô é danglù gi, ramau gón yhang jam lò byuq bê nghut ri.

Myoqjit Í Yuq Eq Nhut Jit Sù Rayuq Lé,

Lhoq Gê Byí É Hkyô

²⁷ Yesuq gi, haú jowò mai xoq e ló nyi le, Yhâng é htàng má, myoqjit í yuq gi, châng đin uchyang, "Dawiq é Yhangzo é, ngá-nhik lé shogyô yú laq ôi!" ga wut tái akô.

²⁸ Yesuq gi, yhùmhkaú má jé wang lô é hkùn, myoqjit su nhik châng wang lò kômù, haú nhik lé, "Ngò wó kut byí é lé, nungnhik lumjng akô luq?" ga myí ri.

Haú hkùn, yhangnhik gi, "Lumjng lâê ô, Yhumsing ê." ga tái akô.

²⁹ Hau htàng, Yhang gi, haú nhik é myoqji má é záng htung lui, "Nungnhik lumjng é eq rajung za dut sháng gaq." ga tái ri. ³⁰ Haú mù, yhangnhik gi, myoq wó myàng bekô nghut ri. Yesuq gi, "Shí hkyô, ó lé lé hkásé nhâng kô." ga, yhangnhik lé htân htân sidiq byí ri. ³¹ Nghut kôlhang, yhangnhik gi, haú hkyô lé, haú mau ramau gón yhang tái pyo lô bekô nghut ri.

³² Haú nhik htoq lô nyi kô é hkùn, nat gang wang júng lui, dang a wó nyô sù rayuq lé,

Yesuq chyáng shuí lé lo akò. ³³ Nat gang lé hkat htoq pyám é hkûn, nhutjit sù haù gi, dang wó nyò bê nghut ri. Byù hpûng mó gi, haù lé wú maù byuq kômù, "Shí su dut é hkyò lé, Israelaq amyù má radàm lháng a myang wú." ga tai bum akò.

³⁴ Nghut kôlhang, Hparishe pé kúm gi, "Nat gang pé é zaù é wum-o a-tsam eq za, nat gang pé lé hkat htoq pyám é nghut ri." ga tai bum akò nghut ri.

Mú Zui Byù Shaù Ri

³⁵ Yesuq gi, myuq pé eq wà pé banshoq má wàng lui, haù pé má é tarajong pé má mhoqshit é eq, mauhkûng mingdán hkyò eq sêng é gabù danglù lé hko kyo uchyang, nòhpyo ajung jung eq noli nojàng hui bang yuq hkangmó lé, lhoq gè byì wún ri. ³⁶ Yesuq gi, byù moq mó lé myàng jáng, wú shogyò nyi ri. Hkâsu mù gà le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri. ³⁷ Haù mù, Yhang gi, Yhâng é chángzò pé lé, "Kyòshù yù rá myo shoq joq kôlhang, mù zui rá byù gi, shaù nyi ri. ³⁸ Haù mù, haù kyò Yhumsing lé, Yhâng é kyò yô má, kyò shu byù myo myo nhâng byi rá matú, dung keq." ga tai ri.

10

Raxe Í Yuq Lé Nhang Htoq Kat É Hkyò

Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17

¹ Yesuq gi, Yhâng é chángzò raxe í yuq lé wut yù mù, agè ashop é nat pé lé wó hkat htoq rá eq, noli nojàng eq nòhpyo ajung jung lé wó lhoq gè rá ahko ahkáng yhangmoq lé byì ri.

² Haù lagyo raxe í yuq é mying gi, (Petruq ga sù) Simun eq yhanggu Andre; Zebedi é yhangzò nhiktang Yakuq eq yhanggu Yohan; ³ Hphilip eq Barhtolume; Htomaq eq kang guq sù Mahte; Alhpe é yhangzo Yakuq, Htade, ⁴ Zelutuq* dut é Simun eq, Yesuq lé ap pyám rá sù, Yudaq Iskarut pé nghut akò.

⁵ Yesuq gi, haù bang raxe í yuq lé dangsàng mù, nhang htoq kat ri. Yhang sang kat é dang gi, "Tùngbaù pé chyáng le hkâ-ê kó; Samariq wà rawà má le hkâwàng kó. ⁶ Haù byuq byuq é sau pé su nghut nyi é Israelaq byu pé chyáng sheq é keq. ⁷ Nungmoq gi, é mù, 'Mauhkûng mingdán gi, chyáng lò bé nghut ri.' ngu é danglù lé hko kyo keq.

⁸ Nò bang lé lhoq gè byì, shì bê bang lé lhoq dui toq, manggàm dap bang lé lhoq san lhoq yung byi, nat gâng pé lé hkat htoq pyám, kut keq. Láí lai wó é lé, láí lai byi keq. ⁹ Nungmoq é hpyihit má, hìng, ngùn eq

gyi pé hkâkat chùng kó; ¹⁰ hkyowui é matú, etap, mebu htaí, hkyí-tsung eq dumbáng pé hkâyú chùng kó; hkâsu mù gà le, mù zui sù gi, zoshuq wó gíng lhê.

¹¹ Hkâ wà hkâ dum má jé wang lò le, haù má é gingdán é byù lé hô mù, haù mai htoq lò é hkûn jé shoq, haù yuq é yhùm má za nyi nyi keq. ¹² Haù yhùm má wang é hkûn, shichyên yù keq. ¹³ Haù yhùm gi, gingdán é nghut jang, nungmoq shimân byì é hkyò, yhangmoq chyáng joq nyi sháng gaq; a gingdán é nghut jang, nungmoq chyáng dum taù lò sháng gaq. ¹⁴ Nungmoq lé a lhom hap yu é eq nungmoq é dang lé a lhom gyo byi kô é nghut jang, haù yhùm haù wà mai htoq lò é hkûn, nungmoq é hkyiwa má dap é hpuihaù lé ko hkyò pyám to keq. ¹⁵ Ngò, nungmoq lé teng za tai kôlé, tarà jéyáng é buinyi má, haù wà gi, Sodom eq Gomoraq myuq htoq má je hpuzo rá nghut lhê. ¹⁶ Wamhkui hpûng má nhang hâng kat é sau pé lé su, Ngò, nungmoq lé nhang kat é nghut lhê. Haù mù, lhangmui su hpaqchyí bò lui, hpûngkyui su nú-nhâm nyi keq.

¹⁷ Byu pé lé sidiq keq; hkâsu mù gà le, yhangmoq gi, nungmoq lé, tarà ràng pé má é ap pyám kó rá nghut é htoq agó, yhangmoq é tarajong pé má, nungmoq lé nhuq bat kó rá nghut lhê. ¹⁸ Nungmoq gi, Ngá é yanmai, mauzau wui eq khokkam pé é hí má shuí jé é hui lui, yhangmoq é hí má le, tungbaù pé é hí má le, saksé myang hkám kó rá nghut lhê. ¹⁹ Nghut kôlhang, nungmoq lé ap pyám kô é hkûn, nungmoq hkâsu tai rá eq hai tai rá lé, hkâ-myit chiq kó. Haù hkûn tai rá dang, nungmoq wó kó rá nghut lhê. ²⁰ Hkâsu mù gà le, haù gi, nungmoq é dang a nghut, nungmoq é Yhângwá é Woi-nyí sheq, nungmoq đông tai rá ru nghut lhê.

²¹ Nhiktang gi, nhiktang yhangcham, íwa gi, yhangzo lé, shí shoq ap pyám lhum kó rá nghut lhê; zo wui gi, mó wui lé gumlau toq mù, sat pyám nhang kó rá nghut lhê. ²² Byù lhunglhang bang gi, Ngá é yanmai, nungmoq lé a ngu kut kó rá nghut lhê; nghut kôlhang, jìhtùm jé shoq wó hkam jân nyi é sù gi, hkyi yu é hui rá nghut lhê. ²³ Rawò má zing-ri é hui jang, rawò shut hpang é keq. Ngò, nungmoq lé teng za tai kôlé, Israelaq byu pé é myuq pé má, nungmoq a ban wang ngap shimá, haù Byu Yhangzo jé rá nghut lhê.

²⁴ Jongzo gi, sará htoq, dui-nhâng zoshâng gi, yhumsing htoq, gyaù rá a nghut.

²⁵ Jongzo gi, yhâng é sará su, dui-nhâng zoshâng gi, yhâng é yhumsing su, wó dut jang gé bê. Yhumsing hpó lé lháng Bezebulaq†

* **10:4** Zelutuq gà é lichyùm gi, yhumsing zui sai é hkyò má gyai yang myit lòm shirong é sù lé ga lhê. Haù u lé, Israelaq byu pé gi, mingdán luthkyò wó rá matú shikut nyi é hpàng bang lé, Zelutuq gà lhê. † **10:25** Bezebulaq gà é gi, Tsadán é mying raja nghut lhê.

ga kô le gi, Yhâng é yhumbyù wùi lé gi, je riyhang nghù kô rá a nghut lúhú?

²⁶ Haù mù, yhangmoq lé hkâgyuq kó. A byông htoq loshoq wó zaù nghop tô é haí le a joq rá nghut lhê; a sé loshoq wó haq tô é le, haí a joq rá nghut lhê. ²⁷ Ngò, nungmoq lé mauchut hkaù má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkúng htoq mai taí pyô keq. ²⁸ Gungdu lé za wó sat pyâm mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngarai ming má wó lhoq htên é Sù lé sheq, gyuq nyi keq. ²⁹ Johkyáng í du lé, gyi htngchap rachap éq wó ùng pyâm lhê a nghut kô lúhú? Nghut kôlhang, haù radu lháng, nungmoq é Íwâ é myit éq a nghut jáng, myigùng má wó byit gyó rá a nghut. ³⁰ Nungmoq é ulhum má é xâm banshoq lé lháng, nghap to gù nghut lhê. ³¹ Haù mù, hkâgyuq kó; nungmoq gi, haù johkyáng myo myô htoq má lháng gù je bo é bang nghut lhê.

³² Byu pé hí má, Ngo lé lhom yín yu é sù ó yuq lé nghut kôle, mauhkúng htoq má é Ngá Wâ é hí má, Ngò lhom yín yu rá nghut lhê. ³³ Byu pé é hí má, Ngo le he-ngik pyâm é sù ó yuq lé nghut kôle, mauhkúng htoq má é Ngá Wâ é hí má, Ngò he-ngik pyâm rá nghut lhê.

³⁴ Ngo lé, haù myidàm htoq má simsaq hkyô byi rá matú lé lo é sù su hkâ-ngâm kó. Ngò gi, simsaq hkyô byi rá matú lé lo é a nghut, shâm byi rá matú sheq lé lo é ru nghut lhê. ³⁵ Hkâsu mù gâ le,

"Yuqzo gi, yhângwa eq, byizo gi, yhângnu eq, dumó gi, yhângmhoi eq, byoq lhum kô rá nghut lhê.

³⁶ Yhumsing é yhumbyù wùi gi, yhumsing é gye taù dut rá nghut lhê.^{10*}

gâ tô é matú sheq, Ngò jé lé é ru nghut lhê.

³⁷ Ngò lé chyt é htoq yhumsing é ìnu iwa lé je chyt é sù ó yuq nghut kôle, Ngá é chángzo kut rá gingdán sù a nghut; Ngo lé chyt é htoq yhumsing é zo wùi lé je chyt é sù ó yuq nghut kôle, Ngá é chángzo kut rá gingdán sù a nghut; ³⁸ Yhumsing é tapzîng lé a waq é za, Ngá htâng châng é sù ó yuq nghut kôle, Ngá é chángzo kut rá gingdán sù a nghut. ³⁹ Yhumsing é asak lé ha bûn é sù ó yuq nghut kôle, asak sum rá nghut lhê; Ngá é yanmai, yhumsing é asak sùm pyâm é sù ó yuq nghut kôle, asak wó rá nghut lhê.

⁴⁰ Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haù Ngo lé nhang kat Sù lé hap yu é sù nghut bê. ⁴¹ Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chynghuq lé wó yù rá nghut lhê;

dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chynghuq lé wó yù rá nghut lhê. ⁴² Shí, tiq bang má é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chynghuq lé hkyak myang hkam yù rá za nghut lhê." gâ ri.

11

Yesuq Eq Wui-myhup Sará Yohan Luk 7:18-35

¹ Yesuq gi, Yhâng é chángzo raxe í yuq lé dang ban pying é htâng má, Galile mau má é wà pé má mhoqshít rá matú eq hko kyo rá matú, haù jowò mai htoq e ló bê nghut ri.

² Wui-myhup Sará Yohan gi, Hkrisduq kut nyi é hkyô lé, htóng hkaù má wó gyo jáng, ³ "Nàng gi, haù jé lé lô rá Sù nghut lhê lúhú? Haù a nghut jáng, ngamoq gi, góyuq lé láng ra shirá lúhú?" ga, yhâng é chángzó pé lé myí nhang kat ri.

⁴ Yesuq tú taí é gi, "Nungmoq wó gyo wó myang é hkyô, Yohan lé ló taí kyo keq; ⁵ myoqjit bang, myoq wó myàng bekô; hkyí hten bang le, wó so bekô; manggâm dap bang le, lhoq gè byí é hui bekô; nojit bang le, wó gyo bekô; shí bê bang le, lhoq dui toq é hui bekô; myùng bâng é matú, gabú danglù hko kyô nyi bê nghut lhê. ⁶ Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

⁷ Yohan é chángzó pé taù ló kô é ulé, Yohan eq séng luí, byù moq mó lé Yesuq taí é gi; "Nungmoq gi, haí lé hpuq wù rá matú, haù yoso shut e akò lúhú? Lai éq hik nhùn é jangâm lé wù rá matú nghut akò lúhú? ⁸ Haù a nghut jáng, haí lé wù rá matú e akò lúhú? Nú-nhâm é mebu wut sù lé wù rá matú e akò lúhú? A nghut. Nú-nhâm é mebu wut bang gi, hkohkâm-wâng pé má sheq rù nyi lhê. ⁹ Haù nghut lé gi, haí lé wù rá matú é kô é lúhú? Myiqhtoi rayuq lé lúhú? Haù kúm nghut ri; Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê. ¹⁰ Haù yuq é hkyô lé, Chyúmdang má kâ tô é gi,

"Wú aq, Nàng é hkyô lajang láng rá matú, Ngá é lagyo lé, Nàng é hí má Ngò nhang kat rá nghut lhê."^{10*}

gâ ri. ¹¹ Ngò, nungmoq lé teng za taí kôlé, myiwe wùi mai hku kat é bang má, Wui-myhup Sará Yohan htoq je kô é rayuq lháng a htoq wù shi; nghut kôlhang, Garai Gasâng é mauhkúng mingdán má je tiq dik sù gi, Yohan htoq je kô lhê. ¹² Wui-myhup Sará Yohan é buinyi mai ahkuí jé shoq, mauhkúng mingdán gi, lú chyín wang nyi é hui mù, sarhé pé gi, haù lé wó yù bekô nghut

† 10:34 Yesuq gi, simsaq hkyô byi sù nghut lhê. Nghut kôlhang, Yhang é yanmai, byu pé mabyoq htoq rá nghut é hkyô lé sé mù, haù su ga taí é nghut lhê. * 10:36 Mihka 7:6 ✧ 11:10 Mal 3:1

ri. ¹³ Hkâsu mù gâ le, Yohan é ahkyíng jé shoq, haù myiqhtoi pé banshoq eq tará gi, haù hkyô eq séng lui, myiqhtoi htoi to gù nghut lhê. ¹⁴ Nungmoq hap yù nau é nghut jáng, Yohan gi, haù jé lé lô râ ga sù Eliyaq nghut lhê. ¹⁵ Gyô yù râ nohkyap dap sù gi, gyô yù sháng gaq.

¹⁶ Shí ipyat lhê é byu pé lé, Ngò, hai eq tai kê wú râ lúh? ¹⁷ Yhangmoq gi, 'Nungmoq é matú, ngamoq sampyí mut byi kôlhang, nungmoq gi, a gô kó; ngamoq, ngaù hkyangsang kôlhang, nungmoq gi, a ngaù kó.'

ga lui, gai pé má zùng mù, góbang lé wut tai lhúm nyi é zoshàng wui eq wui akó. ¹⁸ Hkâsu mù gâ le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga tai akó. ¹⁹ Haù Byu Yhangzo jé lé lui, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinôm hpó nghut ri.' ga dum tai akó. Nghut kôlhang, hpaqchyí byéng-yá gi, yhang é muzó èq saksé tún shit nyi ri." gâ ri.

*Myit A Lhìng É Wà Mó Pé Hkyô
Luk 10:13-15*

²⁰ Hau htàng, Yesuq gi, laklai kumlhá pé je myo kut shit bê nghut kôlhang, myit a lhìng é myuq pé lé tân é gi, ²¹ "Kurazin wà mó è! Nàng dingnyé wó ri! Bet-saida wà mó è! Nàng dingnyé wó ri! Nungmoq chyáng lé kut shit é laklai kumlhá pé lé, Turuq myuq eq Sidun myuq má kut shit é ru nghut le gi, yhangmoq, noq noq mai myit lhìng mù, jimé tú wut lhê, myiwap kyaq gyún lhê kut bekô râ nghut lhê. ²² Ngò, nungmoq lé tai kôlé, tará jéyáng é buinyi má, nungmoq gi, Turuq myuq eq Sidun myuq htoq má je hpuzo kó râ nghut lhê. ²³ Dum mù, Kaperna-um wà nàng é, nàng gi, mauhkung jé shoq waq toq é hui râ lúh? A nghut, mosumhkung má sheq gyó râ nghut lhê. Náng chyáng kut shit é laklai kumlhá lé, haù Sodom wà má kut shit é ru nghut le gi, myuq haù hkû-nyi jé shoq joq nyi râ nghut lhê. ²⁴ Ngò, nungmoq lé tai kôlé, tará jéyáng é buinyi má, Sodom wà hpuzó é gi, náng htoq shau râ nghut lhê." gâ ri.

*Ngú Nyi Bàng É Matú Bánno Jang
Luk 10:21-22*

²⁵ Haù u lé, Yesuq tai é gi, "Mauhkung eq myigung é Yhumsing, Áwa ê, Nàng gi, haù pé lé, hpaqchyí byéng-yá bô bang eq myit hpaqchyí sé bâng é hí má nghop to lui, zoshàng wui lé tún shit bê nghut é yanmai, Ngò, Nang lé hkya-on lhê ô. ²⁶ Nghut bê, Áwa ê, haù gi, Nàng ô nau é hkyô nghut ri.

²⁷ Ngá Wa gi, lunglhang lé Ngá é loq má ap byí to bê. Haù Zo lé, Áwa mai lai lui ó le a sé; Áwa lé le, haù Zo eq haù Zo mai sé nhàng râ matú hkyin yu é bang mai lai lui ó a sé.

²⁸ Ngú é eq wôlai wun é lunglhang bang ê, Ngá chyáng lé keq; Ngò, nungmoq lé bánno nhàng râ nghut lhê. ²⁹ Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yú keq; haù hkûn, nungmoq é asak woi-nyi bánno kó râ nghut lhê. ³⁰ Haù mù gâ le, Ngá é kandaş gi, waq lui é htoq agó, Ngá é wò le sôm lhê." gâ ri.

12

*Bánno Buinyi É Yhumsing
Mrk 2:23-28; 3:1-6; Luk 6:1-5, 6-11*

¹ Haù yoq lhê é Bánno buinyi ra-nyi má, Yesuq gi, Yhâng é chángzô pé eq rahá yò hkaù mai sô lai ló nyi ri. Yhâng é chángzô pé gi, zòmút é yanmai, kyôshi ratsui langshap yù mù, zô akó nghut ri. ² Hparishe pé gi, haù lé myàng kôjáng, "Wú aq! Náng é chángzô pé gi, Bánno buinyi má a ge kut jung lé kut nyi akó." ga tai kat akó.

³ Haù hkûn, Yesuq tú tai é gi, "Dawiq lhang gi, yhang htàng châng é bang eq rahá zòmút hui é hkûn hkâsu kut é hkyô lé, nungmoq a nghap wú kó lúh? ⁴ Dawiq gi, Garai Gasàng é yhúmhaù má wang é mù, hkyangjông pé mai lai lui, ó le a ge zô é, kyàng tó é muk lé, yhang eq yhang htàng châng é bang yù zo kô é a nghut kó lúh? ⁵ Hau htoq agó, Bánno buinyi má, hkyangjông pé gi, noqkuq yhúmhaù má Bánno buinyi é tará lé shut kôlhang mara a wó é lé, haù tará laiká má nungmoq a nghap wú kó lúh? ⁶ Ngò, nungmoq lé tai kôlé, haù noqkuq yhúm htoq je ko sù gi, shí má nghut nyi lhê. ⁷ Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê" gâ é lichyúm lé nungmoq sé kô é ru nghut le gi, mara a bô bang lé mara hún kó râ a nghut. ⁸ Hkâsu mù gâ le, haù Byu Yhangzo gi, haù Bánno buinyi é Yhumsing nghut lhê." gâ ri.

⁹ Hau htàng, Yhang gi, haù jowô mai é ló mù, yhangmoq é tarajong má wang é ló ri. ¹⁰ Loq rahkyam ajum shi byuq é byù rayuq le, haù má nyi tó ri. Yhangmoq gi, Yesuq lé, "Bánno buinyi má, nòhpyo lhoq gê byi le, tará wang lhê lúh?" ga myi é dông, Yhang lé mara hún râ hkyô ho akó nghut ri.

¹¹ Haù hkûn, Yesuq gi, "Nungmoq chyáng má é ó yuq wá, yhumsing é sau radu, Bánno buinyi má dong gyó tó le, a xe htoq yú é nyi kó râ lúh? ¹² Byù gi, saù htoq má hpaudap dik é nghut lhê! Haù mù, Bánno buinyi má ge é hkyô kut le, tará wang lhê." ga yhangmoq lé tú tai ri.

✧ 11:14 Mal 4:5 ✧ 12:7 Hos 6:6

¹³ Hau htàng, Yhang gi, haù loq jum shì sù lé, "Náng é loq nyhang kat aq." ga tai kat jáng, haù yuq gi, loq nyhang kat jáng, loq haù gi, a no é loq su ge byuq bê nghut ri. ¹⁴ Hparishe pé kúm gi, htoq ló kômù, Yesuq lé hkâsu kut wó gíng to rá lú? ¹⁵ Hau mù luí, Ngò gi, Bezebulaq é wum-o a-tsam eq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam eq hkat htoq pyám kô é nghut lê lú? Hau su nghut jáng, haù bang gi, nungmoq lé tará jéyáng bang dut kó rá nghut lê. ¹⁶ Nghut kólhang, Ngò gi, Garai Gasâng é Woi-nyí eq nat gâng pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

Garai Hkyin Tô É Dui-nhâng Zoshâng

¹⁵ Yesuq gi, haù hkyô lé sé jáng, haù jowò mai htoq ló bê nghut ri. Byù myo myo le, Yhâng htàng châng bùm kômù, Yhang gi, nòhpyo hui bang banshoq lé lhoq gè byi luí, ¹⁶ Yhang ó yuq nghut é hkyô lé, a tai byông htoq rá matù, yhangmoq lé tai hkùm tô ri. ¹⁷ Hau gi, myightoi Esai-aq é nhut đông mai tai tô é dang lé lhoq dik rá matù nghut ri. Dang haù pé gi,

¹⁸ "Shí yuq gi, Ngò chyit, Ngò myit nguì luí, hkyin tô é Ngá é dui-nhâng zoshâng nghut lê;

Ngò gi, Ngá é Woi-nyí, Yhang lé kat byi rá nghut mù,

Yhang gi, tará dingmán é hkyô lé byù myú banshoq pé má tai kyo rá nghut lê.

¹⁹ Yhang gi, haí a hpuq tú é htoq agó, a garu rá nghut lê; Yhâng é htê lé, hkyô mó pé má wó gyo rá a nghut.

²⁰ Yhang gi, tará dingmán é hkyô lhoq ung é hkùn jé shoq,

nâng chap pyám bê jam gàm lé le, lhoq hkyui rá a nghut, myihkau za htoq nyí bê myi lé le, lhoq sat pyám rá a nghut.

²¹ Byù myú chângiup gi, Yhâng é myìng má myit myoqbyù kó rá nghut lê."*

gà ri.

Yesuq Eq Bezebulaq

Mrk 3:20-30; Luk 11:14-23; 12:10; 6:43-45

²² Hau htàng, agè ashop é nat gang wang júng luí, myogjit nhutjit é byù rayuq lé, Yesuq chyáng shuí lé lô kôjáng, Yesuq gi, haù yuq lé lhom lhoq gè byi ri; haù mù, haù yuq gi, dang le wó nyò, myoq le wó myàng dut bê nghut ri. ²³ Byù hpùng mó gi, haù lé wú maù byuq kômù, "Shí yuq, Dawiq é Yhangzo za gi, nghut lê laq?" ga tai bum akò.

²⁴ Nghut kólhang, Hparishe pé gi, haù lé wó gyo kôjáng, "Shí yuq gi, nat gâng pé é zau Bezebulaq* é wum-o a-tsam eq za nat gâng pé lé wó hkat htoq é nghut ri." ga tai bum akò nghut ri.

²⁵ Yhangmoq myit nyi é hkyô lé Yesuq sé mù, yhangmoq lé tai é gi, "Hká mingdán nghut kôle, ahkau má byoq gâng lhum nyi kô é nghut jáng, htên byoq byuq rá za nghut lê; haù eq rajung za, myuq ralhum nghut nghut, yhangchang byoq lhum nyi kô é nghut jáng, haù gi, wó gíng nyi rá a nghut.

²⁶ Tsadán gi, Tsadán lé hkat htoq pyám é nghut jáng, yhumsing gùng yhumsing lhoq hpyoq nyi gù bê nghut ri. Haù su nghut jáng, yhâng é mingdán gi, hkâsu kut wó gíng to rá lú? ²⁷ Hau mù luí, Ngò gi, Bezebulaq é wum-o a-tsam eq za nat gâng pé lé hkat htoq é nghut jáng, nungmoq é byu pé gi, ó yuq é wum-o a-tsam eq hkat htoq pyám kô é nghut lê lú? Hau su nghut jáng, haù bang gi, nungmoq lé tará jéyáng bang dut kó rá nghut lê. ²⁸ Nghut kólhang, Ngò gi, Garai Gasâng é Woi-nyí eq nat gâng pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

²⁹ Ó yuq nghut kôle, wum-o bò sù lé hí tuí zing pyám é a nghut le gi, yhâng é yhùm má lú wàng mù, yhâng é sutzè lé hkâsu wó lú yù rá lú? Hau yuq lé hí tuí zing pyám jáng sheq, yhâng é sutzè lé wó lú yù rá nghut lê.

³⁰ Ngá hkyam shut a dap sù gi, Ngo lé gye kut sù nghut lê; Ngò eq rahá a shùm tsing sù gi, lhoq pyo pyám é sù nghut nyi ri. ³¹ Hau mù, Ngo, nungmoq lé tai kôle, byu pé é yubak mara hkangmò eq Garai Gasang lé rhoi dang tai pyám é lhunglhang gi, mara hkyut byí é wó hui rá nghut lê.

Nghut kólhang, haù Choyiýng Woi-nyí lé rhoi dang tai pyám é gi, mara hkyut byí é hui rá a nghut. ³² Hau Byu Yhangzo lé dang đông shut é sù gi, mara hkyut byí é wó hui rá nghut lê; nghut kólhang, haù Choyiýng Woi-nyí lé dang tai shut é sù gi, shí ipyat má le, htang pyat má le, mara hkyut byí é hui rá a nghut.

³³ Ashi lé wú luí, agàm lé sé rá nghut é yanmai, agàm lé lhoq gè jáng, ashì le gè rá nghut lê; agàm lé a lhoq gè jáng, ashì le gè rá a nghut; ³⁴ Duq htân lhangmuì amyù é, nungmoq gi, agè ashop é bang nghut to kólui nhing, dang gè hkâsu wó tai kó rá lú? Hkâsu mù gà le, i-myt unghkau má byíng muì tô é lé za, nhut mai tai htoq lo é nghut lê. ³⁵ Ge é sù gi, yhumsing é i-myt unghkau má é sutdò mai ge é zè pé lé lhoq htoq shit lê. Agè ashop é sù gi, yhumsing é i-myt unghkau má é agè ashop é sutdò mai, agè ashop é zè pé lé lhoq htoq shit lê. ³⁶ Ngò, nungmoq lé tai kôle, byu gi, yhumsing tai kat é akyú a bo é dang pé é matù, tará jéyáng é buinyi má tai sân kyo ra kó rá nghut lê. ³⁷ Hkâsu mù gà le, yhumsing mara lui rá le, ó le ó tai é dang pé mai; mara byí é hui rá le, ó le ó tai é dang pé mai, nghut rá nghut lê." gà ri.

Limik Kumhá Lé Dung Kô É Hkyô

Mrk 8:11-12; Luk 11:29-32; 12:24-26

³⁸ Hau htàng má, Hparishe pé eq tará sará pé ra-am gi, "Sarà é, ngamoq gi, Nàng, limik

* 12:21 Esai 42:1-4

* 12:24 Bezebulaq gà é gi, Tsadán é myìng rajà nghut lê.

kumlhá kut shit râ lé myàng nau ri." ga Yhang lé dúng akô.

³⁹ Haù mù, Yhang tù tai é gi, "Agè ashop é eq lhum a zuí é ipyat shí gi, limik kumlhá dung nyi ri myhi-nhung! Myiqhtoi Yonaq é kumlhá mai lai lui, gotú hai lé tún shit râ a nghut. ⁴⁰ Hkâsu mù gà le, Yonaq gi, ngo mó é wamdau hkaù má sum nyí sum myín lúng é su, haù Byu Yhangzo le, myigùng kang má sum nyí sum myín lúng râ nghut lhê. ⁴¹ Ninewe wà byù wui gi, Yonaq mungdang hko kyô é hkûn myit lhung kô é nghut mù, tará jéyang é buinyi má, ipyat shí má é bang eq rahá toq lò lui, ipyat shí má é bang lé mara hún kô râ nghut lhê; haù Yonaq htoq ko sù gi, ahkuí shí má jé nyi to bê. ⁴² Maupyí má é hkohkâm myhi gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haù tará jéyang é buinyi má, ipyat shí má é bang eq rahá toq lò lui, ipyat shí má é bang lé mara hún râ nghut lhê; haù Sholumon htoq ko sù gi, ahkuí shí má jé nyi to bê.

⁴³ Haù agè ashop é nat gi, byù rayuq chyáng mai htoq lò mù, kyuq huí é jowò pé má só yông e ló lui, no rá jowò hkat ho wú le, a myang hó nghut ri. ⁴⁴ Haù hkûn, yang gi, 'Ngò nyi lai lo é yhùm má dum taù ló wú rá.' ga tai ri. Yhang dum taù jé ló wú le, yhùm haù lé, ó le a sing yu hpyuq é htoq agò, san za rago dut to láng é lé ló myang ri. ⁴⁵ Haù jáng, yang gi, dum taù é mù, yhang htoq je wui é nat nyhit nat lé shui lò lui, haù má lo wang nyi to bekò. Haù mù, haù yuq é nyi yap sâmlai gi, hí lhê htoq má je wui lò bê nghut ri; agè ashop é ipyat shí le, haù eq rajung za dut râ nghut lhê." gà ri.

*Yesuq É Yhângnu Eq Yhanggù Pé
Mrk 3:31-35; Luk 8:19-21*

⁴⁶ Yesuq, shiwa byu pé lé dang rù nyo nyi ashí hkûn, yhângnu eq yanggu pé gi, Yhang lé nyò nau kômù, shinggan má lé yap tô akò nghut ri. ⁴⁷ Haù mù, Yesuq lé, "Náng nu eq nunggu pé gi, Nang lé nyò nau mù, shinggan má láng yap bum akô." ga tai kyô akô.

⁴⁸ Haù hkûn, Yhang gi, "Ó pé gi, Ngá nu eq Ngá gu pé nghut akò lúhù?" ga tù tai kat ri. ⁴⁹ Hau htâng, Yhang gi, Yhâng é chángzô pé lé loq tun lui, "Wú keq, shí bang gi, Ngá nu eq Ngá é gumang wui nghut bê. ⁵⁰ Hkâsu mù gà le, mauhkung htoq má é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq tai ri.

13

*Kyôshi Sân É Dangtú
Mrk 4:1-20; Luk 8:4-15*

* 13:15 Esai 6:9-10

¹ Haù nyí má yang, Yesuq gi, yhùmkaù mai htoq lò mù, wui nhông yàm má é zung tô ri. ² Byù hpúng mó gi, Yhâng é lhungkyuq má zup zing lé bùm kô é yanmai, Yhang gi, lhai hkaù má doq zùng tô ri. Shiwa byu pé kúm gi, gin-gau htoq má yap tô bum akô. ³ Hau htâng, Yhang gi, haù bang lé, dangtú pé dông myo myo tai é má, "Kyô hkyó sù rayuq gi, kyôshi san râ ga htoq e ló ri. ⁴ Yhang, kyôshi sân kat é hkûn, ra-am gi, hkyô má gyô ang mù, nghoq pé eq lé hte zô pyám ri. ⁵ Ra-am gi, myi-tse a htú é lugok yò pé má gyô ang mù, myi-tse a htú é yanmai, lui za yuq htoq lò kôle, ⁶ amiyit a wó chún hing é nghut mù, bui htoq lò jáng, lhap kyuq pyám bê nghut ri. ⁷ Dum ra-am gi, zugyóm hkaù má gyô ang lui, zubyap haù pé kô lò mù, wup pyám ri. ⁸ Ra-am dum nghut jáng, myihpún bo é dang má gyô ang lui, ashi zuí lo é gi, sân kat é htoq rashò tú, hkyuq xê tú, sum xê tú, myò jat lo é nghut ri. ⁹ Gyô yù râ nohkyap dap sù gi, gyô yù sháng gaq." ga le tai ri.

¹⁰ Haù hkûn, chángzô pé gi, Yhâng chyáng lé mù, "Nàng gi, hai mù, shí bang lé, dangtú dông tai lhê lúhù?" ga myí akò.

¹¹ Haù jáng, Yhang tù tai é gi, "Mauhkung mingdán eq sêng é sê gyo wui é hkyô pé lé sê gyo rá ahko ahkáng, nungmoq lé byi to bê, nghut kôlhang, yangmoq lé gi, a byi shí é nghut lhê. ¹² Wó to sù lé gi, yang agùn agó wó rá matú, jat byi shirá nghut lhê. A wó su chyáng mai kúm gi, yhang wó tô é lé lhang yu pyám byi shirá nghut lhê. ¹³ Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yangmoq lé Ngò dangtú dông tai rá é nghut lhê. ¹⁴ Haù gi,

'Nungmoq gi, wó gyô tô nyi kôlhang, sê gyo kó rá a nghut;
myang tô nyi kôlhang, wú sé kó rá a nghut.

¹⁵ Hkâsu mù gà le, byù shí bang gi, myit nhikshi jit byuq bê;
yangmoq é nohkyap gi, a wó gyo kó,
myoqji le chum byuq bekò nghut ri.

Haù su a nghut le gi, yangmoq, myoq myàng no gyo mù,
i-miyit bun bóng lui, lhung lò kômù,

Ngò, yangmoq lé yâ gè byi berâ nghut lhê.¹⁶

gâ é, Esai-aq é myiqhtoi dang lé lhoq dik é nghut ri. ¹⁶ Nghut kôlhang, nungmoq é myoq gi, wó myàng mù, nungmoq é nohkyap gi, wó gyô é yanmai, nungmoq gi, hkungsó wó nyi ri. ¹⁷ Hkâsu mù gà le, Ngò, nungmoq lé teng za tai kôle, nungmoq wó myàng, wó gyô é pé lé, myiqhtoi pé eq dingmán bang myo myo gi, myàng nau gyo nau kôlhang, a wó myàng, a wó gyo kó nghut ri.

¹⁸ Ahkuí, kyôshi san sù eq sêng é dangtú é lichyúm lé rago gyô wú keq; ¹⁹ Hkyô má gyô âng é kyôshi gi, mauhkûng mingdán eq sêng é danglú lé wó gyo kôhang, a sê gyô é yanmai, haú agê ashop sù lé lô mù, yhâng é i-myit hkaú má san kat tó é kyôshi lé, lé yu pyám byí é hui sù lé gá nau é nghut lhê. ²⁰ Luqgok yò pé má gyô âng é kyôshi gi, mungdang lé wó gyo jáng, radá dâm gabú myit eq hap yù kôhang, ²¹ amyit a wó chin é yanmai, razup zo za yuq mù, mungdâng é yanmai, wuîhkê é eq zing-ri é hui kôjáng, hân hân htak ló byuq é sù lé gá nau é nghut lhê. ²² Zuyóm má gyô âng é kyôshi gi, haú mungdang lé wó gyô yù kôhang, shí ipyat lhê é myit wui myit hke hkyô pé eq hkyô shuí nghoq jung ngùn hîng zêhkoq eq hup pyám é yanmai, ashi a wó zuí é sù lé gá nau é nghut lhê. ²³ Nghut kôhang, myihpùn bo é jang má gyô âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haú yuq ashi zuí é gi, san kat é htoq rashò tú, hkyuq xê tú, sum xê tú, myô jat lo é nghut ri.

Myoqgàm Dangtú

²⁴ Yesuq, yhangmoq lé dangtú đông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq dù ri. ²⁵ Byu pé yhup myhî tô bum é u lé, yhâng é gyê gi, lé jé mù, guq gàm gyoro má, myoqshi lé sân to hkó lui, taú ló byuq bê nghut ri. ²⁶ Guq gàm yuq lò mù, guq nhâm htoq lo é hkùn, myoqgàm le bo yuq htoq lo ri.

²⁷ Yhumsing hpô é ðui-nhâng zoshâng wui gi, yhâng chyâng lé jé mù, 'Yhumsing ê, ge é kyôshi lé za yò má sân tó é a nghut lú? Myoqgàm pé gi, hkâmai htoq lo é lú?' ga myi kôjáng, ²⁸ haú yhumsing hpó gi, 'Gumlau gyê eq kut é nghut ri.' ga tú taí ri.

Haú jáng, ðui-nhâng zoshâng wui gi, 'Ng-amog, myoq haú pé lé é nut pyám rà lé, nàng ô nau ri lú?' ga myí akó.

²⁹ Haú hkùn, yhang gi, 'Hká nut pyám kó; hkâsu mù gá le, nungmoq, myoq haú pé lé nut é hkùn, guq gàm pé lé le bo záng nut pyám kó rà nghut lhê. ³⁰ Kyôshu yoq jé shoq rahá yuq to kó sháng gaq; haú hkùn, myoqgàm pé lé hí hkyin tsing yù mù, nyhê hkyô pyám rà matú hkyom ðing to lui, guq lé kúm gi, shú yù mù, ngá é chyí má tsing kat to rà matú, kyô shu bang lé ngò taí rà nghut lhê.' ga tú taí ri." ga ri.

Angshi Cham Eq Munchi Dangtú *Mrk 4:30-34; Luk 13:18-21*

³¹ Hau htâng, Yesuq gi, yhangmoq lé gotú dangtú ralhóm dum xoq taí é gi; "Mauhkûng mingdán gi, byù rayuq eq, yhâng hkyâm má hô tó é angshi cham eq wui ri. ³² Angshi cham haú gi, kyôm yui jí banshoq htoq má je tiq é nghut kôle, yuq kô lò jáng, hkyâm má hô é nhan-haq hpoqnoq gàm banshoq htoq má

je kô é agàm dut lò mù, akoq pé má, maulat nghoq zô pé lé wó zung nô bum lhê." gá ri.

³³ Yhang, gotú dangtú dum xoq taí é gi, "Mauhkûng mingdán gi, myiwe rayuq eq sungso mùn sum búng má yu nyhò lui, haú pé banshoq lé wó lhoq dau nhang é múnchi eq wui ri." gá ri.

³⁴ Yesuq gi, byù moq mó lé, haú pé banshoq dangtú đông mai chyat taí ri; yhang-moq lé, dangtú a bo é haí lháng a taí wú nghut ri. ³⁵ Haú gi,

"Ngá nhut lé hpóng mù, dangtú đông mai taí rà;

mingkan lé sâng-hi hpan é mai zaú tô é hkyô pé lé taí sân kyo rà nghut lhê."³⁶

ga, myiqhtoi đông taí tô é dang lo dik é nghut ri.

Myoqgàm Dangtú Lé Taí Sân Kyô É Hkyô

³⁶ Hau htâng má, Yesuq gi, byù moq mó mai htoq lò mù, yúm hkaú má wang ló ri. Haú hkùn, Yhâng é chángzô pé gi, Yhâng chyâng lé lô kômù, "Yò má é myoqgàm dangtú eq sêng é hkyô lé taí sân kyo laq." ga taí akó.

³⁷ Haú jáng, Yhang tú taí é gi, "Ge é kyôshi san sù gi, haú Byu Yhangzo nghut ri. ³⁸ Yò gi, mingkan nghut ri; ge é kyôshi gi, mauhkûng mingdán é yhangzô pé nghut akó. Myoqgàm pé kúm gi, haú Tsadán é yhangzô pé nghut akó; ³⁹ haú lé châng hkat sân é gumlau gyê gi, nat Tsadán nghut ri. Kyôshu yoq gi, mingkan htùm é ahkying nghut ri; kyô shu bang gi, maumang lagyô pé nghut akó.

⁴⁰ Haú myoqgàm pé lé, nut yù mù, myi má nyhê pyám é su, haú mingkan htùm é ahkying má dut rà nghut lhê. ⁴¹ Haú Byu Yhangzo gi, Yhâng é maumang lagyô pé lé nhâng rà nghut lhê; haú mù, haú bang gi, hkyô lhoq nghoq nhang é bang banshoq eq agê ashop hkyô kut é bang lhunglháng lé, Yhâng é mingdán mai hkyin she htoq yù mù, ⁴² gyúng nyi é myibung hkyúng hkaú má dú kat pyám kó rà nghut lhê; hau má, ngaubyi ngau nhap eq zui kyik shoq hpuzò nyi kó rà nghut lhê. ⁴³ Haú hkùn, ðingmân bang gi, yhangmoq Yhângwá é mingdán má búi su ðuqbó nyi kó rà nghut lhê. Nohkyap dap sù gi, gyô yù sháng gaq.

Haq Tô É Sutzè Dangtú

⁴⁴ Mauhkûng mingdán gi, yò má haq tô é sutzè eq wui ri. Sutzè haú lé myang é sù gi, haú lé saí haq to mù, gabú myit eq taú lò lui, yhang wó é banshoq lé ùng pyám mù, yò haú lé wui yu ri.

⁴⁵ Dum, mauhkûng mingdán gi, réng é palhé lé châng ho wún é hpugá hpó eq wui ri. ⁴⁶ Yhang gi, gyai hpaú é palhé lé myàng jáng, yhang wó é banshoq lé lò ùng pyám mù, haú lé wui yu ri.

Gùn Lé Dangtú Yu É Hkyô

⁴⁷ Mauhkûng mingdán gi, nhông má, ngozo ajà jà lé wó dù nghop yu é gùn eq le wuí ri. ⁴⁸ Gùn haù má ngozo bying jáng, ngo kóng bang gi, wuí yàm má she htoq yú mù, zung to lui, ge é pé lé gi, ngo-pyap má guq kat yú lui, a ge é pé lé gi, dù pyám akô. ⁴⁹ Haù eq rajung za, mingkan htúm é ahkýng má le, maumang lagyô pé gi, gyô lé lô mù, agè ashop é bang lé, dingmán bâng chyáng mai gam htoq yú lui, ⁵⁰ ngaubyi ngaù nhap eq zui kyik kyik shoq hpuzô nyi rà nghut é, gyúng nyi é myibung hkyûng hkaù má dù kat pyám kó rà nghut lhê.

⁵¹ Shí hkyô banshoq lé nungmoq sê gyo bekô lúh?" ga ri.

Haù hkûn, yhangmoq gi, "Sê gyo bê." ga tú tai akô nghut ri.

⁵² Hau htâng, Yesuq gi, yhangmoq lé, "Mauhkûng mingdán eq séng lui mhoq yú bê é tará sará ó nghut kôle, yhang mhoq é hkyô gi, yhumsing é sut-púnglhúng hkaù mai zè sik zè xau lé yu htoq é yhumsing hpó rayuq eq wuí ri." ga dum tai ri.

Myiqhtoi, Myoqdong A Wó Dut É Jang
Mrk 6:1-6; Luk 4:16-30

⁵³ Yesuq gi, dangtú haù pé lé ban tai jáng, haù jowò mai htoq é lô bê nghut ri. ⁵⁴ Yhang gi, Yhâng é yhummau má jé lô jáng, byu pé lé, yhangmoq é tarajong má mhoqshít ri; haù hkûn, yhangmoq gi, gyô mau byuq kólui, "Byú shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê là?" ⁵⁵ Yhang gi, laksíma hpó é yhangzo a nghut lúh? Yhângnú é mying gi, Mariq gá lhê a nghut lúh? Yhanggú pé gi, Yakuq, Yosep, Simun eq Yudaq gá é bang a nghut kó lúh? ⁵⁶ Yhâng nhammó pé le, nganhnúng eq rahá nghut nyi lhê a nghut kó lúh? Haù su nghut le nhing, haù pé banshoq lé, Yhang hkâmai wó yu é nghut lhê là?" ga myí bùm kômù, ⁵⁷ Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhum-sing é yhúm má za, myoqdong a lhaq wó wú é nghut lhê." ga tú tai kat ri.

⁵⁸ Yhangmoq lumjing myit a bò kô é yan-mai, Yesuq gi, haù má, laklaí kumlhá myo myo a kut shít lo nghut ri.

14

Wui-myhup Sará Yohan Shi Byuq É Hkyô
Mrk 6:14-29; Luk 9:7-9

¹ Haù hkûn, mauzau Herut gi, Yesuq eq séng é ludang lé wó gyo jáng, ² yhâng a-ô má é bang lé, "Shí yuq gi, Wui-myhup Sará Yohan nghut ri-nhung; Yhang gi, shí é mai dum dui toq lo é nghut mù, hpungwup a-tsam haù pé lé wó kut é nghut ri." ga tai ri.

³ Herut haù su gá é gi, yhanggu Hpilip é yhangmyi Herudiaq é yanmai, Yohan lé chyup tui yú mù, htóng hkyô pyám é yanmai nghut ri. ⁴ Hkâsu mù gá le, Yohan gi, yhang lé, "Nàng, myiwe haù lé hâng yu é gi, tará a wang é nghut lhê." ga tai byí nyi é yanmai nghut ri. ⁵ Herut gi, Yohan lé sat pyám naù kôlháng, mingbyú wuí lé gyuq é yanmai, a wám sat nghut ri; haù mù gá le, yhangmoq gi, Yohan lé myiqhtoi tsuq nyí kô é yanmai nghut ri.

⁶ Nghut kôlháng, Herut é hkú ladu hkyúm buinyi má, Herudiaq é yhangzo byizo gi, yhangmoq é hí má gó shít é lé, Herut gi, gyai yhang wú myit ngui mù, ⁷ byizo haù lé, yhang haù dung le haù byi rà ga dakam é danggidiq byí ri. ⁸ Byizo haù gi, yhângnu hpaqchyí byí é lé gyo yú mù, "Shí, bó má, Wui-myhup Sará Yohan é ulhum lé, kat byi laq." ga, Herut lé dúng ri. ⁹ Mauzau hpó gi, myit a ngón dut byuq kôlháng, yhang dakam tô é danggidiq é yanmai le, bíng pê é myoqdong lé tè nau é yanmai le, yhang dúng é lé, byi rà matú, ¹⁰ htóng hkaù má lúng tô é Yohan é ulhum lé hpyit rà hkunmó hkyô kat bê nghut ri. ¹¹ Yohan é ulhum lé bó má kat lui, myiwe zo haù lé byi jáng, myiwe zo haù gi, haù lé yhângnú chyáng yu lô byí ri. ¹² Haù mù, Yohan é chángzô pé gi, yhâng é mâng lé lé yú lui, myhup pyám bekô nghut ri. Hau htâng, yhangmoq gi, Yesuq lé lô tai kyô akô nghut ri.

Byú Ngo Hkýng Lé Byi Tsô É Hkyô
Mrk 6:30-44; Luk 9:10-17; Yhn 6:1-14

¹³ Yesuq gi, haù hkyô lé wó gyo jáng, haù mai lai jí mù, tsím tsám é jowò shut Yhang baù é lô ri. Haù lé, byu pé wó gyô bùm kôjáng, wá mó pé mai htoq lé lô kômù, hkyí hkyô Yhâng htâng châng é lô akô nghut ri. ¹⁴ Yesuq gi, lai mai gyó dap lô é hkûn, byú moq mó nyi to láng é lé myàng jáng, yhangmoq lé wú shogyo lui, nò bang lé lhoq gè byí ri.

¹⁵ Myinhâng jé lô jáng, haù chángzô pé gi, Yhâng chyáng lé kômù, "Shí má gi, tsím tsám é jowò nghut é htoq agó, bui le gyum lô bê nghut mù, shiwa byu pé gi, wá pé shut lô lui, yhangmoq é matú zôjung lô wó wuí kó sháng gaq, yhangmoq lé nhang kat aq hkoí." ga tai akô.

¹⁶ Haù hkûn, Yesuq gi, "Yhangmoq lô a ra. Nungmoq, yhangmoq lé rajung jung byi tso keq." ga tú tai kat ri.

¹⁷ Haù su ga jáng, yhangmoq gi, "Muk ngo long eq ngozo í du za ru wó lhê." ga dum tú tai akô.

¹⁸ Haù jáng, Yesuq gi, "Yu lò keq." ga tú tai mù, ¹⁹ shiwa byu pé lé, wáhu yô má zùng nhang ri. Hau htâng, Yhang gi, haù muk ngo long eq ngozo í du lé yú mù, mauhkûng shut tu wú to lui, jeju ban hkya-on jáng, muk

lé hpê gàm mù, chángzô pé lé byí ri. Haú chángzô pé gi, shiwa byu pé lé gàm byí akò nghut ri. ²⁰ Yhangmoq banshoq bang zô gyí bùm kô é htàng má, haú chángzô pé gi, zô myhit tô é pé lé, raxe í mung bying shoq wó guq tsing yu ashí kô nghut ri. ²¹ Haú má zô é bang gi, myiwe wui eq zoshâng wui lé a nghap lhôm é za, yuqgè baú ngo hkyíng kô bo ri.

Yesuq, Wui Htoq Má Sô É Hkyô

Mrk 6:45-56; Yhn 6:15-21

²² Yesuq gi, haú shiwa byu pé lé byo ló nhang nyí é hkún jáng, chángzô pé lé lhai má wang ji nhâng mù, tú tap shut dap ló láng nhâng ri. ²³ Shiwa byu pé lé nhang pyâm é htàng má, Yhang gi, kyúdung râ ga, Yhang baú bùm shut doq é ló ri. Myinhâng chutshúm zó jé shoq, Yhang baú haú má nyí nyi ri. ²⁴ Haú u lé, lhai gi, gin-gau mai tsómra wê é jowó má jé é hkún, lai tau mut é yanmai, wuillheng eq gyai yhang lo bat nhún é hui zô ri.

²⁵ Htang napsùn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. ²⁶ Haú mù, chángzô pé gi, Yesuq nhông htoq má sô nyí é lé myàng kôjáng, gyuq dân kômù, "Sobyó ô!" ga gyuq nân é eq tái garú akò nghut ri.

²⁷ Haú jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kóng keq." ga nyo kat ri.

²⁸ Haú hkún, Petruq gi, "Yhumsing ê, Nàng yhang ru nghut le gi, ngo lé, wui htoq mai sô lé lô nhâng laq." ga tái kat ri.

²⁹ Haú jáng, Yesuq gi, "Lé lô aq." ga tú tái kat ri.

Haú mù, Petruq gi, lhai mai gyó mù, wui htoq mai Yesuq chyáng sô é ló ri. ³⁰ Nghut kôlhang, yhang gi, laidun htan é lé myang kat jáng, wú gyuq luí, wui má nop ló nyí mù, "Yhumsing ê, ngo lé hkyi yù laq." ga wut garú kat ri.

³¹ Yesuq gi, radá dâm yhâng é loq lhâm kat luí, Petruq lé láng zing to mù, "Lumjing myit shau sú ê, nàng hai mù úng-âng lhê thú?" ga tái ri.

³² Yhangnhik, lhai má wàng kôjáng, laidun le zím byuq bê nghut ri. ³³ Hau htàng, haú lhai má lúng tô é bang gi, Yhang lé paí gop mù, "Nàng gi, gè gè yhang, Garai Gasâng é Yhangzo nghut bê." ga tái akò nghut ri.

³⁴ Yhangmoq gi, gú dap ló kômù, Generarat mau má jé wang ló bekò nghut ri. ³⁵ Haú mau má é bang gi, Yesuq lé wú sé kôjáng, awui ayàm má é bang banshoq lé kyô kat akò. Haú mù, byu pé gi, nhôpyo hui bang lhunglhang lé, shuí lé lô kômù, ³⁶ nhôpyo hui bang lé, Yhâng é bushi htàng má za lháng záng nhâng râ matú dúng

tôngbán akò; Yhang lé záng é lhunglhang bang gi, lhoq gè byí é lui bekò nghut ri.

15

Sansêng É Hkyô Eq A Sansêng É Hkyô
Mrk 7:1-23

¹ Hau htàng má, Hparishe pé eq tarâ sará pé ra-am gi, Yerusalem wà mó mai Yesuq chyáng jé lé lô kômù, ² "Nàng é chángzô pé gi, hai mù luí, íchyí íwa pé é htúngli lé a cháng kut akò lhu? Yhangmoq gi, loq hí a chí é zang zô akò nghut ri." ga, lé tái akò.

³ Haú jáng, Yesuq tú tái é gi, "Nungmoq gi, hai mù, nungmoq é htúngli é yanmai, Garai Gasâng é hkunmó lé a cháng kô é lhu?"

⁴ Hkâsu mù gà le, Garai Gasang gi, "Nungmoq é ínu íwa lé, hkungwa keq." ga le, "Ínu íwa lé, nhing é sú ó yuq nghut kôle, sat pyâm é hui rá lhê." ga le, tái tô é nghut lhê. ⁵ Nghut kôlhang, nungmoq tái é gi, "byu rayuq yuq, yhumsing é yhângnu yhângwa lé byi âng é zè lé, Garai Gasang lé byi rá chyunghuq nghut lhê ga tái é nghut jáng, ⁶ haú yuq gi, yhângwa lé hkungga nó a ra." gà akò nghut ri. Haú dông mai, nungmoq gi, nungmoq é htúngli é yanmai, Garai Gasâng é mungdang lé hengik pyâm akò nghut ri. ⁷ Gegùn labyoq kut bang ê! Nungmoq eq séng lui, myiqhtoi Esai-aq htoi tô é dang gi, têng ri. ⁸ Myiqhtoi dang haú gi,

"Byù shí bang gi, nhut htoq mai za Ngo lé hkunggá akò;

yhangmoq é myit nhikhlum gi, Ngò eq wê gâng nyi akò.

⁹ Yhangmoq, Ngo lé noqkuq nyi kô é gi, akóm má za nghut nyi ri;

hkâsu mù gà le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri." ga ri.

¹⁰ Hau htàng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq. ¹¹ Nhut má wang lo é hai jung le, byù lé a sansêng dut nhang é a nghut, nhut mai htoq lo é pé sheq, byù lé a sansêng dut nhang é ru nghut lhê." ga tái ri.

¹² Haú hkún, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sé lhê thú?" ga myi kôjáng,

¹³ Yhang gi, "Mauhkung htoq tsáng myhâng má é Ngá Wa a hô tô é agàm hkangmó gi, apùn eq roq nut pyâm é hui rá nghut lhê. ¹⁴ Yhangmoq é yanmai, myit hkâm-yo kó; yhangmoq gi, myoqjit bang nghut kôle, myoqjit é bang lé hkyô-u she é bang nghut akò. Myoqjit yhangchang hkyô-u she lhúm é nghut le gi, í yuq é yhang donghông má byit gyó kó rà za nghut lhê." ga tái tái ri.

¹⁵ Haú hkûn, Petruq gi, "Ngamoq lé, dangtú hau é lichyúm tái sán kyo laq." ga tái jáng, ¹⁶ Yesuq gi, "Nungmoq, ahkuí le haú-í yhang go nyi ashí kô luq?" ¹⁷ Nhut má wang lo é haí jung le, wamdaum hkaú má je wang ló mù, gungdu mai dum htoq ló é nghut lhê. ¹⁸ Nghut kôlhang, nhut mai htoq ló é gi, myit nhikhlum mai htoq ló é nghut mù, byù lé a sanséng dut nhang ri. ¹⁹ Hkâsu mù gâ le, myit nhikhlum mai htoq ló é gi, agê ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaú é hkyô, a tengmân é saksé hkâm é hkyô, lumú gansang é hkyô pé nghut ri. ²⁰ Haú pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga tái ri.

Hkanan Myiwe Myhí Rayuq É Lumjng Myit

Mrk 7:24-30

²¹ Hau htâng, Yesuq gi, haú mai Turuq eq Sidun mau shut htoq e ló bê nghut ri.

²² Haú hkûn, haú mau má nyi é Hkanan myiwe myhí rayuq gi, Yhâng chyáng lé je mù, "Dawiq é Yhangzo, Yhumsing ê, ngo lé shogyô yù laq ô! Ngá byizo gi, nat gang wang jung mù, gayai yhang nô gyn nyi ri." ga tái garú ri.

²³ Nghut kôlhang, Yesuq gi, dang rahkun le a tú tái nghut ri. Haú mù, Yhâng é chángzô pé gi, Yhâng chyáng lé je kômù, "Myiwe myhí haú lé ló nhang pyám aq; haí mù gâ le, yhang gi, nga-nhùng é htâng má châng garú nyi ri." ga tái akô.

²⁴ Yesuq gi, "Byuq byuq é sau pé su nghut nyi é Israellaq byu pé chyáng sheq, Ngo lé nhang kat é ru nghut lhê." ga tái ri.

²⁵ Haú hkûn, myiwe myhí haú gi, Yhâng é hí má lé mù hkyihput htug lui, "Yhumsing ê, ngo lé garúm yù laq ô!" ga tái ri.

²⁶ Yesuq gi, "Zô wui chyáng má é zoshuq lé yù mù, hkuí pé lé byi tsó é jung a nghut." ga tái jáng, ²⁷ myiwe myhí haú gi, "Yhumsing ê, haú kùm nghut ri; nghut kôlhang, hkuí pé lhang, yhumsing hpô é zohpoq mai gyó é zang cham zang htâng lé, zô akô mhai." ga dum tái ri.

²⁸ Haú mù, Yesuq gi, "Myiwe zo ê, náng é lumjng myit gi, kô nyi ri! Nang dùng é hkyô lé gyo byi bê nghut lhê." ga tái ri. Haú hkûn jáng, myiwe myhí hau é byizo le ge byuq bê nghut ri.

Byù Myi Hkying Lé Byi Tsó É Hkyô
Mrk 8:1-10

²⁹ Yesuq gi, haú mai htoq ló lui, Galile nhông yàm má é je mù, bùm shut doq ló lui, ló zung nyi ri. ³⁰ Haú hkûn, byù moq mó gi, hkyí hten bang, myoqjit bang, gung-yùn bang, nhut jit bang eq nô bang gotú myo myo lé shuí lé ló kômù, Yhâng é hkyí wang

má lé nyhi to kô é nghut lui, Yhang gi, haú bang lé lhoq gê byi ri. ³¹ Haú shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyí hten bang hkyô wó só é lé le, myoqjit bang myoq wó myang é lé le, myàng kôjáng, wú maú kômù, Israellaq é Garai Gasang lé hkya-ôn bum akô nghut ri.

³² Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyi bò bê, haí le a myàng zo kó nghut ri. Yhangmoq, hkyolat má mut yut ló yut kó abe, yhangmoq zômto gú lé, Ngò a nhang kat naù." ga tái ri.

³³ Haú hkûn, Yhâng é chángzô pé gi, "Isù é yoso má nhing, byù shí myhò bang lé luq shoq byi tso rá zoshuq gi, hkarâ é wó rá lú?" ga tái akô.

³⁴ Yhang gi, "Nungmoq, muk hkâ-myhó long wó akô lú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tái akô.

³⁵ Haú mù, Yhang gi, byù hpùng lé, myigùng htoq má zùng nhang ri. ³⁶ Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpê lui, haú chángzô pé lé byi jáng, yhangmoq gi, byù hpùng lé gâm byi akô nghut ri. ³⁷ Yhangmoq lhunglhang bang zô gyí bùm kô é htâng má, haú chángzô pé gi, amyit ahtàng lé nyhit mung bying shoq wó guq tsing yu ashí kô nghut ri. ³⁸ Haú hkûn zô é bang má, myiwe wui eq zoshàng wui lé a nghap lhôm é za, yuqgê wui baú myi hkying yuq bô ri. ³⁹ Yesuq gi, byù hpùng lé ló nhang pyám é htâng má, lhai má wang ji mù, Magadan mau shut dap e ló bê nghut ri.

16

Kumhá Dung Kô É Hkyô

Mrk 8:11-13; Luk 12:54-56

¹ Hparishe pé eq Saduke pé gi, Yesuq chyáng lé je kômù, Yhang lé chyam wú é dông, mauhkung má é kumhá kut shit rá matú, dùng akô.

² Haú mù, Yhang gi, yhangmoq lé, "Nungmoq gi, myinhâng je jáng, 'Mau hpong rá nghut lhê, hkâsu mù gâ le, mauhkung ne ri.' ga le, ³ napkyó lé nghut jáng, 'Hkú-nyí laidun lò rá nghut lhê, hkâsu mù gâ le, mauhkung nè mù, noq ri.' ga le, lhaq tái akô. Nungmoq gi, mauhkung é isâm lé wú mù sê gam hkoq yù kô é nghut kôlhang, shí ipyat lhê é kumhá lé gi, a sê gam hkoq yù kô nghut ri. ⁴ Agê ashop é eq lhum a zui é ipyat shí gi, limik kumhá lé ho nyi akô; nghut kôlhang, Yonaq é kumhá mai lai lui, gotú haí le tún shit rá a nghut." ga tái ri. Hau htâng, Yesuq gi, yhangmoq chyáng mai htoq ló bê nghut ri.

Hparishe Pé Eq Saduke Pé É Múnchi
Mrk 8:14-21

⁵ Yhangmoq, nhông hé hpoq shut gũ dap ló kô é hkũn, haũ chángzô pé gi, muk yu chung rà lé tô-myhĩ pyãm akô. ⁶ Haũ hkũn, Yesuq gi, "Hparishe pé eq Saduke pé é múnchi lé, sidiq luĩ, koi pyãm nyi keq." ga, yhangmoq lé tai kat ri.

⁷ Yhangmoq gi, "Nga-nhúng, muk a yu chung é yanmai, haũ su ga tai é nghut ri." ga luĩ, tai lhum bum akô nghut ri.

⁸ Yhangmoq haũ su tai lhum nyi kô é lé Yesuq sé jáng, yhangmoq lé, "Lumjing myit shaũ é bang ê, muk a bo é hkyô lé, haĩ mũ tai lhum nyi akô lúh? ⁹ Ahkuĩ jé shoq, nungmoq gi, a sê gyo shi kô lúh? Muk ngo lóng eq byũ ngo hkying lé byi tsô é htang, nungmoq hkâ-myhó mung wó dum guq tsing yũ kô é lé le, ¹⁰ muk nyhit lóng eq byũ myi hkying lé byi tsô é htang, nungmoq hkâ-myhó mung wó dum guq tsing yũ kô é lé le, nungmoq a myit bun kô lúh? ¹¹ Ngò gi, muk eq séng luĩ tai é a nghut é lé, nungmoq, hkâsu mù a sê gyo kô é lúh? Hparishe pé eq Saduke pé é múnchi lé koi pyãm keq nghũ tai é ru nghut lhê." ga tai ri. ¹² Haũ hkũn sheq, Yhang tai é gi, muk má chung é múnchi lé koi pyãm rà matú tai é a nghut e za, Hparishe pé eq Saduke pé é mhoqshit hkyô lé koi pyãm rà matú tai é ru nghut é lé, yhangmoq sé gyô akô nghut ri.

Yesuq Lé, Petruq Yin Yu É Hkyô
Mrk 8:27-30; Luk 9:18-21

¹³ Yesuq gi, Kesare-Hpilipi wà mó nãm má é mau má jé é hkũn, Yhâng é chángzô pé lé, "Haũ Byu Yhangzô gi, ó yuq nghut lhê ga, byu pé tai akô lúh?" ga myĩ ri.

¹⁴ Haũ hkũn, yhangmoq gi, "Ra-am gi, Wui-myhup Sará Yohan ga, gôbang gi, Eliyaq ga, dum ra-am gi, Yeremiaq, a nghut jáng, gotũ myiqhtoi rayuq yuq nghut ri ga, tai akô." ga tũ tai kôjáng, ¹⁵ Yhang gi, "Haũ jáng, nungmoq gi, Ngo lé ó yuq nghut lhê nghu akô lúh?" ga, yhangmoq lé xoq myĩ ri.

¹⁶ Haũ hkũn, Simun Petruq gi, "Nàng gi, rũ dui nyi é Garai Gasang é Yhangzô, Hkrisduq nghut ri." ga tũ tai ri.

¹⁷ Haũ mù, Yesuq tũ tai é gi, "Yonaq é yhangzô Simun ê, năng gi, hkungso wó nyi ri; hkâsu mù gà le, nang lé haũ hkyô tũn shit é gi, byũ mai a nghut, mauhkũng htoq má nyi é Ngá é Iwa mai tũn shit é ru nghut lhê. ¹⁸ Ngò, nang lé tai lé, năng gi, Petruq* nghut luĩ, luqgok shĩ má, Ngò, Ngá é noqkuq hpung lé xuq to rà nghut mù, haũ moming hkũmdong pé gi, hpung haũ lé wó ùng rà a nghut. ¹⁹ Mauhkũng mingdán é zoqshi pé lé, Ngò, nang lé ap byi rà nghut lhê; myigũng htoq má, năng tũ to má tũ to lé, mauhkũng htoq má le, tũ to rà nghut lhê;

myigũng htoq má, năng lhoq lhut má lhoq lhut lé, mauhkũng htoq má le, lhoq lhut byi rà nghut lhê." gà ri. ²⁰ Hau htang, Yhang Hkrisduq nghut é hkyô lé, ó lé le a tai kyo rà matú, Yhâng é chángzô pé lé tai hkũn kat ri.

Yesuq Gi, Yhang Shĩ Rà Lé Hĩ Te Tai É Hkyô

Mrk 8:31—9:1; Luk 9:22-27

²¹ Yesuq gi, Yhang Yerusalem wà mó má ló mù, suwũn wui, hkyangjong agyi pé eq tará sará pé é loq má, zing-ri é myo myo lui zo luĩ, sat pyãm é hui ra rà nghut kôle, sum nyi nghũ rà buinyi má, lhoq toq yu é hui rà nghut é hkyô lé, haũ hkũn mai, Yhâng é chángzô pé lé tai kyo hi ló bẽ nghut ri.

²² Haũ mù, Petruq gi, Yhang lé rahkyam shut shuĩ htoq yũ mù, "Yhumsing ê, haũ hkyô Nàng chyáng hkâ-nhám le a dut sháng gaq." ga Yhang lé tân ri.

²³ Yesuq gi, lhing wũ kat mù, Petruq lé, "Tsdán năng, Ngá chyáng mai hpang aq! Nàng gi, Garai Gasang eq sêng é hkyô lé a myit e za, byũ eq sêng é hkyô lé za myit é sũ nghut mù, Ngá é matú myit leqbat jowò nghut ri." ga tai ri.

²⁴ Hau htang, Yhang gi, Yhâng é chángzô pé lé, "Ngá htang cháng naũ sũ ó yuq nghut kôle, yhumsing gũng yhumsing he-ngik pyãm mù, yhumsing é tapzing lé waq chung luĩ, cháng ra rà nghut lhê. ²⁵ Hkâsu mù gà le, yhumsing é asak lé hkyi yũ nàu sũ ó yuq nghut kôle, asak sum rà nghut lhê; nghut kôlháng, Ngá é yanmai, yhumsing é asak sũm pyãm é sũ kũm gi, asak wó yũ rà nghut lhê. ²⁶ Byũ gi, mingkan gón lé wó sing to kôlháng, yhumsing é asak woi-nyĩ sũm byuq é nghut le gi, yhang é matú, hai akyũ bò rà lúh? Byũ gi, yhumsing é asak woi-nyĩ lé, hai eq wó htaĩ yũ rà lúh? ²⁷ Haũ Byu Yhangzô gi, Yhâng Wá é hpungwup shing kang bo é eq, Yhâng Wá é maumang lagyô pé eq rahá jé lé ló rà nghut lhê; haũ hkũn, Yhang gi, yuq hkangmó lé, yhumsing kut lai bẽ eq rajung za akyũ byi rà nghut lhê. ²⁸ Ngò, nungmoq lé teng za tai kôle, ahkuĩ shĩ má yap to bang ra-am gi, haũ Byu Yhangzô, Yhâng é mingdán eq jé lé lo é lé, a myang é za shĩ kô rà a nghut." ga tai ri.

17

Yesuq, Isâm Htai Lo É Hkyô
Mrk 9:2-13; Luk 9:28-36

¹ Hkyuq nyi lai htang má, Yesuq gi, Petruq lé le, Yakuq eq yhanggu Yohan nhiktang lé le, shuĩ chung mũ, yhangmoq baũ myhang é bũm ralhũm má doq ló akô. ² Haũ má, yhangmoq é myoq hí tẽ má, Yesuq é ihpyô isâm htaĩ byuq mù, Yhâng é myoqdong gi, bũi su duqbo tô é eq, Yhâng é mebu gi,

* 16:18 Grik dõng Petruq gà é gi, luqgok lé gà é nghut lhê.

maubò su hpyu zan tô ri. ³ Haù hkùn jáng, Mosheq eq Eliyaq gi, yhangmoq é hí má htoq shit mù, Yesuq eq dáng nyo lhùm nyi akò.

⁴ Haù mù, Petruq gi, Yesuq lé, "Yhumsing ê, shí jowò má nga-nhúng nyi le ge ri. Nàng ô nau é nghut le gi, Náng é matú ralhùm, Mosheq é matú ralhùm, Eliyaq é matú ralhùm kut, ngò zúm sùm lhum saí bá." ga tai ri.

⁵ Petruq dang ru tai nyi ashí le, duqbò é mhut gi, yhangmoq lé htuq zing lô mù, mhut hkaù mai htoq lo é htê gi, "Shí yuq gi, Ngò chytidap é Ngá Zo nghut lhê; Yhang má Ngò myit dik nyi lhê. Yhàng é dang gyo keq." gâ ri.

⁶ Haù su gâ é htê lé, chángzò pé wó gyo kôjáng, yhangmoq gi, gyuq nân mù, myigùng má gop bùm bekò nghut ri. ⁷ Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat lui, "Toq keq, hkâgyuq kó." ga tai ri. ⁸ Yhangmoq tu wú kat kò le, Yesuq mai lai lui, ó lé le a myàng lo kó nghut ri.

⁹ Bùm mai taù gyó lô kô é hkùn, Yesuq gi, "Ahkuí nungmoq myang é hkyó lé, haù Byu Yhangzo shí é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé tai hkùm tô ri.

¹⁰ Haù jáng, chángzò pé gi, "Eliyaq hí lé ra rá nghut lhê ga, tará sará pé haí mù tai kô é lúhú?" ga, Yesuq lé myí akò.

¹¹ Haù hkùn, Yesuq gi, "Eliyaq hí lé lui, lhunglhang lé hen lajàng tô rá gâ é gi, têng lhê. ¹² Nghut kôlhang, Ngò, nungmoq lé tai kôlé, Eliyaq gi, jé lé bê nghut lhê; nghut kôlé, yhangmoq gi, yhang lé a lhom wú sé kômù, yhangmoq ô nau é dòng banshoq kut bekò nghut ri. Haù eq rajung za, haù Byu Yhangzo le, yhangmoq é loq má hpuzo rá nghut lhê." ga tù tai ri. ¹³ Haù hkùn sheq, Yhang tai nyi é gi, Wuí-myhup Sará Yohan eq sêng é hkyó nghut é lé, haù chángzò pé sé gyo akò nghut ri.

Nat Wang Júng Sù Lé Lhoq Gê Byí É Hkyó
Mrk 9:14-32; Luk 9:37-45

¹⁴ Yhangmoq, byù moq mó pé chyáng dum taù jé lô kô é hkùn, byù rayuq gi, Yesuq chyáng lé jé mù, hkyihput htuq lui, ¹⁵ "Yhumsing ê, ngá é yuzò pé shogyò yù laq; yhang gi, mhúngtuq tuq lui, gyai yhang jamjaù nyi ri. Myihkyóm má le, wui má le, anum num lêng wàng wàng dut nyi ri. ¹⁶ Yhang lé, Náng é chángzò pé chyáng shuí é kôlhang, yhangmoq a wó lhoq gê byi kó nghut ri." ga tai ri.

¹⁷ Haù mù, Yesuq gi, "Lumjing myit a bo é eq agè ashop é amyù pé é, Ngò gi, hkâ-myháng jé shoq nungmoq eq rahá nyi

mù, wó jân nyi rá lúhú? Yuqgè zo haù lé, Ngá chyáng shuí lé lô keq." ga tù tai kat ri. ¹⁸ Yesuq gi, nat gang lé tân kat jáng, nat gang haù gi, yuqgè zo haù yuq chyáng mai htoq lô byuq bê nghut mù, haù hkùn jáng, yuqgè zo haù gi, ge byuq bê nghut ri.

¹⁹ Hau htàng, chángzò pé gi, ó a nyi é u má, Yesuq chyáng lé lô kômù, "Ngamoq gi, haí mù, nat haù lé a wó hkat htoq é lúhú?" ga, lé myi kôjáng, ²⁰ Yhang gi, "Nungmoq é lumjing myit shaù é yanmai nghut ri. Ngò, nungmoq lé teng za tai kôlé, nungmoq é lumjing myit anghí cham í za hkálháng bò kô é nghut le gi, bùm shí lé, "Hé shut htot lô aq." ga tai le, htot rá nghut lhê. Nungmoq a wó kut é haí lhang joq rá a nghut. ²¹ Shí jung gi, kyúdung é eq zoshuq gám é dòng za a nghut jáng, a htoq lô é nghut lhê.*" ga dum tù tai ri.

²² Yhangmoq, Galile mau má rahá zup nyi kô é hkùn, Yesuq gi, yhangmoq lé, "Haù Byu Yhangzo gi, byu pé é loq má ap pyâm é hui zo rá nghut lhê. ²³ Haù bang gi, Yhang lé sat pyâm kó rá nghut lhê; nghut kôlhang, Yhang gi, shi é htàng sum nyi nghú rá nyi má lhoq dui toq é hui rá nghut lhê." ga tai ri. Haù mù, haù chángzò pé gi, gyai yhang gyó yón nyi bekò nghut ri.

Noqkuq Yhùm Hkansé Kat É Hkyó

²⁴ Yesuq eq Yhàng é chángzò pé gi, Kaperna-um wà má jé kô é hkùn, noqkuq yhùm hkansé hkyuí bang gi, Petruq chyáng lé jé kômù, "Nungmoq é sará gi, noqkuq yhùm hkansé a kat lúhú?" ga myí akò.

²⁵ Petruq gi, "Kat lhê." ga tù tai ri.

Hau htàng, Petruq yhùmhkaù má wàng lô le, Yesuq hí lhom tai é gi, "Simun é, mingkan hkohkam pé gi, kang eq hkansé pé lé, ô pé chyáng mai guq yu akò lúhú? Yhumsing byu pé chyáng mai lúhú? Haù a nghut jáng, góbàng chyáng mai lúhú? Náng, hkásu wó myit lhê lúhú?" gâ ri.

²⁶ Haù mù, Petruq gi, "Góbàng chyáng mai nghut ri." ga tù tai jáng, Yesuq gi, "Haù su nghut le gi, yhumsing byu pé gi, lut akò nghut ri. ²⁷ Nghut kôlhang, yhangmoq é i-myit a ngón a dut kó sháng gaq, nhông má é mù, ngo-nhe é hkyó aq. Sâng-hi wó nhê yu é ngozò é nhut lé lãng há kat jáng, ngùn htúngchap rachap lé myàng rá nghut lhê. Haù lé yù mù, Ngá é matú eq náng é matú, yhangmoq lé lô byi aq." ga tai ri.

18

Kô Dik Sù Gi, Ó Yuq Nghut Lhê Lúhú?

Mrk 9:33-37, 42-48; Luk 9:46-48; 17:1-2

¹ Haù hkùn, haù chángzò pé gi, Yesuq chyáng lé jé kômù, "Mauhkung mingdán má, kô dik sù gi, ó yuq nghut lhê lúhú?" ga myí akò.

* 17:21 Chyúmbun shí gi, chyúmding myo myo má a bo é nghut lhê.

² Yesuq gi, zoshâng zo rayuq lé wut yù mù, yhangmoq é gung gung má shap to lui, ³ taí é gi, "Ngò, nungmoq lé teng za taí kôlé, nungmoq gi, myit htaí lhik lui, zoshâng zo wui su dut kô é za a nghut jâng, mauhkung mingdán má hkâ-nhâm le wó wâng kó rá a nghut. ⁴ Haú mù, zoshâng zo shí yuq su, yhumsing é i-myt wó lhoq nyhum é sù ó yuq nghut kôle, mauhkung mingdán má, kô dik sù nghut ri.

⁵ Shí sù é zoshâng lé, Ngá é mying mai hap yu é sù ó yuq nghut kôle, Ngo lé hap yu é sù nghut bê. ⁶ Nghut kôlhâng, Ngo lé lumjîng é zoshâng wui mà é rayuq yuq lé, mara kut shut nhang é sù gi, yhâng é lingzing má luqluí long mó tuí hut byi lui, nik é wuimau má, dú hkyô pyâm é huí é nghut le gi, yhâng é matú je gè rá nghut lhê.

⁷ Haú mingkan gi, byu pé lé mara kut shut nhâng jang joq é yanmai, dingnyé wó ri. Haú mara kut shut nhâng hkyô gi, htoq lugù bê; nghut kôlhâng, haú lé lhoq htoq sù gi, dingnyé wó ri. ⁸ Náng é loq èq, a nghut jâng, náng é hkyi èq, nang lé mara kut shut nhang é nghut le gi, haú lé hpyit dù pyâm aq. Ahtum abyuq é myi má, hkyi hkúm loq hkúm gù dú hkyô pyâm é huí rá htoq má, hkyi loq a hkúm é za, asak wó yu é nghut le gi, náng é matú je ge ri. ⁹ Náng é myoqjí èq, nang lé mara kut shut nhang é nghut le gi, haú lé lap choq yù mù, dú pyâm aq; myoqjí í jí dap gù ngaraí myi má dú hkyô pyâm é huí rá htoq má, myoq rají eq za, asak wó yu é nghut le gi, náng é matú je ge ri.

Byuq Byuq É Sau

Luk 15:3-7

¹⁰ Shí sù é zoshâng zo wui mà é rayuq lé lhang a wú tiq rá matú, sidiq nyi keq. Hkâsu mù gá le, Ngò, nungmoq lé taí kôlé, mauhkung mà é yhangmoq é maumang lagyô pé gi, mauhkung htoq mà é Ngá Wá é myoqdong lé, hkâ-nhâm le myang nyi akô. ¹¹ (Hkâsu mù gá le, haú Byu Yhangzo gi, byuq byuq bê bang lé hkyi yù rá matú, jé lé é nghut lhê.)*

¹² Byu rayuq gi, sau rashô du wó é nghú sháng, sau haú gù mà é radu byuq byuq é nghut jâng, haú gaú xe gaú du lé, bùm pé má nyhi pyâm to lui, byuq byuq é sau lé a châng ho é nyi rá lhu? Haú lé, nungmoq hkâsu wó myit ngam akô lhu? ¹³ Ngò, nungmoq lé teng za taí kôlé, yhang gi, haú byuq byuq é sau haú lé myang ho é hkún, a lám byuq é sau gaú xe gaú dù é matú gabú é htoq má, haú dù matú je riyhang gabú ri. ¹⁴ Haú eq rajung za, mauhkung htoq mà é nungmoq é Iwa gi, shí tiq bang mà é rayuq htên byoq byuq rá lé lhang, ô nau é a nghut.

Mara Kut Shut É Gumang Hpó Lé Hkâsu Kut Râ Hkyô

¹⁵ Náng é gumang hpó, nang lé mara kut shut é nghut jâng, yhâng chyáng é mù, nungnhik baú za nghut é hkún, yhâng é mara lé tûn shit aq. Yhang, náng é dang lé gyô é nghut jâng, nàng gi, gumang rayuq dum wó bê nghut ri. ¹⁶ Nghut kôlhâng, yhang, náng é dang lé a gyô é nghut jâng, 'Mara hun é hkyô hkangmó lé, saksé í yuq sum yuq lòm jâng, wó lhoq teng sháng gaq.¹⁶ gá tô é eq rajung za, nàng, gotú byu ra-i yuq lé shuí chûng aq. ¹⁷ Yhang gi, haú bâng é dang lé le a lhom yu é nghut jâng, haú hkyô lé, noqkuq hpúng má shit kyo aq; hpúng é dang lé le a gyô é nghut jâng, yhang lé, a lumjîng é byu rayuq dong le, kang guq sù rayuq dong le sôn pyâm aq.

¹⁸ Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkung htoq má le, tuí to rá nghut lhê; myigùng htoq má, nungmoq lhoq lhut má lhoq lhut lé, mauhkung htoq má le, lhoq lhut byi rá nghut lhê.

¹⁹ Ngò, nungmoq lé dum taí kôlé, myigùng htoq má, nungmoq mà é í yuq myit hui lui, haí lé dung kôlhâng, mauhkung htoq mà é Ngá Wa gi, haú nhik lé gyo byi rá nghut lhê. ²⁰ Hkâsu mù gá le, Ngá mying lé lang lui, í yuq sum yuq zup zing é jang hkâm nghut kôlhâng, haú bâng é gyoro má Ngò nyi lhê." gá ri.

Shogyo Nhikmyin A Sé É Jùn Hpó É Dantú

²¹ Haú hkún, Petruq gi, Yesuq chyáng huí é mù, "Yhumsing è, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra rá lhu? Nyhit dâm jé shoq hkyut byi ra rá lhu?" ga myi ri.

²² Haú jâng, Yesuq tú tai é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi rá lhê.

²³ Mauhkung mingdán gi, yhumsing é dui-nhâng zoshâng wui é jìhpán lé jep nau é hkohkâm rayuq eq du ri. ²⁴ Yhang gi, jìhpán lé jep hí ló é u lé, yhang chyáng ngùn wan myo myo chyin dap to sù lé shuí lé lo akô.

²⁵ Haú yhumsing hpó gi, haú yuq chyin a wó xap é yanmai, chyin wó yù rá matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ùng pyâm rá hkunmó hkyô kat ri.

²⁶ Haú mù, dui-nhâng zoshâng haú yuq gi, yhâng é hí má hkyihput htoq lui, 'Ngo lé myit hng byi shi laq; banshoq lé, ngò xap rá.' ga dúng tóngbán ri. ²⁷ Haú dui-nhâng zôshang é yhumsing hpó gi, haú yuq lé wú shogyo lui, chyin banshoq lhut pyâm byi mù, nhang kat ri.

* 18:11 Bun zo shí gi, chyúmding myo myo má a bo é nghut lhê.

☆ 18:16 Tará Pun 19:15

† 18:28 Denari rachap

gi, ra-nyi lhê é byu rayuq é zuihpau eq wui ri.

28 Nghut kôlhang, dui-nhâng zoshâng haù gi, htoq lô mù, yhang lé, denari† rashô chyîn dap tô é dui-nhâng zoshâng luzúm rayuq lé myàng jáng, haù yuq é lingzing má gyaq myhik zing to mù, 'Ngo lé dap tô é chyîn hân xap aq!' ga tai ri.

29 Haù hkùn, yhang é luzúm dui-nhâng zoshâng haù gi, yhang é hí má hkyihput htuq luí, 'Ngo lé myit hng byi shi laq; ngò xap rá.' ga dũng tóngbán ri.

30 Nghut kôlhang, yhang gi, a gyo byi e za, yhang é chyîn dum wó xap é hkùn jé shoq, haù yuq lé htóng hkyô pyám nhâng ri. 31 Gotù dui-nhâng zoshâng wui gi, haù hkyô lé myàng kôjáng, i-myt wú nõ kôluí, yhangmoq é yhumsing hpó lé, haù hkyô banshoq lô tai kyô akò.

32 Haù mù, haù yhumsing hpó gi, dui-nhâng zoshâng haù lé wut hâng yu mù, 'Agè ashop é dui-nhâng zoshâng ê, nàng, ngo lé dũng tóngbán é yanmai, nàng, ngo lé dap é chyîn banshoq lé, ngò lhut pyám byi bê nghut lhê mhai. 33 Haù su é nhing, ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut lú?' ga tai luí, 34 yhang gi, nhikjum yo mù, yhang é chyîn ban xap é hkùn jé shoq, jamjau hui zo rá matú, yhang lé, htóng suwún pé chyáng ap byi pyám bê nghut ri.

35 Nungmoq é gumang wui lé, nungmoq é myit mai mara a wó hkyut byi kô é nghut jáng, mauhkũng htoq tsáng myhâng mâ é Ngá Wa le, nungmoq lé haù đông kut rá nghut lhê." gâ ri.

19

Myi Làng Gâng É Hkyô *Mrk 10:1-12*

1 Yesuq gi, mhoqshit é dang haù pé lé ban tai jáng, Galile mau mai htoq lô mù, Yodan làng tú tap mã é Yuda mau mã é jé ri. 2 Byù moq mó gi, Yhâng htâng cháng kô é nghut mù, Yhang gi, haù bang mã é nõhpyo hui bang lé, haù má lhoq gè byi ri.

3 Haù hkùn, Hparishe pé ra-am gi, Yhâng chyáng lé jé kômù, Yhang lé chyam wú é đông, "Byù rayuq gi, hai hkyô mai nghut nghut, yhumsing é yhangmyi lé lhoq kàng pyám le, tará wang lhê lú?" ga myi akò.

4 Haù jáng, Yhang tú tai é gi, "A-nham sâng-hi lé, Hpân Sù, 'byu hpan é hkùn, yuqgè eq myiwe lé hpan é nghut lhê.' 5 'Hau é yanmai, yuqgè gi, yhumsing é ñu iwâ chyáng mai htoq luí, yhangmyi eq rahá rading ralhum za kut nyi mù, yhangnhik gi, gungsho ralhum za dut byuq kô rá nghut lhê.' 6 Haù tô é lé, nungmoq a nghap wú kó lú? 6 Haù mù luí, yhangnhik gi, í yuq a nghut lô e za, rayuq za dut bê nghut ri. Haù mù luí, Garai

Gasang lhoq tsùm tô é lé, byù gi, a lhoq kang sháng gaq," gâ ri.

7 Haù hkùn, yhangmoq gi, "Haù lé nhing, yuqgè rayuq gi, lhoq kang laiká za ká byi mù, yhangmyi lé wó nhang pyám lhê ga, hai mù, Mosheq, hkunmó hkyô tô lhê lú?" ga, Yhang lé dum taù myi akò.

8 Haù mù, Yesuq gi, "A-nham sâng-hi mai gi, haù đông a nghut. Nghut kôlhang, nungmoq é myit nhikhum htân kô é yanmai, nungmoq é yhangmyi pé lé lhoq kang rá ahkáng, Mosheq byi tô é ru nghut lhê. 9 Ngò, nungmoq lé tai kôlé, sulàng lú é za a nghut jáng, yhumsing é yhangmyi lé kàng pyám mù, myiwe gotù dum hâng yu é sù ó yuq nghut kôlé, su-myi lú é sù dut bê." ga, yhangmoq lé dum tú tai ri.

10 Haù hkùn, haù chángzô pé gi, "Myi làng hkyô má haù đông ru nghut le gi, a yu le lhang je ge nyo ri." ga tai akò.

11 Haù mù, Yesuq gi, "Yuq hkangmó gi, dang haù lé wó hap yu é a nghut, wó hkâm rá jeju wó é bang za sheq, wó hap yu é nghut lhê. 12 Byù ra-am gi, ñu unghkaù mai yhang, yuqgè a jé gũ hku lé lo é bang nghut akò; ra-am gi, góbang èq kut é yanmai, yuqgè a jé dut byuq akò; ra-am nghut jáng, mauhkũng mingdán é matú, yuqgè a jé rá đông kut yu pyám akò nghut ri. Shi hkyô lé wó hap yu sù gi, hap yù sháng gaq." ga dum tai ri.

Zoshâng Wui Eq Yesuq *Mrk 10:13-16; Luk 18:15-17*

13 Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shui lé lo akò. Haù chángzô pé kúm gi, haù shui lé lô bang lé lhom tãn hkùm akò nghut ri.

14 Nghut kôlhang, Yesuq gi, "Haù zoshâng wui lé, Ngá chyáng lé nhâng keq; yhangmoq lé hkâhkùm zing to kó; hkâsu mù gâ le, mauhkũng mingdán gi, haù sù é bãng é mingdán ru nghut lhê." ga tai kat ri. 15 Yhang gi, zoshâng wui htoq má loq ke shimân byi mù, haù jowò mai htoq lô bê nghut ri.

Sùt Wó É Zorâm Rayuq É Hkyô *Mrk 10:17-31; Luk 18:18-30*

16 Byù rayuq gi, Yesuq chyáng lé jé mù, "Sarà é, ahtum abyuq é asak wó yù rá matú, ge é muzó hai kut ra rá lú?" ga myi ri.

17 Haù jáng, Yesuq gi, "Ge é hkyô eq séng luí, hai mù Ngo lé myi lhê lú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tará pé lé cháng aq." ga tú tai ri.

18 Haù yuq gi, "Hká gũ lé lú?" ga dum myi jáng, Yesuq gi, "Byù hkâsat, su-myi hkâlú, hkâhkau, a teng a mán é saksé hkâhkâm,

19 nángnu nángwa lé hkungga aq,* ga le, 'náng gúng lé náng chyitdap e su, náng é chyangnâm mã é bang lé le chyitdap aq.* ga le bo tó ri." ga tái kat ri.

20 Haú hkûn, zorâm hpó haú gi, "Haú pé banshoq lé, ngò cháng bê nghut lhê; haí kut rá ashí lú?" ga dum taú myí ri.

21 Yesuq gi, "Nàng, gumjup sù dut nau le gi, ló mù, nàng wó é sutzè pé lé ùng pyám lui, myùng bang lé byí pyám aq; haú jáng, nàng, mauhkûng htoq mã sutzè wó rá nghut lhê; haú mù, Ngá htàng lé cháng aq." ga tú tái ri.

22 Zorâm hpó haú gi, sutzè gyai wó sù nghut é yanmai, dang haú lé wó gyo jáng, gyai yhang myit a ngón é èq ló byuq bê nghut ri.

23 Hau htàng, Yesuq gi, Yhâng é chángzô pé lé, "Ngò, nungmoq lé teng za tái kôlé, sutzè wó bang gi, mauhkûng mingdán wó wàng rá gyai yhang wui ri. 24 Hau htoq agó, Ngò, nungmoq lé tái kôlé, sutzè wó sù rayuq, Garai Gasâng é mingdán mã wó wàng rá htoq, gola-uq radu âpno mai wó wang lái rá gi, je lui rá nghut lhê." ga tái ri.

25 Haú chángzô pé gi, haú su gá é lé wó gyo kôjáng, haú ru nghut le gi, ó yuq za hkyi yu é hui rá nghut lhê lú?" ga Yhang lé myí akò nghut ri.

26 Haú hkûn, Yesuq gi, yhangmoq lé wú kat mù, "Haú hkyó lé byú mai gi, wó kut rá a nghut; nghut kôlhang, Garai Gasang gi, lhunglhang lé wó kut é Sù nghut lhê." ga tái ri.

27 Haú hkûn, Petruq gi, Yhang lé, "Ngamoq gi, wó é gú lhunglhang lé tô pyám to lui, Náng htàng cháng bê nghut lhê. Ngamoq, haí wá wó rá nghut lhê lú?" ga myí kat ri.

28 Haú mù, Yesuq tú tái é gi, "Ngò, nungmoq lé teng za tái kôlé, lhunglhang lé asik dum sai dut nhang é mã, haú Byu Yhangzo gi, Yhâng é hpungwup bo é hkohkâm-tanghkuq mã zùng tô é hkûn, Ngá htàng châng é bang nungmoq le, hkohkâm-tanghkuq raxe í lhum htoq mã zùng to kômù, Israelaq amyú raxe í hú lé jéyáng kó rá nghut lhê. 29 Ngá é yanmai, yhumsing é yhùm, nhiiktàng wui, ínu íwa, zo dù wui eq yò pé rajung jung lé tô pyám tô é sù ó yuq nghut kôlé, rashô tú akyú myo jat shoq wó rá nghut é htoq agó, ahtum abyuq é asakle, wó yú rá nghut lhê. 30 Nghut kôlhang, hí nghut nyi é bang myo myo gi, htàng gyó byuq kó rá nghut mù, htàng gyó nyí bang yuq gi, hí bekò rá nghut lhê.

20

Tsibiyiq Hkyâm Mù Zui Bang Lé Dangtú Yu É Hkyó

1 Hkásu mù gá le, mauhkûng mingdán gi, yhumsing é tsibiyiq hkyâm mã mù zui nhâng

* 20:3 Chyúmdang ra-am mã, sum hkyíng ga chung tô é gi. Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hí lhê.

rá langchyáng é lùng rá ga, napsùn noq le htoq e ló é hkyâm yhumsing eq dù ri. 2 Yhang gi, ra-nyí é matú denari rachap byi rá dông, haú bang eq myit huí yù mù, yhangmoq lé, yhâng é tsibiyiq hkyâm mã nhang hàng kat ri.

3 Napkyó gau hkyíng* kô mã, yhang gi, htoq e ló le, hai mù le a kut é za, gai mã yap tô é bang ra-am lé é myang ri. 4 Haú mù, yhang gi, haú bang lé, 'Nungmoq le, ngá é hkyâm mã mù é zui keq; byi àng é ahpau, ngò, nungmoq lé byi rá nghut lhê.' ga tái jáng, yhangmoq gi, e ló bekò nghut ri.

5 Hau htàng, yhang gi, raxe í hkyíng mã le, myinhhtàng sum hkyíng kô mã, dum htoq é mù, haú eq rajung za langchyáng pé é lung kat ri. 6 Myinhhtàng ngo hkyíng kô mã, yhang dum htoq e ló wú le, góbang ra-am le yap tô bum é lé, é myàng mù, haú bang lé, 'Nungmoq gi, hai le a kut é za, ra-nyí buí hai mù shí mã yap tô bum akò lú?' ga myi jáng, 7 haú bang gi, 'Ngamoq lé, ó yuq èq le a lùng kô é yanmai nghut lhê.' ga tú tái akò.

Haú hkûn, yhang gi, 'Nungmoq le, ngá é hkyâm mã mù é zui keq.' ga tái ri.

8 Myinhhtàng jé jáng, tsibiyiq hkyâm yhumsing gi, yhâng é mù shuí u sù lé, 'Haú langchyáng pé lé jì yù mù, je htàng mã lung yu é bang mai hí lui, sàng-hi lung yu é bang jé shoq, mù zui hpau byi aq.' ga tái ri.

9 Myinhhtàng ngo hkyíng mã mù wàng bang le, denari rachap chap wó yu bum akò.

10 Haú mù, je hí mã mù wàng bang gi, yhangmoq je myo wó nhò ngam akò. Nghut kôlhang, yhangmoq le, rayuq denari rachap chap za wó akò nghut ri. 11 Yhangmoq gi, haú myhó za wó yu bùm kô é yanmai, haú hkyâm yhumsing lé, 12 'Shi bang gi, je htàng mã mù lé wàng mù, náyí rahkum za mù zui kôlhang, nàng gi, ra-nyí buigyum chap buí htân yò mã mù zui é bang ngamoq eq rajung za byi ri.' ga mara hùn dang tái akò.

13 Nghut kôlhang, haú hkyâm yhumsing gi, haú bang mã é rayuq lé, 'Buinum hpó é, ngò, nang lé a tará é dông kut é a nghut. Denari rachap byi rá nghut, nàng eq ngò myit huí to bê a nghut lú?' 14 Nàng wó àng é lé yu chùng mù, ló aq. Je htàng mã mù lé wang é sù lé le, nang lé byi é myhó, ngò byí nau ri. 15 Ngá é ngùn lé, ngò kut nau é su a ge kut lú? Ngò, ge é kut le, nàng manôn ri lú?' ga tái ri.

16 Haú mù lui, htàng gyó nyí bang gi, hí bekò rá nghut mù, hí nghut nyí bang gi, htàng gyó byuq kó rá nghut lhê." gá ri.

Yesuq Gi, Yhang Shi Rá Hkyó Lé Dum Tái Ri

Mrk 10:32-34; Luk 18:31-34

17 Ahkuí, Yesuq gi, Yerusalem wà mó shut doq ló nyi é u lé, haú chángzo raxe í yuq lé, gotú kut wut yù mù, 18 "Nga-nhúng gi,

Yerusalem và mó shut doq ló nyi lhê; haú Byu Yhangzo gi, hkyangjong agyi pé eq tará sará pé é loq má ap byí pyâm é hui rá nghut lhê; haú bang gi, Yhang lé, shí rá mara byi kó rá nghut é htoq agó,¹⁹ jóng pyâm é, nhuq bat é eq tapzing má jén sat pyâm é hui rá matú, haú tungbaú pé é loq má ap pyâm kó rá nghut lhê. Nghut kólhang, Yhang gi, sum nyí ngú rá buyni má, lhoq dui toq é dum hui rá nghut lhê." ga tai ri.

*Zô Njik Matú Ínu Êq Dung Byí Ê Hkyô
Mrk 10:35-45*

²⁰ Hau htâng má, Zebedi é yhangzô nhik-tang é yhangnu gi, yhangzô nhik eq rahá jé lé lô kômù, rajung dung rá matú, Yesuq é hí má hkyihput htuq nyi ri.

²¹ Haú mù, Yesuq gi, "Nàng, haí ô nau ri lú?" ga yhang lé myi jáng, yhang gi, "Náng é mingdán má, shí ngá zô nhiktang lé, Náng é loqyò hkyam má rayuq, loqpaí hkyam má rayuq kut, zùng rá ahkáng byí laq." ga tai ri.

²² Haú hkún, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq rá góm[†] lé, nungnhik wó shuq kó rá lú?" ga myi jáng, yhangnhik tang gi, "Wó shuq lhê." ga tú tai akó nghut ri.

²³ Haú mù, Yesuq gi, yhangnhik lé, "Ngò shuq rá góm lé, nungnhik shuq ra kó rá za nghut lhê. Nghut kólhang, Ngá é loqyò, loqpaí hkyam má zùng rá ahkáng lé gi, Ngò byí jung a nghut. Jowò haú pé gi, Ngá Wa hen to byi bang é matú za ru nghut lhê." ga tai ri.

²⁴ Gotú chángzo raxê yuq gi, haú hkyô lé wó gyo kôjáng, haú nhiktang lé nhik-yô akó nghut ri. ²⁵ Haú mù, Yesuq gi, yhangmoq banshoq bang lé wut tsing yú lui, "Tungbaú pé lé uphking é ga bang gi, tungbaú pé lé up zô nyi kô é hkyô lé lé, haú eq rajung za, yhangmoq é ming up suwún wú le, yhumsing é ahkáng ayá lé chùng mù, up zô nyi kô é hkyô lé lé, nungmoq sé lhê.

²⁶ Nungmoq chyáng gi, haú su a dut kó sháng gag; haú Byu Yhangzo lháng gi, dojaú é lé hkam yú rá matú jé lé é a nghut é za, dojaú rá matú eq byú myo myô é matú, shíntai gunglik hkungga đông, Yhâng é asak lé byi pyâm rá matú sheq, jé lé é ru nghut é su, ²⁷ nungmoq má, byú mó dut nau sú ó yuq nghut kôle, nungmoq é dui-nhâng zoshâng dut ra rá nghut lhê. ²⁸ Hau htoq agó, nungmoq má ushuq dut nau sú ó yuq nghut kôle, nungmoq é jùn dut ra rá nghut lhê." ga tai ri.

*Myoqjit Í Yuq Myoq Dum Myang Ê Hkyô
Mrk 10:46-52; Luk 18:35-43*

²⁹ Yesuq eq Yhâng é chángzô pé gi, Yerihko myuq mai htoq ló nyi kô é hkún, byú moq mó gi, yhangmoq é htâng má châng e ló bum akó. ³⁰ Haú hkyô yàm má zung tô é myoqjit í yuq gi, Yesuq lai ló nyi é hkyô lé wó gyo kôjáng, "Dawiq é Yhangzo, Yhumsing é, ngá-nhik lé shogyô yú laq ô!" ga, wut garú kat akó nghut ri.

³¹ Byú moq mó gi, yhangnhik zím byuq rá matú tân hkúm kólhang, yhangnhik gi, "Dawiq é Yhangzo, Yhumsing é, ngá-nhik lé shogyô yú laq ô!" ga, je riyhang htê mó eq wut garú kat akó nghut ri.

³² Haú mù, Yesuq gi, yap kat mù, "Ngò, nungnhik lé haí kut byi rá ô nau akó lú?" ga, yhangnhik lé wut myí kat ri.

³³ Haú hkún, yhangnhik gi, "Yhumsing é, ngá-nhik myoq myàng nau ri." ga tú tai akó.

³⁴ Yesuq gi, yhangnhik lé wú shogyo lui, yhangnhik é myoqji má é záng byí ri. Haú hkún jáng, yhangnhik gi, myoq wó myàng kômù, Yhâng htâng cháng bekô nghut ri.

21

Yesuq, Yerusalem Và Mó Má Wang E Ló Ê Hkyô

Mrk 11:1-11; Luk 19:28-38; Yhn 12:12-19

¹ Yesuq eq Yhâng é chángzô pé gi, Yerusalem và mó eq chyàng lo nyi kô é hkún, Tsanlun Bùm má é Bethpage và má jé ló kôjáng, Yesuq gi, chángzo í yuq lé, ² "Nungnhik, hí má é wá má é keq; và haú má, logúng zing radu lé, logúng zo eq rahá tuí to lánng é lé, é myàng kó rá nghut lhê; haú lé hpyi yú mù, Ngá chyáng she lò keq. ³ Byú rayuq yuq, nungnhik lé rajung jung gá lò jáng, 'Shí í du lé, haú Yhumsing chúng rá ri.' gá ngú tú tai keq; haú jáng, yhang, radá dâm nhâng byi rá nghut lhê." ga Yesuq tai lui, nhang kat ri.

⁴ Haú gi, myiqhtoi dang lhoq dik rá matú dut lo é nghut ri. ⁵ Myiqhtoi dang haú gi, "Zi-un byizo* lé, shí su nhú keq; 'Wú aq, náng é hkohkám gi, nú-nhâm é myit eq logúng htoq má jì mù, nghut bê, logúng zo htoq má jì mù, náng chyáng lé lò bê nghut ri.'" ⁶ ga ri.

⁶ Haú chángzô nhik gi, e ló mù, Yesuq tai kat é eq rajung za é kut bekô nghut ri. ⁷ Yhangnhik gi, logúng me lé she lò mù, yhangnhik é buhng pé lé, haú logúng mê é htoq má ke byi kôjáng, Yesuq gi, doq jì ri. ⁸ Byú moq mó má é myo myo gi, yhangmoq é buhng lé, hkyô má hkyut hkang byí akó; ram gi, mhandng pé lé zân hkyô yú mù, hkyô

[†] 20:22 Góm gá é gi, Yesuq, jamjau hui rá hkyô eq shí rá hkyô lé, tai nau é nghut lhê. * 21:5 Zi-un byizo gá é lichyúm gi, Yerusalem byu pé gá é nghut lhê. * 21:5 Zhk 9:9 [†] 21:9 Hebre dang má, hosana gá é gi, "ahkúi hkyi yú laq" gá é nghut lhê. Nghut kólhang, bun zo 9 má gi, hkyá-on dang đông chung é nghut lhê.

má hkanq byí akò nghut ri. ⁹ Yhâng é hí má htâng má châng só nyi bum é bang gi,

"Dawiq é Yhangzo gi, hosana† nghut nyí sháng gaq ô!"

"Haù Yhumsing é mying mai jé lé lô Sù gi, hkungsò wó nyí sháng gaq ô!"¹⁰

"Htoq tsáng myhâng má, hosana nghut nyí sháng gaq ô!"

ga luí, tai garú bum akò nghut ri.

¹⁰ Yesuq, Yerusalem wá mó má wang ló é hkùn, rawá gón é bang gi, gabyông lo bùm kômù, "Shí yuq gi, ó wá nghut lhê lhà?" ga luí, myi lhum bum akò.

¹¹ Haù hkùn, byú moq mó gi, "Shí yuq gi, Galile mau, Nazaret wá byú Yesuq gá é myiqhtoi nghut lhê." ga tai akò nghut ri.

Yesuq, Noqkuq Yhùm Lé Lhoq Sansêng Pyám É Hkyô

Mrk 11:15-19; Luk 19:45-48; Yhn 2:13-22

¹² Yesuq gi, noqkuq yhùm má wang é mù, haù má é zè ung zè wui kut nyi é bang banshoq lé, hkat htoq pyám luí, ngùn htaí zo bâng é siboí pé eq hpûngkyui ung zo bâng é tanghkuq pé lé, tu mhúq pyám byí ri. ¹³ Haù hkùn, Yhang gi, "Ngá yhùm gi, kyúdung yhùm ga rá nghut lhê."¹⁴ ga ká to kôllhang, nungmoq gi, jowò shí lé 'damaq hkyûng'¹⁵ kut nyi akò." ga, yhangmoq lé tai ri.

¹⁴ Yesuq, noqkuq yhùm má nyi tô é hkùn, myoqjit bang eq hkyí hten bang Yhâng chyáng lé lô kômù, Yhang gi, haù bang lé lhom htoq gè byí ri. ¹⁵ Nghut kôllhang, hkyangjong agyi pé eq tará sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhùm má zoshâng wui garú nyi bùm kô é lé le, myàng kôjáng, wú nhik-yô bum akò nghut ri.

¹⁶ Haù mù, yhangmoq gi, "Zoshâng shí bang hai tai nyi kô é lé, Nàng wó gyô lhê lú?" ga, Yesuq lé myi kôjáng, Yhang gi, "Wó gyô ri. Nungmoq gi, Zoshâng wui eq nyheqnú pé é nhut mai hkya-on kungtôn rá matú, nàng lajàng to bê nghut ri."¹⁷

ga ká tô é lé, Chyúmdang má a nghap wú kô lú?" ga yhangmoq lé tai ri.

¹⁷ Haù htâng má, Yhang gi, haù bang lé nyhi to luí, wá hkaù mai htoq ló mù, Behtani wá má é jé luí, haù myîn, haù má bíng yu ri.

Maih páng Gâm Nyhui Kyuq Shi Byuq É Hkyô

Mrk 11:12-14, 20-24

¹⁸ Yhang gi, htang napkyò noq le, Yerusalem wá mó shut dum taù ló é hkùn, hkyô má zòmút hui bê nghut ri. ¹⁹ Haù mù, Yhang gi, hkyô yàm má yuq tô é mairpáng

gâm lé myang kat mù, chyâng e wú le, ahaq mai lai luí, hai lé le a myàng nghut ri. Haù mù, Yhang gi, shigâm haù lé, "Nàng má, hkâ-nhám le ashí a zui sháng gaq." ga tai kat ri. Haù hkùn jáng, agàm haù gi, nyhui kyuq shi ló byuq bê nghut ri.

²⁰ Haù chángzô pé gi, haù lé myàng kôjáng, maù byuq kômù, "Maih páng gâm shí gi, hai mù haù-í hân nyhui kyuq shi ló lhê lhà?" ga myí akò.

²¹ Yesuq gi, "Ngò, nungmoq lé teng za tai kôlé, nungmoq, ùng-âng é myit a bo é za, lumjìng kô é nghut le gi, mairpáng gâm má Ngò kut é muzó lé, nungmoq wó kut kó rá nghut é htoq agó, bùm shí lé, 'Htot mù, wuimau má ló gyô wàng aq.' ga tai jáng, tai é eq rajung za dut rá nghut lhê. ²² Nungmoq, lumjìng myit eq dung kô é nghut jáng, hai dúng le le wó yú kó rá nghut lhê." ga tù tai ri.

Yesuq É Ahkáng Ayá Lé Myí Chyam É Hkyô

Mrk 11:27-33; Luk 20:1-8

²³ Yesuq gi, noqkuq yhùm wàng hkaù má wang é mù, mhoqshít nyi é hkùn, hkyangjong agyi pé eq mingbyu é suwún wui gi, Yhâng chyáng lé jé kômù, "Hai ahko ahkâng eq, Nàng, shí pé lé kut nyi lhê lú? Ahko ahkâng shí, Nang lé ó yuq byí é lú?" ga myí akò.

²⁴ Haù hkùn, Yesuq gi, "Ngò le, nungmoq lé rajung myí wú kôlé, nungmoq wó tù tai kô é nghut jáng, hai ahko ahkâng eq, Ngò, shí pé kut é hkyô lé tai kyo rá nghut lhê. ²⁵ Yohan byí é baptisma gi, ó yuq é ahko ahkáng mai nghut lhê lú? Mauhkùng mai lú? A nghut jáng, byu chyáng mai lú?" ga taù myí kat ri.

Haù hkùn, yhangmoq, chòm hpyé lhum kô é gi, "'Mauhkùng mai nghut lhê.' nghú, nga-nhúng tai jáng le, 'Haù nghut le nhúng, hai mù, yhang lé a lumjìng kô é lú?' ga rá nghut; ²⁶ 'Byu chyáng mai nghut lhê.' nghú jáng le, yhangmoq lhunglhàng bang gi, Yohan lé, myiqhtoi rayuq ga lumjìng bùm kô é nghut lhê yanmai, haù bang lé, nga-nhúng gyuq rá lhê nghut." ga akò.

²⁷ Haù mù, yhangmoq gi, Yesuq lé, "Ng-amoq a sé." ga tù tai akò.

Haù hkùn, Yesuq gi, "Haù jáng, Ngò le, hai ahko ahkâng eq shí pé kut é hkyô lé, nungmoq lé a tai kyo." ga, yhangmoq lé tai ri.

Yuzô Nihktàng Lé Dangtú Yu É Hkyô

²⁸ Yesuq xoq tai é gi, "Nungmoq hkásu wó myit akò lú? Byú rayuq gi, yuzô í yuq wó ri. Yhang gi, ko sù yuq chyáng é mù, 'Ngá zo é, nàng, hkù-nyí tsibiyiq hkyâm má mù é zui aq.' ga tai jáng, ²⁹ yuzô haù gi, 'Ngò a kám é.'

✧ 21:9 Hkya-on 118:26

✧ 21:13 Esai 56:7

✧ 21:13 Yer 7:11

✧ 21:16 Hkya-on 8:2

ga tù tai ri; nghut kôlhang, htâng má, yhang gi, myit dum lhung mù, ê bê nghut ri.

³⁰ Hau htâng, yhangwa gi, yhang zo tiq sù yuq chyáng ê mù, rajung za ga ê dum tai jáng, yuqzo hau gi, 'Ê rá, áwa!' ga yín yú kôlhang, a ê kut ri.

³¹ Hau nhiktâng má é hká yuq sheq, yhangwa ô nau é hkyô lé kut sù nghut ri lúhú?" gâ ri.

Hau hkún, yhangmoq gi, "Ko sù nghut ri." ga tù tai akô.

Hau mù, Yesuq gi, yhangmoq lé, "Ngò, nungmoq lé teng za tai kôlé, kang guq bang eq shiwa myhî pé gi, Garai Gasâng é mingdán má, nungmoq a wàng shimá, wang ló nyi bùm kó rá nghut lhê. ³² Hkásu mù gâ lé, Yohan gi, nungmoq chyáng lé jé mù, dingmán hkyô lé tún shít kôlhang, nungmoq gi, yhang lé a jing kut akô nghut ri; nghut kôlhang, hau kang guq bang eq shiwa myhî pé gi, yhang dang lé jing akô nghut ri. Nungmoq gi, hau hkyô lé myang é nghut kôlhang, myit a lhung kô é htoq agó, yhang lé a lumjing shi kó nghut ri.

Tsibiyiq Hkyâm Sai Bang Lé Dangtú Yu Ê Hkyô

Mrk 12:1-12; Luk 20:9-19

³³ Gotú dangtú lé gyô wú shi keq; hkyâm yhumsing rayuq gi, tsibiyiq hkyâm ralhum sai to mù, lhungkyuq kyâm to lui, tsibiyiq wing pyik htoq rá donghkong dù to mù, machya ralhum sai tô ri. Hau htâng, yhang gi, hkyâm hau lé, hkyâm sai zo bâng chyáng ngho byi to mù, gó ming shut e ló byuq bê nghut ri. ³⁴ Kyôshu yoq jé jáng, yhang gi, yhang eq sêng é tsibiyiq shi é yú rá matú, yhang é dui-nhang zoshâng wui lé, hau hkyâm sai zo bâng chyáng nhang kat ri.

³⁵ Hau hkyâm sai zo bang gi, dui-nhang zoshâng wui lé, lhom chyup yú kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, lugkok eq lhom dú sat pyám, kut akô nghut ri. ³⁶ Hau htâng má, yhang gi, hí dam lhê htoq je myo shoq gotú dui-nhang zoshâng wui lé dum nhang kat le le, hau hkyâm sai zo bang gi, hí lhê bang lé su lhom dum kut akô nghut ri. ³⁷ Ló htáng má, yhang gi, 'Ngá zo lé gi, yhangmoq lhom hkungga kó rá nghut lhê.' ga, yhang zo lé, hau bâng chyáng nhang kat ri.

³⁸ Nghut kôlhang, hau hkyâm sai zo bang gi, yhang zo lé myang kôjáng, 'Shí yuq gi, silí wunlí sing yú rá sù nghut lhê; lé keq, yhang lé sat pyám mù, yhang é silí wunlí lé yu pyám byi sháng.' ga, rayuq eq rayuq tai lhum bum akô nghut ri. ³⁹ Hau mù, yhangmoq gi, yhang lé, chyup yú lui, hkyâm shinggan shut dú htoq kômù, sat pyám bekô nghut ri.

⁴⁰ Hau mù lui, tsibiyiq hkyâm yhumsing lé jé é hkún lé, hau hkyâm sai zo bang lé hkásu kut nô ngam akô lúhú?" ga Yesuq myi ri.

⁴¹ Hau hkún, hau hkyangjong agyi pé eq suwún wui gi, "Hau agê ashop bang lé gi, agê ashop é dông sat pyám rá nghut lhê. Hau tsibiyiq hkyâm lé gi, kyô shu yoq má, yhang é gambum lé byi rá bang lé, htót ngho byi pyám rá nghut lhê." ga, tù tai akô nghut ri.

⁴² Hau jáng, Yesuq dum tai é gi, "Chyúmdang má,

'Yhúm sai bâng eq hkyin htoq pyám é lugkok gi, htungchyún má é ahkyak dik é lugkok dut bê.

Shí hkyô gi, hau Yhumsing kut é nghut lui, nga-nhung é myoq hí má mauhpo dut bê nghut ri.'⁴³

ga bo tô é lé, nungmoq a nghap wú kó lúhú?

⁴³ Hau mù, Ngò, nungmoq lé tai kôlé, Garai Gasâng é mingdán lé, nungmoq chyáng mai yú mù, hau é ashí wó zui rá byuhú lé byi pyám rá nghut lhê. ⁴⁴ Lugkok hau má gyô záng é sù gi, gyui gyop byuq rá nghut lhê. Lugkok hau eq gyô nhê záng é sù le, nhê pyeq pyám é hui rá nghut lhê." gâ ri.

⁴⁵ Hkyangjong agyi pé eq Hparishe pé gi, hau Yesuq tai é dangtú pé lé wó gyô kôjáng, yhangmoq lé tai nyi é hkyô lé, sê gyô akô nghut ri. ⁴⁶ Hau mù, yhangmoq gi, Yhang lé chyup yú rá hkyô ho nyi akô; nghut kôlhang, byu pé gi, Yhang lé, myightoi rayuq ga myit lum to kó é yanmai, yhangmoq gi, hau bang lé gyuq akô nghut ri.

22

*Myiháng Poí Dangtú Pé
Luk 14:15-24*

¹ Yesuq, dangtú pé dông yhangmoq lé dum tai é gi, ² 'Mauhkung mingdán gi, yhumsing yhangzô é matú myiháng poi hen lajâng to byi é hkohkâm rayuq eq du ri. ³ Hkohkâm hpó hau gi, yhang ji tô é bang, hau poi má lé ló rá matú, yhang é dui-nhang zoshâng wui lé é tsing tai nhang ri; nghut kôlhang, hau bang gi, a lé kut akô nghut ri.

⁴ Hau htâng má, yhang gi, gotú dui-nhang zoshâng wui lé, 'Ngò hai le hen to bê; ngá é no eq xu-myom é gau-nyhau pé lé sat mù, jung hkangmó ri rì nghut to bê. Myiháng poi má lé lò keq hkoí nghú, hau ji tô é bang lé é tai keq.' ga pying lui, nhang kat ri.

⁵ Nghut kôlhang, hau ji to hui é bang gi, dang hau lé hai su a gyô ngàm kômù, rayuq gi, yohtung shut, rayuq gi, hpugá dinggá hkyô shut é byuq bekô nghut ri. ⁶ Ra-am dum nghut jáng, yhang é dui-nhang zoshâng wui lé lhom chyup yú kômù, nhuq bat lui, sat pyám byi akô nghut ri. ⁷ Hau mù, hkohkâm gi, nhikjum yo lui, yhang é gyezô pé lé, hau byu sat bang lé sat pyám nhang

mù, yhangmoq é myuq lé nyhê hkyô pyâm nhang ri.

⁸ Hau htâng má, yhang gi, yhâng é dui-nhâng zoshâng wui lé, 'Myiháng poi gi, ri ri nghut to bê; nghut kôlhâng, hau ji to huê é bang gi, lé rá a gingdán kó nghut ri. ⁹ Hau mù, hkyô kang pé má ê lui, myang é yuq hkangmó lé, poi má lé rá matú é ji keq.' ga tai ri. ¹⁰ Hau jáng, dui-nhâng zoshâng hau bang gi, hkyô kang pé má htoq é lui, myang é byù gè byù gang lhunglhang lé ji tsing yù kô é nghut mù, myiháng poi gi, bíng pé zung bying bùm bê nghut ri.

¹¹ Nghut kôlhâng, bíng hau bang lé, hkohkâm hpó, lé wang wú é hkùn, myiháng poi wàng hking a wut tô é byù rayuq lé, yhang byu-myang ri. ¹² Hau mù, yhang gi, hau yuq lé, 'Buinùm hpó é, nàng gi, myiháng poi wàng hking le a wut é nhing, shí má hkâsu kut wang lo é lúh?' ga myi jáng, hau yuq gi, hai le a dat tú tai lo nghut ri.

¹³ Hau hkùn, hkohkâm hpó gi, yhâng é dui-nhâng zoshâng wui lé, 'Yhâng é hkyô loq má tui lui, hau ngaubyi ngaù nhap eq zui kyik kyik shoq hpuzô nyi rá nghut é shinggan mauchut hkaù má, dú htoq pyâm keq.' gâ ri.

¹⁴ Hkâsu mù gâ le, byù myo myo gi, ji yu é hui kôlhâng, hkyin yù huê é bang gi, shaù ri." gâ ri.

Kehtaq Lé Kang Kat Byi É Hkyô
Mrk 12:13-17; Luk 20:20-26

¹⁵ Hau htâng má, Hparishe pé gi, htoq lô kômù, Yhâng é dang pé má mara chyup rá hpaqchyí dâ akô nghut ri. ¹⁶ Yhangmoq gi, Herut é byu pé eq rahá, yhangmoq é chângzô pé lé, Yesuq chyáng nhang kat akô. Hau bang gi, Yesuq chyáng lé jé kômù, "Sarâ é, Nàng gi, tengmân sù nghut é eq, Garai Gasâng é hkyô lé, tengmân é dông mhoqshít é sù nghut é lé le, Nàng gi, ó hai ga rá lé le hai su a ngâm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. ¹⁷ Hau mù, hkoséng Kehtaq lé kang kat byi le gi, ge lhê lúh? A gè lúh? Nàng, hkâsu wó myit é hkyô tai kyô wú aq." ga tai akô nghut ri.

¹⁸ Yesuq kùm gi, yhangmoq é agè ashop hkyô lé sé byi mù, "Gegùn labyoq kut bang é, nungmoq gi, hai mù, Ngo lé lé chyam wú akô lúh? ¹⁹ Kang kat rá ngùn htingchap rachap, Ngo lé byi wú keq." ga tai kat ri. Hau hkùn, yhangmoq gi, denari rachap yù byi akô. ²⁰ Hau mù, Yhang gi, yhangmoq lé, "Shí má, ó yuq é alhò eq masat laiká dap tô ri lúh?" ga myi jáng, ²¹ yhangmoq gi, "Kehtaq é nghut ri." ga tú tai akô. Hau mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga tai kat ri.

²² Hau su gâ é lé, wó gyo kôjáng, hau bang gi, mau byuq kômù, Yhâng chyáng mai htoq lô byuq bekô nghut ri.

Saduke Pé, Yesuq Lé Myi Chyam É Hkyô
Mrk 12:18-27; Luk 20:27-40

²³ Hau nyi má yhang, hau dum dui toq hkyô a jooq gâ é Saduke pé gi, Yesuq chyáng lé jé kômù, dangmyi lé myi akô. ²⁴ Yhangmoq myi kô é gi, "Sarâ é, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi rá matú, yhâng rhat lé chui gon ra rá nghut lhê.' ga, nga-nhúng lé, Mosheq tai tô é nghut lhê. ²⁵ Hí hpyang lé, ngamoq chyáng, gumang nhiktâng wui nyhit yuq nyi akô. Lagám yuq gi, myiwe yù lui, zo dù a dap é za yhangmyi lé shi lhuì pyâm to bê nghut ri. ²⁶ Hau eq rajung za, Lanong, Lalaq mai Lahkâ jé shoq, chuimó hau lé gon lui, ó le zo dù a dap é za shi lô byuq bùm bekô nghut ri. ²⁷ Lô htáng má, myiwe myhí hau le châng shi lô byuq bê nghut ri. ²⁸ Hau mù lui, hau dum dui toq é buinyi má, myiwe myhí hau gi, hau nhiktâng wui nyhit yuq má é hká yuq é yhangmyi nghut rá lúh? Hkâsu mù gâ le, yhang gi, hau nhiktâng wui banshoq bâng é yhangmyi dut wú bê sù nghut ri." gâ akô.

²⁹ Hau hkùn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri. ³⁰ Hau dum dui toq é buinyi má gi, myi byi myi yù hkyô jooq lo rá a nghut; yhangmoq gi, mauhkùng htoq má é maumang lagyô pé su dut byuq kó rá nghut lhê. ³¹ Shí é mai dum dui toq bang eq séng lui, ³² Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga, nungmoq lé tai tô é lé, nungmoq a ngaph wú kô lúh? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga tai ri.

³³ Byù moq mó gi, dang hau wó gyo kôjáng, Yhang mhoqshít é hkyô lé mau byuq bum akô nghut ri.

Ahkyak Dik É Jep É Tarâ
Mrk 12:28-34; Luk 10:25-28

³⁴ Saduke pé lé, Yesuq lhoq zím pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zing lé bum akô. ³⁵ Yhangmoq má bo é tarâ sarâ rayuq gi, Yesuq lé chyam wú é dông, ³⁶ "Sarâ é, jep é tarâ má, hká lhum gi, je ahkyak dik lhê lúh?" ga myi ri.

³⁷ Hau mù, Yesuq gi, "Hau Yhumsing náng é Garai Gasang lé, náng é myit nhikhlum banshoq, náng é asak woi-nyí lhum gón, nàng myit é hkyô banshoq eq, chyitdap rá lhê.* gâ é nghut lhê. ³⁸ Tarâ hau gi, je hi

* 22:32 Htoq Lô 3:6 * 22:37 Tarâ Pun 6:5

lhum eq je ahkyak dik é lhum nghut lhê.
39 Hau htang lhum le haù eq du é nghut mù, 'Náng gùng lé náng chyiitdap é su, náng é chyàngnám mà é bang lé le chyiitdap aq.'³⁹ gâ é nghut lhê. 40 Tarâ haù í lhum gi, jep é tarâ banshoq eq myightoi laikâ banshoq é dangchyûng nghut lhê." ga, yhang lé tai kat ri.

Hkrisduq Gi, Ô Yuq É Yhangzo?
Mrk 12:35-37; Luk 20:41-44

41 Hparishe pé zup zing to kô é hkûn, Yesuq gi, yhangmoq lé, 42 "Nungmoq gi, Hkrisduq eq séng lui hkâsu myit ngam akô lhu? Yhang gi, ó yuq é yhangzo nghut lhê lhu?" ga myi jáng, yhangmoq gi, "Dawiq é yhangzo nghut ri." ga tù tai akô.

43 Haù mù, Yhang gi, yhangmoq lé, "Haù hkûn, Dawiq gi, Woi-nyi dông mai, Yhang lé, 'Yhumsing' ga, haù mù wut lhê lhu? Hkâsu mù gâ le, Dawiq tai é gi,

44 'Haù Yhumsing Garai gi, ngá é Yhumsing lé, "Ngò, náng é gumlau gye pé lé, náng é hkyiwa ô má tô pyâm é hkying jé shoq,

Ngá é loqyo hkyam shut zung nyi shi aq." ga tai ri.⁴⁴

gâ ri. 45 Haù mù, Dawiq yhang lhang, Hkrisduq lé, 'Yhumsing' gâ é nghut le gi, yhangzo za hkâsu ge nghut rá lhu?" ga tai ri. 46 Haù mù, ó yuq le, dang rahkun lhang a wó tù tai lo kô é nghut mù lui, haù nyi mai, ó yuq lhang Yhang lé dangmyi a wám myi lo kô nghut ri.

23

Tarâ Sará Pé Eq Hparishe Pé Lé Sidiq Râ Hkyô

Mrk 12:38-40; Luk 11:37-52; 20:45-47

1 Hau htang, Yesuq gi, byù moq mó eq Yhang é chángzò pé lé tai é má, 2 "Tarâ sará pé eq Hparishe pé gi, Mosheq é tanghkuq má zung akô. 3 Haù mù, yhangmoq mhoqshít é hkyô chângiup lé, nungmoq châng kut ra kó rá nghut lhê. Nghut kôlhang, yhangmoq kut é dông gi, hkâkut kó; hkâsu mù gâ le, yhangmoq gi, yhangmoq tai é dông a kut kó nghut ri. 4 Yhangmoq gi, byu pé é goqsân má wôlai ke byi kôlhang, yhangmoq yhang gi, wò haù pé lé bo waq rá matú, loqnyhui lhang a kám lhoq tui kó nghut ri.

5 Yhangmoq kut é hkyô lhunglhang gi, byu pé myàng rá matú za kut shít é nghut akô; haù chyûmbun bó é showui-htûng pé lé lhoq kô yu kômù, buhng pé má é banbyaù pé lé lhoq hing yu akô nghut ri; 6 yhangmoq gi, poi pé má é réng é jowò pé eq tarajong pé má é ahkyak dik é zùng jang pé má, myang zùng rá lé ô nau nyi akô; 7 yhangmoq gi, gai pé

má lhom shi-kyâm yù kó rá eq, byu pé mai, yhangmoq lé, 'Rabai'* ga lhom wut kó rá lé ô nau nyi bum akô.

8 Nungmoq kúm gi, 'Rabai' ga wut rá lé hkâ-ô nau kó; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. 9 Haù mù, myidàm htoq má, ó yuq lé le, 'awa' hkâ-nghù kó; hkâsu mù gâ le, mauhkung htoq má é İwa rayuq za, nungmoq é İwa nghut lhê. 10 Hau htoq agó, 'sarâ' ga wut rá lé, hkâ-ô nau kó; hkâsu mù gâ le, Hkrisduq za, nungmoq é Sará nghut lhê. 11 Nungmoq má é je gyaù sù gi, nungmoq é dui-nhang zoshâng dut rá nghut lhê. 12 Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui rá nghut lhê, yhumsing gùng lé lhoq nyhùm sù kúm gi, waq toq é hui rá nghut lhê.

13 Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gâ le, nungmoq gi, byu pé hí má, mauhkung mingdân hkyô lé xaù tò akô; nungmoq yhang le a wàng kó, wàng nau nyi bang lé le a wàng nhâng kó nghut ri. 14 (Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gâ le, nungmoq gi, chuimò pé é yhùm-yò pé lé hpyoq zo hpyoq shuq é eq kyú hing hing dũng shít mhaù é bang nghut akô; haù mù, dam byi é je myo hui zo kó rá nghut lhê.)†

15 Gegùn labyoq nghut é, tarâ sará pé eq Hparishe pé é, nungmoq gi, dingnyé wó ri. Hkâsu mù gâ le, nungmoq gi, byù rayuq lé nungmoq é noqkuq htûng má wò lhoq lhiq yù rá matú, myi hkyô, wui hkyô, châng jón wún kômù, wò lhoq lhiq yu é sù lé gi, nungmoq su ngarai byù í tú shuí dut akô nghut ri.

16 Hkyô-u she é myoqjit pé é, nungmoq gi, dingnyé wó ri. Nungmoq gi, 'Noqkuq yhùm lé lang lui dakam é sù gi, haù a ra; noqkuq yhùm má é hing lé lang mù dakam é sù kúm gi, cháng ra bê.' ga lhaq tai akô. 17 Myoqjit é byu ná pé è! Haù hing eq hing lé lhoq yunglhô é noqkuq yhùm gi, hkâ lhum je ahkyak lhê lhu? 18 Hau htoq agó, nungmoq gi, 'Haù hkungga gyap lé lang lui dakam é sù gi, haù a ra, nghut kôlhang, haù hkungga zè lé lang mù dakam é sù gi, cháng ra bê.' ga le, lhaq tai akô nghut ri. 19 Myoqjit pé è! Haù hkungga zè eq hkungga zè lé lhoq yunglhô é hkungga gyap gi, hkâ lhum je ahkyak lhê lhu? 20 Haù mù, haù hkungga gyap lé lang lui dakam é sù gi, haù hkungga gyap eq hau é ahtoq má ke tò é zè banshoq lé lang lui dakam é sù dut bê nghut ri. 21 Noqkuq yhùm lé lang lui

* 22:39 Nhung 19:18 † 22:44 Hkya-on 110:1 * 23:7 Aramaik dang dông rabai gâ é gi, sará gâ é lichyùm nghut lhê. † 23:14 Chyûmding ra-am má gi, bun zo 14 shi a bo é nghut lhê.

dakam é sù gi, haù noqkuq yhùm eq haù má nyi é Sù lé lang lui dakam é sù dut bê nghut ri. ²² Hau htoq agó, mauhkung lé lang lui dakam é sù gi, Garai Gasáng é tanghkuq eq haù má zung é Sù lé lang lui dakam é sù dut bê nghut ri.

²³ Gegùn labyoq nghut é, tará sará pé eq Hparishe pé ê, nungmoq gi, dingnyé wó ri. Hkásu mù gà le, nungmoq gi, xunmân nghut é gau-tsáng shingtón, bantsai, hpakkyi pé má é xê gambùm ragambùm lé gi, byi nyi kômù, je ahkyak é tará nghut é, tará rap-rá hkyô, shogyo nhikmyin hkyô eq lhumzui hkyô pé lé gi, lhai pyám tò akò nghut ri. Hí lhum lé kut é su, htang lhum lé le kut rá lhê. ²⁴ Hkyô-u she é myoqjit pé ê! Nungmoq, pyup lé gi, jân pyám kômù, gola-uy lé gi, myui pyám akò nghut ri.

²⁵ Gegùn labyoq nghut é, tará sará pé eq Hparishe pé ê, nungmoq gi, dingnyé wó ri. Hkásu mù gà le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tò ri. ²⁶ Hparishe myoqjit pé ê! Zo hkoq shuq góm é ahte lé hí chí yúng pyám keq, haù jáng, ahtoq le sân-yúng rá nghut lhê.

²⁷ Gegùn labyoq nghut é, tará sará pé eq Hparishe pé ê, nungmoq gi, dingnyé wó ri. Hkásu mù gà le, nungmoq gi, but hpyu tò é lup pé eq du akò; haù pé gi, ahtoq má wú yúng kôhang, ahkaù má gi, màng bup showui pé eq acháq achyut é chángiup byíng tò é nghut ri. ²⁸ Haù eq rajung za, nungmoq gi, byu pé hí má, ahtoq pyám dingmán é su kut shit kôhang, ahkaù má gi, gegùn labyoq kut é eq agé ashop é hkyô pé byíng zan tò ri.

²⁹ Gegùn labyoq nghut é, tará sará pé eq Hparishe pé ê, nungmoq gi, dingnyé wó ri. Hkásu mù gà le, nungmoq gi, myiqtóif pé é lup lé luptsuq tsuq kômù, dingmán bâng é lup pé lé mhón byi kôluí, ³⁰ Ngamoq gi, ngamoq é ichyi íwa pé é ipyat má nyi áng é ru nghut le gi, haù myiqtóif pé é sui lhoq shun é bang má, ngamoq bo lóm rá a nghut. ³¹ ga lhaq tai akò. ³¹ Haù su mù, nungmoq gi, haù myiqtóif pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akò nghut ri. ³² Haù mù, nungmoq é ichyi íwa pé hí tò é muzó lé, banshoq châng kut pán keq!

³³ Lhangmui pé ê, duq htân lhangmui amyú pé ê! Ngarai mîng é dam byi hkyô mai, hkásu wó hpang lut kó rá lhú? ³⁴ Hau é yanmai, myiqtóif pé, hpaqchyí bò bang eq chyúm sará pé lé, Ngò, nungmoq chyáng nhang kat rá nghut lhê. Haù bang má é ra-am lé gi, nungmoq lhom sat pyám mù, tapzîng má jén pyám kó rá nghut lhê; ra-am lé gi, nungmoq é tarajong pé má, nhuq bat

kômù, ra-myuq htâng ra-myuq châng hkat zing-ri wún kó rá nghut lhê. ³⁵ Hau é yanmai, haù dingmán sú Abelaq é sui mai hí lui, noqkuq yhùm eq hkungga gyap gyoro má nungmoq sat pyám é, Berehkiq é yhangzo Zahkariq é sui jé shoq, myidàm htoq má shun pyám é dingmán bang banshoq é sui gi, nungmoq é ahtoq má jé lô rá nghut lhê. ³⁶ Ngò, nungmoq lé teng za tai kôlé, shí hkyô banshoq gi, ipyat shi é ahtoq má jé rá nghut lhê.

³⁷ Yerusalem é, Yerusalem é, myiqtóif pé lé sat pyám pyám kut mù, náng chyáng nhang kat é bang lé luqgok eq dú sat sat kut é myuq nàng ê, woqzing gi, yhangzô pé lé, yhâng é dùng hkaù má tsing lhùng yu é su, nungzô pé lé, Ngò, hkâ-myhó dâm shuí tsing yù nàu kôhang, nàng a dóng nghut ri. ³⁸ Wú keq, nungmoq é yhùm gi, nungmoq é matú chamchyuyiui dut pyám to berá nghut lhê. ³⁹ Hkásu mù gà le, Ngò, nungmoq lé tai kôlé, 'Yhumsing é mying mai jé lé lo é Sù gi, hkungsô wó nyi sháng gaq.'⁴⁰ ga, nungmoq a tai tai gi, Ngo lé wó myâng kó rá a nghut lo." gá ri.

24

*Ló Htâng Buinyi Má Dut Lò Rá Hkyô
Mrk 13:1-31; Luk 21:5-33*

¹ Yesuq gi, noqkuq yhùm mai htoq é ló é u lé, Yhâng é chángzô pé gi, Yhâng é nàm má huí lé lô kômù, haù noqkuq yhum é loqmú pé lé tún shit akò. ² Haù hkùn, Yesuq gi, yhangmoq lé, "Haù pé banshoq lé, nungmoq myang lhê a nghut kó lhú? Ngò, nungmoq lé teng za tai kôlé, luqgok haù pé gi, rachâm htoq racham lháng a kê lhum loshoq, hpyoq hpyi pyám é hui rá nghut lhê." ga tai ri.

³ Yesuq gi, Tsanlun Bùm má zung tò é hkùn, haù chángzô pé gi, yhangmoq baú Yhâng chyáng lé jé kômù, "Haù hkyô pé gi, hkâ-nhám dut lò rá lhú? Nàng gyó lé rá hkùn eq ló htâng buinyi má, hkasú é kumlhá htoq lò rá nghut lhê lhú? Ngamoq lé tai kyô wú laq." ga, Yhang lé myí akò.

⁴ Haù hkùn, Yesuq, yhangmoq lé tú tai é gi, "Nungmoq lé, ó yuq eq le a wó shuí nghoq sháng gaq, sidiq nyi keq. ⁵ Hkásu mù gà le, 'Ngò gi, haù Hkrisduq nghut lhê.' ga, Ngá myíng lé lãng é byu myo myo pò htoq lô mù, byu myo myo lé hkyô shuí nghoq kó rá nghut lhê. ⁶ Nungmoq gi, majan dut nyi é hkyô eq majan eq sêng é danglám pé lé, wó gyo kó rá nghut lhê; nghut kôhang, hkágyuq dân kó. Haù hkyô pé gi, dut lò rá za nghut lhê; nghut kôhang, ló htâng é buinyi gi, a nghut shi. ⁷ Byu ra-myuq eq ra-myuq, mingdán ralhum eq ralhum majan zân lhùm lò kó rá nghut lhê. Jowò myo myo má, mutmó

gyó é pé eq layàng nún é pé dut lò rá ngfut lhê. ⁸ Háu pé gi, wuñke jamjau hkyo é apùn awang za ru ngfut ashî.*

⁹ Háu hkún, nungmoq gi, zing-rí é eq sat pyâm é hui zo rá matú, ap pyâm é hui kó rá ngfut lhê. Byù myù lhunglhang bang gi, Ngá é yanmai, nungmoq lé a ngui kut kó rá ngfut lhê. ¹⁰ Háu u lé, byù myo myo gi, lumjínng myit lé tò pyâm kômù, rayuq eq rayuq a ngui lhum dut é htoq agó, rayuq eq rayuq ap pyâm lhum kó rá ngfut lhê. ¹¹ Háu htoq agó, myiqhtoi pyoq pé myo myo pò htoq lò kômù, byù myo myo lé hkyô shuí nghoq kó rá ngfut lhê. ¹² Agé ashop é hkyô myó jat lo é yanmai, byù myo myó é chiytdap myit gi, kân lò byuq rá ngfut lhê; ¹³ ngfut kôlhang, jihtúm jé shoq wó hkam jân nyi é sù gi, hkyi yu é hui rá ngfut lhê. ¹⁴ Byù myù banshoq má saksé dut rá matú, háu mingdán eq séng é gabú danglù lé, mingkan gón má hko kyo rá ngfut lhê. Háu htàng má sheq, lò htum buinyi jé rá ngfut lhê.

¹⁵ Háu mù lui, myiqhtoi Danielaq dông mai tai tò é eq rajung za, 'háu lhóq hten lhoq hpyoq é achaq achyut hkyô'[†] gi, chyoiyúng jowò má shap tò é lé, nungmoq myàng kó rá ngfut lhê. (Chyúmlaika nghap sù gi, sé gyo sháng gaq). ¹⁶ Háu hkún, Yuda mau má nyi é bang gi, bùm pé shut hpang doq lò kó sháng gaq. ¹⁷ Yhumhkúng htoq má nyi tò é sù gi, yhumhkaú má é zè hai lé le, a lò gyó wang yù lo sháng gaq. ¹⁸ Yò má nyi tò é sù gi, yhang é buhíng lé a lò tau yu nyi lo sháng gaq. ¹⁹ Háu buinyi pé má, zogúng dut é myiwe eq nau huq ashî ngfut é ìnu wui gi, gyai yhang wuñke jamjau kó rá ngfut lhê. ²⁰ Háu nungmoq hpáng rá buinyi gi, gyoqmyò,* a ngfut jáng, Bánno buinyi má a ang rá matú, kyúduńng nyi keq. ²¹ Hkâsu mù gà le, mingkan lé joq é hkún mai ahkuí jé shoq, hkâ-nhám le a dut wú shí é wuñke jamjau mó gi, háu buinyi pé má dut lò rá ngfut lhê; háu sù é hkyô gi, htàngnúng má hkâ-nhám le dum dut lò rá ngfut. ²² Buinyi háu pé lé lhoq shaú pyâm é za a ngfut le gi, ó yuq le asak wó lut rá a ngfut; ngfut kôlhang, Garai Gasang eq hkyin yù hui báng é matú gi, buinyi háu pé lé, lhoq shaú pyâm byi rá ngfut lhê. ²³ Háu ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, háu a ngfut jáng, 'Wú keq, Yhang hê má nyi ri.' ga tai jáng, nungmoq hkájíng kó. ²⁴ Hkâsu mù gà le, Hkrisduq pyoq pé eq myiqhtoi pyoq pé pò htoq lò mù, wó dut é ngfut jáng, hkyin yù hui báng lé lhang, wó lhoq nghoq shoq ga, kumlhá mó pé eq laklaí kumlhá pé lé kut

shit kó rá ngfut lhê. ²⁵ Gyo keq, shí hkyô a dut shimá, Ngò, nungmoq lé tai kyô nyi gù ngfut lhê.

²⁶ Háu mù, rayuq yuq eq, nungmoq lé, 'Yhang gi, yoso má nyi ri.' gá jáng le, hkâ-é kó; 'Yhang gi, shí gok hkaú má lúng tò ri.' ga jáng le, hkájíng kó. ²⁷ Hkâsu mù gà le, búi htoq hkyam má lhap hpyat é gi, búi wang hkyam má lhang jé shoq duqbó é su, háu Byu Yhangzo jé lé é hkún le, dut rá ngfut lhê. ²⁸ Màng leq é jang má, langdá pé, lé zing bùm rá ngfut lhê.

²⁹ Buinyi háu pé má é wuñke jamjau lai eq yhang, 'Búi gi, noq byuq mù, lhamó gi, a tsò dut byuq rá ngfut lhê; kyí pé gi, mauhkúng mai byit gyó lo bùm mù, mauhkúng má é wum-o a-tsam pé gi, lhoq nhún é hui bùm kó rá ngfut lhê.'[‡]

³⁰ Háu hkún, háu Byu Yhangzô é kumlhá gi, mauhkúng má htoq shit lò rá ngfut mù, myidám htoq má é byù myù lhunglhang gi, yón ngau bùm kó rá ngfut lhê. Háu Byu Yhangzo gi, mauhkúng mai, mhut ji mù, hpungwup a-tsam mó eq le, hpungwup shíngkang eq le, gyó lé lo é lé, yhangmoq byu-myàng kó rá ngfut lhê. ³¹ Háu htàng má, Yhang gi, Yhang é maumang lagyó pé lé, tut hté mó eq nhang kat lui, yhangmoq gi, maumyi chyún myi chyún eq mauhkúng rahkyam mai, gó hkyam htum shoq má é, Yhang hkyin yu tò é bang lé shuí tsíng yù kó rá ngfut lhê.

³² Maihpáng gam lé wú mù, mhoq yú keq; agám mai a-nyuq nyún lò mù, ahaq htut lò jáng, búi nyé nám chyàng lò bé lé, nungmoq sé lhê. ³³ Háu eq rajung za, shí hkyô banshoq[†] lé, nungmoq myàng kó jáng, Yhang gi, chyàng bé ngfut mù, hkúmdong má lhang ngfut nyi bé hkyô lé, nungmoq sé lo keq. ³⁴ Ngò, nungmoq lé teng za tai kôlé, shí pyat má é byu pé a ban shi byuq shimá, háu hkyô pé[‡] banshoq dut byuq rá ngfut lhê. ³⁵ Mauhkúng eq myigúng gi, a joq lo dut byuq rá ngfut lhê; ngfut kôlhang, Ngá é dang gi, ru joq nyi rá ngfut lhê.

Háu Buinyi Eq Ahkyíng Lé, Ó Le A Sé

Mrk 13:32-37; Luk 17:26-30, 34-36; 12:35-48

³⁶ Buinyi eq ahkyíng háu lé gi, ó yuq le a sé; mauhkúng htoq má é maumang lagyó pé lhang a sé; háu Zo le a sé; háu Iwa za ru sé lhê. ³⁷ Noaq é tsín pyat má dut é su, háu Byu Yhangzo lé lo é hkún le, dut rá ngfut lhê. ³⁸ Hkâsu mù gà le, dowuí a dítng shí é buinyi pé má, byu pé gi, Noaq, wui-sangpho

* **24:15** Dan 9:27; 11:31; 12:11 * **24:20** Israelaq mau má gi, gyoqmyò lé hkyô htoq le gyai wuñke é ahkyíng ngfut

lhê. † **24:29** Esai 13:10; 34:4 † **24:33** Shí hkyô banshoq gá é gi, Yesuq jé lé rá hí má dut rá hkyô pé lé tai é ngfut

lhê. ‡ **24:34** Háu hkyô pé gá é gi, Yerusalem noqkuq yhum htén byoq rá lé tai é ngfut lhê.

mó hkaú má wang é hkún jé shoq, zo zo shuq shuq, myi byi myi yú, kut nyi bum akò nghut ri; ³⁹ yangmoq gi, dowuí dǐng lô mù, yangmoq banshoq lé ùm sat pyâm é hkún jé shoq, haí dut lò rá lé, a sé kó dut bùm é su, haú Byu Yhangzo lé lô é hkún le, dut rá nghut lhê. ⁴⁰ Haú hkún, yò má rahá nyi tô é byú í yuq mã é rayuq gi, shuí yu é hui mù, rayuq gi, myit gyó to rá nghut lhê. ⁴¹ Luqluí chòm láng nyi é myiwe í yuq mã é rayuq gi, shuí yu é hui mù, rayuq gi, myit gyó pyâm to rá nghut lhê.

⁴² Haú su mù, haú nungmoq é Yhumsing gi, hká nyi jé lé lô rá lé, nungmoq a sé kô é yanmai, sidiq machya nyi keq. ⁴³ Myin hká u má hkau sú jé lé lô rá lé, yhumsing sê é ru nghut le gi, yhang é yhum má a wó hput wâng nhâng loshoq, yang machya nyi rá nghut é lé, nungmoq sê gyó nyi keq. ⁴⁴ Haú mù, nungmoq le rì rì nghut nyi keq; hkásu mù gá le, haú Byu Yhangzo gi, a bũn nũng má jé lé lô rá nghut lhê.

⁴⁵ Yhumsing hpô é dui-nhâng zoshâng wui lé, uphkâng rá eq ahkying jé jáng zoshuq gãm byi rá matú, yhumsing hpô eq mù nhang tô é, lhumzui luí, hpaqchyi bo é dui-nhâng zoshâng gi, ó yuq nghut rá lú? ⁴⁶ Yhumsing hpô dum taú lo é hkún, haú su kut nyi láng é dui-nhâng zoshâng gi, hkungsô wó nyi ri. ⁴⁷ Ngò, nungmoq lé teng za taí kólé, yhumsing hpô haú gi, yhang é sutzé banshoq, dui-nhâng zoshâng haú yuq lé ap to rá nghut lhê. ⁴⁸ Nghut kólhang, laqma mù, dui-nhâng zoshâng haú yuq gi, agé ashop sú nghut luí, 'Ngá é yhumsing hpô jé lô rá gyai myáng ashí.' ga, yhang é i-myt unghkaú má myit yú mù. ⁴⁹ gotú dui-nhâng zoshâng luzúm wui lé nhuq bat é htoq agó, í shuq wut bang eq rahá zo zo shuq shuq kut nyi é nghut le gi, ⁵⁰ dui-nhâng zoshâng hau é yhumsing hpô gi, yang a myingam tô é buinyi eq yang a sé tô é ahkying má jé lô mù, ⁵¹ yang lé jap pyám luí, gegũn labyoq kut bang hkám zô é, ngaubyi ngaũ nhap eq zui kyik kyik shoq hpuzó nyi rá jowó má hkyó pyám rá nghut lhê.

25

Zomyi Raxé Yuq Lé Dangtú Yu É Hkyó

¹ Haú hkún, mauhkũng mingdán gi, myibung yu chũng mù, lusik lé te yú rá ga, htoq e ló é zomyi raxé yuq eq pũng rá nghut lhê. ² Haú bang má, ngo yuq gi, nhik a gying kó; ngo yuq gi, nhik gying akò nghut ri. ³ Haú nhik a gying é bang gi, myibung yu chũng kólhang, xú a yu chũng kó nghut ri. ⁴ Nghut kólhang, haú nhik gying é bang kúm gi, yangmoq é myibung lé le, xú bo é bông lé le yu chung akò nghut ri. ⁵ Lusik jé lé lô rá myáng nyi é yanmai, yangmoq banshoq

bang gi, yhup mui lò kômù, yhup myhi byuq bekò nghut ri.

⁶ Myin gunggàm jé jáng, 'Lusik jé bê ô! Yang lé te yú rá matú, htoq lé lô keq hkoi ô!' ga, garú é htê htoq lo ri.

⁷ Haú hkún, zomyi haú bang banshoq gi, toq lô mù, yangmoq é myibung lé hen lajâng akò nghut ri. ⁸ Haú nhik a gying bang gi, 'Ngamoq lé, xú ratsui byi kó laq; hkásu mù gá le, ngamoq é myibung shi lô nyi ri.' ga, haú nhik gying hâng chyáng dũng akò.

⁹ Haú hkún, haú nhik gying bang gi, 'Nungmoq eq ngamoq é matú ga jáng, luq rá a nghut. Haú mù, nungmoq é matú, xú ung bâng chyáng é wui yú keq.' ga tú taí kat akò.

¹⁰ Yangmoq, xú wui é ló kô é hkún, lusik gi, jé lé lô mù, haú rì rì hen tô é zomyi wui gi, yang eq rahá myihâng poi má wang lô bekò. Hkum le myhi byuq bê nghut ri.

¹¹ Hau htâng má, hau htâng gyó tô é zomyi wui gi, tau jé lô kômù, 'Yhumsing é! Yhumsing é! Ngamoq lé, hkum hpóng byi laq ô!' ga taí akò.

¹² Nghut kólhang, haú lusik gi, 'Ngò, nungmoq lé teng za taí kólé, nungmoq lé ngò a sé.' ga tú taí kat ri.

¹³ Haú mù luí, haú Byu Yhangzo jé lé rá buinyi eq ahkying lé, nungmoq a sé kô é yanmai, sidiq machya nyi keq.

Dui-nhâng Zoshâng Sum Yuq Lé, Dangtú Yu É Hkyó

Luk 19:11-27

¹⁴ Mauhkũng mingdán gi, byú rayuq byin we htoq rá hen nyi é nghut mù, yhang é dui-nhâng zoshâng wui lé wut yú luí, yhang é sutzé lé ap byi to sú eq pung ashí nghut ri.

¹⁵ Yang gi, yangmoq é a-tsam má châng luí, rayuq lé gi, ngũn ngo joi, rayuq lé gi, í joi, htâng rayuq lé gi, rajoi kut byi to mù, byin we shut htoq lô byuq bê nghut ri. ¹⁶ Ngũn ngo joi wó yú sú gi, haú hkún jáng htoq lô mù, hpugá gá luí, ngũn ngo joi wó myat yú bê nghut ri. ¹⁷ Haú eq rajung za, ngũn í joi wó yú sú le, í joi wó myat yú bê nghut ri. ¹⁸ Nghut kólhang, rajoi za wó yú sú gi, htoq e ló mù, myigũng má du luí, yhang yhumsing hpô é ngũn lé haq myhup tô ri.

¹⁹ Hau htâng tsómra myáng jáng, dui-nhâng zoshâng haú bâng é yhumsing hpô gi, dum taú jé lô mù, yangmoq é ngũn chyaráng lé, lo jep ri. ²⁰ Ngũn ngo joi wó yú sú gi, amyat ngo joi lé le yu lé lô mù, 'Yhumsing é, nang, ngo lé, ngũn ngo joi ap tô é nghut lhê. Wú aq, amyat ngo joi wó ho jat yú bê.' ga taí ri.

²¹ Haú hkún, haú yhumsing hpô gi, 'Ará! Nghut bê. Nang gi, kyet é eq lumging é dui-nhâng zoshâng nghut ri! Tiq é mù má lhang wó lum é sú nghut é yanmai, ngò, nang lé, kô é mù lé le ap byi rá nghut lhê. Nang yhumsing hpô é gabú hkyó má bo wang lòm aq hkoi!' ga tú taí ri.

²² Haù eq rajung za, í joi wó yù sù le, lé lô mù, 'Yhumsing ê, nang, ngo lé ngùn í joi ap tô é nghut lhê. Wú aq, amyat í joi wó ho jat yù bê.' ga, lé tai ri.

²³ Haù hkùn, haù yhumsing hpó gi, 'Arâ! Nghut bê. Nang gi, kyet é eq lumging é dui-nhâng zoshâng nghut ri! Tiq é mù má lhâng wó lum é sù nghut é yanmai, ngò, nang lé, kô é mù lé le ap byi râ nghut lhê. Nang yhumsing hpô é gabú hkyô má bo wang lòm aq hkoil' ga tú tai ri.

²⁴ Haù htâng, rajoi wó yù sù le, lé lô mù, 'Yhumsing ê, nang gi, byù wui nghut mù, yhumsing a hô tô é jang má é shù yù nau é htoq agó, yhumsing, kyôshi a sân hkyô tô é jang má é tsing yù nau sù nghut é lé, ngò sê lhê. ²⁵ Haù mù, ngò gi, gyuq lui, htoq é mù, nang é ngùn lé, myigùng má é haq myhup tô é nghut lhê. Wú aq, shí gi, nang é ngùn nghut lhê.' ga tai ri.

²⁶ Haù mù, yhumsing hpó gi, yang lé, 'Agè ashop é eq lagôn é dui-nhâng zoshâng ê! Ngò gi, yhumsing a hô tô é jang má é shù yù nau é eq, yhumsing, kyôshi a sân hkyô tô é jang má é tsing yù nau sù nghut é lé, nang sé to gù nghut le nhing, ²⁷ ngá é ngùn lé, ngò dum tau' jé lô jâng, aráng eq amyat wó yù shoq, ngùn hpún kat jang má, haù mù a kat tô é lúh?

²⁸ Haù mù, haù ngùn rajoi lé, nang chyáng mai yù lui, raxê joi wó to sù lé, byi pyám nhâng râ nghut lhê. ²⁹ Hkâsu mù gá le, wó sù ó yuq lé nghut kôle, yang agùn agó wó râ matú, jat byi râ nghut lhê. A wó su chyáng mai kúm gi, yang wó tô é lé lhâng yu pyám byi shirâ nghut lhê. ³⁰ Haù mù, haù akyú a bo é dui-nhâng zoshâng lé gi, ngaubiyi ngàu nhap eq zui kyik kyik shoq hpuzô nyi râ jowò nghut é, shinggan mauchut hkaù má dú htoq pyám keq.' gâ ri.

Sau Eq Bainám

³¹ Haù Byu Yhangzo gi, Yhâng é hpungwup shinggang mai, maumang lagyo lhunglhâng bang eq rahá jé lé lo é hkùn, Yhâng é hpungwup shinggang bo é hkohkâm-tanghkuq htoq má zùng râ nghut lhê. ³² Haù hkùn, byù myú chângjup gi, Yhâng é hí má zing lé lo bùm kó râ nghut mù, Yhang gi, sau zùng sù mai, sau eq bainám lé gotú tú kut gam hkoq é su, byu pé lé gam hkoq pyám râ nghut lhê. ³³ Yhang gi, sau pé lé, loqyo hkyam shut, bainám pé lé, loqpai hkyam shut kut, nyhi to râ nghut lhê.

³⁴ Haù htâng má, haù Hkohkâm gi, Yhâng é loqyo hkyam shut má é bang lé, 'Ngá Wâ chyáng má é shimân jeju hkam yu é hui bang é, lé keq; mingkan lé hpan é hkùn mai, nungmoq é matú ga hen lajâng tô é muì mingdán má wang ló keq. ³⁵ Hkâsu mù gá le, Ngò zòmut é u lé, nungmoq, Ngo lé byi tso kô é nghut lhê; Ngò wuishit é u lé, nungmoq,

Ngo lé byi huq kô é nghut lhê; Ngò bing kut wún é u lé, nungmoq, Ngo lé lhom hkulum yù kô é nghut lhê; ³⁶ Ngò gùngchín dut é u lé, nungmoq, Ngo lé byi hut kô é nghut lhê; Ngò nòhpyo huí é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga tai râ nghut lhê.

³⁷ Haù hkùn, haù dingmán bang gi, Yhang lé, 'Yhumsing ê, Nang zòmut huí é lé, ngamoq, hkâ-nhám myàng lui, byi tsò wú é lúh? Nang wuishit é lé, ngamoq, hkâ-nhám myàng lui, byi huq wú é lúh? ³⁸ Nang bing kut wún é lé, ngamoq, hkâ-nhám myàng lui, lhom hkulum wú é lúh? Nang gùngchín dut é hkùn, ngamoq, hkâ-nhám byi hut wú é lúh? ³⁹ Nang nòhpyo huí é lé le, htóng lúng é lé le, ngamoq, hkâ-nhám myàng lui, lé gon lé kum wú é lúh?' ga myi kó râ nghut lhê.

⁴⁰ Haù hkùn, haù hkohkâm gi, 'Ngò, nungmoq lé teng za tai kôle, shí, Ngá gumang wui má é je tiq sù lé, nungmoq kut byi é hkyô haì le, Ngo lé kut byi é nghut bê.' ga tú tai râ nghut lhê.

⁴¹ Haù htâng má, Yhang gi, Yhâng é loqpai hkyam shut má é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pé é matú hen tô é, ahtum abyuq é myi má wang ló keq. ⁴² Hkâsu mù gá le, Ngò zòmut é u lé, nungmoq, Ngo lé a byi tso kó; Ngò wuishit é u lé, nungmoq, Ngo lé a byi huq kó; ⁴³ Ngò bing kut wún é u lé, nungmoq, Ngo lé a lhom hkulum yù kô; Ngò gùngchín dut é u lé, nungmoq, Ngo lé, mebu a byi hut kó; Ngò nòhpyo huí é eq htóng lúng é u lé, nungmoq, Ngo lé a gon kó nghut ri.' ga tai râ nghut lhê.

⁴⁴ Haù hkùn, yhangmoq gi, 'Yhumsing ê, nang zòmut wuishit é, bing kut wún é, gùngchín dut é, nòhpyo huí é eq htóng lúng é lé, ngamoq, hkâ-nhám myàng lui, a wú gon kut wú é lúh?' ga tú myi kó râ nghut lhê.

⁴⁵ Haù hkùn, Yhang gi, 'Ngò, nungmoq lé teng za tai kôle, shí bang má é je tiq sù lé, nungmoq, a kut byi é hkyô haì le, Ngo lé a kut byi é nghut bê.' ga, yhangmoq lé tú tai râ nghut lhê.

⁴⁶ Haù mù lui, haù bang gi, ahtum abyuq mara dam byi é má wang ló kó râ nghut lhê; haù dingmán bang kúm gi, ahtum abyuq é asak má wang ló kó râ nghut lhê." ga Yesuq tai ri.

26

Yesuq Lé, Sat Râ Da Kô É Hkyô

Mrk 14:1-2; Luk 22:1-2; Yhn 11:45-53

¹ Yesuq gi, haù hkyô pé lé ban tai é htâng má, Yhâng é chángzô pé lé, ² "Nungmoq sé tô é eq rajung za, í nyi lai é htâng má, Lhoqlhai Poí jé râ nghut mù, haù Byu Yhangzo gi, tapzing má jén sat é hui râ matú, ap pyám é hui râ nghut lhê." ga tai ri.

³ Háu u lé, hkyangjong agyi pé eq suwún wúu gi, Kayahpaq gá é hkyangjong mó rayuq é yhumwàng má zup zîng to kômù, ⁴ Yesuq lé haq chyup yú rà eq sat pyám rà hkyô lé, hpyé lhum bum akò nghut ri. ⁵ Nghut kôhang, yhangmoq gi, "Byu pé gabyông lò kó abe, poi gyoro má gi, a kut shi sháng." ga, tai lhum akò nghut ri.

Yesuq, Xú Hut Gyun Huí É Hkyô
Mrk 14:3-9; Yhn 12:1-8

⁶ Yesuq gi, Behtani wà má nyi é manggâm dap wú sú Simún é yhùm má nyi tô é hkùn, ⁷ myiwe myhí rayuq gi, gyai hpaù é namngón xú bo é luq hpyú bông yu lé lô mù, Yesuq zo shuq nyi é hkùn, namngón xú háu lé, Yhàng é ulhum má hut gyun byí ri.

⁸ Háu hkyô lé, háu chángzô pé myàng kôjáng, wú nhik-yo kômù, "Hái mù luí, háu lé aha agó kut pyám lhê lú?" ⁹ Xú háu lé, ahpau myo myô eq ùng pyám mù, myùng bang lé byí le ge lhê mhai!" ga tai kat akò.

¹⁰ Yesuq gi, háu hkyô lé sé luí, "Hái mù, myiwe zo háu lé, i-myt lhoq myô nyi akò lú?" Yhang gi, Ngá é ahtoq má ge é hkyô kut bê nghut ri. ¹¹ Háu myùng bang gi, nungmoq eq rahá hkâ-nhám le nyi rà nghut lhê; nghut kôhang, Ngò gi, nungmoq eq rahá ayang nyi nyi rà sú a nghut. ¹² Yhang, Ngá gùng má namngón xú hut gyùn é gi, Ngá gùng lé yhum rà matú, hen lajàng é hkyô nghut ri. ¹³ Ngò, nungmoq lé teng za tai kôlé, háu gabú danglù lé, mingkan gón hko kyô é jowô hkyangmó má, yhang lé myit bún é dông, yhang kut é hkyô shí lé, tai kyo bekô rà nghut lhê." ga tai kyo ri.

Yesuq Lé, Yudaq Êq Ung Zô Pyám É Hkyô
Mrk 14:10-11; Luk 22:3-6

¹⁴ Hau htàng, háu chángzo raxe í yuq má bo é Yudaq Iskarut ga sú gi, hkyangjong agyi pé chyáng é mù, ¹⁵ "Ngò, Yesuq lé nungmoq é loq má ap byí é nghut jáng, nungmoq, ngo lé hai byi kó rá lú?" ga myí ri. Háu mù, yhangmoq gi, yhang lé ngùn denggá sum xê chap nghap byí akò. ¹⁶ Háu hkùn mai, Yudaq gi, Yesuq lé ap pyám rà hkyô ho nyi bê nghut ri.

Yhumsing É Myinzang
Mrk 14:12-26; Luk 22:7-23; Yhn 13:21-30

¹⁷ Múnchi a kat é Muk Zo Poi sâng-hi nyi má, háu chángzô pé gi, Yesuq chyáng lé lô kômù, "Nàng zo rà Lhoqlhai Poi zoshuq lé, ngamoq hkámá món to rá lú?" ga myí akò.

¹⁸ Háu mù, Yhang gi, "Myuq hkaù shut wang lô mù, byù rayuq chyáng é luí, háu yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhùm má Lhoqlhai Poi kut rà nghut lhê.' gá Sará tai ri nghù, é tai keq." ga pying kat ri. ¹⁹ Háu mù, háu chángzô pé gi, Yesuq pying kat é eq rajung

za é tai kômù, Lhoqlhai Poi lé món to bekô nghut ri.

²⁰ Myinhâng jé lô jáng, Yesuq gi, háu chángzo raxe í yuq eq rahá, zohpoq má zung tô ri. ²¹ Yhangmoq zô nyi bùm kô é u lé, Yesuq gi, "Ngò, nungmoq lé teng za tai kôlé, nungmoq má é rayuq sú gi, Ngo lé ap pyám rà nghut lhê." ga tai ri.

²² Háu hkùn, yhangmoq gi, gyai gyô yón kômù, rayuq htàng rayuq, "Yhumsing é, ngò a nghut hkai?" ga, Yhang lé chòm myí akò.

²³ Háu hkùn, Yesuq gi, "Ngò eq rahá, hkoq shí má loq lap bê sú gi, Ngo lé ap pyám rà sú nghut lhê. ²⁴ Háu Byu Yhangzo gi, Yhang eq séng luí ká tô é eq rajung za, shí rà za nghut lhê. Nghut kôhang, háu Byu Yhangzo lé ap pyám é sú gi, dingnyé wó ri; háu yuq gi, a hku lé le lháng, je ge ri." ga dum tai kat ri.

²⁵ Hau htàng, Yhang lé ap pyám rà sú, Yudaq gi, "Rabai é, ngò a nghut hkai?" ga myí jáng, Yesuq gi, "Nàng nghut ri." ga tú tai kat ri.

²⁶ Yhangmoq zô nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga tai uchyang, Yhàng é chángzô pé lé gàm byí ri.

²⁷ Hau htàng, Yhang gi, góm lé le, yù mù, jeju hkya-on luí, yhangmoq lé byi mù, tai é gi, "Nungmoq banshoq bang, shuq keq. ²⁸ Shí gi, yubak mara hkyut pyám byi rà, byù myo myô é matú htoq pyám é, dangshikaq eq séng é Ngá sui nghut lhê. ²⁹ Ngò, nungmoq lé tai kôlé, ahkuí mai gi, Ngò, Ngá Wá é mingdán má, nungmoq eq rahá tsibiyiq wing asik lé shuq é buinyi a jé jé, tsibiyiq wing lé dum shuq rà a nghut lo." ga tai ri.

³⁰ Yhangmoq gi, hkya-on mahkôn ralhum ban hkôn jáng, Tsanlun Bùm shut htoq é ló bekô nghut ri.

Petruq He-ngik Rà Lé, Te Tai É Hkyô

Mrk 14:27-31; Luk 22:31-34; Yhn 13:36-38

³¹ Hau htàng má, Yesuq gi, yhangmoq lé, "Nungmoq lhunglhàng bang gi, hkù-mýn yhang jáng, Ngá é yanmai, myit lingbat kó rá nghut lhê; hkâsu mù gá le,

'Háu sau zung sú lé, Ngò bat sat pyám mù, sau hpung má é sau pé gi, lhoq pyo pyám é hui kó rá nghut lhê.'*

ga ká tô ri. ³² Nghut kôhang, Ngò gi, lhoq dui toq é huí htàng má, Galile mau shut, nungmoq é hí má é ló lánng rà nghut lhê." gá ri.

³³ Háu hkùn, Petruq gi, "Náng é yanmai, góbang banshoq myit lingbat kôhang, ngò gi, hkâ-nhám le myit lingbat rà a nghut." ga tú tai ri.

³⁴ Yesuq gi, "Ngò, nang lé teng za tai lé, hkù-mýn yhang jáng, woq a tún shimá, nàng,

Ngo lé sum dâm he-ngik pyám râ nghut lhê." ga tû tai ri.

³⁵ Nghut kôlhang, Petruq gi, "Ngò, Nàng eq rahá shí râ dut kôlhang, Nang lé ngò he-ngik pyám râ a nghut." ga sai tai ri. Haù chángzô pé góbang banshoq le, haù su ga châng tai bum akò nghut ri.

Get-samane Gà É Jowò Má Kyúdung É Hkyô

Mrk 14:32-42; Luk 22:39-46

³⁶ Hau htâng má, Yesuq gi, Yhâng é chángzô pé eq rahá Get-samane gà é jowò má é kômù, yhangmoq lé, "Ngò, hê má é mù, kyúdung nyi é u lé, nungmoq shí má zùng láng keq." ga tai ri. ³⁷ Yesuq gi, Petruq eq Zebedi yhangzô nhik lé shuí chùng ri. Yhang gi, myit gyai a ngón é eq myit wui nhik hkyik dut lò bê nghut ri. ³⁸ Hau htâng, Yhang gi, yhangmoq lé, "Ngò gi, shí râ í yhang myit yón nyi ri; nungmoq gi, Ngò su machyá luí, shí má láng nyí keq." ga tai ri.

³⁹ Yesuq gi, haù mai ratsuí zo sô é mù, myigùng má ngóm gop to luí, "Áwa ê, wó dut é nghut le gi, góm* shí lé, Ngá chyáng mai hai pyám byí laq. Nghut kôlhang, Ngò ô nau é đông a nghut, Nàng ô nau é đông sheq nghut sháng gaq." ga kyúdung ri.

⁴⁰ Hau htâng, Yhang gi, Yhâng é chángzô pé chyáng dum tau lo le, yhangmoq yhup myhi to kô é lé lo myàng ri. Haù mù, Yhang gi, Petruq lé, "Nungmoq gi, hkyíng hkum rahkum za lháng, Ngò eq rahá a wó machya nyi kó thú? ⁴¹ Gunglau é a hui sháng gaq, machyá luí, kyúdung nyi keq. Haù woi-nyi gi, kâm nyi kôlhang, gungsho gi, wum nyhôm nyi ri." ga tai ri.

⁴² Yhang gi, radàm dum ê mù, "Áwa ê, góm shí lé, Ngò a shuq é a wó lai rá nghut jáng gi, Nàng ô nau é đông nghut sháng gaq hkoi." ga kyú dum dưng ri.

⁴³ Yhang dum tau lo le, yhangmoq gi, myoqkuq lai kô é yanmai, yhup myhi to láng kô é lé, lo dum myàng ri. ⁴⁴ Haù mù, Yhang gi, yhangmoq lé tô pyám to mù, sum dâm ngù râ dàm dum é luí, hí lé dưng é dang lé roq é dum dưng ri.

⁴⁵ Haù mù, Yhang gi, haù chángzô pé chyáng dum tau jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó thú? Wú keq! Haù ahkyíng gi, jé bê nghut luí, haù Byu Yhangzo gi, yubak dap bâng é loq má ap pyám é hui rá nghut bê. ⁴⁶ Toq keq! Ló losháng hkoi! Ngo lé ap pyám rá sù gi, jé lé bê nghut ri." ga tai ri.

Yesuq, Chyup Yú Hui É Hkyô

Mrk 14:43-50; Luk 22:47-53; Yhn 18:3-12

⁴⁷ Yesuq, dâng nyo nyi ashí u lé, haù chángzo raxe í yuq má bo é Yudaq gi, jé lé

lo ri; haù hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byu moq mó le, yhang eq rahá nghut akò. ⁴⁸ Yesuq lé ap pyám rá sù gi, haù bang lé, "Ngò, bopuq puq é sù gi, haù yuq nghut bê; Yhang lé chyup yú keq." ga kumlhá byí tô ri. ⁴⁹ Yudaq gi, Yesuq chyáng hkyé za é mù, "Rabai ê, wángzán nyi lhê thú?" ga tai luí, Yhang lé bopuq puq byí ri.

⁵⁰ Haù hkûn, Yesuq gi, "Buinùm hpó é, nàng kut rá muzó lé kut aq hkoi." ga tû tai kat ri.

Hau htâng, yhangmoq gi, hí shut hui é luí, Yesuq lé chòm zuí zing mù, chyup yú bekò nghut ri. ⁵¹ Haù mù, Yesuq eq rahá nyi bang má é rayuq gi, shâm she htoq yú mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁵² Haù jáng, Yesuq gi, haù yuq lé, "Náng é shâm lé, xâng pyám aq; hkâsu mù gà le, shâm shê sù gi, ó yuq nghut kôle, sham êq shí rá nghut lhê. ⁵³ Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi rá nghut é lé, nungmoq a sé kó thú? ⁵⁴ Nghut kôlhang, haù su nghut é nghut jáng, shí hkyô dut lò rá nghut lhê ga Chyúmdang pé má bò tô é hkyô gi, hkâsu wó dik lò rá thú?" ga tai kat ri.

⁵⁵ Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup rá matú, shâm eq dumbáng pé chùng mù, lé lo akò thú? Ngò gi, nyí wuí, noqkuq yhùm má zùng mù, mhoqshit nyi kôlhang, nungmoq, Ngo lé a chyup yú kô é nghut lhê. ⁵⁶ Nghut kôlhang, shí su dut é hkyô pé banshoq gi, haù myightoi pé kâ tô é hkyô pé lo dik rá matú dut é nghut ri." ga tai ri. Haù hkûn, haù chángzô pé banshoq gi, Yesuq lé tô pyám to kôluí, hpang byo byuq bekò nghut ri.

Yudaq Byin Tú Wapdoq Má Jep Hui É Hkyô

Mrk 14:53-65; Luk 22:54-55, 63-71; Yhn 18:13-14, 19-24

⁵⁷ Yesuq lé chyup yu é bang gi, haù tará sará pé eq suwún wui zup zing nyi é jang. hkyangjong mó Kayahpaq é yhùm má, Yhang lé shuí e akò. ⁵⁸ Petruq gi, hkyangjong mó é yhumwàng hkaú má châng jé wàng shoq, we we mai Yesuq htâng châng tô ri. Yhang gi, hkâsu dut lò rá lé myàng nau luí, wàng hkaú má wang é mù, zúng bang eq rahá zung tô ri.

⁵⁹ Haù hkyangjong agyi pé eq Yudaq byin tú wapdoq má é góbang gi, Yesuq lé sat pyám nhâng rá matú, a têng é saksé ho nyi akò. ⁶⁰ A

* **26:39** Góm gà é gi, Yesuq, jamjau hui rá hkyô eq shí rá hkyô lé, tai nau é nghut lhê.

têng é saksé myo myo htoq lô kôlhang, wó sat rã í é saksé a myàng kó nghut ri.

Ló htáng má, byù í yuq gi, lé lô kômù, ⁶¹ "Shí yuq gi, 'Ngò gi, haù Garai Gasàng é noqkuq yhùm lé lhoq hten pyám mù, sum nyí gyoro má dum wó sai lhê,' ga tai sú nghut ri." ga tai akò.

⁶² Haù hkùn, haù hkyangjong mó gi, toq yap mù, "Nàng, haí le a tú tai luq? Shí bang, Nang lé mara hun nyí é saksé gi, hká dông nghut lhê lhu?" ga, Yesuq lé myí ri. ⁶³ Nghut kôlhang, Yesuq gi, jit le a ga nyí tô ri.

Haù mù, hkyangjong mó gi, Yhang lé, "Haù rú dui nyí é Garai Gasàng é mying lé lang luí, ngò, Nang lé myí wú lé: Nàng gi, Garai Gasàng é Yhangzo, Hkrisduq nghut lhê luq, ngamoq lé tai kyò wú aq." ga tai jáng, ⁶⁴ Yesuq gi, "Nàng tai é eq rajung za nghut lhê. Ngò, nungmoq banshoq lé tai kôlé, nungmoq gi, ahkuí mai htàng hpyang má, haù Byu Yhangzo gi, a-tsam bo dik Su é loqyo hkyam má zung tô é lé le, mhuthti jí mù, mauhkung mai lé lo é lé le, nungmoq myàng kó rá nghut lhê." ga tai ri.

⁶⁵ Haù hkùn, hkyangjong mó gi, yhang é bu lé láng cheq pyám mù, "Yhang gi, Garai Gasang lé rhoi dang tai bê nghut ri! Nga-nhung, hai saksé rá ashí lhu? Yhang, Garai Gasang lé rhoi dang tai é lé, nungmoq, ahkuí wó gyo bekò nghut lhê. ⁶⁶ Nungmoq hkàsù wó myit akò lhu?" ga myí jáng, yhang-moq gi, "Yhang gi, shí gíng sú nghut lhê." ga tú tai akò nghut ri.

⁶⁷ Haù htàng má, yhangmoq gi, Yesuq é myoqdong má sòkan byé gyun luí, loqtsup eq htui byí akò nghut ri. Góbang gi, Yhang lé bo-pyuq pyuq byú luí, ⁶⁸ "Hkrisduq Nàng, Nàng lé bat sú ó yuq nghut é lé, myiqhtoi htoí wú aq." ga tai akò.

Yesuq Lé, Petruq He-ngik Pyám É Hkyò
Mrk 14:66-72; Luk 22:56-62; Yhn 18:15-18, 25-27

⁶⁹ Petruq gi, wâng hkaù má nyi tô é u lé, dui-nhâng zoshâng myhi rayuq gi, yhang chyáng lé jé mù, "Nàng le, haù Galile byù Yesuq eq rahá nyí sú nghut ri." ga tai ri.

⁷⁰ Nghut kôlhang, Petruq gi, haù bang banshoq é hí má yhang, "Nàng haí tai nyí é lé, ngò a sé." ga he kat ri.

⁷¹ Haù htàng, yhang gi, wâng hkúmdong shut htoq e ló le, haù jowò má, dui-nhâng zoshâng myhi góyuq lé, yhang lé myàng mù, "Shí yuq gi, Nazaret wà byù Yesuq eq rahá nyí sú nghut ri." ga, haù má é bang lé tai kat ri.

⁷² Haù hkùn, yhang gi, "Byù haù yuq lé, ngò a sé!" ga dakam é dông he pyám ri.

⁷³ Haù htàng razup zo má, haù jowò má yap to bang gi, Petruq chyáng huí é kômù, "Nàng le, haù bang má bò sú yhang nghut ri; náng é danghté lé sê gyò ri." ga tai akò.

⁷⁴ Haù hkùn, yhang gi, yhânggùng yhang nhing luí, "Haù yuq lé, ngò a sé." ga dakam dang tai ri.

Haù-u yhang, woq tún bê nghut ri. ⁷⁵ Haù mù, Petruq gi, "Woq a tún shí má, nàng, Ngo lé sum dâm he pyám rá nghut lhê." ga, Yesuq, yhang lé tai é dang lé, myit bún kat mù, shinggan shut htoq é luí, gyai yhang é ngau ri.

27

Yudaq Juíshi É Hkyò
Mrk 15:1; Luk 23:1-2; Yhn 18:28-32

¹ Napsùn noq lé, hkyangjong agyi pé banshoq bang eq mingbyu é suwún wú gi, Yesuq lé sat pyám nhâng rá matú chòm myit hpyit yù bekò nghut ri. ² Haù mù, yhang-moq gi, Yhang lé tuí yù luí, shuí htoq é kômù, mauzau Pilat chyáng é ap byí akò nghut ri.

³ Yesuq lé ap pyám é sú Yudaq gi, Yesuq lé jéyáng doqđán é hkyò lé myang sé jáng, nungngham wó mù, haù ngùn sum xé chap lé, hkyangjong agyi pé eq suwún wui chyáng ló dum taù byí ri. ⁴ Haù mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga tai jáng, yhangmoq gi, "Haù hkyò, ngamoq eq haí sêng lhê lhu? Haù gi, nàng eq sheq ru sêng lhê." ga lhom tai kat akò nghut ri.

⁵ Haù mù, Yudaq gi, ngùn haù lé, noqkuq yhúm hkaù má dú pyám to luí, htoq ló mù, yhang gùng yhang é juíshi byuq bê nghut ri.

⁶ Haù hkyangjong agyi pé gi, ngùn chap haù pé kui yù luí, "Shí gi, sui hpau ngùn nghut lhê yanmai, alu sidek má a ge kat." ga tai akò. ⁷ Haù mù, yhangmoq gi, tungbaù pé é lupdùng kut rá matú, au sai zo su é maumyí lé, ngùn hau éq wui hpyit yù rá dông, chòm myit hpyit to bekò nghut ri. ⁸ Haù é yanmai, ahkuí jé shoq, haù jowò lé, sui myigùng ga myhngng tô akò nghut ri. ⁹ Haù gi, "Haù Israelaq byu pé mai, Yhang lé gù hpyit tô é ngùn sum xé chap lé, yhangmoq yù mù, haù Yhumsing Garai, ngo lé pying tô é eq rajung za, ¹⁰ haù au sai zo su é maumyí lé, yhangmoq wui yù bekò nghut ri." ga myiqhtoi Yeremiaq tai tô é dang lo dik é nghut ri.

Yesuq Lé, Pilat Myí Jep Wú É Hkyò
Mrk 15:2-15; Luk 23:3-5, 13-26; Yhn 18:33—19:16

¹¹ Haù u lé, Yesuq gi, mauzau hpò é hí má yap tô é nghut mù, haù mauzau hpò gi, Yhang lé, "Nàng gi, Yudaq byu pé é hko hkaù nghut lhê lhu?" ga myí jáng, Yesuq gi, "Nàng tai é eq rajung za nghut lhê." ga tú tai ri.

¹² Haù hkyangjong agyi pé eq suwún wui gi, Yhang lé, mara hùn kôjáng, Yhang gi, haí le a tú tai nghut ri. ¹³ Haù hkùn, Pilat gi, Yhang lé, "Yhangmoq, Nang lé mara hùn saksé haù-í hkâm nyí kô é lé, Nàng a wó gyo

lhub?" ga sai myi ri. ¹⁴ Nghut kôlhang, Yesuq gi, dang rahkun lhang a tû tai é yanmai, haú mauzau hpó gi, gyai maú byuq bê nghut ri.

¹⁵ Haú Lhoqlhai Poí u lé, mingbyú wui ô nau é má cháng lui, haú mauzau hpó gi, htóng byú rayuq yuq lé nhâng byi é htúng joq ri. ¹⁶ Haú u lé, a gè myìng htoq é htóng byú, Barabaq ga sù rayuq nyi ri. ¹⁷ Haú mù, byu moq mó zup zing lò kó é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akó lhub? Barabaq luq? Haú a nghut jáng, Hkrisduq gá é Yesuq lé luq?" ga myi ri. ¹⁸ Yhang haú su ga myi é gi, yhangmoq, Yesuq lé manôn kôluí, yhang chyáng lé ap byi kó é hkyô lé sê é yanmai nghut ri.

¹⁹ Pilat gi, tarâ jéyáng tingnyáng htoq má zung tô ashí hkûn, yhangmyi gi, "Haú mara a bò Sù lé, haí le hkákut; hkâsu mù gá le, hkû-nyí za lhang, yhupmoq má, haú yuq é yanmai, ngò tsómra hpuzó pyám bê nghut lhê." ga, yhang chyáng dang pying kat ri.

²⁰ Nghut kôlhang, haú hkyangjong agyi pé eq suwún wui gi, Barabaq lé dúng htoq yú rá eq Yesuq lé sat pyám nhâng rá matú, shiwa byu pé lé wum byi bekò nghut ri.

²¹ Haú mauzau hpó gi, "Shí í yuq má é hká yuq lé, nhâng byi nhâng nau akó lhub?" ga myi jáng, yhangmoq gi, "Barabaq!" ga tû tai akó nghut ri.

²² Haú mù, Pilat gi, "Haú jáng gi, Hkrisduq gá é Yesuq lé, ngò hkâsu kut rá lhub?" ga dum myi kat jáng, yhangmoq bang gi, "Yhang lé tapzing má jén sat pyám aq!" ga dum tû tai akó nghut ri.

²³ Nghut kôlhang, yhang gi, "Haí mù lui lhub? Yhang gi, hai mara kut shut bê lhub?" ga dum myi jáng, yhangmoq gi, htê mó éq, "Yhang lé tapzing má jén sat pyám aq!" ga je riyhang garú lo bum akó nghut ri.

²⁴ Pilat gi, hká dông le a dat kut lô é eq byu pé gabyông lò kó rá nghut é hkyô lé myàng lui, uchyam yú mù, shiwa byu pé hí má loq chí lui, tai é gi, "Shí yuq é sui gi, ngò eq haí a séng; nungmoq eq za ru séng lhê." gá ri.

²⁵ Haú shiwa byú lhunghâng bang gi, "Yhâng é sui gi, ngamoq é ngamoq é yhangzo yhangshú pé htoq má joq nyi sháng gaq." ga, dum tû tai kat akó nghut ri.

²⁶ Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzing má jén sat pyám rá matú ap byi kat bê nghut ri.

Yesuq Lé, Gyezò Pé Rhoi É Hkyô

Mrk 15:16-21; Yhn 19:2-3

²⁷ Hau htâng, mauzau hpó é gyezò pé gi, Yesuq lé, mauzau hpó é yhumwàng mó hkaú má shuí wang ló kômù, Yhâng é lhhnghkyuq má, gyedap gón lé ji tsing tô akó. ²⁸ Yhangmoq gi, Yesuq é mebu hkyut pyám byi kôluí, zam zam ne é buhng hut byi kômù,

²⁹ zujanmaú ralhun sai yú kôluí, Yhâng é ulhum má tsung byi akó nghut ri. Yhangmoq gi, jâm-yang rahkat lé, Yhâng é loqyo loq má kat byi kômù, Yhâng é hí má hkyihput htug kôluí, "Yudaq byu pé é hkohkâm hpó è! Chyung hing xê hing nyi sháng gaq ô!" ga, jihpoi dang tai akó. ³⁰ Yhangmoq gi, Yhang lé sôkan byé gyun lui, Yhâng é loq mai jâm-yang lú yú mù, Yhâng é ulhum má dum bat bat kut akó nghut ri. ³¹ Yhangmoq gi, Yhang lé rhoi jihkyoi ban kut yú kôjáng, Yhang wut tô é buhng lé hkyut yú kômù, Yhâng é mebu lé dum hut byi lui, tapzing má jén sat pyám rá matú, Yhang lé shuí htoq é ló bekò nghut ri.

Yesuq Lé Jén Pyám É Hkyô

Mrk 15:22-32; Luk 23:27-43; Yhn 19:17-

27

³² Yhangmoq htoq e ló nyi le, Kuruni myuq byú nghut é Simun ga sù lé myàng kômù, yhang lé, zik lui tapzing waq nhang akó nghut ri. ³³ Yhangmoq gi, Golgahta gá é jowó má jé é ló bekò nghut ri. Golgahta gá é lichyú gi, ugyap joq é jowó lé gá é nghut lhê. ³⁴ Haú má jé jáng, yhangmoq gi, Yesuq lé, hkó jung eq nyhò tô é tsibiyiq wing lé byi huq akó; nghut kôlhang, Yhang gi, haú lé chyam wú mù, a shuq byi kut pyám ri. ³⁵ Yhangmoq gi, Yesuq lé tapzing má jén tap tô é htâng, Yhâng é mebu lé lhang, hkyin shosé shé é dông gam yu pyám byi akó.

³⁶ Hau htâng, yhangmoq gi, haú jowó má zung to mù, Yhang lé zúng nyi akó nghut ri.

³⁷ Yhâng é u htoq má, "SHÍ YUQ GI, YUDAQ BYU PÉ É HKOHKÂM, YESUQ NGHUT LHÊ." ga, Yhang lé mara hun é laiká ká tap tô akó. ³⁸ Haú hkûn, Yhang eq rahá, damaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzing htoq má jén tap tô akó nghut ri. ³⁹ Hkyô sô lai ló é bang gi, nyhap é dông u-ngut ngut mù, tai kó é gi, ⁴⁰ "Noqkuq yhâm lé hpoyoq pyám lui, sum nyi gyo má dum wó sai lhê ga Sù è! Nang, Garai Gasâng é Yhangzo nghut le gi, Nang gúng nang hkyi yú lui, tapzing mai gyó lo wú aq mhai!" ga akó nghut ri.

⁴¹ Haú eq rajung za, hkyangjong agyi pé, tarâ sará pé eq suwún wui le, Yhang lé rhoi jihkyoi kut mù, tai kó é gi, ⁴² "Shí yuq gi, góbang lé hkyi yú sù nghut kôlhang, Yhânggung yhang gi, a wó hkyi yú nghut ri myhi-nhung! Yhang gi, Israelaq byu pé é hkohkâm nghut lhê là! Ngamoq wó lumjing rá matú, Yhang, tapzing mai gyó lo wú sháng gaq. ⁴³ Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yú sháng gaq; hkâsu mù gá le, Yhang gi, 'Ngò, Garai Gasâng é Yhangzo nghut lhê.' ga tai ri." ga bum akó nghut ri. ⁴⁴ Haú eq rajung za, Yhang eq rahá tapzing má jén to lui é

damaq í yuq le, Yhang lé rhoi dang tai akò nghut ri.

Yesuq Soqkang Byit É Hkyô

Mrk 15:33-41; Luk 23:44-49; Yhn 19:28-

30

⁴⁵ Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. ⁴⁶ Myinhâng sum hkyíng kô má, Yesuq gi, "Eloi, Eloi, lama sabakhtani?" ga, hté mó èq garú kat ri. Hau é lichyúm gi, "Ngá Garai é, Ngá Garai é, Nang, hai mù, Ngo lé tô pyâm tô lhê lú?" gá é nghut ri.⁴⁷

⁴⁷ Haú nâm má yap tô é bang ra-am gi, haú lé wó gyo kôjáng, "Yhang gi, myiqhtoi Eliyaq lé wut nyi ri." ga tai akò.

⁴⁸ Haú hkún jáng, yhangmoq má é rayuq gi, din e ló mù, wuimaù lé é yu ri. Yhang gi, haú lé tsiyiq wíng chyín má jum yú luí, jám-yang má tuí tap mù, Yesuq shoq rá matú yhun byí ri. ⁴⁹ Góbang gi, "Yhang lé, Eliyaq, lé hkyi yu lhê laq, nga-nhúng chóm láng wú sháng," ga tai akò nghut ri.

⁵⁰ Haú hkún, Yesuq gi, hté mó èq dum garú kat luí, Yhâng é soqkang byit bê nghut ri.

⁵¹ Haú u lé, haú noqkuq yhúm má é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún ló mù, luqgok pé le goq byuq bê nghut ri. ⁵² Lup pé gi, bóng ló mù, shi byuq bê é chyoiyúng bang myo myo gi, lhoq dui é hui akò. ⁵³ Haú bang gi, Yesuq dum dui toq é htâng, lup mai htoq lô kômù, chyoiyúng myuq* má wang é luí, byú myo myô hí má htoq shit akò nghut ri.

⁵⁴ Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dàn kômù, "Yhang gi, gè gè yhang, Garai Gasâng é Yhangzo nghut ri-nhung!" ga tai akò nghut ri.

⁵⁵ Myiwe wui myo myo le, we we mai wú nyi bum akò. Haú bang gi, Yesuq rá é má garúm rá matú, Galile mau mai Yhang htâng châng lé é bang nghut akò. ⁵⁶ Haú bang má, Magadalaq wà má é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akò nghut ri.

Yesuq Lé, Myhup Pyâm É Hkyô

Mrk 15:42-47; Luk 23:50-56; Yhn 19:38-

42

⁵⁷ Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byú Yosep ga sù lé lo ri. ⁵⁸ Yhang gi, Pilat chyáng é mù, Yesuq é gungsóm lé é dung jáng, Pilat gi, yhang lé byi rá matú hkunmó hkyô kat bê nghut ri. ⁵⁹ Yosep gi, gungsóm lé

yù mù, pán yúng èq htup yup luí, ⁶⁰ luqgok lé kyúng tô é, yhâng é lup sik hkaù má é kat tô ri. Hau htâng, yhang gi, luphukum má, luqlông èq lhêng chí pyâm to luí, ló byuq bê nghut ri. ⁶¹ Magadalaq wà má é Mariq eq goyuq Mariq gi, lup hí má zung tô akò nghut ri.

Lup Zúng É Hkyô

⁶² Haú Hên Lajang Buinyi lai é htâng nyi lé, hkyangjong agyi pé eq Hparishe pé gi, Pilat chyáng é mù, ⁶³ "Yhumsing é, Yhang, asak dui nyi ashí hkún, 'Sum nyi ngúh rá buinyi má, Ngò dum dui toq lô rá.' ga, haú byú mhaù tai é dang lé, ngamoq bún nyi lhê. ⁶⁴ Haú mù, haú sum nyi ngúh rá buinyi jé shoq, lup lé rago za zúng nhang to aq. Haú a nghut jáng, Yhâng é chángzô pé, mâng lé lé hkaù yu ló mù, Yhang shi é mai dum dui toq lô bê ga, byu pé lé tai kô rá nghut lhê. Shí, ló htâng dàm mhaù é hkyô gi, sâng-hi dàm htoq je wui rá nghut lhê." ga, lé tai akò nghut ri.

⁶⁵ Haú hkún, Pilat gi, "Nungmoq sé é dông, lup lé hai a dut loshoq, gyezô pé lé zúng nhang to keq." ga tú tai kat ri. ⁶⁶ Haú mù, yhangmoq gi, é luí, lup lé gau shoq ga, luqgok má dizik hung mù, lup zúng byú nyhi to bekò nghut ri.

28

Dum Dui Toq Lo É Hkyô

Mrk 16:1-8; Luk 24:1-12; Yhn 20:1-10

¹ Bánno buinyi lai jáng, rabat é sâng-hi nyi maubó zó má, Magadalaq wà má é Mariq eq goyuq Mariq gi, lup má é wú rá ga, e ló akò.

² Haú hkún, layàng mó nún lo ri; hkâsu mù gà le, Yhumsing Garaí é maumang lagyo rayuq gi, mauhkúng mai gyó lé ló mù, lup má é luí, haú luqlong lé tu lheng mù, hau ahtoq má zung tô ri. ³ Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. ⁴ Zúng nyi é bang gi, yhang lé lúm wú gyuq kômù, pyik pyik nán luí, shí gùng su dut bùm bekò nghut ri.

⁵ Haú maumang lagyo gi, myiwe haú nhik lé, "Hkâgyuq kó! Haú tapzng má jén sat huí é Yesuq lé, nungnhik ho nyi kô é lé, ngò sê lhê. ⁶ Yhang gi, shí má a nyi lo; Yhang tai tô é eq rajung za, lhoq dui toq é hui bê nghut ri. Yhang lé lheq é jowó lé, lé wú keq. ⁷ Haú mù, hân taù ló luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut ló láng berâ. Nungmoq, Yhang lé, haú má ló myàng kô rá nghut lhê.' ngúh ló tai kyo keq. Nungnhik lé, ngò tai é lé matsing chúng keq." ga tai kat ri.

⁸ Haú mù luí, myiwe myhí haú nhik gi, gyuq kôhang, gyai gabú é myit èq lup mai hân taù ló mù, Yhâng é chángzô pé lé ló tai

* 27:46 Hkya-on 22:1

* 27:53 Chyoiyúng myuq gá é gi, Yerusalem wà mó lé gá é nghut lhê.

kyo râ matú, din ló bê nghut ri. ⁹ Haú hkún, Yesuq gi, radá dâm yhangnhik lé lhom tê mù, "Wángzán nyí kó sháng gaq." ga taí ri. Haú mù, yhangnhik gi, huí ê luí, Yhâng é hkyí má po zing to mù, Yhang lé noqkuq akó. ¹⁰ Haú hkún, Yesuq gi, yhangnhik lé, "Hkâgyuq kó. Ngá é gumang wui lé, Galile mau shut e ló keq nghú ló taí kyo keq; haú má, yhangmoq, Ngo lé myàng kó râ nghut lhê." ga taí kat ri.

Zúng Nyi É Gyezô Pé Tai É Danglù

¹¹ Myiwe haú nhik hkyô má ru nghut nyi ashí le, lup zúng é gyezô pé ra-am gi, myuq hkaú má wang ló mù, dut lai lo é hkyô banshoq lé, haú hkyangjong agyi pé lé ló taí kyo akó nghut ri. ¹² Haú hkyangjong agyi pé gi, suwún wui eq huí lhum luí, hpyê lhum é htàng má, haú gyezô pé lé, ngùn myo myo tsup byi mù, ¹³ "Myín lé, ngamoq yhup myhí tô é hkún, Yhâng é chángzô pé lé lô mù, mâng lé, lé hkaú yu ló bekô nghut ri." nghú taí keq. ¹⁴ Shí hkyô lé, haú mauzau hpó wó gyô é nghut jáng, yhang myit ngón shoq, ngamoq taí râ nghut lhê; haú hkún, nungmoq gi, hai manghkáng a htoq râ nghut lhê." ga taí kat ri. ¹⁵ Haú mù, gyezô pé gi, ngùn haú pé lé yù luí, yhangmoq lé taí kat é eq rajung za kut bekô nghut ri. Haú su mù, haú hkyô gi, Yudaq byu pé má taí pyo myhín ló bê nghut mù, ahkuí jé shoq tai nyi bum akó nghut ri.

Chángzô Pé Kut Râ Sasana Muzó

Mrk 16:14-18; Luk 24:36-49; Yhn 20:19-23; Lagyo 1:6-8

¹⁶ Hau htàng má, haú chángzo raxe rayuq gi, yhangmoq lé, Yesuq é nhang tô é Galile mau má é bùm shut e ló bekô nghut ri. ¹⁷ Yhangmoq gi, Yesuq lé myàng kôjáng, no-qquq akó; nghut kôlhang, ra-am gi, a dê jing kó nghut ri. ¹⁸ Hau htàng, Yesuq gi, yhangmoq chyáng lé lô mù, "Mauhkúng eq myigúng htoq má é ahkáng ayá banshoq, Ngo lé byí to bê nghut lhê. ¹⁹ Haú mù, nungmoq gi, htoq é luí, byù myú chângjup lé, Ngá é chángzô pé dut nhâng mù, haú Iwa, Yhangzo, Chyoiyúng Woi-nyí é mying lang luí, wui-myhup hkám byi mù, ²⁰ nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhoqshit keq. Ngò gi, mingkan pyat htúm é hkún jé shoq lhang, nungmoq eq rahá ru nghut nyí râ nghut lhê." ga pying tô ri.

MARKUQ é Gabú Danglù Laiká (The Gospel of Mark)

*Yesuq É Matú Hkyô Htong Byí É Hkyô
Mht 3:1-12; Luk 3:1-18; Yhn 1:19-28*

¹ Haú Garai Gasâng é Yhangzo, Yesuq Hkrisduq eq sêng é gabú danglù hi é hkyô gi, ² haú myiqhtoi Esai-aq laiká má:

"Náng é hkyô lajang láng rà matú, Ngá é lagyo lé, Náng é hi má Ngò nhang kat rà nghut lhê."^o

ga luí le,

³ "Haú yoso má, byù rayuq garú tai é htê gi, 'Haú Yhumsing é matú, hkyô hen to keq; Yhâng é matú hkyô lhoq nyhang to keq."^o

ga luí le, kâ tô é eq rajung za nghut lhê. ⁴ Haú mù, Wui-myhup Sará Yohan gi, yoso hkaú má jé lé luí, wui-myhup hkám byí nyi é eq, yubak mara hkyut pyám byí é huí rá matú myit lhng mù, wui-myhup hkám yù rá hkyô lé, hko kyô nyi ri. ⁵ Haú hkùn, Yuda mau jowó hkanmó má é bang eq Yerusalem wá mó má é banshoq bang gi, yhâng chyáng htoq é bum akò. Yhangmoq gi, yhumsing é mara lé yín yú kòluí, yhâng chyáng mai Yodan làng má wui-myhup hkám yu bum akò nghut ri. ⁶ Yohan gi, gola-uq shomaú eq saí é mebu wut mù, yhâng é hpyidum má gi shokuq hpyihit hit ri; yhang gi, dinggám eq yosò byo-í pé lé zo sú nghut ri. ⁷ Yhang tai kyô é dang gi, "Ngá htoq má wum-o a-tsam je bo é sú rayuq, ngá htâng má jé lé rá nghut lhê; ngò gi, yhâng é hkyí-tsung tui lé hpyí rá lháng a gingdán é nghut lhê. ⁸ Ngò gi, nungmoq lé, wui eq za wui-myhup wó hkám byí lhê; nghut kòlhang, Yhang gi, Chyoiyúng Woi-nyí má nungmoq lé wui-myhup hkám byí rá nghut lhê." ga ri.

*Yesuq, Wui-myhup Hkám Yu É Hkyô Eq
Gunglaú Huí É Hkyô*

Mht 3:13-17; 4:1-11; Luk 3:21-22; 4:1-13

⁹ Haú yoq má lé, Yesuq gi, Galile mau Nazaret wá mai lé jé mù, Yohan chyáng Yodan làng má wui-myhup hkám yu ri. ¹⁰ Yesuq gi, wui mai htoq lo é u lé, mauhkúng bóng lo é lé le, Woi-nyí gi, hpúngkyui gungghkyáng sú é dōng mai, Yhang ahtoq má gyó lé lo é lé le, Yhang myang kat ri. ¹¹ Haú hkùn, "Nàng gi, Ngò chyitdap é Ngá zo nghut lhê; Náng é ahtoq má Ngò gabú myit ngón nyi lhê." ga mauhkúng mai danghtê htoq lo ri.

¹² Haú hkùn jáng, Woi-nyí gi, Yhang lé yoso shut wang é ló nhang ri. ¹³ Haú mù, Yhang gi, yoso má myi xê nyí nyi luí, Tsadán

éq gunglaú é huí ri; tân jung yosò zè pé le, Yhang eq rahá nghut nyi ri; maumang lagyô pé gi, Yhang lé, lé dojaú nyi akò nghut ri.

Sâng-hi Lhê É Chángzó Pé

Mht 4:12-22; Luk 4:14-15; 5:1-11

¹⁴ Yohan htóng gyó é htâng má, Yesuq gi, Galile mau má ló jé mù, ¹⁵ "Ahkying gi, jé bê; Garai Gasâng é mingdán gi, chyáng lò bê nghut ri; myit lhng mù, haú gabú danglù lé lumjing keq hkoi." ga luí, Garai Gasâng é gabú danglù lé hko kyo wún ri.

¹⁶ Yesuq gi, Galile không yám mai sô lai ló le, Simun eq yhanggu Andre nhiktàng, không má gùn dú nyí kô é lé, myang ri; haú nhik gi, ngozo kóng zo su nhik nghut akò. ¹⁷ Haú mù, Yesuq gi, haú nhiktàng lé, "Ngá htâng cháng keq; Ngò, nungnhik lé, byù lé châng kóng su nhik dut nhâng rá nghut lhê." ga tai ri. ¹⁸ Haú hkùn, yhangnhik gi, radá dâm, gùn pé lé tô pyám to luí, Yhang htâng cháng bekò nghut ri.

¹⁹ Yesuq gi, radun zo dum sô e ló é hkùn, Zebedi é yhangzo, Yakuq eq yhanggu Yohan nhiktàng, lhai hkaú má gùn hpo nyi kô é lé, myang ri. ²⁰ Haú hkùn, Yhang gi, radá dâm, yhangnhik tâng lé wut kat jáng, yhangnhik tâng gi, yhangnhik é yhangwa Zebedi eq langchyáng pé lé, lhai hkaú má nyhi pyám to kòluí, Yhang htâng cháng bekò nghut ri.

*Nat Lé, Yesuq Hkat Htoq Pyám É Hkyô
Luk 4:31-37*

²¹ Yhangmoq gi, Kaperna-um wá má e akò; Bánno buinyi nyi jé jáng, Yesuq gi, tarajong má wang é mù, mhoqshit hi lò bê nghut ri. ²² Shiwa byu pé kúm gi, Yhang mhoqshit é hkyó lé mauhong bum akò; hkásu mù gá le, Yhang gi, tará sará pé eq a pung é za, ahkáng ayá wó sú rayuq su, yhangmoq lé mhoqshit é yanmai nghut ri. ²³ Haú u lé, agè ashop é nat wang júng é byù rayuq tarajong má bo lom nyi luí, wut garú kat é gi, ²⁴ "Nazaret wá byù Yesuq é, ngamoq gi, Náng eq haí sêng lhê lúhú? Ngamoq lé lhoq hten rá matú, Náng jé lé é nghut lhê lúhú? Náng gi, Garai Gasâng é Chyoiyúng Sù nghut é lé, ngò sê lhê." ga ri.

²⁵ Haú hkùn, Yesuq gi, "Hkâjop, yhâng chyáng mai htoq ló aq." ga yhang lé tân kat ri. ²⁶ Haú hkùn, agè ashop é nat haú gi, byù haú yuq lé wum kat langhtán nhâng luí, htê mó eq garu uchyang htoq ló byuq bê nghut ri.

²⁷ Shiwa byù banshoq bang gi, gyai yhang maú byuq kômù, rayuq eq rayuq, "Shí yuq é dang gi, hkású é dang wá nghut lhê lúhú? Ahko ahkáng bo é dōng mhoqshit é hkyô asik nghut ri-nhung! Yhang gi, agè ashop é nat pé lé hkunmó hkyó jáng, haú bang lháng gyo byí akò nghut ri." ga luí, tai lhum bum akò nghut ri. ²⁸ Yesuq eq sêng é ludang gi,

Galile mau jam shoq, yang é dōng byo myín ló bê nghut ri.

Byù Myo Myo Lé, Yesuq Lhoq Gê Byí É Hkyô

Mht 8:14-17; Luk 4:38-41

²⁹ Yhangmoq gi, tarajong mai htoq lui, hau hkùn jáng, Yakuq eq Yohan nhik le mù, Simun eq Andre nhiktàng é yhùm má wang e ló bekò nghut ri. ³⁰ Simùn é yhâng-aumó gi, gyai yhang nò leq tô é nghut mù lui, yhangmoq gi, Yesuq lé hau yuq no é hkyô lhom tai kyô akò nghut ri. ³¹ Hau mù lui, Yesuq gi, yhâng chyáng huí é mù, yhâng é loq má zui lui tu tsung ri; hau hkùn jáng, nò ge byuq lui, yhang gi, yhangmoq lé gai tso gai huq bê nghut ri.

³² Hau nyí buiwang é htàng má, byu pé gi, no é bang eq nat gang wang júng nyi é bang banshoq lé, Yesuq chyáng shuí lé lo bum akò nghut ri. ³³ Rawa bang, hkúmdong nám má lé zup zing tô akò. ³⁴ Hau mù, Yesuq gi, awáng nòhpyo ajung jung huí é bang myo myo lé lhoq gê byí ri; nat gang myo myo lé le, hkat htoq pyám ri; nghut kólhang, Yhang ó nghut é lé nat gang hau bang sé kò é yanmai, nat gang hau bang lé dang a tai nhâng nghut ri.

³⁵ Yesuq gi, htang napkyó mau lhang a bó shimá, toq mù, gaú é jowò ralhun má htoq é lui, kyú é dúng ri. ³⁶ Simun eq yhâng é luzúm wui kúm gi, Yhang lé châng hô kômù, ³⁷ Yhang lé myang hô kôjáng, "Yuq hkanqmó gi, Nang lé châng hkat ho nyi akò." ga lui, tai kyô akò nghut ri.

³⁸ Hau hkùn, Yesuq gi, yhangmoq lé, "Awui ayàm má é wá pé má le, ngò, mung-dang wó hkò rá matú é sháng, hau é matú ngò lé é ru nghut lhê." ga tũ tai ri. ³⁹ Hau mù lui, Yhang gi, Galile mau ramau gón, tarajong pé má mungdang hkat hko wún é htoq agó, nat gâng pé lé le hkat htoq pyám byí wún ri.

Manggâm Dap Sù Lé, Yesuq Lhoq Gê Byí É Hkyô

Mht 8:1-4; Luk 5:12-16

⁴⁰ Manggâm dap é byù rayuq gi, Yesuq chyáng lé mù, hkyihput htuq lui, "Nàng dóng é nghut le gi, ngò lé Nàng wó lhoq sân-yúng byi rá nghut lhê." ga dung wut ri.

⁴¹ Hau hkùn, Yesuq gi, yhang lé wú shogyo lui, loq lhâm kat mù, hau yuq lé é záng lui, "Ngò dóng lhê, sân-yúng aq hkoi." ga tai ri.

⁴² Hau hkùn jáng, manggâm ana byuq byuq lui, yhang gi, gè bê nghut ri.

⁴³⁻⁴⁴ Yesuq gi, "Nàng, shí hkyô ó lé le hkàtai kyo. Nghut kólhang, náng é gungdu lé, hkyangjong hpò chyáng ló tũn shít mù, náng sân-yúng bê hkyô lé yhangmoq é matú saksé dut sháng gaq, Mosheq tará tô tô é eq rajung za, hkungga ló nhông byi aq." ga, yhang lé

gyai yhang sidiq byi mù, radá dâm nhang kat bê nghut ri. ⁴⁵ Nghut kólhang, hau yuq gi, htoq ló mù, hau hkyô lé je tai pyo myhín ló bê nghut ri. Hau é yanmai, Yesuq gi, wá hkaú má de de a ge wang ló lo mù, shinggan má é chamchuyiui dut é jowò má za nyi nyi ri. Nghut kólhang, byu pé gi, jowò hkanqmó mai Yhâng chyáng ru zing lé nyi bum ashí kò nghut ri.

2

Gùngjum Shí Sù Lé, Yesuq Lhoq Gê Byí É Hkyô

Mht 9:1-8; Luk 5:17-26

¹ Buinyi hkà-myháng a myáng má, Yesuq gi, Kaperna-um wá má dum wang lò jáng, Yhang yhùm dum taú jé lô bê gá é hkyô lé, byu pé wó gyô bum akò nghut ri. ² Hau mù, byù myo myo zing lé lô kólui, yhùmhkaú má jowò a joq lô é htoq agó, hkumtot má lhang a joq lo nghut ri; Yesuq gi, yhangmoq lé mungdang hko kyô nyi ri. ³ Hau hkùn, byù myi yuq gi, gùngjum shí sù rayuq lé chòm dang waq lui, Yhâng chyáng lé lo akò. ⁴ Yhangmoq gi, byù lùm myò chýin chypat to mù, byù hau yuq lé Yesuq chyáng a wó shuí jé é kò é yanmai, Yesuq é u htoq má é yhumhkúng lé dong htông yù lui, gùngjum shí sù lé taphkang eq roq hkyô kat akò nghut ri. ⁵ Yesuq gi, yhangmoq é lumjúng myit lé byu-myáng jáng, gùngjum shí sù lé, "Ngá zo é, náng é yubak mara lé hkyut pyám byi bê." ga tai ri.

⁶ Hau hkùn, tará sará pé ra-am gi, hau má zung to kólui, yhangmoq é i-myit unghkaú má, ⁷ "Byù shí yuq gi, hái mù lui hau sù ga lhê laq? Yhang gi, Garai Gasang lé rhoi dang tai nyi ri; Garai Gasang mai lai lui, ó yuq wá mara wó hkyut byi rá lhu?" ga lui, myit són wui nyi bum akò nghut ri.

⁸ Yesuq gi, yhangmoq é unghkaú má myit wú nyi kò é hkyô lé, radá dâm Yhang é myit mai sé mù, "Nungmoq é i-myit hkaú má, hái mù hau sù ngúh myit són wui nyi bum akò lhu?" ⁹ Hau gùngjum shí sù lé, "Náng é yubak mara lé hkyut pyám byi bê." ngúh tai é dang eq, "Toq aq, náng é taphkang lé yù mù, hkyô só aq." ngúh tai rá má, hká hkun je tai lui lhê lhu?" ¹⁰ Nghut kólhang, hau Byu Yhangzô* gi, mingkan htoq má, mara hkyut byi rá ahkáng wó Sù nghut é lé, nungmoq lé sé nhâng nau lhê." ga, yhangmoq lé tai kat ri. ¹¹ Hau htàng, Yhang gi, hau gùngjum shí sù lé, "Ngò, nang lé tai bá, toq aq, náng é taphkang lé yu chùng lui, yhùm taú ló aq hkoi." ga tai ri. ¹² Hau yuq gi, toq mù, yhâng é taphkang lé yu chùng lui, yhangmoq banshoq bang wú tsuq tô é myoq hí mai só htoq ló byuq bê nghut ri. Hau é yanmai,

* 2:10 Byu Yhangzo gá é gi, Yesuq Yhânggùng yhang lé le tai é nghut lhê, Mesaia lé le tai é nghut lhê.

yuq hkangmó gi, mauhong bùm kômù, "Isù é hkyô gi, hkâ-nhám lháng a myàng wú shí." ga, Garai Gasang lé hkya-on kungton bum akò nghut ri.

Lewiq (Mahte) Lé Wut Yu É Hkyô
Mht 9:9-13; Luk 5:27-32

¹³ Yesuq gi, nhông yàm má radàm dum htoq e ri. Haù hkùn, byù moq mó gi, Yhâng chyáng jé lé lo bùm kômù, Yhang gi, haù bang lé lhom mhoqshit nyi ri. ¹⁴ Yhang gi, sô yông ló nyi é hkùn, kang guq zùm má zung tô é, Alhpe yhangzo Lewiq lé myang kat luí, "Ngá htàng cháng aq." ga tai ri. Haù hkùn, Lewiq gi, toq luí, Yhang htàng cháng bê nghut ri.

¹⁵ Yesuq gi, Lewiq é yhùm má myinzang é zô nyi é hkùn, kang guq bang myo myo eq yubak dap bang le, Yhang eq Yhâng é chángzô pé eq rahá zo shuq bum akò. Hkâsu mù gá le, Yhang htàng cháng é bang gi, ajùm ayò nghut é yanmai nghut ri. ¹⁶ Tará sará nghut é Hparishe pé ra-am gi, yubak dap bang eq kang guq zo bang le mù rahá, Yesuq zang zô nyi é lé myàng kôjáng, Yhâng é chángzô pé lé, "Yhang gi, haù mù luí, kang guq bang eq yubak dap bang eq rahá zo shuq nyi lhé lú?" ga myí bum akò nghut ri.

¹⁷ Haù su ga myi kô é lé Yesuq wó gyo jáng, Yhang gi, yhangmoq lé, "Wángzán bang gi, chi sará a ra kó, nòhpyo hui bang za sheq ru rá lhé. Haù eq rajung za, Ngò gi, dingmán bang lé wut yù rá matú jé lé é a nghut, yubak dap bang lé ji yù rá matú sheq jé lé é ru nghut lhé." ga tai kat ri.

Zoshuq Gám É Eq Sêng É Hkyô
Mht 9:14-17; Luk 5:33-39

¹⁸ Yohan é chángzô pé eq Hparishe pé gi, zoshuq gám nyi akò nghut ri. Haù mù, ra-am gi, Yesuq chyáng jé lé kômù, "Wui-myhup Sará Yohan é chángzô pé eq Hparishe pé é chángzô pé gi, zoshuq gám akò; nghut kôlhang, náng é chángzô pé gi, haù mù a gám kô é lú?" ga luí, myí akò nghut ri.

¹⁹ Haù hkùn, Yesuq tú tai é gi, "Bíng pé gi, lusik eq rahá nghut nyi tô ashí hkùn, zoshuq hkâsu wó gám rá lú? Yhangmoq gi, lusik eq rahá nghut nyi é u lé, zoshuq gám kó rá a nghut. ²⁰ Nghut kôlhang, lusik lé yhangmoq chyáng mai shuí yu pyâm é hkyíng jé rá nghut lhé; haù buinyi pé má kúm gi, yhangmoq, zoshuq gám kó rá nghut lhé.

²¹ Ó yuq le, mebu xau má pán sik èq a lhaq hpo wú kó; haù su kut é nghut jáng, pán sik gi, kun byuq mù, mebu xau le jé lhoq cheq pyâm rá nghut lhé. ²² Haù eq rajung za, tsibiyiq wing asik lé le, shokuq htùng axau má ó a kat wú kó. Kat é nghut jáng, tsibiyiq wing asik gi, htùng lé lhoq buq goq nhâng luí, tsibiyiq wing eq shokuq htùng htên byuq

rá nghut lhé. Haù mù, tsibiyiq wing asik gi, shokuq htùng sik má za ge kat é nghut lhé.

Bánno Buinyi É Yhumsing
Mht 12:1-14; Luk 6:1-11

²³ Bánno buinyi ra-nyí má, Yesuq gi, Yhâng é chángzô pé eq rahá yò hkaù mai sô láí ló é hkùn, Yhâng é chángzô pé gi, kyôshi ratsuí langshap yu akò nghut ri. ²⁴ Haù mù, Hparishe pé gi, Yesuq lé, "Wú aq, Bánno buinyi má a ge kut jung lé, haù mù, náng é chángzô pé kut nyi akò lú?" ga tai akò.

²⁵ Haù hkùn, Yesuq gi, yhangmoq lé, "Dawiq lháng gi, yhâng htàng cháng é bang eq rahá zómut hui luí, zoshuq rá tô é hkùn, hkâsu kut é hkyô lé, nungmoq hkâ-nhám le a nghap wú kó lú? ²⁶ Abiahta, hkyangjong mó kut nyi é u lé, Dawiq gi, Garai Gasang é yhúmhkaù má wang é mù, hkyangjông pé mai lai luí, ó le a ge zô é, kyâng tô é muk lé yù zo mù, yhang htàng cháng é bang lé le ratsuí tsuí byi tso é nghut lhé." ga tú tai ri.

²⁷ Hau htàng, Yhang gi, yhangmoq lé, "Bánno buinyi gi, byù é matú kut tô é nghut lhé; byù gi, Bánno buinyi é matú a nghut. ²⁸ Haù mù, haù Byu Yhangzo gi, haù Bánno buinyi é Yhumsing lháng nghut lhé." ga xox tai ri.

3

¹ Yesuq gi, tarajong má radàm dum wang e le, loq raloq ajum shi byuq é byù rayuq nyi to lánng ri. ² Haù hkùn, haù má nyi tô é bang ra-am gi, Bánno buinyi má, Yesuq mai haù yuq lé lhoq gè byi rá lú ga, mara hùn rá matú gyám wú nyi akò nghut ri. ³ Yesuq gi, haù loq jum shí sù lé, "Banshoq bâng é hí má, toq yap shit aq." ga tai kat ri.

⁴ Hau htàng, Yhang gi, haù má nyi tô é bang lé, "Bánno buinyi má, ge é muzó kut rá, a ge é muzó kut rá, byù asak hkyí rá eq byù sat rá hkyô pé má, hká lhum kut le sheq tará wang lhé lú?" ga myí kat jáng, yhangmoq kúm gi, jit le a ga kó nghut ri.

⁵ Haù mù, Yhang gi, nhik-yô nau é myit èq haù bang lé lhing wú mù, yhangmoq myit htan é hkyô lé, wú yón luí, haù loq jum shí sù lé, "Náng é loq nyhang kat aq." ga tai kat jáng, haù yuq gi, loq nyhang kat luí, yhâng é loq gi, shoq za ge byuq bê nghut ri. ⁶ Hau htàng má, Hparishe pé gi, htoq ló kômù, Yesuq lé hkâsu kut wó sat pyâm rá hkyô lé, Herut é byu pé eq chôm hpyê lhùm bum akò nghut ri.

Byù Ajùm Ayò, Yesuq Htàng Cháng Kô É Hkyô

⁷ Yesuq gi, Yhâng é chángzô pé eq rahá, nhông shut dum e ló le, Galile mau má é byù ajùm ayò gi, Yhang htàng cháng e ló bum akò nghut ri. ⁸ Hau htoq agó, Yuda mau má é bang, Yerusalem wá mó má é bang, Idumia mau má é bang, Yodan lánng hé hpoq má é bang, Turuq myuq eq Sidun myuq

awui ayàm jé shoq mã é bang, ajùm ayò gi, Yhang kut nyi é hkyò banshoq lé wó gyo kôjáng, Yhâng chyáng jé lé bum akò nghut ri.⁹⁻¹⁰ Yesuq gi, byù myo myo lé lhoq gè byí é yanmai, nõhpyo hui to bang gi, Yhang lé wó záng shoq ga, chýin chyap wang ló bum akò. Byù lùm myo luí, Yesuq gi, Yhang lé a nhè pyet pyám sháng gaq ga, Yhâng é chángzò pé lé lhai ralhum hen to nhang ri.¹¹ Agè ashop é nat pé gi, Yhang lé myàng hkangmó, Yhâng é hí má lêng ngop to luí, "Nàng gi, Garai Gasâng é Yhangzo nghut ri." ga luí, tai garú akò.¹² Nghut kôlhang, Yesuq gi, Yhang ó yuq nghut é hkyò lé a tai byông htoq rá matú, tân hkúm kat ri.

Lagyo Kut Râ Byù Raxe Í Yuq Hkyin Yu É Hkyò

Mht 10:1-4; Luk 6:12-16

¹³ Yesuq gi, bùm shut doq ló mù, Yhang ó nau é bang lé jí kat luí, haù bang gi, Yhâng chyáng jé lé lo bum akò nghut ri.¹⁴ Haù hkùn, Yesuq gi, byù raxe í yuq lé hkyin yù luí, lagyo ayá byí ri; haù bang gi, Yhang eq rahá nyi rá matú le, mungdang hkò rá matú Yhang nhang htoq kat rá eq.¹⁵ Nat gâng pé lé hkat htoq rá ahko ahkáng wó rá matú le, nghut akò nghut ri.¹⁶ Haù raxe í yuq gi, Simun (Yesuq mai Petruq ga mying myhíng byi sù);¹⁷ Zebedi é yhangzò nhiktàng Yakuq eq yhanggu Yohan (Yháng nhiktàng lé Yesuq mai Buanerga ga mying myhíng byí ri; hau é lichyúm gi, maugum zò nhik gá é nghut lhê.);¹⁸ Andre, Hpilip, Barhtolume, Mahte, Htomaq, Alhpe é yhangzo Yakuq, Htade, Zelutuq* dut é Simun eq,¹⁹ Yhang lé ap pyám rá sù, Yudaq Iskarut pé nghut akò.

Yesuq Eq Bezebulaq

Mht 12:22-32; Luk 11:14-23; 12:10

²⁰ Hau htàng, Yesuq gi, yhùm má wang ló le, byù ajùm ayò dum zing lé ló kômù, Yhang eq Yhâng é chángzò pé gi, zang zo hkyíng lháng a wó kó nghut ri.²¹ Yhâng é yhumbyù wuì gi, haù hkyò lé wó gyo kôjáng, "Yhang, myit a gyíng lo nghut ri." ga luí, Yhang lé hung shuí yù rá matú, e akò nghut ri.

²² Yerusalem wa mó mai gyó lé lo é tará sará pé gi, "Shí yuq gi, Bezebulaq gá é nat gâng pé é zau lúng sù nghut ri-nhung! Yhang gi, nat zaù é wum-o a-tsam eq za, nat gâng pé lé hkat htoq pyám é nghut ri." ga tai bum akò nghut ri.

²³ Haù mù luí, Yesuq, yhangmoq lé wut yù mù, dangtú dong tai é gi, "Tsadán gi, Tsadán lé hkásu kut wó hkat htoq rá lúhú?"²⁴ Míngdán ralhum gi, ahkaù má byoq gâng lhùm nyi kò é nghut jáng, míngdán haù wó gíng nyi rá a nghut.²⁵ Yhumhtu ralhum má le, ikun byù yhangchang byoq gâng lhùm nyi é nghut le

gi, yhumhtu haù wó gíng nyi rá a nghut.²⁶ Haù eq rajung za, Tsadán le, yhànggung yhang lhoq hpyoq luí, gam hkoq nyi é nghut le gi, yhang wó nyi nyi rá a nghut, htùm byuq rá za nghut lhê.²⁷ Ó yuq nghut kòle, wum-o bò sù lé hí tui zing pyám é a nghut le gi, yhâng é yhùm má lú wàng mù, yhâng é sutzè lé wó lú yù rá a nghut: Haù yuq lé hí tui zing pyám jáng sheq, yhâng é sutzè lé wó lú yù rá nghut lhê.²⁸ Ngò, nungmoq lé teng za tai kòle, byu pé kut shut é mara banshoq eq rhoi dang tai pyám é pé lé gi, mara wó hkyut pyám byí lhê.²⁹ Nghut kôlhang, haù Chyoiyung Woi-nyí lé rhoi dang tai pyám é sù gi, hká-nhám le, mara hkyut byí é wó hui rá a nghut; haù yuq gi, ahtum abyuq yubak wó sù nghut nyi ri." gá ri.

³⁰ Yhang haù su ga tai é gi, yhangmoq mai, "Yhang gi, agè ashop é nat wó sù nghut ri." ga kò é yanmai nghut ri.

Yesuq É Yhângnu Eq Yhanggu Pé

Mht 12:46-50; Luk 8:19-21

³¹ Hau htàng, Yesuq é yhângnu eq yhanggu pé gi, jé lé mù, yhùm hkun má yap to kòluí, Yesuq htoq ló rá matú, byù rayuq lé wang tai nhang akò nghut ri.³² Byù ajùm ayò gi, Yhâng é lhíngkyuq má zung tó akò; haù bang gi, Yhang lé, "Wú aq, náng nu eq nunggu pé gi, nang lé hui nau luí, shinggan má láng bum akò." ga tai kyó akò nghut ri.

³³ Haù hkùn, Yhang gi, "Ó pé gi, Ngá nu eq Ngá gu pé nghut akò lúhú?" ga myi kat ri.

³⁴ Hau htàng, Yhang gi, Yhâng é lhíngkyuq má zung hkyuq tó é bang lé wú mù, tai é gi, "Shí bang gi, Ngá nu eq Ngá é gumang wuì nghut bè!"³⁵ Garai Gasang ó nau é hkyò cháng é sù ó yuq nghut kòle, Ngá gu, Ngá mang, Ngá nhá, Ngá nu chyat nghut bè." gá ri.

4

Kyòshi Sân É Dangtú

Mht 13:1-23; Luk 8:4-15

¹ Yesuq gi, nhông yàm má radám dum mhoqshít hí ló bè nghut ri. Haù hkùn, Yhâng é lhíngkyuq má byù moq mó lùm yán zing lé lo bùm kò é yanmai, Yhang gi, nhông hkaù má é lhai má wang zung tó ri; haù u lé, byù moq mó gi, nhông yàm gin-gau htoq má nyi míng bum akò nghut ri.² Yhang gi, haù bang lé, dangtú pé đồng myo myo mhoqshít byí nyi ri; Yhang mhoqshít é má,³ "Gyo wú keq! Kyò hkyó sù rayuq gi, kyòshi san rá gá htoq é ló ri."⁴ Yhang, kyòshi sân kat é hkùn, ra-am gi, hkyò má gyó ang mù, nghoq pé eq lé hte zò pyám ri.⁵ Ra-am gi, myi-tse a htú é luqqok yò pé má gyó ang mù, myi-tse a htú é yanmai, lui za yuq htoq ló kòle,⁶ amyit a

* **3:18** Zelutuq gá é lichyúm gi, yhumsing zui sai é hkyò má gyai yhang myit lóm shirong é sù lé gá lhê. Haù u lé, Israelaq byu pé gi, míngdán luthkyó wó rá matú shikut nyi é hpúng bang lé, Zelutuq gá lhê.

wó chîn hing é nghut mù, bui htoq lô jáng, lhap kyuq pyám bê nghut ri. ⁷Dum ra-am gi, zuygóm hkaú má gyó ang lui, zubyap háu pé kô lò mù, wup pyám é yanmai, ashí a wó zui nghut ri. ⁸Nghut kôlháng, ra-am gi, myìhpún bo é jang má gyó àng é yanmai, yuq kô lò mù, ashí sum xê tú, hkyuq xê tú, rashô tú lhang, zui myô lo é nghut ri." gâ ri.

⁹Hau htâng, Yesuq dum taí é gi, "Gyo yù rá nohkyap dap sù gi, gyô yù sháng gaq." gâ ri.

¹⁰Yhang baú za nghut nyi é hkûn, háu lagyo raxe í yuq eq Yhang nâm má nyi tô é bang gi, dangtú háu eq sêng é hkyô lé, lé myí akó. ¹¹Hau hkûn, Yhang, yhangmoq lé taí kyô é gi, "Garai Gasâng é mingdán eq sêng é sé gyo wuí é hkyô lé sé gyo rá ahko ahkáng, nungmoq lé byí to lugu nghut bê. Nghut kôlháng, góbbàng é matú gi, jung hkangmó lé dangtú dōng chyat taí é nghut lhê. ¹²Hau mù lui,

"Yhangmoq gi, myang nyi kôlháng, a wú sé kó, gyô nyi kôlháng, a sé gyo kó;

sé wú sé gyo kó é ru nghut le gi, lhing taú lò mù, mara hkyut pyám byí é hui kó rá nghut lhê!"¹³

gâ ri." ga tô ri.

¹³Hau htâng, Yhang, yhangmoq lé dum xoq taí é gi, "Nungmoq, dangtú shí lé a sé gyo kó é nghut le gi, gotú dangtú pé lé hkásu kut ung sé gyo kó rá lhu? ¹⁴Yô mù zui sù san kat é kyôshi gi, mungdang nghut lhê. ¹⁵Byù ra-am gi, hkyô má gyó àng é kyôshi eq wuí akó; yhangmoq gi, mungdang lé wó gyô yù é hkûn yhang, Tsadán gi, lé mù, yhangmoq chyáng má é mungdang lé lé yù pyám byí ri. ¹⁶Ra-am gi, luqgok yò pé má gyó àng é kyôshi eq wuí akó; yhangmoq gi, mungdang lé wó gyó jáng, radá dâm gabú myit eq hap yù akó. ¹⁷Nghut kôlháng, yhangmoq gi, amyit a wó chîn é yanmai, razup zo za yuq kômù, mungdang é yanmai, wúihke é eq zing-rí é pé hui kôjáng, hân hân htak ló byuq kó rá nghut lhê. ¹⁸Dum ra-am nghut jáng, zuygóm hkaú má gyó àng é kyôshi eq wuí akó; yhangmoq gi, mungdang lé wó gyô yù kôlháng, ¹⁹shí ipyat lhê é myit wú myit hke hkyô, hkyô shuí nghoq jung ngùn hing zèhkoq eq gotú zè pé lé ô nau é hkyô pé, yhangmoq chyáng wang lò jáng, háu mungdang lé hup pyám é yanmai, ashí a wó zui dut kó rá nghut lhê. ²⁰Ra-am kúm gi, myìhpún bo é jang má gyó àng é kyôshi eq wuí akó; yhangmoq gi, háu mungdang lé gyô yù mù, lhom yù lui, sân kat é htoq sum xê tú, hkyuq xê tú, rashô tú lhang myo shoq ashí zui lò kó rá nghut lhê." gâ ri.

Myibung Htún É Hkyô

Luk 8:16-18

²¹Yesuq, yhangmoq lé xoq taí é gi, "Nungmoq gi, myibung lé yù mù, tsungiang má a

tsung e za, mùng eq nghop tô é, a nghut jáng, yhupchong ô má tsung tô é, ó yuq wá kut wú akó lhu? ²²Hkásu mù gâ le, haq tô é zè hái jung le htoq ze lò rá eq, záu tô é pé hái jung le byông htoq lò rá nghut lhê. ²³Gyô yù rá nohkyap dap sù ó yuq nghut kôle, gyô yù sháng gaq." gâ ri.

²⁴Hau htoq agó, Yhang dum taí é gi, "Nungmoq gi, wó gyô yù é hkyô lé rago myit wú keq; nungmoq lik byí é bung eq, nungmoq lé dum lik byi rá nghut lhê; hau htoq lhang myo shoq wó kó rá nghut lhê. ²⁵Hkásu mù gâ le, wó to sù lé gi, jat byi shirá, a wó su chyáng mai kúm gi, yhang wó tô é lé lhang yu pyám byi shirá nghut lhê." gâ ri.

Kyôshi Yuq Kô Lo É Dangtú

²⁶Hau htâng, Yhang dum xoq taí é gi, "Garai Gasâng é mingdán gi, byù rayuq mai, myigùng má sân kat é kyôshi eq wuí ri. ²⁷Byù háu yuq gi, myín lé yhup tô é nghut nghut, nyí lé toq lo é nghut nghut, kyôshi gi, zui htoq lò mù, yuq kô lo nyi ri; nghut kôlháng, yhang gi, hkásu kut yuq lo nyi é hkyô lé a sé nghut ri. ²⁸Myigùng gi, yhang baú yhang, kyôshi lé, sâng-hi má abum bum nhâng, hau htâng má a-nhâm htoq nhâng mù lui, ashí zui shoq kut é nghut lhê. ²⁹Kyôshi myhíng jáng, kyô shu yoq jé bê nghut é yanmai, yhang gi, zaiyik eq yâm yù rá nghut lhê." gâ ri.

Angshi Cham Lé Dangtú Yu É Hkyô

Mht 13:31-32; Luk 13:18-19

³⁰Yesuq dum xoq taí é gi, "Garai Gasâng é mingdán lé, hái eq lhoq whui wú rá lhu? Hái jung dangtú yù mù, shít wú rá lhu? ³¹Garai Gasâng é mingdán gi, angshi cham eq wuí ri. Angshi cham háu gi, myigùng má hô é kyômyui jí pé má je tiq é nghut lhê. ³²Nghut kôlháng, ho mù, yuq kô lô jáng, xun hkyâm má hô é mhan-haq hpoqnoq gam banshoq htoq má je kó é agám dut lò mù, akoq kô lò lui, hau é buishúm hkaú má, maulat nghoq zô pé lé wó zung nô nyi é nghut lhê." gâ ri.

³³Hau sù é dangtú myo myo dōng mai, Yesuq gi, yhangmoq wó sé gyô é myhó, mungdang hko kyô nyi ri. ³⁴Yhang gi, yhangmoq lé, dangtú a bo é hái lhang a taí wú nghut ri; nghut kôlháng, Yhang eq chángzô pé baú nghut nyi é hkûn kúm gi, jung hkangmó é lichyúm lé taí sân kyô ri.

Laidun Mó Lé, Yesuq Lhoq Zim Pyám É Hkyô

Mht 8:23-27; Luk 8:22-25

³⁵Hau nyí, myinhâng lé, Yesuq gi, Yhâng é chángzô pé lé, "Nga-nhúng nhōng hé hpoq shut dap e ló sháng." ga taí ri. ³⁶Hau hkûn, chángzô pé gi, byù moq mó lé nyhi pyám to lui, Yhang zung tô é lhai mai yhang, Yhang lé shuí gú dap ló bekó; gotú lhai pé le,

yangmoq eq rahá bo gû dap ló akò nghut ri. ³⁷ Háu u lé, laidun mó jé lô mù, wuilhêng hta toq lô luí, lhai má lo bat háng é yanmai, wui byíng lô bê nghut ri. ³⁸ Háu hkún, Yesuq gi, lhai htàng má uhkuq hkuq mù yhup myhí tó ri; háu chángzò pé gi, Yang lé nháu pun luí "Sarà ê, nga-nhúng myup shi lô râ dut é lé, nàng a chiq byi lú?" ga tái akò nghut ri.

³⁹ Yesuq gi, toq mù, laidun lé tan luí, wuilhêng lé, "Zim aq." ga tái kat jáng, háu laidun num lô byuq luí, banshoq zím byuq bê nghut ri.

⁴⁰ Háu htàng, Yang gi, Yhâng é chángzò pé lé, "Hái mù, háu-í gyuq bum akò lú? Nungmoq gi, lumjáng myit a bò shi kó lú?" ga tái ri.

⁴¹ Yangmoq gi, gyai yang gyuq dan bùm kômù, "Shí yuq gi, hkású é byù nghut lhê là? Lài eq wuilhêng pé lháng gi, Yhâng é dang lé gyo byí ri-nhung!" ga luí, rayuq eq rayuq myí lhum bum akò nghut ri.

5

Nat Gang Hkat Htoq Pyâm É Hkyô *Mht 8:28-34; Luk 8:26-39*

¹ Yangmoq gi, nhông hé hpoq má é Gerase byu pé é mau má jé dap e ló akò.

² Yesuq lhai mai htoq lô é hkún, agè ashop é nat wang júng é byù rayuq gi, lupdùng mai htoq lé lô mù, Yang lé lhom hui ri. ³ Háu yuq gi, lupdùng má za nyi é sù nghut ri; yang lé, ó yuq eq le, shamtoq-tui eq lháng a wó tui zing wú kó nghut ri. ⁴ Hkásu mù gâ le, adám dâm, yhâng é loq eq hkyí má shamtoq-tui eq tui tó wú kôlháng, yang gi, loq má é shamtoq-tui pé lé làng hpyit pyám pyám kut mù, hkyí má é shamtoq kyum lé lhoq hkyop pyám pyám kut ri. Yang lé, ó yuq eq le a wó hkuq yù kó nghut ri. ⁵ Yang gi, nyí myin aga lupdùng eq bùm pé má puk garu uchyang, yhumsing gùng lé luqgok eq dùn cheq wún ri.

⁶ Yang gi, Yesuq lé, we mai myang kat jáng, din e lô mù, Yhâng é hí má hkyihput htuq ngop luí, ⁷ hté mó eq, "Myhang htàng é Garaí Yhangzo Yesuq ê! Nàng gi, ngò eq hái sêng lhê lú? Nàng gi, ngo lé a zing-ri râ matú, Garaí Gasàng hí má danggidiq byi laq." ga tái garú ri. ⁸ Hái mù gâ le, Yesuq gi, yang lé, "Agè ashop é nat nàng ê, byù shí yuq chyáng mai htoq ló aq." ga tái kat é yanmai nghut ri.

⁹ Háu htàng, Yesuq gi, "Náng myíng hái gâ lhê?" ga, yang lé myi jáng, yang gi, "Ngamoq gi, myo myo nghut é yanmai, Legio gâ lhê." ga tui tái ri. ¹⁰ Háu htàng, yang gi, háu jowò mai yangmoq lé a kón pyám râ matú, Yesuq lé dum dung dung kut nyi ri.

¹¹ Háu u lé, wáq rajum mó gi, bùm yàm má dù but zó nyi bum akò nghut ri. ¹² Háu

mù luí, nat gâng pé gi, "Ngamoq lé, waq pé chyáng nhang kat luí, yangmoq chyáng wàng nhâng laq." ga luí, Yesuq lé dung akò. ¹³ Háu hkún, Yesuq gi, yangmoq lé ahkáng byí kat jáng, háu agè ashop é nat pé gi, háu yuq chyáng mai htoq lô kôluí, waq pé chyáng wang lô byuq bekò nghut ri. Háu mù, háu í hkyíng kô bo é waq hpúng gi, gampyoq mai nhông hkaú shut rut din yán wang lô kôluí, myup shi byuq bekò nghut ri.

¹⁴ Waq zúng bang gi, hpang din wang lô kômù, myuq hkaú má é bang eq awui ayám má é bang lé, háu hkyó ló shít kyo kô é yanmai, byù háu bang gi, dut lai lò bê hkyó lé, é htoq wú akò nghut ri. ¹⁵ Yangmoq gi, Yesuq chyáng jé lé kô é hkún, nat gang myo myo wang júng wú é sù, mebu wut luí, byù gè rayuq su zung to láng é lé myàng kômù, gyuq dan bùm bekò nghut ri. ¹⁶ Háu hkyó lé myang é bang gi, nat gâng pé wang júng sù eq waq pé chyáng hkásu dut é hkyó, góbang lé tái kyo akò nghut ri. ¹⁷ Háu htàng, byu pé gi, Yesuq lé yangmoq é mau mai htoq lô byuq râ matú, chòm dúng tóngbán akò nghut ri.

¹⁸ Yesuq lhai hkaú má wang lô é u lé, háu nat gâng pé wang júng lai lò bê sù gi, Yesuq htàng cháng râ matú, Yesuq lé dung tóngbán ri. ¹⁹ Nghut kôlháng, Yesuq gi, yang lé ahkáng a byi e za, "Nàng, yhùm shut sheq lô mù, háu Yhumsing, nang lé hká-í kut byi bê hkyó eq hkásu kut shogyo nhikmyin yu é hkyó lé, nàng é yhumbýù buinùm ji-myi wui lé ló tái kyo aq." ga tái kat ri. ²⁰ Háu mù, byù háu yuq gi, lô luí, yang lé Yesuq hká-í kut byi bê hkyó lé, Dekapoli* mau bang lé ló tái kyô ri. Háu hkún, wó gyô é bang banshoq gi, mauhong bum akò nghut ri.

Shi Byuq Bê Myiwe Zo Eq No É Myiwe *Myhi Rayuq É Hkyô* *Mht 9:18-26; Luk 8:40-56*

²¹ Yesuq gi, lhai jí mù, nhông he hpoq shut dum dap jé lô mù, Yang, nhông yám má nyi tó é u lé, byù ajùm ayò gi, Yhâng é lìnhhkyuq má lé zing bum akò nghut ri; ²² háu hkún, Yairuq gâ é, tarajong má up bang má é rayuq gi, háu má lé luí, Yesuq lé myang kat jáng, Yhâng é hkyí wang má paí gop to mù, ²³ "Ngá zo byizo gi, kàng byit ló nyi ri; yang ge lò mù asak dum dui shí sháng gâq, nàng lé mù, yhâng é ahtòq má loq lé ke byi laq." ga, wum kat dúng tóngbán nyi ri. ²⁴ Háu mù, Yesuq gi, háu yuq htàng châng e ló ri; byù ajùm ayò le, Yhâng é awui ayám má châng chyín chyap wún bum akò.

²⁵ Háu hkún, raxe í zân súi yui nyi é myiwe myhí rayuq le háu hpúng má bo tó ri. ²⁶ Yang gi, chí sará myo myo pé chyáng yang wó é ngunzè banshoq htoq pán mù,

* 5:20 Dekapoli gâ é gi, Grik đông myuq raxê lé gâ lhê.

nò hkâm lui yâ wú kôhlang, ge é hkyô a joq é htoq agó, je lhang wuîhke lò ri. ²⁷ Yhang gi, Yesuq é hkyô lé wó gyo jáng, byù hpûng mai Yesuq é nunghtáng má huí lé mù, Yhâng é bu má é záng kat ri. ²⁸ Hái mù lui gâ le, yhang gi, "Ngò, Yhang é bu má za lhang é wó záng é nghut le gi, ge byuq râ nghut lhê." ga wó myit é yanmai, haú su kut é nghut ri. ²⁹ Haú hkûn jáng, yhâng chyáng suí yui é kân byuq lui, yhang gi, hpuzò lui é mai wó lut bê hkyô lé, yhânggung má sê gyô kat bê nghut ri.

³⁰ Yesuq gi, Yhâng é gung mai hpungwup a-tsam htoq ló é lé, radá dâm châng sê kat lui, byù moq mó shut lhang wú mù, "Ngá é bu má ó yuq záng bê lú?" ga myi kat ri.

³¹ Haú hkûn, Yhâng é chángzò pé gi, "Náng é lhanghkyuq má byù ajùm ayò chyin chypay nyi é lé, myang to lui nhing, 'Ngo lé, ó yuq záng bê lú?' nghú myi lhê lú?" ga tú tai kat akó.

³² Nghut kôhlang, Yesuq gi, Yhang lé lé záng sù lé myàng râ matú, ho lhang wú nyi ashí nghut ri. ³³ Haú hkûn, myiwe myí haú gi, yhâng chyáng hkâsu dut lai lò bê hkyô lé sê é yanmai, Yesuq é hí má lé mù, gyuq nán é é Yhang é hkyí wang má ngóm gop to lui, yhâng chyáng dut lai lò bê hkyô banshoq lé tai kyô ri. ³⁴ Haú mù, Yesuq gi, myiwe myí haú lé, "Byizo é, náng é lumjing myit gi, náng lé lhoq gè byi bê nghut ri; náng é nôhpyo ge byuq bê nghut ri; ngón za ló aq hko!" ga tai ri.

³⁵ Yesuq gi, dang ru tai nyi ashí hkûn, tarajong má up sù Ya-iruy é yhúm mai byù ra-am jé lé mù, "Nang é byizo gi, shi byuq bê; hái mù lui, haú sará lé lhoq hkyik nyi lhê lú?" ga lui, lé tai kat akó.

³⁶ Yesuq gi, haú bang tai é dang lé gyô lhai pyám mù, "Hkâgyuq, za lumjing aq." ga, haú tarajong má up sù lé tai kat ri.

³⁷ Hau htâng, Yhang gi, Petruq, Yakuq eq Yakuq é yhanggu Yohan pé mai lai lui, ó yuq lé le, Yhang htâng a cháng nhâng nghut ri. ³⁸ Yhangmoq, haú tarajong má up sù é yhúm má jé lé kô é hkûn, Yesuq gi, byu pé garu garín ga yón ngau gabyông nyi bum é lé, myàng ri. ³⁹ Yhang gi, yhúmhaú shut wang ló mù, haú bang lé, "Hái mù, yón ngau gabyông nyi bum akó lhú? Haú zoshâng gi, shi byuq é a nghut, yhup myí tò é sheq ru nghut lhê." ga tai ri. ⁴⁰ Nghut kôhlang, yhangmoq gi, Yhang lé wuizui kut pyám byi akó.

Yhang kúm gi, haú bang banshoq lé hkát htoq pyám mù, zoshâng é yhângnu yhângwa nhik eq Yhâng é chángzò pé lé za shui lui, zoshâng lé lhez tò é gok má wang é akó nghut ri. ⁴¹ Yesuq gi, myiwe zo hau é loq má zui to mù, "Talihta ku-mi" (haú é lichyúm gi, "Myiwe zo é, ngò, nang lé tai bá, toq aq." gâ é nghut lhê.) ga tai ri. ⁴² Myiwe zo haú gi, haú hkûn jáng, toq lui, sô wún ri (yhang gi, asak

raxe í zân bò bê sù nghut ri.). Yhangmoq gi, haú sù dut é hkyô lé gyai yhang máu byuq bùm bekô nghut ri. ⁴³ Yhang gi, haú hkyô ó lé le a sé nhâng râ matú, yhangmoq lé tai hkúm kat lui, myiwe zo haú lé, zò jung byi tso râ matú le, yhangmoq lé tai ri.

6

Yhumsing Wà Má Myoqdong A Wó É Hkyô

Mht 13:53-58; Luk 4:16-30

¹ Yesuq gi, haú jowò mai htoq e ló mù, Yhâng é yhum mau shut taú lò ri; Yhâng é chángzò pé le, Yhang eq rahá bô châng lò akó nghut ri. ² Bánno buinyi jé jáng, Yhang gi, tarajong má mhoqshit hí lò ri; wó gyô é bang myo myo gi, gyô máu byuq kôluí, "Byù shí yuq gi, haú pé lé hkâmá mhoq yu é lhà? Yhang wó yu é hpaqchyí byéng-yá gi, hkasú é wá nghut mù lui, laklai kumlhá lé lhang kut lhê laq? ³ Shí yuq gi, Mariq é yhangzo, laksíma hpó nghut lhê, a nghut lúhú? Yhang gi, Yakuq, Yose, Yudaq, Simun pé é yhangmang nghut lhê, a nghut lúhú? Yhâng nhammó pé le, nga-nhúng eq rahá nghut nyi lhê, a nghut kó lúhú?" ga lui, Yhang lé myit a ngón dut bùm bekó nghut ri.

⁴ Yesuq, yhangmoq lé tai é gi, "Myiqhtoi rayuq gi, yhumsing é yhum mau, yhâng é buinúm ji-myi wui eq yhumsing é yhúm má za, myoqdong a lhaq wó wá é nghut lhê." gâ ri. ⁵ Yhang gi, nò byù ra-am lé loq ke byi mù, lhoq gè byi é mai lai lui, gotú laklai kumlhá hái le, haú má a wó kut shit nghut ri. ⁶ Haú mù, Yesuq gi, yhangmoq lumjing myit a bò kô é hkyô lé, máu nyi ri. Hau htâng, Yhang gi, Nazaret wà mai htoq ló mù, rawà htâng rawà má châng mhoqshit wún ri.

Lagyo Raxe Í Yuq Lé Nhang Htoq Kat É Hkyô

Mht 10:5-15; Luk 9:1-6

⁷ Yesuq gi, haú lagyo raxe í yuq lé wut yu mù, agè ashop é nat pé lé ùng râ a-tsam byi lui, í yuq yuq kut nhang htoq kat ri.

⁸ Yhang, yhangmoq lé châng ying kat é dang gi, "Hkyowui é matú má, dymbáng mai lai lui, zoshuq le, etap le, ngùn le, gotú hái le, hkâyú chùng kó; ⁹ hkyí-tsong kúm gi, tsùng chùng keq; nghut kôhlang, bu í dung hkâwut chùng kó. ¹⁰ Hká má nghut kôhlang, rayhúm yhúm má nungmoq wang bíng kô é nghut le gi, haú wá mai dum htoq ló é buinyi jé shoq, haú yhúm má za nyi nyi keq. ¹¹ Jowò rawò wò má é bang, nungmoq lé a lhom hap yù, a lhom gyo byi kô é nghut jáng, nungmoq lé yhangmoq a lhom hap yu é saksé dut sháng gaq, nungmoq é hkyiwa má dap é hpuilhau lé ko hkyô pyám to mù, haú jowò mai htoq ló keq." gâ ri.

¹² Haú mù, yhangmoq gi, htoq e ló lui, myit lhang rá é hkyô, byu pé lé hkó kyô akó.

¹³ Hau htoq agó, yhangmoq gi, nat gâng pé myo myo lé hkat htoq pyám byi mù, no é bang myo myo lé le xú but byi luí, lhoq ge byi akó nghut ri.

*Yohan, Ulhum Hpyit Huí é Hkyó
Mht 4:1-12; Luk 9:7-9*

¹⁴ Yesuq é mying hú lo é yanmai, Herut hkohkâm gi, Yesuq é hkyó lé wó gyo bê nghut ri. Byù ra-am gi, "Shí yuq gi, hau shi byuq bê Wui-myhup Sará Yohan dum dui toq lo é nghut lhê abe, hau é yanmai, yhang gi, hpungwup a-tsam hau pé lé wó kut é nghut ri." ga luí, tai bum akó nghut ri.

¹⁵ Ra-am gi, "Yhang gi, Eliyaq nghut ri." ga tai akó nghut ri.

Dum, ra-am tai kô é gi, "Yhang gi, hí hpyang lhê é myiqhtoí pé su, myiqhtoí rayuq nghut ri." gâ ri.

¹⁶ Herut kúm gi, hau lé wó gyo jáng, "Ngò, ulhum hpyit pyám byi é Yohan gi, shi é mai dum dui toq bu-nhung!" ga tai ri.

¹⁷ Herut gi, yhanggu Hpilip é yhangmyi Herudiaq lé hâng yu pyám é hkyó é yanmai, Yohan lé chyup tui yú nhâng mù, htóng hkyó pyám nhang wú é sù nghut lhê. ¹⁸ Hkásu mù gâ le, Yohan gi, Herut lé, "Nâng, nunggu é yhangmyi lé hâng yu é gi, tarâ a wang é nghut lhê." ga luí, tai byi nyi é yanmai nghut ri. ¹⁹ Hau mù, Herudiaq gi, Yohan lé gyai a jú dut byuq luí, sat pyám nau kôlhâng, a wó sat dut nyi ri. ²⁰ Hai mù gâ le, Herut gi, Yohan, dingmán chyoiyung é sù nghut é lé sé mù luí, yhang lé gyuq hkungga mù, yhang lé búng nyi é yanmai nghut ri. Yhang gi, Yohan é dang pé lé wó gyo jáng, gyô nhùng nhâng byuq kôlhâng, yhang tai é dang pé lé ru gyô nau nyi ashí nghut ri.

²¹ Nghut kôlhâng, Herut gi, yhang é hkú ladu hkyúm buinyi má, byù mó pé, gyezau pé, Galile mau suwún wui pé lé, ji yù mù zoshuq poi mó kut é yanmai, hau nyi gi, Herudiaq é matú, buinyi gè dut bê nghut ri. ²² Herudiaq é yhangzo byizo gi, wang lé lô mù, gó shít é hkún, Herut eq yhang é bíng pé gi, myit ngón bum akó nghut ri.

Hau mù, hkohkâm gi, myiwe zo hau lé, "Nâng ô nau é hai nghut kôle, dung aq, ngò nang lé byi rá nghut lhê." ga, dakam é danggididq byi ri. ²³ Hau htoq agó, yhang gi, myiwe zo hau lé, "Nâng dung é hai nghut kôle, ngò byi rá; ngá é mingdán rawú gú lhâng, byi rá nghut lhê." ga, dakam é danggididq byi ri.

²⁴ Hau hkún, myiwe zo hau gi, htoq lô mù, yhang nu lé, "Hai dúng le gè rá laq?" ga myi jáng, yhangnu gi, "Wui-myhup Sará Yohan é ulhum dung aq." ga tù tai kat ri.

²⁵ Myiwe zo hau gi, radá dâm hân hân wang lô mù, hkohkâm lé, "Ahkuí yhang,

Wui-myhup Sará Yohan é ulhum lé, bó má kat mù byi laq." ga, dúng tóngbán ri.

²⁶ Hau su ga jáng, hkohkâm gi, myit gyai yhang a ngón dut byuq kôlhâng, yhang dakam tô é danggididq é yanmai le, bíng pé é myoqdong lé tê nau é yanmai le, myiwe zo hau tai é dang lé a kâm he pyám lo nghut ri.

²⁷ Hau mù, hkohkâm gi, zúng é gyezo rayuq lé, Yohan é ulhum é hpyit lô rá matú, radá dâm hkunmó hkyó mù nhang kat ri. Hau mù, hau yuq gi, htóng hkaú má é luí, Yohan é ulhum lé, é hpyit mù, ²⁸ bó má kat luí, myiwe zo hau lé lo byi ri; myiwe zo hau gi, ulhum hau lé, yhangnu chyáng yu lo byi ri. ²⁹ Yohan é chángzô pé gi, hau hkyó lé wó gyo kôjáng, yhang é mâng lé lé yú luí, lup má lô myhup pyám bekô nghut ri.

Byù Ngo Hkying Lé Byi Tsó É Hkyó

Mht 14:13-21; Luk 9:10-17; Yhn 6:1-14

³⁰ Lagyo pé gi, Yesuq chyáng dum jé zing lò kômú, yhangmoq kut lai lo é hkyó pé eq mhoqshit bê hkyó pé banshoq, Yhang lé tai kyó akó nghut ri. ³¹ Hau htáng, byù myo myo gi, yhangmoq chyáng htoq htoq wàng wàng kut nyi kô é yanmai, yhangmoq gi, zang zo ahkying lhâng a wó kó nghut ri. Hau mù, Yesuq gi, chángzô pé lé, "Nga-nhung, tsím tsám é jowò ralhum má é mù, é nô yù sháng." ga tai ri.

³² Hau mù, yhangmoq gi, yhangmoq baú hai racham má ji mù, tsím tsám é jowò shut e lo akó nghut ri. ³³ Nghut kôlhâng, yhangmoq e lo é lé châng myang é bang myo myo gi, yhangmoq lé wú sé kôluí, wà hkangmó mai hkyí hkyó châng din é kômú, yhangmoq é hí má jé to lánng akó nghut ri. ³⁴ Yesuq gi, hai má gyó dap lo é hkún, byù moq mó nyi to lánng lé myàng jáng, yhangmoq gi, zúng sú a nyi é sau pé su dut kô é yanmai, yhangmoq lé wú shogyo luí, myo myo mhoqshit byi hí lo bê nghut ri.

³⁵ Bui gyum lô yâm jé jáng, Yhang é chángzô pé gi, lé lô kômú, Yhang lé, "Shí má gi, tsím tsám é jowò nghut é htoq agó, bui le gyum lò bê; ³⁶ yhangmoq gi, awui ayám má é yhùm pé eq wà pé má, zoshuq lô ho wui zo kó sháng gaq, yhangmoq lé lô nhâng aq hkoi." ga tai akó nghut ri.

³⁷ Hau hkún, Yhang gi, "Nungmoq, yhangmoq lé rajung jung byi tso keq." ga tù tai jáng, yhangmoq gi, "Shí myhò é bang zo rá matú, ngamoq gi, ê luí, denari* í sho eq muk é wui byi rá rá luq?" ga dum tai myi akó nghut ri.

³⁸ Nghut kôlhâng, Yhang gi, "Nungmoq chyáng muk hkâ-myhó wó akó? É wú wú keq." ga myi ri. Hau mù, yhangmoq gi, myang hô jáng, "Muk ngo long eq ngozo í du wó lhê." ga, dum tù tai akó nghut ri.

* 6:37 Denari rachap gi, byù rayuq é ra-nyi lhê é zuihpau eq wui ri.

³⁹ Hau htâng, Yesuq gi, banshoq bang lé ahpúng hpúng kut wàhu yò má zúng nhâng rá matú, Yhâng é chángzô pé lé tai kat ri. ⁴⁰ Haù mù, shiwa byu pé gi, rashò shò kut le, ngo xê xê kut le, ahpúng hpúng zung tò bùm bekò nghut ri. ⁴¹ Yesuq gi, haù muk ngo long eq ngozo í du lé yù mù, mauhkúng shut tu wú to lui, jeju ban hkya-on jáng, muk lé hpê gam ri. Hau htâng, Yhang gi, byu pé hí má châng hkat to byi rá matú, Yhâng é chángzô pé lé byí ri. Ngozo í du lé le, Yhang yù mù, banshoq bang lé gàm byí ri. ⁴² Yhangmoq banshoq bang gi, zò gyí bùm bekò nghut ri. ⁴³ Hau htâng, haù chángzô pé gi, zò myhít tò é muk eq ngozo lé, raxe í mung byíng shoq wó guq tsíng yu ashí kó nghut ri. ⁴⁴ Haù hkùn, zò é bang gi, yuggè wui baù lhang, byù du ngo hkyíng nghut ri.

Yesuq, Wui Htoq Má Sô É Hkyô

Mht 14:22-33; Yhn 6:15-21

⁴⁵ Yesuq gi, haù shiwa byu pé lé byo ló nhang nyí é hkùn jáng, Yhâng é chángzô pé lé lhai má wang ji nhâng mù, tù tap má é Bet-saida wa mó shut dap lò láng nhang ri. ⁴⁶ Yhangmoq lé shi-kyám kat é htâng, Yhang gi, kyúdung rá ga, Yhang baù bùm shut doq e ló bé nghut ri.

⁴⁷ Buiygm htâng, lhai gi, nhông gùng má jé tò é u lé, Yesuq gi, Yhang baù za myí htoq má nyí tò ashí nghut ri. ⁴⁸ Lai tau mut é yanmai, haù chángzô pé gi, lhai lhu wuìhkè nyí kò é lé, Yesuq myang ri. Napsùn maubó zó sum hkyíng eq hkyuq hkyíng gyo má, Yesuq gi, nhông htoq má só mù, yhangmoq shut e ló lui, yhangmoq é nàm mai lai ló rá dà ri. ⁴⁹ Nghut kóhlang, yhangmoq gi, Yhang, nhông htoq má sô nyí é lé myang kójàng, sobyó su ngám kómù, kyek garù bum akò nghut ri. ⁵⁰ Hkásu mù gà le, yhangmoq banshoq bang gi, Yhang lé myàng kólui, gyuq dân kò é yanmai nghut ri.

Nghut kóhlang, Yhang, radá dâm yhangmoq lé dáng nyo kat é gi, "Hkâgyuq kó. Ngò ru nghut lhê; zim za nyí keq." gà ri. ⁵¹ Hau htâng, Yhang gi, lhai htoq má yhangmoq eq rahá é doq ji jáng, lai gi, zim byuq bé nghut ri; haù mù, yhangmoq gi, gyai yhang mauhong byuq bùm bekò nghut ri. ⁵² Hkásu mù gà le, yhangmoq gi, muk gam é laklai kumhá eq séng lui a sê gyo kò é htoq agó, myitbun a bóng kò é yanmai nghut ri.

⁵³ Yhangmoq gi, gú dap lò kómù, Generarat mau má jé wang lò jáng, lhai lé haù má lò shap tò akò nghut ri. ⁵⁴ Yhangmoq lhai mai gyó é hkùn jáng, byu pé gi, Yesuq lé lhom wú sê akò nghut ri. ⁵⁵ Haù mù, yhangmoq gi, haù mau ramau gón má din jón mù, nò bang lé taphkang mai waq lui, Yesuq nyí ri gà é jowò hkangmó má, shuí lé lo bum akò

nghut ri. ⁵⁶ Yesuq jé é wà hkangmó, myuq hkangmó, awui ayàm má é wà hkangmó pé má, yhangmoq gi, nò byù lé gai pé má lé lhez to kólui, Yhâng é bushi htâng má za lhang, haù bang lé byi zàng nhâng rá matú, Yhang lé dúng tóngbán akò. Yhang lé zàng é lhunglhang bang gi, lhoq gè byí é hui akò nghut ri.

7

A Sanséng Dut Nhang É Hkyô Pé Mht 15:1-20

¹ Haù Hparishe pé eq tará sará pé ram gi, Yerusalem wa mó mai jé lé lô kómù, Yesuq é nàm má lé zup zing bum akò. ² Haù hkùn, Yhâng é chángzô pé ra-am gi, htúngli dông a chí pyàm é, a sanséng é loq eq zo shuq nyí kò é lé, yhangmoq myang akò nghut ri. ³ (Hparishe pé eq Yudaq byù banshoq bang gi, yhangmoq é íchýí iwa pé é htúngli lé châng é bang nghut lhê mù lui, loq hí a chí é gi, hai le a zò wú kó nghut ri. ⁴ Yhangmoq gi, gai pé mai taù lò jáng le, gùng hí a chí pyàm é, zojung a zo kó nghut é htoq agó, góm pé, hkoq pé, gyi chòkon pé lé chí é htúngli gotú pé lé le, châng akò nghut ri.)

⁵ Haù mù, Hparishe pé eq tará sará pé gi, Yesuq lé, "Náng é chángzô pé gi, hai mù lui, íchýí iwa pé é htúngli lé a châng e za, a sanséng é loq eq zo shuq nyi akò lhu?" ga myí akò.

⁶ Haù hkùn, Yesuq gi, yhangmoq lé, "Gegùn labyoq kut bang é, nungmoq eq séng lui myiqhtoi Esai-aq htoi tò é dang má, 'Byù shí bang gi, nhut htoq mai za Ngo lé hkunggá akò; yhangmoq é myit nhikhlum gi, Ngò eq wè găng nyi akò.

⁷ Yhangmoq gi, akóm má za, Ngo lé noqkuq nyi akò; hkásu mù gà le, yhangmoq é mhoqshit hkyô pé gi, byù dông mai mhoqshit é hkyô pé za nghut nyi ri."

⁸ Nungmoq gi, Garai Gasang tò tò é hkunmó lé tò pyàm lui, byu é htúngli lé za, myhik zing tò akò nghut ri." ga lui tù tai ri.

⁹ Hau htâng, Yhang xoq tai é gi, "Nungmoq gi, yhumings é htúngli lé za châng rá matú, Garai Gasang é hkunmó lé he-ngik pyàm é má, hpaqchyi gyai bo akò nghut ri. ¹⁰ Hkásu mù gà le, Mosheq gi, 'Nungmoq é ìnu iwa lé, hkungga keq.'" ga le, 'Ìnu iwa lé, nhíng é sù ó yuq nghut kòle, sat pyàm é hui rá lhê.'" ga le, ká tò é nghut lhê. ¹¹ Nghut kóhlang, nungmoq tai é gi, byù rayuq yuq, yhumings é yhangnu yhangwa lé byi lóng é zè lé, Korban za (Garai Gasang lé byi rá chyunhuq) nghut lhê gá nhang akò. ¹² Haù mù, haù yuq lé, yhangnu yhangwá é matú, hai a kut byi nhâng lò é dông dut bé nghut ri. ¹³ Haù dông mai, nungmoq gi, nungmoq chung gyó lo é

htungli é yanmai, Garai Gasâng é mungdang lé he-ngik pyám akó; haú sù é hkyô myo lé le, nungmoq kut akó nghut ri." gâ ri.

¹⁴ Yesuq gi, shiwa byu pé lé Yhâng chyáng dum wut yù mù, taí é gi, "Nungmoq ban-shoq bang, ngò taí é lé gyô yù mù, sé lo keq; ¹⁵ Shinggan mai wang lo é hai jung le, byù lé a sanséng dut nhang é a nghut, nghut kôlháng, byu é unghkaú mai htoq ló é zè kúm gi, byù lé a sanséng dut nhang lhê." gâ ri. ¹⁶ (Gyo rá nohkyap dap é sù gi, gyô yù sháng gaq.)" ga taí ri.*

¹⁷ Yhang gi, byù moq mó mai htoq ló mù, yhùmhkaú má jé wang ló é hkún, Yhâng é chángzô pé gi, dangtú haú eq séng luí, Yhang lé lhom myí akó nghut ri. ¹⁸ Haú mù, Yhang gi, yhangmoq lé, "Nungmoq gi, haú-í yhang go akó luq? Shinggan mai wang lo é hai jung le, byù lé a sanséng nhang wó dut rá a nghut é hkyô lé, a sé kó lhú? ¹⁹ Hkâsu mù gâ lé, haú gi, byu é myit nhiklhum hkaú má wang ló é a nghut e za, wamdau hkaú má sheq wang ló é nghut mù, shinggan shut dum lhoq htoq pyám é nghut lhê." ga taí ri. (Yhang isu ga taí é gi, zoshuq lhunglháng sanséng lhê gâ nau é dông nghut ri.)

²⁰ Hau htoq agó, Yhang xoq taí é gi, "Byù mai htoq ló é hai jung le, byù lé a sanséng nhang wó dut é nghut lhê. ²¹ Hkâsu mù gâ lé, ahkaú mai htoq lo é gi, byu pé é myit mai htoq ló é nghut mù, agè ashop é dông myit é hkyô pé, ashop é dông gungsho zùm yap é hkyô, hkaú é hkyô, byù sat é hkyô, sumyi sulàng lú hkyô, ²² myoqnoq é hkyô, agè ashop é hkyô, mhaú zô é hkyô, achayut zùm yap lhùm é hkyô, manon é hkyô, lumù gansang é hkyô, gumrong é hkyô eq ngha é hkyô pé htoq ló é nghut lhê; ²³ Agè ashop é hkyô shí pé banshoq gi, byu é unghkaú mai htoq lo é nghut mù, byù lé a sanséng dut nhang ri." gâ ri.

Tungbaú Myiwe Myhí Rayuq É Lumjing Myit

Mht 15:21-28

²⁴ Yesuq gi, haú jowò mai htoq ló mù, Turuq eq Sidun maukyo shut e ló luí, yhùm rallhum má wang ê ri; Yhang nyi é hkyô lé, ó yuq lé lé a sé nhang nau kôlháng, a wó zaú to nghut ri. ²⁵ Haú mù, agè ashop é nat wang júng tô é myiwe zo rayuq é yhângnu gi, Yhang nyi tô é hkyô lé wó gyô é hkún jáng, Yhâng chyáng jé lé mù, Yhâng é hkyí wang má lé pai gop to luí, ²⁶ yhang zô chyáng mai nat gang lé hkat htoq pyám byi rá matú, Yhang lé dúng tôngbán ri. Myiwe haú gi, Suru-Hpiniki mau mã é Grik byuhú nghut ri.

* **7:16** Bun zo shí gi, Chyúmlaík ra-am má bo lhê, ra-am má a bò. † **7:27** Zo wui gâ é gi, Yudaq byu pé lé gâ é nghut lhê. ‡ **7:27** Hkuí pé gâ é gi, tungbaú pé lé gâ é nghut lhê.

²⁷ Yesuq gi, "Zo wui† hí zô gyi kó sháng gaq; haí mù gâ le, zô wui chyáng mã é zoshuq lé yù mù, hkuí pé‡ lé byi tsô é jung a nghut." ga yhang lé taí kyô ri.

²⁸ Haú hkún, yhang gi, "Yhumsing! Haú kúm nghut ri; nghut kôlháng, siboi ô mã é hkuí lháng, zô wui é zô myhit shuq htáng lé, ge zo lhê a nghut lhú?" ga dum tú taí ri.

²⁹ Haú mù, Yesuq gi, yhang lé, "Nàng tú taí é dang hau é yanmai, ló lo aq hkoí; haú nat gang gi, nung zô chyáng mai htoq ló byuq bē nghut ri." ga taí kat ri.

³⁰ Myiwe myhí haú gi, yhùm má dum taú jé lo é hkún, yhang zo chong htoq má leq to lánq é lé le, nat gang htoq byuq bē nghut é lé le, lo myang ri.

Nojit É Eq Dang A Hkyang É Sù Lé Lhoq Gê Byí É Hkyô

³¹ Yesuq gi, Turuq mau mai dum htoq ló mù, Sidun mai sô lai ló luí, Dekapoli mau hkaú dông lai byit mù, Galile nhông shut gyó jé ló ri. ³² Haú hkún, byù ra-am gi, nojit é eq dang a hkyang é byu rayuq lé, Yhâng chyáng shuí lé lô kômù, haú yuq é ahtoq má loq ke byi rá matú, Yhang lé dúng tôngbán akó nghut ri.

³³ Yesuq gi, haú yuq lé baú za byù hpúng mai shuí htoq yù mù, yhâng é nohkyung má loqnyhui htaú háng byi luí, sôkan byé tik yù mù, haú yuq é shô má htaú byi ri. ³⁴ Hau htáng, Yhang gi, mauhkung shut tu wú mù, soq mó shê luí, "Ehpahta!" (Lichyúm gi, "Bóng aq hkoí!") ga luí, haú yuq lé taí kat ri. ³⁵ Haú hkún, haú yuq é nohkyap lé bóng byuq luí, shô le nyhôm byuq mù, balang hkyáng hkyáng dang wó nyô bē nghut ri.

³⁶ Yesuq gi, haú hkyô ó lé le a taí kyo rá matú, yhangmoq lé hkúm kôlháng, yhangmoq gi, je hkúm le, je taí pyo akó nghut ri. ³⁷ Byu pé gi, gyai yhang mauhong byuq bùm kôluí, "Yhang gi, haí lé le, ge é dông chyat kut ri; nojit sù lé, wó gyô shoq, dang a hkyáng sù lé, wó nyô shoq, kut byi bē nghut ri." ga luí, taí bum akó nghut ri.

8

Byù Myi Hkying Lé Byi Tsô É Hkyô

Mht 15:32-39

¹ Haú yoq má, gotú byù moq mó gi, lé zing bum akó; haú bang zoshuq langhpyut to kó é yanmai, Yesuq gi, Yhâng é chángzô pé lé wut yù mù, ² "Ngò, shí bang lé wú shogyo ri; yhangmoq gi, Ngò eq rahá nghut nyi é sum nyí bò bē, haí le a myàng zo kó nghut ri. ³ Yhangmoq chyáng mã é ra-am gi, mau we mai lé é bang nghut é yanmai, yhangmoq lé, zòmút gú yhùm shut nhang kat é nghut le gi,

hkyolat má mutyut yut é ló hui kó râ nghut lhê." ga taí ri.

⁴ Haú hkûn, Yhâng é chángzô pé gi, Yhang lé, "Ísu é yoso má nhîng, shî myhò bang lé luq shoq byi tso râ zoshuq gi, hkâmá é yú râ lhú?" ga taí akò.

⁵ Yesuq gi, "Nungmoq, muk hkâ-myhó long wó akò lhú?" ga taú myi jáng, yhangmoq gi, "Nyhit long." ga, dum tú taí akò nghut ri.

⁶ Haú mù, Yhang gi, byù hpûng lé myigùng htoq má zùng nhang to luí, muk haú nyhit long lé yù mù, jeju ban hkya-on jáng, myhik hpé luí, haú bang lé gâm byi râ matú, Yhâng é chángzô pé lé byi kat ri; haú mù, yhangmoq gi, haú bang lé gâm byi akò nghut ri. ⁷ Yhangmoq gi, ngo-nú zo ratsuí le wó akò nghut ri; haú mù, Yhang gi, ngozo haú pé é matú jeju hkya-on luí, chángzô pé lé dum gâm byi nhang ri. ⁸ Yuq hkangmó zô gyí bùm kó é htàng má, haú chángzô pé gi, amyit ahtàng lé nyhit mung byîng shoq wó guq tsîng yu ashî kó nghut ri. ⁹ Zô é bang gi, byù myi hkyîng kó nghut ri; Yesuq gi, haú bang lé, nhang kat luí, ¹⁰ Yhâng é chángzô pé eq rahá, hai má wang ji mù, Dalamanuhta mau má é jé akò nghut ri.

¹¹ Hparishe pé gi, lé mù, Yesuq eq dang htîng htîng lhùm akò; hau htoq agó, yhangmoq gi, mauhkûng má é kumlhá lé dúng é dông, Yhang lé chyam wú akò nghut ri. ¹² Yesuq gi, myit nô-kying kying luí, yhangmoq lé taí é gi, "Hai mù luí, shî ipyat lhê é byu pé gi, limik kumlhá dúng akò lhú? Ngò teng za taí kólé, shî ipyat má é bang lé, hai kumlhá le tún shit râ a nghut." gâ ri. ¹³ Hau htâng, Yhang gi, yhangmoq lé pyâm to mù, hai má dum taú wang ló luí, tú tap shut gú dap é ló bê nghut ri.

Hparishe Pé Eq Herut É Múnchi
Mht 16:5-12

¹⁴ Haú chángzô pé gi, muk yu chûng râ lé tô-myhí pyâm kólú, hai hkaú má muk ralong za ru wó akò nghut ri. ¹⁵ Yesuq gi, yhangmoq lé, "Nungmoq gi, Hparishe pé eq Herut é múnchi* lé, sídiq luí, koi pyâm nyi keq." ga taí ri.

¹⁶ Haú hkûn, yhangmoq gi, "Nga-nhûng chyáng muk a bo é yanmai, haú su ga taí é nghut ri." ga luí, rayuq eq rayuq taí lhùm bum akò nghut ri.

¹⁷ Haú su ga taí lhùm nyi kó é lé Yesuq sé jáng, yhangmoq lé, "Nungmoq gi, muk a bo é hkyô lé, hai mù taí lhùm nyi akò lhú? Ahkuí jé shoq, nungmoq gi, a byu-myàng, a sê gyo shi kó lhú? Nungmoq é myit nhikhum gi, ru htan nyi ashî kó lhú? ¹⁸ Myoq dap to kólú nhîng, a myàng kó lhú? Nohkyap dap to kólú

nhîng, a wó gyo kó lhú? ¹⁹ Ngò, muk ngo long lé myhik hpé mù, byù ngo hkyîng lé byi tsò é hkûn, zô myhit shuq htàng lé, nungmoq hkâ-myhó mung wó guq tsîng yu é lé, bun ashî kó lhú?" ga myi jáng, yhangmoq gi, "Raxe í mung." ga tú taí akò.

²⁰ Dum, Yesuq gi, "Ngò, muk nyhit long lé myhik hpé mù, byù myi hkyîng lé byi tsò é hkûn, zô myhit tô é ajap azo lé, nungmoq hkâ-myhó mung wó guq tsîng yu kó é lhú?" ga myi jáng, yhangmoq gi, "Nyhit mung." ga dum tú taí akò.

²¹ Haú hkûn, Yesuq gi, "Haú nghut le nhîng, ahkuí le, a sê gyo shi kó lhú?" ga, yhangmoq lé myí ri.

Myojit Sû Rayuq Lé Lhoq Gê Byi É Hkyô

²² Yhangmoq gi, Bet-saida wà mó má jé lò kó é hkûn, byù ra-am gi, myojit é byù rayuq lé, Yesuq chyáng shuí lé lò mù, haú yuq lé záng byi râ matú, dúng tóngbân akò.

²³ Yesuq gi, myojit sù haú yuq é loq lé zui mù, wà shinggan shut shuí htoq ló luí, yhâng é myoq má sòkan byé tik byi mù, loq ke byi luí, "Nàng, rajung jung lé myang ri lhú?" ga myí kat ri.

²⁴ Haú jáng, yhang gi, tu wú kat luí, "Byu pé gi, sigâm su dut luí, hkyô sô wún é lé, ngò myang ri." ga taí ri.

²⁵ Hau htâng, Yesuq gi, haú yuq é myoq má Yhâng é loq dum ke byi ri; haú hkûn, haú yuq é myoq gi, búng lò mù, ge byuq luí, hai lé le san za myàng bê nghut ri. ²⁶ Yesuq gi, haú yuq lé, "Wà hkaú má hkâwang ló lo." ga taí luí, yhâng é yhùm shut ló nhang kat bê nghut ri.

Hkrisduq Ga, Petruq Yín Yu É Hkyô
Mht 16:13-20; Luk 9:18-21

²⁷ Yesuq eq Yhâng é chángzô pé gi, Kesare-Hpilipi wà mó awui ayàm má é wà pé shut e ló é hkûn, hkyô má, Yesuq gi, chángzô pé lé, "Byu pé gi, ngo lé ó yuq nghut lhê ga, taí akò lhú?" ga myí ri.

²⁸ Haú hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, myiqhtoi rayuq yuq nghut ri ga taí akò." ga, Yhang lé tú taí akò.

²⁹ Yesuq gi, "Nungmoq gi, ngo lé ó yuq nghut lhê nghu akò lhú?" ga, yhangmoq lé xoq myi jáng, Petruq gi, "Nàng gi, Hkrisduq† nghut ri." ga tú taí ri.

³⁰ Yesuq gi, haú hkyô ó lé le a taí kyo râ matú, yhangmoq lé taí hkúm ri.

Byu Yhangzo Gi, Sat Pyâm É Hui Luí, Dum Dui Toq Râ Hkyô

Mht 16:21-28; Luk 9:22-27

³¹ Hau htâng, Yhang gi, yhangmoq lé mhoqshít é má, "Haú Byu Yhangzo gi, zing-rí é

* 8:15 Shî má taí é múnchi gi, Hparishe pé eq Herut é mhoqshít hkyô lé, lhoq pyo é lé gâ lhê. † 8:29 Grik dong Hkrisduq gâ é gi, xù but hui Sù gâ é lichyúm nghut mù, Hebre dong "Mesaia" gâ é eq rajung za nghut lhê.

myo myo hui zo luí, suwún wuí, hkyangjong agyi pé, tará sará pé êq he-ngik pyâm é hui mù, sat pyâm é hui ra rá nghut lhê; nghut kôlhang, sum nyí nghú rá buinyi má, dum dui toq rá nghut lhê." gâ ri. ³² Yesuq gi, haú hkyó lé san za dut shoq tái nyi é yanmai, Petruq gi, Yhang lé rahkyam shut shuí htoq yú mù, Yhang lé tân ri.

³³ Nghut kôlhang, Yesuq gi, Yhâng é chángzô pé lé lhing wú kat mù, Petruq lé, "Tsadán nàng, Ngá chyáng mai hpàng aq! Nàng gi, Garai Gasang eq sêng é hkyó lé a myit e za, byù eq sêng é hkyó lé za myit é sú nghut ri." ga tân kat ri.

³⁴ Hau htàng, Yhang gi, byù moq mó eq Yhâng é chángzô pé lé wut yú mù, tái é gi, "Ngá htàng cháng nàu sú ó yuq nghut kôle, yhumsing gùng yhumsing he-ngik pyâm mù, yhumsing é tapzìng lé waq chùng luí, cháng ra rá nghut lhê. ³⁵ Hkásu mù gâ le, yhumsing é asak lé hkyi yù nàu sú ó yuq nghut kôle, asak sum rá nghut lhê; nghut kôlhang, Ngá é yanmai le, haú gabú danglù é yanmai le, yhumsing é asak sùm pyâm é sú kúm gi, asak hkyi yu é hui rá nghut lhê. ³⁶ Byù gi, mingkan gón lé wó sng to kôlhang, yhumsing é asak woi-nyí sùm byuq é nghut le gi, yhâng é matú, hai akyú bò rá lú? ³⁷ Byù gi, yhumsing é asak woi-nyí lé, hai êq wó htaí yù rá lú? ³⁸ Yubak mara myô é eq su-myi sulàng shut é ipyat shí má, Ngó eq Ngá é dang lé hoq pyâm é sú ó yuq lé le, haú Byu Yhangzo gi, Yhâng Wá é hpungwup shingkan bo é êq, haú chyoyúng maumang lagyó pé eq rahá jé lé é hkún, hoq pyâm rá nghut lhê."* gâ ri.

9

¹ Hau htàng, Yesuq gi, yhangmoq lé, "Ngó, nungmoq lé teng za tái kôle, shí má yap tó é bang ra-am gi, Garai Gasang é mingdán, hpungwup a-tsâm êq jé lé lo é lé, a myang é za shí kó rá a nghut." ga tái ri.

Yesuq É Ihpyô Isâm Htaí Lo É Hkyô

Mht 17:1-13; Luk 9:28-36

² Hkyuq nyí lai htàng má, Yesuq gi, Petruq lé le, Yakuq eq Yohan lé le, shuí chùng mù, yhangmoq baú myhang é bùm ralhùm má doq ló akô; haú hkún, yhangmoq é myoq hí tē má, Yesuq é ihpyô isâm htaí lo ri. ³ Hau htoq agó, Yhâng é mebu gi, wik wik duq hpyu zan lo ri; myidàm htoq má, ó yuq le haú-í hpyú shoq a wó xaú hpyu wú é nghut lhê. ⁴ Eliyaq eq Mosheq gi, yhangmoq é hí má htoq shit mù, Yesuq eq dǎng nyo lhùm nyi akô.

⁵ Haú mù, Petruq gi, Yesuq lé, "Rabai é, shí jowò má nga-nhùng nyi le ge ri; haú mù, Náng é matú ralhùm, Mosheq é matú ralhùm, Eliyaq é matú ralhùm kut, ngamoq

lé, zúm sùm lhum saí nhàng laq." ga tái ri. ⁶ Hkásu mù gâ le, yhangmoq gi, gyai yhang gyuq dan bùm kô é yanmai, Petruq gi, haú tái rá le a sé mù, haú su gâ é nghut ri.

⁷ Hau htàng, mhut htoq lô luí, yhangmoq lé htup zìng lô mù, mhut hkaú mai htoq lo é htê gi, "Shí yuq gi, Ngó chyitdap é Ngá Zo nghut lhê; Yhâng é dang gyo keq." gâ ri.

⁸ Haú hkún jàng, chángzô pé gi, lhinghkyuq má wú kat le, Yesuq za yhangmoq eq rahá nghut nyi é mai lai luí, ó lé le, a myàng lo kó nghut ri.

⁹ Yhangmoq, bùm mai taú gyó lô kô é hkún, Yesuq gi, haú Byu Yhangzo shi é mai a dum dui toq toq gi, yhangmoq myang é hkyó lé, ó lé le a tái kyo rá matú tái hkùm tó ri. ¹⁰ Chángzô pé gi, dang haú lé myit má kat to kôluí, "Shi é mai dum dui toq rá." gâ é lichyúm lé, rayuq eq rayuq myi lhùm bum akô nghut ri.

¹¹ Hau htàng, yhangmoq gi, "Eliyaq hí lé ra rá nghut lhê ga, tará sará pé hai mù tái kô é lú?" ga, Yesuq lé myi akô.

¹² Haú hkún, Yesuq gi, "Eliyaq hí jé lé é gi, teng bê nghut luí, lhunglhang lé dum lajàng tó é nghut ri. Nghut kôlhang, haú Byu Yhangzo gi, myo myo hpuzo luí, he-ngik pyâm é hui ra nghut lhê ga le, Chyúmdang má ká to ashí, a nghut kó lú? ¹³ Ngó, nungmoq lé tái kôle, Eliyaq gi, jé lé bê nghut mù, yhang eq séng luí Chyúmdang má ká tó é eq rajung za, yhangmoq gi, ô nau é dǎng banshoq kut bekó nghut ri." ga tái ri.

Nat Dap É Yuqgè Zo Rayuq Lé Lhoq Gê Byí É Hkyô

Mht 17:14-20, 22-23; Luk 9:37-45

¹⁴ Yhangmoq gi, chángzô pé chyáng dum taú jé lô kô é hkún, haú bǎng é lhinghkyuq má byù moq mó zìng lé é lé le, tará sará pé, haú bang eq dang htíng htíng lhùm nyi kô é lé le, myang akô. ¹⁵ Haú má nyi tó é lhunglhang bang gi, Yesuq lé myang kat é eq, má byuq kôluí, din é mù, é shi-kyâm akô nghut ri.

¹⁶ Haú hkún, Yesuq gi, yhangmoq lé, "Nungmoq gi, yhangmoq eq hai lé dang htíng htíng lhùm nyi akô lú?" ga tái ri.

¹⁷ Byù hpúng hkaú má é rayuq tú tái kat é gi, "Sará é! Nhut jit nhang é nat wang júng tó é ngá é yuqzo lé, Náng chyáng shuí lé lo lhê. ¹⁸ Nat haú gi, yhâng chyáng wǎng hkangmó, yhang lé myi htoq má lhoq leqbat nhang ri; haú mù, yhang gi, nhut mai guttsú htoq lhê, zui kyik kyik lhê, langhtan lo lhê, dut ri; hau é yanmai, nat haú lé hkat htoq pyám byi rá matú, Náng é chángzô pé lé dǎng wú kôlhang, yhangmoq a wó dut kó nghut ri." gâ ri.

¹⁹ Haú hkún, Yesuq gi, "Lumjǎng myit a bo é amyú pé é, Ngó gi, hká-myháng jé shoq nungmoq eq rahá nyi mù, wó jǎn nyi rá lú?"

Yuqgè zo haù lé, Ngá chyáng shuí lé lô keq." ga tai kat ri.

²⁰ Haù mù, yhangmoq gi, yuqgè zo haù lé shuí lé lo akò; nat haù gi, Yesuq lé myang kat é eq yhang, yuqgè zo haù lé langhtân nhang ri; yuqgè zo haù gi, myigùng má lêng leq luí goleng leng mù, nhut mai tsù-myup htoq nyi ri.

²¹ Haù hkùn, Yesuq gi, yhângwa lé, "Yhang, isu dut é hkâ-myhâng myáng bê lú?" ga myi jâng, yhâng wa gi, "Zoshâng hkùn mai nghut bê." ²² Nat haù gi, yhang lé lhoq sat pyâm naù mù, myi má le, wui má le, anum num lêng wàng nhang wú bê nghut lhê; nghut kôlhang, Nang, rajung jung wó kut byí é nghut le gi, ngá hpe lé shogyo yù laq, garúm yù laq." ga tù tai ri.

²³ Yesuq gi, "Nang, wó kut byí é nghut le gi, nghú, haù mù tai lhê lú? Lumjîng myit bò su é matú gi, haù le wó dut lhê." ga, yhang lé tai ri.

²⁴ Haù zôshang é yhângwa gi, radá dâm, "Ngò lumjîng lhê; nghut kôlhang, ngá é lumjîng myit gi, shaù ashí nghut é yanmai garúm yù laq." ga tai garú ri.

²⁵ Yesuq gi, byù hpúng din zîng lé lô kô é lé, myàng jâng, haù agè ashop é nat lé, "Nojit, nhutjit nhang é nat ê! Ngò, nang lé hkunmó hkyô lhê, yhâng chyáng mai htoq lô aq; hkâ-nhám le, yhâng chyáng hkâdum wàng lo." ga tân kat ri.

²⁶ Haù hkùn, nat haù gi, garu mù, zoshâng haù lé wum kat langhtân nhâng luí, htoq lô byuq bê. Zoshâng haù gi, shí mâng gùng su dut byuq é yanmai, byù myo myo gi, "Yhang shí bê nghut ri." ga tai akò. ²⁷ Nghut kôlhang, Yesuq gi, zôshang é loq má zui luí, tu toq kat ri; haù mù, zoshâng gi, yap to bê nghut ri.

²⁸ Yesuq, yhúmhaù má wàng ló é htâng, Yhâng é chángzô pé gi, "Ngamoq gi, haù mù, nat haù lé a wó hkat htoq é lú?" ga, tsik za Yhang lé myí akò.

²⁹ Yesuq gi, "Haù jung nat lé gi, kyúdùng é dông za a nghut jâng, wó hkat htoq rá a nghut." ga, yhangmoq lé tù tai ri.

³⁰ Yhangmoq gi, haù jowò mai htoq lô mù, Galile mau mai lai lô akò; nghut kôlhang, Yesuq gi, ó lé le a sé nhâng naù nghut ri. ³¹ Haù mù gá le, Yhang gi, "Haù Byu Yhangzo gi, byu pé é loq má ap pyâm é hui rá nghut lhê; haù bang gi, Yhang lé sat pyâm kó rá nghut lhê; nghut kôlhang, Yhang gi, shí é htâng sum nyí nghú rá nyí má, dum dui toq rá nghut lhê." ga, Yhâng é chángzô pé lé mhoq-shít byí nyí é yanmai nghut ri. ³² Yhâng é chángzô pé gi, dang haù lé a sé gyo kôlhang, Yhâng chyáng a wám myi kó nghut ri.

*Kô Dik Sù Gi, Ó Yuq Nghut Lhê Lú?
Mht 18:1-5; Luk 9:46-48*

³³ Yhangmoq gi, Kaperna-um wa má jé e akò nghut ri. Yesuq gi, yhúmhaù má nyi tô é hkùn, chángzô pé lé, "Hkyô má, nungmoq, hai hkyô lé dang chyin chyin lhum kô é lú?" ga myí ri. ³⁴ Nghut kôlhang, yhangmoq gi, zim za nyi tô akò; hkâsu mù gá le, ko dik sù gi, ó yuq nghut lhê nghú é hkyô lé, hkyolat má, yhangmoq dang chyin chyin lhum kô é yanmai nghut ri.

³⁵ Yesuq gi, zùng mù, haù chángzo raxe í yuq lé, wut yù luí, "Kô dik naù sù ó yuq nghut kôle, tiq dik sù eq banshoq bâng é dui-nhâng zoshâng dut ra rá nghut lhê." ga tai ri.

³⁶ Haù htâng, Yhang gi, zoshâng rayuq lé shuí yù mù, yhangmoq é gung gung má shap to luí, dum bún yù mù, yhangmoq lé tai é gi, ³⁷ "Shí sù é zoshâng lé, Ngá é myîng mai hap yu é sù ó yuq nghut kôle, Ngo lé hap yu é sù nghut bê; Ngo lé hap yu é sù ó yuq nghut kôle, Ngo lé za hap yu é a nghut, Ngo lé nhang kat é Sù lé hap yu é le nghut lhê." gá ri.

*Nga-nhúng Lé Gyè A Kut É Sù Gi, Nga-nhúng É Hkyam Shut Nghut Lhê Gá É Hkyô
Luk 9:49-50*

³⁸ Haù hkùn, Yohan gi, "Sarà ê! Náng é myîng lang luí, nat gâng pé lé hkat pyâm byí wún é byù rayuq lé, ngamoq myang ri. Yhang gi, nga-nhúng chyáng a lòm sù nghut é yanmai, yhang lé ngamoq hkùm pyâm é nghut lhê." ga tai ri.

³⁹ Yesuq kúm gi, "Yhang lé hkâhkùm kó; Ngá myîng lé lang luí, laklai kumlhá kut é sù gi, razup za má, Ngò eq séng luí, a ge é hkyô pé lé tai rá a nghut; ⁴⁰ Hkâsu mù gá le, nga-nhúng lé gyè a kut é sù gi, nga-nhúng é hkyam shut nghut lhê. ⁴¹ Ngò, nungmoq lé teng za tai kôlé, nungmoq gi, Hkrisduq eq séng é bang nghut lhê gá é yanmai, ngá é myîng lé lang luí, nungmoq lé, uchyam ragóm byi huq é sù ó yuq nghut kôle, zuihpau lé hkyak myang hkam yù rá za nghut lhê.

*Mara Shut Nhang É Hkyô
Mht 18:6-9; Luk 17:1-2*

⁴² Ngo lé lumjîng é zoshâng wui mà é rayuq lé, mara kut shut nhang é sù gi, yhâng é lingzing má luqlui long mó tui hut byi luí, wuimau má é dú hkyô pyâm é hui é nghut lé gi, yhang é matú je gè rá nghut lhê. ⁴³ Náng é loq èq, nang lé mara kut shut nhang é nghut le gi, haù lé hpýt dú pyâm aq; loq í loq dap luí, hkâ-nhám le, myiduq a dat shum é ngarai ming wàng rá htoq má, loq raloq eq za ahtum abyuq é asak wó rá shut wàng le gi, náng é matú je ge ri. ⁴⁴ (Haù ngarai ming gi, 'yhangmoq lé hkê nyí é luq le a shí, myiduq le a shum' é jowò nghut lhê).* ⁴⁵ Náng é hkyi èq, nang lé mara kut shut nhang é nghut

* 9:44 Bun zo 44, 46, gi, Chyúmlaiká myo myo má a bo é nghut lhê.

le gi, haú lé hpyit dú pyám aq; hkyí í hkyí dap luí, hkâ-nhám le, myiduq a dat shum é ngaraí ming má dú hkyô pyám é hui rá htoq má, hkyí rahkyí za dap luí, ahtum abyuq é asak wó rá shut wang le gi, náng é matú je ge ri. ⁴⁶ (Haú ngaraí ming gi, 'yangmoq lé hkê nyi é luq le a shí, myiduq le a shûm' é jowò nghut lhê.) ⁴⁷ Náng é myoqjí eq, nang lé mara kut shut nhang é nghut le gi, haú lé lap choq pyám aq; myoqjí í jí dap gú, ngaraí ming má dú hkyô pyám é hui rá htoq má, myoq rají eq za, Garaí Gasâng é mingdán má wang le gi, náng é matú je ge ri.

⁴⁸ (Haú ngaraí ming gi, 'yangmoq lé hkê nyi é luq le a shí, myiduq le a shûm' é jowò nghut lhê.)*

⁴⁹ Hkâsu mù gâ le, hkungga sho lé xo kat luí lhoq sanséng é su, myi gi, yuq hkangmó lé lhoq sanséng rá nghut lhê.*

⁵⁰ Xo gi, ge lhê. Nghut kôlhang, xomân kân byuq jáng gi, hkâsu kut dum wó lhoq ngam yú rá lhú? Nungmoq gi, xo su ngam nyí mù, rayuq eq rayuq nguínón nyí keq." ga taí ri.

10

Myi, Làng Gâng É Hkyô

Mht 19:1-12; Luk 16:18

¹ Hau htâng má, Yesuq gi, Kaperna-um mai htoq ló mù, Yuda mau má é maukyo má é jé luí, Yodan làng tú tap má dap ló bê nghut ri; byù myo myo gi, Yhâng chyáng dum zing lé ló kôluí, Yesuq gi, Yhang lhaq kut nyi é eq rajung za, haú bang lé mhoqshít byí ri.

² Hparishe pé ra-am gi, lé jé kômù, "Byù rayuq, yhumsing é yangmyi lé lhoq kâng pyám le, tará wang lhê lhú?" ga myí é dong, Yhang lé chyam wú akò.

³ Yesuq gi, "Mosheq gi, nungmoq lé, hkâsu ga hkunmó hkyô tô é lhú?" ga taú myí ri.

⁴ Haú hkún, yangmoq gi, "Yuggé rayuq gi, lhoq kang laiká ká mù, yangmyi lé wó nhang pyám lhê ga, Mosheq, ahkáng byí tô ri." ga tú taí akò.

⁵ Yesuq dum tú taí é gi, "Nungmoq é myit nhikhum htân kô é yanmai, Mosheq gi, tará haú lé ká tô é nghut lhê. ⁶ Nghut kôlhang, mau htoq xáng hkun lé, Garaí Gasang gi, 'yuggé eq myiwe lé hpan é nghut lhê'.^{*}

⁷ 'Hau é yanmai, yuggé gi, yhumsing ínu íwâ chyáng mai htoq luí, yangmyi eq rahá rading ralhú za kut nyí mù, ⁸ yangnhik gi, gungsho ralhú za dut byuq kó rá nghut lhê'.^{*} Haú mù luí, yangnhik gi, í yuq a nghut lo é za, rayuq za dut bê nghut ri. ⁹ Haú mù luí, Garaí Gasang lhoq tsúm tô é lé, byù gi, a lhoq kang sháng gaq." gâ ri.

¹⁰ Yhumhkaú má, yangmoq nyi tô é hkún lé, chángzô pé gi, haú hkyô eq séng luí, Yhang lé dum saí myí akò. ¹¹ Haú hkún,

Yhang gi, "Yhumsing é yangmyi lé kâng pyám mù, myiwe gotú dum háng yu é sù ó yuq nghut kôle, su-myi lú é sù dut bê nghut mù, yangmyi lé shut é sù nghut bê. ¹² Myiwe rayuq le, yhumsing é yanglàng lé kâng pyám mù, yuggé góyuq eq dum háng é nghut le gi, sulàng lú é hkyô lé kut bê nghut ri." ga tú taí ri.

Zoshâng Wuí Eq Yesuq É Hkyô

Mht 19:13-15; Luk 18:15-17

¹³ Byu pé gi, zoshâng wuí lé Yesuq záng byi sháng gaq ga, Yesuq chyáng shuí lé lo akò; nghut kôlhang, chángzô pé gi, yangmoq lé lhom tân hkùm akò nghut ri. ¹⁴ Haú lé Yesuq myàng jáng, Yhang gi, wú nhik-yo naú luí, "Haú zoshâng wuí lé, Ngá chyáng lé nhâng keq; yangmoq lé hkâhkùm zing to kó; hkâsu mù gâ le, Garaí Gasâng é mingdán gi, haú su é bâng é mingdán ru nghut lhê. ¹⁵ Ngò, nungmoq lé teng za taí kôle, ó yuq nghut kôle, Garaí Gasâng é mingdán lé, zoshâng su kut a lhom hap yu é nghut le gi, mingdán haú má wó wàng rá a nghut." ga yangmoq lé taí ri. ¹⁶ Hau htâng, Yesuq gi, zoshâng wuí lé bún yú mù, yangmoq ahtuq má loq ke luí, shimân byí ri.

Sùt Wó É Zorâm Rayuq É Hkyô

Mht 19:16-30; Luk 18:18-30

¹⁷ Yesuq gi, hkyô dum so xoq e ló é hkún, byù rayuq gi, din lé ló mù, Yhâng é hí má hkyihput htuq luí, "Ge é Sará ê, ahtum abyuq é asak wó yú rá matú, ngò haí kut ra rá lhú?" ga myí ri.

¹⁸ Haú mù, Yesuq gi, "Haí mù, Ngo lé ge é Sará nghu lhê lhú? Garaí Gasang mai lai luí, ge é ó yuq le a nyi. ¹⁹ Jep e tará má, 'Byù hkâsat, su-myi sulàng hkálu, hkâhkau, a teng a mán é saksé hkâhkâm, hkâmô zo, nángnu nángwa lé hkungga aq!'^{*} ga bo tô é lé, náng sê lhê." ga tú taí ri.

²⁰ Haú hkún, haú yuq gi, "Sará ê, haú pé banshoq lé, ngò, zoshâng hkún mai cháng bê nghut lhê." ga taí ri.

²¹ Yesuq gi, haú yuq lé wú tsuq to mù, yang lé chyitdap luí, taí é gi, "Nàng kut rá rajung rá tô ashí; ló mù, náng wó miwó lé úng pyám luí, myàng bang lé byí pyám aq; haú jáng, náng, mauhkung htoq má sutzé wó rá nghut lhê; haú mù, Ngá htâng lé cháng aq." gâ ri.

²² Haú yuq gi, dang haú lé wó gyo jáng, sutzé gyai wó sù nghut é yanmai, myoqdong shum byuq mù, gyai yang myit a ngón é eq ló byuq bê nghut ri.

²³ Yesuq gi, lhinghkyuq byu wú mù, Yhâng é chángzô pé lé, "Sutzé wó bang gi, Garaí Gasâng é mingdán má wàng rá matú, haú-í yang wuí ri-nhung!" ga taí ri.

²⁴ Chángzô pé gi, Yhang tai é dăng é yan-mai, mauhong bum akò nghut ri. Nghut kôlhang, Yesuq dum xoq tai é gi, "Zo wui é, Garai Gasâng é mingdán má wàng rã matú, haú-í yhang wui ri-nhung! ²⁵ Sutzè wó sũ rayuq, Garai Gasâng é mingdán má wò wàng rã htoq, gola-uq radu âpno mai wó wang lai rã gi, je lui rã nghut lhê." gã tai ri.

²⁶ Haú hkûn, chángzô pé gi, je riyhang maú byuq kômù, rayuq eq rayuq, "Haú su ru nghut le gi, ó yuq za hkyi yu é hui rã nghut lhê lhu?" ga, tai lhum bum akò nghut ri.

²⁷ Haú hkûn, Yesuq gi, yhangmoq lé wú kat mù, "Haú hkyô lé, byu mai gi, wó kut rã a nghut; nghut kôlhang, Garai Gasang gi, wó dut lhê; hkâsu mù gã le, Garai Gasang gi, lhungháng lé wó kut é Sũ nghut lhê." ga tai ri.

²⁸ Haú hkûn, Petruq gi, Yhang lé, "Ngamoq gi, wó é gũ lhungháng lé tó pyám to lui, Náng htâng cháng bê nghut lhê." ga tai ri.

²⁹ Haú mù, Yesuq tú tai é gi, "Ngò, nungmoq lé teng za tai kôlé, Ngá é yanmai le, gabú danglu é yanmai le, yhumsing é yhùm, gumang gu-nhá, ìnu iwa, zo dù wui eq yò pé lé tó pyám tó é sũ ó yuq nghut kôlé, ³⁰ shí pyat lhê é yhùm pé, gumang gu-nhá wui, ìnu pé, zo dù wui eq yò pé lé, rashô tú wó hkam yù lui, zing-rí é hkyô pé lé le hui kó rã nghut é htoq agó, htang pyat má le, ahtum abyuq é asak wó yù rã nghut lhê. ³¹ Nghut kôlhang, hí nghut nyi é bang myo myo gi, htâng gyó byuq kó rã nghut mù, htâng gyó nyi bang yuq gi, hí bekò rã nghut lhê." gã ri.

Yesuq, Yhang Shi Rã Hkyô Lé Dum Tai É Hkyô

Mht 20:17-19; Luk 18:31-34

³² Yhangmoq gi, Yerusalem và mó shut doq ló nyi kô é u lé, Yesuq gi, yhangmoq é hí má sô tó ri; haú hkûn, htâng má sô é bang gi, gyuq nyi bùm kô é u lé, haú chángzô pé gi, maú byuq bum akò nghut ri; Yesuq gi, haú chángzo raxe í yuq lé gotú kut dum wut yù mù, Yhâng chyáng dut lò rã hkyô, yhangmoq lé tai kyô é gi, ³³ "Wú keq, nga-nhung gi, Yerusalem và mó shut doq ló nyi lhê; haú Byu Yhangzo gi, hkyangjong agyi pé eq tarã sará pé é loq má ap byi pyám é hui rã nghut lhê; haú bang gi, Yhang lé, shí rã mara byi lui, tũngbàu pé é loq má ap byi pyám kó rã nghut lhê. ³⁴ Haú bang gi, Yhang lé, wuizui kut pyám é, sòkan byé gyùn é, nhuq bat é kut yù mù, sat pyám kó rã nghut lhê. Hau htâng sum nyi má, Yhang dum dui toq lò rã nghut lhê." gã ri.

Yakuq eq Yohan nhik dung é hkyô

Mht 20:20-28

³⁵ Hau htâng má, Zebedi é yhangzo Yakuq eq Yohan nhik gi, Yesuq chyáng lé kômù,

"Sarà è, ngá-nhik dũng é gũ banshoq, Nàng kut byi rã lé, ngá-nhik ô nau ri." ga tai akò.

³⁶ Haú hkûn, Yhang gi, "Ngò, nungnhik lé haí kut byi rã ô nau akò lhu?" ga myi ri.

³⁷ Yhangnhik gi, "Náng é hpungwup shing kang hkaú má, ngá-nhik tâng lé, Náng é loqyò hkyam má rayuq, loqpaí hkyam má rayuq kut, zùng nhâng laq." ga tú tai akò.

³⁸ Nghut kôlhang, Yesuq gi, "Nungnhik haí dũng nyi é lé, nungnhik a sé kó nghut ri. Ngò shuq rã góm* lé, nungnhik wó shuq kó rã lhu? Ngò hkam yù rã bap tisma lé, nungnhik wó hkam yù kó rã lhu?" ga yhangnhik lé tú tai ri.

³⁹ Haú hkûn, yhangnhik gi, "Nga-nhik wó dut lhê." ga tú tai kôjáng, Yesuq gi, "Ngò shuq rã góm lé, nungnhik shuq kó rã nghut lhê; ngò hkam yù rã bap tisma lé le, nungnhik hkam yù kó rã nghut lhê. ⁴⁰ Nghut kôlhang, Ngá é loqyò, loqpaí hkyam má zùng rã ahkáng lé gi, Ngò byi jung a nghut. Jowò haú pé gi, hen to byi é hui bang matú za nghut lhê." ga yhangnhik lé tai ri.

⁴¹ Haú su gã é hkyô lé, haú gotú chángzo raxê yuq wó gyo kôjáng, yhangmoq gi, Yakuq eq Yohan nhik lé nhik-yô akò nghut ri. ⁴² Yesuq gi, yhangmoq banshoq bang lé wut tsing yù lui, "Tũngbàu pé lé uph kang é ga bang gi, tũngbàu pé lé up zô nyi kô é hkyô lé le, haú eq rajung za, yhangmoq é ming up suwún wui le, yhumsing é ahkáng ayá lé chũng mù, up zô nyi kô é hkyô lé le, nungmoq sê lhê. ⁴³ Nghut kôlhang, nungmoq chyáng gi, haú su a dut kó sháng gaq, nungmoq má, byù mó dut nau sũ ó yuq nghut kôlé, nungmoq é dui-nhâng zoshâng dut ra rã nghut lhê. ⁴⁴ Hau htoq agó, nungmoq má ushuq dut nau sũ ó yuq nghut kôlé, banshoq bang é jùn dut ra rã nghut lhê. ⁴⁵ Hkâsu mù gã le, haú Byu Yhangzo lháng gi, dojaú é lé hkam yù rã matú jé lé é a nghut e za, dojaú rã matú eq byù myo myô é matú, shihtaí gunglik hkungga dõng, Yhâng é asak lé byi pyám rã matú sheq, jé lé é ru nghut lhê." ga, yhangmoq lé tai ri.

Myoqjit Sũ Barateme, Myoq Dum Myang É Hkyô

Mht 20:29-34; Luk 18:35-43

⁴⁶ Hau htâng, yhangmoq gi, Yeriho kó và má jé ló akò nghut ri. Yesuq eq Yhâng é chángzô pé gi, byù moq mó eq rahá, và mai htoq ló nyi kô é hkûn, Barateme (Teme é yhangzo) gã é myoqjit sũ rayuq gi, hkyô yàm má dung zò zung tó ri. ⁴⁷ Yhang gi, Nazaret và byù Yesuq lai ló é lé wó gyo jáng, "Dawiq é Yhangzo Yesuq è, ngo lé shogyo yù laq ô!" ga garú kat ri.

⁴⁸ Haú mù, byù myo myo gi, zim za nyi rã matú yhang lé tân hkùm akò; nghut kôlhang,

* 10:38 Góm eq bap tisma gã é gi, jamjau hui rã eq shí rã lé, tai nau é nghut lhê.

yhang gi, "Dawiq é Yhangzo ê, ngo lé shogyo yu laq ô!" ga, je riyhang garú kat ri.

⁴⁹ Haú mù luí, Yesuq gi, yap nô kat mù, "Yhang lé ji kat keq." ga tai jáng, yhangmoq gi, "Myit ngón aq hkoi; Yhang, nang lé ji nyi ri; toq aq." ga myoqjit sú haú lé tai akó. ⁵⁰ Haú hkún, haú yuq gi, yhang é buhíng lé hkyut pyám mù, byam chy luí, Yesuq chyáng lé jé ri.

⁵¹ Yesuq gi, yhang lé, "Ngò, nang lé hai kut byi rá ô nau ri lú?" ga myi jáng, yhang gi, "Sará ê, ngò myoq myàng nau ri." ga tú tai ri.

⁵² Yesuq gi, "Ló aq hkoi, nang é lumjíng myit gi, nang lé lhoq gê byi bê nghut ri." ga tai kat é hkún jáng, yhang gi, myoq wó myàng mù, Yesuq e ló é hkyô shut cháng e ló bê nghut ri.

11

Yesuq, Yerusalem Wà Mó Má Wang Ló É Hkyô

Mht 21:1-11; Luk 19:28-40; Yhn 12:12-19

¹ Yesuq eq Yhâng é chángzò pé gi, Yerusalem wà mó eq chyáng lo nyi kô é hkún, Tsanlun Bùm mã é Bethpage wà eq Behtani wà mã jé ló kójáng, Yesuq gi, Yhâng é chángzo í yuq lé, ² "Nungnhik, hí mã é wà mã é keq; wà haú mã wang é hkún jáng, ó le a jí wú shí é logúng zo tuí to lánng é lé, ê myàng kó rá nghut lhê; haú lé hpyi yù mù, Ngá chyáng she lò keq. ³ Byù rayuq yuq mã, 'Haí mù, haú su kut nyi akó lú?' ga nungnhik lé lhom myi jáng, 'Shí du lé, haú Yhumsíng rá ri ga, razup mã dum taú dé byi rá nghut lhê.' nghú tú tai keq." ga pyíng luí, nhang kat ri.

⁴ Haú nhik gi, e ló mù, hkyô mó yâm mã é hkumdong nàm mã tuí tó é logúng zo radu lé, ê myàng kólú, haú lé tuí hpyi nyi akó.

⁵ Haú hkún, haú mã yap tó é bang ra-am gi, "Haí mù, logúng tuí hpyi nyi akó lú?" ga myi akó. ⁶ Haú jáng, yhangnhik gi, Yesuq pyíng kat é eq rajung za tai kyo kójáng, yhangmoq gi, she ló rá ahkáng byi kat akó nghut ri.

⁷ Yhangnhik, logúng zo haú lé Yesuq chyáng she jé lo é hkún, logúng hau é gúng htoq mã, yhangmoq é buhíng pé buí jáng, hau é ahtoq mã, Yesuq doq jí ri. ⁸ Byù myo myo gi, yhangmoq é buhíng pé lé, hkyô mã hkyut hkang byi akó; ra-am gi, yò pé mã zân yu é mhandíng lé hkang byi akó nghut ri. ⁹ Hí mã so bang eq htàng mã châng é bang gi, "Hosana!"

Haú Yhumsíng é myíng mai jé lé lô Sù gi, hkungsó wó nyi sháng gaq ô!

¹⁰ Jé lé lô rá nghut é, nga-nhúng é íwa Dawiq é mingdán gi, hkungsó wó nyi sháng gaq ô!

Htoq tsáng myhâng mã hosana nghut sháng gaq ô!"¹⁰

ga luí, tai garú bum akó nghut ri.

¹¹ Yesuq gi, Yerusalem wà mó mã jé mù, noqkuq yhúm mã wang é luí, lhíngkhyuq mã é jung hkangmó lé wú ri; nghut kólhang, búi gyum ló bê nghut é yanmai, Yhâng é chángzo raxe í yuq eq rahá, Behtani wà shut htoq é ló bekó nghut ri.

Maihpáng Gâm Ashi A Zui Râ Matú Tai É Hkyô

Mht 21:18-19

¹² Hau htang nyi, yhangmoq, Behtani wà mai htoq ló kó é hkún, Yesuq gi, zo mut bê nghut ri. ¹³ Yhang gi, ahaq wúm é maihpáng gâm ragám lé, we we mai byu-myang kat jáng, agám haú mã ashí zúí lhê laq ga é jé wú lé, ahaq mai lai luí, hai le a myàng nghut ri. Hai mù gá le, maihpáng-shi zui yâm a nghut é yanmai nghut ri. ¹⁴ Haú mù, Yesuq gi, shigám haú lé, "Ahkuí mai gi, nang chyáng mã é ashí, ó yuq le a myàng zo lo kó sháng gaq." ga tai ri. Yhâng é chángzò pé gi, haú su ga tai é dang lé wó gyô yu akó nghut ri.

Yesuq, Noqkuq Yhúm Lé Lhoq Sanséng Pyám É Hkyô

Mht 21:12-17; Luk 19:45-48; Yhn 2:13-22

¹⁵ Yhangmoq, Yerusalem wà mó mã jé é hkún, Yesuq gi, noqkuq yhúm mã wang é mù, haú mã é zè ung zè wui kut nyi é bang lé, hkát htoq pyám luí, ngùn htaí zo bâng é siboi pé eq hpúngkyui ung zo bâng é tanghkuq pé lé tu mhúq pyám byi ri. ¹⁶ Hau htoq agó, Yhang gi, ó yuq lé nghut kôle, ung zé lé noqkuq yhúm mai a waq lai nháng kut pyám ri. ¹⁷ Yesuq, yhangmoq lé mhoqshit é gi,

"Ngá yhúm gi, byù myú lhunglhang bâng é matú, kyúdung yhúm ga rá nghut lhê."¹⁶

ga kâ tó é a nghut kó lú? Nghut kólhang, nungmoq gi, 'damaq hkyúng' kut pyám bekó nghut ri." gá ri.¹⁷

¹⁸ Hkyangjong agyi pé eq tará sará pé gi, haú lé wó gyô kómú, Yhang lé hkásu kut wó sat pyám rá hkyô ho nyi akó; nghut kólhang, shiwa byu pé gi, Yhang mhoqshit é hkyô mã, myit zing zuq bùm kó é yanmai, yhangmoq gi, Yhang lé gyuq bum akó nghut ri.

¹⁹ Myinhtàng jé jáng, Yesuq eq Yhâng é chángzò pé gi, wà hkaú mai htoq ló bekó nghut ri.

Maihpáng Gâm Nyhúí Shi Byuq É Hkyô
Mht 21:20-22

* **11:9** Hebre dang mã, hosana gá é gi, "ahkuí hkyi yù laq" gá é nghut lhê. Nghut kólhang, bun zo 9, lo mã gi, hkyá-on dang đồng chung é nghut lhê. * **11:10** Hkyá-on 118:25-26 * **11:17** Esai 56:7 * **11:17** Yer 7:11

12

²⁰ Htang napkyó, yhangmoq sô lai lô le, maihpáng gâm gi, anyit mai yhang nyhuí kyuy shi byuq é lé myang akô. ²¹ Petruq gi, myit bún kat luí, "Rabai ê, wú aq! Nang nhing pyâm é maihpáng gâm gi, nyhuí shi byuq bê nghut ri." ga luí, Yesuq lé tai ri.

²² Haú hkûn, Yesuq gi, "Garai Gasang lé lumjng keq. ²³ Ngò, nungmoq lé teng za tai kôlé, ó yuq nghut kôlé, i-myt má úng-âng é hkyô a bo é za, yhumsing tai é hkyô gi, dut lò rá nghut lhê ga lumjng kô é nghut le gi, bùm shí lé, 'Htot mù, wuimau má lô gyó wàng aq.' ga tai le lháng, haú hkyô dut byi rá nghut lhê. ²⁴ Haú mù luí, Ngò, nungmoq lé tai kôlé, nungmoq hai dng le le wó yú rá nghut lhê nghú lumjng kô é nghut le gi, wó yú kó rá za nghut lhê. ²⁵ Mauhkung htoq má é nungmoq é İwa gi, nungmoq é mara lé hkyut pyâm byi sháng gaq, nungmoq gi, kyúddng yap tô é hkûn lé, rayuq yuq, nungmoq lé shut é mara bo é nghut jáng, mara hkyut pyâm byi keq; ²⁶ (Nghut kôlháng, nungmoq mai mara a hkyut pyâm byi é nghut le gi, mauhkung htoq má é nungmoq é İwa le, nungmoq é mara lé hkyut pyâm byi rá a nghut.)" ga tú tai ri.†

Yesuq É Ahko Ahkáng Lé Myi Chyam É Hkyô

Mht 21:23-27; Luk 20:1-8

²⁷ Yhangmoq, Yerusalem wá mó má dum jé mù, Yesuq gi, noqquq yhùm wàng hkaú má sô yong wún é u lé, hkyangjong agyi pé, tará sará pé eq suwún wui gi. Yhâng chyáng lé jé kómù, ²⁸ "Hai ahko ahkáng eq, Nang, shí pé lé kut nyi lhê lhú? Haú su kut rá ahko ahkáng, Nang lé ó yuq byi é lhú?" ga myí akô.

²⁹ Haú jáng, Yesuq gi, "Ngò le, nungmoq lé rajung myí wú kôlé, tú tai wú keq; haú hkûn, hai ahko ahkáng eq, Ngò, shí pé lé é hkyô lé tai kyo rá nghut lhê. ³⁰ Yohan byi é bapisma gi, mauhkung mai lhú? A nghut jáng, byu chyáng mai lhú? Tai wú keq!" ga taú myí kat ri.

³¹ Haú hkûn, yhangmoq chôm hpyê lhum kô é gi, "Mauhkung mai nghut lhê' nghú nga-nhung tai jáng le, 'Haú nghut le nhing, hai mù, yhang lé a lumjng kô é lhú?' ga rá nghut; ³² 'Byu chyáng mai nghut lhê.' nghú jáng le..." gá ri. (Yohan gi, myightoi rayuq gè gè nghut lhê ga, lhunglháng bang lumjng bùm kô é yanmai, yhangmoq gi, haú byu pé lé gyuq bum akô nghut ri.)

³³ Haú mù, yhangmoq gi, Yesuq lé, "Ng-amoq a sé." ga tú tai akô.

Haú hkûn, Yesuq gi, "Haú jáng, Ngò le, hai ahko ahkáng eq shí pé kut é hkyô lé, nungmoq lé a tai kyo." ga, yhangmoq lé tai ri.

† 11:26 Bun zo shí gi, Chyúmlaiká ra-am má za bo lhê. "hkoséng" gá é nghut lhê.

Tsibiyiq Hkyâm Sai Bang Lé Dangtú Yu É Hkyô

Mht 21:33-46; Luk 20:9-19

¹ Hau htang, Yesuq, dangtú dông yhangmoq lé tai é gi, "Byù rayuq gi, tsibiyiq hkyâm rahkyam sai to mù, lhinghkyuq kyâm to luí, tsibiyiq wing pyik htoq rá donghkong dù to mù, machya ralhüm sai tô ri. Hau htang, yhang gi, hkyâm haú lé, hkyâm sai zo bang chyáng ngho byi to mù, gó ming shut e lô byuq bê nghut ri. ² Kyôshu yoq jé jáng, yhang gi, yhang yú âng é tsibiyiq shi é yú rá matú, dui-nhâng zoshâng rayuq lé, hkyâm sai zo bang chyáng nhang kat ri. ³ Nghut kôlháng, haú bang gi, haú yuq lé lhóm chyup bat luí, loq kôm taú nhang kat akô. ⁴ Haú mù, yhang gi, gotú dui-nhâng zoshâng rayuq lé, yhangmoq chyáng dum nhang kat ri; yhangmoq gi, haú yuq lé le, ulhum má lhóm bat cheq byi kôluí, hoq lhoq hpú kat akô nghut ri. ⁵ Hau htang, rayuq lé dum nhang kat jáng, haú yuq lé gi, lhóm sat pyâm akô; Yhang gi, góbang myo myo lé le, yhangmoq chyáng nhang kat ashí nghut ri; yhangmoq kúm gi, ra-am lé lhóm bat, ra-am lé lhóm sat pyâm, kut akô nghut ri.

⁶ Lô htáng má, yhang gi, yhang chyitdap é zo lé nhang kat rá za ru nghut aló; haú mù, yhang gi, 'Ngá zo lé gi, yhangmoq lhóm hkungga kó rá nghut lhê.' ga, yhangzo lé nhang kat ri.

⁷ Nghut kôlháng, haú bang gi, 'Shí yuq gi, silí wunlí sing yú rá sú nghut lhê; lé keq, yhang lé sat pyâm sháng, haú jáng sheq, silí wunlí pé lé nga-nhung wó yú rá nghut lhê.' ga rayuq eq rayuq tai lhum bum akô.

⁸ Haú mù, yhang lé chyup yú luí, sat pyâm mù, hkyâm shinggan shut dù htoq pyâm akô nghut ri.

⁹ Haú jáng, tsibiyiq hkyâm yhumsing gi, yhangmoq lé hkásu kut rá lhú? Yhang gi, é mù, haú hkyâm sai zo bang lé sat pyâm luí, hkyâm haú lé, góbang lé htot ngho byi pyâm rá nghut lhê. ¹⁰ Chyúmdang má, 'Yhùm sai bang eq hkyin htoq pyâm é luqgok gi, htungchyün má é ahkyak dik é luqgok dut bê.

¹¹ Shí hkyô gi, haú Yhumsing kut é nghut luí, nga-nhung é moyoq hí má mauhpo dut bê nghut ri.' ga bô tô é lé, nungmoq a nghap wó kó lhú?†*

gá ri.

¹² Hau htang, yhangmoq gi, dangtú haú, yhangmoq lé lhoq ang luí tai é hkyô lé, sé kô é yanmai, Yhang lé chyup yú rá matú hkyô ho nyi akô. Nghut kôlháng, yhangmoq gi, byù moq mó lé gyuq kô é yanmai, Yhang lé nyhi pyâm to luí, htoq lô byuq bekô nghut ri.

* 12:11 Hkya-on 118:22-23

* 12:12 Kehtaq gá é gi,

Kehtaq Lé Kang Kat Byí É Hkyô**Mht 22:15-22; Luk 20:26*

¹³ Hau htàng má, yhangmoq gi, Yesuq é dang má mara hô luí Yhang lé chyup yú rá matú, Hparishe pé ra-am eq Herut é byu pé ra-am lé, Yesuq chyáng nhang kat akó. ¹⁴ Háu bang gi, Yhâng chyáng lé jé kômù, "Sarà ê, Nàng gi, tengmán sù nghut é lé, ngamoq sê lhê. Nàng gi, ó hái ga rá lé le hái su a ngàm sù nghut é yanmai, ó yuq é myoqdong lé le a tê byí é za, Garai Gasâng é hkyô lé, tengmán é dông mhoqshit é sù nghut ri. Háu mù, Kehtaq lé kang kat byí le gi, ge lhê lúhú? ¹⁵ Ngamoq kat ra rá lúhú? A kat ra rá lúhú?" ga Yhang lé tai akó.

Yesuq kúm gi, yhangmoq, gegùn labyoq kut nyí kô é lé sê mù, "Nungmoq gi, hái mù, Ngo lé lé chyam wú akó lúhú? Denari ngùn rachap yu lé keq, ngò wú wú bá." ga tai kat ri. ¹⁶ Háu hkùn, yhangmoq yu jé lô jáng, Yhang gi, "Shí má, ó yuq é alhó eq masat laiká dap tô ri lúhú?" ga myí ri.

Yhangmoq gi, "Kehtaq é nghut ri." ga tú tai akó.

¹⁷ Háu mù, Yesuq gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasâng lé byi keq." ga tai jáng, yhangmoq gi, máu byuq bùm bekô nghut ri.

*Saduke Pé, Yesuq Lé Myí Chyam É Hkyô**Mht 22:23-33; Luk 20:27-40*

¹⁸ Háu dum dui toq hkyô a joq gâ é Saduke pé gi, Yesuq chyáng lé jé kômù, dangmyí lé myí akó. ¹⁹ Yhangmoq myí kô é gi, "Sarà ê, myiwe wó é byú rayuq gi, zo dù a dap é za shí byuq é nghut jáng, yhanggu gi, yhangmang é awut ashín xoq byi rá matú, yhang rhat lé chui gon ra rá nghut lhê sa, nganhuáng lé, Mosheq kâ tô byí ri. ²⁰ Hí hpyang lé, gumang nhiktàng wù nyhit yuq nyi akó. Lagám yuq gi, myiwe yú luí, zo dù a dap é za shí lô byuq bê nghut ri. ²¹ Lanong yuq gi, yhangmang mó é chui lé gon mù, zo dù a dap é za shí lô byuq bê. Lalaq yuq le, háu eq rajung za dut byuq bê nghut ri. ²² Háu nhiktàng wù nyhit yuq gi, zo dù a dap é chyat shí lô byuq bùm bekô nghut ri. Htàng má, myiwe myí háu le châng shí lô byuq bê nghut ri. ²³ Háu mù luí, háu dum dui toq é buinyí má, myiwe myí háu gi, hká yuq é yhangmyí nghut rá lúhú? Hkâsu mù gâ le, yhang gi, háu nyhit yuq é yhangmyí dut wú bê sù nghut ri." gâ akó.

²⁴ Yesuq gi, yhangmoq lé, "Nungmoq hkyô nghoq é gi, Chyúmdang eq Garai Gasâng é wum-o a-tsam lé, a sé kô é yanmai nghut lhê, a nghut kó lúhú? ²⁵ Háu shí byuq bê bang dum dui toq é hkùn gi, myi byi myi yú hkyô joq lo rá a nghut; yhangmoq gi, mauhkung htoq má é maumang lagyô pé

su dut byuq kó rá nghut lhê. ²⁶ Shi é mai dum lhoq dui toq é hkyô eq séng luí, Mosheq kâ tô é laiká má lháng, háu nyé duq nyi é mhanpúng mai, Garai Gasang gi, yhang lé, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'^a ga kâ tô é lé, nungmoq a nghap wú kó lúhú? ²⁷ Garai Gasang gi, shí bê bâng é Garai Gasang a nghut, dui nyi bâng é Garai Gasang sheq ru nghut lhê. Nungmoq gi, shut dik bekô nghut ri." ga tai ri.

*Ahkyak Dik É Jep É Tarâ**Mht 22:34-40; Luk 10:25-28*

²⁸ Tarâ sará rayuq gi, lé lô mù, yhangmoq taihting lhum nyi kô é lé, lé wó gyô ri. Yhang gi, háu bang lé, Yesuq rago tú tai nyi é lé myàng jáng, Yesuq lé, "Jep é tarâ banshoq má, hká lhum gi, ahkyak dik lhê lúhú?" ga myí ri.

²⁹ Háu jáng, Yesuq gi, "Ahkyak dik é jep é tarâ gi, 'Israellaq byu pé é, gyo wú keq! Nganhuáng é Yhumsing Garai Gasang za, Garai Gasang nghut lhê. ³⁰ Háu Yhumsing náng é Garai Gasang lé, náng é myit nhikhlum banshoq, náng é asak woi-nyí lhum gón, náng myit é hkyô banshoq, náng é wum-o banshoq eq, chyitdap rá lhê.'^a gâ é nghut lhê. ³¹ Hau htang lhum gi, 'Náng gùng lé náng chyitdap é su, náng é chyangnâm má é bang lé le chyitdap aq.'^a gâ é nghut lhê. Shí í lhúm htoq kô é tarâ gotú a joq lo." ga yhangmoq lé tú tai ri.

³² Háu hkùn, tarâ sará háu yuq gi, "Gyo naú bê, Sarà ê! Garai Gasang rayuq za nghut lhê, gotú a nyi lo ga náng tai é gi, têng ri. ³³ Garai Gasang lé, náng é myit nhikhlum banshoq eq le, náng é sê gyo é nyan banshoq eq le, náng é wum-o banshoq eq le, chyitdap rá lhê gâ é eq, náng gùng lé náng chyitdap é su, náng é chyangnâm má é bang lé le chyitdap rá lhê gâ é gi, myi nyhé hkungga eq gotú hkungga pé banshoq htoq má, je ahkyak lhê." ga tai ri.

³⁴ Yesuq gi, yhang hpaqchyí bo é dông tú tai nyi é lé myàng jáng, "Nàng gi, Garai Gasâng é mingdán eq a we lo nghut ri." ga yhang lé tai kat ri. Háu hkùn mai gi, ó yuq le, Yhang lé dangmyí a wám myi lo kó nghut ri.

*Hkrisduq Gi, Ó Yuq É Yhangzo?**Mht 22:41-46; Luk 20:41-44*

³⁵ Yesuq, noqkqu yhùm má mhoqshit nyi é hkùn lé tai é dang gi, "Hái mù, háu tarâ sará pé gi, Hkrisduq lé, Dawiq é yhangzo za nghut lhê gâ akó lúhú? ³⁶ Dawiq gi, Chyoiyung Woi-nyí eq tai nhang é má, 'Háu Yhumsing Garai gi, ngá é Yhumsing lé, 'Ngò, náng é gumlau gye pé lé,

náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga tai ri.³⁶ gâ ri. ³⁷Haù mù, Dawiq yhang lhang, Hkrisduq lé, Yhumsing gâ é nghut le gi, yhangzo za hkâsu ge nghut rá lúh?" gâ ri.

Byù hpûng mó gi, Yhâng é dang lé, gabú myit eq gyô nyi bum akô nghut ri.

³⁸Yesuq gi, mhoqshit uchang tai é má, "Tarâ sará pé lé sidiq nyi keq. Yhangmoq gi, réng é buhng wut chúng mù, sô yông wún lui, gai pé má lhom shi-kyâm yù rá lé le, ³⁹tarajong pé má é ahkyak dik é zung jang pé eq poi pé má é réng é zung jowò pé má myang zung rá lé le, ô nau nyi bum akô. ⁴⁰Yhangmoq gi, chuimó pé é yhûm-yò pé lé hpyoq zo hpyoq shuq kôluí, kyû hng hng dng shit mhaú é bang nghut akô. Haù su é bang gi, dam byi é je riyhang hui zo kó rá nghut lhê." gâ ri.

*Chuimó Myhí Kat É Alu Ngùn
Luk 21:1-4*

⁴¹Yesuq gi, alu sidek nàm má zung to mù, noqkuq yhûm má é alu sidek haù má, byù moq mó ngùn kat nyi é lé wú nyi ri. Sùt wó bang myo myo gi, ngùn ga-myhó myhó kat bum akô. ⁴²Haù hkûn, myung é chuimó myhí rayuq gi, lé mù, gyi htingchap ngùn zo í chap lé kat ri.

⁴³Yesuq gi, Yhâng é chángzô pé lé wut yù mù, "Ngò, nungmoq lé teng za tai kôlé, shí myung é chuimó myhí gi, góbang banshoq htoq má je myo kat bê nghut ri. ⁴⁴Haù góbang banshoq gi, yhumsing agùn agó wó é má é lé, lé kat akô; yhang kúm gi, myùng sù nghut kôlé, yhâng é asak lé baù rá ngùn banshoq lé, kat bê nghut ri." ga tai ri.

13

*Ló Htâng Buinyi Má Dut Lò Rá Hkyô
Mht 24:1-21, 29-35; Luk 21:5-33*

¹Yesuq, noqkuq yhûm mai htoq ló é hkûn, Yhâng é chángzo rayuq gi, "Sarâ ê, wú aq; hkâ-í ko é luqgok pé! Hkâ-í hkié é yhûm pé!" ga Yhang lé tai kat ri.

²Haù hkûn, Yesuq gi, "Nàng, yhûm mó shí pé lé myang lhê a nghut lúh? Luqgok shí pé gi, rachâm htoq racham lhang a kê lhum loshoq, hpyoq hpyi pyâm é hui rá nghut lhê." gâ tú tai ri.

³Yesuq gi, Tsanlung Bùm má, noqkuq yhûm shut hù mù zung tô é hkûn, Petruq, Yakuq, Yohan eq Andre pé gi, Yhâng chyáng lé jé kômù, ⁴"Haù hkyô pé gi, hkâ-nhám dut lò rá lúh? Haù dut lò rá hkûn, hkâsù é kumlhá htoq lò rá nghut lhê lúh? Ngamoq lé tai kyô wú laq." ga Yhang lé baù myi akô nghut ri.

⁵Haù mù, Yesuq gi, yhangmoq lé, "Nungmoq lé, ó yuq èq le a wó shuí ngoq sháng gaq, sidiq nyi keq. ⁶Hkâsu mù gâ le, 'Ngò gi, haù yuq* nghut lhê.' ga, Ngá myíng lé lhang é byù myo myo pò htoq lò mù, byù myo myo lé shuí ngoq kó rá nghut lhê. ⁷Nungmoq gi, majan dut nyi é hkyô eq majan eq sèng é danglám pé lé, wó gyo kôjáng, hkâgyuq dân kó. Haù hkyô pé gi, dut lò rá za nghut lhê; nghut kôlhang, ló htâng é buinyi gi, a nghut shi. ⁸Byù ra-myù eq ra-myù, mingdán ralhum eq ralhum majan zân lhum lò kó rá nghut lhê. Jowò myo myo má, layang nún é, mutmó gyó é pé dut lò rá nghut lhê. Haù pé gi, wuìhke jamjau hkyo é apùn awang za ru nghut ashí.

⁹Nungmoq gùng nungmoq sidiq nyi keq. Hkâsu mù gâ le, yhangmoq gi, nungmoq lé, tarâ rùng pé má é ap pyâm kó rá nghut é htoq agó, tarajong pé má nungmoq lé nhuq bat kó rá nghut lhê. Hau htoq agó, nungmoq gi, Ngá mying é yanmai, mauzau wui eq hkohkam pé é hí má, saksé dng yap ra kó rá nghut lhê. ¹⁰Haù gabú danglù gi, amyù banshoq lé hí hko kyo ra rá nghut lhê. ¹¹Nungmoq gi, chyup yu é hui lui, jep hui é hkûn, hai tai rá lé, hkâ-myt chí kó. Ahkyíng jé jáng, nang lé myit htoq lò nhang é dong za tai aq; hkâsu mù gâ le, dang haù pé gi, nungmoq tai é a nghut, haù Choyoiyung Woi-nyí eq tai nhang é ru nghut lhê.

¹²Nhiktâng gi, nhiktâng yhangchang, íwa gi, yhangzo lé, shí shoq ap pyâm lhum kó rá nghut lhê; zo wui gi, mó wui lé gumlaur toq mù, sat pyâm nhâng kó rá nghut lhê. ¹³Byù lhunglhang bang gi, Ngá é yanmai, nungmoq lé a ngui kut kó rá nghut lhê; nghut kôlhang, jihâm jé shoq wó hkam jân nyi é sù gi, hkyi yu é hui rá nghut lhê.

¹⁴Haù lhoq hten lhoq hpyoq é achay hkyô¹⁵ gi, yhang a nyi àng é jowò má yap tô é lé, nungmoq myang kôjáng (laiká nghap é sù gi, sè gyo sháng gaq), Yuda mau má nyi é bang gi, bùm pé shut hpang doq ló kó sháng gaq. ¹⁵Yhumhkung htoq má nyi tô é sù gi, yhumhkaù má é zè há lé le, a ló gyó wang yù lo sháng gaq. ¹⁶Yò má nyi tô é sù gi, yhâng é buhng lé a ló taù yu nyi lo sháng gaq. ¹⁷Haù buinyi pé má, zogùng dut é myiwe wui eq nau huq ashí nghut é ínu wui gi, hkâ-í yhang wuìhke bekó nghut ri myhi-nhung. ¹⁸Haù hkyô gi, gyoqmyò má a dut sháng gaq, kyúdung nyi keq. ¹⁹Hkâsu mù gâ le, Garai Gasang, mingkan lé hpan tô é hkûn mai ahkuí jé shoq, hkâ-nhám le a dut wú shí é wuìhke jamjau mó gi, haù buinyi pé má dut lò rá nghut lhê; haù su é hkyô gi, htàngnùng má hkâ-nhám le dum dut lò rá a nghut. ²⁰Buinyi haù pé lé, haù Yhumsing Garai mai a lhoq shaú é nghut le gi, ó yuq

* 13:6 Haù yuq gâ é gi, Hkrisduq lé gâ é nghut lhê. ✧ 13:14 Dan 9:27; 11:31; 12:11

le asak wó lut rã a nghut. Nghut kôlhang, Yhang hkyin yù bê nghut é, hkyin yù hui bâng é matú gi, buinyi háu pé lé, Yhang lhoq shaú pyám byi bê nghut ri. ²¹ Háu ahkyíng má, byù rayuq yuq mai, nungmoq lé, 'Wú keg, shí má Hkrisduq nyi ri.' ga le, 'Wú keg, Yhang hê má nyi ri.' ga le, tái jáng, nungmoq hkájíng kó. ²² Hkãsu mù gã le, Hkrisduq apyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lhang, wó lhoq nghoq shoq ga, kumlhá pé eq laklaí kumlhá pé lé kut shit kó rã nghut lhê. ²³ Háu mù, nungmoq sidiq nyi keg; ahkyíng a jé shi mai, ngò, nungmoq lé, jung hkangmó tái kyô nyi gù nghut lhê.

²⁴ Buinyi háu pé má, wuìhke jamjau háu pé lai é htàng, 'Bui gi, noq byuq mù, lhamó gi, a tsô dut byuq rã nghut lhê;

²⁵ kyí pé gi, mauhkúng mai byit gyó lo bùm mù, mauhkúng mã é wum-o a-tsam pé gi, lhoq nhùn é huì bùm kó rã nghut lhê.^{*}

²⁶ Háu hkùn, háu Byu Yhangzo gi, mhut ji mù, hpungwup a-tsam mò eq le, hpungwup shíngkang eq le, gyó lé lo é lé, byu pé byu-myàng kó rã nghut lhê. ²⁷ Hau htàng má, Yhang gi, Yhâng é maumang lagyô pé lé nhang kat mù, maumyí chýùn hkangmó eq myigùng htum shoq, mauhkúng htàng shoq mai, Yhang hkyin yu tò é bang lé shui tsíng yù nhâng rã nghut lhê.

²⁸ Maihpáng gãm lé wú mù, mhoq yù keg; agãm mai a-nyuq nyùn lô mù, ahaq htut lô jáng, bui nyé nám chýàng lò bê lé, nungmoq sê lhê. ²⁹ Háu eq rajung za, shí hkyô pé dut nyi é lé, nungmoq myàng kójáng, Yhang gi, chýáng bê nghut mù, hkúmdong má lhang nghut nyi bê hkyô lé, nungmoq sé lo keg. ³⁰ Ngò, nungmoq lé teng za tái kólé, shí pyat mã é byu pé a ban shi byuq shimá, háu hkyô pé banshoq dut byuq rã nghut lhê. ³¹ Mauhkúng eq myigùng gi, a joq lo dut byuq rã nghut lhê; nghut kôlhang, Ngá é dang gi, ru joq nyi rã nghut lhê.

Háu Buinyi Eq Ahkyíng Lé, Ó Le A Sé
Mht 24:36-44

³² Buinyi eq ahkyíng háu lé gi, ó yuq le a sé; mauhkúng htoq mã é maumang lagyô pé lhang a sé; háu Zo le a sé; háu Iwa za ru sê lhê. ³³ Háu mù, nungmoq gi, ahkyíng háu hkã-nhâm jé rã lé, a sé kó é yanmai, sidiq nyi keg! Machya nyi keg! ³⁴ Háu gi, byù rayuq, yhâng é dui-nhâng zoshâng wui lé, ó le ó eq sêng é mù lé gãm byi to mù, hkum zúng sú lé le, machya nyi rã matú pyíng to lui, yhâng yhùm lé, háu dui-nhâng zoshâng wui chýáng ap pyám to mù, byìn we shut htoq lò byuq é sú eq pung ri.

³⁵ Háu mù, háu Yhumsíng hpó gi, myín-htàng laq, myín gunggãm laq, woqtùn hkun laq, maubó zó laq, hkã-nhâm jé lô rã lé nungmoq a sé kó é yanmai, sidiq machya nyi keg. ³⁶ Háu a nghut jáng, Yhang, dàn loq tung tau jé lo é hkùn, nungmoq yhub myí tò é lé, lo myang pyám rã nghut lhê. ³⁷ Ngò, nungmoq lé, 'sidiq machya nyi keg,' nghú tái é eq rajung za, yuq hkangmó lé le, tái é nghut lhê." ga tái ri.

14

Yesuq, Xú But Byi Huì É Hkyô

Mht 26:1-16; Luk 22:1-6; Yhn 11:45-53; 12:1-8

¹ Ahkuí, háu Lhoqlhai Poí eq múnchi a kat é Muk Zo Poí jé rã í nyi za ru ra aló hkùn, hkyangjong agyi pé eq tará sará pé gi, Yesuq lé hkãsu kut wó haq chypu yù mù, sat pyám rã matú, hkyô ho nyi akó nghut ri. ² Nghut kôlhang, yhangmoq gi, "Byu pé gabyông lô kó abe, poí gyoro má gi, a kut shi sháng." ga tái akó.

³ Yesuq gi, Behtani wá má nyi é manggãm dap wú sú Simùn é yhùm, siboi má nghe zung tò é hkùn, myiwe myí rayuq gi, nardu amyit mai za sai yu é, gyai hpaú é namngón xú bo é alabasta (luq hpyú) bông yu lé lô mù, bông háu lé lhang hkyui lui, namngón xú háu lé Yesuq é ulhum má hut gyun byi ri.

⁴ Háu má nyi tò é bang ra-am gi, wú nhik-yô é myit eq, rayuq eq rayuq tái lhum kó é gi, "Hái mù, namngón xú lé aha agó kut pyám lhê laq? ⁵ Háu namngón xú lé, denari* súm sho eq ung lui, myùng bang lé byi le ge lhê mhai!" gã akó. Yhangmoq gi, myiwe myí hau lé le, gyai chòm tân akó.

⁶ Nghut kôlhang, Yesuq gi, yhangmoq lé, "Myiwe zo háu lé, hkâtân nyi kó; hái mù, yhang lé i-myit lhoq myo nhang nyi akó lú? Yhang gi, Ngá é ahtoq má ge é hkyô kut bê nghut ri. ⁷ Háu myùng bang gi, nungmoq eq rahá hkã-nhâm le nyi rã nghut lhê mù, nungmoq garúm nau é hkùn, yhangmoq lé wó garúm lhê. Nghut kôlhang, ngò gi, shí má nungmoq eq rahá ayang nyi nyi rã sú a nghut. ⁸ Yhang gi, yhang wó dut é í kut bê nghut ri. Yhang, Ngá gũng má, namngón xú hut gyùn é gi, Ngá gũng lé yhum rã matú, hí hen lajáng tò é ru nghut lhê. ⁹ Ngò, nungmoq lé teng za tái kólé, háu gabú danglú lé mingkan gón hko kyô é jowó hkangmó má, yhang lé myit bùn é dòng, yhang kut é hkyô shí lé, tái kyo bekó rã nghut lhê." ga tái kyo ri.

¹⁰ Hau htàng, háu chángzo raxe í yuq má bo é Yudaq Iskarut gi, Yesuq lé ap pyám rã ga, hkyangjong agyi pé chýáng e ri. ¹¹ Háu bang gi, háu hkyô lé lhom wó gyo kójáng,

* 13:25 Esai 13:10; 34:4

* 14:5 Denari rachap gi, byù rayuq é ra-nyi lhê é zuihpau eq wui ri.

gyô gabû luí, yhang lé ngùn byi râ ga, dang-gidyô byí akò. Haù mù, yhang gi, Yesuq lé ap pyám râ hkyô ho nyi bê nghut ri.

Yhumsing É Myinzang

Mht 26:17-30; Luk 22:7-23; Yhn 13:21-30

¹² Haù htùngli joq é eq rajung za, Lhoqlhai Poi hkungga sauzo jaú byí é, múnchi a kat é Muk Zo Poi sâng-hi nyi má, Yesuq é chángzô pé gi, Yesuq lé, "Nàng zo râ Lhoqlhai Poi lé, ngamoq hkâmá é món to râ lúh?" ga myí akò.

¹³ Haù mù, Yhang gi, chángzo í yuq lé, "Nungnhik, myuq hkaú shut wang lô keq, wui yambú waq é byú rayuq lhom lui râ nghut lhê; haú hkûn, nungnhik gi, yhang htâng cháng keq. ¹⁴ Haú yuq, wang lô é yhùm má é yhumsing lé, 'Ngò, Ngá é chángzô pé eq rahá, Lhoqlhai Poi lé zo râ bíng wap hkâmá nghut lhê lúh ga, Sará myí nhang kat ri.' nghú tai keq. ¹⁵ Haú hkûn, hen to gú nghut é, ahtoq má é wap mó lé lhom tún shít râ nghut lhê. Wap haú má, nga-nhùng é matú é hen to keq." ga tai luí, nhang kat ri.

¹⁶ Chángzo haú nhik gi, htoq é lô mù, myuq hkaú má wang e lô le, Yesuq tai kat é eq roq za é myáng kômù luí, Lhoqlhai Poi lé, món to bekò nghut ri.

¹⁷ Myinhântang jé lô jáng, Yesuq gi, haú chángzo raxe í yuq eq rahá, haú má lé jé bekò nghut ri. ¹⁸ Yhangmoq gi, siboí má nghê mù, zô nyi bùm kô é u lé, Yesuq gi, "Ngò, nungmoq lé teng za tai kôlé, Ngò eq rahá zô nyi é bang nungmoq má é rayuq sù gi, Ngo lé ap pyám râ nghut lhê." ga tai ri.

¹⁹ Haú hkûn, yhangmoq gi, gyô yón kômù, rayuq htâng rayuq, "Ngò, a nghut hkaí?" ga Yhang lé myí akò.

²⁰ Haú hkûn, Yhang gi, "Haú yuq gi, haú raxe í yuq má é rayuq nghut lhê. Ngò eq rahá, hkoq shí má muk jùmzo sù nghut lhê.

²¹ Haú Byu Yhangzo gi, Yhang eq séng luí ká tô é eq rajung za, shí râ za nghut lhê. Nghut kôlhang, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lhang, je ge ri.

²² Yhangmoq zo nyi kô é u lé, Yesuq gi, muk lé yù mù, jeju hkya-on luí, muk lé myhik hpé mù, "Shí gi, Ngá é gungsho nghut lhê; yù mù zo keq." ga tai uchyang, Yhâng é chángzô pé lé gam byí ri.

²³ Hau htâng, Yhang gi, góm lé le, yù mù, jeju hkya-on luí, yhangmoq lé byí ri; yhangmoq banshoq bang gi, haú lé yù shuq akò nghut ri.

²⁴ Yesuq gi, yhangmoq lé, "Shí gi, byù myo myô é matú htoq pyám é, dangshikaq eq séng é Ngá sui nghut lhê. ²⁵ Ngò, nungmoq lé teng za tai kôlé, Ngò, Garai Gasâng é mingdán má, tsibiyiq wing asik lé shuq é

buinyi a jé jé, tsibiyiq wing lé dum shuq râ a nghut lo." ga tai ri.

²⁶ Yhangmoq gi, hkya-on mahkôn ralhun ban hkôn jáng, Tsanlun Bùm shut htoq e lô bekò nghut ri.

Petruq He-ngik Râ Hkyô Lé, Te Tai É Hkyô

Mht 26:31-35; Luk 22:31-34; Yhn 13:36-38

²⁷ Yesuq gi, yhangmoq lé, "Nungmoq lunglhâng bang gi, myit lingbat kó râ nghut lhê; hkâsu mù gá le,

'Haù sau zúng sù lé, Ngò bat sat pyám mù, sau pé gi, lhoq pyo pyám é hui kó râ nghut lhê."[†]

ga kâ tô ri. ²⁸ Nghut kôlhang, Ngò gi, lhoq dui toq é hui htâng má, Galile mau shut, nungmoq é hí má é lô láng râ nghut lhê." ga tai ri.

²⁹ Haú hkûn, Petruq gi, "Góbang banshoq myit lingbat kôlhang, ngò gi, myit lingbat râ a nghut." ga tai kat ri.

³⁰ Haú mù, Yesuq gi, "Ngò, nàng lé teng za tai lé, hkû-nyí, hkû-myín yhang jáng, woq í dâm a tún shímá, nàng, Ngo lé sum dâm he-ngik pyám râ nghut lhê." ga tú tai ri.

³¹ Nghut kôlhang, Petruq gi, "Ngò, Nàng eq rahá shí râ dut kôlhang, Nang lé ngò he-ngik pyám râ a nghut." ga zuq zuq tai ri. Góbang banshoq le, haú su ga châng tai bum akò nghut ri.

Get-samane Gá é Jowò Má Kyúdùng É Hkyô

Mht 26:36-46; Luk 22:39-46

³² Yhangmoq gi, Get-samane gá é jowò má jé lô kômù, Yesuq gi, Yhâng é chángzô pé lé, "Ngò, kyú é dúng nyi é u lé, shí má zúng láng keq." ga tai ri. ³³ Yesuq gi, Yhang eq rahá Petruq, Yakuq, Yohan pé lé, shuí chùng ri.

Haú hkûn, Yhang gi, myit gyai a ngón é eq myit wuihke é hui mù, ³⁴ yhangmoq lé, "Ngò gi, shí râ í yhang myit yón nyi ri; nungmoq gi, machyá luí, shí má láng nyi keq." ga tai ri.

³⁵ Yesuq gi, haú mai ratsuí zo sô é mù, myigùng má gop byên to luí, ahkyíng haú lé ge lhoq lhai pyám byi le gi, Yhâng chyáng mai lhoq lhai pyám byi râ matú, ³⁶ "Aba,† Áwa é, Nàng gi, hai le wó dut é Sù nghut lhê. Góm† shí lé, Ngá chyáng mai yu pyám byi laq.

Nghut kôlhang, Ngò ô nau é dông a nghut, Nàng ô nau é dông sheq nghut sháng gaq." ga kyúdùng ri.

³⁷ Hau htâng, Yhang gi, Yhâng é chángzô pé chyáng dum taú lo le, yhangmoq yhup myhí to kô é lé lo myang ri. Haú mù, Yhang gi, Petruq lé, "Simun, nàng yhup ngón nyi lhê lúh? Razup za lhang a wó machya nyi lúh?

☆ 14:27 Zhk 13:7 † 14:36 Aba gá é gi, Aramaik dang dông "Áwa" gá é lichyúm nghut lhê. ‡ 14:36 Góm gá é gi, Yesuq, jamjau hui râ hkyô eq shí râ hkyô lé, tai nau é nghut lhê.

³⁸ Gunglaú é a hui sháng gaq, machyâ luí, kyúndung nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

³⁹ Yesuq gi, radàm dum é mù, hí lé dúng é dang lé za, é dung ri. ⁴⁰ Yhang dum taú lo le, yhangmoq gi, myoqkuq lai kô é yanmai, yhup myhí to láng kô é lé, lo dum myang ri. Yhangmoq gi, Yhang lé hai taí rã a sé dut byuq akò nghut ri.

⁴¹ Yesuq gi, sum dãm nghú rã lhang má, yhangmoq chyáng dum taú jé lô mù, yhangmoq lé, "Nungmoq gi, ahkuí jé shoq yhup ngón nyi ashí kó lú? Gé bê! Haú ahkying gi, jé bê nghut lui, haú Byu Yhangzo gi, yubak dap bãng é loq má ap pyâm é hui rã nghut bê. ⁴² Toq keq! Lô loşhàng hkoi! Ngo lé ap pyâm rã sù gi, jé lô bê nghut ri." ga taí ri.

Yesuq, Chyup Yú Hui É Hkyô

Mht 26:47-56; Luk 22:47-53; Yhn 18:3-12

⁴³ Yesuq, dãng nyo nyi ashí u lé, haú chángzo raxe í yuq má bo é Yudaq gi, haú hkyangjong agyi pé, tarã sarã pé eq suwún wui chyáng mai nhang kat é bang nghut é, shãm eq dumbãng pé chung tô é byu moq mó eq rahá jé lé lo ri.

⁴⁴ Yesuq lé ap pyâm rã sù gi, yhangmoq lé, "Ngò bopuq puq é sù gi, haú yuq nghut bê; Yhang lé chyup yú mù, zúng shuí lô keq." ga kumlhá byi to bê nghut ri. ⁴⁵ Yudaq gi, Yesuq chyáng hkyè za é mù, "Rabai ê." ga taí lui, Yhang lé bopuq puq byi ri. ⁴⁶ Haú hkún, yhangmoq gi, Yesuq lé chôm zui zing mù, chyup yú bekò nghut ri. ⁴⁷ Haú mù, nãm má yap tô é byu rayuq gi, yhang é shãm lé she htoq yú mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

⁴⁸ Yesuq gi, yhangmoq lé, "Nungmoq gi, damyaq rayuq lé chyup é su, Ngo lé chyup rã matú, shãm eq dumbãng pé chung mù, lé lo akò lú? ⁴⁹ Ngò gi, nyi wui, nungmoq eq rahá nyi lui, noqkuq yhum má mhoqshit byi nyi kôlhang, nungmoq, Ngo lé a chyup yú kô é nghut lhê. Nghut kôlhang, Chyúmdang pé gi, dik ra rã nghut lhê." ga taí ri. ⁵⁰ Haú hkún, haú chángzô pé gi, Yesuq lé tô pyâm to kôlui, hpang byo byuq bekò nghut ri.

⁵¹ Buhing za wut é zorãm rayuq gi, Yesuq htâng cháng wún ri. Yhangmoq gi, haú yuq lé, wó kyaq zui kô é hkún, ⁵² yhang gi, buhing lé hkyut hkyô pyâm to mù, gungchín hpang lô byuq bê nghut ri.

Yudaq Byin Tú Wapdoq Má Jéyáng Hui É Hkyô

Mht 26:57-68; Luk 22:54-55, 63-71; Yhn 18:13-14, 19-24

⁵³ Yhangmoq gi, Yesuq lé, hkyangjong mó chyáng shuí e akò; haú hkyangjong agyi pé lhunglhang bang, suwún wui eq tarã sarã pé le, lé zup zing bum akò. ⁵⁴ Petruq gi, hkyangjong mó é yhumwàng hkaú má châng jé wàng shoq, we we mai Yesuq htâng châng tô ri. Yhang gi, haú má, zúng bang eq rahá, myihkyóm yâm má gyoq gang zung tô ri.

⁵⁵ Haú hkyangjong agyi pé eq Yudaq byin tú wapdoq gón gi, Yesuq lé sat rã saksé hó kôlhang, hai le a myàng kó nghut ri. ⁵⁶ Byu myo myo gi, a têng é saksé hkám kôlhang, yhangmoq é dang gi, a tsung lhum kó nghut ri.

⁵⁷ Hau htâng, ra-am gi, toq yap mù, a têng é saksé hkám kô é gi, ⁵⁸ "Yhang gi, 'Byu loq èq sai é noqkuq yhum shí lé, Ngò hpyoq hpyi pyâm mù, sum nyi goro má, byu loq èq a sai é, gotú ralhum dum sai rã nghut lhê.' ga taí é lé, ngamoq wó gyô ri." ga akò. ⁵⁹ Nghut kôlhang, yhangmoq é saksé gi, a tsung lhum kó nghut ri.

⁶⁰ Hau htâng má, hkyangjong mó gi, yhangmoq é hí má toq yap mù, "Nàng, hai le a tú taí luq? Shí bang, Nàng lé mara hun nyi é saksé gi, hká dòng nghut lhê lú?" ga lui, Yesuq lé myi ri. ⁶¹ Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yesuq lé, "Nàng gi, hkungsó wó Su é yhangzo, Hkrisduq nghut lhê lú?" ga dum myi ri.

⁶² Haú hkún, Yesuq gi, "Nghut lhê; haú ngò Byu Yhangzo gi, a-tsam bo dik Su é loqyo hkyam^s má zung tô é lé le, mhuthtui jì mù, mauhkung mai lé lo é* lé le, nungmoq myàng kó rã nghut lhê." ga taí ri.

⁶³ Haú hkún, hkyangjong mó gi, yhang é bu lé llang cheq pyâm mù, "Nga-nhung, hai saksé rã ashí lú? ⁶⁴ Yhang, Garai Gasang lé rhoi dang taí é lé nungmoq wó gyo bê nghut lhê. Nungmoq hkâsú wó myit akò lú?" ga myi ri; yhangmoq banshoq bang gi, shí gíng sù nghut ri ga, chôm myit hui akò. ⁶⁵ Haú mù, ra-am gi, Yhang lé sôkan byé gyun é eq, myoq má nghop pyâm byi lui, loqsup èq htui byi lhê kut mù, "Nang lé ó yuq htui é, myightoi htoi wú aq." ga taí akò. Haú zung bang gi, Yhang lé shuí yú mù, nhuq bat akò nghut ri.

Yesuq Lé, Petruq He-ngik Pyâm É Hkyô
Mht 26:69-75; Luk 22:56-62; Yhn 18:1-18, 25-27

⁶⁶ Petruq gi, wàng hkaú má nyi tô é u lé, haú hkyangjong mó é dui-nhâng zoshang myhi rayuq jé lé lo ri. ⁶⁷ Haú yuq gi, Petruq gyoq gang nyi é lé myàng jáng, yhang lé rago

§ 14:62 Loqyò hkyam gã é gi, ahko ahkáng wó é jowé lé gã é nghut lhê.

é gã é gi, Danielaq 7:14 má bò lhê.

* 14:62 Mhuthtui jì mù, mauhkung mai lé lo

wú mù, "Nàng le, Nazaret wà byù Yesuq eq rahá nyi sú nghut ri." ga tai ri.

⁶⁸ Nghut kôlhang, yhang gi, "Nàng tai é hkyô lé, ngò, sé le a sé, gyo le a sé gyo." ga he pyám lui, wâng hkúmdong shut htoq e ló bê nghut ri.†

⁶⁹ Dui-nhâng zoshâng myhí haú gi, Petruq lé, haú má dum myàng jáng, awui ayàm má yap tô é bang lé, "Shí yuq le, haú hpúng má lom é sú rayuq nghut ri." ga dum tai ri.

⁷⁰ Petruq gi, radàm dum he pyám ri; hau htàng razup zo má, haú nàm má yap tô é bang gi, Petruq lé, "Nàng gi, Galile byù rayuq nghut é yanmai, haú hpúng má é byù rayuq hkyak nghut lhê." ga tai akò.

⁷¹ Haú hkûn, yhang gi, yhânggùng yhang nhing lui, "Haú nungmoq tai é byù lé, ngò a sé." ga dakam ri.

⁷² Haú u yhang, woq radàm dum tun kat bê nghut ri. Haú mù, Petruq gi, "Woq í dâm a tún shimá, nàng, Ngo lé sum dâm he-ngik pyám rà nghut lhê." ga, Yesuq, yhang lé tai é dang lé, myit bún kat mù, wum kat ngau ri.

15

Pilat Hí Má Yesuq Jé Nyi É Hkyô

Mht 27:1-2, 11-26; Luk 23:1-5, 13-25; Yhn 18:28-19:16

¹ Haú napkyó noq za má, hkyangjong agyi pé gi, suwún wui, tará sará pé, Yudaq byin tú wapdoq gón bang eq rahá kut, chòm bông yú kômù, Yesuq lé tuí yú lui, shui htoq é kômù, mauzau Pilat chyáng é ap byi akò nghut ri.

² Pilat gi, Yesuq lé, "Nàng gi, Yudaq byu pé é hkohkâm nghut lhê lúhú?" ga myi jáng, Yesuq gi, "Nàng tai é eq rajung za nghut lhê." ga, tú tai ri.

³ Haú hkyangjong agyi pé gi, Yhang lé mara gyai myo shoq chòm hun akò. ⁴ Haú mù, Pilat gi, Yesuq lé, "Wú aq, yhangmoq, nàng lé mara haú myhó hun nyi le, nàng, haí le a tú tai lúhú?" ga myi ri.

⁵ Nghut kôlhang, Yesuq gi, haí le a tú tai kut jáng, Pilat gi, maú byuq bê nghut ri.

⁶ Haú Lhoqlhai Poí u lé, mingbyù wui dúng é htóng byù rayuq yuq lé, mauzau mai lhaq lhoq htoq byi byi kut é htúng joq ri. ⁷ Haú hkûn, Barabaq gá é byù rayuq gi, gumlau gabyông é hkûn, byù sat é gumlau bang eq rahá, htóng gyó tó ri. ⁸ Byù hpúng mó gi, doq lé lô mù, mauzau Pilat lé, yhang lhaq kut é eq rajung za, yhangmoq lé kut byi rà matú, dúng akò.

⁹ Haú mù, yhang gi, "Yudaq byu pé é hkohkâm lé nhang htoq kat byi rà lé, nungmoq ô nau akò lúhú?" ga myi ri. ¹⁰ Pilat, haú su ga myi é gi, haú hkyangjong agyi pé, Yesuq lé manôn kôluí, yhang chyáng lé ap byi kô é hkyô lé sé é yanmai nghut ri. ¹¹ Nghut

kôlhang, haú hkyangjong agyi pé gi, Barabaq lé sheq nhâng byi rà matú, Pilat chyáng dúng kô sháng gaq ga, haú byù moq mó lé i-myt lhoq toq byi akò.

¹² Pilat gi, "Haú jáng, nungmoq mai Yudaq byu pé é hkohkâm ga sú yuq lé, ngò hkásu kut rà lúhú?" ga yhangmoq lé myi ri.

¹³ Haú hkûn, yhangmoq gi, "Yhang lé tapzìng má jén sat pyám aq." ga chòm garu akò.

¹⁴ Haú jáng, Pilat gi, "Haí mù lui lúhú? Yhang haí kut shut bê lúhú?" ga dum myi jáng, yhangmoq gi, hté mó éq, "Yhang lé tapzìng má jén sat pyám aq." ga je riyhang garú lo bum akò nghut ri.

¹⁵ Pilat gi, haú byù moq mó lé nhik dik nhâng nau é yanmai, Barabaq lé gi, nhang kat byi mù, Yesuq lé gi, nhuq bat nhâng mù, tapzìng má jén sat pyám rà matú, ap byi kat bê nghut ri.

Gyezô Pé Gi, Yesuq Lé Rhoi É Hkyô

Mht 27:27-30; Yhn 19:2-3

¹⁶ Gyezô pé gi, Yesuq lé, Pretori yhumwàng (mauzau hpò é yhumwàng) mó hkaú má shui wang ló kômù, gyedap gón lé ji tsing yu akò. ¹⁷ Hau htàng, yhangmoq gi, Yesuq lé buhìng nè radung hut byi mù, zujanmaú sai yú kôluí, Yhâng é ulhum má tsung byi akò. ¹⁸ Hau htàng, yhangmoq gi, "Yudaq byu pé é hkohkâm hpò é! Chyung hìng xê hìng nyi sháng gaq ô!" ga wut garú akò. ¹⁹ Hau htoq agó, yhangmoq gi, Yhâng é ulhum má dumbáng éq adam dàm bat kômù, sòkan byé gyun lui, Yhâng hí má hkyihput htuq mù, paí mhaú akò nghut ri. ²⁰ Yhangmoq gi, Yhang lé rhoi jihkyoí ban kut yú kôjáng, Yhang wut tô é buhìng nè lé hkyut yú kômù, Yhâng é mebu lé dum hut byi lui, tapzìng má jén sat pyám rà matú, Yhang lé shui htoq e ló bekò nghut ri.

Yesuq Lé Jén Pyám É Hkyô

Mht 27:31-44; Luk 23:27-43; Yhn 19:17-27

²¹ Alesander eq Ruhpu nhiktang é yhângwa, Kuruni myuq byù nghut é Simun ga sú gi, yosò wà mai lô mù, haú jowò mai laí lô ri. Haú hkûn, gyezô pé gi, yhang lé, tapzìng waq nhang akò nghut ri. ²² Yhangmoq gi, Yesuq lé, Golgahta gá é jowò má shui e akò (Golgahta gá é gi, ugyap joq é jowò lé gá é nghut ri). ²³ Hau htàng, yhangmoq gi, Yhang lé, mura* eq nyhò tô é tsibiyiq wing huq akò; nghut kôlhang, Yhang gi, a lhom shuq byi nghut ri. ²⁴ Hau htàng má, yhangmoq gi, Yhang lé tapzìng má jén tap to kôluí, Yhâng é mebu pé lé, hkyin shosé shê mù, âng é dông gam yu pyám byi akò nghut ri.

† 14:68 Chyúmding ra-am má Haú hkûn jáng, woq tún bê nghut ri gá é le bo ri.

* 15:23 Mura gi, chí wò kut jung xú

nglut lhê.

²⁵ Yhangmoq, Yesuq lé tapzîng má jén tap pyâm é hkûn gi, napkyô gau hkyîng nghut bê nghut ri. ²⁶ Hau htoq agó, Yhang lé mara hun é dông kê tap to kô é gi, "YUDAQ BYU PÊ É HKOHKÂM" gâ ri. ²⁷ Yhangmoq gi, damyaq í yuq lé le, Yhâng é loqyo hkyam shut rayuq, loqpaí hkyam shut rayuq kut, tapzîng htoq má jén tap tô akô nghut ri. ²⁸ (Hau gi, "Yhang gi, yubak dap bâng chyâp nghap lhôm é hui bê nghut ri."*) gâ é Chyúmdang lé lhoq dik é nghut ri.)† ²⁹ Hkyô sô lai lô é bang gi, nyhap é dông u-ngut nut mù, tai kô é gi, "Noqkuq yhûm lé hpyoq pyâm lui, sum nyi gyoro má dum wô sai lhê ga Sù ê! ³⁰ Náng gûng náng hkyi yù lui, tapzîng mai gyô lò wú aq mhai!" ga akô nghut ri.

³¹ Hau eq rajung za, hkyangjong agyi pé eq tarâ sarâ pé le, yhangmoq hkaú má, "Shí yuq gi, góbang lé hkyi yù sù nghut kôlhâng, Yhânggûng yhang gi, a wô hkyi yù nghut ri myhi-nhung! ³² Nga-nhúng wô myâng mù, lumjîng rá matú, shí, Israelaq byu pé é hkokhâm, Hkrisduq gi, tapzîng mai gyô lo wú sháng gaq." ga, Yhang lé rhoi dang tai akô. Yhang eq rahá tapzîng má jén tap to huí é su nhik le, Yhang lé rhoi dang tai akô nghut ri.

Yesuq, Shi É Hkyô

Mht 27:45-56; Luk 23:44-49; Yhn 19:28-

30

³³ Nyi-káng raxe í hkyîng mai myinhâng sum hkyîng jé shoq, ramau gón mauchut tuq dut byuq bê nghut ri. ³⁴ Myinhâng sum hkyîng jé é hkûn, Yesuq gi, "Eloi, Eloi, lama sabakhtani."* ga, htê mó èq garú kat ri. Hau é lichyúm gi, "Ngá Garai é, Ngá Garai é, Náng, hai mù, Ngo lé tô pyâm tô lhê thú?" gâ é nghut ri.

³⁵ Hau nâm má yap tô é bang ra-am gi, hau lé wó gyo kôjáng, "Gyô wú keq. Yhang gi, myiqhtoi Eliyaq lé wut nyi ri." ga, tai akô.

³⁶ Hau hkûn, byù rayuq gi, ðin é lô mù, wuimaú lé tsibiyiq wing chyin má jum yù lui, jâm-yang má tuí tap mù, Yesuq shuq sháng ga yhun byi lui, "Eliyaq gi, lé lô mù, Yhang lé lé lhoq hkyô yù abe, nga-nhúng chôm láng wú sháng." ga tai ri.

³⁷ Yesuq gi, htê mó èq garú kat lui, kâng byit byuq bê nghut ri.

³⁸ Noqkuq yhûm má é pán-gyang gi, ahtoq mai a-ô í hkyam byáng dut byuq bê nghut ri. ³⁹ Yesuq é hí má yap tô é shó up gyezau hpó gi, Yesuq é garu htê lé wó gyo mù, Yhang hkásu kut shí é lé myàng jáng, "Shí yuq gi, gè gè yhang, Garai Gasâng é Yhangzo nghut ri-nhung!" ga tai ri.

⁴⁰ Myiwe wui ra-am gi, we we mai wú nyi bum akô. Hau bang má, Magadalaq wà má é

Mariq, Yakuq tiq sù yuq eq Yose nhiktang é yhângnu Mariq eq Salome pé le bo akô nghut ri. ⁴¹ Hau bang sum yuq gi, Galile mau má, Yesuq htâng cháng mù, Yhâng rá é hkyô pé lé châng kut byi é bang nghut akô. Yesuq eq rahá, Yerusalem wà mó má doq lé lo é myiwe wui, góbang myo myo le hau má nyi tô bum akô nghut ri.

Yesuq Lé, Myhup Pyâm É Hkyô

Mht 27:57-61; Luk 23:50-56; Yhn 19:38-

42

⁴² Hau nyi gi, Hên Lajang Buinyi (Bánno buinyi é hí nyi) nghut ri. Hau mù, myinhâng jé lô jáng, ⁴³ Yudaq uphkâng hpung má bo é, aróng wó é, Garai Gasâng é mingdán lé láng nyi é sù, Aramahti wà byù Yosep gi, myit wum lhoq kîng yù mù, Pilat chyáng wàng lui, Yesuq é gungsôm lé é ðung ri. ⁴⁴ Pilat gi, Yesuq shi bê gâ é hkyô lé wó gyo jáng, mau byuq ri; hau mù, yhang gi, shô up gyezau lé wut yù mù, Yesuq shi teng bê thú ga myi ri. ⁴⁵ Shí teng bê hkyô lé, shô up gyezau chyáng mai wô sê yù jáng, Pilat gi, Yesuq é gungsôm lé yù rá ahkáng, Yosep lé byi kat ri. ⁴⁶ Hau mù, Yosep gi, pán yung lé wui yù lui, gungsôm lé yu hkyô mù, htup yup lui, luqgok lé kyung tô é lup hkaú má é kat tô ri. Hau htâng, yhang gi, luphkum má, luqlông èq lhêng chí pyâm tô ri. ⁴⁷ Magadalaq wà má é Mariq eq Yose é yhângnu Mariq gi, Yesuq lé, hkâmá lhezq tô é lé, é myang akô nghut ri.

16

Dum Dui Toq Lo É Hkyô

Mht 28:1-8; Luk 24:1-12; Yhn 20:1-10

¹ Bánno buinyi lai jáng, Magadalaq wà má é Mariq, Yakuq é yhângnu Mariq eq Salome pé gi, Yesuq é gung má, é but byi rá matú namngón jung é wui akô. ² Bánno buinyi htang napkyô bui htoq lo é hkûn yhang, yhangmoq gi, lup shut e lô akô. ³ Yhangmoq gi, "Luphkum má é luqgok lé, ó yuq chyün lhêng pyâm byi rá thú?" ga, rayuq eq rayuq tai lhum akô.

⁴ Nghut kôlhâng, yhangmoq tu wú kat kô é hkûn, luqlong hau gi, lhoq lhêng to láng é lé, myàng akô nghut ri; luqlong hau gi, gyai kô é nghut lhê. ⁵ Yhangmoq gi, lup hkaú má wang é kô é hkûn, hpyu é buhîng wut é zorâm rayuq, loqyo hkyam má zung tô é lé, myàng kôjáng, gyuq dan bum akô.

⁶ Hau hkûn, hau yuq gi, "Hkâgyuq ðan kó! Nungmoq gi, hau tapzîng má jén sat huí é, Nazaret wà byù Yesuq lé ho akô, a nghut thú? Yhang ðui toq lô bê! Yhang gi, shí má a nyi lo. Yhang lé, lhezq tô é jowô lé wú wú keq. ⁷ Ahkuí, nungmoq gi, lô mù, Yesuq gi, nungmoq hí má, Galile mau shut so láng rá

* 15:28 Esai 53:12

†

15:28 Bun zo shí gi, chyúmding axau ra-am pé má za bo é nghut lhê.

* 15:34 Hkyá-on 22:1

nghut lhê. Nungmoq lé, Yhang tái tô é eq rajung za, nungmoq gi, Yhang lé hau má ló myâng kó rá nggut lhê.' ngñu, Yhâng é chángzô pé eq Petruq lé ló tái kyo keq." ga lhom tái kat ri.

⁸ Hau mù, miywe myhí hau bang gi, byòdàn gyuq nán é eq, lup mai hpang htoq ló akò; yhangmoq gi, lúm gyuq byuq kô é yanmai, ó yuq lé lé, hái le a tái kó nggut ri. (Bun zo 9 mai 20 jé shoq gi, chyúmding axau ra-am pé má a bo é nggut lhê.)

Yesuq Htoq Shit É Hkyô

Mht 28:9-10, 16-20; Luk 24:13-53; Yhn 20:11-23; Lagyo 1:6-11

⁹ Yesuq gi, Bánno buinyi htang napsùn lé, Yhang dui toq é htâng, Yhang mai nat gang nyhit du hkat htoq pyám byi bê sù, Magadalaq wà mã é Mariq lé hí htoq shit ri. ¹⁰ Mariq hau gi, ló mù, hau Yesuq eq nyi lai lò bê bang, yón ngau nyi kô é hkùn, hau hkyô lé ló tái kyô ri. ¹¹ Yhangmoq gi, Yesuq dum dui bê gâ é hkyô lé le, Yhang lé, Mariq myang é gâ é hkyô lé le, wó gyo kôlháng, a jing kó nggut ri.

¹² Hau htâng má, Yesuq gi, yosò wà shut htoq e ló nyi é chángzô í yuq lé, gotù gungghyâng dong htoq shit ri. ¹³ Hau nhik gi, taù lò mù, gotù chángzô pé lé hau hkyô lò shit kyo akò; nggut kôlháng, yhangmoq gi, hau lé le a jing byi kó nggut ri.

¹⁴ Hau htâng má, Yesuq gi, hau chángzô raxe rayuq baù za zang zô nyi kô é hkùn, yhangmoq chyáng lé htoq shit ri. Yhangmoq chyáng lumjing myit a bò kô é yanmai le, Yhang dui toq é htâng má, Yhang lé myang é bang tái kyo kô é dang lé, a jing é za myit htan to kô é yanmai le, Yhang gi, yhangmoq lé tân ri.

¹⁵ Hau htoq agó, Yesuq gi, yhangmoq lé, "Mingkan jam shoq htoq é mù, waxâng zo wui lhunglhang lé, hau gabú danglù hko kyo keq. ¹⁶ Lumjing mù, wui-myhup hkâm yu é sù ó yuq nggut kôle, hkyi yu é hui rá nggut lhê. Nggut kôlháng, a lumjing é sù ó yuq nggut kôle, mara byi é hui rá nggut lhê.

¹⁷ Lumjing é bang wó kut shit rá kumlhá pé gi, Ngá é mying lé lang lui, nat gâng pé lé wó hkat htoq kó rá eq laklai é mying pé lé dat nyò kó rá nggut lhê; ¹⁸ yhangmoq gi, lhangmui pé lé le, wó kui zui kó rá nggut lhê; muí shi jung duq lé, shuq kôlháng, hái dut kó rá a nggut. Nò bâng é htoq má, yhangmoq é loq ke byi jáng, nò bang ge byuq kó rá nggut lhê." ga tái ri.

¹⁹ Hau Yhumsing Yesuq gi, yhangmoq lé dang ban tái é htâng má, mauhkung shut shuí toq yu é hui lui, Garai Gasâng é loqyo hkyam má zung to bê nggut ri. ²⁰ Hau htâng, hau chángzô pé gi, htoq é mù, jowò hkangmó má mungdang é hko kyô akò nggut ri; hau Yhumsing gi, yhangmoq eq

rahá nggut nyi mù lui, Yhâng é mungdang têng é hkyô lé tún shit rá matù, yhangmoq lé, kumlhá pé wó kut é a-sam byi é nggut ri. Amen.

LUKAQ é Gabú Danglù Laiká (The Gospel of Luke)

¹ Aróng wó dik é sù Htohpilúq è, namoq chyáng dut lai lò bê hkyô pé lé, sâng-hi mai yhumsing myoq èq yhang, myang é bang eq, mungdang wùn waq é bang mai shap kyô gyó lô mù luí, ² byù myo myo gi, shikut luí ká to bekô nghut ri. ³⁻⁴ Ngò le haú pé banshoq lé awang mai ahpyo hpyot jìhkùm nuquq ho myí yù luí, nàng wó sè yu to bê hkyô pé gi, je lhoq gíng é dut sháng gaq nghù, náng é matú banshoq tok za ká kat byi rá lé, ngò wó myit ri.

Wui-myhup Sará Yohan Hku Lé Lô Rá Gà É Hkyô

⁵ Yuda mau má Herut hkohkâm up é u lé, Abiyaq hkyangjong hpúng má Zahkariq ga sù hkyangjong rayuq nyi ri. Yhang myi gi, Arun amyú má é, Elizabet ga sù nghut ri. ⁶ Haú nhik gi, Yhumsing Garai é jep é tará eq htúngtará banshoq lé, rago za cháng mù, Garai Gasâng é hí má dingsmán é su nhik nghut akò. ⁷ Nghut kôlhang, Elizabet gi, baùdung dung sù nghut é yanmai, yhang nhâm gi, zo dù a dap kó. Yhangnhik gi, asak ipyat le ko bekô nghut ri.

⁸ Ahkuí, Zahkariq gi, dum lhing hkyuq lo é hkyangjong mù lé, yhang é hpúng eq rahá, Garai Gasâng é hí má lé zui le, ⁹ haú Yhumsing é noqkuq yhùm ahkaú má namngón hkungga é wang nyhé rá matú, hká yuq nghut rá lé hkyangjong pé é htúngli eq rajung za byù hkyin shosé she wú é hkún, yhang chyáng àng ri. ¹⁰ Haú mù yhang namngón hkungga lé nyhé é u lé, shiwa byù banshoq gi, yhpán má, kyúdung nyi akò.

¹¹ Haú hkún, Yhumsing Garai é maumang lagyo gi, namngón jung nyhé é hkungga gyap é loqyo hkyam má, Zahkariq lé, lé yap shit ri. ¹² Zahkariq gi, maumang lagyo haú lé myàng jáng, dan gyuq nyi ri. ¹³ Nghut kôlhang, maumang lagyo gi, "Zahkariq è, hkágyuq, náng é kyúdung dang lé Garai Gasang gyo byi bê. Haú mù luí, náng é yhumsing myhí Elizabet gi, náng é matú yuqzo rayuq bau byi berá nghut lhê; nàng gi, yhang lé Yohan nghù myhíng byi ra rá nghut lhê. ¹⁴ Yhang gi, náng é matú gabú hpo eq nguingón é hkyô dut berá nghut lhê. Yhang lé baù lo é yanmai, byù myo myo le gabú lo bùm berá nghut lhê. ¹⁵ Hkásu mù gá le, yhang gi, haú Yhumsing Garai é hí má ahko ahkáng wó mù luí, byù mó dut rá sù nghut lhê. Yhang gi, tsibiyiq wing eq ihpe lé ge shuq rá sù a nghut; yhang nú é unghkaú mai yhang, Chyoíyung Woi-nyí èq bying nyí rá sù nghut lhê. ¹⁶ Yhang gi,

Israellaq yhangzo yhangshù pé myo myo lé, Yhumsing yhangmoq é Garai Gasâng chyáng lhing lò nhâng rá sù nghut lhê. ¹⁷ Iwá pé é myit nhikhlum lé gi, zô wui shut, nyo é a gyo bang lé gi, dingsmán bâng é hpaqchyí hkyô shut lhing lò nhâng luí, haú Yhumsing jé lé rá matú hen tó é byù myú dut nhâng rá matú, Yohan gi, Eliyaq é woi-nyí wum-o wó é eq, Yhumsing é hí má é lo rá nghut lhê." ga luí, yhang lé tai ri.

¹⁸ Haú hkún, Zahkariq gi, "Haú hkyô lé ngò hkásu kut wó sé rá lhú? Ngò le mang byuq bê, ngá é yhumsing myhí le asak ipyat ko bê." ga luí, maumang lagyo lé tui tai ri.

¹⁹ Maumang lagyo haú gi, "Ngò gi, Garai Gasang eq rahá nyi é sù Gabrielaq nghut lhê. Nang lé gabú danglù shí tai kyo aq ga luí, Yhang, ngo lé nhang kat é nghut lhê. ²⁰ Ahkying jé jáng, ngá dang gi, gè gè dut lò rá nghut lhê. Dang shí pé lé nàng a lumjing é yanmai, mù haú dut lo é buinyi jé shoq, nàng gi, nhut jit byuq rá nghut lhê." ga luí, yhang lé tui tai ri.

²¹ Haú u, shiwa byu pé gi, Zahkariq noqkuq yhùm ahkaú má haú-í myàng shoq lúng byuq é hkyô lé lánng máu nyi akò. ²² Zahkariq dum htoq lo le, dang a wó nyo byuq mù shiwa byu pé lé loq lik za lik shit nyi ri. Haú mù luí, yhangmoq gi, noqkuq yhùm ahkaú má yhang myoqwup shing-rán rajung jung myàng ang bê lé, wú sè yu akò nghut ri.

²³ Ahkuí, Zahkariq gi, hkyangjong jong àng é buinyi ngap jáng, yhùm shut dum taú lo byuq bê. ²⁴ Haú htàng má, yhang é yhumsing myhí Elizabet gi, zogúng dut lò mù luí, hká le a htoq e za lhamó ngo hkyap yhùmhaú má lúng byuq gi. ²⁵ Haú hkún, yhang gi, "Byu pé hí má ngò hui zô é hoq hpu hkyô lé, Garai Gasang gi, myàng byi luí, shí su dut nhang é dōng mai huí sèng pyám byí é buinyi má, Yhang ge é hkyô lé, ngo lé tún shit bê nghut ri." ga tai ri.

Yesuq Hku Lé Lô Berá Gà É Hkyô

²⁶ Ahkuí, Elizabet zogúng dut é lhamó hkyuq hkyap jé jáng, Garai Gasang gi, maumang lagyo Gabrielaq lé Galile mau, Nazaret wá má nyi é, zomyi gyíng rayuq chyáng nhang kat ri. ²⁷ Zomyi hau é myíng gi, Mariq gá ri; yhang gi, Dawiq amyú má é Yosep gá su èq dūng tó é zomyi nghut ri. ²⁸ Maumang haú gi, Mariq chyáng jé jáng, "Mariq è, nguingón nyí sháng gaq; Nang, hkungsó wó nyi ri; Haú Yhumsing Garai gi, nàng eq rahá nyi nyi ri ò!" ga tai ri.

²⁹ Mariq gi, dang haú lé gyo sing nán mù, shí su gá é dang gi, hai jung gá nau é nghut lhê lhú ga luí, myit máu nyi ri. ³⁰ Haú hkún, haú maumang lagyo gi, "Mariq è, hkágyuq, nàng gi, Garai Gasâng é hí má myoqdong wó bê nghut ri. ³¹ Wú aq, nàng zogúng dut lò

mù luí, yuqzo rayuq bau rà nghut lhê. Yhâng é mying lé gi, 'Yesuq' nghû luí, nàng myhíng byi ra rà nghut lhê. ³² Yhang gi, hpung bô sù dut rà nghut mù, Myhang htáng htúm Su é Yhangzo gâ é huí rà nghut lhê. Yhumsíng Garai Gasang gi, yhang lé, yhâng é ichyí iwa Dawiq é hkohkâm tanghkuq lé, byi rà nghut mù luí, ³³ Yhang gi, Yakup yhúm* lé hkâ-nhám le ru-up nyi rà nghut lhê. Yhâng é mingdán le htum nghu é joq rà a nghut." ga luí, yhang lé tai ri.

³⁴ Haú hkûn, Mariq gi, "Ngò gi, zomyi gyíng ru nghut ashí, haú gi, hkâsu wó dut rà lú?" ga luí, maumang lagyo lé tú tai ri.

³⁵ Haú maumang lagyo gi, "Chyoiyúng Woi-nyí náng é ahtoq má jé lé mù, Myhang htáng htúm Su é wum-o a-tsam gi, nàng lé shum gum to byi luí, haú baú lò rà Chyoiyúng sù le gi, Garai Gasâng é Yhangzo ga kó rà nghut lhê. ³⁶ Hau htoq agó, wú aq, náng é amyú suisho baùdung myhí Elizabet lhang, mang bê le yuqgè zo wun to bê. Ahkuí, zogúng dut é lhamó hkyuq hkyap wàng bê nghut ri. ³⁷ Hkâsu mù gâ le, Garai Gasang a wó kut é hai le a joq." ga luí, yhang lé tú tai ri.

³⁸ Haú hkûn, Mariq gi, "Yhumsing é jùnmyhí ngò nghut nyi lhê; náng é dang eq rajung za ngá chyáng dut lò sháng gaq." ga tú tai ri. Hau htáng, maumang lagyo gi, yhang chyáng mai ló byuq bê.

Elizabet Lé Mariq Ê Huí É Hkyô

³⁹ Hau htâng hkâ-í a myáng má, Mariq gi, Yuda mau bum mau má é wà rawá shut hân hân e ló luí, ⁴⁰ Zahkariq é yhúm má wàng mù, Elizabet eq huí nyo lhúm ri. ⁴¹ Mariq é danghtë lé Elizabet wó gyo jáng, yhâng é unghkaú má é zoshâng gi, byam chyú lo ri. ⁴² Elizabet le, Chyoiyúng Woi-nyí byíng to mù luí, Mariq lé hté mó eq tai é gi, "Myiwe banshoq má, nàng gi, hkungsô wó dik sù nghut ri. Náng é unghkaú má é zoshâng le hkungsô wó nyi ri ô! ⁴³ Ngá Yhumsing é yhângnu ngá chyáng jé lé é jeju gi, hai é yanmai nghut bê lú? ⁴⁴ Wú aq, náng danghtë lé wó gyo kat jáng, ngá unghkaú má é zoshâng gi, gabú luí byam chyú nyi ri. ⁴⁵ Haú Yhumsing tai é dang gi, gè gè dik lò rà nghut lhê ga luí, lumjíng é myiwe gi, hkungsô wó nyi ri." gâ ri.

Mariq Ê Hkya-on Dang

⁴⁶ Haú hkûn, Mariq gi, "Ngá é i-myt mai haú Yhumsing lé hkya-on nyi lhê,

⁴⁷ ngá é woi-nyí le, Garai Gasang ngá é hkyi yú Sù má gabú nyi lhê.

⁴⁸ Ngò Yhâng é jùnmyhí myit nyhum nyi é lé, Yhang myáng byi bê nghut ri.

Wú aq, ahkuí mai ipyat dedu má, ngo lé gi, hkungsô wó nyi sù, gâ nyi bekò rà nghut lhê.

⁴⁹ Hkâsu mù gâ le, Wum-o Bo Dik é Garai Gasang gi, ngo lé mauho mù mó kut byi bê nghut ri,

Yhâng é myíng gi, chyoiyúng nyi ri ô.

⁵⁰ Yhang lé gyuq hoq nyi bâng é ahtoq má, Yhang shogyo nhikmyín é hkyô gi, pyat bán hkangmó jé shoq hkâ-nhám le joq nyi rà nghut lhê.

⁵¹ Yhâng é wum-o bo é loq eq mauho mù mó pé lé tún shit bê.

Yhumsing myit é hkyô má nghutbún nyi é bang lé, Yhang lhoq pyo pyám bê.

⁵² Zaugun suwún wuí lé gi, zau zúng tanghkuq mai lhoq hkyô pyám mù, i-myt yhúm bang lé gi, lhoq myhâng bê nghut ri.

⁵³ Zòmut huí bang lé gi, ge é zoshuq gyi shoq byi tso mù, sutzè wó bang lé gi, akóm nhang kat bê nghut ri.

⁵⁴⁻⁵⁵ Nga-nhúng é ichyí iwá pé lé tai tô é dang eq rajung za, Abraham eq yhangzo yhangshu pé lé,

hkâ-nhám le shogyo nhikmyín nyi rà gâ e lé myit bún nyi é yanmai,

Yhâng é dui-nhâng zoshâng Israelaq byu pé lé hku baú nyi ri."

ga luí, tai ri.

⁵⁶ Mariq gi, Elizabet chyáng lhamó sum hkyap kô nyi mù luí, yhúm shut dum taú lò byuq bê.

Wui-myhup Sará Yohan Baú É Hkyô

⁵⁷ Hau htâng, Elizabet gi, zoshâng bau rà buinyi jé mù, yuqgè zo bau bê. ⁵⁸ Yhang lé haú-í kô é jeju Yhumsing tún shit é hkyô lé, yhâng é yhumkyo buinùm wui eq mung moq gumang wui wó gyo kojáng, yhang eq rahá gabú nyi akò.

⁵⁹ Ahkuí shit nyi jé jáng, yhangmoq gi, zoshâng haú lé ahyo-kuq hpyit byi rà matú lé kólú, yhâng wá é myíng eq rajung za, Zahkariq ga myhíng byi rà dá akò. ⁶⁰ Nghut kólhang, yhâng nu gi, "A nghut, Yohan nghú sheq myhíng rà nghut lhê." ga tú tai ri.

⁶¹ Yhangmoq gi, "Náng é amyú suisho má le, haú su gâ é myíng rayuq le a bo wú shi." ga luí, yhang lé tai akò.

⁶² Haú hkûn, zoshâng haú lé hkâsu nghú myhíng nau lhê laq ga, yhâng wa lé loq lik lik shit mù myí akò. ⁶³ Zahkariq gi, ká jung longpá dúng yú mù, "Yhâng é myíng gi, Yohan nghut lhê." ga ká shit ri. Haú mù, lhunglhâng bang gi, maú byuq bum akò. ⁶⁴ Haú hkûn jáng, Zahkariq gi, nhut hkum bóng lô mù, dang wó nyó luí, Garai Gasang lé hkya-ón nyi ri. ⁶⁵ Haú su dut é hkyô lé, wó gyô é awúi ayám lhíngkyuq má

* 1:33 Yakup yhúm nghu e gi, Israelaq amyú lé gâ lhê.

é lunglhang bang gi, gyuq mau byuq bum kômù, Yuda mau bum mau ramau gôn tai pyo lô bum akô. ⁶⁶ Wô gyô é lunglhang bang gi, haú hkyô lé yhumsing é i-myt unghkaú má kat to mù, "Zoshâng shí gi, hkâsu dut lò rà sù nghut lhê lhu?" ga myit wú nyi akô. Haí mù gà le, haú Yhumsing é loq gi, yhang eq rahá nghut nyi é yanmai nghut ri.

Zahkariq É Myiqhtoi Dang

⁶⁷ Haú hkûn, zôshang é yhangwa Zahkariq gi, Chyoiyúng Woi-nyí byíng lô mù, myiqhtoi dang dong tai é gi,

⁶⁸ "Haú Yhumsing, Israelaq é Garai Gasang lé hkya-on sháng ô!

Haí mù gà le, Yhang gi, Yhâng é amyù lé, lé kùm wú mù lui, lé hkyi yù bê nghut ri.

⁶⁹ Garai Gasang gi, Yhâng é dui-nhâng zoshâng, Dawiq é amyù mai nga-nhông é matú

wum-o bo é hkyi yu é hkyuí† lé, yuq htoq lô nhâng bê.

⁷⁰ Shí hkyô gi, a-nham pyat mai yhâng é chyoiyúng myiqhtoi pé é nhut mai tai tô é eq rajung za nghut ri.

⁷¹ Haú hkyuí gi, nga-nhông lé nga-nhông é gye pè chyáng mai le, a ngui a nau bang banshoq é loq mai le, hkyi yù rà nghut lhê.

⁷² Íwa Garai gi, nga-nhông é íchyí íwa pé lé shogyo nhikmyin hkyô lé tún shit rà matú, Yhang byí tô é chyoiyúng dangshikaq lé a tô-myí nghut ri.

⁷³ Haú gi, nga-nhông é chyiké Abraham lé byi tô é danggidig nghut lhê.

⁷⁴⁻⁷⁵ Nga-nhông lé gye pè loq mai hkyi yù rà eq, nga-nhông asak dui tô é buinyi banshoq má,

Yhâng é hí má a gyuq a kyum é za, chyoiyúng é eq dingmán é hkyô mai, Yhang lé wô dojaú nyí nhâng rà matú, Yhang jé lé é nghut lhê.

⁷⁶ Ngá zo ê, nàng gi, Yhumsing é hí má, e lô mù lui, Yhâng é hkyô lé hen lajang byi rà sù nghut é yanmai, nang lé Myhang htáng htúm Su é myiqhtoi ga kó rà nghut lhê.

⁷⁷ Nàng gi, Garai Gasâng é byu pé lé, yhang-moq é yubak mara hkyut pyám byí é dong,

hkyi yu é hui rà hkyô lé tai kyo rà sù nghut lhê.

⁷⁸ Haí mù gà le, Garai Gasâng é shogyo nhikmyin é yanmai, napsún bui† gi, mauhkung mai nga-nhông chyáng htoq lé lô rà nghut lhê.

⁷⁹ Yhang gi, mauchut hkaú\$ eq shí wup hkaú má lung to bang lé builoq su duqbó byi rà eq,

nga-nhông lé nguóngón simsaq é hkyô shut shuí e lô rà sù nghut lhê." ga ri.

⁸⁰ Zoshâng haú gi, kô lò mù, woi-nyí wum-o bo lò lui, Israelaq byu pè chyáng htoq shit lo é buinyi jé shoq, yoso pé má nyi nyi ri.

2

Bethlehem Wà Mó Má Yesuq Hku Lo É Hkyô

Mht 1:18-25

¹ Buinyi haú pé má, Romaq hkoséng ming banshoq má é byù lunglhang bang gi, myíng jihpán kat rà matú, hkoséng Kehtaq Augustuq chyáng mai mungdang htoq ri.

² Jihpán haú lé sâng-hi dàm guq hi é gi, Kuireni ga sù Suriq mau má mauzau kut nyi é hkûn nghut ri. ³ Haú hkûn, byù du jup gi, myíng jihpán kat rà matú, ó le ó é wà shut lô bum akô.

⁴ Haú mù, Yosep le Dawiq é awut ashín nghut é yanmai, Galile mau Nazaret wà mai, Yuda mau má é Bethlehem gà é Dawiq é wà shut, ⁵ yhang dúng tô é myíwe Mariq eq rahá myíng kat hóm rà matú jé doq lô akô; Mariq kùm gi, gungloq lai to bê nghut ri. ⁶ Haú Bethlehem má nyi tô ashí le, Mariq gi, zo hkû rà buinyi jé mù, zomún yuqzo lé bau bê. ⁷ Yhang gi, zoshâng haú lé panchoq eq htup mù no tso langhkang má lheq tô ri; haí mù gà le, bíng yhúm má yhangmoq nyi rà jowò a joq lo é yanmai nghut ri.

Sau Zúng Bang Yesuq Chyáng Jé Lé É Hkyô

⁸ Ahkuí, haú ginwáng má é sau zúng zo bang gi, sau zúng jang má yhangmoq é sau hpúng lé, myín lé zúng nyi akô. ⁹ Haú hkûn, Yhumsing é maumang lagyo gi, yhangmoq é hí má lé htoq yap shit to mù, Yhumsing é hpungwup shíngkang gi, awui ayàm má duqbang lò lui, yhangmoq gyai gyuq bum akô. ¹⁰ Maumang lagyo gi, "Hkâgyuq kó, byù lunglhang bâng é matú, gyai yhang gabú é danglú, ngó nungmoq chyáng wun lé lo lhê.

¹¹ Hkû-nyí lhê buinyi má, Hkrisduq* nghu é Yhumsing nghut é hkyi yù Sù gi, Dawiq é wà má nungmoq é matú hku to bê. ¹² Nungmoq é matú kumlhá gi, zoshâng nyhegnú rayuq panchoq eq htup mù, no tso langhkang má lheq to lánq ra nghut lhê." ga lui, yhangmoq lé tai ri.

¹³ Haú hkûn jáng yhang, mauhkung bang rajum rayò htoq lô mù, maumang lagyo haú eq rahá Garai Gasang lé hkya-ôn é dang gi,

† 1:69 Hkyi yu é hkyuí gi, Yhumsing Yesuq lé tai é nghut ri. † 1:78 Napsún bui gà é gi, Yesuq lé tai é nghut lhê.

\$ 1:79 Mauchut hkaú gà é gi, Garai lé a sé mù woi-nyí má shí tô é bang lé gà lhê. * 2:11 Grik dong Hkrisduq gà é gi, xù bui hui Sù gà é lichyúm nghut mù, Hebre dong "Mesaia" gà é eq rajung za nghut lhê.

14 "Htoq tsáng myhâng má, Garai Gasang gi, hpungwup shingkang bo nyi sháng gaq ô!

Myigùng htoq má le, Yhang ô nau é byu pé má, nguóngón é gi, hkâ-nhám le joq nyi sháng gaq ô!"

gâ akô.
15 Maumang lagyô pé, yhangmoq chyáng mai, mauhkúng shut dum lô byuq jáng, sau zúng bang gi, "Sà! Betlehem wà mó má jé shoq yhang, nga-nhúng ê mù, ahkuí za Yhumsing nga-nhúng lé lé shit kyô lai lô bê hkyô lé é gôn wú sháng." ga lui, rayuq eq rayuq tái lhum akô.

16 Hau htâng, yhangmoq gi, hân hân é lui, Mariq eq Yosep lé le, no tso langhkang má lhez tô é zoshâng nyheqnú lé le, ê myàng akô. 17 Zoshâng haú lé, yhangmoq myàng kôjáng, zoshâng haú eq séng lui yhangmoq lé, lé tái kyô é dang lé, tái pyô kat bekô. 18 Wó gyô é bang banshoq gi, haú sau zúng bang tái kyô é dang lé, maú byuq bum akô. 19 Mariq kúm gi, dut lo é hkyô pé eq wó gyô é dang banshoq lé unghkaú má matsing yù mù lui, nik nik myit wú nyi ri. 20 Sau zúng bang gi, yhangmoq lé maumang lagyô tái kyô kat é dang eq rajung za, wó gyô yù, wó myang yu é hkyô pé banshoq é yanmai, Garai Gasang lé hkya-on kungtôn uchyang dum tái lô bekô nghut ri.

Yesuq Lé, Noqkuq Yhúm Má Shuí E É Hkyô

21 Zoshâng haú, shit nyi jé mù ahyo-kuq hpyit byi rá buinyi má, yhang unghkaú má a lúng shi mai maumang lagyô myhông tô é mying eq rajung za, yhang lé, "Yesuq" ga lui, myhông byi akô.

22 Mosheq é tarâ eq rajung za, yhangmoq é lhoq san lhoq séng é buinyi bying jáng, Yhumsing é tarâ má, "Zomún yuqzo hkangmó gi, haú Yhumsing é hí má chyoyúng sù wó nghú rá matú, Yhumsing chyáng ê ap byi rá lhê."* gâ é eq, 23 "Hpúngkyui razúm, haú a nghut jáng, nghoqmyhú zo í du,* hkungga byi rá lhê ga kâ tô é eq rajung za, 24 Mariq eq Yosep gi, zoshâng haú lé shui mù Yerusalem wà mó shut é akô.

25 Haú hkún, Simeon gâ é mangzo rayuq, Yerusalem wà mó má nyi ri. Haú yuq gi, dingmán é eq tarâ cháng sù nghut mù, Israellaq lé nhik lhoq títng rá ahkýng lé láng nyi sù nghut ri; haú Chyoyúng Woi-nyí le, yhâng é ahtoq má nyi nyi ri. 26 Yhang gi, haú Yhumsing Hkrisduq lé a myang é za, shí rá a nghut, ga Chyoyúng Woi-nyí eq tún shit tô é hui sù nghut lhê. 27 Yhang gi, Chyoyúng Woi-nyí eq shui mù, noqkuq yhúmkaú má é jé nyi tô é hkún lé, Mariq eq Yosep gi, zoshâng Yesuq lé htúng tarâ eq rajung za

kut byi rá matú, noqkuq yhúmkaú má shuí wang lô kôjáng, 28 Simeon gi, zoshâng lé loq eq lhom bún yù mù, Garai Gasang lé hkya-ôn é dang gi,

29 "Yhumsing ê, náng é danggidiq gi, dik bê nghut ri; hkú-nyí náng é jùn ngò gi, nguóngón é eq wó shi lô berâ nghut lhê.

30 Haú mù gâ le, byù lhunglhâng bâng é matú, náng lajang tô é hkyi yù hkyô lé, ngá myoq eq yhang wó myâng bê.

31 Haú gi, byù myù chângjup wó myâng rá matú, náng lajang tô byí é nghut mù,

32 tũngbaù pé lé, tengmán hkyô má bui su duqbó mù hpông shit rá matú le, náng é amyú Israellaq é hpungwup shingkang matú le nghut nyi ri."

gâ ri.

33 Yhângnu eq yhângwâ nhik gi, zoshâng Yesuq é hkyô lé Simeon tái é yanmai, maú byuq akô. 34 Simeon gi, yhangmoq lé shimân byi mù, Yhâng nu Mariq lé, "Wú aq, zoshâng shí gi, Israellaq ming má é byù myo myô é matú lingbat jowò eq myo myô é matú kô lò myhang lò rá hkyô le, byù myo myo tái he pyám rá kumlhá matú le, hkyin tô é hui sù nghut ri. 35 Haú mù, byù myo myô é unghkaú má, myit mi-myit lé lhoq htoq shit rá nghut lhê. Náng é myit nhiklum má, shâm chún eq htaú kyáng kat é su gâ é lé, náng hui zo rá nghut lhê." ga tái ri.

36 Ashe amyú má é Hpanuelaq é yhangzo, Annaq gâ é myiqhtoi myhi rayuq nyi ri; yhang gi, ipyat gyai ko bê. Yhang gi, zomyí pyat mai, yhanglâng eq nyhit zân za nyi lui, shit xe myi zân jé shoq chuimó mó nyi to sù nghut ri. 37 Myiwe haú gi, noqkuq yhúm mai a htoq é za, nyi myin a ga noqkuq dojaú nyi mù, zoshuq gám lui kyúdũng nyi ri. 38 Simeon dang ban tái jáng, Annaq gi, hui lé lô mù, Garai Gasang jeju lé hkya-on lui, Yerusalem wà mó lé Garai Gasang hkyi yù rá gâ é lé, myit lum to bang lhunglhâng lé, zoshâng hau é hkyô tái kyô ri.

39 Yosep eq Mariq gi, kut rá pé lé haú Yhumsing é tarâ joq é dõng ban kut jáng, Galile mau má é yhangmoq wà Nazaret shut dum tái lô bekô. 40 Zoshâng haú gi, kô lò mù, wum-o bò lo é eq, hpaqchyí byéng-yá le bying nyi ri. Garai Gasang jeju le, Yhâng é ahtoq má joq nyi ri.

Noqkuq Yhúmkaú Má Zoshâng Yesuq Jé Nyi É Hkyô

41 Yhângnu yhângwâ nhik gi, Lhoqlhai Poí jé hkangmó, zân wui Yerusalem wà mó má é ê kut akô. 42 Yesuq raxe í zân jé jáng, poí haú, é bo lòm ra htũngli joq é eq rajung za, yhangme wui yhangpe wui doq lô akô. 43 Haú poí buinyi lai lui, dum tái lo é hkún, zoshâng Yesuq gi, Yerusalem wà mó má nyi

gyô tô ri; nghut kôlhang, yhangnu yhangwâ nhik gi, a sé kô. ⁴⁴ Yesuq lé rahá lo é luzúm wui chyáng bò rà su ngàm kômù luí, Yosep eq Mariq gi, ra-nyí buigyùm chap sô lô bê htàng má, mung moq wui eq, sê lhum é buinùm ji-myi wui chyáng Yhang lé châng ho akô. ⁴⁵ Yhangnhik gi, Yesuq lé a myàng kôjáng, Yhang lé châng hô uchyang, Yerusalem wà mó má dum taù jé é lo bekô. ⁴⁶ Ahkuí, sum nyí nghù rà nyí sheq, noqkuq yhúmhaù má, tarâ sará pê é gung gung má zùng to mù, yhangmoq é dang lé gyo yù luí, dum taù myi myi kut nyi é lé, yhangnhik é myàng akô. ⁴⁷ Yhâng é dang wó gyô é bang banshoq gi, Yhâng é u-nuq nyau é hkyô lé le, Yhang tú taí é dang lé le, maú nyi akô. ⁴⁸ Yhang lé myàng jáng, yhangnhik maú byuq kômù luí, yhangnu gi, "Ngá zo é, haí mù luí ngá-nhik lé isu kut lhé lúhú? Wú aq, náng wa eq ngá-nhik gi, myit myo myit chiq é eq, náng lé jaq châng ho pyám bê." ga luí, Yhang lé taí ri.

⁴⁹ Yhang gi, "Haí mù luí, ngo lé châng ho akô lúhú? mauhkung má é ngá Wá é yhúm má ngò nyi rà lhé le gi, nungnhik a sé kô lúhú?" ga luí, yhangnhik lé tú taí ri. ⁵⁰ Nghut kôlhang, yhangnhik gi, Yesuq taí é dang lichyùm lé, a sé gyo kô.

⁵¹ Yesuq kúm gi, yhangnhik eq rahá Nazaret wà shut taù jé gyô lô luí, yhangnhik nyo é dang lé gyo mù nyi tô ri. Yhangnu Mariq gi, dut lai lò bê hkyô pé banshoq lé, yhâng é myit nhiklhum má matsing tô ri. ⁵² Yesuq gi, hpaqchyí byéng-yá kung zet lo é eq, gungkyáng kô myhang lò mù, Garai Gasâng é hí má le, byu hí má le, myoqdong wó lo nyi ri.

3

Wui-myhup Sará Yohan Mhoqshit É Hkyô

Mht 3:1-12; Mrk 1:1-8; Yhn 1:19-28

¹ Romaq hkoséng Kehtaq Tiberuq gi, hkó zung é raxe ngo zân nghut é hkún, Yuda mau má Pontu Pilat gi, mauzau ayá má; Galile mau má, Herut gi, mauzau ayá má; Ituri eq Trakuni mau má, Herut yhanggu Hpilip gi, mauzau ayá má; Abili mau má, Lusanu gi, mauzau ayá má; ² Anna eq Kayahpaq gi, hkyangjong mó mù má, kut nyi akô. Haù hkún, Garai Gasâng é mungdang gi, yoso má nyi tô é, Zahkariq é yhangzo Yohan chyáng jé lé ri. ³ Haù mù, yhang gi, Yodan làng yàm jowò hkangmó má, sô jón wún luí, yubak mara hkyut pyám byí é hui rà matú myit lhing mù, wui-myhup hkâm* yù rà hkyô lé,

hko kyô nyi ri. ⁴ Haù gi, myiqhtoi Esai-aq laiká má,

"Haù yoso má, byù rayuq garú taí é hté gi,

Haù Yhumsing é matú, hkyô hen to keq, Yhâng é matú hkyô lhoq nyhang to keq;

⁵ wuihkung langhkop hkangmó lé lhoq pying ra rà nghut lhé;

bùm eq wingkáng hkangmó lé hpyit pyám ra rà nghut lhé;

agoí aguq é hkyô hkat hkangmó lé lhoq nyhâng ra rà nghut lhé;

ahkung ahkop dut é hkyô hkat hkangmó lé lhoq rhá ra rà nghut lhé.

⁶ Haù hkún, byù banshoq gi, Garai Gasâng é hkyi yù hkyô lé myàng rà nghut lhé."[†]

ga luí, kâ tô é eq rajung za nghut ri.

⁷ Shiwa byù rajung rayô gi, Yohan é loq má wui-myhup hkâm yù rà ga luí htoq lé lô kôjáng, Yohan taí é gi, "Duq htan é lhangmui amyú pé[†] é, jé lô rà yubak dam mai wó hpanq lut kó sháng gaq ga, nungmoq lé ó yuq taí pún é lúhú? ⁸ Myit lhing hkyô eq gingdán é ashi zui keq. 'Nga-nhung gi, Abraham é yhangzo yhangshù pé nghut lhé.[‡] nghù luí, yhumsing é i-myiit unghkaù má hkâtaí kô. Hkâsu mù gâ le, ngò, nungmoq lé taí kyo kôlé, Garai Gasang gi, luggok shí pé mai, Abraham é matú yhangzô pé wó hpan htoq kat lhé. ⁹ Ahkuí lhang, Garai Gasang gi, Yhâng é wazung lé haù siggâm wang pé má tô to bê nghut ri; haù mù, ge é ashi a zui é agâm hkangmó lé gi, htuq lheng pyám mù, myi má dú kat pyám rà nghut lhé." ga ri.[§]

¹⁰ Haù hkún, shiwa byu pé gi, "Haù nghut le gi, ngamoq hkâsu kut le gè rà lúhú?" ga luí, yhang lé myí akô.

¹¹ Yhang gi, "Bu í dung wó sù gi, bu a wó sù lé, gâm byi sháng gaq; zo shuq wó sù le, a wó sù lé, gâm byi sháng gaq." ga luí, yhangmoq lé tú taí kat ri.

¹² Kang guq bang le, wui-myhup hkâm yù rà ga lé lô mù, "Sará é, ngamoq gi, hkâsu kut le gè rà lúhú?" ga luí, yhang lé myí akô.

¹³ Yhang gi, "Nungmoq hkyui yù rà masat tô é htoq lai shoq hkâyú kô." ga luí, yhangmoq lé taí ri.

¹⁴ Gyezô pé ra-am le, "Ngamoq gi, hkâsu kut le gè rà lúhú?" ga luí, yhang lé lé myí akô.

Yohan gi, "Ó lé le hkâyuyq zo ko; a tara é dong mara le hkâhún kô; nungmoq wó e aphaù èq gé bün nyi keq." ga luí, yhangmoq lé taí ri.

* 3:3 Wui-myhup hkâm gâ é gi, bapisma lé gâ é nghut lhé. † 3:6 Esai 40:3-5 ‡ 3:7 Lhangmui amyú pé gâ é gi, Lukaq 3:7-10 má bo é Hparishe eq Saduke pé lé taí é nghut ri. ‡ 3:8 Nga-nhung gi, Abraham é yhangzo yhangshù pé nghut lhé gâ é gi, Abraham é yhangzo yhangshu nghut é yanmai, Garai Gasang jéyáng é lé a hui rà ga, myit yu é hkyô nghut ri. § 3:9 Bun zo shí lhum é lichyùm gi, myit a lhing bang lé, Garai Gasang jéyáng é buinyi jé rà nghut lhé ga naù é nghut ri.

¹⁵ Shiwa byu pé kúm gi, Hkrisduq lé myit láng nyi tó é bang nghut é yanmai. Yohan lé hau yuq nghut lhê laq ga yhumsing é i-myyit unghkaú má myit wú nyi bum akò. ¹⁶ Háu hkún, banshoq bang lé Yohan taí é gi, "Ngò gi, nungmoq lé, wui éq za wui-myhup hkám byi lhê; nghut kôllhang, ngá htoq má wum-o a-tsam je bo é sú rayuq jé lé lô rà nghut lhê. Ngò gi, yhâng é hkyi-tsung tui lé hpyi rà lhâng a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi rà nghut lhê. ¹⁷ Yhang gi, loq má byò chung to mù, guq chyaráng má é guq bùm lé hik sân pyám luí, já é guq cham lé gi, guqchyí má tsing kat to mù, guqsóm lé kúm gi, hkâ-nhám le shí byuq a sê é myí éq nyhê hkyô pyám rà nghut lhê." gâ ri.* ¹⁸ Háu mù, Yohan gi, byu hau bang lé gotú dang myo myo éq lhoq pun lhoq kying mù, gabú danglù lé hko kyô nyi ri.

¹⁹ Nghut kôllhang, hkâ-myháng a myáng má mauzau Herut gi, yhanggú é yhangmyi Herudiaq lé lú yu é hkyô eq, yhang kut shut é gotú a ge é mù banshoq é yanmai, Yohan gi, yhang lé tân mhoqshit bê nghut ri. ²⁰ Mara háu pé htoq agó, Herut dum kut jat yu é mara gi, Yohan lé htóng má lhúng kat é nghut ri.

Yesuq, Wui-myhup Hkâm Yu É Hkyô
Mht 3:13-17; Mrk 1:9-11

²¹ Yohan lé htóng má a lhúng kat shimá, byú myo myo gi, wui-myhup hkám yu nyi kò é hkún, Yesuq le Yohan chyáng wui-myhup hkâm yu mù, kyúdüng nyi le, mauhkúng bóng lô mù, ²² háu Chyoiyúng Woi-nyí gi, hpúngkyui gungghyâng sú é dòng mai Yhâng ahtoq má lé gyó nô ri. Háu hkún, "Nàng gi, Ngò chyyitdap é Ngá zo nghut lhê; Nàng é ahtoq má Ngò gabú myit ngón nyi lhê." ga mauhkúng mai danghté htoq lo ri.

Yesuq É Byú Xik Shap Kyô É Hkyô
Mht 1:1-17

²³ Yesuq gi, Yhang mù zú hi é hkún, asak sum xê zàn kò nghut bê; Yhang lé byú hkyam dòng gôn wú jáng, Yhang gi, Yosep é yhangzo nghut ri; Yosep gi, Heli é yhangzo, Heli gi, Mahtat é yhangzo, ²⁴ Mahtat gi, Lewiq é yhangzo, Lewiq gi, Melahki é yhangzo, Melahki gi, Yannai é yhangzo, Yannai gi, Yosep é yhangzo, ²⁵ Yosep gi, Matahtiaq é yhangzo, Matahtiaq gi, Amo é yhangzo, Amo gi, Nahum é yhangzo, Nahum gi, Esali é yhangzo, Esali gi, Nagai é yhangzo, ²⁶ Nagai gi, Maat é yhangzo, Maat gi, Matahtiaq é yhangzo, Matahtiaq gi, Semai é yhangzo, Semai gi, Yosek é yhangzo, Yosek gi, Yodaq é yhangzo, ²⁷ Yodaq gi, Yohan é yhangzo, Yoanan

gi, Resa é yhangzo, Resa gi, Zerubabelaq é yhangzo, Zerubabelaq gi, Shalahlila é yhangzo, Shalahlila gi, Neri é yhangzo, ²⁸ Neri gi, Melahki é yhangzo, Melahki gi, Adi é yhangzo, Adi gi, Kusam é yhangzo, Kusam gi, Elamadam é yhangzo, Elamadam gi, Era é yhangzo, ²⁹ Era gi, Yoshuq é yhangzo, Yoshuq gi, Elieze é yhangzo, Elieze gi, Yorim é yhangzo, Yorim gi, Mahtat é yhangzo, Mahtat gi, Yese é yhangzo, ³⁰ Lewiq gi, Simeon é yhangzo, Simeon gi, Yudaq é yhangzo, Yudaq gi, Yosep é yhangzo, Yosep gi, Yonam é yhangzo, Yonam gi, Eliakim é yhangzo, ³¹ Eliakim gi, Mela é yhangzo, Mela gi, Menaq é yhangzo, Menaq gi, Matahta é yhangzo, Matahta gi, Nahtan é yhangzo, Nahtan gi, Dawiq é yhangzo, ³² Dawiq gi, Yese é yhangzo, Yese gi, Obet é yhangzo, Obet gi, Bua é yhangzo, Bua gi, Salamun é yhangzo, Salamun gi, Nashon é yhangzo, ³³ Nashon gi, Aminada é yhangzo, Aminada gi, Arni é yhangzo, Arni gi, Hesrun é yhangzo, Hesrun gi, Hparet é yhangzo, Hparet gi, Yudaq é yhangzo, ³⁴ Yudaq gi, Yakup é yhangzo, Yakup gi, Isak é yhangzo, Isak gi, Abraham é yhangzo, Abraham gi, Htara é yhangzo, Htara gi, Nahura é yhangzo, ³⁵ Nahura gi, Seruk é yhangzo, Seruk gi, Re-u é yhangzo, Re-u gi, Hpelek é yhangzo, Hpelek gi, Ebera é yhangzo, Ebera gi, Shela é yhangzo, ³⁶ Shela gi, Kainan é yhangzo, Kainan gi, Arhpaza é yhangzo, Arhpaza gi, Shem é yhangzo, Shem gi, Noaq é yhangzo, Noaq gi, Lamek é yhangzo, ³⁷ Lamek gi, Mehtusela é yhangzo, Mehtusela gi, Enuq é yhangzo, Enuq gi, Yaret é yhangzo, Yaret gi, Mahelela é yhangzo, Mahelela gi, Kainan é yhangzo, ³⁸ Kainan gi, Enu é yhangzo, Enu gi, Shet é yhangzo, Shet gi, Adam é yhangzo, Adam gi, Garai Gasâng é yhangzo nghut ri.

4

Yesuq Lé Tsadán Gunlaú É Hkyô
Mht 4:1-11; Mrk 1:12-13

¹ Yesuq gi, Chyoiyúng Woi-nyí éq byíng mù, Yodan làng mai dum tau lo é hkún, Chyoiyúng Woi-nyí gi, Yhang lé yoso shut shuí é ri. ² Háu má, Yesuq gi, buinyi myí xê nyí jé shoq, nat Tsadán éq gunlaú é huí ri. Buinyi háu gyoro má, Yesuq gi, hái le a zô é yanmai, zòmut hui bê nghut ri.

³ Háu mù luí, nat Tsadán gi, "Nàng, Garai Gasâng é Yhangzo nghut le gi, luqgok shí lé muk dut nhâng aq." ga luí, Yhang lé taí ri.

⁴ Háu hkún, Yesuq gi, "Byú gi, muk éq za asak duí rà a nghut." ga luí, Chyúmdang má kâ tô ri."* ga yhang lé tú taí ri.

* **3:17** Háu eq rajung za, Hkrisduq gi, a ge é byu pé eq ge é byu pé lé gam hkoq pyám rà nghut lhê. ✧ **4:4** Tará Pun 8:3

⁵ Hau htâng, nat Tsadán gi, Yesuq lé, gyai yang myhang é bùm htoq má shuí doq ló mù, mingkan má joq é mingdán pé banshoq lé razup má za tũn shit lui. ⁶ "Shí ahkáng ayá banshoq eq haũ mingdán é hkikhkâm hkyô banshoq, ngò nang lé wó byí lhê; hkâsu mù gâ le, haũ pé banshoq gi, ngo lé ap byí to bê nghut mù, ngò byí nau é sũ ó yuq lé nghut kôlháng, byí rá nghut lhê. ⁷ Haũ mù, Nang, ngo lé noq é nghut jáng, shí pé banshoq Náng é dut rá nghut lhê." ga, Yesuq lé tai ri.

⁸ Haũ hkũn, Yesuq gi, "Haũ Yhumsing náng é Garai Gasang lé za, nang noqkuq dojaũ ra rá nghut lhê."* ga lui, Chyũmdang má kâ tũ ri." ga lui, yang lé tũ tai ri.

⁹ Nat Tsadán gi, Yesuq lé Yerusalem và mó má shuí é mù, noqkuq yhum je myhang é shũhtâng htoq má yap nhang to lui, "Nang, Garai Gasang é Yhangzo nghut le gi, shí mai byam gyó kat wú aq. ¹⁰ Hkâsu mù gâ le, 'Nang lé upzũng byí nyi rá matũ, Garai Gasang gi, Yhâng é maumang lagyó pé lé tai to rá nghut mù,

¹¹ luqgok má náng é hkyi á ló htung shoq, yangmoq é loq èq Nang lé lhom bún yũ kó rá nghut lhê."*

ga lui, Chyũmdang má kâ tũ ri." ga tai ri. ¹² Nghut kôlháng, Yesuq gi, "Haũ Yhumsing, nungmoq é Garai Gasang lé, wó chyam wú rá a nghut."* ga lui, Chyũmdang má bo tũ ri." ga, yang lé tũ tai ri.

¹³ Nat Tsadán gi, gungláu é hkyô pé banshoq ban kut jáng, ahko ahkáng láng wú uchyang yhâng chyáng mai byam gâng nyi byuq ri.

Yesuq Lé Nazaret Và Bang He-ngik Pyâm É Hkyô

Mht 4:12-17; 13:53-58; Mrk 1:14-15; 6:1-6

¹⁴ Yesuq kũm gi, Chyoiyũng Woi-nyí wum-o byíng é èq Galile mau shut dum tũ lo ri. Haũ mau jowò hkangmó má, Yhâng é hkyô lé tai pyo ló bùm bekò. ¹⁵ Yangmoq é tarajong pé má, Yesuq mhoqshit byi mù, lhunglhâng bang gi, Yhang lé tai hkya-ôn nyi bum akò.

¹⁶ Hau htâng má, Yhang nyi kò lo é Nazaret và má dum tũ jí ló bê; Yhang gi, hkâ-nhám le kut nyi é eq rajung za, Bánno buinyi* lé tarajong má wang é mù, laiká nghap rá ga toq yap é hkũn, ¹⁷ Yhang lé myiqhtoi Esai-aq chyũmding byi kôjáng, Yhang chyũmding haũ lé hpõng kat le,

¹⁸ "Yhumsing é Woi-nyí gi, ngá é ahtoq má nyi nyi ri;

hkâsu mù gâ le, asho awuí é bang lé gabú danglũ hkò kyo rá matũ, Yhang ngo lé hkyin yũ bê.

Htóng lũng bang lé lhoq htoq rá hkyô eq, myoqjit bang lé myoq dum myàng nhâng rá hkyô hkò kyo rá matũ le, zik zo huí é bang lé nhang kat nhâng rá eq,

¹⁹ Yhumsing, Yhâng é byu pé lé hkyi yũ rá ahkyíng zanwut lé hkò kyo rá matũ le, Yhang, ngo lé nhang kat bê nghut ri."*

ga lui, kâ tũ é jowò lé myang záng mù nghap ri.

²⁰ Hau htâng, Yesuq gi, chyũmding haũ lé ding mù, shuí-u sũ lé tau byí pyám lui, dum zung tũ ri; tarajong má é byũ lhunglhâng bang gi, Yesuq lé chõm wú tũ é hkũn, ²¹ Yesuq gi, "Nungmoq é nohkyap má, ahkũ wó gyô é Chyũmdang shí gi, hkũ-nyí yang lo dik bê." ga lui, yangmoq lé tai hi kat ri.

²² Lhunglhâng bang gi, Yhang ge é hkyô lé saksé hkâm byi kòmũ, Yhâng é nhut mai htoq é jeju bo é dang lé le, maũ kòlũ, "Shí yuq gi, Yosep é yangzo a nghut lhũ?" ga tai bum akò.

²³ Haũ mù lui, Yesuq gi, "Nungmoq gè gè yang, 'Chi sará ê, yhumsing gũng lé lhoq ge yũ aq.'† gâ é sanghkyang èq le, 'Nang, Kaperna-um và má kut shit wú é hkyô ngamoq wó gyo bê, haũ eq rajung za, nang, náng é yhum mau má le, kut shit wú aq.' ga lui le, ngo lé tai kó rá nghut lhê." ga tai ri.

²⁴ Yhang dum xoq tai é gi, "Ngò, nungmoq lé teng za tai kòlê, myiqhtoi ó yuq le yhumsing é yhum mau má myoqdong wó wú é a nghut. ²⁵ Ngò, nungmoq lé teng za tai kòlê, Eliyaq é pyat lé, Israelaq ming má chuimó myo myo nyi bum akò. ²⁶ Nghut kôlháng, haũ ming má sũm zan eq lhamó hkyuq hkyap yang, mau a wò dut byuq mù, mutmó gyó tũ é hkũn, Garai Gasang gi, yangmoq má é rayuq chyáng le, Eliyaq lé a nhang kat é za, Sidun mau Zarephta và má é, chuimó myhí rayuq chyáng sheq nhang kat byí é nghut lhê. ²⁷ Myiqhtoi Elisha é pyat má le, Israelaq ming má, manggãm dap é byũ myo myo nyi kôlháng, yangmoq chyáng má é rayuq le wó sãn-yũng yũ kò é a nghut; Suriq byũ Naman ga sũ tũngbàu hpó za sheq wó sãn-yũng é nghut lhê." ga tai ri.

²⁸ Tarajong hkaũ má é lhunglhâng bang gi, haũ hkyô lé wó gyo kôjáng, gyai yang nhik-yo nau bùm kòmũ, ²⁹ toq yap lui, Yhang lé và mai hkat htoq mù, yangmoq é và xuq tũ é bùm gũng htoq má é gampyoq má, é chyũn hpýt hkyô pyám rá ga shuí é ló akò. ³⁰ Nghut

* 4:8 Tará Pun 6:13 * 4:11 Hkya-on 91:11-12 * 4:12 Tará Pun 6:16 * 4:16 Bánno buinyi gâ é gi, Yudaq byu pé nõmũ é buinyi lé gâ lhê. Ahkui lhê é dõng ga jáng, Bánno buinyi gi, bat htoq hkyuq nyi lé àng ri. * 4:19 Esai 61:1-2

† 4:23 Chi sará ê, yhumsing gũng lé lhoq ge yũ aq gâ é sanghkyang gi, 'Mesaia nghut le gi, mauho mù wò tũn shit rá nghut lhê.' gâ é nghut lhê.

kôlhang, Yesuq kúm gi, byù hpûng haù mai so hkoq htoq lô byuq bê nghut ri.

Agè Ashop É Nat Lé Yesuq Hkat Htoq É Hkyô

Mrk 1:21-28

³¹ Hau htàng, Yesuq gi, Galile mau mâ é Kaperna-um wà má jé è mù, Bánno buinyi má byu pé lé mhoqshit hi lô bê nghut ri. ³² Yhangmoq gi, Yhang mhoqshit é hkyô lé mauhong nyi akò; hkâsu mù gà le, Yhang gi, ahko ahkàng bo é dang đông tai nyi é yanmai nghut ri.

³³ Yesuq, tarajong hkaù má mhoqshit byi nyi é hkùn, nat gang wang júng é byù rayuq htê mó o mó eq tai é gi, ³⁴ "È, Nazaret wà byù Yesuq é, ngamoq gi, Nàng eq haì sêng lhê lhu? Ngamoq lé lhoq hten rà matú, Nàng jé lé é nghut lhê lhu? Nàng gi, Garai Gasàng é Choyoyúng Sù nghut é lé, ngò sè lhê." gà ri.

³⁵ Haù hkùn, Yesuq gi, "Hkâjop, yhang chyáng mai htoq lô aq," ga yhang lé tân kat jáng, nat gi, haù yuq le yhangmoq é gung gung má lhoq lhez tò mù, a nõ nhang é za, yhang chyáng mai htoq lô byuq ri.

³⁶ Haù mù luí, shiwa byù banshoq bang gi, gyai yhang má byuq kômù, rayuq eq rayuq, "Shí yuq é dang gi, hkasú é dang wá nghut lhê lhu? Yhang gi, ahkàng ayá eq le, wum-o bo é eq le, agè ashop é nat pé lé hkunmó hkyô jáng, haù bang htoq lô byuq akò." ga tai lhum bum akò. ³⁷ Haù hkùn, haù mau mà é awui ayàm jowò hkangmó má jam shoq, Yhang é hkyô lé tai pyo hù lô bùm bekò nghut ri.

Yesuq Nòhpyo Lhoq Gé Byi É Hkyô

Mht 8:14-17; Mrk 1:29-34

³⁸ Yesuq gi, haù tarajong mai toq lô mù, Simun é yhùm má wang lô ri. Simun é yhang-aumó gi, aì gyai nyé nõ nyi é nghut mù luí, lhoq gé byi rà matú, Yesuq lé garúm dung byi akò. ³⁹ Yesuq gi, Simun é yhang-aumó nàm má yap to mù, nòhpyo haù lé tân kat jáng, Simun é yhang-aumó gi, ge lô byuq bê; haù hkùn jáng, yhang gi, toq mù, yhangmoq lé gai tso gai huq bê nghut ri.

⁴⁰ Bui wang lô jáng, nòhpyo hui bang eq awàng nòhpyo ajung jung dap é bang lunglhang lé, Yesuq chyáng shuí lé lô kômù, yhangmoq rayuq htàng rayuq é ahtoq má Yesuq gi, loq ke byi luí, lhoq gé byi ri. ⁴¹ Nat gâng pé gi, Yesuq lé, "Nàng gi, Garai Gasàng é Yhangzo nghut ri." ga luí, wut tai mù byù myo myò chyáng mai htoq lô byuq akò; Yesuq gi, Hkrisduq nghut é hkyô lé, yhangmoq sé kò é yanmai, yhangmoq lé dang a wò tai loshoq, Yesuq tân pyàm ri.

⁴² Maubó lô jáng, Yesuq gi, htoq lô mù, gaù é jowò yoso hkaù má é nyi tò ri; shiwa byu pé kúm gi, Yhang lé hkat hô kômù, myang hô kôjáng, yhangmoq chyáng mai a lô byuq rà

matú châng hkùm wú akò, ⁴³ Nghut kôlhang, Yesuq gi, "Garai Gasàng é mingdán é gabú danglù lé, gó wà pé má le ngò hko kyo rà rà ashí, haù é matú, Garai Gasang gi, ngo lé nhang kat bê nghut lhê." ga luí, yhangmoq lé tai ri. ⁴⁴ Haù mù, Yesuq gi, Yuda mau mà é tarajong pé má, hko kyô wún nyi ri.

5

Sâng-hi Ji Yù Hui É Chángzó Pé

Mht 4:18-22; Mrk 1:16-20

¹ Radàm má lé, Yesuq gi, Genesarat nhông yàm má yap tò le, Garai Gasàng é mungdang gyo rà ga, shiwa byu pé, Yhàng chyáng chyín chyap wang lé lô kò é hkùn, ² nhông gin-gau yàm má haì razúm joq tò é lé, Yhang myang kat ri. Ngogùn dú bang kúm gi, haì mai htoq mù, yhangmoq é gùn pé lé chí nyi akò. ³ Yesuq gi, Simun é haì má wàng mù gin-gau mai rachyit lhoq kang nhâng luí, haù haì htoq má zung tò mù, shiwa byu pé lé mhoqshit tai kyô nyi ri.

⁴ Dang ban tai jáng, Yesuq gi, Simun lé, "Wui nik é shut hui luí, ngozo wó kông yù rà matú, nungmoq é gùn pé lé dú hkyô kat keq." ga tai ri.

⁵ Simun gi, "Yhumsing é, ngamoq amàn ramyin mau shikut wú kôlhang, haì le a wó; nghut kôlhang, náng dang é yanmai, ngò gùn dú hkyô kat rà nghut lhê." ga tù tai ri.

⁶ Gùn pé lé hkyô kat kôjáng, yhangmoq gi, ngozo gyai myo shoq lé wó kông yù kômù, gùn lhang jeq lô rà su dut é yanmai, ⁷ haì gó lhum má é luzúm wui lé, lé garúm yù rà matú loq lik lik kat kôjáng, haù bang lé lô mù, haù haì í lhum aluq myup lô shoq ngozo lé kat pying bekò.

⁸ Simun Petruq gi, haù lé myàng jáng, Yesuq é hkyi wang má hkyihput htuq mù, "Yhumsing é, ngá chyáng mai lô byuq aq, haì mù gà le, ngò gi, yubak dap é byù nghut nyi lhê." ga tai ri. ⁹ Haì mù luí gà le, Simun le, yhang eq nyi tò é lunglhang bang le, haù su ngozo wó yu é yanmai, mau nyi bùm kômù nghut ri. ¹⁰ Simun é luzúm nhik, Zebedi é yhangzo Yakuq eq Yohan le, haù su chòm maù byuq akò.

Hau htàng, Yesuq gi, "Hkâgyuq, ahkuí mai nàng gi, byù lé châng kóng sù dut rà nghut lhê." ga luí, Simun lé tai ri. ¹¹ Yhangmoq gi, wuiyàm má jé jáng, haì pé eq yhangmoq é zè banshoq lé tò pyàm to luí, Yesuq htàng châng bekò nghut ri.

Manggâm Dap Bang Lé Yesuq Lhoq Gé Byi É Hkyô

Mht 8:1-4; Mrk 1:40-45

¹² Radàm lé, Yesuq gi, wà rawà má nyi tò lé, ragùngdù é manggâm dap é byù rayuq lé lo ri; haù yuq gi, Yesuq lé myàng jáng, hkyihput htuq luí, "Yhumsing é, Nàng đông

é nghut le gi, ngo lé Nàng wó lhoq sân-yúng byi rá nghut lhê." ga dũng wut ri.

¹³ Yesuq gi, loq lhâm kat mù, haú yuq lé é záng luí, "Ngò dõng lhê, sân-yúng aq hkoi." ga tai ri; haú hkũn jáng, haú yuq é manggãm gi, ge byuq bê nghut ri.

¹⁴ Yesuq gi, "Nàng, shí hkyô ó lé le hkâtai kyo. Nghut kôlhang, náng é gungdu lé, hkyangjong hpó chyáng ló tũn shít mù, náng sân-yúng bê hkyô lé yhangmoq é matú saksé dut sháng gaq, Mosheq tará tó tó é eq rajung za, hkungga ló nhõng byi aq." ga, yhang lé tai hkũm kat ri.

¹⁵ Nghut kôlhang, Yesuq é hkyô gi, je riy-hang tai pyo hũ jam ló mù luí, shiwa byù rajùm rayó gi, Yhâng é dang gyo rá matú le, yhangmoq é nõhpyo lhoq gê byi nhâng rá matú le, lé zup ming tó akò. ¹⁶ Yesuq kùm gi, Yhang baú tsik za yoso shut htoq é mù, kyú é dung dung kut ri.

Gũngjum Shí Sũ Lé, Yesuq Lhoq Gê Byi É Hkyô

Mht 9:1-8; Mrk 2:1-12

¹⁷ Ra-nyí lé, Yesuq mhoqshít nyi é hkũn, Hparishe pé eq tará sará pé le, Yesuq nãm má zung tó akò; haú bang gi, Galile mau wá hkyap hkangmó mã é bang eq Yuda mau, Yerusalem wá mó mã é bang nghut akò. Yhumsíng Garai é wum-o a-tsam le nõhpyo lhoq gê rá matú Yesuq eq rahá nghut nyi ri. ¹⁸ Haú hkũn, byù ra-am gi, gũngjum shí sũ rayuq lé taphkang mai waq lé ló kômù, haú yuq lé, yhũmhkaũ má nyi tó é Yesuq é hí mã, wó lhez byi shoq ga hkyô ho nyi akò. ¹⁹ Byù lũm myô chyín chyap to mù, haú nõ sũ lé hká dõng le a wó shuí wàng kôluí, haú yhumhkũng htoq shut waq doq ló mù, haú yuq lé taphkang eq roq, shiwa hpõng gung gũng, Yesuq é hí ang ang má hkyô hang kat akò.

²⁰ Yesuq gi, yhangmoq é lumjĩng myit lé byu myàng jáng, "Byù náng ê! Nàng é yubak mara lé hkyut pyám byi bê." ga tai ri.

²¹ Haú hkũn, Hparishe pé eq tará sará pé gi, "Shí su ga luí, Garai Gasang lé rhoi dang tai é sũ gi, ó yuq wá nghut lhê lúhú? Garai Gasang za a nghut jáng, yubak mara wó hkyut pyám byi sũ gi, ó yuq wá nghut lhê lúhú?" ga luí, myit sòn wui nyi bum akò.

²² Yesuq gi, yhangmoq myit sòn wui nyi é hkyô lé sé mù, "Nungmoq é i-myit hkaũ má, haí mù shí pé lé myit sòn wui nyi akò lúhú? ²³ 'Náng é yubak mara lé hkyut pyám byi bê.' nghũ tai rá eq, 'Toq luí, hkyô so aq.' nghũ tai rá má, hká hkun je tai lui lhê lúhú? ²⁴ Nghut kôlhang, haú Byu Yhangzo* gi, mingkan htoq má, mara hkyut byi rá ahkáng wó Sũ nghut é lé, nungmoq lé sé

nhâng nau lhê." ga mù, haú gũngjum shí sũ lé, "Ngò, náng lé tai bá, toq aq, náng é taphkang yu chũng luí, yhũm tau ló aq hkoi." ga tai ri. ²⁵ Haú hkũn jáng, yhang gi, yhangmoq é hí mã toq yap mù, yhâng é taphkang waq chũng luí, yhang é yhũm shut Garai Gasang lé hkyá-on kungtõn uchyang ló byuq bê. ²⁶ Byù banshoq bang gi, gyai mau byuq kômù luí, Garai Gasang lé hkyá-on kungton akò nghut ri. Yhangmoq gyai gyuq mau dik é èq le, "Hkũ-nyí, nga-nhũng, mauho amù pé lé myàng bê." ga tai nyi akò.

Yesuq Gi, Lewiq É Yhũm Má Yubak Dap Bang Eq Rahá Zo Shuq É Hkyô

Mht 9:9-13; Mrk 2:13-17

²⁷ Hau htàng má, Yesuq sô e ló le, Lewiq gá é kang guq sũ rayuq yhâng é kang guq zúm má zung tó é lé é myàng mù, haú yuq lé, "Ngá htàng cháng aq." ga tai ri. ²⁸ Lewiq gi, haú mã é zè banshoq lé tó pyám to mù, toq luí, Yhâng htàng cháng bê nghut ri.

²⁹ Hau htàng, Lewiq gi, yhâng é yhũm má Yesuq é matú zoshuq pói mò kut byi ri; poi haú má kang guq bang myo myo eq byù góbang le, yhangmoq eq rahá za zò zung nyi bum akò. ³⁰ Haú mù luí, Hparishe pé eq yhangmoq hpúng mã é tará sará pé kùm gi, "Nungmoq gi, haí mù luí kang guq bang eq yubak dap bang eq rahá zo shuq nyi akò lúhú?" ga, Yhâng é chángzô pé lé mara hũn dang tai akò.

³¹ Yesuq gi, yhangmoq lé, "Wángzán bang chí sará a ra kó, nõhpyo lui bang za sheq ru rá lhê. ³² Ngò gi, dingmán bang lé wut yù rá matú jé lé é a nghut, yubak dap bang myit lhĩng rá matú sheq jé lé é ru nghut lhê." ga tú tai ri.

Zoshuq Gám Hkyô Eq Séng Luí, Yesuq Tai É Hkyô

Mht 9:14-17; Mrk 2:18-22

³³ Dum, yhangmoq gi, "Yohan é chángzô pé gi, zoshuq gám mù kyũdung dung kut akò; Hparishe pé é chángzô pé le, haú su kut akò; nghut kôlhang, náng é chángzô pé gi, haí mù zò nyi shuq nyi akò lúhú?" ga Yesuq lé tai akò.

³⁴ Yesuq, yhangmoq lé tú tai é gi, "Bĩng pé gi, lusik eq rahá nghut nyi to ashí hkũn, yhangmoq lé zo shuq wó gám nhâng rá lúhú?

³⁵ Nghut kôlhang, lusik† lé yhangmoq chyáng mai shuí yu pyám é hkying jé rá nghut lhê; haú buinyi pé má kùm gi, yhangmoq, zoshuq gám kó rá nghut lhê." gá ri.

³⁶ Dangtũ dõng mai le, Yesuq, yhangmoq lé tai é gi, "Mebu sik mã é lé yhang cheq yù mù, mebu xau má hpo é gi, ó a kut wú kó; haú su kut é nghut jáng, mebu sik lé le lãng cheq pyám é dut mù, pãn jap sik le mebu xau eq du lhum rá a nghut. ³⁷ Tsiyiq wing asik lé

* 5:24 Byu Yhangzo gá é gi, Yesuq Yhàngũng yhang lé le tai é nghut lhê, Mesaia lé le tai é nghut lhê. † 5:35 Lusik gá é gi, Yesuq lé tai nau é nghut lhê.

le, shokuq htung axau má ó a kat wú kó. Kat é nghut jáng, tsibiyiq wing asik gi, htung lé lhoq buq goq nhâng mù, tsibiyiq wing le yui shun byuq, htung le hten byuq, dut rà nghut lhê. ³⁸ Haú su a dut shoq gi, tsibiyiq wing asik lé, shokuq htung asik má kat ra rà nghut lhê. ³⁹ Tsibiyiq wing axau shuq nyí bè sù gi, asik lé a shuq naú nghut rà; hkâsu mù gâ le, 'Axau sheq je nghâm ri.' ga tai rà." ga ri.

6

Bánno Buinyi Má, Yesuq É Chángzô Pé Kyôshi Shap Zô É Hkyô

Mht 12:1-8; Mrk 2:23-28

¹ Bánno buinyi ra-nyí má, Yesuq gi, Yhâng é chángzô pé eq yò hkaú mai sô lai ló é hkûn, Yhâng é chángzô pé gi, kyôshi ratsuí langshap yú mù, loq èq nè hpuq zô akó. ² Haú mù luí, Hparishe pé ra-am gi, "Bánno buinyi má a ge kut jung lé, nungmoq gi, haí mù luí haú su kut akó lhú?" ga tai akó.

³ Yesuq gi, yhangmoq lé, "Dawiq lháng gi, yhang htang châng é bang eq rahá zomut hung é hkûn, hkâsu kut é hkyô lé, nungmoq a nghap wú kó lhú?" ⁴ Dawiq gi, Garai Gasang é yhâm* hkaú má wang é mù, hkyangjông pé mai lai luí, ó le a ge zô é, kyang tô é muk lé yú zo mù, yhang htang châng é bang lé le, byi tsô é a nghut kó lhú?" ga tai ri. ⁵ Hau htang, Yhang gi, "Haú Byu Yhangzo gi, haú Bánno buinyi é Yhumsing nghut lhê." ga yhangmoq lé tai ri.

Loq Jum Shi Sù Lé Yesuq Lhoq Gê Byí É Hkyô

Mht 12:9-14; Mrk 3:1-6

⁶ Gotú Bánno buinyi má le, Yesuq gi, taring má wang mù mhoqshit nyí é hkûn, loqyo loq ajum shi byuq é byu rayuq haú má nyi tô ri. ⁷ Haú hkûn, tará sará pé eq Hparishe pé gi, Bánno buinyi má nòhpyo lhoq gê byi rà lhú ga luí, Yhang lé mara wó hún shoq ga gyám wú nyi akó. ⁸ Yesuq kúm gi, yhangmoq é i-myyit lé sé sù nghut luí, loq jum shi sù lé, "Toq mù, banshoq bang é hí má, yap shit aq." ga tai kat ri. Haú yuq le, toq mù yap tô ri.

⁹ Haú hkûn, Yesuq gi, "Ngò nungmoq lé myí wú kôlé, Bánno buinyi má, ge é muzó kut rá, a ge é muzó kut rá, byu asak hkyi rá eq lhoq hten rá pé má hká lhum kut le sheq tará wang lhê lhú?" ga luí, yhangmoq lé tai ri.

¹⁰ Hau htang má, yhangmoq banshoq lé lhing wú mù, haú loq jum shi sù lé "Náng é loq nyhang kat aq." ga tai kat é hkûn lé, yhang le loq nyhang kat luí, yhang é loq

gi, shoq za ge byuq bê nghut ri. ¹¹ Nghut kólháng, yhangmoq gi, myoq chum nhô chik yhang nhik-yo naú kômù luí, "Yesuq lé hkâsu wá kut pyám rà lhú?" ga luí, rayuq eq rayuq tai lhúm nyi akó.

Raxe Í Yuq Lé Lagyo Ga Myhông Yu É Hkyô

Mht 10:1-4; Mrk 3:13-19

¹² Haú yoq ra-nyí má, Yesuq gi, kyúdung rá ga bùm shut htoq e ló luí, ra-myin mau Garai Gasang lé kyúdung nyi ri. ¹³ Maubó jáng Yhâng é chángzô pé lé wut yú mù, yhangmoq chyáng má é raxe í yuq lé hkyin yú luí, lagyo pé ga myhông to byí ri. ¹⁴ Haú bang gi, Yesuq eq Petruq ga mying myhing byí é Simun eq, yhanggu Andre, Yakuq eq Yohan, Hpilip eq Barhtolome, ¹⁵ Mahte eq Htomaq, Alhpe é yhangzo Yakuq eq Zelutuq† dut é Simun, ¹⁶ Yakuq é yhangzo Yudaq eq, Yesuq lé ap pyám rà sù Yudaq Iskarut pé nghut akó.

Hkungsô Wó É Hkyô Eq Dingnyé Wó É Hkyô

Mht 4:23-25; 5:1-12

¹⁷ Yesuq gi, yhangmoq eq rahá gyó ló mù, janggyú má yap tô é hkûn; Yhâng é chángzo moq mó le mù, Yuda mau banshoq má é bang, Yerusalem wá mò má é bang, wuishuq lung-aú ayám má é Turuq myuq eq Sidun myuq má é bang, rajùm rayó gi, ¹⁸ Yhâng é dang gyó yú rà eq yhangmoq é nòhpyo lhoq gê nhâng rà matú, rahá za zup ming tô akó. Agè ashop é nat eq zing-ri huí é bang le ge byuq akó. ¹⁹ Yhâng é gùng mai htoq é wum-ô eq byu banshoq lé lhoq gê byí nyi é yanmai shiwa byu pé le Yhang lé wó zang shoq ga, ho nyi akó.

²⁰ Haú hkûn, Yesuq gi, Yhâng é chángzô pé lé wú kat luí tai é gi,

"Myùng bang nungmoq gi, hkungsô wó nyi ri, hkâsu mù gâ le, Garai Gasang é mingdán‡ gi, nungmoq é mingdán nghut nyi ri.

²¹ Ahkuí, zomut wuishit huí nyi é bang nungmoq gi, hkungsô wó nyi ri, hkâsu mù gâ le, nungmoq nhik dik shoq myàng zo kó rà nghut lhê.

Ahkuí, ngau nyi bang nungmoq gi, hkungsô wó nyi ri, hkâsu mù gâ le, nungmoq myang wui kó rà nghut lhê.

²² Haú Byu Yhangzô é yanmai nungmoq lé su èq a ngui é, lhoq hpyoq lhoq kâng é, hoq hpu nhang é,

agè ashop nghut é dong jihpoi gamhkui huí é hkûn, nungmoq gi, hkungsô wó nyi ri.

* **6:4** Garai Gasang é yhâm nghu é gi, Yerusalem wá mó má joq é saksé zúm lé gâ é nghut lhê. † **6:15** Zelutuq gâ é lichyúm gi, yhumsing zui sai é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó rà matú shikut nyi é hpung bang lé, Zelutuq gâ lhê. ‡ **6:20** Garai Gasang é mingdán gâ é gi, Garai Gasang up é lé gâ lhê.

²³ Haù hkûn lé, gabú byam chyû nyi keq, hkâsu mù gà le, wú keq, nungmoq é matú kô é chyunghuq gi, mauhkûng mingdán má joq tô ri. Ngò, nungmoq lé tai lhê, hkâsu mù gà le, yhangmoq é íchyí íwâ pé le myiqhtoi pé[§] lé haù su kut wú bekô."

²⁴ Nghut kôlhang, sùt wó bang nungmoq gi, dingnyé wó rà, hkâsu mù gà le, nungmoq gi, yhumsing gùng má nhik shí nhik dik é hkyô lé huí yú bekô.

²⁵ Ahkuí, gyi gyi dau dau myàng zo myàng shuq nyi é bang nungmoq gi, dingnyé wó rà, hkâsu mù gà le, nungmoq zòmút wuìshit é huì kó rà nghut lhê.

Ahkuí, wui nyi é bang nungmoq gi, dingnyé wó rà, hkâsu mù gà le, iyon yôn é eq ngaubyi ngau-nhap htoq é huì kó rà nghut lhê.

²⁶ Byù banshoq bang, nungmoq lé ge é byù ga kôjáng, nungmoq gi, dingnyé wó rà,

hkâsu mù gà le, yhangmoq é íchyí íwâ pé le, myiqhtoi pyoq pé* lé, haù su ga tai wú bekô.

Gye Pé Lé Chyitdap Râ Hkyô
Mht 5:38-48; 7:12

²⁷ Hau htoq agó, ngá dang gyô nyi bang nungmoq lé ngò tai kôlé, nungmoq é gye pé lé chyitdap nyi keq; nungmoq lé a nau a wôm é bang lé ge é hkyô kut keq;

²⁸ nungmoq lé nhing é bang lé, shimân byi keq; nungmoq lé rhoi é bang lé kyûdung byi keq. ²⁹ Nang lé bo-pyuq rahkyam shut pyuq byi sù lé, rahkyam dum hkâm byi shi aq; nang bumó hkyut yu é sù lé, buzo le dum hkyut byi shi aq; ³⁰ nang lé rajung jung dúng é sù lé le, byí pyám aq; nang zè yu pyám byí é su chyáng mai le, hkâdúng yù lo.

³¹ Nungmoq ô nau é dông supé lé kut nhâng nau é su, yhangmoq lé le kut byi keq.

³² Nungmoq lé chyitdap é bang lé za chyitdap kô le gi, nungmoq é matú hai akyû bò kó rà lhú? Yubak dap bang le, yhumsing lé chyitdap é bang lé gi, chyitdap nyi akô.

³³ Nungmoq lé ge é dông kut nyi é bang lé za, ge é dông kut nyi kô le gi, nungmoq é matú hai akyû bò kó rà lhú? Yubak dap bang le haù su kut nyi akô. ³⁴ Supé lé zè chyí byí le, dum wó tau byí rà su dut é bang lé za, chyí byí le gi, nungmoq é matú hai akyû bò kó rà lhú? Yubak dap bang lháng chyí byí é myhó dum wó yú shoq, yubak dap é bang lé chyí byí akô. ³⁵ Nghut kôlhang, nungmoq gi, nungmoq é gye pé lé chyitdap mù, ge é dông kut byí nyi keq. Dum wó tau yù rà lé myoq a byu é za, chyí ngò byi keq; haù su kut jáng, nungmoq wó é chyunghuq ko

râ eq, Myhang htáng htúm Su é yhangzô pé dut rà nghut lhê; hkâsu mù gà le, Yhang gi, jeju a dat bun bang eq agè ashop é bang lé ge é kut nyi ri. ³⁶ Nungmoq é íwâ Garai Gasang shogyo nhikmyin sê é su, nungmoq le shogyo nhikmyin nyi keq.

A Jéyáng Râ Hkyô

Mht 7:1-5

³⁷ A jéyáng é za nyi keq; haù jáng, nungmoq le jéyáng é a huì kó rà nghut lhê. A doqdân é za nyi keq; haù jáng, nungmoq le doqdân é a huì kó rà nghut lhê. Mara hkyut byi keq; haù jáng, nungmoq le mara hkyut byí é huì kó rà nghut lhê. ³⁸ Byi keq, haù jáng, nungmoq le dum byí é huì kó rà nghut lhê. Mán é búng mai bying mui shûn shoq nhûn chyíng, dùn chyíng kat mù, nungmoq é tanghkoí hkaù má lik kat byí é huì kó rà. Hkâsu mù gà le, nungmoq lik byí é bung eq, nungmoq lé dum lik byi rà nghut lhê." gà ri.

³⁹ Hau htoq agó, Yhang dangtú ralhum dông yhangmoq lé dum tai é gi, "Myoqjit sù gi, myoqjit sù lé hkyô wó tûn shit lhê lhú? Yhangnhik í yuq é donghkong má byit gyó kó rà nghut lhê, a nghut kó lhú? ⁴⁰ Jongzo gi, sará htoq gyaú rà a nghut; nghut kôlhang, gúm shoq mhoq yú bê sù ó nghut kôlhang, yhumsing é sará su dut rà nghut lhê.

⁴¹ Yhumsing myoq hkaù má lúng tô é siktúm† lé lháng a myit wú é nhing, haí mù luí, nungmoq lé myoqwàng‡ lé myang lhê lhú? ⁴² Yhumsing é myoq má lúng tô é siktúm lé lháng a myàng sù nhing, 'Gumang hpó ê, nang myoq má lúng tô é myoqwàng lé, ngò choq pyám byi lé.' nghú luí, nang é gumang hpó lé hkâsu wó tai rà lhú? Gegùn labyoq kut sù ê, nang é myoq má lúng tô é siktúm lé hí choq pyám aq. Haù jáng sheq, nunggu nungmang é myoq má wang tô é myoqwàng lé choq pyám byi rà matú, nang san za myàng rà nghut lhê.

Agàm Eq Ashi

Mht 7:17-20; 12:34-35

⁴³ A ge é ashí zuí é, ge é shigâm hkámá le a joq. Ge é ashí zuí é, a ge é shigâm le a joq. ⁴⁴ Haù mù luí, shigâm hkangmó lé, zuí é ashí lé wú mù wó sê hkyin yu lhê. Dangké, zubyap mai maihpáng-shi ó le a myang hpyoq yù wú, zugyóm mai le tsibiyiq shi a wó hpyoq yu wú. ⁴⁵ Ge é sù gi, yhumsing é i-myit unghkaù má é sutdó mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaù má é agè ashop é sutdó mai, agè ashop é zè pé lé lhoq htoq shit lhê. Haù mù gà le, yháng é i-myit

§ 6:23 Myiqhtoi pé le zing-ri huí é yanmai, yhangmoq chyunghuq wó nyi akô. Haù eq rajung za, jamjang huí é bang nga-nhúng le chyunghuq wó rà nghut lhê. * 6:26 Myiqhtoi pyoq pé gi, Garai Gasang jéyáng é huí rà. † 6:41 Siktúm nghu e gi, yubak mara kô é lé tai lhê. ‡ 6:41 Myoqwàng nghu e gi, yubak mara atiq azo lé tai é nghut lhê.

unghkaq má byíng muí tò é lé za, yhang é nhut mai taí htoq lo é nghut lhê.

Luaqtân Htoq Má Yhùm Sai Sù Eq Myi Chín Dum Má Yhùm Sai Su É Hkyô

Mht 7:24-27

⁴⁶Ngò taí é eq rajung za lhang a wó châng kut kô é nhing, haí mù luí, nungmoq Ngo lé 'Yhumsing ê, Yhumsing ê.' nghu nyi akò lhu? ⁴⁷Ngá chyáng lé mù, ngá dang gyô yù luí, châng kut é sù ó nghut kôle, hkasú é sù eq wuí é lé ngò nungmoq lé shit kyo kôle. ⁴⁸Hau yuq gi, wahpang yhùm sai le, nik nik du luí a dui é lungtân htoq má apùn awang hi é sù eq wuí lhê. Wui jê lò luí wuihau pé eq yhùm hau lé lo gùn kôlhang, ging ting ting sai to bè nghut luí, hau lé a wó gun nhún. ⁴⁹Ngá dang gyô yù mù, a cháng sù gi, apùn awang a sai é za myi chín dum má wahpang yhùm sai sù eq wuí nyi ri. Wuihau pé eq yhùm hau lé lo gun kat é eq, hau hkún jáng, lêng gyop byuq ri. Yhùm hau byoq hten byuq é gi, yù whuí a bò loshoq dut byuq rá nghut lhê." ga ri.

7

Romaq Gyezau Rayuq É Lumjing Myit

Mht 8:5-13; Yhn 4:43-54

¹Yesuq gi, shiwa byu pé lé ban mhoqshít é htâng má, Kaperna-um wà shut wang ló ri. ²Hau hkún, Romaq gyezau rayuq é chyitdap dui-nhâng zoshâng gi, shi-nò no nyi ri. ³Hau u lé, gyezau hpó gi, Yesuq é hkyô lé wó gyo jáng, yhang é dui-nhâng zoshâng lé lhoq gé byi rá matú, Yesuq lé é ji lò keq ga, Yudaq suwún wuí lé nhang kat ri. ⁴Hau bang gi, Yesuq chyáng jé é kô é hkún, "Yhang gi, nang shí hkyô kut byi rá matú gingdán é sù, yhang nghut nyi ri; ⁵hkásu mù gá le, yhang gi, nga-nhâng amyú lé chyitdap é eq, ngamoq matú tarajung le kut byi sù nghut ri." ga luí, Yhang lé zuq zuq dúng wut nyi akò. ⁶Hau mù luí, Yesuq gi, yhangmoq eq rahá za e ló ri.

Hau yhùm eq hká hé a wê é má jé jáng, Romaq gyezau hpó, yhang é luzúm wuí lé taí nhang kat é gi. 'Yhumsing Yesuq é, nang gung lé hkálhoq hkyik lo. Nang, ngá é laishín-htâng má, lé nang rá lhang ngò má a gingdán. ⁷Hau mù, ngò, nang chyáng jé rá matú gingdán é sù a nghut; Nang, dang rahkun za taí kat laq, hau hkún, ngá é dui-nhâng zoshâng ge ló rá nghut lhê. ⁸Hkásu mù gá le, ngò le ahkáng ayá wó é zau rayuq é a-ô má é zau nghut lhê; ngá é a-ô má le gyezô pé nyi lhê, rayuq lé 'É aq!' nghu le, yhang e ló lhê; góyuq lé, 'Lò aq!' nghu le, yhang lò lhê; ngá jún lé le, 'Shí kut aq!' nghu le, yhang kut lhê." ga ri.

⁹Yesuq gi, dang hau lé wó gyo jáng, hau yuq é hkyô lé mau byuq luí, Yhang htâng châng é shiwa byu pé lé lhang wú mù, "Ngò, nungmoq lé taí kôle, Israellaq amyú má

lhang, shí í lumjing é sù lé, Ngò a myang wú." ga taí ri. ¹⁰Nhang kat é bang yhùm má dum taú jé jáng, no nyi é dui-nhâng zoshâng gi, ge to lóng é lé ló myang akò.

Shí Sù Lé Dum Lhoq Tui É Hkyô

¹¹Hau htâng hkâ-myháng a myáng má, Yesuq gi, Yhang é chángzô pé eq, shiwa byu moq mó le mù rahá za Na-in gá é wà shut e ló akò. ¹²Hau wà wàng hkum má jé lo é hkún lé, chuimó myhí é yuqzo te gi, shí mù, yhang é mâng lé waq htoq lé lo akò. Wà byu myo myo le, chuimó myhí hau eq rahá châng lé lo akò. ¹³Yhumsing gi, hau chuimó myhí lé myàng jáng, yhang lé wú shogyo luí, "Hkâ-ngau." ga taí ri.

¹⁴Yesuq gi, gung shut huí é mù, loq èq é záng kat ri. Hau hkún, waq tò é bang le jàng yap to byí akò. Yhang gi, "Zorâm é, ngò, nang lé taí lhê, toq aq." ga taí ri. ¹⁵Hau hkún, shí bè sù gi, toq zùng mù dang taí lo ri. Yesuq gi, zorâm hau lé yhangnú chyáng dum ap byí ri.

¹⁶Byu lhunglhang bang gyuq mau bùm kólú, Garai Gasang lé hkya-ôn é dang gi, "Myiqhtoi mó, nga-nhâng chyáng lé pò htoq bè nghut ri. Garai Gasang gi, Yhang é amyú lé garúm rá ga lé kùm wú nyi ri." ga taí nyi akò. ¹⁷Hau Yesuq é hkyô eq sêng é ludang lé, Yuda mau eq hau mau awui ayàm jowò hkangmó má taí pyo myhín ló bum akò.

Yesuq Eq Wui-myhup Sará Yohan É Hkyô

Mht 11:1-19

¹⁸Hau hkún, wui-myhup sará Yohan é chángzô pé gi, hau hkyô banshoq yhang lé lo taí kyô akò. ¹⁹Hau mù luí, Yohan gi, yhang é chángzo í yuq lé ji yù mù, hau Yhumsing chyáng nhang kat luí, "Nang gi, hau jé lé lò rá Sù nghut lhê lhu? Hau a nghut jáng, ngamoq, góyuq lé lóng ra shirá lhu?" ga, myí nhang kat ri.

²⁰Hau nhik gi, Yesuq chyáng jé jáng, "Nang gi, hau jé lé lò rá sù nghut lhê lhu? Hau a nghut jáng, ngamoq góyuq lé myoqbyu lóng nyí ra shirá lhu?" ga luí, Wui-myhup Sará Yohan gi, ngá-nhik lé nang chyáng myí nhang kat ri." ga taí akò.

²¹Hau u yhang, Yesuq gi, nò zo hpýo zo, noli nojàng huí é bang eq agè ashop é nat dap jun dap é byu myo myo lé le, lhoq gé byí ri. Myoqjit bang myo myo lé le, myoq dum myàng nhang ri. ²²Hau hkún, Yesuq gi, yhangnhik lé, "Myàng mi-myàng, wó gyo má wó gyo, Yohan lé lò taí kyo keq; myoqjit bang, myoq wó myàng bekô; hkyí hten bang le, wó so bekô; manggám dap bang le, lhoq gé byí é hui bekô; nojit bang le, wó gyo bekô; shí bè bang le, lhoq dui toq é hui bekô; myùng bâng é matú, gabú danglù hko kyô nyi bè nghut lhê. ²³Ngá é yanmai, Ngo lé lum shut é hkyô a bò sù gi, hkungsó wó nyi ri." ga taí ri.

²⁴ Yohan é chángzô nhik ló byuq é htâng má, Yesuq gi, Yohan eq séng luí, byù moq mó lé tai é gi, "Nungmoq gi, hai lé hpuq wú rá matú, hau yoso shut e akó lúh? Lai eq hik nhún é jamgám lé wú rá matú ngut akó lúh? ²⁵ Hau á ngut jáng, hai lé wú rá matú e akó lúh? Nú-nhám é mebu wut sù lé wú rá matú e akó lúh? A ngut! Wú keq, gyai hpaú é mebu wut luí agùn agó wó bang gi, hkohkâm-wâng pé má sheq ru nyi lhê. ²⁶ Hau ngut le gi, hai lé wú rá matú é kô é lúh? Myiqhtoi rayuq lé lúh? Hau kúm ngut ri. Ngò, nungmoq lé tai kôlé, Yohan gi, myiqhtoi htoq lhang gyá sù ngut lhê. ²⁷ Hau yuq é hkyô lé, Chyúmdang má kâ tô é gi,

'Wú aq, Náng é hkyô lajang láng rá matú, Ngá é lagyo lé, Náng é hí má Ngò nhang kat rá ngut lhê.'*

gâ ri. ²⁸ Ngò, nungmoq lé tai kôlé, myiwe wui mai hku kat é bang má, Yohan htoq je kô é rayuq lhang á nyi, ngut kôlhang, Garai Gasâng é mingdán má je tiq dik sù gi, Yohan htoq je kô lhê." gâ ri.

²⁹ Mingbyù lunglhang bang eq kang guq bang gi, dang hau pé lé wó gyo kôjáng, Yohan byi é baptisma lé hkám yu kô é ngut mù luí, Garai Gasâng é dingmán é hkyô lé sé gyô yu akó. ³⁰ Hparishe pé eq tará sará pé kúm gi, Yohan byi é baptisma á hkám yu kômù luí, Garai Gasâng hen lajang é hkyô lé yhumsing gung é matú he-ngik pyám akó.

³¹ Yesuq dum tai é gi, "Hau mù luí, byù myú shí lé, Ngò, hai eq tai kê wú rá lúh? Yhangmoq hai eq wú akó lúh? ³² Yhangmoq gi,

'Nungmoq é matú, ngamoq sampyi mut byi kôlhang, nungmoq gi, á gó kó, ngamoq ngaú hkyangsâng kôlhang, nungmoq gi, á ngaú kó.'

ga luí, gai pé má zùng uchang rayuq eq rayuq wut tai lhum nyi é zoshâng wui eq wui akó. ³³ Hkásu mù gâ le, Wui-myhup Sará Yohan jé lé luí, muk á zo, tsibiyiq á shuq é nyi le le, 'Yhang gi, nat gang dap sù ngut ri.' ga luí, nungmoq tai akó. ³⁴ Hau Byu Yhangzo jé lé luí, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq yubak dap bâng é buinùm hpó ngut ri.' ga dum tai akó. ³⁵ Ngut kôlhang, hpaqchyí byéng-yá é yhangzô pé gi, hpaqchyí byéng-yá tengmán é hkyô lé saksé hkám byi nyi akó.* gâ ri.

Yubak Dap É Myiwe Rayuq, Yesuq Lé Xù But Byi É Hkyô

³⁶ Hparishe rayuq gi, Yesuq lé yhang chyáng zang zo rá matú ji kat ri. Hau mù,

Yesuq gi, hau Hparishe é yhúm má wàng luí zo rá matú zung tô ri. ³⁷ Hau hkún, wú keq, hau wâ má é yubak dap é myiwe rayuq gi, Yesuq hau Hparishe é yhúm má zô zung tô é lé sé jáng, gyai hpau dap é namngón xù bó é luq hpyù bông yu lé luí, ³⁸ Yesuq é nunghtáng hkyí wàng má ngau yap to mù, Yhâng é hkyí má ngaubyí eq záng lhoq teq byi jáng, úxam eq but sut pyám byi ri. Dum ngut jáng, nhut eq puq luí mura lé but byi ri.

³⁹ Yesuq lé ji é Hparishe wá gi, hau lé myàng jáng, "Shí yuq myiqhtoi ngut le gi, Yhang lé záng htùng é sù, ó yuq ngut é eq hkásù é yubak dap é myiwe ngut é lé, Yhang sé rá ngut lhê." ga luí, yhâng é unghkau má myit nyi ri.

⁴⁰ Yesuq gi, "Simun é, Ngò, nang lé tai rá rajung joq ri." ga tai ri.

Simun le, "Sará é, tai aq." ga tai kat ri.

⁴¹ Hau hkún, Yesuq gi, "Ngùn chyí zo sù rayuq chyáng, chyín dap é byù í yuq nyi ri.

Rayuq gi, denari† ngo shô chap, rayuq gi, ngo xê chap dap ri. ⁴² Hau nhik gi, chyín xap rá ngùn á wó kólú, chyín yhumsing gi, yhangnhik lé xap á ra lò gâ pyám ri. Hau mù luí, hau nhik má é hká yuq gi, yhang lé je chyitdap rá lúh?" ga myi ri.

⁴³ Simun gi, "Je myo lhoq lhut hui sù, ngut rá su ngam ri." ga tú tai ri.

Yesuq gi, "Nàng myit e dòng jô ri." ga tai ri.

⁴⁴ Hau hkún, Yesuq, myiwe zo hau lé lhing wú luí, Simun lé, "Nàng myiwe zo shí lé myang lhê lúh? Ngò, nàng é yhúm má wang le, hkyí chí rá uchyang, nàng á byi, yhang kúm gi, ngaubyí eq ngá hkyí lé tik byi luí, yhâng é xam eq sut pyám byi bê. ⁴⁵ Nàng gi, ngo lé nhut eq á puq ngut ri; yhang kúm gi, ngò yhúmkaú má wang é mai ngá hkyí má á no loshoq puq nyi rá. ⁴⁶ Nàng gi, ngá ulhum má xù á but byi wú, yhang kúm gi, ngá é hkyí má nàm ngón é mura but byi bê ngut ri. ⁴⁷ Hau su mù, ngò, nàng lé tai lé, hau myiwe gi, je chyitdap luí, yhang wó é yubak myo myo lé hkyut pyám byi é hui bê. Shau za mara hkyut pyám byi é hui sù gi, shau za chyitdap sù ngut ri." ga tai ri.

⁴⁸ Yesuq gi, myiwe hau lé le, "Ngò, nàng é yubak mara hkyut pyám byi bê." ga tai ri.

⁴⁹ Rahá zung tô é bang gi, "Yubak mara lhang wó hkyut pyám byi sù, shí yuq gi, ó wá ngut lhê lúh?" ga luí, myit nyi bum akó.

⁵⁰ Yesuq gi, "Náng é lumjing myit eq nang lé hkyi yù bê, ngón zá ló aq hkoi." ga luí, myiwe hau lé tai kat ri.

8

Yesuq Htâng Châng É Myiwe Wui

* 7:27 Mal 3:1 * 7:35 Ngut kôlhang, Garai Gasâng é hpaqchyí byéng-yá lé lhom hap yu é banshoq bang gi, Garai Gasâng é hpaqchyí byéng-yá hau, tengmán ri ga saksé hkám nyi akó. † 7:41 Denari rachap gi, ra-nyí lhê é byù rayuq é zuihpau eq wui ri.

¹ Hau htâng hkâ-myhâng a myáng má, Yesuq gi, Garai Gasâng é mingdán hkyô eq sêng é gabú danglú lé tai kyo uchyang, Yhâng é lagyo raxe í yuq eq rahá za, rawa htâng rawá jé e ló ri. ² Hau htoq agó, nat gang dap é mai le, nõhpyo mai le Yesuq eq lhoq ge yu é myiwe wui, nat nyhit nat lhoq htoq pyám byi huí é, Magadalaq wà mã é Mariq le, ³ Herut é ikun zum sù Kuza é yhumsing myhi Yoanaq le, Susannaq le, gotú myiwe wui myo myo le, Yesuq eq rahá nghut akó. Haú bang gi, yhumsing wó du é í Yesuq eq lagyo pé lé byi zo byi huq nyi akó.

Kyôshi Sân É Hkyô

Mht 13:1-23; Mrk 4:1-20

⁴ Wà hkang wà mó mã é bang gi, Yesuq chyáng zup zing lé lo bùm kômù shiwa byu moq mó zup ming tô é hkún, Yesuq dangtú dông tai kyô é gi, ⁵ "Kyô hkyô sù rayuq gi, kyôshi san rá ga htoq e ló ri. Yhang, kyôshi sân kat é hkún, ra-am gi, hkyô má gyó ang mù, byu eq záng nãng pyeq pyám lhê, maulat nghoq pé eq hte zo pyám lhê dut ri. ⁶ Ra-am gi, luqgok yò má gyó ang mù, yuq htoq lo é hkún, myigùng a teq é yanmai nyhuí shi byuq akó. ⁷ Ra-am gi, zugyóm hkaú má gyó ang luí, zubyap eq rahá yuq htoq lô mù, wup pyám é hui bê nghut ri. ⁸ Nghut kólhang, ra-am gi, myihpún bo é jang má gyó ang mù, yuq kó lò jáng, rashô tú myô jat lo ri." ga tai ri.

Yhang haú su ga tai nyi é hkún, "Gyô yù rá nohkyap dap sù gi, gyô yù sháng gaq!" ga le, htê mó eq tai kat ri.

⁹ Haú hkún, Yhâng é chángzô pé gi, dangtú shí hai lichyúm nghut lhê lhú ga, Yhang lé myi akó. ¹⁰ Yhang gi, "Garai Gasâng é mingdán eq sêng é sê gyo wui é hkyô pé lé sê gyo rá ahko ahkáng, nungmoq lé byi to bê. Nghut kólhang, góbàng matú gi, "Wú to kólhang, a myàng kó sháng, gyô nyi kólhang, a sê gyo kó sháng."* nghú, ngò dangtú dông tai lhê.

¹¹ Ahkui lhê é dangtú shi é lichyúm gi, ísu nghut ri: kyôshi gi, Garai Gasâng é mungdang nghut nyi lhê. ¹² Hkyô má gyó âng é kyôshi gi, hai eq wui lhê lhú gâ le, haú mungdang lé byu pé wó gyó é htâng má, lumjing é má le, hkyi yu é má le, a jé kó sháng gaq ga luí, yhangmoq é i-myyit hkaú mai nat Tsadán eq mungdang haú lé, lé yu pyám é hui bang eq wui lhê. ¹³ Luqgok yò pé má gyó âng é kyôshi gi, hai eq wui lhê lhú gâ le, haú mungdang lé wó gyo jáng, gabú myit eq hap yù kólhang, amyit a wó chin mù, rayoq rabun za lumjing luí, gunglau lui é nyi má, dum htak lò byuq é bang eq wui lhê. ¹⁴ Zugyóm má gyó âng é kyôshi gi, hai eq wui lhê lhú gâ le, haú mungdang lé gyô yù luí, yhumsing é asak dui e ló é hkyô má, shí ipyat lhê é

myit wui myit hke hkyô, ngùn zè sutgan eq mingkan ngon hkyô má myup byuq luí, mó é ashi a zui é bang eq wui lhê. ¹⁵ Hpún bo é myigùng má gyó é kyôshi kúm gi, hai eq wui lhê lhú gâ le, haú mungdang lé lhumzui luí ge é i-myyit eq ban gyô yù mù, ging ting shoq zui zing luí, wó jân é i-myyit eq ashi zui é bang eq wui lhê.

Myibung Htún É Hkyô

Mrk 4:21-25

¹⁶ Myibung lé tap mù, àu eq nghop tô é le, yhupchong ô má tô tô é le, ó a kut wú kó. Nghut kólhang, wang lé lô bang myoq wó myàng rá matú kúm gi, tsungjang má tsung to to chyat kut akó. ¹⁷ Hkâsu mù gâ le, a htoqzê loshoq haq tô é zè hai le a joq, a sé a byông htoq loshoq wó zaú tô é zè le hai a joq nghut ri. ¹⁸ Haú mù luí, nungmoq hkâsu wó gyô yu é hkyô lé sidiq nyi keq, hai mù gâ le, wó to sù lé gi, jat byi shirâ, a wó su chyâng mai kúm gi, yhang wó to bün é mã é lé lháng, yu pyám byi shirâ nghut lhê." ga tai ri.

Yesuq É Yhângnu Eq Yhanggu Pé

Mht 12:46-50; Mrk 3:31-35

¹⁹ Haú hkún, Yesuq é yhângnu eq yhanggu pé gi, Yhâng chyáng lé lô kó le, shiwa byu pé lúm chyün chyap to kômù, Yhâng chyáng a wó wang é kó nghut ri. ²⁰ Haú hkún, Yhang lé, "Nãng nu eq nunggu pé gi, nang lé hui naú luí, shinggan má láng yap bum akó." ga tai kyo akó.

²¹ Yesuq gi, yhangmoq lé, "Garai Gasâng é mungdang lé gyô yù luí, châng é bang gi, Ngá nu eq Ngá gú pé nghut akó." ga luí, yhangmoq lé tú tai kat ri.

Laidun Mó Lé Yesuq Lhoq Zim É Hkyô

Mht 8:23-27; Mrk 4:35-41

²² Ra-nyí lé, Yesuq gi, Yhâng é chángzô pé lé, "Nga-nhúng nhông he hpoq shut dap e ló sháng." ga tai luí, lhai má wàng mù gú dap e ló akó. ²³ Yhangmoq gú dap e ló é hkún lé, Yesuq gi, yhup myhi tô ri. Haú u lé, nhông haú má laidun mó lò luí, lhai má wui bying lò mù, yhangmoq myup shí rá su dut lò nyi bekô nghut ri.

²⁴ Haú mù, yhangmoq gi, Yesuq chyâng huí é luí, Yhang lé nhaú pun mù, "Yhumsing é, Yhumsing é, nga-nhúng myup ló nyi ri." ga tai akó.

Haú hkún, Yhang toq luí, laidun eq wuilhêng pé lé tân kat jang, haú pé gi, zim za dut lò byuq bê. ²⁵ Haú mù, Yesuq gi, "Nungmoq é lumjing myit gi, hkámá nghut akó lú?" ga luí, yhangmoq lé myi ri.

Yhangmoq kúm gi, gyoq maú byuq bùm kólui, "Shí yuq gi, hkasú é byù nghut lhê là? Yhang hkunmó hkyô jáng, lai eq wuilhêng pé lháng gyo byi ri-nhung!" ga luí, rayuq eq rayuq myi lhum bum akó nghut ri.

* 8:10 Esai 6:9

Nat Lé Hkat Htoq Byí É Hkyô
Mht 8:28-34; Mrk 5:1-20

²⁶ Hau htâng, yhangmoq gi, Galile mau tú tap má é Gerase byu pé é mau má jé dap e ló bekô. ²⁷ Yesuq kong shut doq ló le, hau wá má é nat gang dap é sù rayuq gi, Yhang lé huí ri. Hau yuq gi, yhùm má le a nyi é za, mebu a dap é, lupdùng má myáng myáng nyi nyi sù nghut ri. ²⁸ Hau yuq gi, Yesuq lé myàng jáng, wut garu lui, yhâng é hkyí wang má pái gop to mù, "Myhang htâng é Garai Yhangzo Yesuq é, Nàng gi, ngò eq hái séng lhê thú? Ngo lé a zing-ri rá matú, ngò nang lé dùng nyi lhê." ga lui, Htê mó eq tái garú nyi ri. ²⁹ Hkásu mù gá le, yesuq gi, agé ashóp é nat lé hau yuq gùng mai htoq ló rá matú, tân pyâm é yanmai nghut ri. Byù hau yuq lé nat gâng eq adàm dàm wang júng hkangmó, loq eq hkyí má toqjâng tuí eq tuí shung, kyum xâng tô é eq, zúng tô é nghut kôlhang, lâng hpyit pyâm pyâm kut é htoq ago, nat gâng eq yhang lé yoso hkaú shut lánghap yù yù kut nyi ri.

³⁰ Yesuq gi, yhang lé, "Náng myíng hái gá lhê?" ga myí kat é hkùn, yhang gi, "Legio * gá lhê." ga tú tái ri. Hái mù gá le, yhâng chyáng nat gang myo myo wang lúng tô é yanmai nghut ri. ³¹ Nat jùm gi, yhangmoq lé nik dik htúm é Lasang-dong shut a kôn kat rá matú, Yesuq lé chòm dùng nyi bum akô.

³² Hau u lé, waq rájùm mó gi, bùm yàm má dù bù zò nyi bum akô nghut ri. Hau mù, yhangmoq gi, waq pé chyáng wàng nhâng laq ga, Yesuq lé ahkáng dum dung dùng kut kôjáng, Yesuq gi, yhangmoq lé ahkáng byi kat ri. ³³ Hau mù lui, nat gang jùm gi, byù hau yuq chyáng mai htoq ló kôlui, waq pé chyáng wàng byuq bekô nghut ri. Hau hkùn, waq hau jùm gi, gampyoq mai nhông hkaú shut rut đin yán wang ló kôlui, myup shi byuq bekô nghut ri.

³⁴ Waq zúng bang gi, hau su dut é lé myàng jáng, hpang đin ló kômù, myuq hkaú má é bang eq awui ayàm má é bang lé ló tái kyô akô nghut ri. ³⁵ Hau mù, wó gyô é bang gi, hau hkyô lé wú rá matú htoq lé lo akô. Yhangmoq gi, Yesuq chyáng jé lé kô é hkùn, nat gang htoq byuq hui sù, Yesuq é hkyí wang má mebu wut to lui, byù ge rayuq su zùng to lánng é lé myàng kômù, gyuq dan bùm bekô nghut ri. ³⁶ Nat dap sù lé hkásu kut lui lhoq ge yu é hkyô lé myang é bang gi, góbang lé tái kyô akô nghut ri. ³⁷ Hau hkùn, Gerase byu pé é mau má é lhunglhang bang gi, gyuq dan dik kôlui, Yesuq lé yhangmoq é mau mai htoq ló byuq rá matú, chòm dùng tôngbán akô. Hau mù lui, Yesuq gi, tái ló byuq rá matú lhai má wàng bê nghut ri.

³⁸ Nat htoq byuq hui é sù gi, Yesuq htâng cháng rá matú, Yesuq lé dùng tôngbán ri. ³⁹ Nghut kôlhang, Yesuq gi, "Nàng, yhùm shut sheq ló mù, Garai Gasang, nang lé hkâ-í kut byi bê hkyô lé, ló tái kyo aq." ga lui, yhang lé ló nhâng bê nghut ri. Hau hkùn, yhang htoq ló mù, Yesuq yhang lé hkâ-í kut byi bê hkyô lé, hau wá rawá bang lé ló tái kyô ri.

Ya-iruoq É Yhangzo Byizô É Hkyô Eq,
Yesuq É Bu Lé Lé Záng É Myiwe Rayuq É Hkyô
Mht 9:18-26; Mrk 5:21-43

⁴⁰ Ahkuí, Galile byu pé gi, Yesuq dum tái ló rá lé lánng nyi kô é nghut mù, Yhang dum tái gú dap lo é hkùn gabú myit eq lhom te yu akô. ⁴¹ Hau hkùn, Ya-iruoq gá é tarajong má up sù rayuq gi, jé lé ló mù, Yesuq é hkyí wang má hkyihput htuoq lui, yhâng yhùm má lé rá matú ji nyi ri. ⁴² Hkásu mù gá le, raxe í zân bô bê é, yhangzo byizo te gi, shi ló nyi é yanmai nghut ri.

Hau mù, Yesuq cháng e ló le, shiwa byu pé gi, Yhang lé záng htùng lo bum akô. ⁴³ Hau u lé, raxe í zân sui yui lui ngunzê lhunglhang ban pyâm shoq chí sará pé chyáng yá wú kôlhang, hká yuq le a wó yá gè byi é† myiwe myí rayuq le hau hkaú má bo tô ri. ⁴⁴ Myiwe hau gi, Yesuq é nunghtáng má huí lé mù, Yhâng é bushi htàng má é záng kat eq, sui yui é ana gi, ge byuq bê nghut ri.

⁴⁵ Hau hkùn, Yesuq gi, "Ngo lé, ó yuq záng bê thú?" ga lui myí jáng, lhunglhang bang gi, a sé ga he nyi bùm kô é hkùn lé, Petruq gi, "Yhumsing é, shiwa byu pé gi, náng é lhúngkyuq mai náng chyáng chyín chyap wang lo bùm kô é yanmai, nang lé záng bekô rá nghut lhê?" ga tái ri.

⁴⁶ Yesuq gi, "Byù rayuq ngo lé lé záng mù, ngá chyáng má é hpungwup a-tsam htoq ló é lé, ngò cháng sé kat ri." ga tái ri.

⁴⁷ Hau jáng, myiwe myí hau gi, yhang a wó haq záo to ló é hkyô lé sé jáng, req req nán lé ló mù, Yesuq é hkyí wang má ngóm gop kat lui, hai mù Yhang lé záng é hkyô eq, hká đong ge ló byuq é hkyô pé lé, shiwa byù banshoq đâng é hí má Yesuq lé tái kyô nyi ri.

⁴⁸ Yesuq gi, "Ngá zo é, náng é lumjíng myit gi, nang lé lhoq gè byi bê nghut ri, ngón za ló aq hkoii!" ga lui, myiwe hau lé tái kat ri.

⁴⁹ Yesuq gi, dang ru tái nyi ashí hkùn, tarajong má up sù Ya-iruoq é yhùm mai byù rayuq jé lé ló lui, "Nung zo gi, shi byuq bê, hau sará lé hkálhoq hkyik nyi lo." ga lui, Ya-iruoq lé tái kyô ri.

⁵⁰ Yesuq gi, dang hau lé wó gyo jáng, "Hkagyuoq, za lumjíng aq, hau jáng, yhang ge byuq rá nghut lhê." ga lui, Ya-iruoq lé tái ri.

⁵¹ Yesuq gi, Ya-iruoq é yhùm má jé é hkùn lé, Petruq, Yohan, Yakuq, eq hau myiwe zô

* **8:30** Legio gá é lichyúm gi, gyezo 4000 eq 6000 gyoro bo é gyedap lé tái ri. † **8:43** Ngunzê lhunglhang ban pyâm shoq chí sará pé chyáng yá wú kôlhang, hká yuq le a wó yá gè byi gá é. Chyúmdang ra-am má gi, bo lhê; ra-am má gi, a bô.

é yhangnu eq yhangwa mai lai lui, yhum hau má, ó lé le a wàng nhâng kut ri. ⁵² Hau u lé, lunglhang bang zoshâng hau é yanmai, ngaubiy ngau-nhap eq yón nyi akò. Yesuq kùm gi, "Hkâ-ngaù kó, yang shi byuq é a nghut, yhup myhi tò é sheq ru nghut lhê." ga lui, yhangmoq lé tai ri.

⁵³ Zoshâng gi, shi byuq bê lé yhangmoq sé kólui, yhangmoq gi, Yesuq lé wuizui kut pyám byí akò. ⁵⁴ Yhang kùm gi, myiwe zo hau é loq má zui to mù, "Zoshâng ê, toq aq." ga tai kat ri. ⁵⁵ Hau mù lui, yhang woi-nyi dum tau wàng mù, hau hkùn jâng toq yap ri. Hau jâng, Yesuq gi, zoshâng hau lé zòjung byi keq, ga yhangmoq lé tai kat ri. ⁵⁶ Hau myiwe zò é yhangnu eq yhangwa nhik gi, gyai maú byuq akò. Nghut kôlhang, Yesuq gi, hau dut é hkyò ó lé le a tai kyo rá matú, yhangnhik lé tai hkùm tô ri.

9

Lagyô Raxe Í Yuq Lé Nhang Htoq Kat É Hkyô

Mht 10:5-15; Mrk 6:7-13

¹ Yesuq gi, hau lagyo raxe í yuq lé wut yù mù, nat gang banshoq lé wó hkat htoq pyám rá matú eq, noli nojàng wó lhoq gê rá matú, yhangmoq lé wum-o a-tsam eq ahko ahkáng byí ri. ² Hau htâng má, Garai Gasâng é mingdán hkyô hko kyo rá eq, nõhpyo lhoq gê byi rá matú nhang htoq kat ri. ³ Yesuq gi, yhangmoq lé, "Hkyowui é matú, dumbáng, etap, zoshuq, ngùn eq, bu htai lhang hkáwùn hkáchung kó. ⁴ Nungmoq hká yhum má wàng kôlhang, hau wá mai dum htoq ló é buinyi jé shoq, hau yhum má za nyi nyi keq. ⁵ Nungmoq lé a lhom hap yu é bang lé gi, yhangmoq é wá mai htoq ló é hkùn, nungmoq lé a lhom hap yu é saksé dut sháng gaq, yhangmoq é hkyiwa má dap é hpuilhaú lé yhangmoq é myoq hí má ko hkyô pyám to keq." ga tai kat ri. ⁶ Hau mù, yhangmoq gi, htoq e ló lui, wá hking wá mó má hau gabú danglù hko kyo uchyang, hká jé hkámá nõhpyo lhoq gê byí wún akò.

Herut Maú Úng-âng É Hkyô

Mht 14:1-12; Mrk 6:14-29

⁷ Hau su dut é hkyô banshoq lé, mauzau Herut wó gyô yù lui myit wui nyi ri. Hkásu mù gá le, ra-am gi, Yohan shi é mai dum dui toq lô bê ga, ⁸ ra-am gi, Eliyaq dum pô htoq lo ri ga, hau mai, ra-am gi, hí hpyang lhê é myiqhtoi rayuq yuq dum dui toq lô bê ga lui, tai bùm kó é yanmai nghut ri. ⁹ Herut gi, "Yohan é ulhum lé, ngò hpyit pyám nhâng bê, nghut kôlhang, shí í wá tai byông bùm kó é gi, ó wá nghut lhê thú?" ga lui, Yesuq lé myàng shoq ga ho nyi ri.

Byù Ngo Hkying Lé Yesuq Zoshuq Byi Tsò É Hkyô

Mht 14:13-21; Mrk 6:30-44; Yhn 6:1-14

¹⁰ Lagyo pé dum tau lo é hkùn, yhangmoq kut lai lo é hkyô pé, Yesuq lé tai kyô akò. Hau hkùn, Yesuq gi, yhangmoq lé shui chùng mù, Bet-saida gá é wá mó shut tsik za e ló byuq ri. ¹¹ Shiwa byu pé gi, hau hkyô lé châng sé kómù, Yhâng htâng châng e ló akò. Yesuq le yhangmoq lé lhom hap yù mù, Garai Gasâng é mingdán hkyô lé tai kyo lui, nõhpyo gè nau bang lé, lhoq gê byí ri.

¹² Buigyùm zó má, lagyo raxe í yuq gi, Yhâng chyáng hui é mù, "Hau shiwa byu pé lé, awui ayám má é yhum pé eq wá pé má ló mù, zoshuq hô zo lui ló yhup kó sháng gaq, ló nhâng aq. Hkásu mù gá le, ahkuù nga-nhúng gi, yoso má nghut nyi ri." ga lui, Yhang lé tai akò.

¹³ Hau hkùn, Yesuq gi, "Nungmoq, yhangmoq lé rajung jung byi tso keq." ga tú tai ri.

Yhangmoq gi, "Shí myhò bang lé tso rá zoshuq a é wui le gi, ngamoq chyáng muk-yo muk ngo long eq ngozo í du mai lai lui, hai le a wó nghut ri." ga tai akò. (Hkásu mù gá le, yuqgè wui bau lhang ngo hkying kô nghut ri.)

¹⁴ Nghut kôlhang, Yesuq gi, "Shí bang lé rahpúng má ngo xê xê kô kut lui, zùng nhang to keq." ga lui, Yhâng e chángzò pé lé tai ri.

¹⁵ Yhangmoq lé Yesuq tai é eq rajung za, banshoq bang lé zùng nhang to bekò. ¹⁶ Hau hkùn, Yesuq gi, hau muk ngo long eq ngozo í du lé yù mù, mauhkung shut tu wú to lui, jeju ban hkya-on jâng, hau lé ajap jap hpé lui, shiwa byu pé lé, châng to byi rá matú, Yhâng é chángzò pé lé byi kat ri. ¹⁷ Hau hkùn, yhangmoq banshoq bang zò gyi bùm kó é htâng má, hau chángzò pé gi, zò myhit tò é pé lé, raxe í mung bying shoq wó guq tsing yu ashí kô nghut ri.

Yesuq Gi, Hkrisduq Nghut Lhê Ga Petruq Tai É Hkyô

Mht 16:13-28; Mrk 8:27—9:1

¹⁸ Radám lé, Yesuq gi, Yhang bau kyúdtung nyi é hkùn, chángzò pé le, Yhang eq rahá nghut akò. Hau htâng, Yhang gi, yhangmoq lé, "Shiwa byu pé gi, ngo lé ó yuq nghut lhê ga, tai akò thú?" ga myí ri.

¹⁹ "Ra-am gi, Wui-myhup Sará Yohan ga; góbang gi, Eliyaq ga; dum ra-am gi, hí hpyang lhê é myiqhtoi rayuq yuq dum dui toq ló é nghut ri ga, tai akò." ga lui, yhangmoq tú tai akò.

²⁰ Dum, Yhang gi, yhangmoq lé, "Nghut kôlhang, nungmoq gi, ngo lé ó yuq nghut lhê nghu akò thú?" ga myí ri.

Hau hkùn, Petruq gi, "Nàng gi, Garai Gasang nhâng byi é Hkrisduq nghut ri." ga tú tai ri.

²¹ Shí hkyô ó lé le a tai kyo sháng gaq ga, Yesuq, yhangmoq lé tai hkùm pyám ri. ²² Hau mù, Yhang gi, "Hau Byu Yhangzo gi, zing-rí é myo myo hui zo lui, suwún wui,

hkyangjong agyi pé, tará sará pé êq he-ngik pyâm é hui mù, sat pyâm é hui ra rà nghut lhê, hau htâng sum nyí ngùu rà buinyi má, lhoq toq yu é hui rà nghut lhê." ga tai ri.

²³ Hau htâng, banshoq bang lé Yhang dum xoq tai é gi, "Ngá htâng cháng nau sú ó yuq nghut kôle, yhumsing gung yhumsing he-ngik pyâm mù, nyí wuí yhumsing é tapzìng lé waq chùng* luí, cháng ra rà nghut lhê. ²⁴ Hkásu mù gà le, yhumsing é asak lé hkyi yù nau sú ó yuq nghut kôle, asak sum rà nghut lhê; nghut kôlháng, Ngá é yanmai, yhumsing é asak sum pyâm é sú kúm gi, asak hkyi yu é hui rà nghut lhê. ²⁵ Byú gi, mingkan gón lé wó sing to kôlháng, yhumsing é asak woi-nyí sùm byuq é nghut le gi, yhang é matú, hái akyú bò rà lú? ²⁶ Ngò eq Ngá é dang lé, lhom hap yù rà lé hoq é sú ó yuq lé le, hau Byu Yhangzò gi, yhumsing é hpungwup shingkang eq, Yhâng Wá é hpungwup shingkang, hau chyoyúng mau-mang lagyô pé é hpungwup shingkang eq jé lé é hkùn, hoq pyâm rà nghut lhê. ²⁷ Ngò, nungmoq lé teng za tai kôle, shi má yap tò é bang ra-am gi, Garai Gasàng é mingdán lé a myang é za shí kó rá a nghut." gà ri.

Mosheq Eq Eliyaq Yesuq Lé Hui Nyo É Hkyô

Mht 17:1-8; Mrk 9:2-8

²⁸ Dang hau tai é htâng, shit nyí kô nghut jáng, Yhang gi, kyúdung rá ga Petruq, Yohan, Yakuq pé lé shuí chùng mù, bùm shut doq ló ri. ²⁹ Kyú dúng nyi le, Yesuq é myoqdong gi, ihpyô isâm htaí lò mù, Yhâng é mebu gi, lháp su duq bang lo ri. ³⁰ Háu hkùn, wú keq, Mosheq eq Eliyaq gi, hpungwup shingkang eq htoq lé lò luí, Yesuq eq dúng nyo lhùm nyi akò. ³¹ Yhangmoq gi, Garai Gasang myit tò é hkyô Yerusalem wá mó má Yesuq shí hkâm é dòng mai dik lò rà nghut é hkyô lé tai lhùm nyi akò. ³² Petruq eq yhâng luzúm nhik gi, yhap mù nyi akò; nghut kôlháng, yhangmoq bún lo é hkùn lé, Yesuq é hpungwup shingkang lé le, Yhang eq rahá yap to su nhik lé le, myang kat akò. ³³ Háu nhik Yesuq chyáng mai gâng ló nyi é hkùn, Petruq gi, Yesuq lé, "Yhumsing é, shí jowò má nga-nhúng nyi le ge ri, hau mù, Nang é matú ralhúm, Mosheq é matú ralhúm, Eliyaq é matú ralhúm kut, ngamoq lé, zúm sùm lhúm sai nháng laq." ga tai kat kôlháng, yhang hái tai nyi é lé, yhang a sé.

³⁴ Petruq dang tai nyi ashí hkùn lé, mhut jé mù, yhangmoq lé htop zìng lo nyi ri. Mhut hau htop lo nyi é yanmai, yhangmoq gi, gyuq byuq akò. ³⁵ Háu mhut hkaú mai htoq lo é hté gi, "Shí yuq gi, Ngá zo nghut lhê; Ngò hkyin yu é Sú le nghut lhê; Yhâng é dang gyo keq." gà ri. ³⁶ Dang hté hau zim jáng, Yesuq

yhang baú nyi tò é lé, yhangmoq myang akò. Yhangmoq myang é hkyô lé, buinyi hau bún hau yoq má, ó lé le a tai kyô é zim za nyi byuq akò.

Nat Gang Dap É Yuqgè Zo Rayuq Lé Lhoq Gê Byí É Hkyô

Mht 17:14-18; Mrk 9:14-27

³⁷ Hau htâng nyi, yhangmoq bùm hau mai gyó ló kô le, byú moq mó gi, Yesuq lé lhom te yu akò. ³⁸ Háu hkùn, byú hpúng hau má é byú rayuq wut garú htoq ló é gi, ³⁹ "Sará é, wú aq, ngá é zo te yuqzò gi, nat wang júng mù dàn so dàn loq garú lo lhê, guttsú gi, agut gut dut doq langhtán nhang lo lhê kut mù, nat gi, yhang lé gyai myáng shoq zìng-ri yù yù kut nyi ri. ⁴⁰ Nat hau lé hkat pyâm byi kó laq ngùu luí, Náng é chángzò pé lé ngò dúng wú kôlháng, yhangmoq a wó hkat pyâm byi kó. Hau mù, ngá zo lé lhoq gê byi rà matú, ngò gi, nang lé gyai myit lum é eq dúng kat lhê." gà ri.

⁴¹ Háu mù luí, Yesuq gi, "Lumjìng myit a bo é eq agè ashop é amyú pé è. Ngò gi, hkâm-yháng jé shoq nungmoq eq rahá nyi mù, wó jân nyi rà lú? Nung zo lé, shí shut shuí lé ló aq." ga tù tai ri.

⁴² Zoshâng hau, lé lo nyi le lháng, nat gang gi, yhang lé lhoq lhêng to mù langhtán nhang ashí. Yesuq kúm gi, hau agè ashop é nat lé tân kat luí, zoshâng hau lé lhoq gê byi mù, yhâng wa lé dum ap byí ri. ⁴³ Nyi mi-nyí gi, Garai Gasàng é kó dik é hpungwup a-tsam lé mau hong nyi bum akò.

Lhunglhâng bang gi, Yesuq kut é muzó hau lé mau nyi bùm kô le, Yesuq gi, ⁴⁴ "Háu Byu Yhangzò gi, byu pé é loq má ap pyâm é hui zo rà nghut lhê. Dang shí hkun lé nungmoq é no má rago gyô wun to keq." ga luí, chángzò pé lé tai ri. ⁴⁵ Yhangmoq kúm gi, dang hau lé a sé gyo kó, hkásu mù ga le, hau gi, yhangmoq é matú a sé gyo sháng gaq ga luí, nghop tò ashí yanmai nghut ri. Dang hau é lichyúm lé, Yesuq chyáng yhangmoq a wám myi kó nghut ri.

Ó Yuq Gi, Kô Dik Sú Nghut Rà Lú? H

Mht 18:1-5; Mrk 9:33-40

⁴⁶ Hau htâng, lagyô pé gi, hká yuq sheq, kó dik sú nghut lhê lúu ga, rayuq eq rayuq tai mying myó lhùm nyi akò. ⁴⁷ Yesuq kúm gi, yhangmoq é unghkaú má myit nyi é hkyô lé sé byi luí, zoshâng rayuq lé shuí yù mù, Yhâng nàm má shap to luí, ⁴⁸ "Shí zoshâng lé Ngá é mying mai hap sú ó yuq nghut kôle, Ngo lé hap yu é sú nghut bē; Ngo lé hap yù sú ó yuq nghut kôle, hau Ngo lé nhang kat é Sú lé hap yu é le nghut lhê. Hau mù luí, nungmoq banshoq má, je tiq sú gi, je ko sú nghut lhê." ga luí, yhangmoq lé tai ri.

* 9:23 Tapzìng lé waq chùng nghu é gi, Yesuq é yanmai jamjau hui é lé tai é nghut lhê.

⁴⁹ Haù hkûn, Yohan gi, "Yhumsîng ê, Náng é myîng láng luí, nat gânq pé lé hkát pyám byí wún é byù rayuq lé, ngamoq myang ri. Yhang gi, ngamoq chyáng a lòm sù nghut é yanmai, yhang lé ngamoq hkûm pyám é nghut lhê." ga tai ri.

⁵⁰ Yesuq kúm gi, "Yhang lé hkâhkúm kó, nungmoq é gyê hkyam shut a nyí sù gi, nungmoq é hkyam shut nyí sù nghut lhê." ga luí, yhang lé tai ri.

Samariq Wà Bang Yesuq Lé A Lhom Hap Yu É Hkyô

⁵¹ Ahkuí, Yesuq gi, Yhang lé mauhkûng shut shui toq yú rà buinyi chyáng lò bê nghut mù, Yerusalem wà mó shut é rà lé myit hpyit to luí, Yhâng é hí má lagyo nhang kat ri. ⁵² Lagyo haù bang gi, Yhâng matú rà é hkyô lajang láng rà ga, Samariq wà rawà má wang lô akò. ⁵³ Nghut kôlhâng, Yesuq gi, Yerusalem wà mó shut lai e lô é sù nghut é yanmai, haù wà bang gi, Yhang lé a lhom hap yú kó. ⁵⁴ Haù hkûn, lagyo Yakuq eq Yohan nhik gi, haù lé myàng jáng, "Yhumsîng ê, yhangmoq lé lhoq htên pyám rà matú, ngá-nhik mauhkûng mai myi wut hkyô le, a gè lhu?" ga luí, Yesuq lé myí akò. ⁵⁵ Yhang kúm gi, lhing wú luí yhangnhik lé, tân pyám ri. ⁵⁶ haù mù luí, yhangmoq gi, gó wâ shut e lô byuq akò.

Yesuq É Htâng, Hkâsu Kut Cháng Râ Hkyô Mht 8:19-22

⁵⁷ Yhangmoq haù hkyô má e lô kô le, byù rayuq gi, "Nàng hká e le hká ngò cháng rà." ga luí, Yesuq lé tai ri.

⁵⁸ Yesuq gi, haù yuq lé, "Wamhkuí pé gi, hkyûng wó akò, ngoq pé le, ngoqsut wó akò. Nghut kôlhâng, haù Byu Yhangzo gi, ulhum to jang lháng a wó é nghut ri." ga tai pyám ri.

⁵⁹ Dum rayuq lé, "Ngá htâng cháng aq." ga tai jáng, haù yuq gi, "Yhumsîng ê, ngá wa lé, lô yhûm pyám rà ahkáng hí byi shi laq." ga tai ri.

⁶⁰ Yesuq gi, yhang lé, "Shí bê bang† gi, shí bê bang yhangchang yhûm lhum kó sháng gaq; nghut kôlhâng, nang gi, Garai Gasâng é mingdán hkyô lé, é hko kyo aq." ga tai ri.

⁶¹ Byù rayuq dum, Yhang lé, "Yhumsîng ê, ngò le náng htâng cháng rà, nghut kôlhâng, ngá yhumbyù lé hí hkyang lô shít to rà ahkáng byi shi laq." ga tai ri.

⁶² Yesuq gi, "Yò hpuq li zui mù htâng shut lhing wú sù ó yuq nghut kôlhâng, Garai Gasâng é mingdán eq a gingdán." ga luí, yhang lé tai ri.

† **9:60** Shí bê bang gá é gi, woi-nyí má shi to bang lé gâ lhê.

le kâ tò ri. † **10:2** Kyô nghú é gi, Yesuq lé lumjîng nau kôlhâng tai kyo rà bang a nyi lui láng tô é bang nghut ri. † **10:2**

Kyô shu byù nghu é gi, Yesuq é hkyô gabú danglú lé tai kyo bang nghut ri. § **10:12** Haù buinyi gá é gi, Garai Gasâng tará jéyáng é buinyi lé gâ lhê.

10

Yesuq, Chángzô Pé Nyhit Xê Yuq Lé, Nhang Htoq Kat É Hkyô

¹ Haù htâng má, Yhumsîng gi, gotú chángzô pé nyhit xê yuq* lé hkyin yù mù, Yhang e lô rà wà eq jowò hkangmó shut í yuq razúm zúm kut lui, Yhâng é hí má é nhang kat ri. ² Yesuq gi, yhangmoq lé, "Kyô† shù yù rà myo shoq joq kôlhâng, mù zui rà byù gi, shaù nyi ri. Haù mù, haù kyô Yhumsîng lé, Yhâng é kyô yò má, kyô shu byù‡ myo myo nhâng byi rà matú, dung keq. ³ Nungmoq e lô keq! Wamhkuí hpung má nhang hâng kat é sau zô pé lé su, Ngò, nungmoq lé nhang kat é nghut lhê. ⁴ Ngùn htung eq, etap, hkyi-tsung pé hkâyú chûng kó, hkyô má ó lé le hkâshichyên kûn nyí kó.

⁵ Nungmoq gi, hká yhûm má wàng e lô kô le, 'Shi yhûm nguingón nyí sháng gaq.' nghú lui, hí tai keq. ⁶ Haù yhûm má nguingón hkyô eq gingdán sù nyi é nghut le gi, nguingón hkyô haù gi, haù yuq é ahtoq má joq to rà nghut lhê. Haù a nghut jáng, nguingón hkyô haù gi, nungmoq chyáng dum taù lo byuq rà nghut lhê. ⁷ Haù yhûm má nyi to mù, yhangmoq haù byi le haù to haù shuq keq; hkâsu mù gâ le, mù zui sù gi, zuihpau wó yù gîng lhê; haù mù, nungmoq rayhum htâng rayhûm hkâhtot nyi wún kó.

⁸ Nungmoq hká wà má wang lô kôlhâng, yhangmoq lhom hap yù kô é nghut le gi, nungmoq é hí má yhangmoq htung to byí é zoshuq lé, to keq, shuq keq. ⁹ Haù má é nò bang lé lhoq gè byi mù, 'Garai Gasâng é mingdán gi, nungmoq eq chyáng lò bê nghut ri.' nghú lui, yhangmoq lé tai kyo keq. ¹⁰ Nghut kôlhâng, nungmoq hká wà má wang lô kô le, yhangmoq a lhom hap yu é nghut le gi, haù wâ má é hkyô mó má htoq é mù, ¹¹ 'Ngamoq é hkyí má dap tô é nungmoq wà má é hpuilhaù lháng, nungmoq lé hkyang pù tsò nyi rà matú ngamoq kó hkyô pyám to byi bê. Nghut kôlhâng, Garai Gasâng é mingdán gi, chyáng lò bê hkyô lé, sé to keq.' nghú lui tai keq. ¹² Ngò, nungmoq lé tai kôlé, haù buinyi§ lé, haù wâ gi, Sodom wà htoq má je hpuzo rà nghut lhê.

¹³ Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri! Nungmoq chyáng lé kut shít é laklai kumlhá pé lé, Turuq myuq eq Sidun myuq má kut shít é ru nghut le gi, yhangmoq, noq noq mai myit lhing mù, jimé tú wut lhê, myiwap kyaq gyûn lhê kut zung ngung to bekò rà nghut lhê. ¹⁴ Haù mù, tará jéyáng é nyí jé jáng, nungnhik gi, Turuq myuq eq Sidun

* **10:1** Chyûmdang ra-am má gi, chángzô nyhit xê í yuq ga

myuq htoq má je hpuzo* kó rã nghut lhê.
 15 Dum mù, Kaperna-um wà nãng ê, nãng gi, mauhkung jé shoq waq toq é hui rã lúh? A nghut, mosumhkung má sheq gyó rã nghut lhê." ga tai ri.

16 Hau htàng má, chángzô pé lé dum xoq tai é gi, "Nungmoq é dang gyo sũ gi, ngá é dang gyo sũ le nghut bê; nungmoq lé he-ngik é sũ gi, ngo lé le he-ngik é sũ nghut bê; ngo lé he-ngik é sũ gi, ngo lé nhang kat sũ lé le, he-ngik é sũ nghut bê." gã ri.

Nyhit Xê Yuq Dum Taué Lo É Hkyô

17 Hau htàng, hau chángzo nyhit xê yuq gi, gabú myit êq dum taué lò mù, "Yhumsing ê, nãng é mying lé lang jáng, nat gãng pé lhang ngamoq é dang lé gyô bum akô." ga tai akô.

18 Hau su ga tai kôjáng, Yesuq tú tai é gi, "Tsdán gi, mauhkung htoq mai lhap hpyat é su byit gyó lo é lé ngò myang kat bê.
 19 Wú keq! Ngò gi, nungmoq lé, lhangmuì eq gogok pé lé wó nang rã eq gumlau gyé pé é wum-o a-tsam banshoq lé wó ùng rã ahko ahkáng lé byi bê nghut mù lui, hai eq le nungmoq lé wó lhoq hten rã a nghut lo.
 20 Nghut kôlhang, nat pé nungmoq é dang gyô é lé za hkâgabú nyi kó, mauhkung htoq má é asak jihpán laiká buk má nungmoq é mying bo to bê lé sheq gabú nyi keq." ga tai ri.

21 Hau u lé, Yesuq gi, Chyoiyúng Woi-nyí má gabú é myit bying lò mù, "Mauhkung eq myíng é Yhumsing, Áwa ê, Nãng gi, hau pé lé, hpaqchyi byéng-yá bò bang eq myit hpaqchyi sé bâng é hí mai haq nghop to lui, zoshâng wui lé tũn shít bê nghut é yanmai, Ngò, Nang lé hkya-ôn lhê ô. Nghut bê, Áwa ê, hau gi, Nãng ô nau é hkyô nghut ri.

22 Ngá Wa gi, lhunglhang lé Ngá é loq má ap byi to bê. Garai Gasang Yhangzo ó nghut é gi, Áwa Garai Gasang mai lai lui ó le a sé; Áwa ó nghut é lé le, hau Zo eq hau Zo mai sé nhâng rã matú hkyin yu é bang mai lai lui, ó a sé." ga tai ri.

23 Hau htàng má, Yhâng é chángzô pé shut lhing wú lui, yhangmoq lé baú za haq tai kat é gi, "Nungmoq byu-myàng é hkyô pé lé, myàng é myoq pé gi, hkungsó wó nyi ri. 24 Hkâsu mù gã le, Ngò, nungmoq lé tai kôlé, nungmoq wó myàng, wó gyô é pé lé, myiqhtoi pé eq hkohkam pé myo myo gi, myàng nau gyo nau kôlhang, a wó myàng, a wó gyo kó nghut ri." ga tai ri.

Gé É Samariq Byù

25 Hau hkũn, wú keq, tará sará rayuq gi, toq lui, Yesuq lé, "Sará ê, ahtum abyuq é asak lé wó yú shoq, ngò hkâsu kut rã rã lhê lúh?" ga lui, Yhang lé myi chyam wú ri.

26 Yesuq gi, "Mosheq é tará má hkâsu ga kâ tô ri lúh? Nãng hau lé hkâsu nghap yu nyi lhê lúh?" ga lui, yhang lé myi ri.

27 Hau yuq gi, "Hau Yhumsing nãng é Garai Gasang lé, nãng é myit nhikhlum banshoq, nãng é asak woi-nyí lhum gón, nãng é wum-o banshoq, nãng myit é hkyô banshoq êq, chyitdap rã lhê;"* nãng gũng lé nãng chyitdap é su, nãng é chyangnãm má é bang lé le chyitdap aq.^{10*} ga tú tai ri.

28 Yesuq gi, "Nãng tú tai é dang jô ri; hau su yhang kut aq, hau jáng nãng gi, asak dui rã nghut lhê." ga yhang lé tai ri.

29 Nghut kôlhang, hau yuq gi, yhang gungdu dingmán é lé, tũn shít nau lui, "Ngá é chyangnãm má é sũ gi, ó yuq nghut lhê lúh?" ga lui, Yesuq lé myi ri.

30 Yesuq tú tai é gi, "Byù rayuq gi, Yerusalem wá mó mai Yerihko wá shut gyó ló le, damyaq eq htung hui ri. Damyaq hau bang gi, yhâng é mebu pé lé hkyut shang pyám byi kôlui, rayúm gyut shoq bat nha mù, aluq shoí shí jáng sheq tó pyám to kôlui ló byuq bekô. 31 Hau u lé, hkyangjong rayuq gi, hau hkyô mai lai ãng ló le, hau damyaq hui sú lé myàng jáng, koi lai ló byuq ri. 32 Hau eq rajung za, Lewiq rayuq le, hau mai lai ló é hkũn, hau yuq lé myàng jáng, koi lai ló byuq ri. 33 Nghut kôlhang, Samariq byù rayuq le, hau mai lai ló é hkũn, hau yuq leq tô é lé myàng jáng, wú shogyo lui yhâng chyáng hui é mù, 34 yhâng é dàm má, xú eq tsibiyiq wing shoq gyun lui, rago za htup byi mù, yhâng é logúng má, hau yuq lé bũn ke lui, bing-yhũm ralhũm má jé shoq shu ló mù, gôn lajang byi ri. 35 Htang nyi lé, yhang gi, hau bing-yhũm yhumsing lé ngũn Denari í chap shê byi mù, tai é gi, 'Shi yuq lé wó lajang byi laq, yhâng gũng má nãng myo chung zàng é banshoq lé ngò dum taué lò jáng, lo xap rã.' gã ri.

36 Hau htàng, tará sará lé, "Nãng gi, byù hau bang sum yuq má damyaq hui sú é chyangnãm má é dõng nghut sũ gi, hká yuq nghut rã su ngam ri lúh?" ga lui, Yesuq myi ri.

37 Hau tará sará gi, "Hau yuq lé shogyo sũ nghut ri." ga tai ri.

Yesuq gi, "Nãng le hau dõng ló kut aq." ga lui, yhang lé tai kat ri.

Mariq Eq Mahtaq Nhik Chyáng Yesuq Ê Jé É Hkyô

38 Ahkuí, Yesuq eq Yhâng é chángzô pé hkyô xoq só é ló kô le, wá rawá má jé wang ló é hkũn, Mahtaq gã é myiwe rayuq gi, Yesuq lé yhâng yhũm má lhom te yu ri. 39 Mahtaq gi, Mariq gã é yhanggu myiwe zo rayuq wó ri. Mariq hau gi, Yhumsing Yesuq é hkyi

* 10:14 Nungnhik je hpuzó é hkyô gi, mauhpo kumlhá myo myo myang é nghut kôlhang, myit a lhing kô é yanmai nghut ri. * 10:27 Tará Pun 6:5 * 10:27 Nhung 19:18

wang má zung to mù, Yhang mhoqshit é dang lé gyô nyi ri. ⁴⁰ Mahtaq kúm gi, saí tso saí huq é amú myo luí, gyin bûn nyi ri. Haú mù luí, yhang huí é mù, "Yhumsing é, ngá gu gi, saí tso saí huq é amú má, ngo lé baú za rap kut tó é lé, nàng a bo myàng byi lúhú? Ngo lé, lé garúm sháng gaq, yhang lé tai byi laq." ga luí, Yesuq lé tai ri.

⁴¹ Haú hkún, Yhumsing gi, "Mahtaq, Mahtaq, nàng gi, muzò lé za ma nyi mù, myit myo myit chiq é huí nyi ri. ⁴² Nghut kôhlang, je ahkyak é hkyô gi, rahkat za nghut lhê. Mariq kúm gi, haú je ge é hkyô lé hkyin yù bê nghut ri. Haú lé yhang chyáng mai wó yu pyám byi rá a nghut." ga luí, yhang lé tú tai ri.

11

Yesuq Mhoqshit É Kyúdung Dang
Mht 6:9-13; 7:7-11

¹ Ra-nyí lé, Yesuq gi, jowò rawò má kyúdung nyi ri. Yhang kyú ban dung jáng, Yhàng é chángzo rayuq gi, "Yhumsing é, Yohan gi, yhàng é chángzò pé lé kyúdung rá hkyô mhoq byi é su, ngamoq lé le mhoq byi laq." ga Yhang lé tai ri.

² Haú hkún, Yhang gi, "Nungmoq kyúdung le, 'Mauhkúng htoq tsáng myhàng má é ngamoq é Áwa é,

Náng é mying gi, chyoiyúng nyí sháng gaq.
Náng é mingdán jé lô sháng gaq.

³ Ngamoq nyi wuí rá é zoshuq lé, ngamoq lé nyi wuí byi laq.

⁴ Ngamoq lé shut é byù banshoq bâng é mara lé, ngamoq hkyut pyám byi é yanmai, ngamoq é mara lé le hkyut pyám byi laq.

Ngamoq lé, agúng alaú hkyô má hkâwàng nhâng.'

ngù keq." ga luí, yhangmoq lé mhoqshit ri.

⁵ Yesuq yhangmoq lé dum tai é gi, "Dangké, nungmoq chyáng má é rayuq sú gi, buinùm wó é ngù sháng, yhang gi, gunggàm yoq má haú yuq chyáng é luí, 'Buinùm hpó é, ngo lé muk sùm long byam chyí byi kat laq, ⁶ haí mù gâ le, ngá buinùm rayuq byin we mai ngá chyáng jé nyi tó ri. Ngò gi, yhang lé byi tso rá haí le a joq byam dut tó ri.' ga tai é hkún, ⁷ yhúmkaú shut má é sú gi, 'Ngo lé, hkâlê lhoq hkyik lo, hkum le myí pyám bê, ngá zoshàng wui le ngò eq rahá yhupjang má yhup to bekô. Ngò, nang lé haí le a wó toq yú byi lo.' ga tu kat ri. ⁸ Ngò, nungmoq lé tai kólé, buinùm nghut é yanmai za gi, muk a kâm toq byi lo kôhlang, zuq zuq dúng nyi é yanmai, haú

yuq lé, yhang ra chá é banshoq toq yú byi rá nghut lhê.

⁹ Haú mù, ngò, nungmoq lé dum tai kólé, dung keq, haú jáng, nungmoq lé byi rá nghut lhê; hô keq, haú jáng, nungmoq myàng kó rá nghut lhê; hkum má kok keq, haú jáng, nungmoq lé hpóng byi rá nghut lhê. ¹⁰ Hkâsu mù gâ le, ó yuq nghut kôle, dung sú wó rá; hô sú myàng rá; hkum kok sú lé gi, hpóng byi rá nghut lhê.

¹¹ Nungmoq íwâ pé má, ó yuq wá, yhum-sing yhangzo muk dúng le, luggok byi kó rá lúhú? Ngozo dúng le, lhangmui byi kó rá lúhú?

¹² Woq-ú dúng le, gogok byi kó rá lúhú? ¹³ Agè ashop é bang nungmoq lhang gi, nungmoq é zo wui lé, ge é chyunghuq dat byi kó le nhing, mauhkúng htoq tsáng myhàng má é nungmoq é Íwa gi, Yhang lé dúng é bang lé, je riyhang haú Chyoiyúng Woi-nyí byi rá nghut lhê." ga tai ri.

Mara Hún É Dang Lé Yesuq Tú Tai É Hkyô
Mht 12:22-30, 43-45; Mrk 3:20-27

¹⁴ Radàm lé, Yesuq gi, byù rayuq lé dang a wó nyò shoq kut tó é nat gang lé, haú yuq chyáng mai hkat htoq pyám ri. Nat haú htoq ló byuq é htàng má, dang a wó nyò sú gi, dang wó nyo nyi é yanmai, byù moq mó gi, chôm maú byuq bum akò. ¹⁵ Nghut kôhlang, yhangmoq chyáng má é ra-am gi, "Yhang gi, nat gang pé é zau Bezebulaq é wum-o a-tsam èq za, nat gang pé lé wó hkat pyám é nghut ri." ga tai bum akò nghut ri. ¹⁶ Ra-am le, Yhang lé, mauhkúng má é kumlhá tûn shit wú laq ga dúng chyam wú akò.*

¹⁷ Yesuq kúm yhangmoq myit nyi é hkyô lé sé mù tai é gi, "Ikun byoq é mingdán hká lhum nghut kôle, hten byuq rá za nghut lhê; haú eq rajung za, ikun byù yhangchang rayuq eq rayuq byoq lhum é yhùm htu gi, byoq gâng lhum rá za nghut lhê. ¹⁸ Nat pé le yhangmoq yhangchang byoq gâng lhum nyi kó é nghut le gi, Tsadán é mingdán gi, hkâsu kut wó gíng to rá lúhú? Ngò isu ngu tai é gi, nungmoq ngo lé Bezebulaq é wum-o a-tsâm èq za, nat gang pé lé hkat pyám ri ga kó é yanmai nghut lhê. ¹⁹ Ngò gi, Bezebulaq é wum-ô èq za, nat gang pé lé hkat htoq é nghut jáng, nungmoq é chángzò pé gi, ó yuq é wum-o a-tsâm èq za, nat gang pé lé hkat pyám kó é nghut lhê lúhú? Haú mù luí, yhangmoq gi, nungmoq lé jéyáng é bang dut bekô rá nghut lhê. ²⁰ Nghut kôhlang, Ngò gi, Garai Gasâng é wum-ô èq nat gang pé lé hkat htoq pyám é nghut jáng, Garai Gasâng é mingdán† gi, nungmoq chyáng jé bê nghut ri.

* 11:16 Byu pé gi, Yesuq lé Garai Gasang nhang kat é hkyô lé saksé myàng nau luí, mauho kumlhá dúng nyi akò.

† 11:20 Garai Gasâng é mingdán gâ é gi, byù htoq má le, nat htoq má le, Garai Gasâng yhang uphkan é lé gâ é nghut lhê.

²¹ Wum-o bo é sù rayuq gi, yhâng é yhùm lé, shâm, lham chung lui zung tô é nghut jang, yhâng é sutzè pé gi, rago za wó joq to rá nghut lhê. ²² Nghut kôlhang, yhâng htoq wum je bo é sù lé lui, haù yuq lé, lé zân ung pyâm é nghut le gi, yhang lum tô é shâm, lham lé, hkyom yu pyâm byi lui, yhâng é sutzè pé lé, gam yu pyâm byi rá nghut lhê.†

²³ Ngá hkyam shut a dap sù gi, Ngo lé gyè kut sù nghut lhê. Ngó eq rahá a shui tsing sù gi, lhoq pyo pyâm é sù nghut nyi ri.

²⁴ Haù agé ashop é nat gi, byù rayuq chyáng mai htoq lô mù, kyuq huí é jowò pé má sô yông e lô lui, no rá jowò hkat ho wú le, a myang hô nghut ri. Haù hkùn, yhang gi, 'Ngó nyi lai lo é yhùm má dum tau lô wú rá.' ga tai ri. ²⁵ Yhang dum tau jé lô wú le, yhùm haù gi, shum pyâm mù san za rago dut to lánq é lé lô myang ri. ²⁶ Haù jang, yhang gi, dum tau é mù, yhang htoq je wú é nat nyhit nat lé shui lò lui, haù má lo wàng nyi to bekô. Haù mù, haù yuq é nyi yap sâmlai gi, hí lhê htoq má je wú lò bé nghut ri." ga tai ri.

²⁷ Haù su ga, Yesuq tai nyi é hkùn, haù shiwa hpong má é, myiwe zo rayuq hté mó o mó eq Yhang lé tai é gi, "Nang lé wun é ùng wam eq nang shuq é nauwang gi, hkungsô wó nyi ri ô!" gá ri.

²⁸ Yesuq gi, "Garai Gasang é mungdang gyò yù lui châng kut é bang gi, je riyhang hkungsô wó kó rá nghut lhê." ga tai ri.

Mauho Kumhá Lé Dung Kô É Hkyô

Mht 12:38-42; Mrk 8:12

²⁹ Shiwa byu pé jat myô zup zing lo é hkùn lé, Yesuq tai é gi, "Shí ipyat lhê é byu pé gi, agé ashop é bang nghut akô. Yhangmoq gi, limik kumhá dúng nyi bùm kôlhang, Yonaq é kumhá mai lai lui, gotú hai le tún shit rá a nghut. ³⁰ Yonaq gi, Ninewe wá byù pé hí má kumhá[§] dut é su, haù Byu Yhangzo gi, shí pyat lhê é byu pé hí má, kumhá dut rá nghut lhê. ³¹ Maupyí má é hkohkâm myhí gi, maumyí lô htàng é mai lé lô mù, Sholumon é hpaqchyí dang lé, lé gyò yù bé nghut mù, haù tará jéyáng é buinyi má, shí ipyat má é byu pé eq rahá toq lô lui, yhangmoq lé mara hùn rá nghut lhê. Wú keg, Sholumon htoq ko sù gi, ahkuí shí má jé nyi to bé. ³² Ninewe wá byu pé gi, Yonaq, mungdang hko kyô é hkùn myit lhing kô é nghut mù, tará jéyáng é buinyi má, shí ipyat eq rahá toq lô lui, yhangmoq lé mara hùn kó rá nghut lhê. Wú keg, Yonaq htoq ko sù gi, ahkuí shí má jé nyi to bé.

† **11:22** Haù eq rajung za, Yesuq gi, Tsadán lé zân ùng bé nghut é yanmai, agé ashop é nat pé lé byu pé chyáng mai, wó hkat pyâm bé nghut ri. § **11:30** Kumhá gi, Yonaq, ngozó wamdaù má sum nyi lúng é su, Yesuq lé, shí bé mai sum nyi nghù rá nyi má, dum dui toq lô rá hkyô lé tai nau é nghut ri. *

* **11:34** Myibung gá é gi, tengmán é mungdang lé wó sè yu é a-tsam lé, tai é nghut ri. † **11:38** Yudaq htung tará má gi, zang a zo shi má loq chi rá lhê. ‡ **11:40** Ahte gá é gi, i-myt unghkaù lé tai ri. § **11:40** Ahtoq gá é gi, gungdu lé tai ri.

Myibung Su Duqbo Rá Hkyô

Mht 5:15; 6:22-23

³³ Myibung lé tuq mù go pyâm é jowò má tô tô é le, mung eq nghop tô é le, ó a kut wú kó. Nghut kôlhang, wang lé lô bang myoq wó myâng rá matú kúm gi, tsungiang má tsung to to chyat kut akô. ³⁴ Náng é myoq gi, náng gungdú é myibung* nghut nyi ri. Náng é myoqjí ge é nghut le gi, náng é gungdu gón má maubó bying mui to rá nghut lhê. Nghut kôlhang, náng myoq a ge é nghut le gi, náng é gungdu gón gi, mauchut tuq dut nyi rá nghut lhê. ³⁵ Haù mù, náng chyáng bo é maubó gi, mauchut byuq é, a chut byuq é lé wú nyi aq. Náng lumjing é hkyô eq nang myit é hkyô gi, mauchut tuq a dut sháng gaq, sidiq nyi aq. ³⁶ Náng é ragungdu gón má duqbo é nghut le gi, rawò má le mauchut é jowò a joq é za, myibung nang lé duqbo byi nyi é su, náng gungdu gón má duqbo nyi rá nghut lhê." ga tai ri.

Hparishe Pé Eq Tará Sará Pé Lé, Yesuq Mara Hun É Hkyô

Mht 23:1-36; Mrk 12:38-40; Luk 20:45-47

³⁷ Yesuq haù su ga ban tai é htàng má, Hparishe rayuq gi, yhang eq zang rahá zo rá matú, Yesuq lé ji ri. Haù mù, Yesuq gi, haù yhùm má wang é mù zang zo rá ga siboí nam má zung tô ri. ³⁸ Nghut kôlhang, Hparishe wá gi, zang zo rá hí má Yesuq loq a chí é lé, myàng lui mau nyi ri.†

³⁹ Haù mù lui, Yhumsing Yesuq yhang lé tai é gi, "Nungmoq Hparishe pé gi, góm eq zanghkoq lé ahtoq shut za chí yung nyi kômù, nungmoq é unghkaù má gi, lú zo lú shuq é eq agé ashop é hkyô pé bying zan tô ri. ⁴⁰ Byù bâm pé è, ahte[‡] lé le, ahtoq[§] lé le, sai sù gi, Garai Gasang rayuq za nghut é lé, a sé kó lúh? ⁴¹ Nghut kôlhang, ahte má bo é zè pé lé, ra chá é bang lé byi pyâm keg; haù hkùn, nungmoq é matú banshoq gi, sânyung lô rá nghut lhê.

⁴² Hparishe pé è, nungmoq gi, dingnyé wó ri, hkâsu mù gá le, nungmoq gi, gau-tsang, shingtón pé eq zangxun mhan-haq ajù jù má é, xé gambùm ragambùm lé gi, Garai Gasang lé byi nyi kômù, tará dingmán é hkyô eq Garai Gasang chyitdap é hkyô lé gi, lhai pyâm tô akô. Xé gambùm ragambùm byi é lé le cháng lui, tará dingmán é hkyô eq Garai Gasang lé chyitdap é hkyô lé le, kut nyi rá lhê.

⁴³ Hparishe pé è, nungmoq gi, dingnyé wó ri, hkâsu mù gá le, tarajong pé má é ahkyak dik é zung jang pé lé le, gai pé má hkunggá é

èq shichyên é dang lé le, nungmoq ô nau nyi bum akô.

⁴⁴ Nungmoq gi, dingnyé wó ri, hkâsu mù gà le, nungmoq gi, ahkô a dong lo mù, byu pé a sé lui, ahtoq mai sô lai é lupdùng eq du akô." ga tai ri.

⁴⁵ Haù hkûn, tarâ sarâ rayuq gi, "Sarâ é, nàng haù su gà é gi, ngamoq lé le rhoi lhom nyi é nghut bê." ga Yhang lé tù tai ri.

⁴⁶ Haù su ga jáng, Yesuq gi, "Nungmoq tarâ sarâ pé le, dingnyé wó ri. Hkâsu mù gà le, nungmoq gi, byu pé lé, wùn waq rá wui é noqkuq htùng tarâ wôlai lé wùn nhâng lui, yhumsing yhang gi, wò haù lé loqnyhui èq lhang, a bo zàng wú kò nghut ri.

⁴⁷ Nungmoq gi, dingnyé wó ri, hkâsu mù gà le, nungmoq gi, nungmoq é ichyi iwâ pé sat pyâm é myiqhtoí pé é lup lé luptsuq tsuq akô. ⁴⁸ Haù mù lui, nungmoq gi, nungmoq é ichyi iwâ pé é muzó lé, myit bo hui é bang nghut nyi akô. Hkâsu mù gà le, yhangmoq gi, myiqhtoí pé lé sat pyâm mù, nungmoq gi, lup haù pé lé luptsuq tsuq akô. ⁴⁹ Haù mù lui, Garai Gasang, Yhâng é hpaqchyí byéng-yá mai tai é gi, 'Myiqhtoí pé eq lagyó pé lé, ngò yhangmoq chyâng nhang kat rá nghut lhê; haù bang má é ra-am lé gi, yhangmoq lhom sat pyâm mù, ra-am lé gi, zing-ri kó rá nghut lhê.' gà ri. ⁵⁰ Haù su mù lui, mau htoq xâng hkûn lhê é, Abelaq é sui mai, hkungga gyap eq noqkuq yhùm gyoro má sat pyâm hui é Zakhariq é sui jé shoq, shun pyâm é myiqhtoí pé é sui banshoq bâng é manglat gi, shí pyat má é byu pé lé hùn rá nghut lhê. ⁵¹ Ngò, nungmoq lé tai kôlé, manglat haù pé lé gi, shí pyat má é byu pé lé, gè gè yhang hùn rá nghut lhê.

⁵² Tarâ sarâ pé é, nungmoq gi, dingnyé wó ri, hkâsu mù gà le, nungmoq gi, byu pé Garai Gasang lé sé ra zoqshi lé yu pyâm byi kômù, yhumsing yhang le a sé, sé naù bang lé le, hkùm zing tò akô nghut ri." ga tai ri.

⁵³⁻⁵⁴ Yesuq haù mai htoq ló é hkûn, tarâ sarâ pé eq Hparishe pé gi, Yhang lé gyè kut mù, Yhâng é dang má mara wó myâng shoq ga, wui é dangmyi myo myo myi lui, gyám wú nyi akô nghut ri.

12

Gegùn Labyoq Kut É Bang Lé Sidiq Râ Hkyô

Mht 10:28-33; 12:32; 10:19-20

¹ Haù u, byù hkying mun zup zing lò mù, rayuq eq rayuq lhang zàng nàng lhum shoq dut nyi é hkûn, Yesuq, Yhâng é chángzò pé lé tai hi é gi, "Gegùn labyoq kut é Hparishe pé é múnchi lé koi sidiq pyám keq. ² A byông htoq loshoq wó zaù nghop tò é, haù le a joq rá nghut lhê; a sé loshoq wó haq tò é le, haù a joq rá nghut lhê. ³ Haù mù lui, nungmoq, mauchut hkaù má haq tai é dang banshoq

lé, myoq myàng maubó má wó gô bùm kó rá nghut lhê. Gok hkaù má, dangsoq soq é lé le, yhumhkûng htoq mai tai pyo bùm bekô rá nghut lhê.

⁴ Ngá buinùm wui é, Ngò, nungmoq lé tai kôlé, gungdu lé za wó sat pyâm mù, woi-nyí lé haù le a wó kut é bang lé, hkâgyuq kó. ⁵ Nghut kôlhâng, nungmoq ó lé za gyuq rá é lé gi, Ngò, nungmoq lé tai kyo kôlé, gungdu lé sat pyâm é htâng má, woi-nyí lé ngrai ming shut wó hkyô kat pyâm é a-tsam wó sù lé kùm gi, gyuq keq. Nghut bê, Ngò, nungmoq lé tai kôlé, haù yuq lé za, gyuq nyi keq. ⁶ Johkyang ngo du lé, gyi htinchap í chap èq wò ùng pyâm lhê a nghut kò lhu? Haù johkyang radu lé lhang, Garai Gasang gi, tó-myhi pyâm é a nghut. ⁷ Garai Gasang gi, nungmoq é ulhum má é xâm banshoq lé lhang, nghap tò gù nghut lhê. Haù mù, hkâgyuq kó; nungmoq gi, haù johkyang myo myô htoq má lhang gù je bo é bang nghut lhê.

⁸ Ngò, nungmoq lé tai kôlé, byu pé hí má Ngo lé lhom yin yu é sù ó yuq nghut kôlé, Garai Gasang é maumang lagyó pé é hí má, haù Byu Yhangzo gi, haù yuq lé lhom yin yu rá nghut lhê. ⁹ Nghut kôlhâng, byu pé é hí má Ngo lé he-ngik pyâm é sù lé chyaù gi, Garai Gasang é maumang lagyó pé é hí má, he-ngik pyâm rá nghut lhê. ¹⁰ Haù Byu Yhangzo lé dang dong shut é sù gi, mara hkyut byí é wó hui ra nghut lhê; nghut kôlhâng, haù Chyoiyung Woi-nyí lé rhoi dang tai pyâm é sù gi, mara hkyut byí é hui rá a nghut.

¹¹ Byu pé nungmoq lé jéyàng rá matú tara-jong pé má le, agyi suwún wui eq ahkáng ayá wó bâng é hí má le, shui e ló kô é hkûn, hkâsu kut rá lé le, hkâsu nghù tù tai rá lé le, hkâ-myit chiq kó. ¹² Hkâsu mù gà le, haù u lé yhang, Chyoiyung Woi-nyí gi, nungmoq hkâsu tai rá hkyô lé mhoqshít byi rá nghut lhê." ga tai ri.

Hpaqchyí A Bo É Sahtê Hpó Lé Dangtú Yu É Hkyô

¹³ Haù hkûn, shiwa hpúng hkaù mai, byù rayuq gi, "Sarâ é, ngá-nhik tâng wó é muizé pé lé chòm gam lhum rá matú, ngá mang lé bo tai byi laq." ga lui, Yesuq lé tai ri.

¹⁴ Yesuq gi, "Byù nàng é, nungnhik tang ahtoq má tarâ agyi kut lui, ikun zè gam byi rá gi, ngo lé ó hkyin tò é lhu?" ga lui, yhang lé tù tai ri. ¹⁵ Yesuq yhangmoq lé tai é gi, "Myoqnoq é hkyô banshoq mai, nungmoq é i-myit lé hkùm zing lui, koi sidiq nyi keq. Hkâsu mù gà le, byu é asak gi, agùn agó é sutzè má bo é a nghut." gà ri.

¹⁶ Dangtú ralhum dong mai le, yhangmoq lé Yesuq tai é gi, "Sahtê rayuq gi, yhâng é yò pé má guqzo muilhum gyaí já ri. ¹⁷ Haù mù lui, yhâng é unghkaù má myit é gi, 'Ngò

hkâsu kut wú rã lhi? Ngá é guqzo muilhum pé lé kut to rá jowò a wó lo dut to bê.' gã ri.

¹⁸ Dum nghut jáng, yhang gi, 'Ngò isu kut wú rã abe, ngá é chyí xau pé lé hpyoq pyám lui, je kò é chyí pé lé sai rá nghut lhê. Chyí hau pé má ngá é guqzo muilhum pé eq sutzè banshoq lé, tsing kut to lui, ¹⁹ ngá é i-myit lé isu nghu tai rá, "I-myit ê, zanwut myáng myáng é matú, zè gè myo myo ngò tsing to bê. I-myit nang zim za kut nyi aq hkoi. Zo mù, shuq mù, ngón ngón nyi aq." ga' gã ri.

²⁰ Nghut kôlhang, Garai Gasang gi, 'Byù gò ê, nang é asak lé, hkú-myín yhang, wup yu pyám byí é nghut jáng, nang tsing hkong tò é zè pé gi, ó yuq é matú dut rá lhu?' ga lui, yhang lé tai ri.

²¹ Hau eq rajung za, yhumsing é matú sutzè hkong to mù lui, Garai Gasang é hí má myung nyi sú gi, hau yuq su nghut rá nghut lhê." gã ri.

Myit A Chiq É Za Garai Lé Lumjǐng Rã Hkyó

Mht 6:25-34, 19-21

²² Yesuq, Yhang é chángzò pé lé dum tai é gi, "Hau mù lui, Ngò, nungmoq lé tai kólé, nungmoq é asak matú hai zo hai shuq rá eq nungmoq é gungdú matú hai wut hai tsang rá lé, hkâ-myit chiq kó. ²³ Asak gi, zoshuq htoq má, gungdu gi, mebu htoq má, je ahkyak lhê. ²⁴ Nghonoq pé é hkyó lé myit wú keq; yhangmoq gi, kyó hkyó kyó shu a kut kó; guqchyí eq sutdek lé a wó kó, nghut kôlhang, Garai Gasang gi, yhangmoq lé, byi tso byi huq nyi lhê. Nungmoq gi, nghoq hau pé htoq má je riyhang hpaudap nyi lhê a nghut kó lhu? ²⁵ Nungmoq má, ó yuq wá, myit chiq é eq, yhumsing é asak lé radúng kó wó jat yù kó rá lhu? ²⁶ Hau su mù lui, tiq dik é hkyó lé lhang, nungmoq a wó kut kó é nhing, hai mù lui gotú hkyó pé lé, myit myó nyi akó lhu?"

²⁷ Htutbó ban* pé hkâsu kut kó lo é lé, myit wú keq. Hau pé gi, mù le a zui, hkying le a dui kó nghut ri. Nghut kôlhang, Ngò, nungmoq lé tai kyo kólé, Hkohkâm Sholumon hpung kó dik u lé wut é mebu lhang, ban hau rabó lé a hkyit nghut ri. ²⁸ Lumjǐng myit tiq é bang é, hkú-nyí joq mù, napmá myihkyóm má dú kat pyám hui rá nghut é yosò mhan pé lé za lhang, Garai Gasang hau su kut hut é nghut le gi, nungmoq lé, je riyhang hut rá a nghut kó lhu? ²⁹ Nungmoq gi, hai zo hai shuq rá lé hkâho nyi kó; hau eq séng lui lé hkâ-myit chiq nyi kó. ³⁰ Hkâsu mù gá le, Garai Gasang lé a sé bang gi, hau hkyó banshoq lé châng hkat ho nyi akó; nghut kôlhang, nungmoq é Íwa Garai Gasang gi, hau pé lé nungmoq rá é hkyó, sé byí nyi lhê. ³¹ Nungmoq kúm gi, Yhang é mingdán lé ho

nyí keq, hau jáng, hau pé, nungmoq lé puq byi rá nghut lhê.

³² Sau hpung zò pé ê, hkâgyuq ko, hkâsu mù gá le, nungmoq é Íwa Garai Gasang gi, Yhang é mingdán nungmoq lé byí nau nyi ri. ³³ Nungmoq wó é zè pé lé ùng pyám lui, myung bang lé byi keq, yhumsing é matú a dat xau a dat wòm é ngunhtung sai lui, hkau sú lé a jé, manot eq le a wó zò é sutzè lé mauhkung htoq má hkong to keq. ³⁴ Hkâsu mù gá le, nang é sutzè joq jang má, nang é i-myit le jé nyí rá nghut lhê.

Yesuq Dum Jé Lé Lô Rã Hkying Lé Machya Nyí Rã Hkyó

Mht 24:45-51

³⁵ Nungmoq gi, hpyihit hit lui, (mù zui rá matú rì rì kut to keq); nungmoq é myibung lé tuq to mù, ³⁶ myihang poi mai dum tau lò lui, hkúm lo kok é, yhumsing hpó lé radá dâm hkum lhom wó hpông hang yù shoq, lánng tò é dui-nhang zoshang wui su kut nyi keq. ³⁷ Hau yhumsing jé lo le, machya nyi lánng é dui-nhang zoshang wui gi, hkungsó wó nyi rá. Hkâsu mù gá le, ngò, nungmoq lé teng za tai kólé, hau yhumsing hpó gi, yhangmoq lé yuq zung to nhang lui, yhang gi, dui-nhang zoshang su hpyihit hit mù, sai tso sai huq rá nghut lhê. ³⁸ Gunggam yoq lé nghut kôlhang, woq tún hkún lé nghut kôlhang, hau su kut machya nyi é lé, yhumsing hpó lo myang é nghut le gi, dui-nhang zoshang hau bang hkungsó wó nyi ri. ³⁹ Yhumsing hpó rayuq, hká u má hkau sú lé lô rá lé, sê tò é ru nghut le gi, yhang machya nyi lui, yhang yhum lé a wó hput htong nhang rá nghut é lé, bün sé nyi keq. ⁴⁰ Hau mù, nungmoq le rì ri nghut nyi keq; hkâsu mù gá le, hau Byu Yhangzo gi, a bün nung má jé lé lô rá nghut lhê." gã ri.

⁴¹ Hau hkún, Petruq gi, "Yhumsing é, dangtú shí gi, ngamoq lé za, tai é nghut lhê lhu? Hau a nghut jáng, lhunglhang bang lé tai é dong nghut lhê lhu?" ga myí ri.

⁴² Hau jáng, Yesuq gi, "Lumging é eq hpaqchyí bo é sùt zum sú gi, hká yuq nghut lhê lhu? Hau yuq gi, yhang yhumsing é dui-nhang zoshang wui lé ahkying jé jáng zoshuq gam byi rá matú, yhumsing hpó eq hkyin to sú dut rá nghut lhê. ⁴³ Yhumsing hpó dum tau lo é hkún, hau su kut nyi lánng é dui-nhang zoshang gi, hkungsó wó nyi ri. ⁴⁴ Ngò, nungmoq lé teng za tai kólé, yhumsing hpó hau gi, yhang é sutzè banshoq, dui-nhang zoshang hau lé ap to rá nghut lhê. ⁴⁵ Nghut kôlhang, dui-nhang zoshang hau gi, yhang é i-myit unghkau má, 'Ngá é yhumsing hpó jé lô rá gyai myang ashí.' ga myit pyám mù, dui-nhang zoshang luzum wui myiwe, yuqgè lé nhuq bat é eq, zo yè shuq yè i shuq wut nyi é nghut jáng, ⁴⁶ dui-nhang zoshang hau é yhumsing hpó gi, yhang a myithyu tò é ho

* 12:27 Htutbó ban gi, yung dik é yosò ban nghut lhê.

buiyni eq yhang a sé tô é ahkyíng má jé lô mù, yhang lé jap pyám luí a lumjíng bang eq rahá nyhi pyám rá ngut lhê.

⁴⁷ Yhumsíng hpô é i-myit lé sê to kôlhang, yhang ô nau é dông a cháng, rì ri le a hen tô é dui-nhâng zoshâng gi, yhâng ykumsíng eq nhuq bat é lé, myo myo hui zo rá ngut lhê.

⁴⁸ Ngut kôlhang, a sé mù kut shut sù kúm gi, shau za bat é hui rá ngut lhê. Haù eq rajung za, Garai Gasang gi, myo shoq wó yú su chyáng mai, myo shoq dúng yù rá ngut lhê. Myo myo ap byi tô é hui su chyáng mai, je myo shoq dum dúng yù rá ngut lhê.

Ngungón Nhâng Râ A Ngut, Lhoq Kang Nhâng Râ Ru Ngut Lhê

Mht 10:34-36

⁴⁹ Ngò jé lé é gi, myigùng htoq má, myi nyé nhâng rá matú ngut lhê. Myi haù dap to láng é ngut le gi, ngò ô nau é hkyô Jup byíng bê. ⁵⁰ Ngut kôlhang, ngò hkam yù rá é bapisma[†] rajung joq ashí, haù a hkam yù yú gi, ngò gyaí yhang hkâm zo wú nyi ri. ⁵¹ Ngò jé lé é gi, myidám htoq má simsaq hkyô byi rá matú ngut nhô ngam akò lú? Haù dông a ngut, Ngò, nungmoq lé tái kôlé, byu pé lé lhoq pyô lhoq kang rá matú sheq ru ngut lhê. ⁵² Haù su mù, ahkú mai rayhúm za má é byù ngo yuq gi, rayuq eq rayuq yhangmoq yhangchang byoq gâng lhum mù, sum yuq rahú, í yuq rahú, í yuq rahú, sum yuq rahú dut lo bùm bekô rá ngut lhê. ⁵³ Yhângwa gi, yhâng é yuqzo eq, yuqzo gi, yhângwa eq, yhângnu gi, yhâng é byizo eq, byizo gi, yhângnu eq, yhangmhoi gi, yhâng dumó eq, yhâng dumó gi, yhangmhoi eq kut, ngá é yanmai, rayuq eq rayuq byoq gâng lhum bùm bekô rá ngut lhê." ga tái ri.

Dut Lò Râ Hkyo É Kumhá Lé Sê Gam Hkoq Râ Lhê

Mht 16:2-3; 5:25-26

⁵⁴ Hau htàng shiwa byu pé lé, Yhang tái é gi, "Nungmoq gi, buiwàng hkyam shut mhut htup é lé myàng jáng, 'Mau wo lò berá.' ga radá dâm lhaq tái tai mu akò, haù eq rajung za le, dut lò mò mu ri. ⁵⁵ Dum ngut jáng, maupyí shut má é lai lo le, 'Bui htán berá.' ga lhaq tái tai mu akò, haù eq rajung za le dut lò mò mu ri. ⁵⁶ Gegùn labyoq kut bang é, nungmoq gi, myigùng eq mauhkung é kumhá lé, sê gam hkoq yu nyi akò. Haù su ngut kô le nhíng, haí mù luí, shí ipyat má é kumhá lé gi, a sê gam hkoq dut tò akò lú? ⁵⁷ Haù eq rajung za, haí mù haù dینگmán é hkyô lé yhumsíng yhang yhang a wó do-qđán yù kô é lú? ⁵⁸ Dangké, nang lé yui tsuq sù eq rahá, tarà agyi wá chyáng é ló le, hkyô má yhang eq ngón shoq byín hpyé hui yù aq. Haù a ngut jáng, yui yhumsíng gi, nang lé

tarà agyi chyáng é dé pyám luí, tarà agyi gi, htóng hkyô su chyáng, nang lé ap pyám luí, yhang gi, nang lé htóng má lhung pyám rá ngut lhê. ⁵⁹ Ngò, nang lé tái lé, yuichyín haù a ban xap xap gi, htóng haù mai nang wó htoq ló rá a ngut." ga tái ri.

13

Myit A Lhíng Jáng Shi Hten Byuq Râ

¹ Haù hkún, haù má nyi é byù ra-am gi, mauzau Pilat eq Galile byù ra-am lé sat mù yhangmoq é sui eq yhangmoq nóng jáu é hkungga lé nyhò pyám é hkyô, Yesuq lé lé tái kyô akò. ² Yesuq gi, "Galile byù haù bang haù su kut hui zo kô é yanmai, yhangmoq gi, gotú Galile byu pé banshoq htoq má, yubak je myô akò nghú, nungmoq myit ngam akò lú? ³ Haù su a ngut! Ngò, nungmoq lé tái kôlé, nungmoq le, myit a lhíng kô é ngut le gi, banshoq bang haù eq rajung za shi hten byuq kó rá ngut lhê. ⁴ Haù htoq agó, Siloam wá má é machya gyop gyó luí, nhé sat hui é byù raxe shit yuq gi, Yerusalem wá mó má é byù banshoq bang htoq má mara je kô akò nghú, nungmoq myit ngam nyi akò lú? ⁵ Haù su a ngut! Ngò, nungmoq lé tái kôlé, nungmoq le, myit a lhíng kô é ngut le gi, banshoq bang haù eq rajung za shi hten byuq kó rá ngut lhê." ga tái ri.

⁶ Yesuq dangtú dông dum tái é gi, "Byù rayuq gi, yhâng é tsibiyq hkyâm má, maihpáng gám ragám hó tò ri. Yhang agám haù má, ashí é ho wú le, zui tô é a myàng ngut ri. ⁷ Haù hkún, yhang gi, 'Wú aq, ngò sum zán tup maihpáng gám haù má ashí é ho wú le, a myàng ngut ri; haù lé htup pyám aq. Haí mù, maumyí aha agó kut yuq nhang tò lhê lú?' ga luí, tsibiyq hkyâm zúng sù lé tái ri.

⁸ Hkyâm zúng sù gi, 'Yhumsíng é, hkúzán za gi, yuq tò wú shi sháng gaq, shigám hau é lhíngkyuq má ngò du lhíng to mù, myihpún kat luí bóm byi wú shirâ. ⁹ Htang zán má ashí zui é ngut le gi, yuq to sháng gaq, ashí a zui é ngut le kúm gi, htup pyám rá ngut lhê.' ga luí, hkyâm yhumsíng lé tù tái ri." gá ri.

Bánno Buiyni Má Gùng Loq Hten Sù Lé, Lhoq Gê Byi É Hkyô

¹⁰ Bánno buiyni lé, Yesuq gi, tarajong ralhum má, mhoqshit nyi ri. ¹¹ Haù hkún, haù má raxe shit zán tup nat dap luí, gùng loq lhoq hten hui é myiwe rayuq le nyi tò ri. Yhang gi, dangngóm luí, gungđu ratsui lhang a wó lhoq nyhâng lô é sù ngut ri. ¹² Yesuq gi, myiwe haù lé myàng jáng, yhâng chyáng wut yù mù, "Myiwe myhi é, nang, nòhpá mai gè berá." ga luí, ¹³ yhâng é ahtop má loq ke byi ri. Haù hkún jáng, myiwe haù gi,

[†] 12:50 Shí má é bapisma gi, Yesuq, ajung jung hpuzo mù shí hkâm é hkyô lé tái é ngut lhê.

nyàng za dum wó yap luí, Garai Gasang lé hkyá-on nyi ri.

¹⁴ Haú mù, Bánno buinyi lé, Yesuq nõhpyo lhoq gè byí é yanmai, tarajong má up sù gi, wú nhik-yo luí, "Mù wó zuí é buinyi hkyuq nyi joq tò le, buinyi haú pé má, lé wó lhoq ge yù lhê. Haú mù, Bánno buinyi má gi, hkâkut kó." ga luí, shiwa byu pé lé tai kat ri.

¹⁵ Haú hkûn, Yhumsing Yesuq gi, "Gegun labyoq kut bang ê, nungmoq yuq hkangmó gi, Bánno buinyi lé, yhumsing é no, logúng pé lé, hkup mai hpông htoq yù mù uchyam byi huq huq kut akò a nghut thú? ¹⁶ Haú nghut le gi, raxe shit zân gón Tsadán eq tú to huí é, Abraham é yhangzo yhangshu miyiwe zo shí lé, Bánno buinyi má Tsadán loq mai, hkyut byi a gíng rá thú?" ga tú tai ri.

¹⁷ Haú su ga tai jáng, Yhang eq i-miyit shai lhum é bang banshoq gi, hoq hpû byuq bum akò. Shiwa byù banshoq bang kúm gi, Yhang kut é mauhpo amù banshoq é yanmai, gabú nyi bum bekò nghut ri.

*Angshi Cham Eq Munchi Dangké
Mht 13:31-33; Mrk 4:30-32*

¹⁸ Haú hkûn, Yesuq tai é gi, "Garai Gasang é mingdán gi, hai eq wú rá thú? Ngô hai eq tai kê wú rá thú? ¹⁹ Haú gi, byù rayuq mai, yhang é hkyâm má hô tò é angshi cham eq wú ri. Angshi cham haú gi, yuq kò lò mù agàm mó dut lò jáng, hau é akoq pé má, maulat nghoq zò pé wó zung nô yu akò." ga ri.

²⁰ Yhang dum xoq tai é gi, "Garai Gasang é mingdán lé, ngò hai eq tai kê wú rá thú? ²¹ Haú gi, miyiwe zo rayuq eq sungò mún sum búng má yu nyhó luí, haú pé banshoq lé wó lhoq daú nhang é múnchi eq wú ri." ga ri.

*Chyap É Hkúmdong
Mht 7:13-14, 21-23*

²² Hau htàng, Yesuq gi, Yerusalem và mó shut lai é ló uchyang, rawà bàn rawà má wàng mù, mhoqshit byí ri. ²³ Haú hkûn, byù rayuq gi, "Yhumsing ê, hkyi yu é hui rá bang gi, shau za nghut rá thú?" ga luí, Yesuq lé myí ri.

²⁴ Yesuq gi, "Chyap é hkúmdong mai, Garai Gasang é mingdán má wó wàng shoq shikut keq. Hkâsu mù gà le, ngò, nungmoq lé tai kôlé, byù myo myo gi, wó wàng shoq ga shikut wú kó rá. Nghut kôhang, a wó wàng kó rá nghut lhê. ²⁵ Yhumsing hpó,* hkum toq myí pyâm é htàng má sheq, nungmoq gi, hkúmdong hí má yap to mù, hkum lé kok uchyang, 'Yhumsing ê, ngamoq lé hkum hpóng byi laq ô!' ga luí, wut dung jáng, haú yuq gi, 'Nungmoq ó nghut é lé le, hkarâ é

bang nghut é lé le, ngò a sé.' ga tú tai rá nghut lhê.

²⁶ Haú jáng, nungmoq gi, 'Ngamoq gi, nang eq rahá zo wú shuq wú bê bang nghut lhê; ngamoq é và hkyô pé má le, nang mhoqshit byí wú bê nghut lhê.' ga tai bekò rá.

²⁷ Nghut kôhang, yhumsing hpó kúm gi, 'Nungmoq ó nghut é lé le, hkarâ é bang nghut é lé le, ngò a sé. Age ashop đông kut é bang banshoq ê, ngá chyáng mai gâng ló byuq keq.' ga tú tai kat rá nghut lhê.

²⁸ Garai Gasang é mingdán má, Abraham, Isak, Yakup pé eq myiqtoi pé banshoq bang nyi to kô é lé, nungmoq wó myàng kôhang, nungmoq gi, shinggan shut hkat pyâm é hui luí, haú jowò má ngaubyi ngaù nhap eq zù kyik kyik shoq hpuzò nyi bum bekò rá nghut lhê. ²⁹ Hau hkûn, buihtoq, buiwàng, maupyí, mautsung má é mingdán myo myo mai byu pé lé luí, Garai Gasang é mingdán zoshuq poi má myang zùng kó rá nghut lhê. ³⁰ Haú hkûn, ahkuí htàng gyó nyí bang gi, hí bekò rá; ahkuí hí to bang gi, htàng gyó bekò rá." ga luí, yhangmoq lé tai ri.

Yerusalem Và Mó Eq Séng Luí, Yesuq Tai É Hkyô

³¹ Haú u lé, Hparishe pé ra-am gi, Yesuq chyáng lé luí, "Shí jowò mai htoq ló byuq aq. Hkâsu mù gà le, Herut gi, nang lé sat rá hen nyi ri." ga luí, Yhang lé tai akò.

³² Haú jáng, Yesuq gi, "'Hkû-nyí, napmá,† ngò nat gang hkat pyâm luí, nõ zo hpyo zo lhoq gè byí rá nghut lhê; sum nyí ngù rá buinyi† má sheq, ngá mù bàn rá nghut lhê.' ngù luí, agè ashop é wamhkuí haú lé ló tai kyo keq. ³³ Hai wá dut kôhang, hkû-nyí, napmá, sánghpe nyí, ngò gi, é ló rá dut ashí. Hkâsu mù gà le, myiqtoi pé gi, Yerusalem và mó mai lai luí gotú jowò má a shi wú kó nghut ri.

³⁴ Yerusalem ê, Yerusalem é, myiqtoi pé lé sat pyâm pyâm kut mù, nang chyáng nhang kat é bang lé, luggok eq dú sat sat kut é myuq nang ê, woqzìng gi, yhangzò pé lé, yhang é dùng hkaú má tsing lhùng yu é su, nungzò pé lé, Ngò hkâ-myhó dâm shuí tsing yù nau kôhang, nang a đông nghut ri. ³⁵ Wú keq, nungmoq é yhum gi, nungmoq é matú chamchyuyi dut pyâm to berá nghut lhê; Ngò, nungmoq lé tai kôlé; Yhumsing é mying mai jé lé lo é Sù gi, hkungsò wó nyí sháng gaq.† nghù, nungmoq a tai tai gi, Ngo lé wó myàng kó rá a nghut lo." ga luí, yhangmoq lé tai ri.

* **13:25** Yhumsing hpó gi, Garai nghut lhê. Yhum gi, Garai é mingdán lé tai é nghut lhê. † **13:32** Hkû-nyí, napmá ga é gi, Yesuq mingkan htoq má mù zui rá ahkyíng lé tai é nghut lhê. ‡ **13:32** Sum nyí ngù rá buinyi ga é gi, Yesuq mingkan htoq má mù ban zui é buinyi lé tai é nghut lhê. ✧ **13:35** Hkyá-on 118:26

14

Hparishe Rayuq É Yhùm Má Yesuq Jé Nyi É Hkyô

¹ Bánno buinyi ra-nyí má, Yesuq gi, zang zo rá ga Hparishe suwún rayuq é yhùm má, é wang nyi tô le, haú má é bang gi, Yhang lé gyui gyui chôm wú nyi bum akô. ² Haú u lé, wui wam ana dut sù rayuq gi, Yesuq é hí má jé nyi tô ri. ³ Haú mù, Yesuq gi, "Bánno buinyi má nõhpyo lé lhoq gê byi é gi, tará wang lhê lú, a wang é lú?" ga luí, tará sará pé eq Hparishe pé lé myí kat ri. ⁴ Nghut kôlháng, yhangmoq gi, zim za dut byuq akô. Haú hkûn, Yesuq gi, nõhpyo hui sù lé, zuí to mù, lhoq gê byi luí, nhang kat ri.

⁵ Hau htâng, Yesuq gi, yhangmoq lé, "Nungmoq chyáng má é rayuq yuq gi, yhum-sing é yhangzo rayuq yuq, haú a nghut jáng, no myang radu du, Bánno buinyi má, wuihtung má byit gyô le, haú hkûn jáng, a xe htoq yu é za, wó nyi kó rá nghut lhê lú?" ga myí kat ri. ⁶ Yhangmoq kúm gi, dang haú hkun lé, haí le a wó tú tai kó nghut ri.

⁷ Haú hkûn, Yesuq gi, jì tô é bang jé réng é zùng jowò pé hkyin yu nyi kô é lé myàng jáng, yhangmoq lé dangtú dông tai é gi, ⁸ "Byù rayuq yuq nang lé, myiháng poi má jì é nghut jáng, je réng é jowò má hkâ é zùng, Hkâsu mù gâ le, nang htoq je aróng wó sù lé le, jì to shírá abe. ⁹ Jì tô é nghut jáng gi, nungnhik lé jì tô é yhum-sing hpó lé lô mù, 'Shì yuq lé jowò hui byi aq.' ga luí, nang lé lé tai jáng, nang hoq hpu luí, hkyí htâng shut hui zùng ra rá nghut lhê. ¹⁰ Haú mù luí, supé nang lé jì le, hkyí htâng má é zùng aq; haú hkûn, nang lé jì sù lé mù luí, 'Buinùm hpó é, shì je réng é jowò má hui doq zùng aq.' ga luí, nang lé tai jáng, nang eq rahá zung tô é bing lhunglháng báng é hí má, nang gi, myoqdong wó rá nghut lhê. ¹¹ Hkâsu mù gâ le, yhum-sing gùng lé waq toq é sù ó yuq nghut kôle, lhoq nyhum pyâm é hui rá nghut lhê; yhum-sing gùng lé, lhoq nyhum é sù kúm gi, waq toq é hui rá nghut lhê." ga tai ri.

¹² Hau htâng, Yesuq yhang lé jì é yhum-sing hpó lé tai é gi, "Napzang, a nghut jáng, myinxún lé nang byi tso nau le gi, nang é buinùm wui, águ âmàng pé, mungmoq wui, sùt wó é yhumkyo chang pé lé hkâjì tso. Haú bang lé jì tsô é nghut jáng gi, yhangmoq nang lé dum jì tsô é eq, jeju dum tau kó rá nghut lhê. ¹³ Nghut kôlháng, nang poi kut mù, byi tso byi huq nau é nghut le gi, myùng bang, hkyí gyui loq hten bang eq myoqjit é bang lé, jì tso aq. ¹⁴ Haú su kut jáng, nang hkungsó wó nyí rá nghut lhê. Yhangmoq nang lé jeju a wó tau kôlháng, dingmán bang dum dui toq lo é buinyi má, hau é akyû lé, nang wó hkam yu rá nghut lhê." gâ ri.

Zoshuq Poi Mó Lé Dangtú Yu É Hkyô
Mht 22:1-10

¹⁵ Yesuq eq rahá zô zung tô é byù rayuq gi, dang haú wó gyo jáng, "Garai Gasáng é mingdán má é zoshuq poi má wó zo rá sù gi, hkungsó wó nyí sù nghut rá." ga luí, Yesuq lé tai ri.

¹⁶ Yesuq haú yuq lé tú tai é gi, "Byù rayuq gi, myinzang byi tso rá ga, zoshuq poi mó ralhúm hen to mù, byù myo myo lé jì tô ri. ¹⁷ Zang byi tso rá yàm jé jáng, yhâng é dui-nhâng zoshâng lé, jì tô é báng chyáng 'Lé keq hkoi, zoshuq jin to bê.' ga é châng wut nhang ri.

¹⁸ Nghut kôlháng, haú bang banshoq gi, zoshuq poi má a é rá dông chyát he pyâm akô. Rayuq sù gi, 'Ngò yohtung rahkyang wui tô lhê; haú lé é wú rá dut ri. Haú mù, ngo lé ahkáng byi shi laq.' ga yhang lé tai ri.

¹⁹ Dum rayuq le, 'Ngò, nohtó ngo zúm wui tô lhê; haú pé lé dui nhang chyam wú rá dut ri; ngo lé ahkáng byi shi laq.' ga tai wó ho ri.

²⁰ Dum rayuq le, 'Ngò myiwe hâng tô é a myáng shì mù, a wó lé.' ga tai wó ho ri.

²¹ Haú jáng, dui-nhâng zoshâng tau lò mù, yhâng é yhum-sing lé haú hkyô banshoq lò tai kyô ri. Haú hkûn, yhum-sing hpó gi, nhikmó gyô yo mù, 'Wà má é hkyô mó hkyô zo hkat hkangmó má hân hân é mù luí, myùng bang, hkyí gyui loq hten bang eq myoqjit bang lé, é jì lò aq.' ga luí, yhâng é dui-nhâng zoshâng lé nhang kat ri.

²² Hau htâng má, dui-nhâng zoshâng gi, 'Yhum-sing é, nang nhang é eq rajung za ban kut bê; nghut kôlháng, zùng rá jowò gi, mân tô ashí.' ga tai ri.

²³ Haú su ga jáng, yhum-sing hpó gi, 'Ngá yhùm bying rá matú, wà yàm hkyô pé eq hkyâm yàm hkyô pé má htoq é mù, myang é bang lé a wó le wó shoq é tsing shui lò aq. ²⁴ Nang lé ngò tai lé, hí lé jì to hui é bang rayuq lháng, ngá é zoshuq poi lé wó chyim wú rá a nghut.' ga luí, yhâng é dui-nhâng zoshâng lé tai ri." gâ ri.

Yesuq É Chángzo Wó Dut Rá Matú
Mht 10:37-38; 5:13; Mrk 9:50

²⁵ Byù hpùng mó Yesuq eq rahá é ló kô é hkûn, Yesuq gi, haú bang lé lhing wú luí, ²⁶ "Ngá chyáng lé sù ó yuq nghut kôle, yhum-sing é ìnu, ìwa, yhangmyi, yhangzo eq, yhanggu, yhangmang, yhâng nhammó pé lé le, haú htoq agó, yhum-sing é asak lé le, ngo lé chyitdap é htoq má je chyitdap sù gi, ngá é chángzo a wó dut. ²⁷ Yhum-sing é tapzang lé a waq é za, Ngá htâng châng é sù ó yuq nghut kôle, Ngá é chángzo a wó dut.

²⁸ Dangké, nungmoq chyáng má é byù rayuq yuq, tsehtung yhùm ralhúm sai nau le, yhang gi, yhùm haú ban sai rá matú, ngùn hkâ-myhó bàn rá eq yhang wó tô é ngùn luq a luq é lé, zùng mù luí, hí a sôn wú é byù nyi kó rá lú? ²⁹ Laq má mù, apùn awang gi, sai hí to mù luí, a wó lhoq pân é nghut

jáng, ³⁰ myàng é bang banshoq èq, 'Shí yuq gi, apùn awang gi, saí hi to mù luí, banshoq a wó saí pán lo nghut ri.' ga luí, yhang lé jóng pyám bekô râ nghut lhê.

³¹ Dangké, hkohkâm rayuq gi, gye zan râ hen le, gyezo í mun eq lé sù hkohkâm lé, gyezo ramùn eq za lhom wó zân ùng râ, a wó zân ùng râ lé, zùng mù luí, hí a myit wú é nyi râ lhú? ³² A ùng râ dut le gi, gye pé we we má nyi tô ashí hkùn lé, lagyo suwún pé lé nhang kat luí, simsaq râ matú htingram pyám ra râ nghut lhê. ³³ Haú eq rajung za, nungmoq chyáng má é ó yuq nghut kôlháng, yhumsging wó é zè banshoq lé, a pyám to sù gi, ngá é chángzo wó dut râ a nghut.

³⁴ Xo gi, gè lhê. Nghut kôlháng, xomân kân byuq jáng gi, haú lé hai èq dum wó lhoq ngam yù râ lhú? ³⁵ Haú gi, myigung matú le, myìhpún kut râ matú le, akyú a bò lo. Haú mù luí, shinggan shut kúm gi, dú pyám sé akô.

Gyo râ nohkyap dap sù gi, gyô yù sháng gaq." ga tái ri.

15

Byuq Byuq É Sau

Mht 18:12-14

¹ Ra-nyí lé, Yesuq é dang gyo kó râ ga, kang guq bang eq yubak dap bang gi, Yhâng chyáng lé zing bum akô. ² Haú hkùn, Hparishe pé eq tará sará pé gi, "Shí yuq gi, yubak dap bang lé lhom hap yù mù, yhangmoq eq rahá za, zo shuq nyi ri." ga tái put nyi bum akô.

³ Haú mù, Yesuq yhangmoq lé dangtú dông tái é gi, ⁴ "Nungmoq má, sau rashô du wó luí radu byuq byuq é nghut le, gaú xe gaú du lé yoso mhan yô má nyi pyám to mù, byuq byuq é sau haú lé, myàng shoq a châng ho yu é, ó yuq wá nyi kó râ lhú? ⁵ Byuq byuq é sau haú lé myang hô jáng, gyaí gau é i-myt èq goqsân htoq má bún kê chung mù, ⁶ yhùm má jé jáng, yhâng é buinùm ji-myi wù eq, yhumkyo chang pé lé ji yù mù, 'Ngá é byuq byuq é sau lé, ngò dum myang ho yù bê, ngò eq rahá chòm gabú sháng.' ga tái râ nghut lhê. ⁷ Haú eq rajung za, Ngò, nungmoq lé tái kôlé, myit lhing a rá é dingmán bang gaú xe gau yuq lé gabú é htoq, myit lhing é yubak dap sù rayuq é yanmai, mauhkung htoq má, je ri-yhang gabú jowò dut râ nghut lhê.

Byuq Byuq É Ngùn Chap

⁸ Dum nghut jáng, dangtú ralhüm gi, myiwe rayuq, ngùn raxé chap wó é má, rachap byuq byuq é nghut le, yhang gi, myibung tap mù rayhum é shum luí, myang yù shoq rago za, ho wú râ a nghut lhú? ⁹ Haú lé ho myàng jáng le, yhâng é buinùm ji-myi wù eq yhumkyo chang pé lé ji yù mù, 'Byuq byuq é ngá ngùn chap lé dum myang ho yù bê, ngò eq rahá chòm gabú

sháng.' ga tái râ nghut lhê. ¹⁰ Haú eq rajung za, Ngò, nungmoq lé tái kôlé, myit lhing é yubak dap sù rayuq é yanmai, Garai Gasàng é maumang lagyô pé hí má, gabú jowò dut râ nghut lhê." gá ri.

Byuq Byuq É Yuqzo

¹¹ Yesuq xoq tái é gi, "Byù rayuq gi, yuqzo í yuq wó ri. ¹² Haú nhik má é tiq sù yuq gi, yhâng wa lé, 'Áwa é, ngò wó gíng é sutzè, ngo lé gàm byi laq.' ga dung jáng, yhâng wa le yhangnhik tàng lé sutzè gàm byi kat ri.

¹³ Haú htàng hká-myháng a myàng má, yhangzo tiq sù yuq gi, sutzè banshoq hkyom yu chung mù, mau we shut é luí, haú jowò má, mingkan ngón hkyô châng é má yhang wó é ngunzè banshoq lé langsa pyám bê. ¹⁴ Haú su kut ngunzè wó mi-wó lé ban langsa pyám é htàng má, haú mau má mutmó gyo é yanmai, yhang gi, asho awui dut lo nyi bê nghut ri. ¹⁵ Haú mù, haú mau má é byù rayuq chyáng, langchyáng é kut le, haú yuq gi, yhang lé waq rém jang shut nhang kat mù, waq lé lhom zùng nhang ri. ¹⁶ Haú hkùn, yhang gi, waq jùm zô é shigyang cham pé lé lháng, zo naú shoq dut kôlháng, ó yuq le a byi zo kó nghut ri.

¹⁷ Haú mù, yhang myit bún lo é gi, 'Ngá wá chyáng nyi é langchyáng pé gi, agùn agó myàng zô nyi kó râ nghut lhê. Nghut kôlháng, ngò gi, shí jowò má, zo mut wuishit é eq shí ló râ dut bê. ¹⁸ Ahkuí, ngò toq mù, ngá wá chyáng taú ló luí, 'Áwa é, ngò gi, Garai Gasàng lé le, nang lé le, shut bê. ¹⁹ Ahkuí mai ngò gi, nung zo ngù râ a gíng lo, hau é yanmai, náng é langchyáng rayuq dông za ngò lé nyi nhâng laq." ngù luí, ló tái rá." gá ri. ²⁰ Haú htàng, yhang toq luí, yhâng wá chyáng ló le, yhang we we má ru nghut ashí hkùn mai, yhâng wa gi, yhang lé lhom myàng jáng, wú shogyo luí, din é mù, yhangzô é lingzing má é po pyik dap to luí, bopuq puq byi ri.

²¹ Haú hkùn, yhangzo gi, 'Áwa é, ngò gi, Garai Gasàng lé le, nang lé le, shut bê. Ahkuí mai, ngò gi, nung zo ngù râ a gíng lo.' ga luí, yhâng wa lé dúng tóngbán ri.

²² Yhângwa kúm gi, yhâng é langchyáng pé lé, 'Réng dik é mebu hân hân yu lé mù, yhang lé hut byi keq; yhâng é loq má, loqchyop chyop byi keq; hkyí má le hkyí-tsung tsung byi keq. ²³ Tsó myum tô é nojùng zo le yu sat keq. Haú mù, nga-nhúng gi, zoshuq poi kut mù chòm ngón sháng. ²⁴ Haí mù gá le, ngá zo shí yuq gi, shí byuq é mai, ahkuí dum duí bê; byuq byuq é mai le, ahkuí dum myàng bê.' ga tái ri. Haú mù, yhangmoq gi, ngón ngón zo shuq ló bekô.

²⁵ Haú u lé, yhangzo ko sù yuq kúm gi, yò má nyi tô ri. Yhang gi, yò mai yhùm shut jé lo nyi é hkùn, zing út bat luí gó nyi é hté lé lò wó gyô ri. ²⁶ Haú mù, langchyáng rayuq

lé wut yù luí, haú hkyô lé yhang myí wú le, ²⁷ langchyang haú gi, 'Nung gu dum taú jé lô bê. Haú mù, náng wa gi, nung gu wáng wáng zán zán dum taú jé lo é lé lhom myàng luí, tsô myum tô é nojúng zo lé sat bê nghut ri.' ga tai kyô ri.

²⁸ Dang haú lé wó gyo jáng, yhang gi, gyô nhik-yo luí, yhúmhaú shut a wàng lo kut ri. Haú mù, yhang wa htoq é luí, yhang lé é chyuoq ri. ²⁹ Yhangzo kúm gi, 'Wú aq, ngò, shí-myháng shílo náng é jùn dông kut luí, hkâ-nhám le náng dang lé a lu lai wú. Nghut kôhlang, ngò ngá é luzúm wui eq ngón kún rá matú, bainám zo radu háng radám le náng a byi wú shí. ³⁰ Shiwa myhi pé eq zum yap wún luí, náng é sutzé lé lhoq pân pyâm é sú nung zo haú dum taú jé lô jáng kúm gi, tsô myum tô é nojúng zo lé, yhang é matú náng sat byi bu-nhung!' ga luí, yhang wa lé tú tai ri.

³¹ Yhangwa gi, 'Ngá zo é, náng gi, hkâ-nhám le ngò eq rahá yhang nyi nyi lhé mù, ngá é sutzé joq mijoq banshoq gi, náng é chyat nghut lhé. ³² Nghut kôhlang, shí nung gu gi, shí byuq é mai ahkuí dum duí bê; byuq byuq é mai le, dum myàng bê. Haú mù, gabú hpo nghut bê.' ga luí, yhang lé tai ri." ga ri.

16

Hpaqchyí Ge Dâ É Sùt Zum Sù

¹ Yesuq, Yhang é chángzô pé lé tai é gi, "Sahté rayuq chyáng sùt zum sù rayuq nyi ri. Haú yuq gi, yhang yhumsing é sutzé pé lé jai hpyuq pyám ri ga, yhang yhumsing é hí má, yhang lé mara lé hun akô. ² Haú hkún, sahté hpó gi, yhang lé wut yù mù, 'Nàng é hkyô lé ngò wó gyo bê. Haú gi, hkâsu lú? Nàng sùt zúm é eq séng luí kut tô é jìhpán laiká lé lò shít wú aq. Hkâsu mù gá le, ahkuí mai náng gi, sùt zum sù wó kut lo rá a nghut lo.' ga tai ri.

³ Haú jáng, sùt zum sù gi, 'Ahkuí, ngò hkâsu kut lo rá lú? Ngá é yhumsing gi, ngo lé sùt zum ayá mai lhoq hkyô pyám bê. Myi du myi hkop zo rá le ngò wum a bò; dung zo dung shuoq rá le ngò hoq ri. ⁴ Ngo lé sùt zúm é ayá mai hkyô pyám htàng má, supé ngo lé yhangmoq é yhúm má lhom hap yù rá matú, hkâsu kut rá hkyô lé ngò sé bê.' ga wó myit rot jáng, ⁵ yhang gi, yhang yhumsing hpó lé chyín dap tô é bang rayuq htàng rayuq lé wut yù mù, sâng-hí yuq lé, 'Ngá yhumsing hpó chyáng náng chyín hkâ-myhó dap tô lhé lú?' ga myi jáng, ⁶ haú yuq gi, 'Xú rashô púng dap lhé.' ga tú tai ri.

Haú jáng, sùt zum sù gi, 'Nàng é jìhpán yù luí, hân zùng mù, ngo xê púng kut ká to aq.' ga yhang lé tai ri.

⁷ Dum rayuq lé, 'Nàng hkâ-myhó dap tô lhé lú?' ga myi jáng, háu yuq gi, 'Sungso rashô búng dap lhé.' ga tú tai ri. Sutzum sù gi, haú yuq lé, 'Nàng é jìhpán má shít xê búng kut ká to aq.' ga tai ri.

⁸ Haú a dingmán é sùt zum sù lé, yhumsing hpó gi, hpaqchyí ge da sù nghut ri ga hkyá-ôn ri. Ngò shí lé tai é gi, mingkan zo wui gi, yhangmoq é mingkan eq séng é hkyô pé má, maubó gung é yhangzo pé* htoq hpaqchyí je bò kô é yanmai nghut lhé. ⁹ Haú mù luí, Ngò nungmoq lé tai kyo kôle, a tara é sutzé pé éq buinùm ho nyi keq, haú mù, sutzé haú htúm byuq jáng, nungmoq lé, ahtum abyuq joq tô é yhúm má, lhom hap yu é hui kó rá nghut lhé.

¹⁰ Tiq é mù má wó lum é sú ó yuq nghut kôhlang, mù mó má le wó lúm rá nghut lhé. Tiq é mù má lhum a zui é sú ó yuq nghut kôhlang, mù mó má le lhumzui rá a nghut. ¹¹ Haú mù, mingkan sutzé má háng nungmoq lé a wó lúm kô é nghut le gi, haú tengmán é sutzé lé, nungmoq chyáng ó yuq wá kâm ap byi rá lú? ¹² Supé é sutzé má, nungmoq lé a wó lúm kô é nghut le gi, nungmoq síng âng é sutzé lé, nungmoq chyáng ó yuq wá kâm ap byi rá lú?

¹³ Dui-nhâng zoshâng ó yuq nghut kôhlang, yhumsing í yuq lé wó dojaú rá a nghut. Hkâsu mù gá le, yhang gi, rayuq lé a jú kut mù, rayuq lé, chyitdap rá nghut lhé; haú a nghut jáng, rayuq lé gi, lhumzui mù, rayuq lé gi, hpau a tap kut rá nghut lhé. Nungmoq gi, Garai Gasang lé le, ngunzê lé le, radá dâm wó dojaú kó rá a nghut." ga tai ri.

¹⁴ Ngùn myoqnoq é Hparishe pé gi, dang haú banshoq lé wó gyo kôjáng, Yesuq lé wuizui kut pyám byi akô. ¹⁵ Haú mù luí, Yesuq gi, yhangmoq lé, "Nungmoq gi, byu pé hí má yhumsing gùng lé yhumsing dingmán bang su kut shít mhaú é bang nghut akó; nghut kôhlang, Garai Gasang gi, nungmoq é i-myit unghkaú lé sé sù nghut lhé. Byù é hí má hpau dap é pé gi, Garai Gasang é hí má achaq achyut é nghut nyi ri.

¹⁶ Jep é tará† eq myiqhtoi pé é dang, ahko ahkáng wó tô é ahkyíng gi, wui-myhup sará Yohan jé lé é buinyi jé shoq nghut bê. Haú hkyíng mai gi, Garai Gasang é mingdán hkyô gabú danglú lé, hko kyô nyi mù, yuq du jup gi, haú hkyô má htúng chying wang ló bum akô. ¹⁷ Jep é tará má é tiq dik é dangjí eq myihkyet zo ralhúm lé wó lhoq hten rá htoq, mauhkung eq myigùng hten rá gi, je lui rá nghut lhé.

¹⁸ Dangké, yhumsing é yhangmyi lé kâng pyám mù, miyiwe gotú dum háng yu é sú ó yuq nghut kôle, su-myi lú é sú nghut bê; yhumsing é yhanglàng eq gang bê miyiwe lé

* 16:8 Maubó gung é yhangzô pé nghu é gi, Garai Gasang é yhangzô pé lé tai é nghut lhé. † 16:16 Jep é tará gá é gi, Garai Gasang, Moshéq mai nga-nhúng lé býi tô é tará lé gá lhé.

hâng yu é sù le, su-myi lú é sù dut bê nghut ri." ga tái ri.

Sahtê Hpô Eq Lazaruq

¹⁹ Yesuq dum xoq tái é gi, "Radàm lé, sahtê rayuq gi, nè é eq nú-nhâm é mebu wut mù luí, nyí nyí bui bui zo ngón shuq ngón nyi ri. ²⁰ Yhâng é hkúmdong má gi, ragùngdú é jeq byi tô é Lazaruq gâ é dung zo sù rayuq lé, lé nyhi tô akô. ²¹ Hâu yuq gi, sahtê wá é siboí mai gyó é agyó ahtâng lé, wú zô nau nyi ri. Hkuí pé le yhâng é dàm pé má, lé yoq byí nyi akô.

²² Htâng má, hau dung zo sù shi byuq jáng, maumang lagyô pé gi, mauhkúng má nyi é Abraham é tanghkoí má yhang lé shui ló byí akô. Sahtê wá le shi byuq luí, yhúm pyám bekô nghut ri. ²³ Sahtê wá gi, ngaraí ming má dik shoq hpuzô nyi mù luí, tu wú kat le, we we má Abraham lé le, yhâng é tanghkoí má é Lazaruq lé le, myàng kat ri. ²⁴ Hâu mù, yhang gi, 'Áwa Abraham ê, ngo lé shogyo yù laq ô. Ngò gi, shí myi htum má achíyí aku nyé é hui zô nyi ri. Hâu mù, Lazaruq gi, yhâng é loqnyhui ú éq wui má tik yú mù, ngá é shô má wui ra-poq zo hkálháng lé tik cham byi sháng gaq, yhang lé ngá chyáng nhang kat byi laq ô!' ga luí, dúng wut nyi ri.

²⁵ Hâu hkùn, Abraham gi, 'Ngá zo é, asak dui tô é u lé, nàng nyi ngón yuqyo tô é hkùn, Lazaruq gi, asho awui dut é lé, bunn nyi aq. Ahkuí, yhang kúm gi, shí má lo nyi byán to bê; nàng chyaú gi, jamjau hui zô nyi bê. ²⁶ Hâu mai gotú gi, shí mai nungmoq chyáng dap lé nau bang a wó dap shoq le, hau mai ngamoq chyáng ó a wó dap lé rá matú le, ngamoq eq nungmoq é gyoro má, ník dik é langhkung mó éq kyo pyám to bê nghut ri.' ga tú tái ri.

²⁷ Sahtê wá gi, 'Áwa ê, hau nghut le gi, ngò, nang lé dúng nau ri. Ngá gú pé ngo yuq nyi ashí; yhangmoq le isu hpuzô é jowô má a jé sháng gaq, ²⁸ yhangmoq myit hính shoq ló tái pun rá matú, Lazaruq lé ngá wá yhúm shut nhang kat byi laq ô!' ga luí, dúng wut ngau nyi ri.

²⁹ Abraham gi, 'Yhangmoq chyáng, Mosheq eq myiqhtoí pé nyi lhê; hau bâng dang lé gyô yù kó sháng gaq.' ga tái ri.

³⁰ Sahtê wá gi, 'Áwa Abraham ê, hau su a nghut. Shi byuq é bang má é rayuq yuq yhangmoq chyáng dum taú lo é nghut le kúm gi, yhangmoq myit hính kó rá nghut lhê.' ga tái ri.

³¹ Abraham gi, 'Mosheq eq myiqhtoí pé é dang lé yhangmoq a gyo kô é nghut le gi, shi byuq é bang má é rayuq yuq dum dui toq ló mù, ló tái kyo kôlháng, kâm gyo kó rá a nghut.' ga luí, yhang lé tú tái ri." gâ ri.

17

Mara Hkyut É Hkyô Eq Lumjǎng Myit
Mht 18:6-7, 21-22; Mrk 9:42

¹ Yesuq, Yhâng chángzô pé le tái é gi, "Byu pé le mara kut shut nhang é hkyô gi, joq htoq lô rá za nghut lhê. Nghut kôlháng, mara kut shut nhang é hkyô lé lhoq htoq é sù gi, dingnyé wó rá. ² Zoshâng shí bang má é rayuq lé, mara kut shut nhang é sù gi, yhâng é lingzing má luqlui long mó tuí hut byi luí, wuimau má é dú hkyô pyám é hui é nghut le gi, yhang é matú je gè rá nghut lhê. ³ Nungmoq gi, yhumsing gùng yhumsing sidiq keq.

Nunggu nungmang nàng lé mara kut shut é nghut le gi, yhang lé tan luí, mhoqshit aq; yhang myit hính é nghut le gi, yhang lé mara hkyut pyám byi aq. ⁴ Ra-nyí má za, yhang nang lé nyhit dàm shut mù, 'Ngò myit hính bê.' ga luí, nang lé nyhit dàm dum tôngbán le, tôngbán hkangmó, nàng, yhâng é mara lé hkyut pyám byi aq.' gâ ri.

⁵ Hâu hkùn, lagyô pé gi, "Ngamoq é lumjǎng myit lé lhoq kó byi laq." ga Yhumsing lé dúng akô.

⁶ Hâu jáng, Yhumsing gi, "Nungmoq é lumjǎng myit anghsi cham í za hkálháng bò kô é nghut le gi, shí hangwá gàm lé, 'Sikgâm ê, amyit eq roq bún luí, wuishuq lung-aú má, é yuq to aq ô.' gâ le, nungmoq é dang lé sikgâm hau gyo byi rá nghut lhê.

⁷ Dangké, nungmoq má é rayuq yuq chyáng, yò hpuq é, a nghut jáng, sau zúng é dui-nhâng zoshâng rayuq nyi é nghut le, dui-nhâng zoshâng hau yohtung pá mai jé lo é hkùn, yhang lé, 'Hân zúng mù zang zo aq.' ga luí, ó yuq wá tái kó rá lúhú? ⁸ Hâu dui-nhâng zoshâng lé sheq, 'Ngò zo rá myinzang lajang aq. Ngò bàn zo shoq hpyidum má hpyihit hit mù, xun zang wú nyi aq. Ngò bàn zo jáng sheq nàng wó zo rá nghut lhê.' ga luí, tái rá a nghut kó lúhú? ⁹ Tái mitái banshoq lé, dui-nhâng zoshâng ban zui saí byí é nghut kôlháng, yhang lé jeju bún é dang ó yuq wá tái wú akô lúhú? ¹⁰ Hâu eq rajung za, nungmoq gi, tái mitái ban kut jáng sheq, 'Nga-nhúng gi, jeju bun a gíng é dui-nhâng zoshâng pé nghut nyi lhê; kut rá é mú lé za lhoq pân é bang nghut lhê.' nghú tái keq." ga tái ri.

Manggâm Dap Bang Raxê Yuq Lé, Yesuq Lhoq Gé Byí É Hkyô

¹¹ Ahkuí, Yesuq gi, Yerusalem wá mó shut e ló nyi le, Samariq mau eq Galile mau gyoro mai lai é ló ri. ¹² Yhang, wá rawà shut wang ló é hkùn, manggâm dap é byù raxê yuq eq hui ri. Hâu bang gi, we mai yap to mù, Yesuq lé, ¹³ "Yesuq, Zau é, ngamoq lé shogyô yù laq ô." ga luí, wut garú bum akô.

¹⁴ Yesuq gi, yhangmoq lé myàng jáng, "Nungmoq é gungdu lé, hkyangjông pé

chyáng ló tún shit keq." ga yhangmoq lé tai ri. Yhangmoq gi, hkyô má ru só nyi ashí le lháng, sân-yúng ló byuq bekô.

¹⁵ Yhangmoq chyáng má é rayuq gi, yhum-sing gungdu ge byuq é lé myàng jáng, Yesuq chyáng dum taú é mù, htê mó eq Garai Gasang lé hkyá-ôn é eq. ¹⁶ Yesuq é hkyi wang má paí gop to lui, Yhang lé jeju hkyá-ôn nyi ri. Haú yuq gi, Samariq byu ngut ri.

¹⁷ Haú mù, Yesuq gi, "Sân-yúng byuq é gi, raxê yuq a ngut lú? Gau yuq gi, hká ló byuq bekô?" ¹⁸ Shí tungbaú rayuq mai lai lui, dum taú lé mù Garai Gasang lé hkyá-ôn é byu, rayuq le a nyi lo kó lú?" ga tai ri. ¹⁹ Hau htâng, Yesuq gi, haú yuq lé, "Toq mù ló aq, náng é lumjng myit gi, nang lé lhoq sân-yúng byi bê ngut ri." ga tai ri.

Garai Gasang É Mingdán Jé Lô Râ Hkyô Mht 24:23-28, 37-41

²⁰ Radám lé, Hparishe pé gi, Garai Gasang é mingdán hkâ-nhám jé rá hkyô, Yesuq lé myi akô. Haú jáng, Yesuq gi, "Garai Gasang é mingdán jé lé rá gi, myoq eq wú lui myàng rá a ngut. ²¹ Garai Gasang é mingdán gi, nungmoq yuq jup é ahaú má ngut nyi é yanmai, 'Wú keq, shí má joq ri, mhó má joq ri.' ga lui le, byu pé gi, wó tai kó rá a ngut." ga lui, yhangmoq lé tú tai ri.

²² Chángzô pé lé le Yesuq tai é gi, "Haú Byu Yhangzô é buinyi ra-nyi lé, nungmoq myàng nau dik é ahkying jé rá. Ngut kôlháng, nungmoq gi, Byu Yhangzô lé wó myàng kó rá a ngut. ²³ Haú buinyi má, byu pé gi, nungmoq lé, 'Yhang shí má nyi ri.' haú a ngut jáng, 'Yhang hê má nyi ri.' ga tai kó rá ngut lhê. Ngut kôlháng, hkâ-ê; hkâcháng kó. ²⁴ Hkâsu mù gâ le, maumyi rahkyam má hpyat é maulhap gi, maumyi gó hkyam jé shoq duqbó é su, haú Byu Yhangzô dum jé lé é buinyi má le dut rá ngut lhê. ²⁵ Ngut kôlháng, haú su a dut htoq shimá, Yhang gi, zing-ri é myo myo lé le, ipyat shi má é byu pé eq he-ngik pyâm é lé le, hui shirâ ngut lhê.

²⁶ Noaq é tsín pyat má dut é su, haú Byu Yhangzô jé lé é buinyi má le dut rá ngut lhê. ²⁷ Byu pé gi, Noaq, wui-sanghpo mó hkaú má wang é hkûn jé shoq, zo zo shuq shuq, myi byi myi yú, myiháng kut lui, nyi nyi bum akô. Haú hkûn, dowuú dng lô mù, yhangmoq banshoq lé lo lhoq htên pyâm bê ngut ri.

²⁸ Haú eq rajung za, Lot é pyat má le, byu pé gi, zo mù, shuq mù, ung zo wui zo, ho zo ho shuq, yhúm kut lui nyi nyi akô. ²⁹ Ngut kôlháng, Sodom wá mai Lot htoq ló é buinyi má, mauhkung mai, myi eq hang gi, mau su wó gyó lô lui, lhunglháng lé lhoq htên pyâm bê ngut ri.

³⁰ Haú Byu Yhangzo, lé htoq shit é buinyi má le, haú eq rajung za dut rá ngut lhê.

³¹ Haú buinyi má, yhumhkung* htoq má nyi tô é sù gi, yhumhkaú má é zè lé, a ló gyó wang yú lo sháng gaq. Yò má nyi tô é sù gi, haú eq rajung za, yhúm shut a taú ló lo sháng gaq. ³² Lot é yhangmyi† lé bûn nyi keq.

³³ Yhum-sing é asak duí hkyô hô sù o yuq ngut kôle, asak sum rá ngut lhê; asak sum pyâm é sù kúm gi, asak wó duí rá ngut lhê.

³⁴ Ngò, nungmoq lé tai kyo kôle, haú myin lé, yhupjang ralhúm má byu i yuq nyi to kô le, rayuq gi, shuí yu é hui mù, rayuq gi, myit gyó to rá ngut lhê. ³⁵ Myiwe i yuq lui má rahá za chòm lui nyi tô le; rayuq gi, shuí yu é hui mù, rayuq gi, myit gyó pyâm to rá ngut lhê. ³⁶ Yohtung má byu i yuq nyi to le, rayuq gi, shuí yu é hui lui, rayuq gi, myit gyó pyâm to berá ngut lhê." gâ ri.

³⁷ Haú hkûn, chángzô pé gi, "Yhum-sing Yesuq é, haú gi, hká gyo má dut rá lú?" ga lui, Yesuq lé myi kôjáng, Yhang gi, "Màng leq é jang má, langdâ pé, lé zing bùm rá ngut lhê." ga lui, yhangmoq lé tú tai ri.

18

Chuímo Myhi Eq Tarâ Agyi É Hkyô Lé Dangtú Yú É Hkyô

¹ Yesuq, Yhâng é chángzô pé lé, myit wum a gyuí é za, hkâ-nhám le kyúdüng nyi rá hkyô lé, dangtú dong mhoqshit é gi, ² "Wá rawá má, Garai Gasang lé le a gyuq hoq, byú lé le haí su a ngám é tarâ agyi rayuq nyi ri. ³ Haú wá má chuímó myhi rayuq le nyi ri. Yhang gi, haú tarâ agyi wá chyáng é lui, 'Ngò eq amú htoq sù lé, yhâng é mara eq rajung za, jéyáng byi laq.' ga lui, é dum tai tai kut nyi ri.

⁴ Ngut kôlháng, tarâ agyi wá gi, ahkying rayoq zo jé shoq tarâ a jéyáng byi é tô tô ri. Hau htâng má, yhang gi, 'Ngò, Garai Gasang lé le a gyuq a hoq, byú lé le haí su a ngám, ⁵ ngut kôlháng, chuímó myhi shí yuq é amú lé, ngò a jéyáng a doqdan byi é ngut le gi, yhang dum lé lé kut mù, ngo lé myit hpêbú nháng rá dut ri. Haú mù, ngò yhâng é amú lé jéyáng byi rá.' ga lui, yhâng é unghkaú má myit yu ri." gâ ri.

⁶ Haú mù lui, Yhum-sing Yesuq gi, "A ding a mán é tarâ agyi wá tai é dang mai mhoq yú keq. ⁷ Garai Gasang gi, Yhang lé nyi myin wut düng nyi é, Yhang hkyin yu to bê bang lé, tarâ é dong a kut byi é gi, myàng myàng nyi to rá lú?" ⁸ Ngò, nungmoq lé tai kôle, Garai Gasang gi, yhangmoq lé hân yhang tengmán é dong jéyáng byi berá ngut lhê. Ngut kôlháng, haú Byu Yhangzo jé lé é

* 17:31 Yudaq byu pé é yhumhkung gi, rá é ngut lhê mù, nyi kún jang kut akô. † 17:32 Lot é yhangmyi gi, Sodom wá shut dum taú lhing wú é yanmai, Garai Gasang lhoq hten pyâm é hui sù ngut lhê.

buinyi má, lumjínq hkyô lé gi, mingkan htoq má myang wú shirà lhú?" ga tai ri.

Hparishe Eq Kang Guq Sû Kyûdûng É Hkyô

⁹Yhumsing gûng lé dingmán bun lui, byû góbang lé wú tiq é bang ra-am lé, Yesuq dangtú dõng tai é gi, ¹⁰"Byû í yuq kyûdûng kó rà ga, noqkuq yhûm má doq e akò. Rayuq gi, Hparishe, rayuq gi, kang guq sù nghut ri.

¹¹Hparishe hpò gi, yap to lui, 'Garai Gasang é, ngò gi, byû góbang su lú zo lú shuq é hkyô le a kut, agè ashop é hkyô le a cháng, su-myi le a lú é htoq agò, shí kang guq sù su le, a nghut é yanmai, ngò nàng lé jeju bûn lhê ô!

¹²Ngò gi, rabat má zoshuq í dâm gâm nyi lhê; ngò wó yu é gû má é xê gambûm ragambûm le kat nyi lhê.' ga lui, yhang baú yhang gotú kut dũng nyi ri.

¹³Kang guq sù kúm gi, we we má yap to mù, mauhkûng shut lháng a wám tu wú é za, wànggàng bat lui, 'Garai Gasang é, shí yubak dap sù ngo lé, shogyô yù laq ô!' ga dũng ri.

¹⁴Ngò, nungmoq lé tai kòlé, kang guq sù kúm gi, Garai Gasâng é hí má mara hkyut san byi é lé wó yù lui, yhûm shut dum tai lô bê; nghut kôlháng, Hparishe wá gi, a wó nghut ri. Hkásu mù gá le, yhumsing gûng lé waq toq sù ó yuq nghut kòle, lhoq nyhum pyám é hui rá nghut lhê; yhumsing gûng lé lhoq nyhum é sù kúm gi, waq toq é hui rá nghut lhê." ga tai ri.

Zoshâng Wuì Lé Yesuq Shimân Byi É Hkyô Mht 19:13-15; Mrk 10:13-16

¹⁵Byu pé gi, zonú wui lé Yesuq záng htung byi sháng gaq ga, Yhâng chyáng shui lé lo bum akò. Chángzò pé gi, hau lé myàng jáng, lhom tân hkûm akò nghut ri. ¹⁶Nghut kôlháng, Yesuq gi, zoshâng wui lé, wut yù lui, "Hau zoshâng wui lé, Ngá chyáng lé nhâng keg; yhangmoq lé hkâhkûm zing to kó; hkásu mù gá le, Garai Gasâng é mingdán gi, hau sù é bâng é mingdán ru nghut lhê. ¹⁷Ngò, nungmoq lé teng za tai kòlé, Garai Gasâng é mingdán lé, zoshâng su kut a lhom hap yu é nghut le gi, mingdán hau má gè gè yhang wó wàng rá a nghut." ga tai ri.

Áyá Wó É Sàhtê Hpò

Mht 19:16-30; Mrk 10:17-31

¹⁸Áyá wó é byû rayuq le, Yesuq lé, "Ge é Sará é, ahtum abyuq é asak wó yù rá matú, ngò hái kut ra rá lhú?" ga myi ri.

¹⁹Yesuq gi, "Hái mù, Ngo lé ge é Sará nghu lhê lhú? Garai Gasang mai lai lui, ge é ó yuq le a nyi. ²⁰Jep é tará má, 'Su-myi sulàng hkálu, byû hkásat, hkâhkau, a teng a mán é saksé hkâhkám, nángnu nángwa lé hkungga aq.'^o gá é dang pé lé, nàng sé gû bê." ga lui, yhang lé tú tai ri.

²¹Hau yuq gi, "Hau pé banshoq lé, ngò, zoshâng hkûn mai cháng bê nghut lhê." ga tai ri.

²²Yesuq gi, dang hau lé wó gyo jáng, "Nàng kut rá rajung rá tô ashí; nàng wó miwó lé ùng pyám lui, myùng bang lé byi pyám aq; hau jáng, nàng, mauhkûng htoq má sutzè wó rá nghut lhê; hau mù, Ngá htàng lé cháng aq." ga lui, yhang lé tai ri.

²³Hau yuq gi, dang hau lé wó gyo jáng, sutzè gyai wó sù nghut é yanmai, gyai yhang myit a ngón dut byuq ri. ²⁴Yesuq gi, hau yuq lé wú lui, "Sutzè wó bang gi, Garai Gasâng é mingdán má wàng rá matú, hau-í yhang wui ri-nhung! ²⁵Sutzè wó sù rayuq, Garai Gasâng é mingdán má wó wàng rá htoq, gola-uq radu âpno mai wó wang lai rá gi, je lui rá nghut lhê." ga tai ri.

²⁶Dang hau lé wó gyô é bang gi, "Hau su ru nghut le gi, ó yuq za hkyi yu é hui rá nghut lhê lhú?" ga myi bum akò nghut ri.

²⁷Hau hkûn, Yesuq gi, "Byû a wó kut é hkyô lé, Garai Gasang gi, wó kut lhê." ga tai kyô ri.

²⁸Hau hkûn, Petruq gi, Yesuq lé, "Wú aq, ngamoq gi, wó miwó tô pyám to lui, Náng htàng cháng bê nghut lhê." ga tai jáng,

²⁹Yesuq gi, "Ngò, nungmoq lé teng za tai kòlé, Garai Gasâng é mingdán é yanmai, yhumsing é yhûm, yhumsing é yhangmyi, yhumsing é águ âmang, yhumsing é ìnu iwa, yhumsing é yhangzò pé lé, pyám to sù ó yuq nghut kòle, ³⁰shí pyat má, akýu myo myo wó hkam yù rá htoq agò, htang pyat má le, ahtum abyuq é asak a wó yu é gi, a nyi rá nghut lhê." ga lui, yhangmoq lé tai ri.

Yesuq, Yhang Shí Hkám Rá Lé Dum Tai É Hkyô

Mht 20:29-34; Mrk 10:46-52

³¹Yesuq gi, Yhâng é lagyô pé raxe í yuq lé gotú kut wut yù mù, "Gyô wú keg, ngnhung gi, Yerusalem wá mó shut doq lô nyi é nghut lhê. Hau má jé jáng, hau Byu Yhangzo eq séng lui, myiqhtoi pé kâ tô é banshoq gi, dik lô berá nghut lhê. ³²Hkásu mù gá le, Byu Yhangzo gi, tungbau pé é loq má ap pyám é hui lui, hau bâng eq Yhang lé, wuizui kut pyám é, rhoi rip e, sókan byé gyûn é, nhuq bat é kut yù mù, sat pyám kó rá nghut lhê. ³³Hau htàng sum nyi nghu rá buinyi má, Yhang gi, dum dui toq lô rá nghut lhê." ga lui, yhangmoq lé tai ri.

³⁴Lagyô pé gi, dang hau pé rahkun lé lháng a sê gyo kó; dang hau é lichyúm gi, yhangmoq é hí má záu nghop tô é nghut é yanmai, Yhang hái tai nyi é hkyô pé lé yhangmoq a sé kó nghut ri.

Dung Zo É Myoqjit Sù Lé, Yesuq, Myoq Dum Myàng Nhang É Hkyô

³⁵ Ahkuí, Yesuq Yerihko và nàm má jé lo nyi le, myojit é byù rayuq gi, hkyô yàm má zùng mù, dung zô nyi ri. ³⁶ Yhang gi, byù rajum rayô sô lai lô é htê lé wó gyo jáng, haú haí dum nyi é hkyô lé, myi kat ri. ³⁷ Haú hkún, yhangmoq gi, "Nazaret và byù Yesuq lai lô ri." ga luí, yhang lé tai kyo akô.

³⁸ Haú su gâ é lé wó gyo jáng, yhang gi, "Dawiq é Yhangzo Yesuq é, ngo lé shogyo yu laq ô!" ga wut dúng kat ri.

³⁹ Hí má lai lô é bang gi, zim za nyi rá matú yhang lé tân hkúm akô; nghut kôlhang, yhang gi, "Dawiq é Yhangzo é, ngo lé shogyo yu laq ô!" ga, je riyhang htê mó o mó eq wut dúng kat ri.

⁴⁰ Haú mù, Yesuq gi, yap kat mù, byù haú yuq lé Yhâng chyáng shuí lé lô nhang kat ri. Myojit sù Yhâng nàm má jé lé jáng, Yesuq gi, ⁴¹ "Ngô, náng lé haí kut byi rá ô nau ri lú?" ga, yhang lé myi kat ri.

Haú yuq gi, "Yhumsing ê, ngo myoq myàng nau ri." ga tú tai ri.

⁴² Haú hkún, Yesuq gi, "Náng myoq myàng sháng gaq! Náng é lumjing myit gi, nang lé lhoq gê byi bê nghut ri." ga, yhang lé tai ri.

⁴³ Haú yuq gi, haú hkún jáng, yhang myoq wó myàng mù, Garai Gasang lé hkyá-on uchyang Yesuq htáng cháng bê. Lhunglhang bang haú lé myàng kôjáng, Garai Gasang lé hkyá-on nyi bum akô.

19

Yesuq Eq Zake

¹ Yesuq gi, Yerihko và má wàng mù, sô lai lô nyi ri. ² Haú hkún, haú wá má, Zake gâ é kang guq agyi rayuq nyi ri; haú yuq gi, sutzè wó sù nghut ri. ³ Yhang gi, Yesuq hká yuq nghut é lé myàng nau kôlhang, nyhùm sù nghut é htoq agô, byù rajum rayô chyin chyap tô é yanmai, a wó myàng nghut ri. ⁴ Haú mù, yhang gi, Yesuq lé wó myàng shoq ga, Yesuq lai lô rá hkyô hí shut din ê mù, hkhóm gâm htoq má é doq zung tô ri.

⁵ Yesuq gi, haú jowô má jé jáng, tu wú kat luí, "Zake é, hân gyô lô aq; hkú-nyí ngò náng yhùm má bíng rá nghut lhê." ga tai ri. ⁶ Haú jáng, Zake gi, hân hân gyô lô mù, gabú dik é eq Yesuq lé lhom hkulum yu ri.

⁷ Haú má nyi bang banshoq gi, haú lé myàng jáng, "Yhang gi, yubak dap sù rayuq chyáng bíng kut rá ga wang é lô bê." ga luí, mara hún dang tai nyi bum akô.

⁸ Zake kúm gi, toq yap mù, "Yhumsing Yesuq ê, ngò wó é sutzè rawuí gú myùng bang lé gâm byi pyám rá; ngò záng mop zô pyám é byù rayuq yuq nyi le gi, myi tú dum tau byi rá." ga Yhumsing Yesuq lé tai ri.

⁹ Haú hkún, Yesuq gi, "Shí yuq le, Abraham é yhangzo* rayuq nghut é yanmai,

hkú-nyí shí yhùm má hkyi yù hkyô jé bê, ¹⁰ hkásu mù gâ le, haú Byu Yhangzo gi, byuq byuq bê bang lé, hkat hô mù hkyi yù rá matú, jé lé sù nghut lhê." ga luí, Zake lé tai ri.

Hkókam É Dui-nhâng Zoshâng Raxê Yuq Mht 25:14-30

¹¹ Haú hkyô lé, yhangmoq gyô nyi bum kô é hkún, Yesuq gi, Yerusalem và mó má jé rá chyâng lò bê nghut é yanmai le, Garai Gasâng é mingdán gi, radá dâm htoq shit lô berá ga, byu pé myit ngam tô bum kô é yanmai le, dangtú ralhùm đông dum tai jat é gi, ¹² "Aróng wó sù byù rayuq gi, hkókhâm ayá é hkam yu luí, dum tau lò rá ga, wé é ming shut é rá matú hen nyi ri. ¹³ Haú mù, yhang gi, Yhâng é dui-nhâng zoshâng raxê yuq lé wut yù mù, rayuq lé ngùn rajoi joi ap byi luí, 'Ngò dum tau jé lô shoq, shi eq hpugá gá nyí láng keq.' ga luí, yhangmoq lé pying tô ri.

¹⁴ Yhâng é mingbyù wui kúm gi, yhang lé a ngui bum é nghut mù luí, yhang é lô é htàng má, 'Shí yuq ngamoq ahtoq má up nyi rá lé, ngamoq a ô nau.' ga luí, ê tai rá matú lagyo châng nhang kat akô.

¹⁵ Nghut kôlhang, yhang kúm gi, hkókhâm ayá wó hkam yu luí, dum tai jé lô jáng, yhang ngùn ap byi tô é dui-nhâng zoshâng wui lé, hpugá gá luí, amyat hká-myhó wó ho jat bê hkyô lé sé nau luí, yhangmoq lé wut nhang kat ri.

¹⁶ Haú hkún, sâng-hí yuq gi, lé mù luí, 'Yhumsing ê, ngò, náng é ngùn rajoi mai, amyat raxê joi wó ho jat yù bê.' ga tai ri.

¹⁷ Haú hkún, yhumsing hpô gi, 'Ará! Nghut bê, kyet é dui-nhâng zoshâng é, náng gi, je tiq é mú má lhang wó lum é sù nghut é yanmai, và raxê lé upzo lo aq hkoí.' ga luí, yhang lé tai ri.

¹⁸ Htang yuq le, lé mù luí, 'Yhumsing ê, ngò, náng é ngùn rajoi mai, amyat ngo joi wó ho jat yù bê.' gâ ri.

¹⁹ Yhumsing gi, haú yuq lé, 'Nàng gi, và ngo wá lé up lo aq hkoí.' ga tai ri.

²⁰ Dum rayuq le, lé mù luí, 'Yhumsing ê, náng é ngùn rajoi lé a byuq shoq, ngò panchoq eq htop tô lhê; wú aq, shí nghut lhê. ²¹ Nàng gi, yhumsing yhang a tô tô é zè pé lé yù nau é eq, yhumsing yhang a hô tô é yò mai yâm yù nau é sù, byù wui nghut é yanmai, nang lé ngò gyuq ri.' ga tai ri.

²² Haú hkún, yhumsing gi, 'Agé ashop é dui-nhâng zoshâng ê, náng nhut mà é dang eq rajung za, ngò, nang lé jéyáng rá nghut lhê. Ngò gi, yhumsing yhang a tô tô é zè pé lé yù nau é eq, yhumsing yhang a hô tô é yò mai yâm yù nau é sù, byù wui nghut é hkyô lé, náng sé to gù nghut le nhing, ²³ ngá ngùn

* 19:9 Abraham é yhangzo ngù é lichyúm gi, Abraham su Garai Gasang lé lumjing é sù lé gâ lhê.

lé, ngò dum taù jé lô jáng, aráng eq amyat wó yù shoq, ngùn hpùn kat jang má, haí mù a kat tô é lhu? ga yhang lé tai ri.

²⁴ Hau htàng, yhumsing hpó gi, ayàm má yap tô é bang lé, 'Hau ngùn rajoi lé yhang chyang mai taù yù luí, raxê joí wó sú lé jat byi keq.' ga tai ri.

²⁵ Hau bang gi, 'Yhumsing ê, yhang gi, raxê joí wó to bê lé nhing.' ga akò.

²⁶ Hau jáng, yhang gi, 'Ngò, nungmoq lé tai kôlé, wó sú[†] ó yuq le, jat byi é hui shirâ nghut lhê; a wó su chyang mai kúm gi, yhang wó tô é lé lhang, yu pyám byi shirâ nghut lhê.

²⁷ Ahkuí, yhangmoq ahtoq má ngò hkohkâm kut rá lé a ô nau é, ngá é gyê pé lé, shí má shuí lé mù, ngá hí má sat pyám keq.' ga hkûnmó hkyô kat ri." gâ ri.

Yesuq Logúng Ji Mù, Yerusalem Wà Mó Shut Wang E Lô É Hkyô

Mht 21:1-11; Mrk 11:1-11; Yhn 12:12-19

²⁸ Yesuq gi, shí hkyô pé lé ban tai jáng, hí má so luí, Yerusalem wà mó shut doq ló nyi ri. ²⁹ Yesuq gi, Yhâng é chángzô pé eq Tsanlun Bùm má é Bethpage wà eq Behtani wà má jé lô kojáng, Yhâng é chángzo í yuq lé, ³⁰ "Nungnhik, hí má é wà má é keq; wà hau má wang é hkûn jáng, ó le a jì wú shí é logúng zo tui tô lánng é lé, é myàng kó rá nghut lhê; hau lé hpyi yù mù, Ngá chyang she lò keq.

³¹ Byù rayuq yuq mai, 'Hau haí mù hpyi nyi akò?' ga nungnhik lé myi kôjáng, 'Shí du lé, hau Yhumsing rá ri gâ.' nghú tú tai keq." ga pying luí, nhang kat ri.

³² Nhang kat é sú nhik ê jé lé, Yesuq tai kat é dong yhang, dut to lánng é lé é myang akò.

³³ Yhangnhik logúng zo hau lé hpyi nyi kô é hkûn, yhumsing wui gi, "Hau logúng zo lé, haí mù hpyi nyi akò lhu?" ga luí, yhangnhik lé myi akò.

³⁴ Hau jáng, yhangnhik gi, "Shí du lé hau Yhumsing rá ri gâ." ga tai akò.

³⁵ Yhangnhik gi, hau logúng zo lé Yesuq chyang she lò mù, yhangmoq é buhng pé lé logúng ahtoq má buí luí, Yesuq lé doq ji nhang akò. ³⁶ Hau su kut, Yhang ji é ló nyi le, byu pé gi, yhangmoq é buhng pé lé hkyô má hkanng byi akò.

³⁷ Ahkuí, Tsanlun Bùm hkêgyó gyó ló é jowé eq chyang lo é mai gi, chángzô pé banshoq bang, yhangmoq myang é laklai kumlhá pé é yanmai, gabú myit mai htê mó o mó eq Garai Gasang lé hkya-on kô é dang gi,

³⁸ "Hau Yhumsing é mying mai jé lé lo é hkohkâm gi, hkungsô wó nyi sháng gaq ô![✱] Mauhkung htoq má, ngu-ingón nyi sháng gaq ô!

Htoq tsáng myhâng má, Garai Gasang gi, hpungwup shingkanng bo nyi sháng gaq ô!"

gâ akò.

³⁹ Hau mù luí, hau byù hpung hkaú má bo é Hparishe pé ra-am gi, "Sarâ ê, náng é chángzô pé lé tân pyám aq." ga luí, Yesuq lé tai akò.

⁴⁰ Hau hkûn, Yesuq gi, "Ngò, nungmoq lé tai kôlé, shí bang zim za nyi kô é nghut le gi, luggok pé garú lô rá nghut lhê." ga tú tai ri.

⁴¹ Ahkuí, Yesuq, Yerusalem wà mó eq chyang lò luí, wà mó hau lé myàng jáng, hau wà mó é matú ngau mù, tai é gi, ⁴² "Wà náng é! Hkû-nyí lhê é buinyi má, nguingón é hkyô lé náng bún sé tô é nghut le gi, gè rá wá! Ahkuí kúm gi, hau hkyô lé nghop to bê nghut mù luí, náng a sé lo nghut ri. ⁴³ Hkâsu mù gâ le, náng chyang Garai Gasang lé kúm jé é hkûn, náng a bun a sé wú kat é yanmai, náng é gyê pé gi, awui ayàm má gyewap xux mù, náng é lhing hkyuq mai nang lé lom tô é buinyi jé lô rá nghut lhê. ⁴⁴ Hau hkûn, nang lé lhoq htên pyám luí, nung zo pé lé le, hau ahkaú má yhang dùn nhê pyet sat pyám bekò rá; náng gi, luggok racham htoq má racham lhang a kè lhum loshoq, dut byuq rá nghut lhê." gâ ri.

Yesuq, Noqkuq Yhùm Lé Sêng Pyâm É Hkyô

Mht 21:12-17; Mrk 11:15-19; Yhn 2:13-22

⁴⁵ Ahkuí, Yesuq gi, Yerusalem noqkuq yhùm má wàng mù, ung zo ung shuq é bang lé, "Ngá yhùm gi, kyûdung yhùm dut rá nghut lhê."[✱] ga kâ to kôlhang, ⁴⁶ nungmoq gi, jowé shí lé 'damaq hkyûng'[✱] kut akò." ga tai uchyang, hkat htoq pyám ri.

⁴⁷ Yhang gi, nyí wui noqkuq yhùm má mhoqshit nyi ri. Hkyangjong agyi pé, tarâ sarâ pé eq, byu pé é suwún wui kúm gi, Yhang lé wó sat pyám rá hkyô ho nyi akò. ⁴⁸ Nghut kôlhang, byù banshoq bang gi, Yhâng mhoqshit é dang lé gyo nau nyi kô é yanmai, wó sat rá hkyô lé, a myang hô kô nghut ri.

20

Yesuq É Ahko Ahkáng Lé Myi Chyam Wú É Hkyô

Mht 21:23-27; Mrk 11:27-33

¹ Ra-nyí lé, Yesuq gi, noqkuq yhùm wàng hkaú má, byu pé lé mhoqshit nyi é eq, gabú danglù hko kyô nyi é hkûn, hkyangjong agyi pé gi, tarâ sarâ pé, suwún wui eq rahá kut, Yhâng chyang lé jé kômù, ² "Hai ahko ahkáng eq Nang shí pé lé kut nyi lhê lhu? Ahko ahkáng shí, Nang lé ó yuq byi é lhu? Ngamoq lé tai kyô wú aq." ga Yhang lé myi akò.

[†] 19:26 Wó sú nghu é gi, yhumsing a-tsam lé rago dat chúng sú lé tai é nghut lhê. ✱ 19:38 Hkya-on 118:26 ✱ 19:45

³ Haú hkûn, Yhang gi, "Ngò le, nungmoq lé rajung myí wú kôlé; ⁴ Yohan byí é bapisma gi, mauhkûng mai lúhú? A nghut jáng, byu chyáng mai lúhú? Ngo lé tai kyô wú keq?" ga yhangmoq lé myí ri.

⁵ Haú hkûn, yhangmoq chôm hpyê lhum kô é gi, "'Mauhkûng mai nghut lhê.', nghú nga-nhúng tai jáng le, 'Haí mù, yhang lé a lumjúng kô é lúhú?' ga rá nghut; ⁶ 'Byu chyáng mai nghut lhê.' nghú jáng le, shiwa byu banshoq gi, Yohan lé, myiqhtoi rayuq ga lumjúng to kô é yanmai, yhangmoq, nga-nhúng lé luqgok eq dú sat kó rá nghut." ga akô.

⁷ Haú mù, yhangmoq gi, "Hkâmai nghut é lé, ngamoq a sé." ga tú tai akô.

⁸ Yesuq gi, "Haú jáng, Ngò le, hai ahko ahkàng eq shí pé kut é hkyô lé, nungmoq lé a tai kyô." ga, yhangmoq lé tai ri.

Tsibiyiq Hkyâm Yhumsing Eq Hkyâm Sai Zo Bang

Mht 21:3-46; Mrk 12:1-12

⁹ Byu pé lé, Yesuq dangtú dong xoq tai kyô é gi, "Byú rayuq gi, tsibiyiq hkyâm ralhum sai to mù, hkyâm sai zo bang chyáng ngho byí to lui, gó ming shut myáng myáng é nyi byuq ri. ¹⁰ Kyôshu yoq jé jáng, yhang gi, hkyâm sai zo bang eq, hkyâm mâ é tsibiyiq shí pé lé lhom byí kat sháng gaq ga, dui-nhâng zoshâng rayuq lé yhangmoq chyáng nhang kat ri. Nghut kôlhâng, hkyâm sai zo bang gi, haú yuq lé lhom bat mù, loq kôm taú nhang kat akô. ¹¹ Gotú dui-nhâng zoshâng rayuq lé, yhangmoq chyáng dum nhang kat ri. Nghut kôlhâng, yhangmoq gi, haú yuq lé le, lhom bat mù, hoq lhoq hpu lui, loq kôm dum taú nhang kat akô. ¹² Sum yuq nghú rá dui-nhâng zoshâng lé dum nhang kat ri. Yhangmoq gi, haú yuq lé le bat cheq lui, hkyâm mai hkat htoq kat akô.

¹³ Haú hkûn, tsibiyiq hkyâm yhumsing gi, 'Ngò hkâsu kut wú rá lúhú? Ngò chyitdap é ngá zo lé, nhang kat wú rá nghut ri. Yhang lé kúm gi, yhangmoq lhom hkungga kó abe.' ga tai ri.

¹⁴ Hkyâm sai zo bang gi, yhumsing hpô é yhangzo lé myàng kôjáng, 'Shí yuq gi, silí wunlí sing yú rá sú nghut lhê; nga-nhúng, silí wunlí haú pé wó yú shoq, yhang lé sat pyám sháng.' ga rayuq eq rayuq tai lhum bum akô. ¹⁵ Haú mù, yhang lé hkyâm shing-gan shut dú htoq kômù, sat pyám akô.

Haú su kut kôjáng, tsibiyiq hkyâm yhumsing gi, yhangmoq lé hkâsu kut rá lúhú? ¹⁶ Yhang gi, é mù, haú hkyâm sai zo bang lé sat pyám lui, hkyâm haú lé góbang lé htot ngho byí pyám rá nghut lhê." gá ri.

Dang haú lé wó gyo bang gi, "Haú su gi, hkâ-nhâm le a dut sháng gaq ô!" gá akô.

¹⁷ Hau htâng, Yesuq gi, yhangmoq lé byu wú lui, "Haú jáng gi,

'Yhâm sai bâng eq hkyin htoq pyám é luqgok gi, htungchyún mâ é ahkyak dik é luqgok dut bê.'¹⁸

ga Chyúmdang má kâ tô é gi, haí gá nau é nghut lhê lúhú? ¹⁸ Luqgok* haú má gyó záng é sú ó yuq nghut kôle, gyuí gyop byuq rá nghut lhê. Luqgok hau eq gyó nhê záng é sú le, nhê pyeq pyám é hui rá nghut lhê." ga tai ri.

¹⁹ Tará sará pé eq hkyangjong agyi pé gi, dangtú shí gi, yhangmoq lé lhoq ang lui tai é hkyô lé, sé kô é yanmai, haú hkûn jáng lhâng Yhang lé chyup yú rá matú hkyô ho nyi akô. Nghut kôlhâng, byu pé lé gyuq mù a chyup shí kó nghut ri.

Kang Kat É Hkyô Eq Séng Lui Myi É Dang Mht 22:15-22; Mrk 12:13-17

²⁰ Haú mù, yhangmoq gi, Yesuq é dang má mara wó chyup yú shoq ga, gegün labyoq kut bang lé jowú nhang nyi akô. Haú gi, ahkáng ayá wó é mauzau chyáng Yhang lé wó ap pyám rá matú nghut ri. ²¹ Haú jowú bang gi, "Sará é, nang gi, dng dng mán mán tai mhoqshit é eq, byu é myoqdong lé a té byí é za, Garai Gasâng é hkyô lé, tengmán é dong mhoqshit é sú nghut é lé, ngamoq sé lhê. ²² Hkoséng Kehtaq lé, ngamoq kang kat rá gi, tará wang lhê lúhú? A wang é lúhú?" ga lui, Yhang lé myí wú akô.

²³ Nghut kôlhâng, Yesuq gi, haú bâng é myit goí é hkyô lé sé mù lui, yhangmoq lé. ²⁴ "Ngo lé, ngùn rachap tûn shit wú keq. Ó yuq é alho eq masat laiká dap tò ri lúhú?" ga myi jáng, ²⁵ yhangmoq gi, "Kehtaq é nghut ri." ga akô.

Haú hkûn, Yesuq gi, "Haú nghut jang, Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga yhangmoq lé tai ri.

²⁶ Yhangmoq gi, byu pé hí má, Yhâng é dang má mara a wó ho myang é eq, Yhang tú tai é dang é yanmai, maú hong byuq kôlui, zim byuq akô.

Dum Dui Toq Lô Râ Hkyô Eq Séng Lui Myi É Dang

Mht 22:23-33; Mrk 12:18-27

²⁷ Haú hkûn, haú dum dui toq hkyô a joq gá é Saduke pé ra-am gi, Yesuq chyáng lé jé kômù, ²⁸ "Sará é, myiwe wó é byú rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi rá matú, yhâng rhat lé chui gon ra rá nghut lhê ga, nga-nhúng lé, Mosheq ká to byí ri. ²⁹ Hí hpyang lé, gumang nhiktâng wui nyhit yuq nyi akô. Lagám yuq gi, myiwe yú lui, zo dù a dap é za shi ló byuq bé nghut ri. ³⁰ Lanong yuq lé, yhangmang mó é chui lé gon mù, zo dù a dap é za shi ló byuq

* 20:17 Hkyâ-on 118:22

* 20:18 Luqgok nghu é gi, Yesuq lé tai ri.

bê. ³¹ Hau htâng, Lalaq yuq mai Lahkâ yuq jê shoq, chuimó háu lé rayuq htâng rayuq dum gon gon kut kôlhâng, zo dù a dap é chyat shi lô byuq bùm bekô nghut ri. ³² Lô htâng má, myiwe myhí háu le châng shi lô byuq bê nghut ri. ³³ Háu mù luí, háu dum dui toq é buinyi má, myiwe myhí háu gi, háu nhiktâng wui má é hká yuq é yhangmyi nghut rá lúh? Hkâsu mù gâ le, yhang gi, háu nyhit yuq é yhangmyi dut wú bê sú nghut ri." ga luí, Yhang lé myí wú akô.

³⁴ Háu hkún, Yesuq gi, "Shí mingkan htoq má é byu pé gi, ikun kut é eq myi byi myi yú kut nyi bum akô. ³⁵ Shi é mai dum dui toq rá eq, háu pyat má nyi rá gíng bâng é matú gi, ikun kut é eq myi byi myi yú hkyô joq lo rá a nghut. ³⁶ Háu bang gi, maumang lagô pé su dut byuq luí, a dat shi lo kô rá nghut lhê. Yhangmoq gi, dum dui toq lô su é yhangzô pé† nghut é yanmai, Garai Gasâng é yhangzô pé nghut bekô. ³⁷ Háu nyé duq nyi é mhanpúng eq séng luí, Mosheq eq kâ tô é má lháng, Yhumsíng gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'* ga bo tô é yanmai, shi é bang dum dui toq lô rá hkyô lé tún shit to bê nghut ri. ³⁸ Garai Gasang gi, shi bê bâng é Garai Gasang a nghut, dui nyi bâng é Garai Gasang ru nghut nyi lhê; hkâsu mù gâ le, lhunglhâng bang gi, Garai Gasâng é hí má dui nyi é bang chyat nghut akô." ga yhangmoq lé tú tái ri.

³⁹ Háu hkún, tará sará pé ra-am gi, "Sará é, náng tai é jô ri." ga akô. ⁴⁰ Háu mù, yhangmoq gi, Yhang lé hai le a wám myi jat lo kô nghut ri.

Hkrisduq Gi, Ó Yuq É Yhangzo?

Mht 22:41-46; Mrk 12:35-37

⁴¹ Hau htâng, Yesuq gi, yhangmoq lé, "Byu pé gi, Hkrisduq lé, Dawiq é yhangzo nghut lhê, ga hkâsu mù tai akô lúh? ⁴²⁻⁴³ Dawiq yhang yhang lháng gi, Hkya-on Kungtôn Laiká má,

'Háu Yhumsíng Garai gi, ngá é Yhumsíng lé, "Ngò, náng é gye pé lé,

náng é hkyí nang tanghkuq kut pyám byí é hkyíng jé shoq, Ngá é loqyo hkyam† shut zung nyi shi aq." gâ ri.*

ga kâ tô ri. ⁴⁴ Háu mù, Dawiq yhang lháng, Hkrisduq lé, Yhumsíng gâ é nghut le gi, Hkrisduq gi, yhangzo za hkâsu ge nghut rá lúh?" ga tai ri.

Tará Sará Pé Lé Sidiq Râ Hkyô

Mht 23:1-36; Mrk 12:38-40; Luk 11:37-54

⁴⁵ Byù banshoq gyô nyi é u lé, Yesuq, Yhâng é chángzô pé lé tai é gi, ⁴⁶ "Tará sará pé lé sidiq nyi keq. Yhangmoq gi, réng é buhíng

wut chùng mù, sô yông wún luí, gai pé má hkunggâ é eq shichyen rá lé le, tarajong pé mâ é ahkyak dik é zùng jang pé eq poí pé mâ é je réng é zùng jowò pé má myang zùng rá lé le, ô nau nyi bum akô. ⁴⁷ Yhangmoq gi, chuimó pé é yhùm-yò pé lé hpyoq to hpyoq shuq kôluí, kyû híng híng dúng shit mhaú é bang nghut akô. Háu sú é bang gi, je riyhang htan é dông dam byí é hui zo kô rá nghut lhê." gâ ri.

21

Chuimó Myhí Kat É Alu

Mrk 12:41-44

¹ Yesuq tu wú kat é hkún lé, noqkuq yhùm má é alu sidek má, wó bang alu kat nyi bùm kô é lé myang ri. ² Dum nghut jáng, gyi htinchap ngùn zo í chap za kat é, myung é chuimó myhí rayuq lé le myang ri. ³ Háu mù, Yhang gi, "Ngò, nungmoq lé teng za tai kôlé, shi myung é chuimó myhí gi, góbang banshoq htoq má je myo kat bê nghut ri. ⁴ Hkâsu mù gâ le, háu góbang banshoq gi, yhumsíng agùn agó wó é má é lé, lé kat akó; yhang kúm gi, myung sú nghut kôle, yhâng asak lé baú ra ngùn lhunglháng lé kat bê nghut ri." ga tai ri.

Ló Htùm Buinyi Má Dut Lò Râ Hkyô

Mht 24:1-21, 29-35; Mrk 13:1-19, 24-31

⁵ Noqkuq yhùm lé, yúng é luqgok pé eq le, alu chyunghuq pé eq le, mhôn tô ri ga, chángzô pé ra-am hkya-ôn bùm kôjáng, Yesuq gi, ⁶ "Nungmoq myang nyi é shí pé gi, luqgok rachâm htoq racham lháng a kê lhum loshoq, hpyoq hpyi pyám é buinyi jé rá nghut lhê." ga tai ri.

⁷ Háu su ga jáng, yhangmoq gi, "Sará é, háu nghut le gi, háu hkyô pé gi, hkâ-nhám dut lò rá lúh? Háu dut rá chyáng lò jáng, hkású é kumlhá htoq dut rá nghut lhê lúh?" ga, Yhang lé myí akô.

⁸ Háu hkún, Yhang gi, "Nungmoq gi, hkyô shuí nghoq é a hui kô sháng gac, sidiq nyi keq. Hkâsu mù gâ le, 'Ngò gi, Mesaia nghut lhê.' ga le, 'Ahkyíng chyáng lò bê.' ga le, Ngá myíng lé láng é byù myo myo pò htoq lô kô rá nghut lhê. Nghut kôlhâng, nungmoq gi, yhangmoq htâng hkácháng kó. ⁹ Majan htoq é eq, gumlau toq é hkyô lé, wó gyo kôjáng, hkágyuq hkâ-kyùm kó, háu hkyô pé hí dut lò rá nghut lhê. Nghut kôlhâng, lô htâng é buinyi gi, háu hkún jáng dut rá a nghut shí." ga tai ri.

¹⁰ Hau htâng, Yhang, yhangmoq lé dum tai é gi, "Ra-myú eq ra-myú, mingdán ralhúm eq ralhúm majan zân lhúm lò kô rá nghut lhê. ¹¹ Jowò myo myo má, layàng mó nún lo é, noli nojàng myó lo é eq mutmó gyó lo

† **20:36** Dum dui toq lô su é yhangzô pé gâ é gi, Yesuq lé lumjíng luí, shi é htâng má dum dui toq lo é bang lé gâ lhê.

* **20:37** Htoq Lô 3:6 † **20:42-43** Loqyo hkyam nghu é gi, ahko ahkáng wó é jowò nghut lhê. * **20:42-43** Hkya-on

é pé, dut lò rà nghut lhê; gyuq chiq jung pé eq kumlhá mó le, mauhkûng htoq mai htoq shit lò rà nghut lhê.

¹² Nghut kôlhang, haù hkyô banshoq a dut shimá, Ngá mying é yanmai, byu pé gi, nungmoq lé chyup yù lui, zing-ri yù mù, tarajong pé eq htóng pé má ap pyám kó rà nghut lhê, hau htoq agó, nungmoq gi, hkohkam pé eq zau pé chyáng ê ap byí é le, hui kó rà nghut lhê. ¹³ Haù su é pé mai, nungmoq gi, ngò eq séng lui, saksé wó hkám rà hkyô htoq lò berá nghut lhê. ¹⁴ Nghut kôlhang, hkâsu nghú lhom tú taí rà hkyô lé, hí mai a myit wui nyí rà lé, nungmoq myit hpyit to keq. ¹⁵ Hkâsu mù gà le, nungmoq é gye pé lhunglhang bang, haí le a wó lhom tú taí loshoq, ngò, nungmoq lé dang eq hpaqchyí byí rà nghut lhê. ¹⁶ Nghut kôlhang, nungmoq gi, ìnu iwâ pé, águ âmãng pé, mungmoq eq buinùm ji-myi wui éq lhang, ap pyám é hui kó rà nghut lhê. Yhangmoq gi, nungmoq chyáng mã é ra-am lé lhang, sat pyám kó rà nghut lhê. ¹⁷ Byù lhunglhang bang gi, Ngá é yanmai, nungmoq lé a ngui kut kó rà nghut lhê. ¹⁸ Nghut kôlhang, nungmoq é xâm rahkat lhang wó htên byuq rà a nghut. * ¹⁹ Nungmoq gi, wó jân é hkyô mai, asak lé wó yù kó rà nghut lhê.

²⁰ Yerusalem và mó lé gye hpúng mó eq lóm tô é lé, nungmoq myàng jáng, và mó haù htên byuq rà ahkyíng chyáng lò bê lé, bûn sê nyí keq. ²¹ Haù hkûn lé, Yuda mau má nyí é bang gi, bùm pé shut hpanq doq lò kó sháng gaq; haù và hkaù má nyí é bang le, hpanq htoq kó sháng gaq; và tiq và zò pé má nyí é bang le, và hkaù shut a wàng kó sháng gaq. ²² Hkâsu mù gà le, Chyúmdang má kâ to má kâ to banshoq dik lò rà matú, buinyi haù pé gi, mara dam byí é buinyi pé dut rà nghut lhê. ²³ Haù buinyi pé má, zogúng dut é myiwe wui eq náu huq ashí nghut é ìnu wui gi, gyai yhang wuìhke kô rà nghut lhê; hkâsu mù gà le, shí ming ahtoq má wuìhke mó eq, shí amyú ahtoq má Garai Gasang nhikmó-yô é jé lò rà nghut lhê. ²⁴ Yhangmoq gi, shâm lham éq sat pyám hui lhê eq, ming hkang ming mó má chyup shuí ló é le hui kó rà nghut lhê. Tungbaù pé lé byí tô é buinyi ahkyíng htáng shoq, Yerusalem và mó gi, tungbaù pé eq nãng zik tô é hui rà nghut lhê.

²⁵ Haù hkûn, bui, kyí, lhamó pé má, kumlhá htoq shit rà nghut lhê. Wuishuq lung-aù mã é wuìhêng pé é mying é hté mó é yanmai, myigùng htoq má, byù myú chângiup gi, hkâsu kut rà a sé loshoq mau é eq myit wui myit hkê é hui bekô rà nghut lhê. ²⁶ Byu pé gi, mingkan htoq má dut lò rà é hkyô pé lé, a jé shi mai myit gyuq kó é yanmai, moq byuq lò bùm kó rà nghut

lhê; hkâsu mù gà le, mauhkûng mã é wum-o a-tsam pé gi, lhoq nhùn é hui bùm kô rà nghut lhê. ²⁷ Haù hkûn, haù Byu Yhangzo gi, mhut ji mù, hpungwup a-tsam mó eq le, hpungwup shingkanq mó eq le, gyó lé lo é lé, yhangmoq byu-myàng kó rà nghut lhê. ²⁸ Haù hkyô pé dut hí lò jáng, ulhum tú mù wú kat keq, hkâsu mù gà le, nungmoq lé hkyi yù rà buinyi gi, chyáng lò bê nghut ri." gâ ri.

²⁹ Yhang, yhangmoq lé dangtú dông xoq taí é gi, "Maihpáng gâm eq siggâm banshoq lé wú wú keq. ³⁰ Sikbu nyùn lo é lé myàng jáng, bui nyé nám chyáng lò bê ga lui, nungmoq yhang dat wú sê akò. ³¹ Haù eq rujung za, haù hkyô pé dut nyí é lé, nungmoq myàng kôjáng, Garai Gasàng é mingdán gi, chyáng bê nghut é hkyô lé, nungmoq sé lo keq.

³² Ngò, nungmoq lé teng za taí kôlé, shí pyat mã é byu pé a ban shi byuq shimá, haù hkyô pé banshoq dut byuq rà nghut lhê. ³³ Mauhkûng eq myigùng gi, a joq lo dut byuq rà nghut lhê; nghut kôlhang, Ngá é dang gi, ru joq nyí rà nghut lhê.

³⁴ "Nghut kôlhang, zò myo shuq myô é, í shuq wut é, mingkan htoq mã é myit wui myit hkê é pé eq, nungmoq é i-miyit wò laí nyí lui, haù ngò jé lé é buinyi gi, lhai bik lo é su, nungmoq ahtoq má byodàn tung a jé lò sháng gaq, sidiq nyí keq. ³⁵ Hkâsu mù gà le, buinyi haù gi, mingkan htoq má nyí é byù banshoq bãng é ahtoq má, haù su jé lò rà nghut lhê. ³⁶ Haù mù lui, haù dut lò rà hkyô banshoq mai, nungmoq wó lut lai mù, haù Byu Yhangzô é hí má, wó yap gíng é bang dut sháng gaq, hkâ-nhám le kyúdung lui, ahkyíng hkangmó má machya nyí keq." gâ ri.

³⁷ Yesuq gi, nyí wui noqkuq yhùm má mhoqshit nyí lui, myin wui Tsalun Bùm gâ é bùm shut htoq é mù, é nyi to to kut ri. ³⁸ Byù banshoq bang gi, Yhang mhoqshit é dang gyo rà ga, napsùn noq moq mai noqkuq yhùm má jé lé bum akò nghut ri.

22

Yesuq Lé, Yudaq Èq Ung Zô É Hkyô
Mht 26:1-5,14,16; Mrk 14:1-2, 10-11; Yhn 11:45-53

¹ Ahkuí, Lhoqlhai Poi gâ é Azuma (múnchi a kat é Muk Zo Poi) jé rà chyáng lò bê.

² Haù mù, hkyangjong agyi pé eq tará sará pé gi, Yesuq lé hkâsu kut wó sat pyám rà hkyô, ho nyí akò; hkâsu mù gà le, yhangmoq gi, mingbyù wui lé gyuq bùm kó é yanmai nghut ri. ³ Haù hkûn, lagyo raxe í yuq má bo é Iskarut gâ é Yudaq chyáng Tsadán wàng mù lui, ⁴ yhang gi, htoq é mù Yesuq lé hkâsu kut ap pyám rà hkyô lé hkyangjong agyi pé, noqkuq yhùm zúng é gyezau pé eq, é hpyé ri.

* 21:18 Shí má gi, asak woi-nyí a shí rà hkyô lé taí é nghut lhê.

⁵ Haù mù, yhangmoq gi, gyò nguì luí, Yudaq lé ngun byi rá hkyô myit lui bèkò. ⁶ Yudaq le hap yù luí, byù hpúng má a nghut é hkùn, Yesuq lé ap pyâm rá hkyô ho nyi bè nghut ri.

Lhoqlhai Poi Lé Môn É Hkyô

Mht 26:17-30; Mrk 14:12-26; Yhn 13:21-

30

⁷ Ahkuí, haù Lhoqlhai Poi má é sauzo shigu hkungga sat nhông byi rá é Azuma buinyi jé bè. ⁸ Haù hkùn, Yesuq gi, Petruq eq Yohan lé, "Nga-nhúng zo rá matú Lhoqlhai Poi é môn láng keq." ga luí, nhang kat ri.

⁹ Haù nhik gi, "Hkâmá é môn to nhâng nau ri lú?" ga luí, Yhang lé myí akò.

¹⁰ Haù hkùn, Yesuq gi, "Nungnhik, myuq hkaù shut wang e ló le wui yambú waq é byù rayuq lhom lui rá nghut lhé; haù yuq chyáng châng ló luí, yhang wang ló é yhùm má châng wàng mù. ¹¹ yhumsing lé, 'Ngò Ngá é chángzò pé eq rahá, Lhoqlhai Poi zo rá bing wap hkâmá nghut lhé lú ga, Sará myí nhang kat ri.' nghú tai keq. ¹² Haù hkùn, hen tó é ahtog má é wap mó lé, nungnhik lé lhom tûn shit rá nghut lhé; wap haù má é môn to keq." ga tai kat ri.

¹³ Haù chángzo nhik htoq e ló le, Yesuq tai kat é eq roq za é myâng kômù, Lhoqlhai Poi lé môn to bekò nghut ri.

Yhumsing É Myinzang

¹⁴ Ahkuí, ahkyíng jé jáng, Yesuq eq Yhâng é chángzò pé rahá za zohpoq má zung tó akò.

¹⁵ Haù hkùn, Yesuq gi, "Ngò wuihke jamjau hpuzò é a hui shí má, Lhoqlhai Poi shí lé nungmoq eq rahá zo rá lé, Ngò gyai ô nau nyi lhé. ¹⁶ Hkâsu mù gà le, ngò, nungmoq lé tai kólé, Garai Gasâng é mingdán má poi shí a ló dik dik gi, ngò haù lé dum zo rá a nghut ló." ga luí, yhangmoq lé tai ri.

¹⁷ Hau htâng, Yesuq gi, góm lé yù mù jeju ban hkya-on jáng, "Góm shí lé yù luí, nungmoq yhangchang gàm shuq lhum keq. ¹⁸ Ngò, nungmoq lé tai kólé, ahkuí mai gi, Ngò, Garai Gasâng é mingdán a jé jé tsibiyiq wing lé dum shuq rá a nghut lo." ga tai ri.

¹⁹ Hau htâng, Yhang gi, muk lé yù mù, jeju hkya-on luí, muk lé myihk hpé mù, yhangmoq lé byi uchyang, "Shí gi, nungmoq é matú byí pyâm é, Ngá é gungdu nghut lhé; Ngò lé bún nyi rá matú, shí su kut nyí keq." ga tai ri.

²⁰ Haù eq rajung za, myinzang ban zo jáng, góm lé le yù mù, "Góm shí gi, nungmoq é matú htoq pyâm é, Ngá é sui má xuq tó é dangshikaq asik nghut lhé. ²¹ Nghut kólhang, wú keq, Ngò lé ap pyâm rá sù gi, zang bó shí má ngò eq rahá nyi tó ri. ²² Haù Byu Yhangzo gi, hkyin to huí é eq rajung za shí rá nghut lhé; nghut kólhang, Yhang lé ap

pyâm é sù gi, dingnyé wó ri." ga tai ri. ²³ Haù su ga jáng, lagyò pé gi, yhangmoq má shí hkyô kut rá sù gi, hká yuq nghut rá lú ga, rayuq eq rayuq myí lhum bum akò.

²⁴ Haù htoq agó, yhangmoq má é hká yuq sheq je kò lhé lú ga le, rayuq eq rayuq tai htung lhum bum akò. ²⁵ Haù mù luí, Yesuq gi, "Tungbaù pé é hkohkam pé gi, yhangmoq byù myù pé é ahtog má up zô nyi kó é nghut luí, byu pé gi, ahkáng ayá wó é bang lé jeju yhumsing pé ga luí, tai hkungga nyi bum akò. ²⁶ Nungmoq kúm gi, haù su hkâkut kó. Nungmoq má je ko sù gi, asak je tiq é sù su, up é sù le, dui-nhâng zoshâng su nghut nyi sháng gaq. ²⁷ Hká yuq sheq je kò lhé lú? Zô zung nyi sù lú? Haù a nghut jáng, sai tsò é sù lú? Zô zung nyi é sù sheq nghut ri. Nghut kólhang, ngò gi, nungmoq má é sai tso sù su za nghut nyi lhé. ²⁸ Nungmoq kúm gi, Ngò jamjau huí nyi le, Ngò eq rahá nyi nyi é bang nghut nyi akò. ²⁹ Haù su mù, Ngá wa gi, Ngò lé, mingdán ap byí é su, Ngò le, nungmoq lé mingdán ap byi rá nghut lhé. ³⁰ Haù mù, Ngá é mingdán má é, Ngá é zangbó má, nungmoq wó zo kó rá nghut lhé; nungmoq le hkohkam-tanghkuq má zung to mù, Israelaq amyû raxe í hú lé jéyáng kó rá nghut lhé.

Yesuq Lé, Petruq (Simun) He-ngik Pyâm Rá Hkyô

Mht 26:31-35; Mrk 14:27-31; Yhn 13:36-38

³¹ Simun, Simun é, wú aq, sungsò cham lé shai é su, nungmoq lé wó shai shoq ga, Tsadán wa gi, ahkáng dung bè. ³² Nghut kólhang, náng é lumjing myit a hten sháng gaq nghú, Ngò, náng é matú kyúdung byi bè; náng dum lhing bún lò jáng, nung gu nung mâng pé lé wum-o lhoq ging byi aq." ga tai ri.

³³ Haù hkùn, Simun gi, "Yhumsing é, htóng wâng kólhang, shí kólhang, ngò gi, náng eq rahá cháng rá matú myit hpyit to bè." ga tú tai ri.

³⁴ Yesuq gi, "Petruq é, nang lé Ngò tai lé, hkù-nyí* lhang woq a tûn shi má, náng, Ngò lé a sé ga lui sum dâm he-ngik pyâm rá nghut lhé." ga tai ri.

³⁵ Hau htâng, Yesuq, yhangmoq lé tai é gi, "Ngò, nungmoq lé ngunhtung, jihtung, hkyi-tsung a wùn a chùng nhang é za, nhang kat é nghut hkùn, nungmoq chyáng haí ra akò lú?" ga myi jáng, yhangmoq gi, "Haí le a ra lo." ga tai akò.

³⁶ Haù hkùn, Yhang gi, "Ahkuí kúm gi, ngunhtung wó sù gi, yù wun sháng gaq, jihtung wó sù le, yù wun sháng gaq, shâm a wó sù gi, bumó ung lui wui sháng gaq. ³⁷ Hkâsu mù gà le, Ngò, nungmoq lé tai kólé,

* 22:34 Yudaq byu pé é ra-nyí gi, myinhtang bui wang é mai, htang nyi bui wang é jé shoq nghut lhé. Shí má é hkù-nyí gi, nga-nhúng é matú myin àng ri.

Ngò eq séng lui Chyúmdang má kâ tô é gi, dut lò herá nghut lhê: "Hau yuq gi, yubak mara wó bang má nghap lhôm to bê.³⁸ ga kâ tô é dang gi, Ngá chyáng dik lò rá nghut lhê." ga lui, yhangmoq lé tai ri.

³⁸ Hau mù, lagyo pé gi, "Yhumsing ê, wú aq, shí má shâm í hkyam joq tô ri." ga tai kôjáng, Yesuq gi, "Gé bê." ga lui, yhangmoq lé tai ri.

Tsanlun Bùm Má Yesuq Kyúdung É Hkyô
Mht 26:36-46; Mrk 14:32-42

³⁹ Ahkuí, Yesuq gi, htoq lui, gó hkun é eq rajung za, Tsanlun Bùm shut htoq e ló bê nghut ri; Yhâng é chángzô pé le Yhang htang châng e ló akò. ⁴⁰ Hau jowò má jé jáng, Yhang gi, "Nungmoq, gunglaú é a hui sháng gaq, kyúdung nyi keq." ga lui, yhangmoq lé tai to mù, ⁴¹ chángzô pé nyi é mai luggok radú we kô gâng e ló lui, hkyihput htuq mù, ⁴² "Áwa é, Náng ô nau é nghut le gi, góm† shí lé Ngá chyáng mai lhai pyám byi laq. Nghut kôlháng, Ngò ô nau é dông a nghut, Náng ô é dông sheq nghut sháng gaq." ga kyúdung ri. ⁴³ Hau hkún, mauhkung mai maumang lagyo rayuq htoq lé lui, Yhang lé i-myit nhik lé tai ting ri. ⁴⁴ I-myit hkaú má dik shoq hkám zo wuí é yanmai, Yhang je riyhang kyúdung wum kat nyi ri; Yhâng é buibù le, sui hkyí sui pat su myigung má yui gyó ri.

⁴⁵ Hau mù, kyú ban dung jáng, Yhang toq lui, chángzô pé chyáng ló wú le, yhangmoq gi, myit yón mù lui, yhup myí hi to kô é lé ló myàng mù, ⁴⁶ "Hau mù yhup nyi akò lhú? Toq keq! Gunglaú é a hui sháng gaq, kyúdung nyi keq." ga lui, yhangmoq lé tai ri.

Yesuq Lé Chyup É Hkyô

Mht 26:47-56; Mrk 14:43-50; Yhn 18:3-11

⁴⁷ Hau su ga, ru tai nyi ashí le, wú keq, hau chángzo raxe í yuq má bo é Yudaq gi, hkyô hí mù byù rajum rayò lé shuí lé lô lui, yhang gi, Yesuq lé bopuq puq rá ga huí lé lo ri. ⁴⁸ Hau mù lui, Yesuq gi, "Yudaq ê, náng gi, hau Byu Yhangzo lé bopuq puq é eq gyè pé chyáng ap pyám lhê lhú?" ga lui, yhang lé lhom myí ri.

⁴⁹ Hau hkún, Yesuq htang cháng bang gi, hai dut lò rá le bún sé kô é yanmai, "Yhumsing ê, ngamoq gi, sham eq zán le, gè rá lhú?" ga myí akò. ⁵⁰ Yhangmoq chyáng má é rayuq gi, hkyangjong mó é dui-nhâng zosháng lé zán kat lui, yhâng é loqyo nohkyap byit byuq bê nghut ri.

⁵¹ Yesuq kúm gi, "Gé bê. Yhangmoq ô nau é su nghut kó sháng gaq." ga tú tai mù, hau yuq é nohkyap lé é záng lui lhoq gè byí ri.

⁵² Yesuq gi, Yhang lé chyup rá ga jé lé é hkyangjong agyi pé, noqkuq yhùm zúng é zau pé eq agyi suwún wuí lé, "Nungmoq gi, damyaq rayuq lé chyup é su, shâm,

dumbáng eq kut lui, lé lo akò lhú? ⁵³ Ngò gi, nyi wuí, noqkuq yhùm má nungmoq eq rahá nyi kôlháng, nungmoq Ngo lé chyup yú rá ga a hen wú kó; ahkuí gi, mauchut eq up† nyi bê yanmai, nungmoq é ahkying nghut nyi ri." ga tai ri.

Yesuq Lé, Petruq Éq He-ngik Pyám É Hkyô
Mht 26:57-58, 67-75; Mrk 14:53-54, 66-72; Yhn 18:12-18, 25-27

⁵⁴ Hau hkún, yhangmoq gi, Yhang lé chyup yú mù she ló lui, hkyangjong mó é yhùm shut shuí wang ló akò. Petruq le we we mai châng tô ri. ⁵⁵ Ahkuí, yhangmoq gi, wàng hkaú má myi mut yú lui zung to bum é hkún, Petruq le yhangmoq é ahkaú má bo tô ri. ⁵⁶ Langchyáng myí rayuq gi, myihkyom yám má Petruq zung tô é lé, myang kat mù, yhang lé rago wú tsuq to lui, "Shí yuq le Yesuq eq rahá nyi sù nghut ri." ga tai ri.

⁵⁷ Hau hkún, Petruq gi, "Myiwe myí ê, náng tai é sù lé, ngò a sé." ga he pyám ri.

⁵⁸ Hau htang hkâ-myháng a myàng má, byù rayuq gi, yhang lé dum myàng lui, "Nàng le yhangmoq chyáng bo nyi sù nghut ri." ga tai kat jáng, Petruq gi, "Byù hpò ê, ngò a nghut." ga tú tai ri.

⁵⁹ Hkying hkum rahkum kô myàng jáng, rayuq le, "Gè gè yhang, shí yuq gi, Yhang eq rahá nyi wún sù nghut ri; hai mù gâ le, yhang gi, Galile byù le nghut ri." ga zuq zuq tai ri.

⁶⁰ Petruq gi, "Byù hpò ê, náng tai nyi é hkyô lé, ngò a sé." ga tú tai ri. Hau su ga ru tai nyi ashí le, woq tún bê nghut ri. ⁶¹ Hau hkún, Yesuq gi, lhiung lui, Petruq lé wú kat ri. Hau mù, Petruq gi, "Hkú-nyi lhang, woq a tún shí má, náng Ngo lé sum dâm he pyám rá nghut lhê." ga lui, Yhumsing yhang lé tai é dang lé bún kat ri. ⁶² Hau mù, yhang gi, shinggan shut htoq é lui, gyai yhang é ngau nyi ri.

Gyezô Pé Yesuq Lé Rhoi É Hkyô

⁶³ Yesuq lé zúng nyi é bang gi, Yhang lé rhoi lui nghap mying nghap hte mu nyi akò. ⁶⁴ Yhangmoq gi, Yhâng é myoqdong nghop pyám byi lui, "Nang lé bat sú gi, ó yuq nghut ri lhú? Myiqhtoi htoí wú aq." ga myí akò. ⁶⁵ Yhangmoq gi, Yhang lé nyhap é dang ajung jung dông tai rhoi nyi akò.

Suwún Wui É Hí Má Yesuq Jé Nyi É Hkyô
Mht 26:59-66; Mrk 14:55-64; Yhn 18:19-24

⁶⁶ Napkyó myoqmyàng jáng, mingbyù wui é suwún hpúng bang eq rahá, hkyangjong agyi pé, tará sará pé, zup hpong kut nyi é má, Yesuq lé shuí é mù, ⁶⁷ "Nàng Hkrisduq

† 22:37 Esai 53:12 † 22:42 góm gâ é gi, Yesuq jamjau hui rá hkyô eq shí rá hkyô lé, tai nau é nghut lhê. † 22:53 Mauchut eq up gâ é gi, Tsadan eq up é lé gâ ri.

nghut é têng le gi, ngamoq lé tai kyo laq." gâ akô.

Yesuq gi, "Ngò gi, Hkrisduq nghut lhê nghù tai kôhlang, nungmoq jing kô râ a nghut. ⁶⁸ Ngò, nungmoq lé myi kôhlang, nungmoq gi, tù tai kô râ a nghut. ⁶⁹ Nghut kôhlang, ahkuí mai haú Byu Yhangzo gi, a-tsam bo dik é Garai Gasâng é loqyo hkyam má wó zung nyi bêra nghut lhê." ga lui, yhangmoq lé tai ri.

⁷⁰ Haú hkûn, yhangmoq banshoq bang gi, "Haú nghut le gi, Nang, Garai Gasâng é Yhangzo nghut lhê lúhú?" ga myi akô.

Yesuq gi, "Nungmoq tai é eq rajung za Ngò nghut lhê." ga lui, yhangmoq lé tù tai ri.

⁷¹ Haú hkûn, yhangmoq gi, "Nga-nhung hai jung saksé wá râ nyi ashí lúhú? Yhâng é nhut mai yhang, tai htoq kat é dang lé, nga-nhung wó gyo bê nghut lhê." ga akô.

23

Yesuq Lé Mara Hun É Hkyô

Mht 27:1-2, 11-14; Mrk 15:1-5; Yhn 18:28-38

¹ Haú hkûn, zup zing tô é bang banshoq gi, htoq mù, Yesuq lé mauzau Pilat chyáng shuí wang é lui, ² "Shí yuq gi, mingbyú wui lé hkyô shuí nghoq é eq, hkoséng Kehtaq chyáng kang kat râ hkyô lé le hkûm to lui, Yhânggung yhang gi, haú Hkrisduq nghù é hkohkâm nghut lhê ga lui, tai nyi é lé ngamoq myang ri." ga lui, Yhang lé mara hun akô.

³ Haú hkûn, Pilat gi, Yesuq lé, "Nang gi, Yudaq byu pé é hkohkâm nghut lhê lúhú?" ga myi jang, Yesuq gi, "Nang tai é eq rajung za nghut lhê." ga tù tai ri.

⁴ Pilat gi, "Shí yuq lé hûn râ mara ngò a myàng," ga lui, hkyangjong agyi pé eq shiwa byu pé lé tai ri.

⁵ Nghut kôhlang, haú bang gi, "Shí yuq gi, Yuda mau gón má yhang mhoqshit é dong mai, mingbyú wui é i-myt lé shuí gabyông ri. Haú gi, Galile mau mai ahkuí shí má jé shoq nghut bê nghut ri." ga zuq zuq tai bum akô.

⁶ Pilat gi, haú su ga kô é lé wó gyo jang, Yesuq Galile byu nghut é, a nghut é hkyô lé myi wú ri. ⁷ Yesuq gi, Herut up é mau má é byu nghut é lé Pilat sé jang, haú u lé Jerusalem wá mó má nyi tô é Herut chyáng, é dé kat nhang ri.

⁸ Herut gi, Yesuq lé myàng jang, gyai yhang gabú pyám ri. Hkâsu mù gâ le, Yhâng é hkyô lé wó gyo wú mù, Yhang laklai kumlhá ralhum lhum kut shit râ lé, wó myàng shoq ga, myit myoqbyu nyi é nghut lui, Yhang lé myàng nau é gyai yhang myáng bê nghut ri. ⁹ Haú mù, yhang gi, Yesuq lé dangmyi myo myó eq myi wú kôhlang, Yesuq gi, dang rahkun lháng a tù tai byi nghut ri.

¹⁰ Hkyangjong agyi pé eq tará sará pé gi, yap to mù, Yhang lé mara gyai yhang chôm hun akô. ¹¹ Herut eq yhâng é gyezô pé gi, Yesuq lé rhoi jihkyoi kut mù, atam é dong tai hpoi kô lui, réng é mebu hut byi mù, Pilat chyáng dum taú dé nhang kat akô. ¹² Haú nyi jang, hí hpyang gyè dut lhûm é Herut eq Pilat gi, buinùm dut byuq bekô nghut ri.

Yesuq Lé Sat Râ Matú Doqdân É Hkyô

Mht 27:15-26; Mrk 15:6-15; Yhn 18:39—19:16

¹³ Haú hkûn, Pilat gi, hkyangjong agyi pé eq zau suwún wui, mingbyú wui lé wut tsing to mù, ¹⁴ "Shí yuq gi, mingbyú wui lé hkyô shuí nghoq ri ga, Yhang lé nungmoq ngá chyáng shuí lé lô bekô. Ahkuí, wú keq, nungmoq é hí má, Yhang lé ngò myi wú le, Yhang má nungmoq hun é mara lé ngò a myàng nghut ri. ¹⁵ Hâu htoq agó, Herut le, hai mara le a myàng mù, shí yuq lé nga-nhung chyáng dum dé kat byi bê nghut ri; haú mù lui, wú keq, shí yuq gi, shí ging é mara hai le a kut shut nghut ri. ¹⁶ Haú mù, ngò, Yhang lé dam byi lui, nhang pyám râ." ga lui, yhangmoq lé tai ri.

¹⁷ Nghut kôhlang, Lhoqlhai Poí hkangmó má, Pilat gi, mingbyú wui lé htongbyú rayuq yuq nhang kat byi byi kut é yanmai, ¹⁸ yhangmoq banshoq bang gi, "Shí yuq lé gi, yu pyám aq; Barabaq lé kúm gi, nhang kat byi laq." ga lui, chôm wut garu bum akô. ¹⁹ Barabaq gi, wá htum má gumlau kut é eq byú sat é yanmai, htóng gyó nyi sù nghut ri.

²⁰ Pilat gi, Yesuq lé nhang pyám nau é nghut mù lui, yhangmoq lé dum puq tai ri.

²¹ Nghut kôhlang, yhangmoq gi, "Yhâng lé tapzing má jén tap pyám aq, jén tap pyám aq!" ga lui, wut tai garú nyi bum akô.

²² Haú mù lui, sum dâm nghú râ hkûn, Pilat dum tai é gi, "Hai mù lui lúhú? Yhang gi, hai mara kut shut bê lúhú? Yhang má shí ging é mara lé ngò a myàng, haú mù, ngò, Yhang lé bat, nhuq, mhoqshit lui, nhang pyám râ." ga lui, yhangmoq lé tai ri.

²³ Yhangmoq gi, Yesuq lé tapzing má wó jén sat pyám shoq ga, zuq zuq htê mó o mó eq dúng wut nyi akô nghut é yanmai, wó tai ung yú bekô nghut ri. ²⁴ Haú mù lui, Pilat gi, yhangmoq dúng é eq rajung za myit hpyit doqdan byi ri. ²⁵ Haú su mù, yhang gi, yhangmoq dúng é eq rajung za, wá htum má gumlau kut é eq byú sat é mai, htóng gyó nyi sù lé nhang kat byi lui; Yesuq lé gi, yhangmoq ô nau é dong ap byi kat bê nghut ri.

Yesuq Lé Tapzing Htoq Má Jén Tap É Hkyô

Mht 27:31-44; Mrk 15:21-32; Yhn 19:17-27

²⁶ Yhangmoq gi, Yesuq lé shuí htoq lô kô é hkûn, yosô wá mai lo é, Kuruni myuq byú nghut é Simun ga sù lé, chyup yú

mù, tapzìng waq nhâng luí, Yesuq htâng má châng nhang akò. ²⁷ Byù rajùm rayò gi, Yhang htâng má châng e ló bum akò. Yhang é yanmai ngaubyl ngau nhap eq iyon yôn é myiwe zo wui le haù má bo tò ri. ²⁸ Yesuq gi, yhangmoq shut lhing wú luí, "Yerusalem byizo wui ê, Ngá é yanmai hkâ-ngau nyi kó, nungmoq gi, yhumsing gùng eq yhumsing é zo dù wui é matú sheq ngau nyi keq. ²⁹ Hkâsu mù gà le, 'Zogùng a dut wú é eq nau a huq wú é baùdung myhi pé gi, hkungsô wó nyi ri.' ga luí, taí é buinyi gi, jé lò rà nghut lhê. ³⁰ Haù buinyi má, byu pé gi, bùm pé lé, 'Ngamoq ahtoq má byoq nhé aq!' ga luí le, kong pé lé, 'Ngamoq ahtoq má nghop aq!'^{*} ga luí le, wut taí bùm bekò rà nghut lhê. ³¹ Byu pé gi, siggâm jùm tò ashí le isu kut kò é nghut le gi, màn jáng gi, hkâsu wá dut lò rà lúh?" ga taí ri.

³² Haù hkùn, damaq í yuq lé le, sat pyám rà ga, Yesuq eq rahá shuí htoq lò akò. ³³ Ahkuí, Ugyap nghu é kong má jé jáng, Yesuq lé tapzìng htoq má jén tap tò é hkùn, damaq í yuq lé le, loqpai loqyò shut kut luí tapzìng má jén tap tò akò. ³⁴ Haù hkùn, Yesuq gi, "Áwa é, yhangmoq lé mara hkyut pyám byi laq; hkâsu mù gà le, yhangmoq kut é hkyò lé yhangmoq a sé kó nghut ri." ga taí ri. Gyezò pé gi, Yhâng é mebu pé lé lhang, hkyín shosé she é dōng gam yu pyám byi akò. ³⁵ Mingbyù wui gi, yap to mù tu wú nyi akò. Zau suwún wui Yhang lé nyhap é gi, "Yhang gi, byù góbang lé hkyi yu é sù nghut ri. Yhang gi, Garai Gasang hkyin yu é sù Hkrisduq nghut le gi; Yhànggùng yhang le hkyi yu wú shàng gaq." ga akò.

³⁶ Gyezò pé le, huí é mù, rhoí nyaú nyaú akò. Yhangmoq gi, chýin wing lé yhun byi kólú, ³⁷ "Nàng gi, Yudaq byu pé é hkohkâm nghut é nghut le gi. Nàng gùng yhang nàng, hkyi yu wú aq." ga Yhang lé taí akò.

³⁸ Yhâng é ulhum ahtoq má le, (Grik dōng le, Latin dōng le, Hebre dōng le) "SHÍ YUQ GI, YUDAQ BYU PÉ É HKOHKÂM." gà é laiká ká tap tò akò.

³⁹ Tapzìng htoq má bat tap lhang to huí é damaq rayuq gi, "Nàng gi, Hkrisduq nghut lhê, a nghut lúh? Haù Nàng gùng nàng le, ngá-nhik lé le, hkyi yù aq." ga luí, Yhang lé rhoí ri.

⁴⁰ Damaq góyuq sù kúm gi, "Nàng le shí yuq eq rajung za jén tò é huí luí nhing, Garai Gasang lé a gyuq lúh? ⁴¹ Nga-nhik gi, yhumsing kut shut é mara eq rajung za, jéyáng huí zo gùng é sù nhik nghut lhê; shí yuq kúm gi, hai mara lé kut shut wú sù a nghut." ga luí, haù yuq lé tân kat ri.

⁴² Haù htâng, yhang Yesuq lé taí é gi, "Yesuq é, Nàng, Nàng é mingdán má jé lò jáng, ngo lé myit bun laq ô." gà ri.

⁴³ Haù hkùn, Yesuq gi, "Ngò, nang lé teng za taí lé, hkù-nyí yhang nàng Ngò eq rahá hparadisú* má nyi rà nghut lhê." ga luí, yhang lé tù taí kat ri.

Yesuq Soqkang Byit É Hkyò

Mht 27:45-56; Mrk 15:33-41; Yhn 19:28-30

⁴⁴ Haù ahkyíng gi, nyí káng raxe í hkyíng nghut luí, myinhàng sum hkyíng jé shoq ramau gón mauchut tuq dut byuq bê nghut ri;† ⁴⁵ hkâsu mù gà le, builoq shum byuq é yanmai nghut ri. Noqkuq yhùm má é pàngyang le, í hkyam byáng dut byuq bê nghut ri. ⁴⁶ Haù hkùn, Yesuq gi, "Áwa é, Ngò, Ngá é woi-nyí nàng é loq má ap byi lhê." ga htê mó eq garú kat ri. Haù su ga ban tai eq, Yhang káng byit bê nghut ri.

⁴⁷ Shò up gyezau hpò gi, haù su dut é lé myàng jáng, "Shí yuq gi, gè gè yhang, dingmán sù nghut ri." ga luí, Garai Gasang lé hkyá-on kungton ri. ⁴⁸ Haù hkyò lé wú rà ga, lé zìng tò é byù lhunglhang bang le, haù su dut é hkyò pé lé myàng kôjáng, myit yón kólú, wànggàng bat mù, dum tarú lò byuq bekò. ⁴⁹ Nghut kôlhang, Yhang lé sê é bang eq Galile mau mai Yhang htâng châng é myiwe wui gi, we we má yap to mù, haù hkyò pé lé byu wú nyi akò.

Yesuq É Màng Lé Lup Hkaù Má Kat É Hkyò

Mht 27:57-61; Mrk 15:42-47; Yhn 19:38-42

⁵⁰ Haù hkùn, Yuda mau Aramahti gà é myuq má, Yosep gà é sù rayuq nyi ri. Haù yuq gi, nhik bo é sù eq dingmán é sù nghut é htoq agó, Garai Gasang é mingdán jé rà hkyò lé myit myoqbyu to sù le, nghut mù luí, ⁵¹ yhang gi, Yudaq uphkàng hpung má é rayuq nghut kôlhang, hpyé lhum é hkyò má le, zui sai é hkyò má le, myit a bo huí lom é sù nghut ri. ⁵² Yhang gi, Pilat chyáng wàng luí, Yesuq é gungsóm lé dúng yu ri. ⁵³ Haù mù, gungsóm haù lé tapzìng mai hkyut hkyò yù luí, pán yúng eq htup yup mù, ó lé lhang a kat wú shí é, luqgok lé kyúng tò é luqgok lup hkaù má kat tò ri. ⁵⁴ Haù nyi gi, Hên Lajang Buinyi nghut luí, Bánno buinyi jé rà za nghut bê.

⁵⁵ Galile mau mai Yesuq eq rahá htoq lé lo é myiwe zo wui le, Yosep htâng má châng é luí, lup haù lé le, Yesuq é gungsóm lé le, hkâsu kut tò tò é lé, é myang akò. ⁵⁶ Haù htâng, yhangmoq gi, yhùm shut taù lò mù,

* **23:30** Hos 10:8 * **23:43** Hparadisú nghu é gi, mauhkùng mingdán lé taí ri. † **23:44** Nga-nhùng é nyí káng raxe í hkyíng gi, Yudaq byu pé é napkyó hkyuq hkyíng nghut lhê; yhangmoq é gau hkyíng gi, nga-nhùng é myinhàng sum hkyíng nghut bê.

Yesuq é gùng sòm lé but byi rà matú, namngón é jung eq mura xù lé hen tò akò. Bánno buinyi má kúm gi, tarâ joq é eq rajung za, yhangmoq yuban bán nyi bum akò nghut ri.

24

Yesuq, Dum Dui Toq É Hkyô

Mht 28:1-10; Mrk 16:1-8; Yhn 20:1-10

¹ Bánno buinyi htang napsùn noq le, myiwe wui gi, yhangmoq hen tò é namngón jung pé lé yu chùng mù, lup shut e ló akò. ² Yhangmoq gi, lup má é luqhkum lêng bóng to lánq é lé, é myàng kômù, ³ wang e wú kò le, haù Yhumsing Yesuq é gung sòm lé, a myàng lo kò nghut ri. ⁴ Yhangmoq maù ùng-àng nyi bum kò é hkùn, radá dâm maulhap su duqbó é mebu wut é byù í yuq, yhangmoq é nàm má yap tò akò. ⁵ Haù mù, myiwe haù bang gi, gyuq dan bum kòluí, myigùng shut myoqdong ngóm gop tò bum é u lé, haù nhik gi, "Nungmoq gi, dui sù lé, shi to báng chyàng haù mù ho nyi akò lúhú? ⁶ Yesuq gi, shí má a nyi lo; Yhang dui toq lo bé! Yhang gi, nungmoq eq rahá Galile mau má nyi tò ashí hkùn lé, ⁷ 'Haù Byu Yhangzo gi, yubak dap bánq é loq má ap pyâm é hui luí, tapzìng má jén sat to hui é htàng, sum nyi ngùh é buinyi má lhoq dui toq yu é hui rà nghut lhé.' ga nungmoq lé tai tò é dang lé myit bun keq.' ga luí, yhangmoq lé tai ri. ⁸ Haù hkùn, yhangmoq gi, Yesuq é dang lé bún kat bekò nghut ri.

⁹ Yhangmoq gi, lup mai dum taù lò mù, lagyo raxe rayuq eq gotú lunglhang bang lé, haù hkyô banshoq lo tai kyô akò. ¹⁰ Lagyo pé lé lo tai kyo bang gi, Magadalaq wà má é Mariq, Yoanaq, Yakuq é yhangnu Mariq eq, yhangmoq eq rahá nyi é myiwe góbang le nghut akò. ¹¹ Lagyo pé kúm gi, yhangmoq é dang lé dangsôm su ngam pyâm kòluí, a jing byi kó nghut ri. ¹² Nghut kòlhang, Petruq gi, toq luí lup má din jé é mù ngóm wú kat le, mâng htup é pán leq tò é lé za myàng mù luí, haù su dut é hkyô lé maù é èq, yhùm shut dum taù lò byuq bé nghut ri.

Chángzo Í Yuq Lé Yesuq Htoq Shit É Hkyô
Mrk 16:12-13

¹³ Haù ra-nyí má za, Yesuq é chángzò pé má é í yuq gi, Yerusalem wà mó mai nyhit déng kò wé é Ema-u gá é wà shut e ló akò. ¹⁴ Yhangnhik gi, dut lai ló é hkyô pé banshoq lé, rayuq eq rayuq tai lhum nyi akò. ¹⁵ Yhangnhik gi, haù hkyô pé lé rayuq eq rayuq tai hpyé lhum e ló kò le, Yesuq gi, yhangnhik chyàng jé lé lò mù, yhangnhik eq rahá sô nyi ri. ¹⁶ Nghut kòlhang, yhangnhik gi, myoq hpuq hpuq pyám byi é hui kômù, Yhang lé a sè wú byuq kó nghut ri.

¹⁷ Hau hkùn, Yesuq gi, yhangnhik lé, "Nungnhik hkyô so uchyang tai lhum lé lo é gi, haù jung wà nghut akò lúhú?" ga myi

kat jáng, yhangnhik gi, myoqdong shum kut luí, hkying yap tò akò. ¹⁸ Yhangnhik má é Hklupa gá é sù gi, "Nàng gi, Yerusalem wà mó má lé bíng nyi luí nhing, shí gyoro lé haù wà má dut lo é hkyô pé lé, a sè é bíng gi, Nàng baù za wà nghut lhé lúhú?" ga myi kat ri.

¹⁹ Yhang gi, "Haù jung lúhú?" ga dum myi é hkùn lé, yhangnhik gi, "Nazaret wà byù Yesuq é hkyô nghut lhé; haù yuq gi, Garai Gasang é hí má le, byù lunglhang báng é hí má le, nhut shò hpaqchyí a-tsam eq hkyí loq a-tsam má wum-o bo é sù myiqhtoi nghut ri. ²⁰ Nghut kòlhang, hkyangjong agyi pé eq ngamoq é zau suwùn wui eq haù yuq lé sat pyám rà matú ap byi pyám kômù, yhangmoq gi, Yhang lé tapzìng má jén sat pyám bekò nghut ri. ²¹ Ngamoq kúm gi, haù yuq lé, Israelaq byù myú lé hkyi yù rà sù nghut lhé ngùh luí, myit myoqbyu nyi bum lhé. Nghut kòlhang, haù su dut lai ló é gi, hkù-nyí sum nyi lhang bò bè. ²² Hau htoq agó, hkù-nap noq le, lup má é wú é, ngamoq hpung má é myiwe wui ra-am gi, ngamoq lé, lo lhoq maù akò. ²³ Yhangmoq gi, Yesuq é gung sòm lé a myàng jang dum taù lò mù, 'Haù Yhumsing dui nyi ri.' ga luí, tai kyô é maumang lagyo htoq shit é shing-rán lé, myang é hkyô lé lo tai kyô akò. ²⁴ Haù mù, ngamoq é luzum wui ra-am gi, lup má é wú kò le, myiwe wui tai é eq rajung za, dut to lánq é lé é myàng akò. Nghut kòlhang, haù yuq lé gi, yhangmoq a myàng kó gá." ga luí, Yhang lé tai kyô akò.

²⁵ Haù hkùn, Yhang gi, "Myiqhtoi pé tai é dang banshoq lé lumjing rà matú, hpaqchyí a bo é eq ngha é sù nhik é, ²⁶ Hkrisduq gi, haù su é wuihke jamjang hkâm zò yu é htàng má sheq, Yhang é hpungwup shingkang má wó wang nyi to rà, a nghut kó lúhú?" ga luí, yhangnhik lé myi ri. ²⁷ Yhang gi, yhangnhik lé, Mosheq ká tò é eq myiqhtoi pé banshoq bang ká tò é Chyúmdang pé mai, Yhang má àng é dang banshoq é lichyúm lé, tai hpông kyô ri.

²⁸ Ahkuí, yhangmoq, haù nhik e ló é wà má chyàng lò kójang, Yesuq gi, lai ló rà su kut ri. ²⁹ Haù hkùn, yhangnhik gi, "Nga-nhik eq rahá wang bíng sháng; hkásu mù gá le, buigylum bé mù, mau le chut lò bé nghut ri." ga luí, Yhang lé wum kat chòm lung nyi akò. Haù mù luí, Yesuq gi, yhangnhik eq rahá wang bíng bé nghut ri.

³⁰ Yesuq gi, zang zo rà ga, yhangnhik eq rahá zung tò é hkùn, muk lé yu luí, jeju hkya-on mù, myhik hpé luí, yhangnhik lé gám byi ri. ³¹ Haù hkùn, yhangnhik é myoq bóng lò luí, Yesuq nghut é lé bún sé kat bekò. Yesuq kúm gi, yhangnhik chyàng mai byuq byuq bé nghut ri. ³² Haù mù, yhangnhik gi, "Yhang gi, hkyô má ngá-nhik eq dang nyo lhum é eq Chyúmdang é lichyúm tai hpông shit é hkùn, ngá-nhik gi, i-miyit unghkaù

má, achyí aku dut bê a nghut lú?" ga luí, yhangnhik yhangchang tai lhùm akò.

³³ Yhangnhik gi, toq mù, radá dâm Yerusalem và mó shut dum taù ló kò le, lagyo raxe rayuq eq, yhangmoq eq rahá nyi é bang zup ming to kò é lé ló myang akò.

³⁴ Haù bang gi, "Haù Yhumsing gi, teng za yhang dum dui toq ló bê; Simun lé lhang htoq shit bê nghut ri." ga tai lhùm nyi bum akò. ³⁵ Haù hkùn, yhangnhik gi, hkyô má dut lai ló é hkyô pé eq, muk hpé é hkùn má Yesuq lé bün sé kat é hkyô lé, tai kyô akò nghut ri.

Chángzô Pé Lé Yesuq Htoq Shit É Hkyô

Mht 28:16-20; Mrk 16:14-18; Yhn 20:19-23; Lagyo 1:6-8

³⁶ Yhangmoq haù hkyô lé chòm tai nyi to bum ashí le, Yesuq gi, Yhang gung yhang, yhangmoq é agùng má yap to luí, "Nungmoq nguigon yuqyo nyi sháng gaq." ga luí, yhangmoq lé tai ri.

³⁷ Yhangmoq kúm gi, gyuq dan byuq bùm kômù, sobyô lé myàng bê ga myit yu pyám bum akò. ³⁸ Haù mù luí, Yhang gi, "Nungmoq gi, hai mù dan nyi bum akò lú? Hai mù nungmoq é i-myit unghkau má úng-âng nyi bum akò lú? ³⁹ Ngá é loq eq Ngá é hkyí lé wú wú keq. Ngò yhang nghut nyi lhé. Ngo lé sop wú keq. Sobyô nghú é gi, ngo lé nungmoq myang é su, sho eq showui showang bo é a nghut." ga luí, yhangmoq lé tai kyô ri.

⁴⁰ Yhang gi, haù su ga tai mù, Yhâng é hkyí loq lé tún shit ri. ⁴¹ Yhangmoq gi, gabú é eq maú nyi bùm kômù, a wó jing shi dut tô é hkùn lé, Yesuq gi, "Nungmoq shí má zôhpo rajung jung wó akò lú?" ga luí, yhangmoq lé myi kat ri. ⁴² Haù hkùn, yhangmoq gi, nyhín nyhoq tô é ngozo rahtung lé, byí akò. ⁴³ Yhang gi, haù lé yù mù, yhangmoq é hí má zô shit ri.

⁴⁴ Hau htàng, Yhang, yhangmoq lé tai é gi, "Mosheq é tarà eq, myiqhtoi laiká pé má le, Hkya-on Kungtôn Laiká pé má le, Ngò èq séng luí ká to má ká to banshoq gi, dik rá chyat nghut lhé nghú luí, nungmoq eq rahá nyi to ashí hkùn lé, Ngò, nungmoq lé tai kyô tô é pé gi, shí nghut bê." ga tai ri.

⁴⁵ Hau htàng, Yhang gi, Chyúmdang pé lé sê gyo shoq ga, yhangmoq é i-myit hkum hpóng byí ri. ⁴⁶ Haù mù, Yhang gi, "Hkrisduq gi, wuñke jamjau hui zo mù, sum nyi nghú rá buinyi má, shi é mai dum dui toq ló rá hkyô lé le, ⁴⁷ Yerusalem và mó mai hí luí, byù myú chángjup lé, Yhâng é mying lé lang luí yubak mara hkyut pyám byi rá hkyô eq myit lhang rá hkyô lé le, hko kyo rá hkyô lé, ká to bê nghut ri. ⁴⁸ Nungmoq gi, shí pé é saksé pé nghut nyi akò. ⁴⁹ Ngá Wa byí tô

é danggidiq* lé, Ngò, nungmoq é ahtoq má nhang kat rá nghut lhé; nungmoq kúm gi, htoq tsáng myhâng má é wum-o a-tsam wó yu é buinyi jé shoq, Yerusalem và mó má láng nyí keq." ga luí, yhangmoq lé tai ri.

Yesuq Mauhkung Shut Shui Toq Yu Hui É Hkyô

Mrk 16:19-20; Lagyo 1:9-11

⁵⁰ Hau htàng, Yhang gi, yhangmoq lé Bhtani và yàm shut shui htoq é mù, Yhâng é loq tu toq luí, shimân byí ri. ⁵¹ Haù su kút shimân byí nyi ashí le, Yhang gi, yhangmoq chyáng mai gâng ló byuq luí, mauhkung shut shui toq yu é hui bê nghut ri. ⁵² Yhangmoq kúm gi, Yhang lé noqkuq kômù luí, gyai gabú é myit èq Yerusalem và mó shut dum taù ló akò. ⁵³ Yhangmoq gi, noqkuq yhùm má nyi to mù, Garai Gasang lé hkya-on kungton nyi bum akò nghut ri.

* 24:49 Ngá Wá byi tô é danggidiq nghu é gi, Chyoiyung é Woi-nyi lé tai ri.

YOHAN é Gabú Danglù Laiká (The Gospel of John)

Haù Mungdang, Xàngzo Byù Gùng Lé Dut É Hkyó

¹ A-nham sâng-hi má, Mungdang joq ri; Mungdang haù gi, Garai Gasang eq rahá nghut lui, haù Mungdang yhang Garai Gasang nghut ri. ² Yhang gi, a-nham sâng-hi má, Garai Gasang eq rahá nghut nyi ri.

³ Nyi mi-nyì, joq mijoq gi, Yhang đông mai hpan tó é chyat nghut lhê; Yhang đông mai a hpan é gi, haì lhang a joq nghut ri. ⁴ Asak chyungxe gi, Yhang má nghut lhê mù, asak haù gi, byu pé é matú maubó nghut ri. ⁵ Haù maubó gi, mauchut má duqbó byì nyì kôhlang, mauchut gi, haù lé a hap yù nghut ri. ⁶ Garai Gasang mai nhang kat é, Yohan gá é byù rayuq jé lé ri.

⁷ Yhang gi, maubó haù eq sêng é hkyó lé, saksé hkám byì lui, yhang é yanmai byù lhunglhang bang wó lumjing kó sháng gaq ga, saksé rayuq đông jé lé é sù nghut ri. ⁸ Yhang gi, haù maubó a nghut; maubó haù lé saksé hkám byì rá matú a hap yù jé lé é ru nghut lhê. ⁹ Byù yuq jup lé duqbó byì é, maubó akying haù gi, mingkan htoq má jé nyi to bê.

¹⁰ Yhang gi, mingkan htoq má nyi to bê nghut ri; mingkan lé gi, Yhang đông mai hpan tó é nghut kôhlang, mingkan haù gi, Yhang lé a wú sé nghut ri. ¹¹ Yhang gi, yhumsing mau má jé lé kôhlang, Yhâng é amyù pé gi, Yhang lé a lhom hap yù kó nghut ri. ¹² Nghut kôhlang, Yhang gi, Yhang lé lhom hap yù lui, Yhâng é mying lé lumjing é bang lhunglhang lé, Garai Gasang é yhangzó pé dut rá ahkáng byì bê nghut ri. ¹³ Haù bang gi, sui sho đông hku kat é le a nghut, byù ô nau é đông hku kat é le a nghut, gungsho ô nau é đông hku kat é le a nghut e za, Garai Gasang chyáng mai hku kat é bang ru nghut lhê.

¹⁴ Haù Mungdang gi, xàngzo byù gùng lé dut lui, ngamoq chyáng nyi wú bê nghut lhê. Ngamoq gi, haù jeju eq tengmán hkyó bying tó é, Yhang é hpungwup shingkan lé myang wú bê nghut lhê; haù gi, haù Íwá é zote rayuq đông, Yhang wó yu é hpungwup shingkan nghut ri.

¹⁵ Wui-myhup Sará Yohan gi, Yhang eq sêng é hkyó lé saksé hkám é hkùn, garù tai é gi, "Ngá é htàng má jé lé é Sù gi, ngá é hí mai nyi to bê sù nghut é yanmai, ngá htoq je gyaù sù nghut ri." nghù, ngò tai é sù gi, shí yuq nghut bê." gá ri. ¹⁶ Yhâng é gumjup é

jeju ahkaù mai, nga-nhúng banshoq bang gi, shimán jeju lé ralhùm htoq ralhùm myang yu nyi bê nghut lhê. ¹⁷ Hkásu mù gá lé, haù jep é tará gi, Mosheq é loq đông mai byì é nghut lhê; jeju eq tengmán hkyó kúm gi, Yesuq Hkrisduq é yanmai lé joq é nghut lhê. ¹⁸ Garai Gasang lé, ó yuq éq le a myang wú wú é nghut lhê; nghut kôhlang, haù Íwá é tanghkoì má lúng tó é, Yhang Zo zote gi, Garai Gasang é gùng lé lhoq htoq shit bê nghut ri.

Wui-myhup Sará Yohan Hko Kyó É Hkyó Mht 3:1-12; Mrk 1:1-8; Luk 3:15-17

¹⁹ Yerusalem wá mó má é Yudaq byu pé gi, hkyangjông pé eq Lewiq byu pé lé, Yohan ó yuq nghut é hkyó myì nhang kat kô é hkùn, Yohan saksé hkám é gi, a-ô má é hkyó pé nghut ri. ²⁰ Yhang gi, a hê a záu tó e za, "Ngò gi, Hkrisduq* a nghut." ga lhom tai kyô ri.

²¹ Haù hkùn, yhangmoq gi, "Haù nghut jáng, nàng gi, ó yuq nghut lhê lhú? Nàng gi, Eliyaq lhú?" ga myi kôjáng, yhang gi, "A nghut." ga tai ri; "Nàng gi, haù Myiqhtoi nghut lhê lhú?" ga dum myi kôjáng, yhang gi, "A nghut." ga tú tai ri.

²² Haù mù, yhangmoq gi, "Ngamoq lé nhang kat bang chyáng ló wó tai kyo rá matú, nàng gi, ó yuq nghut lhê lhú? Náng gùng lé nàng hkásu nghut lhê lhú? Tai kyô wú laq." ga dum myi akò.

²³ Haù hkùn, Yohan gi, myiqhtoi Esai-aq é dang eq rajung za, "Ngò gi, haù yoso má, 'Yhumsing é matú hkyó lhoq nyhang to keq.' gá é hté lé, garù tai é sù nghut lhê."* ga tú tai ri.

²⁴ Hparishe pé mai nhang kat é bang ram gi, yhang lé, ²⁵ "Nàng gi, haù Hkrisduq le a nghut, Eliyaq le a nghut, Myiqhtoi le a nghut é nhing, haì mù lui, wui-myhup hkám byì nyi lhê lhú?" ga dangmyi myi akò.

²⁶ Haù hkùn, Yohan tú tai é gi, "Ngò gi, wui éq za wui-myhup hkám byì lhê; nghut kôhlang, nungmoq a sê é sù rayuq nungmoq chyáng yap tó ri. ²⁷ Yhang gi, ngá htàng má lé é sù yuq nghut bê; ngò gi, Yhâng é hkyi-tsung tui lé hpýi rá lhang a gingdán é nghut ri." gá ri.

²⁸ Shí pé banshoq gi, Yohan wui-myhup hkám byì nyi é, Yodan làng hé hpoq má é Behtani wá má dut é hkyó pé chyat nghut ri.

Yesuq Gi, Garai Gasang É Sauzo Nghut É Hkyó

²⁹ Hau htang nyi, Yohan gi, yhâng chyáng Yesuq lé lo nyi é lé myàng lui, tai é gi, "Mingkan byu pé é yubak mara lé yu pyám byì é Garai Gasang é Sauzo lé, wú keq!" ³⁰ Shí yuq gi, "Ngá é htàng má jé lé é Sù gi, ngá é hí má nyi bê sù nghut é yanmai, ngá htoq je

* **1:20** Grik dong Hkrisduq gá é gi, xù but hui Sù gá é lichyùm nghut mù, Hebre dong "Mesaia" gá é eq rajung za nghut lhê. * **1:23** Esai 40:3

gyau Sû nghut ri.' ngû, ngò tai é sù yhang nghut bê. ³¹ Ngò gi, Yhang ó yuq nghut é lé a sê é nghut lhê, nghut kôhlang, Yhang lé, Israelaq byu pé wó sé kó sháng gaq ngû, ngò lé jé mù, wui eq wui-myhup hkâm byi nyi é nghut lhê." gâ ri.

³² Hau htang, Yohan saksé hkâm é gi, "Hau Woi-nyí gi, mauhkúng mai hpúngkyui gunghkyang sú é dông mai gyó lé mù, Yhâng chyáng lé nô tô é lé, ngò myàng ri. ³³ Ngò gi, Yhang ó yuq nghut é lé a sê é nghut kôhlang, wui eq wui-myhup hkâm byi rá matú, ngò lé nhang kat é Sû, ngò lé tai kyô é gi, 'Hau Woi-nyí gyó lé lô mù, ó yuq chyáng lé nô tô é lé, nang myàng jáng, hau yuq gi, hau Chyoiyúng Woi-nyí má wui-myhup hkâm byi rá sú nghut lhê.' gâ ri. ³⁴ Hau eq rajung za ngò myàng bê nghut lui, shí yuq gi, Garai Gasâng é Yhangzo nghut lhê ngû, ngò saksé hkâm lhê." gâ ri.

Sâng-hi Lhê É Chángzô Pé

³⁵ Hau htang nyí, Yohan gi, yhâng é chángzô í yuq eq rahá, hau má dum nyi tô akó. ³⁶ Hau hkûn, yhang gi, Yesuq lai ló nyi é lé myang kat jáng, "Hê, Garai Gasâng é sauzo lé, wú keq!" ga tai kat ri.

³⁷ Chángzo hau í yuq gi, yhang hau su gâ é lé wó gyo kôjáng, Yesuq é htang cháng bekó nghut ri. ³⁸ Yesuq gi, lhing wú kat le, yhangnhik cháng tô é lé myàng lui, "Nungnhik hai o akó lhú?" ga myí jáng, yhangnhik gi, "Rabai ê, Nang hkâmá nyi lhê lhú?" ga tau myí kat akó nghut ri. (Rabai gâ é gi, Sará gâ é lichyúm nghut lhê.)

³⁹ Hau hkûn, Yhang gi, "Lé keq, hau jáng, nungnhik myàng kó rá nghut lhê." ga tú tai ri.

(Hau-u gi, raxé hkyíng† kô nghut ri.) Hau mù lui, yhangnhik gi, cháng é mù, Yhang hkâmá nyi é lé, é myàng kôlui, hau nyi buigyúm shoq, Yhang eq rahá é nyi nyi akó nghut ri.

⁴⁰ Yohan tai é dang lé wó gyo lui, Yesuq htang cháng é su nhik má é rayuq gi, Simun Petruq é yhanggu Andre nghut ri. ⁴¹ Andre gi, yhangmang Simun lé hí myàng lui, "Nga-nhik gi, Mesaia lé myàng bê." ga yhang lé tai kyô ri. (Mesaia gâ é lichyúm gi, Hkrisduq gâ é nghut lhê.) ⁴² Hau htang, yhang gi, yhangmang lé Yesuq chyáng shuí e ri.

Yesuq gi, Simun lé lhom myàng jáng, "Nang gi, Yohan é yhangzo Simun nghut ri; Kehpa‡ gâ é myíng lé, nang wó yú rá nghut lhê." ga tai ri. (Kehpa gâ é lichyúm gi, Petruq gâ é nghut lhê.)

Hpilip Eq Nahtanelaq Lé Hkyin Yu É Hkyô

† 1:39 Raxé hkyíng gi, myinháng myi hkyíng záng ri.

"Petruq" gâ é lichyúm gi, luqgok gâ é nghut lhê.

⁴³ Hau htang nyí, Yesuq gi, Galile mau shut é rá matú, myit hpyit yú bê nghut ri. Yhang gi, Hpilip lé myàng jáng, "Ngá htang cháng aq." ga tai ri.

⁴⁴ Hpilip gi, Andre eq Petruq nhik nyi é Bet-saida wá mó má é byu nghut ri. ⁴⁵ Yhang gi, Nahtanelaq lé myàng jáng, "Mosheq mai tará laiká má kâ tô é eq myiqhtoi pé mai le lhoq ang lui kâ tô é sú, Yosep é yhangzo, Nazaret wá byu Yesuq lé, ngamoq myàng bê." ga yhang lé tai kyô ri.

⁴⁶ Hau hkûn, Nahtanelaq gi, "Nazaret wá ô! Hau mai, ge é jung hai wa wó htoq lhê lhú?" ga myí jáng, Hpilip gi, "Ru lé wú aq." ga yhang lé tai ri.

⁴⁷ Yesuq gi, Yhâng chyáng Nahtanelaq lé lo nyi é lé myàng jáng, yhang lé lhoq ang lui, "Wú keq, shí yuq gi, mhaú é myang a bo é sú, Israelaq byu akying rayuq nghut ri." ga tai ri.

⁴⁸ Hau hkûn, Nahtanelaq gi, "Nang, ngò lé hkâsu kut sê é lhú?" ga myí jáng, Yesuq gi, "Nang lé, Hpilip eq a wut yú shimá, nang, maihpáng gâm ô má ru nyi tô ashí hkûn, Ngò, nang lé myàng bê nghut lhê." ga tú tai ri.

⁴⁹ Hau mù, Nahtanelaq gi, "Rabai ê, Nang gi, Garai Gasâng é Yhangzo nghut ri; Nang gi, Israelaq byu pé é Hkohkâm le nghut ri." ga tai ri.

⁵⁰ Hau hkûn, Yesuq gi, "Ngò, nang lé, maihpáng gâm ô má myang é ngû tai kyô é yanmai, nang lumjíng lhê a nghut lhú? Hau htoq je kô é muzó pé lé, nang myàng rá nghut lhê." ga tai ri. ⁵¹ Hau htang, Yesuq xoq tai é gi, "Ngò, nungmoq lé teng za tai kôlé, mauhkúng bóng lô lui, hau Byu Yhangzô ahtoq má, Garai Gasâng é maumang lagyo pé doq lô gyó lô kut nyi kô é lé, nungmoq myàng kó rá nghut lhê." gâ ri.

2

Wui Lé Tsiyiq Wing Dut Nhang É Hkyô

¹ Hau htang, í nyi ngû rá nyi má, Galile mau má é Hkanaq wá mó má, myiháng poi ralhum joq ri. Hau má Yesuq é yhângnu le, bo lom ri. ² Yesuq eq Yhâng é chángzô pé lé le, myiháng poi hau má jí akó nghut ri. ³ Tsiyiq wing jáu túm to kô é hkûn, Yesuq é yhângnu gi, "Yhangmoq, tsiyiq wing a wó lo kó nghut ri." ga, Yesuq lé tai ri.

⁴ Hau hkûn, Yesuq gi, "Ánu é,* hau, nang gi, Ngò eq hai sêng lhê lhú? Ngá é ahkyíng a jé shí é nghut lhê." ga tú tai ri.

⁵ Nghut kôhlang, Yhâng nu gi, hau dui-hâng zosháng wui lé, "Yhang hai tai le, hai kut keq." ga tai ri.

⁶ Hau nám má, í sum xê galan kô wang é luqgok wúng hkyuq cham joq tô ri; hau gi,

‡ 1:42 Aramaik dang dông Kehpa gâ é eq Grik dang dông

"Ánu é gâ é lé, Grik dông gi, "Miyiwe myhi ê" ga bo tô é nghut lhê.

Yudaq byu pé mai, lhoq san lhoq yúng hkíng é matú, chung é jung wúng nghut ri.

⁷ Yesuq gi, haú dui-nhâng zoshâng wui lé, "Wúng haú pé má wui lhoq pyíng keq." ga tai ri; haú mù, yhangmoq gi, wúng haú pé má byíng shoq shoq lhoq pyíng beko nghut ri.

⁸ Hau htâng, Yhang gi, yhangmoq lé, "Ahkuí, ratsuí hkú yù mù, poi-up lé yu ló byi keq." ga tai jáng, yhangmoq gi, yu ló byí akò nghut ri.

⁹ Poi-up hpó gi, wui mai dut é tsibiyiq wing haú lé, shuq chyam wú ri; wui hkam é dui-nhâng zoshâng wui gi, tsibiyiq wing haú hkâmai lo é hkyô lé sê to kôlhang, yhang gi, a sé nghut ri. Haú mù, yhang gi, lusik lé, ji yù luí, ¹⁰ "Yuq hkangmó gi, tsibiyiq wing mún lé hí jaú mù, bíng pé shuq gyí bùm jáng sheq, tsibiyiq wing apyâng lé ru yu htoq lhê; nghut kôlhang, nàng gi, nghâm é tsibiyiq wing lé, ahkuí jé shoq wó hkong tô ri-nhung!" ga tai ri.

¹¹ Galile mau má é Hkanaq wà mó má, Yesuq tân shit é limik kumlhá gi, Yhang kut é limik kumlhá pé má é sâng-hí dàm nghut ri. Yhang gi, Yhâng é hpungwup shingkanq lé, haú dng lhoq htoq shit é nghut mù luí, Yhâng é chángzô pé gi, Yhang lé lumjáng bum akò nghut ri.

Noqkuq Yhûm Lé Lhoq Sansêng Pyâm É Hkyô

Mht 21:12-13; Mrk 11:15-17; Luk 19:45-46

¹² Hau htâng má, Yesuq gi, Yhâng nu, Yhâng gu yuqzo pé eq Yhâng é chángzô pé le mù, Kaperna-um wà má gyó ló ri; yhangmoq gi, haú má buinyi myi ngò nyi nyi akò nghut ri.

¹³ Yudaq byu pé é Lhoqlhai Poi jé rá nghut é hkún, Yesuq gi, Yerusalem wà mó má doq ló ri. ¹⁴ Haú hkún, noqkuq yhûm wàng má, nojûng, sau, hpûngkyui pé lé ûng nyi é bang lé le, siboí má ngùn htaí zô zung nyi é bang lé le, Yhang ló myàng ri. ¹⁵ Haú mù, Yhang gi, tui lé, nhuq rá wase saí yù mù, banshoq bang lé le, sau eq nojûng lé le, haú noqkuq yhûm wàng mai hkat htoq luí, ngùn htaí zô bâng é ngùn htingchap lé gi, tú hut pyám byi mù, yhangmoq é siboí lé gi, tu mhuc pyám byi ri; ¹⁶ haú hpûngkyui ung zô é bang lé le, "Zê shi pé lé yu htoq ló keq! Ngá Wà é yhûm lé, hpugá jowó hkâkut kó!" ga luí nhik-yô ri.

¹⁷ Haú mù, Yhâng é chángzô pé gi, "Ngò, Náng é yhûm lé chiytdap káng tui é hkyô gi, Ngo lé myi su nyhê jôm pyám rá nghut lhê."^o ga kâ tô é lé, myit bún kat akò nghut ri.

¹⁸ Yudaq byu pé gi, Yhang lé, "Nàng, shi pé kut rá ahko ahkáng wó é hkyô lé saksé tân shit rá matú, ngamoq lé, hai jung limik kumlhá wó tân shit rá lúh?" ga chôm myí akò nghut ri.

¹⁹ Haú hkún, Yesuq gi, "Noqkuq yhûm shí lé nungmoq hpyoq pyám keq, sum nyi gyoro má, Ngò, haú lé dum tu shap rá nghut lhê." ga, yhangmoq lé tú tai ri.

²⁰ Haú Yudaq byu pé gi, "Noqkuq yhûm shí lé, myi xe hkyuq zân tup saí é ru nghut lhê; sum nyi gyoro má za, Náng wó tu shap rá lúh?" ga tu myí akò nghut ri. ²¹ Nghut kôlhang, Yesuq tai é noqkuq yhûm gi, Yhâng é gùng lé lhoq ang luí tai é nghut ri. ²² Haú mù, Yhang, shí é mai lhoq dui toq huí é hkún sheq, Yhâng é chángzô pé gi, Yhang haú su ga tai é dang lé myit bun kômù, Chyúmdang lé le, Yesuq tai é dang pé lé le, lumjáng akò nghut ri.

²³ Haú Lhoqlhai Poi nghut é u lé, Yerusalem wà mó má Yesuq nyi nyi é hkún, byù myo myo gi, Yhang kut shit é limik kumlhá pé lé myàng kômù, Yhang lé lumjáng bum akò nghut ri. ²⁴ Nghut kôlhang, Yesuq gi, byù lhunglhang bâng é myit lé sê é yanmai, yhangmoq chyáng, Yhânggùng lé a ap to nghut ri. ²⁵ Yhang gi, byu é i-myt unghkaú má hai lúng tô é lé sê é yanmai, byù yhangchang saksé hkám byí é a ra nghut ri.

3

Nikodimu Lé, Yesuq Mhoqshit É Hkyô

¹ Nikodimu gà é Hparishe rayuq nyi ri; yhang gi, Yudaq byu pé é byin tú wapdoq má bo é sù nghut ri. ² Yhang gi, myín lé, Yesuq chyáng lé mù, "Rabai è, Nàng gi, Garai Gasâng chyáng mai lé é sará rayuq nghut é lé, ngamoq sê lhê. Hkâsu mù gà le, Nàng kut shit é limik kumlhá pé gi, Garai Gasang a lom é nghut jáng, ó yuq le wó kut rá a nghut." ga tai ri.

³ Haú hkún, Yesuq gi, yhang lé, "Ngò, nàng lé teng za tai kyo lé, ó yuq nghut kôle, dum hku é hui sù za a nghut le gi, Garai Gasâng é mingdán lé wó myàng rá a nghut." ga tú tai ri.

⁴ Haú jáng, Nikodimu gi, "Ipyat kó bê é byù gi, dum hkú é hkâsu kut wó hui rá lúh? Ínú é unghkaú má dum wàng mù, dum hku é hui rá gi, gè gè yhang wó dut rá a nghut!" ga tai ri.

⁵ Haú hkún, Yesuq gi, "Ngò, nàng lé teng za tai kyo lé, ó yuq nghut kôle, wui eq Woi-nyí mai hku kat é hui sù za a nghut le gi, Garai Gasâng é mingdán má wó wàng rá a nghut. ⁶ Gungsho mai hku kat é gi, gungsho nghut ri; Woi-nyí mai hku kat é kúm gi, woi-nyí nghut ri. ⁷ 'Nungmoq gi, dum hku é hui rá lhê' nghu Ngò tai é dang lé, nàng hkâmau nyi. ⁸ Haú, lai gi, yhang nau é shut ló lhê. Lai lò htê lé nàng wó gyo kôlhang, lai hkâmai lo é eq, hká shut ló é lé, nàng sé rá a nghut; haú Woi-nyí mai hku kat huí é sù, ó yuq nghut

kòle, haù eq rajung za nghut lhê." ga tû tai ri.

⁹ Haù hkùn, Nikodimu gi, "Haù gi, hkâsu wó dut râ lúhú?" ga myí ri.

¹⁰ Yesuq tû tai é gi, "Nàng gi, Israelaq byu pé é sará rayuq nghut to luí nhing, haù hkyô pé lé a sê gyo lúhú? ¹¹ Ngò, nang lé teng za tai kyo lé, ngamoq gi, ngamoq sê é hkyô lé tai mù, ngamoq myang wù bê lé saksé hkâm lhê; nghut kôhang, nungmoq gi, ngamoq é saksé lé a hap yù kó nghut ri. ¹² Ngò gi, nungmoq lé, mingkan eq sêng é hkyô lé tai kyô lé lhang, a lumjing kó é nghut le gi, mauhkung mingdan eq sêng é hkyô lé tai kyô é nghut le gi, hkâsu kut wó lumjing kó râ lúhú? ¹³ Mauhkung mingdan mai gyô lo é sù, haù Byu Yhangzo mai lai lui, mauhkung mingdan má ó yuq lhang wó doq ló wú é a nghut. ¹⁴ Mosheq gi, yoso má lhangmui lé tu shap tô é su, haù Byu Yhangzo le tu shap tô é hui ra râ nghut lhê. ¹⁵ Haù mù, haù Byu Yhangzo lé lumjing é yuq hkangmó gi, ahtum abyuq é asak wó yù râ nghut lhê.

¹⁶ Hkâsu mù gà le, Garai Gasang gi, mingkan lé gyai yhang chyitdap é yanmai, Yhang Zo lé lumjing é sù ó yuq nghut kòle, htên byoq é a hui e za, ahtum abyuq é asak wó yù shang gaq ga, rayuq za é Yhang é Zote lé byí pyâm bê nghut ri. ¹⁷ Hkâsu mù gà le, Garai Gasang gi, mingkan lé mara byí râ matù, Yhang Zo lé mingkan htoq má nhang kat é a nghut é za, Yhang é yanmai mingkan hkyi yu é hui râ matù sheq nhang kat é ru nghut lhê. ¹⁸ Yhang lé lumjing é sù gi, mara byí é hui râ a nghut; nghut kôhang, Yhang lé a lumjing é sù kúm gi, Garai Gasang é Yhangzo zote lé a lumjing é sù nghut é yanmai, mara byí é hui to gù bê nghut ri. ¹⁹ Maubó gi, mingkan htoq má lé jé to bê; nghut kôhang, byu pé kut é hkyô gi, agè ashop hkyô nghut é yanmai, yhangmoq gi, maubó lé chyit râ malaí, maucht lé chyit akò nghut ri; haù gi, mara byí é hui râ hkyô yhang nghut ri. ²⁰ Agè ashop hkyô kut é sù ó yuq nghut kòle, maubó lé a ngui nghut ri; haù yuq gi, yhang kut é hkyô lhoq byông htoq kat râ lé gyuq é yanmai, haù maubó shut lé lô râ a nghut. ²¹ Nghut kôhang, haù tengmán hkyô đông asak dui é sù ó yuq le, yhumjing kut é hkyô gi, Garai Gasang lom é hkyô lé, san za byu-myàng shang gaq ga, haù maubó shut lé lô ri." gà ri.

Yesuq Eq Séng Luí, Wui-myhup Sará Yohan Saksé Hkâm É Hkyô

²² Hau htang má, Yesuq gi, Yhang é chángzô pé eq rahá, Yuda mau shut wang ló mù, haù má rayoq zo nyi lui, wui-myhup hkâm byí ri. ²³ Haù u lé, Yohan gi, Salim nàm mã é E-nun gà é jowò má, wui gyai myo joq é yanmai, wui-myhup hkâm byí nyi ri; byu pé gi, abyit alan lé lô kómù, wui-myhup lé hkâm

yu nyi bum akò nghut ri. ²⁴ (Haù gi, Yohan lé htóng a lhoq hkyô shí é hkun lhê é hkyô nghut ri.) ²⁵ Haù hkùn, Yohan é chángzô pé ra-am eq Yudaq byù rayuq gi, lhoq san lhoq yung hking eq séng lui, dang htung htung lhum bum akò nghut ri. ²⁶ Hau htang, yhangmoq gi, Yohan chyáng lé lui, "Rabai é, Yodan làng hé hpoq shut nàng eq rahá nyi lui, nàng eq saksé hkâm byí é Sù gi, ahkuí, wui-myhup hkâm byí nyi é nghut mù, yuq hkangmó gi, Yhang chyáng e bum akò nghut ri mhai." ga, yhang lé tai akò.

²⁷ Haù eq séng lui, Yohan tû tai é gi, "Byù rayuq gi, mauhkung mai byí é za a nghut jang, hai le wó hap yù râ a nghut. ²⁸ Ngò gi, Hkrisduq a nghut, Yhang é hí má nhang kat hui é sù za nghut lhê." nghù, ngò tai é lé, nungmoq yhang saksé nghut bum akò. ²⁹ Myisik wó é sù gi, lusik nghut ri. Lusik lé, làng yap tô é luzum hpó gi, lusik é hté lé wó gyô é yanmai, gyai yhang gabú nyi ri. Haù sù é gabú hkyô gi, ngá é gabú hkyô nghut mù, ngò má bying jup nyi bê nghut ri. ³⁰ Yhang gi, kó jat lò ra râ nghut lhê; ngò gi, yom ló ra râ nghut lhê.

³¹ Ahtoq mai lé é Sù gi, lhunglhang é ahtoq má nghut ri; myigùng htoq má é sù kúm gi, myigùng htoq eq séng é nghut lui, myigùng htoq eq séng é đông za tai ri; mauhkung mai lé é Sù gi, lhunglhang é ahtoq má nghut ri. ³² Yhang gi, wó myàng wó gyô é hkyô lé, saksé hkâm kôhang, Yhang hkâm é saksé lé, ó yuq le a hap yù kó nghut ri. ³³ Yhang é saksé lé hap yu é sù kúm gi, haù Garai Gasang gi, tengmán sù nghut ri ga, saksé shit é sù nghut bê. ³⁴ Garai Gasang eq nhang kat é hui Sù gi, Garai Gasang é mungdang lé tai ri; hkâsu mù gà le, Garai Gasang gi, haù Woi-nyí lé, laké a kat e za byí é yanmai nghut ri. ³⁵ Haù Iwa gi, Zo lé chyitdap lui, jung hkangmó lé Yhang é loq má ap byi bê nghut ri. ³⁶ Haù Zo lé lumjing é sù ó yuq nghut kòle, ahtum abyuq é asak wó lhê; nghut kôhang, haù Zo lé he-ngik pyâm é sù ó yuq nghut kòle, asak haù lé myàng râ a nghut; hkâsu mù gà le, Garai Gasang é nhikmo-yo hkyô gi, yhang chyáng ru joq nyi ri." gà ri.

4

Yesuq Eq Samariq Myhi Hui É Hkyô

¹ Yesuq gi, Yohan htoq má, chángzo je lhoq myô é eq wui-myhup hkâm byí nyi ri gà é hkyô lé, haù Hparishe pé wó gyô akò nghut ri. ² (Nghut kôhang, gè gè ga jang, Yesuq gi, Yhang wui-myhup hkâm byí é a nghut, Yhang é chángzô pé sheq ru nghut akò.) ³ Haù hkyô lé, Yesuq sé jang, Yhang gi, Yuda mau mai htoq mù, Galile mau shut dum taù ló bê nghut ri.

⁴ Ahkuí, Yesuq gi, Samariq mau mai sô lai ló râ dut bê nghut ri. ⁵ Haù mù, Yhang gi,

Yakup mai yang zo Yosep lé byí é maumyí rajap eq chyáng lhùm é, Suhka ga myhíng é, Samariq mau má é wá mó ralhúm má lo jé ri. ⁶ Haú má, Yakup é wuihtung le joq to luí, Yesuq gi, hkyô só ngu é yanmai, wuihtung hau é nàm má zung gyó tó ri. Haú u gi, nyí-káng raxe í hkyíng* nghut bê nghut ri.

⁷ Haú hkún, Samariq myiwe myhí rayuq wui lé hkam ri; Yesuq gi, yang lé, "Ngo lé wui byi shuq laq." ga tai ri. ⁸ (Haú u gi, Yhâng é chángzô pé, zoshuq wui rá matú wá hkaú shut e byuq kô é ahkyíng nghut ri.)

⁹ Haú Samariq myiwe myhí gi, Yhang lé, "Nàng gi, Yudaq byu rayuq nghut to luí nhíng, ngò Samariq myiwe myhí chyáng, haí mù shuq wui dúng lhê lhu?" ga tai ri. (Hkásu mù gá le, Yudaq byu pé gi, Samariq byu pé eq a zùm yap kó nghut ri.)

¹⁰ Haú hkún, Yesuq gi, yang lé, "Nàng gi, haú Garai Gasâng é chyunghuq lé le, nang lé wui dung sú ó yuq nghut é lé le, sé é nghut le gi, noq mai Yhang lé dúng tóngbán luí, Yhang gi, nang lé asak-wui byi berá nghut lhê." ga tú tai ri.

¹¹ Myiwe myhí haú gi, "Yhumsíng é, Nàng gi, wui hkâm rá zè haí le a wó, wuihtung le ník ri; haú asak-wui lé, Nàng hkâmá é wó yú rá lhu? ¹² Ngamoq é íwa Yakup gi, ngamoq lé wuihtung shí byi to bê nghut lhê; yang yang le, yang zo pé le, yang rém é dusak pé le, wuihtung shí má é wui shuq bekô nghut ri; Nàng gi, Yakup htoq je kô lhê lhu?" ga Yhang lé tai ri.

¹³ Yesuq gi, "Wui shí lé shuq é sú ó yuq le, wuishit é dum hui rá nghut lhê. ¹⁴ Nghut kôlháng, Ngò byí é wui lé shuq é sú ó yuq nghut kôle, wuishit é hkâ-nhám a hui lo rá nghut lhê. Ngò byí é wui haú gi, haú yuq má, ahtum abyuq é asak matú wuíbúm dut rá nghut lhê." ga yang lé tú tai ri.

¹⁵ Myiwe myhí haú gi, Yhang lé, "Yhumsíng é, ngò gi, wui le a shit lo, shí má wui hkâm le a lé ra lo sháng gaq, wui haú ngo lé byi laq." ga tai ri.

¹⁶ Haú hkún, Yesuq gi, "Ló mù, nung làng lé ló wut lò aq." ga, yang lé tai ri.

¹⁷ Yang gi, "Ngò, làng a wó." ga tai jáng, Yesuq gi, yang lé, "Nàng, làng a wó gá é gi, têng ri. ¹⁸ Hkásu mù gá le, nàng gi, yuqgè ngo yuq wó wú bê sú nghut ri; nàng, ahkuí wó tó é yuqgè le nung làng a nghut. Nàng gi, têng é dang tai bê nghut ri." ga tai ri.

¹⁹ Haú hkún, myiwe myhí haú gi, "Yhumsíng é, Nàng gi, myiqhtoi rayuq nghut é hkyô lé, ngò wú sé bê. ²⁰ Ngamoq é íchyí íwá pé gi, bùm shí má noqkuq kô é nghut lhê; nghut kôlháng, nungmoq Yudaq byu pé

gi, Yerusalem wá mó za noqkuq jowô nghut lhê ga tai akô nghut ri." ga tai ri.

²¹ Haú hkún, Yesuq tai é gi, "Myiwe myhí é, Ngo lé jíng aq; bùm shí má le a nghut, Yerusalem wá mó má le a nghut e za, haú íwa lé noqkuq rá ahkyíng, jé lò nyi bê nghut ri. ²² Nungmoq Samariq byu pé gi, yhumsíng lháng a sé é lé, noqkuq akô; ngamoq kúm gi, ngamoq sé é lé noqkuq lhê; hkásu mù gá le, hkyi yú hkyô gi, Yudaq amyí mai lo é nghut lhê.† ²³ Nghut kôlháng, haú têng é dông noqkuq é bang gi, woi-nyí mai le, tengmán hkyô mai le, haú íwa lé noqkuq rá ahkyíng gi, jé lo nyi bê nghut luí, ahkuí lháng jé to bê nghut ri; hkásu mù gá le, haú íwa gi, haú su kut noqkuq é bang lé ô nau ri. ²⁴ Garai Gasang gi, woi-nyí nghut lhê; haú mù, Yhang lé noqkuq é bang gi, woi-nyí mai le, tengmán hkyô mai le, noqkuq ra rá nghut lhê." ga tai ri.

²⁵ Myiwe myhí haú gi, "Hkrisduq gá é Mesaia jé lé rá nghut é lé gi, ngò sé lhê. Yhang jé lé jáng, nga-nhúng lé banshoq tai sân kyo rá nghut lhê." ga tai ri.

²⁶ Hau htâng, Yesuq gi, "Nàng eq dang nyo nyi é sú ngò gi, haú yuq nghut lhê." ga tai ri.

Haú Chángzô Pé Dum Taú Jé Lo É Hkún Lhê Hkyô

²⁷ Haú u lé, Yhâng é chángzô pé gi, dum taú jé lo bum akô; yangmoq gi, Yesuq, myiwe rayuq eq dáng nyo nyi é lé lo myàng luí, maú byuq bum akô. Nghut kôlháng, "Nàng, haí ô ri lhu?" ga le, "Haí mù Yhang eq dáng nyo nyi lhê lhu?" ga le, Yhang lé ó yuq a myi kó nghut ri.

²⁸ Hau htâng, myiwe myhí haú gi, yhang é wui yambú lé tó pyâm to luí, wá shut taú wang ló mù, wá byu wui lé ló tai kyô é gi, ²⁹ "Ngò kut lai lò bê hkyô pé lhunglháng lé, tai kyô é byu rayuq lé, lé wú keq! Yhang gi, Hkrisduq nghut lhê abe?" gá ri. ³⁰ Haú mù, yangmoq gi, wá mai htoq lé luí, Yesuq chyáng lé lo bum akô nghut ri.

³¹ Haú u lé, Yhâng é chángzô pé gi, Yhang lé, "Rabai é, zoshuq zo aq." ga chóm tai akô.

³² Haú hkún, Yang gi, yangmoq lé, "Nungmoq a sé é jung zoshuq zo rá Ngò wó lhê." ga tú tai ri.

³³ Haú mù, Yhâng é chángzô pé gi, "Yhang lé, rayuq yuq eq zoshuq lé dé byí é abe?" ga, rayuq eq rayuq tai lhúm bum akô.

³⁴ Haú hkún, Yesuq tai é gi, "Ngo lé nhang kat Sú ô nau é hkyô lé kut rá eq Yhâng é muzó jizó lé lhoq pán rá hkyô gi, Ngá é zoshuq nghut bê. ³⁵ Kyôshu yoq jé rá gi, lhamó myi hkyap rá ashí." ga, nungmoq lhaq tai lhê a nghut kó lhu? Ngò, nungmoq

* 4:6 Nyí-káng raxe í hkyíng gi, Yudaq byu pé é hkyuq hkyíng nghut ri. † 4:22 Bun zo shí má, Yesuq tai nau é gi, hkyi yú hkyô lé, Garai Gasang gi, Yudaq byu pé dông danggidíq byi to é nghut é lé tai nau é nghut ri.

lé tai kôlé, nungmoq é myoq hpóng luí, haú yò pé má wú kat wú keq! Kyôshi gi, myhíng luí, kyô shu yoq gi, jé to bê nghut ri. ³⁶ Haú kyô hkyó sù eq kyô shu sù gi, rahá wó gabú kó sháng gaq ga, ahkuí lhang, haú kyô shu sù gi, yhang é zuihpau lé myang yù luí, ahtum abyuq é asak é matú, kyôshi shù tsíng to bê nghut ri. ³⁷ Haú su mù, 'Rayuq gi, sân hkyó, góyuq gi, shù yù.' gá é sanghkyang gi, têng ri. ³⁸ Nungmoq a zui sai tô é jang mâ é shù yù rá matú, nungmoq lé Ngò nhang kat bê nghut lhê. Góbang gi, haú má wum kat zui sai to bê nghut mù, nungmoq gi, haú bang zui sai é akýú lé shu yù bekô nghut ri." gá ri.

Samariq Byù Myo Myo Lumjǐng Kô É Hkyô

³⁹ "Yhang gi, ngò kut lai lò bê hkyô lhunglhang lé, tai kyô ri." ga luí, myiwe myhí haú saksé hkâm é yanmai, haú wá má é Samariq byù myo myo gi, Yesuq lé lumjǐng bùm bekô nghut ri. ⁴⁰ Haú mù, Samariq byu pé gi, Yesuq chyáng lé jé kômù, yhangmoq eq nyi rá matú, Yhang lé lung kô é yanmai, Yhang gi, í nyi bo nyi bê nghut ri. ⁴¹ Yhang é dang pé é yanmai, byù myo myo gi, lumjǐng bang dut jat lò bekô nghut ri.

⁴² Yhangmoq gi, myiwe myhí haú lé, "Ahkuí, ngamoq lumjǐng é gi, nang tai é dang yanmai za a nghut lo; ngamoq yhang wó gyo bê nghut é htoq agó, shí yuq gi, gè gè yhang, mingkan é hkyi yù Sù nghut é lé, ngamoq sé bê nghut é yanmai nghut lhê." ga chòm tai akò nghut ri.

Mingsuwún Hpó É Yhangzo Lé Lhoq Gê Byí É Hkyô

Mht 8:5-13; Luk 7:1-10

⁴³ Í nyi lai jáng, Yesuq gi, haú mai Galile mau shut htoq e lò bê nghut ri. ⁴⁴ "Myiqttoi gi, yhumings é mau má myoqdong a wó wú é nghut lhê." ga, Yesuq yhang saksé hkâm é nghut lhê. ⁴⁵ Yesuq gi, Galile mau má jé é hkún, Galile byu pé gi, Yhang lé lhom hkulum yu akò; yhangmoq gi, Yerusalem wá mó má, Lhoqlhai Poí é lòm kô é nghut é yanmai, poi u lé, Yesuq kut é hkyô lhunglhang lé, myàng kô é bang nghut ri.

⁴⁶ Yesuq gi, Yhang mai haú wui lé tsibyiq wing dut nhang é, Galile mau má é Hkanaq wá mó má, é dum kùm ri. Haú ming suwún rayuq é yhangzo yuqzo gi, Kaperna-um wá má no nyi ri. ⁴⁷ Yesuq gi, Yuda mau mai Galile mau má jé lé bê gá é hkyô lé, ming suwún haú wó gyo jáng, yhang gi, Yesuq chyáng é mù, shí-nò no nyi é yhangzo lé, lé lhoq gê byi rá matú, Yhang lé dúng tóngbán ri.

⁴⁸ Haú hkún, Yesuq gi, yhang lé, "Byù nungmoq gi, limik kumlhá pé eq mauhpo

muzó pé lé za a myàng kô é nghut le gi, hkâ-nhám lé lumjǐng kô rá a nghut." ga tai ri.

⁴⁹ Mingsuwún haú gi, "Yhumings é, ngá zo a shí shimá gyó lé laq." ga tai ri.

⁵⁰ Haú hkún, Yesuq gi, "Nàng wó lò bê; nung zo byùn rá nghut lhê." ga tú tai ri.

Suwún haú gi, Yesuq tai é dang haú lé gyó jǐng luí, tau lò bê nghut ri. ⁵¹ Yhang gi, hkyô má ru nghut nyi ashí hkún, yhang é dui-nhang zoshâng wui gi, yhang lé lé hui luí, zoshâng haú gè byuq é hkyô, lé tai kyô akò nghut ri. ⁵² Yhang gi, yhang zo hkâ-nhám gè byuq é ahkyíng lé myi wú é hkún, yhangmoq gi, "A-nyí nap nyí hkyuí rahkyíng má, gùng nyé é chám lò byuq bê nghut ri." ga tai kyô akò.

⁵³ Haú hkún, ahkyíng haú gi, "Nung zo byùn rá nghut lhê." ga, yhang lé, Yesuq tai é ahkyíng nghut é lé, haú yhangwa bùm sé bê nghut ri. Haú mù, yhang eq yhang yhumbyù banshoq bang gi, lumjǐng bekô nghut ri.

⁵⁴ Haú gi, Yesuq, Yuda mau mai Galile mau má lé jé é htàng, í dâm nghù rá dá kut shit é limik kumlhá nghut ri.

5

Wuihtum Yàm Má, Nòhpyo Lhoq Gê Byí É Hkyô

¹ Hau htàng a myáng má, Yudaq byu pé é poi ralhum joq é yanmai, Yesuq gi, Yerusalem wá mó má doq lò ri. ² Ahkuí, haú Yerusalem wá mó é Sau Hkúmdong nám má, Hebre myíng dong gi, Betzahta ga myhíng é wuihtum ralhum joq ri; hau é lhinghkyuq má, jirop ngo lhum joq tô ri. ³ Jirop haú pé má, myoqjit bang, hkyi hten bang, gùngjum shí bang ajùm ayò leq tô bum akò. (Hau bang gi, wui dui nún rá lé láng tô é bang nghut akò.

⁴ Hkásu mù gá le, haú Yhumings é maumang lagyo gyó lé lé kut mù, wui lé, lé lhu nhún jáng, wuihtum haú má hí wó wang é sù gi, hái jung ana wa dap to kólhang, ge byuq é huí é yanmai nghut ri.)* ⁵ Sùm xe shit zân tup no nyi é byù rayuq lé, haú má bo to ri. ⁶ Yesuq gi, haú yuq no leq tô é lé myàng mù, haú su no nyi é gyai myàng bê nghut é hkyô lé sé jáng, yhang lé, "Nàng, gè nau ri lúh?" ga myí ri.

⁷ Nò sù haú yuq gi, "Yhumings é, wui dui nún lo é hkún, wuihtum má wàng rá matú, ngo lé garúm rá byù ó a nyi; ngò wàng rá nghù jáng, góyuq hí, ngá hí má wàng wàng dut ri." ga tú tai ri.

⁸ Hau htàng, Yesuq gi, yhang lé, "Toq aq! Náng é taphkang yu chùng luí, sò lò aq." ga tai ri. ⁹ Haú yuq gi, radá dâm nò ge byuq bê nghut luí, yhang é taphkang yù mù, sò lò bê nghut ri.

* 5:4 Bun zo 3 lhum má é ahtang túm eq bun zo 4 lhum gi, chyúmding myo myo má a bo é nghut lhê.

Haú nyí gi, Bánno buinyi nghut ri. ¹⁰ Haú mù, Yudaq byu pé gi, haú nò ge byuq é hui sù lé, "Hkû-nyí gi, Bánno buinyi nyí nghut é yanmai, nàng, taphkang waq é gi, tará lu lai bê nghut ri." ga taí akò.

¹¹ Nghut kôlhàng, yhang tù taí é gi, "Haú ngo lé lhoq gê byi sù gi, ngo lé, 'Náng é taphkang yu chúng mù, só lo aq.' ga taí é nghut lhê." gâ ri.

¹² Haú mù, yhangmoq gi, "'Náng é taphkang yu chúng mù só lo aq.' ga, nang lé taí é sù gi, ó yuq wá nghut ri lú?" ga nyí akò.

¹³ Nghut kôlhàng, haú ó yuq nghut é lé, nò ge byuq é hui sù gi, a châng sê kat nghut ri; hkâsu mù gâ le, Yesuq gi, haú mà é byù moq mó má wang nyó ló byuq é yanmai nghut ri.

¹⁴ Htàng má, Yesuq gi, haú yuq lé noqkuq yhùm má myàng jàng, "Wú aq, nàng wángzán bê nghut ri; hí lhê htoq má je wuihke é hkyô a hui zo sháng gaq, mara hkâkut shut lo." ga lú, yhang lé taí ri. ¹⁵ Haú yuq gi, htoq ló mù, yhang lé lhoq gê byi é sù gi, Yesuq nghut ri ga, Yudaq byu pé lé taí kyô ri.

Asak Wó Yú Râ Hkyô

¹⁶ Haú mù, Yudaq byu pé gi, Bánno buinyi nyí má, Yesuq, haú hkyô kut é yanmai, Yhang lé gunjang lo akò nghut ri. ¹⁷ Haú hkûn, Yesuq gi, yhangmoq lé, "Ngá Wa gi, hkû-nyí jé shoq, hkâ-nhám le mù zui nyí é nghut mù, Ngò le mù zui nyí lhê." ga taí ri. ¹⁸ Haú mù lú, Yesuq gi, Bánno buinyi lé lhoq htên é htoq agó, Garai Gasang lé lhang, Yhang Wa ga wut é đông, yhumsing gùng lé, Garai Gasang eq lhoq whui é yanmai, Yudaq byu pé gi, Yhang lé sat pyám rà matú, je riyhang shikut lo akò nghut ri.

¹⁹ Yesuq, yhangmoq lé tù taí é gi, "Ngò, nungmoq lé teng za taí kôlé, haú Zo gi, yhumsing é myit đông haí le a wó kut; Yhang Wa kut é hkyô lé myang é gù za wó kut é nghut lhê; hkâsu mù gâ le, haú Íwa kut é hkyô lé za, haú Zo châng kut é yanmai nghut lhê.

²⁰ Hkâsu mù gâ le, haú Íwa gi, Zo lé chyitdap é nghut lú, Yhang kut é hkyô lhunglhang, haú Zo lé tún shit ri; nungmoq mau hông shoq, shí pé htoq je ko é hkyô pé lé lhang, haú Zo lé tún shit shirâ nghut lhê. ²¹ Haú Íwa gi, shí bê bang lé lhoq dui toq mù, yhangmoq lé asak byí é eq rajung za, haú Zo le, Yhang byí nau é bang lé, asak byí rà nghut lhê. ²² Hau htoq agó, haú Íwa lé hkunggá é eq rajung za, haú Zo lé le, lhunglhang bang hkungga kó sháng gaq ga, haú Íwa gi, ó yuq lé le a jéyáng e za, jéyáng é hkyô lhunglhang, haú Zo lé lum to bê nghut ri. ²³ Haú Zo lé a hkunggá é sù gi, haú Yhang lé nhang kat é sù Íwa lé le, a hkunggá é sù nghut ri.

²⁴ Ngò, nungmoq lé teng za taí kôlé, Ngá dang lé gyo lú, Ngo lé nhang kat é Sù lé lumjáng é sù, ó yuq nghut kôlé, mara byí é a hui e za, ahtum abyuq é asak wó é nghut lhê; haú yuq gi, shí é mai lui lú, asak dui bê sù nghut ri. ²⁵ Ngò, nungmoq lé teng za taí kôlé, haú Garai Gasang é Yhangzô é htê lé, shí byuq bê bang wó gyo rà ahkying gi, jé lo nyí bê nghut ri; ahkuí lhang jé to bê nghut ri. Htê haú lé gyo é bang gi, asak dui kó rà nghut lhê. ²⁶ Hkâsu mù gâ le, Garai Gasang gi, Yhanggùng má yhang, asak bo é eq rajung za, Yhang Zo lé le, Yhanggùng má yhang, asak bò nhang é yanmai nghut ri. ²⁷ Hau htoq agó, Yhang gi, haú Byu Yhangzo nghut é yanmai, Garai Gasang gi, tará jéyáng rà ahko ahkáng, Yhang lé byi bê nghut ri.

²⁸ Shí hkyô lé hkâ-mau hong nyí kó: lup pé má lúng tô é bang banshoq gi, Yhang é htê lé wó gyo kôluí, htoq ló rà ahkying jé lò rà nghut lhê. ²⁹ Ge é hkyô kut é bang gi, asak dui rà matú, dui toq kó rà nghut lhê; agé ashop hkyô kut é bang gi, mara byí é hui zo rà matú, dui toq kó rà nghut lhê. ³⁰ Ngò gi, Ngá myit đông mai haí le a wó kut é nghut lhê; Ngò wó gyo yu é eq rajung za sheq, jéyáng é nghut lú, Ngò jéyáng é hkyô gi, tengmán lhê; hkâsu mù gâ le, Ngò gi, Ngò ô nau é đông châng é a nghut e za, Ngo lé nhang kat é Sù ô nau é đông châng é sheq ru nghut lhê.

Yesuq Eq Séng Lú, Saksé Hkâm É Hkyô

³¹ Ngá gùng lé ngò saksé hkâm é nghut jàng, ngò za saksé hkâm é hkyô gi, teng rà a nghut. ³² Ngá é hkyô lé saksé hkâm byí é Sù (Ngá Wa) góyuq nyí lhê; Ngò eq séng lú, haú yuq hkâm é saksé gi, têng é hkyô lé, Ngò sé lhê.

³³ Nungmoq gi, Yohan† chyáng byù nhang kat wú bekò nghut ri; yhang gi, haú tengmán hkyô lé saksé hkâm byí bê nghut lhê. ³⁴ Ngò gi, xângzo byu pé mai saksé hkâm byí rà lé, ra lú a nghut, nghut kôlhàng, nungmoq hkyi yu é wó hui rà matú sheq, haú su ngù taí é ru nghut lhê. ³⁵ Yohan gi, duq nyí é myibung su duqbó byí é nghut mù lú, nungmoq gi, haú duqbó é hkaú má, rayoq zo ngón nau nyí akò nghut ri.

³⁶ Nghut kôlhàng, Ngò wó é saksé gi, Yohan byí é saksé htoq je kô lhê; hkâsu mù gâ le, ahkuí Ngò zui saí nyí é muzó gi, Ngò lhoq pán rà matú, haú Íwa, Ngo lé ap byí tô é nghut lú, haú Íwa, Ngo lé nhang kat é hkyô lé, saksé hkâm byí nyí ri. ³⁷ Hau htoq agó, haú Ngo lé nhang kat é sù Íwa le, Ngò eq séng lú saksé hkâm byí ri; nungmoq gi, Yhang é htê lé le, a wó gyo wú kó; Yhang é gunghkyáng lé le, a myang wú kó; ³⁸ haú Yhang é mungdang le, nungmoq chyáng a

† 5:33 Yohan shí yuq gi, Wui-myhup Sará Yohan nghut lhê.

bò kó nghut ri; hkâsu mù gâ le, nungmoq gi, Yhang nhang kat é Sù lé a lumjǐng kô é yanmai nghut ri. ³⁹ Nungmoq gi, haù Chyúmdang mai ahtum abyuq é asak wó yú rá nghut lhê ga myit yù kô é yanmai, haù Chyúmdang má hò wú akô nghut ri; nghut kôlhang, Chyúmdang haù gi, Ngò eq séng luí saksé hkám byí ri; ⁴⁰ nghut kôlhang, asak wó yú rá matú, nungmoq gi, Ngá chyáng a kâm lé kó nghut ri.

⁴¹ Ngò gi, byu eq hkyá-ôn é lé a lhom yu é nghut lhê. ⁴² Nghut kôlhang, nungmoq lé gi, Ngò sê lhê; nungmoq é i-myit hkaù má, Garai Gasang lé chyitdap é myit a bò kó nghut ri. ⁴³ Ngò gi, Ngá Wá é mying mai jé lé é sù nghut kôlhang, nungmoq gi, Ngo lé a lhom hap yù kó; yhang mying yhang lang é byù, gotú rayuq jé lé é ru nghut le gi, haù yuq lé, nungmoq lhom hap yù kó rá nghut lhê. ⁴⁴ Nungmoq gi, rayuq eq rayuq hkyá-ôn lhum é lé za hap yù luí, rayuq za nghut é Garai Gasang chyáng mai lo é hkyá-ôn hkyô lé gi, a hò kô é bang nhing, hkâsu kut wó lumjǐng kó rá lúh?

⁴⁵ Nghut kôlhang, haù Íwá é hí má, Ngò, nungmoq lé mara hún nhò hkâ-ngâm kó; nungmoq lé mara hun é sù gi, haù nungmoq mai myit myoqbyu tò é Mosheq ri nghut lhê. ⁴⁶ Mosheq lé nungmoq gè gè yhang lumjǐng kô é ru nghut le gi, Ngo lé le lumjǐng kó rá nghut lhê; hkâsu mù gâ le, Mosheq gi, Ngá é hkyô lé kâ tò é sù nghut ri. ⁴⁷ Nghut kôlhang, nungmoq gi, yhang kâ tò é pé lé lhang a lumjǐng kô é nhing, Ngá dang lé, hkâsu kut wó lumjǐng kó rá lúh?" gâ ri.

6

Byù Ngo Hkyǐng Lé Zoshuq Byi Tsô É Hkyô

Mht 14:13-21; Mrk 6:30-44; Luk 9:10-17

¹ Hau htàng a myáng má, Yesuq gi, Tiberi nhông le gâ é, Galilê nhông he hpoq shut gú dap ló bê nghut ri. ² Haù hkún, byu ajùm ayò gi, haù nò bang htoq má, Yhang kut shít é limik kumlhá pé lé myàng kô é yanmai, Yhang htàng châng e ló bum akô nghut ri. ³ Yesuq gi, bùm shut doq ló mù, Yhâng é chángzò pé eq rahá zung tò ri. ⁴ Yudaq byu pé é Lhoqlhai Poi gi, chyáng lo nyi bê nghut ri.

⁵ Yesuq gi, tu wú kat le, byu ajùm ayò Yhâng shut lé lo bùm kô é lé byu-myang kat luí, Hpilip lé, "Shí bang zo rá muk, ngan-húng, hkámá é wó wuí rá lúh?" ga tai ri. ⁶ Yesuq, haù su ga tai é gi, yhang lé chyam wú rá matú za nghut ri; hkâsu mù gâ le, hkâsu kut rá hkyô gi, Yhâng é myit má bo to gù bê nghut ri.

⁷ Hpilip gi, Yhang lé, "Denari* í sho eq muk wui le lhang, rayuq ratsuí tsuí ngap rá a nghut." ga tú tai ri.

⁸ Haù hkún, Yhâng é chángzo nghut é, Simun Petruq é yhanggu Andre gi, Yhang lé, ⁹ "Muk-yo muk ngo long eq ngozi í du wó é yuqgè zo rayuq, shí má nyi ri; nghut kôlhang, byù shí myhò bang lé luq shoq, hkâsu kut wó gám byi rá lúh?" ga tai htoq kat ri.

¹⁰ Yesuq gi, "Haù shiwa byu pé lé, zùng nhang keq." ga tai ri. Jowò haù gi, mhn htu é jang nghut mù, yuqgè wui baù lhang, ngo hkyǐng kô zung tò bùm bekò nghut ri; ¹¹ hau htàng, Yesuq gi, muk long pé lé yù mù, jeju hkyá-on luí, zung tò é bang lé, yhangmoq o é myhó tsing gám byí ri. Haù eq rajung za, ngozo lé le haù su kut ri.

¹² Yhangmoq banshoq bang zô gyí bùm kô é htàng má Yhang gi, Yhâng é chángzò pé lé, "Myit gyó tò é ajap azo pé lé châng guq tsing yù keq. Hai le a langsa pyám sháng gaq." ga tai ri. ¹³ Haù mù, yhangmoq gi, zô myhit tò é muk-yo muk ngo long má é ajap azo pé lé châng guq tsing le, raxe í mung bying shoq wó guq tsing yu akô nghut ri.

¹⁴ Haù shiwa byu pé gi, Yesuq kut é limik kumlhá lé myàng kô é hkún, "Shí yuq gi, mingkan htoq má jé lé lô rá gâ é, My-ightoí yhang nghut ri-nhung!" ga tai bum akô. ¹⁵ Yesuq gi, yhangmoq lé mù, Yhang lé hkohkâm zik kut nhang kó rá dà é hkyô lé, sê é yanmai, Yhang baù tsik za bùm shut dum haq doq ló bê nghut ri.

Yesuq, Wui Htoq Má Sô É Hkyô

Mht 14:22-27; Mrk 6:45-52

¹⁶ Buigyum htàng, Yhâng é chángzò pé gi, haù nhông shut gyó ló mù, ¹⁷ lhai má wang jì luí, nhông hé hpoq má é Kaperna-um wá shut gú e ló akô; haù hkún, mauchut bê nghut kôlhang, Yesuq gi, yhangmoq chyáng a jé gyó lo shí nghut ri. ¹⁸ Haù u lé, laidun htan lo é yanmai, wuilhêng toq ló bê nghut ri. ¹⁹ Yhangmoq gi, sum myi déng kô lhai kôn e ló kô é hkún, Yesuq gi, nhông htoq má so luí, haù lhai shut chyáng lé lo nyi é lé myàng kômù, gyuq dan bùm bekò nghut ri. ²⁰ Nghut kôlhang, Yesuq gi, "Hkâgyuq kó, Ngò ru nghut lhê." ga yhangmoq lé tai ri. ²¹ Haù mù, yhangmoq gi, Yesuq lé gabú myit eq lhai hkaù má shuí hâng yù nau akô. Haù hkún, lhai haù gi, radá dâm yhangmoq jé nau é jang wuiyam má jé bê nghut ri.

²² Nhông hé hpoq má nyi tò é byù moq mó gi, haù má lhai racham za joq lai lo é hkyô eq, lhai haù má Yesuq a bo doq jì e za, chángzò pé baù jì htoq ló kô é hkyô lé, hau htàng nyi, bùn sê kat akô nghut ri. ²³ Haù hkún, haù Yhumsing, jeju hkyá-ôn é htàng, byu pé muk zô é jowò nàm má, Tiberi myuq

* 6:7 Denari rachat gi, byù rayuq é ra-nyí é zuihpau eq wui é nghut lhê.

má é lhai pé jé lé bum ri. ²⁴ Haú byù moq mó gi, Yesuq eq Yhâng é chângzô pé, haú má a nyi lo kô é hkyô lé sé kô é yanmai, Yesuq lé châng hô rá matú lhai haú pé má wang ji mù, Kaperna-um wà shut e ló akô nghut ri.

Yesuq, Asak Muk Nghut É Hkyô

²⁵ Yhangmoq gi, nhông hé hpoq má Yesuq lé myâng kôjáng, "Rabai ê, Nang gi, shí má hkâ-nhám jé lé é lú?" ga, Yhang lé myí akô.

²⁶ Haú hkûn, Yesuq gi, "Ngò, nungmoq lé teng za taí kôlé, nungmoq gi, limik kumlhá pé lé myâng kô é yanmai, Ngo lé hô kô é a nghut, muk gyi shoq myâng zo kô é yanmai sheq, hô kô é ru nghut lhê. ²⁷ Htên byuq sê é zoshuq é matú, hkâshikut kó; haú Byu Yhangzo byi rá nghut é ahtum abyuq é asak é matú, ru gíng nyi é zoshuq wó yú rá lé sheq shikut nyi keq. Yhâng chyáng gi, haú Íwa Garai Gasang mai Yhâng é saksé dizik tap to bé nghut lhê." ga tù taí ri.

²⁸ Haú mù, yhangmoq gi, "Garai Gasang ô nau é muzó pé zui sai rá matú, ngamoq hai kut ra rá lú?" ga Yhang lé myí akô.

²⁹ Haú hkûn, Yesuq gi, "Garai Gasang nhang kat é Sù lé, lumjǐng é gi, Garai Gasang ô nau é muzó nghut bé." ga tù taí ri.

³⁰ Haú mù luí, yhangmoq gi, Yhang lé, "Ngamoq myoq eq wó myâng luí, Nang lé lumjǐng rá matú, Nang, hai jung limik kumlhá kut shit rá lú? Nang, hai jung kut shit rá lú?" ³¹ Haú Chyúmdang má, "Yhang gi, yhangmoq zo rá matú, mauhkúng mai muk byí ri." ³² ga kâ tô é eq rajung za, ngamoq é ichyí íwa pé gi, haú yoso hkaú má mannaq muk zo bekô nghut lhê." ga taí akô.

³² Haú hkûn, Yesuq gi, yhangmoq lé, "Ngò, nungmoq lé teng za taí kôlé, nungmoq lé mauhkúng mai muk byí é Sù gi, Mosheq a nghut, haú Ngá Wa sheq, nungmoq lé mauhkúng mai tengmán é muk byí é Sù ru nghut lhê. ³³ Hkâsu mù gà le, Garai Gasang byí é muk gi, mauhkúng mai gyó lé luí, haú mingkan lé asak byí é Sù nghut lhê." ga taí ri.

³⁴ Yhangmoq gi, "Yhumsing ê, ahkuí mai, ngamoq lé muk haú hkâ-nhám le byí nyi laq." ga chôm taí bum akô.

³⁵ Haú mù, Yesuq taí kyô é gi, "Ngò gi, asak muk nghut lhê. Ngá chyáng lé é sù gi, hkâ-nhám le zômút é hui rá a nghut; Ngo lé lumjǐng é sù le, hkâ-nhám le wushit é hui rá a nghut. ³⁶ Nghut kôlháng, Ngò, nungmoq lé tai wú bé eq rajung za, nungmoq gi, Ngo lé myang wú é nghut kôlháng, a lumjǐng shi kó nghut ri. ³⁷ Haú Íwa mai Ngo lé ap byí tô é byù lhunglháng bang gi, Ngá chyáng lé kó rá nghut luí, Ngá chyáng lé é sù ó yuq lé le, Ngò gi, hkâ-nhám lé hkat htoq pyám rá a nghut. ³⁸ Hkâsu mù gà le, Ngò, mauhkúng

mai gyó lé é gi, Ngò ô nau é hkyô lé kut rá matú a nghut e za, Ngo lé nhang kat Sù ô nau é hkyô lé kut rá matú ru nghut lhê. ³⁹ Haú Ngo lé nhang kat Sù ô nau é hkyô gi, Yhang mai Ngo lé ap byí tô é bang má é rayuq lé lhang, Ngò, a lhoq hpyuq pyám e za, jìhtùm buinyi má yhangmoq lé dum lhoq dui toq yú rá matú ru nghut lhê. ⁴⁰ Hkâsu mù gà le, Ngá Wa ô nau é hkyô gi, haú Zo lé wú mù, Yhang lé lumjǐng é sù yuq hkangmó, ahtum abyuq é asak lé wó yú rá matú nghut lhê; Ngò le, jìhtùm buinyi má haú bang lé lhoq dui toq rá nghut lhê." ga ri.

⁴¹ Haú mù, "Ngò gi, mauhkúng mai gyó lé é muk nghut lhê." ga, Yesuq taí é yanmai, Yhang eq séng luí, Yudaq byu pé taí put kô é gi, ⁴² "Shí yuq gi, Yosep é yhangzo Yesuq a nghut lhi? Yhâng nu Yhâng wa lé, nga-nhúng sê lhê a nghut kó lú? Haú sù é nhing, ahkuí, 'Ngò gi, mauhkúng mai gyó lé é nghut lhê.' ga, Yhang hkâsu kut wó taí lhê lú?" ga bum akô.

⁴³ Haú hkûn, Yesuq gi, "Nungmoq ahkaú má hkâtaí put nyi kó. ⁴⁴ Haú Ngo lé nhang kat é sù Íwa mai shuí jé é sù za a nghut jáng, ó yuq le Ngá chyáng wó jé rá a nghut; jé lé é sù lé gi, jìhtùm buinyi má, Ngò lhoq dui toq rá nghut lhê. ⁴⁵ Myiqhtoi laiká pé má, 'Yhangmoq lhunglháng bang gi, Garai Gasang é eq mhoq byí é hui kó rá nghut lhê.' ⁴⁶ ga kâ tô é eq rajung za, haú Íwa chyáng mai gyo yú, mhoq yu é bang yuq hkangmó gi, Ngá chyáng lé kó rá nghut lhê. ⁴⁶ Haú gi, rayuq yuq mai, haú Íwa lé myang wú bé nghut nau é a nghut; Garai Gasang chyáng má é Sù za sheq, haú Íwa lé myang wú é Sù nghut lhê. ⁴⁷ Ngò, nungmoq lé teng za taí kôlé, lumjǐng é sù gi, ahtum abyuq é asak wó lhê. ⁴⁸ Ngò gi, asak muk nghut lhê. ⁴⁹ Nungmoq é ichyí íwa pé gi, haú yoso hkaú má mannaq muk zo bekô nghut lhê; nghut kôlé, shi byuq bekô nghut ri. ⁵⁰ Nghut kôlháng, shi gi, mauhkúng mai gyó lé lo é muk nghut lhê; haú lé zô é sù gi, a shi lo rá nghut lhê. ⁵¹ Ngò gi, mauhkúng mai gyó lé lo é, haú asak dui é muk nghut lhê; rayuq yuq, muk shí lé zô é nghut le gi, ahtum abyuq dui nyi rá nghut lhê; muk shí gi, mingkan zô wui é asak matú, Ngò byi rá nghut é Ngá gungsho nghut lhê." ga tù taí ri.

⁵² Haú mù, haú Yudaq byu pé gi, "Byù shí yuq gi, nga-nhúng lé, Yhâng é gungsho hkâsu kut wó byi tso rá lú?" ga, yhangmoq yhangchang dang htǐng htǐng lhum bum akô.

⁵³ Haú hkûn, Yesuq gi, yhangmoq lé, "Ngò, nungmoq lé teng za taí kôlé, haú Byu Yhangzô é gungsho lé zô é eq Yhâng é sui lé shuq e za a nghut le gi, nungmoq asak wó kó rá a nghut. ⁵⁴ Ngá é gungsho lé zô é eq Ngá é sui lé shuq é sù, ó yuq nghut kôlé, ahtum

abyuq é asak wó é nghut lhê; Ngò gi, jìhtùm buinyi má, háu yuq lé lhoq dui toq yù rá nghut lhê. ⁵⁵ Hkâsu mù gà le, Ngá é gungsho gi, zojung yhang nghut lhê; Ngá é sui gi, shuqjung yhang nghut lhê. ⁵⁶ Ngá é gungsho lé zô é eq Ngá é sui shuq é sù, ó yuq nghut kôle, Ngò má nghut nyí luí, Ngò le háu yuq má nghut nyí bê nghut lhê. ⁵⁷ Háu rù dui nyi é Íwa gi, Ngo lé nhang kat luí, Ngò gi, háu Íwá é yanmai, dui nyi é eq rajung za, Ngá é gungsho lé zô é sù gi, Ngá é yanmai, dui nyi rá nghut lhê. ⁵⁸ Shí gi, mauhkung mai gyó lé lo é muk nghut lhê. Nungmoq é íchyí íwá pé gi, mannaq muk zo kôle, shí byuq bekò nghut ri; nghut kôlháng, muk shí lé zô é sù gi, ahtum abyuq dui nyi rá nghut lhê." ga tái ri. ⁵⁹ Dang háu pé gi, Yesuq, Kaperna-um wà má é tarajong má mhoqshit nyi é u lé, tái é dang nghut ri.

Chángzô Pé Myo Myo, Yesuq Lé Kâng Pyám To Kó É Hkyô

⁶⁰ Yhâng é chángzô pé myo myo gi, háu lé wó gyo kôjáng, "Dang shí gi, gyai wui ri. Ó yuq wá wó cháng rá lú?" ga tái bum akò.

⁶¹ Yesuq gi, háu eq séng luí, Yhâng é chángzô pé tái put nyi bùm kô é lé Yhâng é myit má sé luí, yhangmoq lé, "Dang shí é yanmai, nungmoq myit htên bum akò lú?"

⁶² Háu Byu Yhangzo gi, Yhang nyi lai lò bê jowò shut tau doq ló é lé, nungmoq myàng kô é nghut le gi, hkâsu nghù kó rá lú?" ⁶³ Háu Woi-nyí gi, asak byí lhê; gungsho kúm gi, hái le a wó dut nghut ri. Nungmoq lé, Ngò tái é dang pé gi, Woi-nyí le nghut lhê, asak le nghut lhê. ⁶⁴ Nghut kôle, nungmoq chyáng má é ra-am gi, a lumjúng kó nghut ri." ga tái ri. Hkâsu mù gà le, ó pé gi, a lumjúng kó rá eq, ó yuq gi, Yhang lé ap pyám rá nghut é hkyô lé, Yesuq gi, sâng-hi mai sé to gù bê nghut ri.

⁶⁵ Yhang xoq tái é gi, "Háu su mù, háu Íwá èq ahkáng byí é sù za a nghut le gi, ó yuq le Ngá chyáng wó lé rá a nghut nghù, Ngò, nungmoq lé tái kyo wú bê nghut lhê." gà ri.

⁶⁶ Háu dàm mai, Yhâng é chángzô pé myo myo gi, Yhâng htáng a cháng lo kó e za, tái lò byuq bùm bekò nghut ri.

⁶⁷ Háu su mù, Yesuq gi, háu chángzo raxe í yuq lé, "Nungmoq le, lò byuq nau akò, a nghut lú?" ga myí ri.

⁶⁸ Háu hkún, Simun Petruq gi, "Yhumsíng é, Nang gi, ahtum abyuq é asak mungdang wó Sù nghut to bê lé nhing, ngamoq gi, ó yuq chyáng é shirá lú?" ⁶⁹ Nang gi, Garai Gasâng é Choyoyúng Sù nghut é lé, ngamoq, lumjúng lhê, sé nyi lhê." ga, Yhang lé tái tái ri.

⁷⁰ Háu hkún, Yesuq gi, "Nungmoq raxe í yuq lé, Ngò hkyin yù bê a nghut kó lú?" Nghut kôle, nungmoq má é rayuq gi, nat nghut ri." ga tái tái ri. ⁷¹ (Yhang gi, háu Simun Iskarut é yhangzo, Yudaq lé tái nau

é nghut ri; háu yuq gi, chángzo raxe í yuq má bò sù nghut kôle, htàng má, Yhang lé ap pyám rá sù nghut ri.)

7

Yesuq Eq Yhâng É Gumang Wui

¹ Háu htàng má, Yesuq gi, Yhang lé sat rá matú, Yudaq byu pé ho nyi bùm kô é yanmai, Yuda mau má a kâm sô wún mù, Galile mau má sô lhing wún ri. ² Nghut kôlháng, háu Yudaq byu pé é Saksé Zúm Póí chyâng lo nyi é hkún, ³ Yesuq é yhanggu yuqzô pé gi, Yhang lé, "Náng é chángzô pé gi, Nang kut é laklai kumlhá pé lé myàng kó sháng gaq, Nang, shí mai htoq ló luí, Yuda mau shut e ló aq. ⁴ Mying hu nau é sù gi, hkaú zaú luí hái le a kut wú é nghut lhê. Nang gi, háu pé lé kut nyi bê nghut é yanmai, mingkan lé, Nang gúng tún shit aq." ga tái akò. ⁵ Hkâsu mù gà le, yhanggu síng yuqzô pé lhang, Yhang lé a lumjúng kó nghut ri.

⁶ Háu mù luí, Yesuq gi, yhangmoq lé, "Ngá é ahkyíng gi, a jé shí nghut ri; nungmoq é ahkyíng kúm gi, hká hkún le joq nyi ri. ⁷ Háu mingkan gi, nungmoq lé a jú a wó kut kó nghut ri; nghut kôlháng, Nang lé gi, a jú kó; hái mù gà le, yhang kut é hkyô gi, agè ashop é nghut é lé, Ngò, saksé tún shit é yanmai nghut ri. ⁸ Nungmoq gi, pói háu shut doq ló keq. Ngò kúm gi, Ngá é ahkyíng a jé shí nghut é yanmai, pói háu shut a doq ló shirá nghut lhê." ga tái ri. ⁹ Háu su ga tái tái, Yhang gi, Galile mau má nyi gyó to bê nghut ri.

¹⁰ Nghut kôlháng, Yhang gu pé, háu pói shut doq ló byuq é htàng má, Yhang gi, de de a nghut é dòng, tsik za châng doq ló bê nghut ri. ¹¹ Yudaq byu pé gi, háu pói má, Yhang lé châng hô kômù, "Háu yuq gi, hkâmá nghut lhê lú?" ga, myi wún akò nghut ri.

¹² Háu byú hpùng hkaú má, Yhang eq séng luí tái lhum bùm kô é má, ra-am gi, "Yhang gi, byú gè nghut ri." ga tái kôjáng, ra-am gi, "A nghut, Yhang gi, byu pé lé hkyô shuí nghoq sù nghut ri." ga tái tái akò. ¹³ Nghut kôlháng, háu Yudaq suwún wui lé gyuq kô é yanmai, ó yuq le, Yhang eq séng é hkyô lé de de a wám tái kó nghut ri.

Háu Pói Má, Yesuq Mhoqshit É Hkyô

¹⁴ Háu pói rawui nghut ló é hkún, Yesuq gi, noqkuq yhùm má doq é luí, mhoqshit hí lò bê nghut ri. ¹⁵ Háu hkún, Yudaq byu pé gi, gyó mau byuq kômù, "Shí yuq gi, mhoq yu é hkyô le a joq wú é wá, háu-í hkâsu mù sé lhê laq?" ga myi bum akò.

¹⁶ Háu mù, Yesuq tái tái é gi, "Ngò mhoqshit é dang gi, Ngá é dang a nghut; Ngo lé nhang kat Su é dang ru nghut lhê. ¹⁷ Rayuq yuq, Garai Gasang ô nau é hkyô lé châng kut nau é nghut jáng, Ngò mhoqshit é dang gi, Garai Gasâng chyáng má é nghut a nghut é eq, Ngá é myit dòng tái é dang nghut a nghut

é lé, yhang sê gâm hkoq yû râ nghut lhê.
 18 Yhumsing é myit dông tai é sù gi, yhum-sing é matú aróng hô sù nghut ri; nghut kôlhâng, yhumsing lé nhang kat su é matú, aróng ho é sù gi, tengmán é byû nghut ri; yhang má, a tengmán é hkyô haí le a bô nghut ri. 19 Mosheq gi, nungmoq lé jep é tarâ byi to bê, a nghut kô lú? Nghut kôlhâng, nungmoq ó yuq le, jep é tarâ haú lé a cháng kô nghut ri. Haí mù luí, Ngo lé sat nau nyi akô lú?" gâ ri.

20 Haú hkûn, haú byû hpûng gi, "Nang gi, nat gang wang to sù nghut ri-nhung! Nang lé, ó yuq wá sat nau nyi ri lú?" ga tû tai akô.

21 Yesuq gi, yhangmoq lé, "Ngò, laklai kumlhá ralhum kut jáng, nungmoq ban-shoq bang gi, maú byuq bum akô. 22 Nghut kôlhâng, nungmoq gi, ahpyo-kuq hpyit byi é hkyô lé, Mosheq byi é nghut lhê ga luí. Bánno buinyi má, zoshâng lé ahpyo-kuq hpyit byi akô (gê gè ga jáng, ahpyo-kuq hpyit é hkyô gi, Mosheq chyáng mai lo é a nghut e za, íchyí iwá pé chyáng mai lo é ru nghut lhê.). 23 Haú, Mosheq é jep é tarâ lé a lhoq htên pyám shâng gaq nghú, Bánno buinyi má, zoshâng lé ahpyo-kuq hpyit byi é nghut le gi, haí mù luí, Bánno buinyi má, byû rayuq é gûng gón lé, Ngò lhoq gê byi é yanmai, Ngo lé nhikjum yô akô lú? 24 Byû du lé wú luí hkájéyáng kô; tengmán é dông sheq jéyáng keq." ga tai ri.

Yesuq Gi, Hkrisduq Nghut Lhê Lú?

25 Haú mù luí, Yerusalem wá mó má é byu pé ra-am gi, "Haú yhangmoq sat pyám nau nyi é sù gi, shí yuq a nghut lhi? 26 Yhang gi, shí má de de dâng nyo nyi le, yhangmoq gi, Yhang lé, haí le a ga kô myhi-nhung! Yhang gi, Hkrisduq nghut lhê ga, haú ahkáng ayá wó bang gi, gê gè yhang, sê akô abe? 27 Haú Hkrisduq jé lé é hkûn gi, Yhang hkâmái lé lo é lé, ó yuq háng sé rá a nghut." ga tai bum akô. Nghut kôlhâng, shí yuq gi, hkâmá é sù nghut é lé, nga-nhung sê lhê;

28 Haú mù, Yesuq gi, noqkuq yhûm wàng má mhqshít uchyang, htê mó èq tai kat é gi, "Nungmoq gi, Ngo lé sê é htoq agó, Ngò, hkâmái lé é sù nghut é lé le, sê akô nghut ri. Ngò gi, Ngá myit dông shí má lé nyi tô é sù a nghut kôlhâng, Ngo lé nhang kat é Sù gi, tengmán lhê; nungmoq gi, Yhang lé a sé kôlhâng, 29 Ngò gi, Yhang lé sê lhê; hkâsu mù gâ le, Ngò gi, Yhâng chyáng mai lé é sù eq Yhang mai nhang kat é sù nghut lhê." gâ ri.

30 Haú mù, yhangmoq gi, Yhang lé chyup rá dâ akô; nghut kôlhâng, Yhâng é ahkyíng a jé shi é yanmai, Yhang lé chyup rá matú, ó yuq le loq a jé kô nghut ri. 31 Nghut kôlhâng, byû hpûng hkaú má é bang myo myo gi, Yhang lé lumjíng bûm kôluí, "Haú Hkrisduq jé lé é hkûn, Yhang gi, shí yuq htoq má, limik kumlhá pé je wó kut shit rá lú?" ga tai bum akô nghut ri.

32 Haú Hparishe pé gi, haú byû hpûng hkaú má, Yesuq eq séng é hkyô lé, haú su ga dangsoq soq lhûm nyi kô é hkyô lé wó gyô yu akô. Haú mù, haú hkyangjong agyi pé eq Hparishe pé gi, Yhang lé é chyup rá matú, noqkuq yhûm zúng é bang lé nhang kat akô.

33 Haú hkûn, Yesuq gi, "Ngò gi, nungmoq eq rahá rayoq zo za nyi rá nghut lhê; hau htâng, Ngo lé nhang kat Su chyáng tai lo rá nghut lhê. 34 Haú hkûn, nungmoq gi, Ngo lé hô kôlhâng, myang hô kô rá a nghut; Ngò nyi é jang má, nungmoq wó jé kô rá a nghut." ga tai ri.

35 Hau é yanmai, Yudaq byu pé, rayuq eq rayuq tai lhum kô é gi, "Shí yuq gi, Yhang lé nga-nhung a myang hô loshoq, hká shut e byuq rá dá lhê lú? Yhang gi, Grik byu pé má nyi byo myín tô é nga-nhung é byu pé nyi é jowó má é mù, Grik byu pé lé, é mhqshít rá dá lhê lú? 36 'Nungmoq gi, Ngo lé hô kôlhâng, myang hô kô rá a nghut.' gâ é eq, 'Ngò nyi é jang má, nungmoq wó jé kô rá a nghut.' gâ é, Yhang tai é dang gi, haí jung wá ga nau é nghut lhê lú?" gâ akô.

37 Haú lô htâng é eq je ahkyak é Poí buinyi má, Yesuq toq yap luí, htê mó èq tai é gi, "Wui shit sù gi, Ngá chyáng lé mù, shuq shâng gaq. 38 Ngo lé lumjíng é sù ó yuq nghut kôle, haú Chyúmdang má tai tô é eq rajung za, Yhâng chyáng mai asak uchyâm é wuilàng yui htoq lô rá nhang lhê." gâ ri. 39 Yhang haú su gâ é gi, Yhang lé lumjíng é bang myang hap yû rá nghut é, haú Woi-nyí lé tai é nghut ri. Haú hkûn jé shoq, haú Woi-nyí lé a byi kat shi nghut ri. Hkâsu dù gâ le, Yesuq gi, hpungwup shingkan dan hû é a hui nhâng shi é yanmai nghut ri.

40 Yhâng é dang pé lé wó gyo kôjáng, ra-am gi, "Shí yuq gi, gê gè yhang, Myiqhtoi haú nghut ri." ga tai akô.

41 Ra-am gi, "Shí yuq gi, Hkrisduq nghut ri." ga tai akô. Gôbang nghut jáng, "Hkrisduq wá Galile mau mai htoq lé rá nghut lhê lú?

42 Haú Chyúmdang má, Hkrisduq gi, Dawiq é awut ashûn má é nghut luí, Dawiq nyi lai lo é Betlehem wá mai htoq lô rá nghut lhê gâ é, a nghut lú?" ga myí bum akô nghut ri.

43 Haú mù luí, Yesuq é yanmai, shiwa byu pé gi, gâm hkoq lò byuq beko nghut ri. 44 Ra-am gi, Yhang lé chyup yû nau bûm kôlhâng, Yhang lé loq a záng kô nghut ri.

Yudaq Byu Pé Lé Shuí U É Bang A Lumjíng Kô É Hkyô

45 Hau htâng má, haú noqkuq yhûm zúng bang gi, haú hkyangjong agyi pé eq Hparishe pé chyáng tai lo kô é hkûn, haú bang gi, yhangmoq lé, "Nungmoq, haí mù luí, Yhang lé a shuí lo kô é lú?" ga lhom myí akô.

⁴⁶ Haù hkùn, haù noqkuq yhùm zúng bang gi, "Shí yuq su ga tai é byù gi, ó le a nyi wú é nghut lhê." ga tai kyô akô.

⁴⁷ Haù mù, haù Hparishe pé gi, "Nungmoq lé le, Yhang eq mhoq hpyoq yù beko lúh? ⁴⁸ Haù zaù wui chyáng le, Hparishe pé chyáng le, Yhang lé lumjúng é byù bò akô lúh? ⁴⁹ A bò! Nghut kôlhang, haù jep é tarâ lé a sê é byù moq mó shí gi, nhing pyâm é hui beko nghut ri." ga nhik-yô é đông tú tai kat akô nghut ri.

⁵⁰ Nghut kôlhang, yhangmoq hpúng má bo é, hí hkùn Yesuq chyáng e wú bê sú nghut é, Nikodimu gi, ⁵¹ "Nga-nhúng é tarâ gi, byù rayuq lé, yhang é dang hí a gyô wú é eq, yhang hái kut é lé a sê e za, mara byi lhê lúh?" ga, yhangmoq lé myi ri.

⁵² Haù hkùn, yhangmoq gi, "Nàng le, Galile mau byù nghut lhê lúh? Galile mau mai myiqhtoi rayuq lhang a htoq é hkyô lé, nàng gon wú aq, haù jàng sé rà nghut lhê." ga tú tai akô.

⁵³ Hau htàng, yuq hkanmó gi, ó le ô yhùm shut taù ló byuq bùm beko nghut ri.*

8

Yesuq Lé, Lé Myi Chyam Wú Kô É Hkyô

¹ Yesuq kúm gi, Tsalun Bùm shut e ló bê nghut ri. ² Htang napykô napsùn noq le, Yesuq gi, noqkuq yhùm wàng hkaù má dum ê luí, byu pé lhunglhang gi, Yhàng é lhinghkyuq má lé zing bum akô; haù mù, Yhang gi, zung to luí, yhangmoq lé mhoqshit ri. ³ Haù hkùn, haù tarâ sará pé eq Hparishe pé gi, sulàng shut nyi é má myang chyup yu é su-myi rayuq lé shuí lé lô kômú, gung gung má shap to kôluí, ⁴ Yesuq lé, "Sarâ é, myiwe myhí shí lé, sulàng shut nyi é má myang chyup yu é nghut lhê. ⁵ Haù Mosheq é tarâ má gi, shí su é myiwe lé, luqgok eq dú sat pyám keq ga, nga-nhúng lé hkunmó hkyô tô ri. Ahkuí, Nàng gi, hkâsu nghú rà lúh?" ga myi akô. ⁶ Yhangmoq haù su ga myi é hkyô gi, Yhang lé mara wó hùn shoq ga, chyam wú rà matú nghut ri.

Nghut kôlhang, Yesuq gi, ngóm mù, myigùng má loqnyhuí eq htaù kâ nyi ri.

⁷ Yhang lé, yhangmoq ru jang myi nyi kô é hkùn, Yhang gi, yap nyhang kat mù, yhangmoq lé, "Nungmoq má é mara a wó é sú hí, myiwe myhí shí yuq lé luqgok eq dú sháng gaq." ga tai ri. ⁸ Hau htàng, Yhang gi, dum ngóm luí, myigùng má kâ nyi ri.

⁹ Yhangmoq gi, haù su gâ é lé wó gyo kôjáng, je mang bang mai hí luí, rayuq htàng rayuq ló byuq beko nghut luí, Yesuq baù za myit gyô tô é eq, myiwe myhí haù jàng yap nân tô ri. ¹⁰ Yesuq gi, yap nyhang kat luí, yhang lé, "Myiwe myhí ê, yhangmoq hká ló

bekô lúh? Ó yuq eq le, nàng lé mara a byi kô lúh?" ga myi ri.

¹¹ Yhang gi, "Yhumsing ê, ó yuq le mara a byi kô nghut ri." ga tú tai ri.

Haù hkùn, Yesuq gi, "Ngò le, nàng lé mara a byi, ló aq hkoí, ahkuí mai mara hkâdum kut shut lo." ga tai kat ri.

Yesuq, Mingkân É Maubó

¹² Yesuq gi, shiwa byu pé lé dum nyo é hkùn, "Ngò gi, mingkân é maubó nghut lhê; Ngá htàng châng é sú ó yuq nghut kôle, mauchut hkaù má hkâ-nhám le so rà a nghut, asak maubó lé wó rà nghut lhê." ga tai ri.

¹³ Haù mù, haù Hparishe pé gi, "Wú aq, Nàng gung Nàng saksé hkâm yu é nghut ri; Nàng é saksé gi, teng rà a nghut." ga tai akô.

¹⁴ Haù hkùn, Yesuq gi, "Ngá gung Ngò saksé hkâm kôlhang, Ngá é saksé gi, teng lhê; hkâsu mù gâ le, Ngò gi, Ngò hkâmai lé lo é eq Ngò hká shut e ló é lé, sê lhê. Nghut kôlhang, nungmoq gi, Ngò hkâmai lé lo é lé le, Ngò hká shut e ló é lé le, a sé kô nghut ri. ¹⁵ Nungmoq gi, byù hkyam đông za jéyáng akô; Ngò gi, ó yuq lé le a jéyáng é nghut lhê. ¹⁶ Nghut kôlhang, Ngò jéyáng é nghut jàng, Ngò jéyáng é hkyô gi, jô lhê; hkâsu mù gâ le, Ngò gi, Ngò baù a nghut, haù Ngo lé nhang kat é sú Iwa eq rahá nghut nyi lhê. ¹⁷ Haù nungmoq é tarâ má yhang le, í yuq mai hkâm é saksé gi, teng lhê ga kâ tô ri. ¹⁸ Ngò gi, Ngá é matú saksé hkâm yu sú nghut lhê; hau htoq agó, haù Ngo lé nhang kat é sú Iwa le, Ngá é matú saksé hkâm byi é nghut lhê." ga tú tai ri.

¹⁹ Haù mù, yhangmoq gi, Yhang lé, "Nàng Wa gi, hkâmá lúh?" ga myi kôjáng, Yhang gi, "Nungmoq gi, Ngo lé le, Ngá Wa lé le, a sé kô nghut ri; nungmoq, Ngo lé sé kô é nghut le gi, Ngá Wa lé le, sé kô rà nghut lhê." ga tú tai ri. ²⁰ Dang haù pé gi, haù noqkuq yhùm wàng hkaù lé é alu kat jang nàm má, Yhang mhoqshit nyi é u lé tai é dang nghut ri. Nghut kôlhang, Yhang lé, ó yuq le a chyup kô; hkâsu mù gâ le, Yhàng é ahkyíng a jé shí é yanmai nghut ri.

²¹ Haù mù luí, Yesuq gi, yhangmoq lé, "Ngò gi, ló byuq rà nghut lhê, haù hkùn, nungmoq Ngo lé hô kô rà, yhumsing é mara má le shí kô rà nghut lhê. Ngò ló é jang má, nungmoq wó jé kô rà a nghut." ga, radàm dum puq tai ri.

²² Hau é yanmai, haù Yudaq byu pé gi, "'Ngò ló é jang má, nungmoq wó jé kô rà a nghut.' gâ é gi, Yhànggung yhang sat shí rà gâ é nghut lhê lúh?" ga myi bum akô.

²³ Nghut kôlhang, Yesuq xoq tai é gi, "Nungmoq gi, a-ô mai lo é bang nghut akô; Ngò gi, ahtoq mai lé é sú nghut lhê. Nungmoq gi, mingkan shí eq sêng é bang nghut

* 7:53 Yohan Laiká 7:53 mai 8:11 jé shoq gi, chyúmding axau myo myo má a bo é nghut lhê.

akô; Ngò kúm gi, mingkan shí eq sêng é sù a nghut. ²⁴ Haú mù, nungmoq gi, yhumsing é mara má shí kó rà nghut lhê nghù, Ngò tai é nghut lhê. Ngò gi, haú Yuq nghut lhê nghù tai é lé, nungmoq a lumjǐng kô é nghut jǎng, nungmoq gi, gè gè yhang, yhumsing é mara má shí kó rà nghut lhê." gâ ri.

²⁵ Haú hkún, yhangmoq gi, "Nàng, ó yuq nghut lhê?" ga myi kôjǎng, Yesuq gi, "Ngò ó yuq nghut é lé, Ngò, hkâ-nhám le tai nyi bê nghut lhê. ²⁶ Ngò gi, nungmoq eq séng luí, tai rá hkyô eq jéyǎng rá hkyô, myo myo joq lhê. Nghut kôlhang, Ngo lé nhang kat é Sù gi, tengmán é Sù nghut lhê mù, Yhǎng chyǎng mai wó gyô yu é gù lé, Ngò, mingkan lé tai kyô lhê." ga tú tai ri.

²⁷ Yesuq gi, yhangmoq lé, Yhǎng Wa eq séng é hkyô tai kyô nyi é lé, yhangmoq gi, a sê gyo kó nghut ri. ²⁸ Haú mù luí, Yesuq gi, "Haú Byu Yhangzo lé nungmoq tu shap* kat é hkún sheq, Ngò gi, haú Yuq nghut é hkyô lé le, yhumsing myit dǒng hai le a kut e za, haú İwa mhoq byi é dǒng za tai é hkyô lé le, nungmoq sé kó rà nghut lhê. ²⁹ Haú Ngo lé nhang kat é Sù gi, Ngò eq rahá nghut nyi lhê; Ngò gi, hkâ-nhám le, Yhang lé myit ngón nhang é hkyô chyat kut é yanmai, Yhang gi, Ngo lé baú za a tô pyǎm to nghut ri." ga tai ri. ³⁰ Yhang, haú su tai nyi é u lé lhǎng, byu myo myo gi, Yhang lé lumjǐng bǐm bekó nghut ri.

Abraham É Awut Ashín Pê Hkyô

³¹ Haú mù, Yesuq gi, Yhang lé lumjǐng é Yudaq byu pé lé, "Ngò mhoqshit é hkyô lé chǎng kut nyi bekó nghut jǎng, nungmoq gi, gè gè yhang, Ngá é chǎngzô pé nghut bekó. ³² Nungmoq gi, haú tengmán hkyô lé sé kó rà nghut luí, haú tengmán hkyô gi, nungmoq lé hkyô lhut kat rá nghut lhê." ga tai ri.

³³ Haú hkún, yhangmoq gi, "Ngamoq gi, Abraham é awut ashín pé nghut luí, ó yuq é jùn le hkâ-nhám a dut wú é nghut lhê. Haú mù, 'nungmoq lé lhoq lhut kat rá' nghù Nàng hkásu kut wó tai lhê lhú?" ga tú tai akó.

³⁴ Yesuq dum tú tai é gi, "Ngò, nungmoq lé teng za tai kólé, mara kut shut é sù gi, mará é jùn nghut lhê. ³⁵ Jùn gi, yhǐm ikun eq hkâ-nhám le séng nyi rá a nghut; zo kúm gi, ikun eq ahtum abyuq séng lhê. ³⁶ Haú mù luí, haú Zo gi, nungmoq lé lhoq lhut kat é nghut jǎng, nungmoq gi, gè gè yhang, lut berá nghut lhê. ³⁷ Nungmoq gi, Abraham é awut ashín pé nghut é lé, Ngò sê lhê. Nghut kôlhang, nungmoq gi, Ngá é dang lé a lhom yu kô é yanmai, Ngo lé sat rá dà akó nghut ri. ³⁸ Ngò gi, Ngá Wǎ chyǎng mai myang yu é eq rajung za, nungmoq lé tai kyô nyi lhê; nungmoq le, nungmoq é İwa chyǎng mai wó gyô yu é eq rajung za kut nyi akó nghut ri." gâ ri.

³⁹ Haú hkún, yhangmoq gi, "Ngamoq é İwa gi, Abraham nghut lhê." ga tú tai kôjǎng, Yesuq gi, "Nungmoq, Abraham é yhangzô pé nghut é nghut le gi, Abraham kut é su kut kó rà nghut lhê. ⁴⁰ Nghut kôlhang, nungmoq gi, haú Garai Gasǎng chyǎng mai wó gyô yu é tengmán hkyô lé tai kyo sù nghut é Ngo lé, sat pyám nau akó nghut ri. Haú sù é hkyô gi, Abraham a kut é nghut lhê. ⁴¹ Nungmoq gi, nungmoq é İwa kut é muzó lé yhang, kut nyi akó." ga tai ri.

Haú hkún, yhangmoq gi, "Ngamoq gi, dezo amyú a nghut; ngamoq gi, İwa rayuq za wó lhê; haú gi, Garai Gasang nghut lhê." ga tai he akó nghut ri.

Zô Wui É A-kyang Gi, Mó Ó Nghut É Hkyô Shit

⁴² Yesuq gi, yhangmoq lé, "Garai Gasang gi, nungmoq é İwa nghut é nghut jǎng, nungmoq gi, Ngo lé chyitdap kó rá nghut lhê; hkásu mù gâ le, Ngò gi, Garai Gasǎng chyǎng mai lé jé luí, ahkuí, shí má nyi tô é nghut lhê. Ngò gi, Ngá myit dǒng lé lo é a nghut, Yhang sheq Ngo lé nhang kat é ru nghut lhê. ⁴³ Nungmoq gi, hai mù Ngá é dang lé a sê gyo kô é lhú gâ le, Ngò tai é dang lé, nungmoq a wó lhom yu kô é yanmai nghut ri. ⁴⁴ Nungmoq gi, haú nungmoq é İwa nghut é nat Tsadǎn eq séng é bang nghut luí, nungmoq é İwa ô nau é hkyô lé kut nau bum akó. Yhang gi, a-nham sǎng-hi mai byu sat sù nghut ri. Yhang má tengmán hkyô a bo é yanmai, yhang gi, haú tengmán hkyô má a yap gǐng nyi nghut ri. Yhang gi, mhaú é hkún, yhǎng é myit má bo é dǒng tai ri; hkásu mù gâ le, Yhang gi, byu mhaú nghut luí, mhaú hkyô pé é İwa nghut ri. ⁴⁵ Haú su mù, Ngò, nungmoq lé, haú tengmán hkyô tai kyô é yanmai, nungmoq gi, Ngo lé a lumjǐng kó nghut ri. ⁴⁶ Nungmoq má é ó yuq wá, Ngo lé mara bo lhê nghù saksé wó tún shit akó lhú? Ngò gi, haú tengmán hkyô lé tai nyi é nghut le nhǐng, nungmoq, Ngo lé hai mù a lumjǐng kô é lhú? ⁴⁷ Garai Gasang eq séng é sù gi, Garai Gasang tai é dang lé gyô lhê. Nungmoq a gyo kô é gi, nungmoq, Garai Gasang eq a séng kô é yanmai nghut ri." ga tai ri.

Yesuq Eq Abraham

⁴⁸ Haú hkún, haú Yudaq byu pé gi, Yhang lé, "Nàng gi, Samariq byu nghut é htoq agó, nat gang wang jǐng to sù nghut lhê nghù, ngamoq tai é dang gi, jô lhê a nghut lhú?" ga myi akó.

⁴⁹ Yesuq gi, "Ngò gi, nat gang wang jǐng é hui sù a nghut; Ngò gi, Ngá Wa lé sheq hkunggá é ru nghut lhê; nungmoq kúm gi, Ngo lé tai hpoí nyi akó nghut ri. ⁵⁰ Ngò gi, Ngá é matú aróng ho nyi é a nghut; nghut

* 8:28 Tu shap gâ é lichyúm gi, tapzǐng htoq má jén sat pyám rá gâ é nghut lhê.

kôlhang, hô byi Sû rayuq nyi lê, haú yuq jéyáng sháng gaq. ⁵¹ Ngò, nungmoq lé teng za tái kôlé, Ngá dang lé châng é sù gi, hká-nhám le, shí rá a nghut." ga tái ri.

⁵² Hau é yanmai, haú Yudaq byu pé gi, "Nàng gi, nat gang wang júng to sù nghut é lé, ahkuí, ngamoq sé bê! Abraham gi, shi byuq bê; haú myiqhtoí pé le, shi byuq bekô nghut ri; nghut kôlhang, Nàng gi, 'Ngá dang lé châng é sù gi, hká-nhám le, shí rá a nghut.' ga tái ri. ⁵³ Nàng gi, ngamoq é iwa Abraham htoq hkik lê lú? Yhang gi, shi byuq bê; haú myiqhtoí pé le, shi byuq bekô nghut ri. Nàng gúng nàng ó yuq su ngám lê lú?" ga tái akô.

⁵⁴ Yesuq gi, "Ngá gúng Ngò lhoq gyaú yu é nghut jáng, Ngá é aróng gi, hai hpaudap é a nghut; nghut kôlhang, haú nungmoq é Garai Gasang nghut lê ga nungmoq tái é sù, Ngá Wa gi, Ngo lé lhoq gyaú é sù ru nghut lê. ⁵⁵ Nungmoq gi, Yhang lé a sé kó nghut ri; nghut kôlhang, Ngò gi, sé lê. Yhang lé a sé ngúh Ngò tái é ru nghut le gi, Ngò le nungmoq su byù mhaú dut rá nghut lê; nghut kôlhang, Ngò gi, Yhang lé sé luí, Yhâng é dang gyo sù nghut lê. ⁵⁶ Nungmoq é iwa Abraham gi, Ngo lé rá buinyi lé myoqbyu gabú nyi é nghut luí, myàng mù, gabú bê nghut ri." ga tú tái ri.

⁵⁷ Haú hkún, haú Yudaq byu pé gi, Yhang lé, "Nàng gi, asak ngo xê zàn lhang a nghut shí é nhing, Abraham lé myàng wú é nghut lê lú?" ga tái akô.

⁵⁸ Yesuq gi, "Ngò, nungmoq lé teng za tái kôlé, Abraham lhang a hkú shí má, Ngò nyi gù bê nghut lê."* ga tú tái ri.† ⁵⁹ Haú mù luí, yhangmoq gi, Yesuq lé, dú rá ga lugkok kui yu akô; nghut kôlhang, Yesuq gi, haú noqkuq yhúm mai haq htoq ló byuq bê nghut ri.

9

Myoqjit Sù Lé Lhoq Gê Byi É Hkyô

¹ Yesuq gi, só yông ló nyi é u lé, hku lé é mai myoqjit to gù nghut é byù rayuq lé myang ri. ² Haú hkún, Yhâng é chángzô pé gi, Yhang lé, "Rabai é, shí yuq, myoqjit gù hku lé é gi, ó yuq kut shut é yubak é yanmai nghut lê lú? Yhang kut shut é lú? A nghut jáng, yhâng nu yhâng wa kut shut é lú?" ga myí akô.

³ Yesuq tú tái é gi, "Haú gi, yhang kut shut é yanmai le a nghut, yhâng nu yhâng wa kut shut é yanmai le a nghut; haú Garai Gasang é muzó lé, yhang má wó lhoq htoq shit rá matú, haú dut é ru nghut lê. ⁴ Nga-nhúng gi, haú Ngo lé nhang kat Su é muzó lé, nyi nghut tô ashí hkún, zui saí nyi ra rá dut lê; myín jé jáng gi, ó yuq le, mù wó zui saí rá a

nghut. ⁵ Ngò gi, mingkan htoq má nyi tô é u lé, mingkán é maubó nghut lê." ga ri.

⁶ Yhang gi, haú su ga tái luí, myigùng má sôkan byé hkyô mù, tse-nyhaq saí yù luí, haú yuq é myoqjí má but byi ri. ⁷ Hau htàng, haú yuq lé, "Haú Siloam wuihtum má é chí pyám aq." ga tái ri. (Siloam gá é gi, nhang é gá é lichyúm nghut lê.). Haú mù, haú yuq gi, é chí mù, myoq myàng luí, yhúm shut ló bê nghut ri.

⁸ Haú yhâng é yhumkyo bang eq yhang dung zô wún é lé myang wú é bang gi, "Shí yuq gi, haú zung to mù, dung zo zo lhaq kut é sù, a nghut kó lú?" ga myí bum akô. ⁹ Ram gi, "Haú yuq nghut lê." gá bum akô.

Góbang gi, "A nghut, haú yuq su dut e za ru nghut lê." ga tái akô.

Nghut kôlhang, yhang gi, "Ngò, haú yuq yhang nghut lê." ga tái ri.

¹⁰ Haú hkún, yhangmoq gi, "Haú nghut le gi, náng myoq hkásu kut wó myang é lú?" ga myí akô.

¹¹ Yhang gi, "Haú Yesuq gá é byù rayuq, tse-nyhaq ratsuí saí yù luí, ngá é myoqjí má but byi mù, 'Siloam wuihtum má é chí pyám aq.' ga ngo lé tái ri; haú mù, ngò é chí pyám é htàng má, ngá myoq wó myang é nghut lê." ga tú tái ri.

¹² Haú hkún, yhangmoq gi, "Byù haú yuq gi, hkámá nyi ri lú?" ga, yhang lé myí akô.

Yhang gi, "Ngò a sé." ga tái ri.

Myoq Dum Myang Byuq É Hkyô Lé, Hparishe Pé Gòn Wú É Hkyô

¹³ Yhangmoq gi, haú myoqjit wú bê sù lé, Hparishe pé chyáng shuí lé akô. ¹⁴ Yesuq, tse-nyhaq saí yù mù, haú yuq é myoq lé lhoq myàng byi é buinyi gi, Bánno buinyi nghut ri. ¹⁵ Haú mù, yhang, myoq hkásu kut wó myang é hkyô lé, haú Hparishe pé le dum myí akô. Haú jáng, yhang gi, "Haú yuq gi, ngá é myoqjí má tse-nyhaq but byi mù, ngò gi, é chí pyám jáng, ngá myoq myàng bê nghut lê." ga tú tái ri.

¹⁶ Haú Hparishe pé ra-am gi, "Shí yuq gi, Bánno buinyi é tará lé a châng é sù nghut é yanmai, Garai Gasang chyáng mai lé é sù a nghut." ga tái akô.

Nghut kôlhang, ra-am gi, "Yubak dap sù rayuq gi, haú su é limik kumhá pé lé, hkásu wó kut htoq rá lú?" ga myí akô. Haú mù, yhangmoq gi, myit a huí lhum bùm lò kó nghut ri.

¹⁷ Haú mù, yhangmoq gi, haú myoqjit wú sù shut lhing mù, "Nang lé myoq lhoq myàng byi é sù gi, hkasú é byù nghut lê ngúh, náng tái rá lú?" ga dum myí kôjáng, "Yhang gi, myiqhtoí rayuq nghut ri." ga, yhang tú tái ri.

¹⁸ Haú Yudaq byu pé gi, haú yuq myoqjit wú é hkyô lé le, ahkuí myoq dum myàng

bê nghut é hkyô lé le, haù yhang nu eq yhang wa lé, ê ji lò nhang é hkùn jé shoq, a lumjing kó nghut ri. ¹⁹ Haù mù, Yhangmoq gi, haù yhang nu eq yhang wa lé, "Shí yuq gi, nungnhik é yhangzo nghut lhê thú? Hku lé é hkùn mai, myoqjit gi nghut lhê thú? Yhang, ahkuí, hkâsu kut wó myang é thú?" ga myí akó.

²⁰ Haù hkùn, yhang nu eq yhang wâ nhik gi, "Yhang gi, ngá-nhik é yhangzo nghut é lé le, hku lé é hkùn mai myoqjit gù nghut é lé le, ngá-nhik sê lhê. ²¹ Nghut kôlhâng, yhang, ahkuí hkâsu kut wó myang é hkyô lé le, yhang é myoq lé ó yuq êq lhoq myang byí é hkyô lé le, ngá-nhik a sé. Yhang, asak wáng bê, yhang lé myí wú keq, yhanggung yhang dat tai kyo rá nghut lhê." ga tù tai akó. ²² Haù yhang nu eq yhang wâ nhik gi, Yudaq byu pé lé gyuq kô é yanmai, haù su ga tai kô é nghut ri; hkâsu mù gâ le, Yesuq gi, haù Hkrisduq nghut lhê ga yín yu é sù, ó yuq lé nghut kôle, haù tarajong mai lhoq htoq pyâm rá nghut lhê ga, haù Yudaq suwún wú chôm myit hpyit to bekó nghut é yanmai nghut ri. ²³ Haù é yanmai, yhang nu eq yhang wâ nhik gi, "Yhang, asak wáng bê, yhang lé myí wú keq." ga tai kô é nghut ri.

²⁴ Haù Hparishe pé gi, myoqjit wú bê sù haù yuq lé dum ji yù mù, "Garai Gasang lé za hkyá-on waq toq aq! Haù yuq gi, yubak dap sù rayuq nghut é lé ngamoq sê lhê." ga tai akó.

²⁵ Haù hkùn, yhang tù tai é gi, "Yhang gi, yubak dap sù rayuq nghut lhê luq, a nghut é luq, ngò a sé. Ngò gi, hí lé myoqjit sù nghut kôle, ahkuí wó myang bê nghut é lé za, ngò ru sê lhê." gâ ri.

²⁶ Haù htâng, yhangmoq gi, "Yhang, nang lé haí kut byí ri thú? Náng é myoq lé, yhang, hkâsu kut lhoq myang byí ri thú?" ga, yhang lé myí akó.

²⁷ Haù hkùn, yhang gi, "Ahkuí za, ngò, nungmoq lé tai kyo bê le, nungmoq sheq a gyo kôluí nhing! Nungmoq gi, haí mù dum gyo nau akó thú? Nungmoq le, Yhang é chángzô pé dut nau akó thú?" ga taù myí ri.

²⁸ Haù mù, yhangmoq gi, yhang lé gyái rhoí é dong mai, "Nàng gi, haù yuq é chángzo nghut ri-nhung! Ngamoq kúm gi, Mosheq é chángzô pé ru nghut lhê! ²⁹ Garai Gasang gi, Mosheq lé dáng nyo é hkyô lé, ngamoq sê lhê; nghut kôlhâng, haù yuq eq séng luí, Yhang gi, hkâmai lé é sù nghut é lé láng, ngamoq a sé." ga tai akó.

³⁰ Haù hkùn, haù yuq gi, "Yhang, ngo lé myoq wó lhoq myang byí kôlhâng, Yhang gi, hkâmai lé é sù nghut é lé, nungmoq a sé kô é gi, mauho yhang nghut bê! ³¹ Garai Gasang gi, yubak dap bâng é dang lé a gyo byí é hkyô lé, nga-nhung sê lhê. Garai Gasang gi, Yhang lé noqkuq luí, Yhang ô nau é hkyô lé, kut é sù é dang lé kúm gyo byí lhê. ³² Hku

lé é hkùn mai myoqjit gù nghut é byù lé, ó yuq êq myoq lhoq myang byí é gâ é hkyô lé, mingkan lé joq é hkùn mai, ó yuq le a wó gyô wú é nghut lhê. ³³ Haù yuq gi, Garai Gasang chyáng mai lé é sù za a nghut le gi, haí le wó kut rá a nghut." ga tù tai ri.

³⁴ Haù su ga jâng, yhangmoq gi, "Nàng gi, yubak htui má hku lé é sù nghut to luí nhing, ngamoq lé wám mhoqshit lhê thú?" ga tù tai kôluí, yhang lé hkat htoq pyâm akó nghut ri.

Woi-nyí Má Myoqjit É Hkyô

³⁵ Yesuq gi, haù yuq lé yhangmoq hkat htoq pyâm é hkyô lé wó gyo luí, yhang lé myang hui jâng, "Nàng gi, haù Byu Yhangzo lé lumjing lhê thú?" ga myí ri.

³⁶ Haù hkùn, haù yuq gi, "Yhumsing ê, haù gi, ó yuq nghut lhê thú? Yhang lé, ngò wó lumjing sháng gaq, tai kyo laq." ga myí ri.

³⁷ Yesuq gi, "Nàng, haù yuq lé myang wú bê nghut lhê; ahkuí, nang eq dáng nyo nyi é sù gi, haù yuq yhang nghut lhê." ga tai ri.

³⁸ Haù mù, haù yuq gi, "Yhumsing ê, ngò lumjing lhê!" ga tai luí, Yhang lé noqkuq ri.

³⁹ Haù hkùn, Yesuq gi, "Haù myoqjit bang myoq myàng kó rá hkyô eq myoq myàng bang myoqjit kó rá hkyô lé, tará jéyáng rá matú, mingkan shí má Ngò jé lé é nghut lhê." ga tai ri.

⁴⁰ Yhang eq rahá nghut nyi é Hparishe pé ra-am gi, Yhang haù su ga tai é lé wó gyo kôjâng, "Hkâsu htà? Ngamoq gi, myoqjit bang dut bê thú?" ga myí akó.

⁴¹ Haù hkùn, Yesuq gi, "Nungmoq, myoqjit é bang ru nghut le gi, yubak mara a bò kó rá nghut lhê; nghut kôlhâng, ahkuí, nungmoq gi, myoq myàng bang nghut lhê ga kô é yanmai, nungmoq má yubak mara bo ashí kó nghut ri.

10

Sau Zúng Sù Eq Sau Hpung

¹ Ngò, nungmoq lé teng za tai kôlé, haù sau hkup má, hkúmdong mai a wang e za, gó hkyô dong doq lut wang é sù gi, hkau sù eq danyaq nghut ri. ² Haù hkúmdong mai wang é sù kúm gi, sau zúng sù nghut ri. ³ Haù hkum zúng sù gi, yhang lé hkum hpông byí é htoq agó, haù sau pé gi, yhang é htê lé gyo byí akó. Yhang gi, yhang é sau pé lé, mying lang luí wut yù mù, yhangmoq lé shuí lhoq htoq kut nyi ri. ⁴ Yhang é sau pé banshoq lé hpông htoq yù mù, yhang gi, hí má sô ri; sau pé gi, yhang é htê lé sê gyo kô é yanmai, yhang é htâng má châng akó nghut ri. ⁵ Nghut kôlhâng, yhangmoq gi, byù bing é htâng má, hkâ-nhâm láng châng kó rá a nghut e za, yhang chyáng mai kúm hpang byuq kó rá nghut lhê; hkâsu mù gâ le, haù byù bing é htê lé, yhangmoq a sê gyo kô é yanmai nghut ri." ga tai ri. ⁶ Yesuq gi, dangtú haù lé yù mù, yhangmoq lé tai kyô

ri; nghut kôlhang, yhangmoq gi, Yhang hái tái kyô nyi é lé, a sê gyo kô nghut ri.

⁷ Haù mù, Yesuq dum tái é gi, "Ngò, nungmoq lé teng za tái kôlê, Ngò gi, haù sau pé wang é hkúmdong nghut lhê. ⁸ Ngá é hí má lé é lhunglhang bang gi, hkau bang eq danyaq pé nghut akô; haù sau pé kúm gi, yhangmoq é dang lé a lhom gyo byi kô nghut ri. ⁹ Ngò gi, hkúmdong nghut lhê; Ngò mai wang é sú ó yuq nghut kôlê, hkyi yu é hui rá nghut lhê. Haù yuq gi, htoq htoq wàng wàng wó kut rá eq mhan-yô myang hô rá nghut lhê. ¹⁰ Haù hkau sú gi, hkau rá, sat rá eq lhoq htên pyám rá matú, lé e za nghut lhê. Ngò lé é gi, yhangmoq, asak wó yú rá eq byingjup é asak lé wó yú rá matú sheq nghut lhê.

¹¹ Ngò gi, ge é sau zúng sú nghut lhê; haù ge é sau zúng sú gi, sau pé é matú, yhumsing é asak lé ap byi pyám é nghut lhê. ¹² Haù langchyang kut sú gi, sau pé lé sing é sau zúng sú a nghut; haù mù, yhang gi, haù wamhkui lé lo é lé myàng jáng, sau pé lé pyám to mù hpang ló byuq rá nghut lhê; haù hkún, wamhkui gi, sau hpúng lé é htím luí, lhoq pyo pyám rá nghut lhê. ¹³ Yhang gi, langchyang hpó nghut luí, haù sau pé é matú hái le a myit chiq byi é yanmai, hpang é nghut ri.

¹⁴ Ngò gi, haù ge é sau zúng sú nghut lhê; haù íwa gi, Ngo lé sê é nghut luí, Ngò le, haù íwa lé sê é eq rajung za, ¹⁵ Ngá é sau pé lé, Ngò sê lhê; Ngá é sau pé le, Ngo lé sê akô nghut ri; Ngò gi, haù sau pé é matú, yhumsing é asak lé ap byi pyám é nghut lhê. ¹⁶ Ngò gi, sau hkup shí má é a nghut é gotú sau pé wó ashí; sau haù pé lé le, Ngò, shuí yú rá rá nghut lhê; sau haù pé le, Ngá é htê lé gyo kô rá nghut lhê; haù hkún, sau hpúng rahpúng za dut luí, sau zúng sú le rayuq za, nghut rá nghut lhê. ¹⁷ Ngò gi, Ngá é asak lé dum wó tau yú sháng gaq nghú, yhumsing é asak lé ap byi pyám é yanmai, Ngá Wa gi, Ngo lé chyitdap é nghut lhê. ¹⁸ Ngá é asak lé, ó yuq eq le wó yu pyám é a nghut, Ngá é myit đồng byi pyám é ru nghut lhê. Ngò gi, yhumsing asak lé ap byi pyám rá ahko ahkáng eq haù lé dum tau yú rá ahko ahkáng wó sú nghut lhê. Haù gi, Ngá Wá chyang mai Ngò wó yu é hkunmó nghut lhê." gá ri.

¹⁹ Dang haù pé é yanmai, haù Yudaq byu pé gi, myit a hui lhum dum dut byuq beko nghut ri. ²⁰ Haù má é bang myo myo gi, "Yhang gi, nat gang wang júng to luí, nâ byuq bê nghut ri. Yhâng é dang lé, haù mù gyo nyi akô lú?" ga tái bum akô.

²¹ Nghut kôlhang, góbang gi, "Dang shi pé gi, nat gang wang júng tô é byu tái é dang a nghut. Nat gang gi, myoqjit sú lé, myoq wó

lhoq myâng nhâng rá lú?" ga tái bum akô nghut ri.

Yudaq Byu Pé A Lumjing Kô É Hkyô

²² Yerusalem wá mó má, Ap Nóng Poi* jé bê nghut ri. Haù gi, gyoqmyô nám nghut ri. ²³ Haù hkún, Yesuq gi, haù noqkuq yhúm wàng má é, Sholumon é Jirop má sô yông wún ri. ²⁴ Haù u lé, haù Yudaq byu pé gi, Yhâng é lhungkhyuq má lé zing bum kômù, "Nàng gi, ngamoq lé hká-myhâng jé shoq úng-áng nhang nyi rá lú? Nàng, Hkrisduq nghut le gi, ngamoq lé san za tái kyô pyám laq." ga tái akô.

²⁵ Yesuq gi, "Ngò, nungmoq lé tái kyô bê nghut lhê; nghut kôlhang, nungmoq a lumjing kô nghut ri. Ngá Wá é mying mai, Ngò kut é laklai kumlhá haù pé gi, Ngá é matú saksé hkám byi nyi ri. ²⁶ Nghut kôlhang, nungmoq gi, Ngá é sau a nghut kô é yanmai, a lumjing kô nghut ri. ²⁷ Ngá é sau pé gi, Ngá é htê lé dat gyo akô; Ngò gi, yhangmoq lé sê lhê; yhangmoq le, Ngá htang cháng akô nghut ri. ²⁸ Ngò gi, yhangmoq lé, ahtum abyuq é asak byi é nghut mù, yhangmoq gi, hká-nhám le htên byoq kô rá a nghut; ó yuq eq le, yhangmoq lé, Ngá é loq mai wó lú yú rá a nghut. ²⁹ Yhangmoq lé, Ngá é loq má ap byi tô é sú, haù Ngá Wa gi, lhunglhang htoq má je gyaú Sú nghut lhê; ó yuq eq le, yhangmoq lé, Ngá Wá é loq mai wó lú yú rá a nghut.

³⁰ Ngò eq haù íwa gi, rayuq za nghut lhê." ga tái tái ri.

³¹ Haù hkún, haù Yudaq byu pé gi, Yesuq lé, dú rá matú luqgok dum kui akô. ³² Nghut kôlhang, Yesuq gi, yhangmoq lé, "Haù íwá chyang má é laklai kumlhá mó pé myo myo, Ngò, nungmoq lé tún shit bê nghut lhê. Nungmoq, Ngo lé dú rá gi, hká lhum é yanmai nghut akô lú?" ga myí ri.

³³ Haù Yudaq byu pé gi, "Ngamoq, Nàng lé dú rá gi, haù pé hká lhum é yanmai le a nghut; Nàng gi, byu rayuq nghut to luí, Garai Gasang nghut é đồng tái whuí luí, Yhang lé rhoi dang tái é yanmai, dú rá nghú lhê." ga tái tái akô.

³⁴ Haù hkún, Yesuq gi, yhangmoq lé, "Nungmoq gi, garai pé nghut akô nghú, Ngò tái bê nghut lhê." ga nungmoq é tará má ká to lhê a nghut kô lú? ³⁵ Chyúmdang haù lé gi, a ge lhoq hpyoq pyám é nghut luí, haù Garai Gasang é mungdang lé wó yu é bang lé, 'garai pé' gá é nghut le gi, ³⁶ haù íwa mai, Yhang é matú hkyin htoq yú luí, mingkan má nhang é Sú eq séng luí gi, hká đồng nghú kô rá lú? 'Ngò gi, Garai Gasang é Yhangzo nghut lhê.' nghú tái é yanmai, Ngò gi, Garai Gasang lé tái hpoi ri nghú, nungmoq, hái mù Ngo lé mara hún akô lú? ³⁷ Ngá Wá é

* 10:16 Esai 56:8

* 10:22 Ap Nóng Poi gá é gi, Garai Gasang é yhúm lé ap nóng lé gá lhê.

* 10:34 Hkya-on 82:6

muzo pé lé, Ngò kut é a nghut jáng, Ngo lé hkâlumjúng kó. ³⁸ Nghut kôlhang, Ngò, haù pé lé kut é nghut le gi, nungmoq, Ngo lé a lumjúng kôlhang, haù muzo pé lé lumjúng keq; haù hkùn, haù Íwa gi, Ngò má nghut nyi é hkyô lé le, Ngò gi, haù Íwa má nghut nyi é hkyô lé le, nungmoq wó sé luí, sê gyo kó rá nghut lhê." ga tũ taí ri. ³⁹ Yhangmoq gi, Yhang lé chyup rá dum hen akò; nghut kôlhang, Yhang gi, yhangmoq é loq mai wó lut ló bê nghut ri.

⁴⁰ Hau htâng, Yesuq gi, haù Yodan làng he hpoq mã é, Yohan, wui-myhup hkám byí hi é jowò má ló jé ri. Haù má, Yhang nyi nyi é nghut luí, ⁴¹ byù myo myo gi, Yhâng chyáng lé jé bum akò. Yhangmoq gi, "Yohan gi, limik kumhá a kut wú é nghut kôlhang, shí yuq eq séng luí, Yohan taí é hkyô lunglhang gi, têng ri." ga taí bum akò. ⁴² Haù jowò má, byù myo myo gi, Yesuq lé lumjúng bùm bekò nghut ri.

11

Lazaruq Shi Byuq É Hkyô

¹ Ahkuí, Lazaruq gâ é byù rayuq gi, no nyi ri. Yhang gi, haù Mariq eq yhângnhá Mahtaq nhik nyi é Behtani wá mã é sũ nghut lhê. ² Mariq haù gi, Yhumsing lé namngón-xù hut gyun luí, hkyí má yhâng xam eq sùt byí é sũ nghut ri; yhang gi, haù no nyi é Lazaruq é yhângnhá nghut ri. ³ Haù mù, haù yhângnhá nhik gi, "Yhumsing ê, Nàng chytidap é sũ gi, no nyi ri." ga, Yesuq chyáng ê taí nhang akò.

⁴ Yesuq gi, dang haù lé wó gyo jáng, "Nòhpyo haù gi, shí-nò a nghut. Haù Garai Gasâng é Yhangzo gi, hau é yanmai, hpungwup shingkang wó dan hũ é hui sháng gaq ga, Garai Gasâng é hpungwup shingkang é matú dut é ru nghut lhê. ⁵ Yesuq gi, Mahtaq eq yhanggu Mariq lé le, Lazaruq lé le, chytidap ri. ⁶ Haù su mù, Yhang gi, haù Lazaruq no nyi ri gâ é lé, wó gyo é hkùn, haù Yhang nyi é jowò má, í nyi nyi tô ashí nghut ri.

⁷ Hau htâng, Yhang gi, Yhâng é chángzô pé lé, "Nga-nhung gi, Yuda mau shut dum taù ló sháng." ga taí ri.

⁸ Haù hkùn, yhangmoq gi, "Rabai ê, hkũ-yoq za, haù Yudaq byu pé, Nang lé luqgok eq dú sat rá da kô é nghut le nhing, ahkuí, haù shut dum taù ló rá lúhú?" ga Yhang lé myí akò.

⁹ Yesuq gi, "Nyi gi, hkyíng hkum raxe í hkum bo lhê a nghut kó lúhú?" Nyi má hkyô sô é sũ gi, mingkan shi é maubó é yanmai myoq myàng luí, lengbat rá a nghut. ¹⁰ Myín lé hkyô sô é sũ kúm gi, maubó lé a wó é yanmai, lengbat lhê." ga tũ taí ri.

¹¹ Haù su ga taí é htâng má, Yhang, yhangmoq lé xoq taí kyô é gi, "Nga-nhung é luzúm Lazaruq yhup myhí byuq bê nghut ri; nghut kôlhang, Ngò gi, yhang lé é nhaù toq rá nghut lhê." gâ ri.

¹² Haù hkùn, Yhâng é chángzô pé gi, "Yhumsing ê, yhang yhup myhí tô é nghut le gi, ge lò rá nghut lhê." gâ taí akò. ¹³ Yesuq gi, Lazaruq shi byuq bê hkyô lé taí é nghut ri; nghut kôlhang, Yhâng é chángzô pé gi, gè gè yhup myhí tô é lé taí é su ngam pyâm akò nghut ri.

¹⁴ Haù mù luí, Yesuq, yhangmoq lé san za jáng taí kyô é gi, "Lazaruq gi, shi byuq bê nghut lhê. ¹⁵ Ngò haù má a nyi záng é gi, nungmoq wó lumjúng rá matú nghut luí, nungmoq é matú Ngò gabú byí ri; yhâng chyáng é ló sháng hkoi." gâ ri.

¹⁶ Haù mù, haù Zozúm le gâ é Htomaq gi, gotú chángzô pé lé, "Nga-nhung le, Yhang eq rahá shí sháng gaq, châng é ló sháng." ga taí ri.

Haù Í-nhâ Nhik Lé, Yesuq Nhik Ting É Hkyô

¹⁷ Yesuq gi, jé e é hkùn, haù Lazaruq lé lup má kat pyâm é myi nyi nghut bê hkyô lé, lhom taí kyô akò. ¹⁸ Behtani wá gi, Yerusalem wa mó eq í déng kô za wê lhùm ri. ¹⁹ Haù mù, Yudaq byu pé myo myo gi, Mahtaq eq Mariq nhik é yhanggu shi byuq é yanmai, nhik ting byi kó rá ga lé jé nyi bum akò nghut ri. ²⁰ Mahtaq gi, Yesuq jé lé lo é hkyô lé wó gyo jáng, htoq é mù, Yhang lé é hui ri; nghut kôlhang, Mariq gi, yhùm má nyi tô ri.

²¹ Mahtaq gi, Yesuq lé, "Yhumsing ê, Nàng, shí má nyi tô é ru nghut le gi, ngá gu shi byuq rá a nghut. ²² Nghut kôlhang, ahkuí le, Garai Gasâng chyáng Nàng hai dung kôlhang, Yhang byi rá nghut é lé, ngò sê lhê." ga taí ri.

²³ Yesuq gi, yhang lé, "Nung gu, dum dui toq rá nghut lhê." ga taí ri.

²⁴ Haù hkùn, Mahtaq gi, "Haù jiltùm buinyi má dum dui toq é hkùn, yhang le dum dui toq rá nghut é lé, ngò sê lhê." ga tũ taí ri.

²⁵ Haù hkùn, Yesuq gi, yhang lé, "Ngò gi, dum dui toq hkyô eq asak nghut lhê. Ngo lé lumjúng é sũ gi, shi byuq kôlhang, dum dui rá nghut lhê. ²⁶ Asak dui nyi luí, Ngo lé lumjúng é sũ ó yuq nghut kôle, hkâ-nhám le shi é hui rá a nghut. Nàng gi, dang shí lé lumjúng lhê lúhú?" ga taí ri.

²⁷ Haù hkùn, yhang gi, "Yhumsing ê, ngò lumjúng lhê. Nàng gi, haù mingkan má jé lé lò rá nghut é, Garai Gasâng é Yhangzo, Hkrisduq† nghut é lé, ngò lumjúng lhê." ga, Yhang lé taí kyô ri.

* **11:9** Nyi gi, hkyíng hkum raxe í hkum bo lhê a nghut kó lúhú? gâ é gi, ahkyíng a jé shimá, muzó nô é gi, a ge é nghut lhê gâ é nghut ri. † **11:27** Hkrisduq lé Mesaia le gâ lhê.

²⁸ Yhang gi, haù su ga tai é htàng má, taù lò mù, yhanggu Mariq lé, tsik za wut yù luí, "Haù Sará jé tò ri; Yhang gi, nang lé myí nyi ri." ga tai kyô ri. ²⁹ Mariq gi, haù lé wó gyo jáng, hàn za toq mù, Yesuq chyáng é bê nghut ri. ³⁰ Haù u lé, Yesuq gi, haù wá hkaù má a wang lò shì e za, Mahta q eq huí é jowò má ru nyi tò ashí nghut ri. ³¹ Haù yhúm hkaù má, Mariq lé nhik tít ngi é Yudaq byu pé gi, yhang hàn za toq luí, htoq lò é lé myàng kôjáng, yhang, lup má é ngaù rá dá lhé abe ga, myit yù kómù, yhang htàng châng e lò bum akò nghut ri.

³² Mariq gi, Yesuq nyi tò é jang má jé mù, Yhang lé myàng jáng, Yhâng é hkyí wang má ngóm gop to luí, "Yhumsing ê, Nang, shí má nyi tò é ru nghut le gi, ngá gu shí byuq rá a nghut." ga tai ri.

³³ Yesuq gi, Mariq ngaù nyi é lé le, haù yhang eq rahá lé lo é Yudaq byu pé ngaù nyi kô é lé le, myàng jáng, Yhâng é myit má gyai yhang hkám zo wú é eq myit wui myit hke dut nyi ri. ³⁴ Haù mù, Yhang gi, "Yhang lé, hkámá tò tò akò lú?" ga myi jáng, yhangmoq gi, "Yhumsing é, lé wú wú aq." ga tù tai akò.

³⁵ Yesuq gi, ngaù bê nghut ri.

³⁶ Haù mù, haù Yudaq byu pé gi, "Wú keq, Yhang gi, Lazaruq lé, haù í yhang chyt ri-nhung!" ga tai akò.

³⁷ Nghut kôlhang, ra-am gi, "Haù myoqjit sù lé, myoq wó lhoq myàng byí é Sù gi, shí yuq lé le, a shí lo shoq a wó kut é lú?" ga tai bum akò nghut ri.

Lazaruq Lé Lhoq Dui Toq É Hkyô

³⁸ Yesuq gi, Yhâng é myit má radàm dum gyai yhang hkám zo wú é èq, lup má lé jé ri. Lup haù gi, luqhkýung dong nghut luí, luqgok rachâm èq chí tò akò. ³⁹ Haù mù, Yhang gi, "Luqgok haù lé yu pyám keq." ga tai ri.

Haù hkún, haù shi byuq su é yhàngnhá Mahta q gi, "Yhumsing é, yhang lé, haù má tò tò é myi nyí lhang nghut bê yanmai, ahkuí gi, bup nàm berá nghut lhé." ga tai ri.

⁴⁰ Haù mù, Yesuq gi, "Nang, lumjín g é nghut le gi, haù Garai Gasàng é hpungwup shíngkang lé, wó myàng rá nghut lhé ngú, Ngò, nang lé tai kyô wú bê a nghut lú?" ga tai ri.

⁴¹ Haù mù luí, yhangmoq gi, luqgok haù lé yu pyám akò. Hau htàng, Yesuq gi, mauhkúng shut tu wú luí, "Áwa ê, Nang, Ngá é dang lé gyo byí é yanmai, Ngò, Nang lé jeju hkya-ôn lhé. ⁴² Nang gi, hká-nhám le, Ngá é dang lé gyo byí nyi é lé, Ngò sê lhé; nghut kôlhang, Nang, Ngò lé nang kat é hkyô lé, shí má yap tò é bang lumjín gó sháng gaq ngú,

yhangmoq é matú, Ngò, isu ngú tai é nghut lhé." ga tai ri.

⁴³ Yhang gi, haù su ga tai luí, "Lazaruq é, htoq lò aq." ga hté mó èq wut kat ri. ⁴⁴ Haù hkún, haù shi byuq bê sù gi, yhâng é loq hkyí pé má pân èq htup yup to gú eq, yhâng é myoqdong má hpajet eq htup to gú htoq lò ri.

Haù mù, Yesuq gi, yhangmoq lé, "Yhang lé hpai pyám byi mù, nhang kat keq." ga tai ri.

Yesuq Lé Sat Pyám Rá Haq Dá É Hkyô

Mht 26:1-5; Mrk 14:1-2; Luk 22:1-2

⁴⁵ Haù mù luí, Mariq chyáng lé kún é Yudaq byu pé myo myo gi, Yesuq kut é hkyô lé myàng jáng, Yesuq lé lumjín bum bekò nghut ri. ⁴⁶ Nghut kôlhang, yhangmoq chyáng má é ra-am gi, haù Hparishe pé chyáng lò mù, Yesuq kut é hkyô lé, lò tai kyô akò. ⁴⁷ Haù mù, haù hkyangjong agyi pé eq Hparishe pé gi, Yudaq byin tú wapdoq† zuphpong lé ji tsing to mù, "Byù shí yuq gi, limik kumlhá myo myo kut shit nyi ri. Nga-nhung, hkásu kut le gè rá lú?" ⁴⁸ Nga-nhung, Yhang lé haù su ru kut nyí nhang é nghut jáng, yuq hkangmó gi, Yhang lé lumjín kó rá nghut lhé; haù hkún, Romaq byu pé gi, jé lé mù, nga-nhung é jowò eq nga-nhung é byuhú lé, lé lhoq htên pyám kó rá nghut lhé." ga tai akò nghut ri.

⁴⁹ Haù hkún, yhangmoq chyáng má é, haù zân má hkyangjong mó nghut nyi é sù, Kaya hpaq gi, yhangmoq lé, "Nungmoq gi, haù lhang a sé kó nghut ri-nhung! ⁵⁰ Haù byuhú gón htên byoq byuq rá htoq má, byuhú hau é matú, byù rayuq shí hkám byi le gi, nungmoq é matú je gè rá hkyô lé, nungmoq, a myit jé kó nghut ri." ga tai kat ri.

⁵¹ Yhang haù su ga tai é gi, yhumsing myit dong a nghut e za, haù zân má, yhang gi, hkyangjong mó nghut é eq rajung za, haù Yudaq byuhú é matú, Yesuq shí hkám byi rá nghut é hkyô lé le, ⁵² byuhú hau é matú baú a nghut e za, haù byo myín tò é, Garai Gasàng é yhangzò pé lé, shuí tsing yù mù, rading ralhum za dut nháng rá matú, shí hkám byi rá nghut é hkyô lé le, myihtoí dang tai é ru nghut lhé. ⁵³ Haù nyí mai, yhangmoq gi, Yesuq lé sat rá matú chòm da bekò nghut ri.

⁵⁴ Hau é yanmai, Yesuq gi, Yudaq byu pé gyoro má, de de a sô shit wún e za, haù mai htoq luí, haù yoso eq chyáng lhum é mau má é, Ehprim gá é wá má é mù, Yhâng é chángzò pé eq rahá nyi nyi ri.

⁵⁵ Haù Yudaq byu pé é Lhoqlhai Poí jé rá za nghut é hkún, byù myo myo gi, Lhoqlhai Poí a jé shi má, lhoq san lhoq yung hking dong yhumsing gung lé lhoq sán-yung yù rá matú, yosò wá pé mai, Yerusalem wá mó

† 11:47 Yudaq byin tú wapdoq lé Grik dong gi, San-hedrin gá lhé.

shut doq ló bum akò. ⁵⁶ Haù mù, yhangmoq gi, Yesuq lé ho nyi kò é nghut luí, haù noqkuq yhùm wàng má yap to uchyang, rayuq eq rayuq, "Nungmoq, hkâsu wó myit akò lhú? Yhang gi, Poi má a lé lô rá gâ lhê lhà?" ga myi lhùm bum akò. ⁵⁷ Nghut kôhang, haù hkyangjong agyi pé eq Hparishe pé gi, Yesuq lé wó chyup yù rá matú, Yesuq hkámá nyi é lé, sê é sù ó yuq nghut kôle, yhangmoq lé lo shit kyo rá lhê ga dangmó hkyò tó akò nghut ri.

12

Yesuq, Namngón-xù But Byi Huí É Hkyô
Mht 26:6-13; Mrk 14:3-9

¹ Haù Lhoqlhai Poi jé rá hkyuq nyi rá ashí hkùn, Yesuq gi, Yhâng èq shi é mai lhoq dui toq yu é sù, Lazaruq nyi é Behtani wà má ló jé ri. ² Haù má, Yesuq lé hkunggá é dông myinzang byi tsò akò; Mahtaq gi, zoshuq jau ri; Lazaruq gi, haù Yesuq eq rahá siboí má zò zung nyi bang má é rayuq nghut ri. ³ Haù hkùn, Mariq gi, haù nardu amyit mai za saí yu é, gyaí hpaù é namngón-xù raxe í rùng kó yu lé mù, Yesuq é hkyí má hut gyun byi luí, yhâng é uxam èq sút byi ri. Haù mù, yhùm haù gi, namngón-xù shôm byíng to bê nghut ri.

⁴ Nghut kôhang, Yesuq lé ap pyám rá nghut é, Yhâng é chángzo rayuq nghut sù, Yudaq Iskarut gi, ⁵ "Haù myùng bang lé byi pyám rá matú, haù namngón-xù lé denari sum sho èq haí mù a ùng pyám é lhú?" ga tai ri. ⁶ Yhang haù su ga tai é gi, myùng bang lé chiq byi é yanmai tai é a nghut, yhang gi, ngùn htùng chúng sù nghut luí, haù má kat tó é ngùn lé, yhumsing é matú lhaq yu chúng chúng kut é, hkau sù nghut é yanmai tai é nghut ri.

⁷ Yesuq gi, "Nghut shang gaq; yhang gi, Ngo lé myhup yhum rá buinyi é matú, namngón-xù shí lé hkong to byi é nghut lhê. ⁸ Haù myùng bang gi, nungmoq eq rahá hkâ-nhâm le nyi rá nghut lhê; nghut kôhang, Ngò gi, nungmoq eq rahá ayang nyi nyi rá sù a nghut." ga tú tai ri.

⁹ Haù u lé, Yudaq byu pé ajùm ayò gi, haù má Yesuq nyi é lé sé kôluí, lé lo akò; haù bang gi, Yesuq é yanmai za lé kò é a nghut, haù Yhâng èq shí bê mai lhoq dui toq yu é Lazaruq lé, lé myâng naù kò é yanmai le nghut ri. ¹⁰ Haù mù, haù hkyangjong agyi pé gi, Lazaruq lé le, sat pyám rá matú chòm hpyê lhùm akò. ¹¹ Hkâsu mù gâ le, yhâng é yanmai, haù Yudaq byu pé myo myo gi, Yesuq chyáng lhing ló kômù, Yhang lé lumjáng bùm kò é yanmai nghut ri.

Yesuq, Yerusalem Wà Mó Má Wang E Ló É Hkyô

Mht 21:1-11; Mrk 11:1-11; Luk 19:28-40

¹² Hau htang nyi, haù Poi má lé jé é byù moq mó gi, Yerusalem wà mó shut Yesuq jé doq ló é hkyò lé, wó gyo bum akò. ¹³ Haù mù, yhangmoq gi, byùm-haq pé yu chúng mù, Yhang lé é tē uchyang,

"Hosana!"*

Haù Yhumsing é myìng mai jé lé lô Sù gi, Yhumsing wó nyi sháng gaq ó!

Haù Israelaq byu pé é Hkohkâm gi, hkungsò wó nyi sháng gaq![✧]

ga, tai garú bum akò nghut ri. ¹⁴ Haù hkùn, Yesuq gi, logúng zo radu lé myàng luí, doq jì ri;

¹⁵ haù gi, "Zi-un byizo[†] é, hkâgyuq; wú keq, nungmoq é hkohkâm gi, logúng zo má jì mù lé lo nyi ri."[✧]

ga, kâ tó é eq rajung za nghut ri.

¹⁶ Haù pé banshoq lé, Yhâng é chángzò pé gi, sâng-hi lé a sê gyo kó; nghut kôhang, Yesuq gi, hpungwup shíngkang dan hu huí é htàng má za sheq, haù pé gi, Yhang eq séng luí kâ tó é hkyò lé le, haù eq rajung za, Yhang lé, yhangmoq mai kut bê hkyò lé le, bùn sê kat akò nghut ri.

¹⁷ Haù Yesuq gi, lup hkaù má é Lazaruq lé wut luí, shi é mai lhoq dui toq yu é hkùn, Yhang eq rahá nghut é shiwa hpúng gi, haù hkyò lé, saksé hkám byi nyi akò. ¹⁸ Haù mù, byù myo myo gi, Yesuq tùn shit é limik kumlhá hau é hkyò lé, wó gyo kò é yanmai, Yhang lé hui rá matú htoq e akò. ¹⁹ Hau é yanmai, haù Hparishe pé gi, "Wú keq, nga-nhúng, hkâsu yhang a ge kut lo nhung! Haù mingkan gón gi, Yhâng htàng châng bùm bekò." ga, rayuq eq rayuq tai lhùm bum akò nghut ri.

Yesuq, Yhang Shí Rá Hkyô Lé Te Tai É Hkyô

²⁰ Haù hkùn, noqkuq rá matú Poi má doq ló é bang má, Grik pé ra-am le bo tó akò.

²¹ Yhangmoq gi, Galile mau, Bet-saida wà mó má é Hpilip chyáng lé jé kômù, "Àhkaù é, ngamòq gi, Yesuq lé myàng nau ri." ga, dúng tóngbán akò. ²² Haù mù, Hpilip gi, Andre lé, é tai kyò ri; Andre eq yháng nhik gi, Yesuq lé, é tai kyò akò.

²³ Haù mù, Yesuq gi, "Haù Byu Yhangzo gi, hpungwup shíngkang dan hù é hui rá matú, ahkyíng jé bê nghut ri. ²⁴ Ngò, nungmoq lé teng za tai kôle, sungsó racham gi, myiùng má gyo luí, shi byuq e za a nghut jáng, acham roq za dut nyi rá nghut lhê. Nghut kôhang, shí byuq é nghut le gi, ashí myo myo lhoq htoq rá nghut lhê. ²⁵ Haù yhumsing é asak

* **12:13** Hebre dang má, hosana gâ é gi, "ahkúi hkyi yù aq" gâ é nghut lhê. Nghut kôhang, bun zo shí má gi, hkyá-on dang dông chúng é nghut lhê. ✧ **12:13** Hkya-on 118:25-26 † **12:15** Hebre myíng dông Zi-un byizo gâ é gi, Yerusalem má é byu pé lé gâ é nghut lhê. ✧ **12:15** Zhk 9:9

lé chyitdap é sù gi, asak sùm byuq râ nghut lhê. Mingkan shí má, haù yhumsing é asak lé a jú é sù kúm gi, ahtum abyuq é asak matú, yhumsing é asak lé wó sing to râ nghut lhê. ²⁶ Ngo lé dojaú é sù ó yuq nghut kôle, Ngá htâng cháng râ lhê; Ngó, hkámá nyi le, Ngá é dui-nhâng zoshâng le nyi râ nghut lhê. Ngá Wa gi, haù Ngo lé dojaú é sù lé, shigyaú râ nghut lhê.

²⁷ Ahkuí, Ngó, myit wúhke nyi ri; Ngó hkásu nghú tái râ lhi? 'Áwa ê, ahkýing shí mai Ngo lé lhoq lhut yù laq.' nghú tái râ lhu? Nghut kôle, Ngó gi, ahkýing shi é matú za sheq jé lé é ru nghut lhê. ²⁸ Áwa ê, Náng é mying lé hpungwup shingkan dan hu nhâng aq hkoí!" ga tái ri.

Haù hkún, "Ngó gi, Ngá é mying lé hpungwup shingkan dan hu nhâng bê nghut lui, dum dan hu nhâng shirâ nghut lhê." gá é htê, mauhkúng mai htoq lo ri. ²⁹ Haù má nyi tô é byù moq mó gi, haù lé wó gyo kôjáng, "Maugum gum ri." gá bum akó; ra-am gi, "Yhang lé, maumang lagyo rayuq nyo ri." ga tái bum akó nghut ri.

³⁰ Haù hkún, Yesuq gi, "Danghtê shí gi, Ngá é matú a nghut, nungmoq é matú ru nghut lhê. ³¹ Ahkuí gi, mingkan shi lé jéyáng râ ahkýing nghut bê; mingkan shi é zau gi, ahkuí hkat htoq pyâm é hui râ nghut lhê. ³² Nghut kôlhang, Ngó gi, myigùng mai tu shap kat é hui é hkún, byù lhunglhâng bang lé, Ngá chyáng shê yù râ nghut lhê." ga tái ri. ³³ Yhang haù su ga tái é gi, Yhang hkásu kut shí râ nghut é hkyô lé shit é nghut ri.

³⁴ Haù hkún, haù byù moq mó gi, "Haù tarâ laiká má, Hkrisduq gi, ahtum abyuq dui nyi râ nghut lhê gá é lé sheq, ngamoq wó gyô wú é ru nghut le nhing, 'Haù Byu Yhangzo gi, tu shap é hui ra râ nghut lhê.' nghú, Nàng hkásu kut wó tái lhê lhu? Haù Byu Yhangzo gi, ó yuq nghut lhê lhu?" ga, myi akó.

³⁵ Haù mù, Yesuq gi, yhangmoq lé, "Nungmoq chyáng, haù maubó joq nyi râ ahkýing gi, a lùm myáng lo nghut ri. Mauchut gi, nungmoq chyáng a hkyit jé sháng gaq, nungmoq chyáng, haù maubó joq nyi ashí hkún sô nyi keq; hkásu mù gá le, haù mauchut má sô nyi é sù gi, yhang hká shut é ló nyi é lé, a sé nghut ri. ³⁶ Nungmoq gi, maubó é yhangzô pé wó dut kó sháng gaq, haù maubó joq nyi ashí hkún, haù lé lumjǐng keq." ga tái ri. Yesuq gi, dang haù ban tái jáng, yhangmoq chyáng mai htoq ló lui, haq byuq bê nghut ri.

Yudaq Byu Pé, A Lumjǐng Ru Dut Nyi Kô É Hkyô

³⁷ Yesuq gi, yhangmoq é hí má, limik kumlhá haù pé banshoq kut shit kôlhang,

yhangmoq gi, Yhang lé a lumjǐng shi kó nghut ri. ³⁸ Haù gi,

"Yhumsing ê, nga-nhùng é danglù lé, ó yuq wá lumjǐng byi wú é lhu? Haù Yhumsing é loq[†] gi, ó yuq lé htoq shit wú é lhu?"^{*}

ga, myightoi Esai-aq tái tô é dang lo dik é nghut ri.

³⁹ Yhangmoq a wó lumjǐng kô é hkyô gi, Esai-aq tái é dang má,

⁴⁰ "Yhang gi, yhangmoq é myoqjǐ lé lhoq chit byi lui, yhangmoq é i-myt lé lhoq htan to byi bê nghut ri;

haù mù, yhangmoq gi, myoqjǐ éq a wó myâng, i-myt éq a wó sé gyo, Ngó, yhangmoq lé yâ ge byi râ matú, a wó lling taù lò kó dut râ nghut lhê."^{*}

ga le bo tô é yanmai nghut lhê. ⁴¹ Esai-aq gi, Yesuq é hpungwup shingkan lé myang é yanmai, Yhang eq sêng é hkyô lé, haù su ga tái é nghut ri.

⁴² Nghut kôlhang, haù uphkáng bang myo myo lhang gi, haù u má, Yesuq lé lumjǐng bum akó. Nghut kôle, yhangmoq gi, Hparishe pé éq tarajong mai lhoq htoq pyâm é hui râ lé, gyuq kô é yanmai, yhangmoq lumjǐng bê hkyô lé a yin yu bùm kó nghut ri. ⁴³ Hkásu mù gá le, yhangmoq gi, Garai Gasâng chyáng mã é aróng lé, ô nau é htoq má, byu pé chyáng mã é aróng lé, je ô nau kô é yanmai nghut ri.

⁴⁴ Haù mù, Yesuq, htê mó éq tái é gi, "Ngo lé lumjǐng é sù gi, Ngo lé baù lumjǐng é a nghut; haù Ngo lé nhang kat é Sù lé le, lumjǐng é nghut lhê. ⁴⁵ Ngo lé myang é sù gi, haù Ngo lé nhang kat é Sù lé le myang é nghut lhê. ⁴⁶ Ngó gi, Ngo lé lumjǐng é sù ó yuq le, mauchut hkaù má a nyi sháng gaq nghú, maubó ðong mingkan má lé jé é nghut lhê.

⁴⁷ Ngó gi, Ngá é dang lé wó gyo lui, a châng é sù ó yuq lé le, jéyáng râ a nghut; hkásu mù gá le, Ngó gi, mingkan lé jéyáng râ matú jé lé é a nghut; haù mingkan lé hkyi yù râ matú sheq, jé lé é ru nghut lhê. ⁴⁸ Ngo lé he-ngik lui Ngá é dang lé a hap yu é sù lé, jéyáng râ Sù rayuq nyi lhê; Ngó tái é danghkun haù gi, haù jhtùm buinyi má, haù yuq lé mara byi râ nghut lhê. ⁴⁹ Hkásu mù gá le, Ngó gi, Ngá é myit ðong tái é a nghut; nghut kôlhang, Ngó hái tái râ eq hkásu nghú tái râ lé gi, haù Ngo lé nhang kat é sù Iwa mai, Ngo lé hkunmó hkyô to bê nghut lhê. ⁵⁰ Haù Yhâng é hkunmó gi, ahtum abyuq é asak nghut é lé, Ngó sê lhê. Haù mù lui, Ngó, hái tái kôlé, haù Iwa mai Ngo lé tái kyô é lé za, tái é nghut lhê." gá ri.

[†] 12:38 Yhumsing é loq gá é gi, Yhumsing é hpungwup a-tsam lé gá é nghut lhê. ^{*} 12:38 Esai 53:1 ^{*} 12:40 Esai 6:10

13

Chángzô Pé É Hkyî Chi Byî É Hkyô

¹ Haù Lhoqlhai Poi jé rã hí má za, Yesuq gi, Yhang, mingkan shí mai Yhâng Wã chyáng htot ló rã ahkyíng jé bê hkyô lé, sê ri. Yhang gi, mingkan má nyi é, Yhâng é byu pé lé chyítap nyi é nghut luí, jìhtâm jé shoq Yhâng é chyítap myit lé shit rã nghut lhê.

² Myinzang zô nyi bum kô é u lé, nat Tsadán gi, Simun é yhangzo Yudaq Iskarut chyáng, Yesuq lé ap pyám rã myit kat byî to gù nghut ri. ³ Yesuq gi, haù lhunglhang lé Íwa mai Yhâng é loq má ap byi to bê nghut é lé le, Yhang gi, Garai Gasâng chyáng mai lé é sù nghut luí, Garai Gasâng chyáng dum taù ló rã sù nghut é lé le, sê ri. ⁴ Haù mù, Yhang gi, zohpoq mai toq luí, Yhâng é bumó lé hkyut pyám mù, hpyidum má hpajet ralhùm èq hpyihit hit tô ri. ⁵ Hau htâng, Yhang gi, jirung má uchyam hut kat mù, Yhâng é chángzô pé é hkyî chi byi luí, haù Yhâng é hpyidum má hit tô é hpajet èq sut huí byî ri.

⁶ Yhang gi, Simun Petruq chyáng jé jáng, Simun Petruq gi, "Yhumsing é, Nang gi, ngá hkyí lé chi byi rã nghut lhê lú?" ga myí ri.

⁷ Haù hkùn, Yesuq gi, "Ngò, haì kut nyi é hkyô lé, ahkuí, nang sê gyo rã a nghut; nghut kôlhang, htâng má sê gyo rã nghut lhê." ga tù taí ri.

⁸ Petruq gi, "Ngá hkyí lé, Nang, hkâ-nhám le wó chi byi rã a nghut." ga taí jáng, Yesuq gi, "Nang lé, Ngò a chi byi é nghut jáng, nang gi, Ngò eq séng rã a nghut." ga tù taí ri.

⁹ Haù hkùn, Simun Petruq gi, "Yhumsing ê, haù su nghut jáng gi, ngá é hkyí lé baù za a nghut, ngá é loq eq ulhum lé le chi byi laq!" ga tù taí ri.

¹⁰ Yesuq gi, "Gùng chi bê sù gi, hkyí za chi jáng, ragùngdú é sanséng bê nghut ri. Nungmoq gi, sanséng bekô; nghut kôlhang, yuq hkangmó gi, sanséng é a nghut." ga tù taí ri. ¹¹ Hkásu mù gà le, Yhang gi, Yhang lé ap pyám rã sù ó yuq nghut é lé, sê é yanmai, "Nungmoq gi, sanséng é bang chyat a nghut." ga taí é nghut ri.

¹² Yesuq gi, yhangmoq é hkyí lé ban chi byi jáng, Yhâng é bumó lé wut mù, Yhâng é jowó má ló dum zùng luí, yhangmoq lé myi é gi, "Nungmoq gi, ahkuí, ngò kut byi é hkyô lé, sê gyo akò lú?" ¹³ Nungmoq, Ngò lé, 'Sarà' ga le, 'Yhumsing' ga le, wut kô é gi, a shut; hkásu mù gà le, Ngò gi, haù yuq yhang nghut lhê. ¹⁴ Ngò, nungmoq é Sarà eq Yhumsing nghut sù lháng, nungmoq é hkyí lé chi byi é nghut le gi, nungmoq le, rayuq eq rayuq é hkyí lé chi byi lhum rã dut lhê. ¹⁵ Nungmoq gi, Ngò, nungmoq lé kut byi é su kut kó sháng gaq ngù, Ngò, nungmoq lé aìk kut shit tô é nghut lhê. ¹⁶ Ngò, nungmoq lé teng za taí

kôlé, dui-nhâng zoshâng gi, yhumsing htoq je kô é a nghut; lagyo gi, nhang kat é sù htoq je kô é a nghut. ¹⁷ Ahkuí, nungmoq gi, haù pé lé sé bekô nghut luí, châng kut kô é nghut jáng, hkungsô wó kó rã nghut lhê.

Yesuq Lé Ap Pyám Rã Lé, Te Tai É Hkyô

¹⁸ Ngò gi, nungmoq banshoq bang lé lhoq ang luí taí é a nghut; Ngò hkyin yu é bang lé gi, Ngò sê lhê. Nghut kôlhang, 'Haù ngá é muk lé bo zô é sù gi, ngo lé, yhâng é hkyihtáng la-nhik èq nâng htíng rã nghut lhê.' ¹⁹ gà é Chyúmdang lé, lhoq dik rã matú ru nghut lhê.

¹⁹ Haù a dut htoq shimá, Ngò, nungmoq lé taí kyô nyi é gi, haù dut é hkùn, Ngò gi, haù Yuq* nghut é lé, nungmoq wó lumjíng kó rã matú nghut lhê. ²⁰ Ngò, nungmoq lé teng za taí kôlé, Ngò nhang kat é sù lé, lhom hap yu é sù ó yuq nghut kôlé, Ngo lé hap yu é nghut bê; Ngo lé hap yu é sù ó yuq nghut kôlé, haù Ngo lé nhang kat é Sù lé hap yu é nghut bê." gà ri.

²¹ Yesuq gi, haù su ga taí é htâng má, myit wuihke nyi mù, saksé hkâm é gi, "Ngò, nungmoq lé teng za taí kôlé, nungmoq má é rayuq sù gi, Ngo lé ap pyám rã nghut lhê." gà ri.

²² Haù mù, Yhâng é chángzô pé gi, ó yuq lé taí záng nyi é hkyô lé, rago a sé kô é yanmai, rayuq eq rayuq wú tsuq lhum bum akò nghut ri. ²³ Haù Yesuq chyítap é chángzo rayuq gi, Yesuq é tangkhoí nâm má leq nge zung tô ri. ²⁴ Haù mù, Simun Petruq gi, chángzo haù yuq lé, loq lik kat mù, "Yhang, ó yuq lé lhoq ang luí, taí nyi é hkyô lé, myi wú aq." ga taí ri.

²⁵ Haù mù, chángzo haù gi, Yesuq é tangkhoí má sai leq nge zung mù, "Yhumsing ê, haù gi, ó yuq nghut lhê lú?" ga, Yhang lé myí ri.

²⁶ Yesuq gi, "Ngò, muk jap zo shí lé jum yù mù, byi é sù gi, haù yuq nghut lhê." ga tù taí luí, muk jap zo haù lé jum yù mù, Simun é yhangzo Yudaq Iskarut lé byi ri. ²⁷ Yudaq gi, muk haù lé yù zo kat é eq, Tsadán gi, yhâng chyáng wàng bê nghut ri.

Haù mù, Yesuq gi, "Nang kut rã é hkyô lé, hân kut aq hkoi." ga yhang lé taí kat ri. ²⁸ Nghut kôlhang, yhang lé, Yesuq haù su ga haù mù taí é hkyô lé, zohpoq haù má nyi tô é bang gi, rayuq lháng a sê gyo kó nghut ri. ²⁹ Haù Yudaq gi, ngùn zum sù nghut é yanmai, ra-am gi, haù Poi má rã é hkyô lé, é wuí rã matú, Yesuq taí ri ga luí le, myùng bang lé rajung jung byi nhang ri ga luí le, myit yu bum akò nghut ri. ³⁰ Yudaq gi, muk haù lé lhom yu eq, htoq ló byuq bê nghut ri. Haù u gi, mauchut bê nghut ri.

* 13:18 Hkya-on 41:9

* 13:19 Haù Yuq gà é gi, Hkrisduq lé gà é nghut lhê.

Petruq He-ngik Pyám Râ Lé, Yesuq Te Tai É Hkyô

Mht 26:31-35; Mrk 14:27-31; Luk 22:31-34

³¹ Haú yuq htoq ló byuq jáng, Yesuq tai é gi, "Ahkuí, haú Byu Yhangzo gi, hpungwup shingkang dan hú é nghut lui, Garai Gasang gi, haú Byu Yhangzó é yanmai, hpungwup shingkang dan hu bê nghut ri. ³² Garai Gasang gi, haú Byu Yhangzó é yanmai, hpungwup shingkang dan hú é nghut jáng, Yhang le, Yhang má haú Zo lé hpungwup shingkang dan hu nhâng rá nghut lhê; radá dâm dan hu nhâng rá nghut lhê.

³³ Ngá zo pé é, Ngò, nungmoq eq rahá nyi rá gi, razup za ru nghut alô. Nungmoq gi, Ngo lé hô kó rá nghut lhê; nghut kôlhâng, 'Ngò ló é jang má, nungmoq wó jé kó rá a nghut.' nghú, haú Yudaq byu pé lé, Ngò tai é eq rajung za, ahkuí, nungmoq lé le, Ngò tai lhê.

³⁴ Ngò, nungmoq lé, hkunmó asik byi to kô lé, nungmoq yhangchang chyitdap lhum keq. Ngò, nungmoq lé chyitdap é su, nungmoq yhangchang chyitdap lhum rá dut lhê. ³⁵ Nungmoq yhangchang chyitdap lhum kó é nghut jáng, nungmoq gi, Ngá é chángzó pé nghut é hkyô lé, byu lhunglhâng bang sé kó rá nghut lhê." gá ri.

³⁶ Haú hkún, Simun Petruq gi, "Yhumsing ê, Nang, hká shut ló rá thú?" ga, Yhang lé myi jáng, Yhang gi, "Ngò ló é jang má, nungmoq, ahkuí a wó châng kó rá nghut lhê. Nghut kôlhâng, htâng má gi, nungmoq châng ra kó rá nghut lhê." ga tú tai ri.

³⁷ Petruq gi, "Yhumsing ê, hai mù lui, ahkuí ngò Nang htâng a wó châng é thú? Ngò gi, Nang é matú, shí hkám rá ri ri nghut lhê." ga tai ri.

³⁸ Haú mù, Yesuq tai é gi, "Nang gi, gè gè yhang, Ngá é matú shí hkám rá thú? Ngò, nang lé teng za tai lé, woq a tún shimá, nang, Ngò lé sum dâm he-ngik pyám rá nghut lhê.

14

Yesuq, Yhâng É Chángzó Pé Lé Nhk Tĩng É Hkyô

¹ Nungmoq é i-myt nihklhum lé, myit wui myit hkê hkáduť nhâng kó. Garai Gasang lé lùm keq; Ngo lé le lùm keq. ² Ngá Wá é yhúm má, nyi jowó myo myo joq lhê; a joq é ru nghut le gi, noq mai, Ngò, nungmoq lé tai kyo rá nghut lhê. Ngò, haú má ló é gi, nungmoq é nyi jowó ló hên llang rá matú ru nghut lhê. ³ Ngò gi, ló mù, nungmoq é matú nyi jowó ló hen é nghut jáng, Ngò nyi é jang má nungmoq le wó nyi shoq, Ngò eq rahá nyi rá matú, Ngò dum tau lé mù, nungmoq lé, lé shuí yù rá nghut lhê. ⁴ Ngò ló é jang má jé é hkyô lé, nungmoq sé lhê." gá ri.

Yesuq Za Hkyô

⁵ Haú hkún, Htomaq gi, Yhang lé, "Yhumsing ê, Nang hká shut ló é lé lháng, ngamoq a sé le nhing, hkyô haú lé, ngamoq hkásu kut wó sé rá thú?" ga myi ri.

⁶ Yesuq gi, "Ngò gi, hkyô nghut lhê; haú tengmán hkyô eq asak le nghut lhê. Ngò mai za a nghut jáng, ó yuq le, Íwá chyáng wó jé é a nghut. ⁷ Nungmoq, gè gè yhang, Ngo lé sé kô é nghut le gi, Ngá Wá lé le, nungmoq sé kó rá nghut lhê. Ahkuí mai, nungmoq gi, Yhang lé sé kô é htoq agó, myàng le myang wú bekó nghut lhê." ga tú tai ri.

⁸ Haú hkún, Hpilip gi, "Yhumsing ê, ngamoq lé, haú Íwa tún shit laq, haú hkún, ngamoq nhik shí rá nghut lhê." ga tai ri.

⁹ Yesuq tú tai é gi, "Hpilip ê, Ngò, nungmoq eq shí myáng lháng nyi lò bê le nhing, nang, Ngo lé a sé thú? Ngo lé myang é sù gi, haú Íwá lé myàng bê nghut ri; haú nghut le nhing, 'Ngamoq lé, haú Íwa tún shit laq.' nghú, nang hkásu wó tai lhê thú?" ¹⁰ Ngò gi, haú Íwá má nghut nyi lui, haú Íwá gi, Ngò má nghut nyi é hkyô lé, nang a lumjǎng thú? Ngò, nungmoq lé tai é dang haú pé gi, Ngá é myit mai tai é a nghut; haú Ngò má lúng nyi é Íwá sheq, Yhâng é mù zui nyi é ru nghut lhê. ¹¹ Ngò gi, haú Íwá má nghut nyi lui, haú Íwá gi, Ngò má nghut nyi lhê nghú é lé lumjǎng keq; haú a nghut jáng, kut shit é limik kumlhá pé dōng za lháng, lumjǎng keq. ¹² Ngò, nungmoq lé teng za tai kólé, Ngo lé lumjǎng é sù gi, Ngò kut é muzó lé kut rá nghut lhê. Ngò gi, haú Íwá chyáng ló rá nghut é yanmai, haú yuq gi, hau htoq je kó é muzó pé lé lháng kut rá nghut lhê. ¹³ Haú Yhangzó é yanmai, Íwá é hpungwup shingkang wó hú ló shoq, Ngá é mying lé lang lui, nungmoq hai jung dung kôlhâng, Ngò gyo byi rá nghut lhê. ¹⁴ Nungmoq gi, Ngá é mying lé lang lui, hai dung kôlhâng, Ngò gyo byi rá nghut lhê.

Chyoiyung Woi-nyí Byi Râ Danggidiq

¹⁵ Nungmoq gi, Ngo lé chyitdap kô é nghut jáng, Ngò hkyô tô é hkunmó pé lé, cháng kó rá nghut lhê. ¹⁶ Haú Íwá gi, nungmoq eq ahtum abyuq nyi nyi rá nghut é, hpaqchyí byi Sù gotú rayuq, nungmoq lé byi rá matú, Ngò gi, haú Íwá lé dung rá nghut lhê. ¹⁷ Haú yuq gi, tengmán é Woi-nyí nghut lhê. Haú mingkan gi, Woi-nyí haú lé a myàng a sé é yanmai, Yhang lé a wó hap yu é nghut lhê. Nghut kôlhâng, Yhang gi, nungmoq eq rahá nyi nyi é nghut lui, nungmoq má nyi to rá Sù nghut é yanmai, nungmoq gi, Yhang lé sé akô. ¹⁸ Ngò gi, nungmoq lé, chuizó pé dōng pyám to rá a nghut; nungmoq chyáng Ngò dum jé lé rá nghut lhê. ¹⁹ Adé myáng má, haú mingkan gi, Ngo lé a myàng lo rá nghut lhê; nghut kôlhâng, nungmoq gi, Ngo lé myàng kó rá nghut lhê. Hkásu mù gá le, Ngò gi, asak

dui nyi é nghut mù, nungmoq le dui kó rá nghut lhê. ²⁰ Ngò gi, Ngá Wà chyáng nghut nyi é lé le, nungmoq gi, Ngò má nghut nyi é lé le, Ngò gi, nungmoq má nghut nyi é lé le, haù buinyà má, nungmoq sé kó rá nghut lhê. ²¹ Ngá é hkunmó pé lé wó mù, châng kut é sù ó yuq nghut kôle, Ngo lé chyitdap é sù nghut ri. Ngo lé chyitdap é sù lé gi, Ngá Wa chyitdap rá nghut lhê; Ngò le, haù yuq lé chyitdap lui, Ngá gúng lé yhang, yhang lé shít rá nghut lhê." gá ri.

²² Hau htâng, (Yudaq Iskarut a nghut sù) Yudaq gi, "Yhumsing ê, Nang gi, haù mingkan lé Nang gúng a shít e za, ngamoq lé shít rá nghut é gi, haù mù nghut lhê thú?" ga myi ri.

²³ Haù hkùn, Yesuq tù tai gi, "Rayuq yuq, Ngo lé chyitdap é nghut le gi, Ngá dang lé gyo rá nghut lhê. Ngá Wa le, haù yuq lé chyitdap rá nghut lui, Ngá hpe gi, haù yuq chyáng lé mù, yhang eq rahá nyi rá nghut lhê. ²⁴ Ngo lé a chyitdap é sù gi, Ngá dang lé gyo rá a nghut. Nang wó gyó é dang shí pé gi, Ngá myit mai tai é a nghut; dang haù pé gi, Ngo lé nhang kat é Sù, haù Íwá é ru nghut lhê.

²⁵ Ngò gi, shí pé banshoq lé, nungmoq eq rahá nyi tô ashí u lé tai bê nghut lhê. ²⁶ Nghut kôlháng, Ngá é mying dông, haù Íwá nhang kat rá nghut é, hpaqchyí byi Sù nghú é, haù Chyoiyúng Woi-nyí gi, nungmoq lé, jung hkangmó mhoq byi rá eq, Ngò, nungmoq lé tai kyo bê hkyó lhunglháng, nungmoq lé lhoq pun rá nghut lhê. ²⁷ Ngò gi, nungmoq chyáng, nguingón hkyó tô to byi bê; Ngá é nguingón hkyó, Ngò, nungmoq lé byí é nghut lhê. Ngò gi, mingkan byí é dông, nungmoq lé byí é a nghut. Nungmoq é i-myt nhiklhám lé, myit wui myit hke é eq gyuq kyúm é hkáduat nháng kó.

²⁸ 'Ngò gi, ló byuq lui, nungmoq chyáng dum taù lé rá nghut lhê.' nghú, Ngò tai é lé, nungmoq wó gyó yù bê nghut lhê. Nungmoq, Ngo lé chyitdap kô é nghut le gi, haù Íwá chyáng Ngo ló rá nghut é hkyó lé, nungmoq gabú kó rá nghut lhê; hkásu mù gá le, haù Íwá gi, Ngá htoq je ko Sù nghut lhê. ²⁹ Haù dut é hkùn, nungmoq lumjing kó sháng gaq nghú, ahkuí, haù a dut shimá, Ngò, nungmoq lé tai kyó é nghut lhê. ³⁰ Ahkuí mai, Ngò gi, nungmoq lé, dang myo myo wó nyô rá a nghut lo; hkásu mù gá le, mingkan shí é zau gi, jé lé lo nyi bê nghut ri. Haù yuq gi, Ngo lé up rá ahkáng haù a wó é sù nghut ri. ³¹ Nghut kôlháng, haù Íwá lé Ngò chyitdap é hkyó, mingkan sé sháng gaq nghú, Ngò gi, Ngá Wa hkyó tô é hkunmó eq roq za kut nyi lhê.

Toq keq, e ló sháng hkoí.

15

Tsibiyiq Nuí Eq Akoq Pé É Hkyó

¹ Ngò gi, haù tsibiyiq nuí akýing nghut lhê; Ngá Wa gi, tsibiyiq hkýám yhumsing nghut lhê. ² Yhang gi, ashí a zui é akoq hkangmó lé, Ngá chyáng mai kyik pyám lui, ashí zui é akoq hkangmó lé kúm gi, ashí je myo zui sháng gaq ga, shang pyám byí ri. ³ Nungmoq gi, Ngò, nungmoq lé tai é mungdang hau é yanmai, sanséng gú nghut bekó nghut ri. ⁴ Ngò má nyi nyi keq; Ngò le, nungmoq má nyi nyi rá nghut lhê. Akoq hkangmó gi, tsibiyiq nuí má nyi nyi é za a nghut jáng, yhang baù ashí wó zui é a nghut. Haù eq rajung za, nungmoq le, Ngò má nyi nyi é za a nghut jang, ashí wó zui kó rá a nghut.

⁵ Ngò gi, tsibiyiq nuí nghut lhê; nungmoq gi, akoq pé nghut akò. Byù rayuq yuq, Ngò má nyi nyi é nghut lui, Ngò gi, yhang má nyi nyi é nghut jáng, haù yuq gi, ashí myo myo zui rá nghut lhê; hkásu mù gá le, Ngò má gang jáng, nungmoq gi, haù le a wó kut kô é nghut lhê. ⁶ Ngò má a nyi nyi é sù gi, haù dù pyám é hui lui, kyuq shí byuq é akoq eq wui ri; haù sù é akoq pé gi, byu pé eq guq yù mù, myihkyóm má dù kat pyám é hui lui, nyé gyó byuq rá nghut lhê. ⁷ Nungmoq gi, Ngò má nyi nyi lui, Ngá é dang pé gi, nungmoq má bo nyi é nghut le gi, nungmoq ó nau é haù nghut kôlháng, dung keq; haù hkùn, nungmoq lé byi rá nghut lhê. ⁸ Nungmoq gi, haù ashí ga-myhó zui é dông, Ngá Wá é hpungwup shinghang lé lhoq htoq shít é nghut lui, Ngá é chángzò pé nghut é hkyó lé tún shít nyi bekó nghut ri.

⁹ Haù Íwá gi, Ngo lé chyitdap é su, Ngò gi, nungmoq lé chyitdap é nghut lhê. Ahkuí, Ngá é chyitdap myit má gíng nyi keq. ¹⁰ Ngò gi, Ngá Wá é hkunmó lé châng é nghut lui, Yháng é chyitdap myit má gíng nyi é su, Ngá é hkunmó lé, nungmoq châng nyi kô é nghut jáng, nungmoq gi, Ngá é chyitdap myit má gíng nyi kó rá nghut lhê. ¹¹ Nungmoq má Ngá é gabú hkyó joq nyi rá eq, nungmoq é gabú hkyó wó bying jup rá matú, Ngò, nungmoq lé, dang shí pé tai é nghut lhê. ¹² Ngò, nungmoq lé chyitdap é su, nungmoq yhangchang chyitdap lhám keq; haù gi, Ngá é hkunmó nghut lhê. ¹³ Haù yhumsing é luzúm wui é matú, yhumsing é asak ap byí pyám é chyitdap myit htoq kô é, chyitdap myit gi, ó yuq chyáng le a bò nghut ri. ¹⁴ Ngò hkyó tô é hkunmó pé lé, nungmoq châng kut é nghut jáng, nungmoq gi, Ngá é luzúm wui nghut bekó. ¹⁵ Ngò gi, Ngá Wá chyáng mai Ngò wó gyó yu é hkyó lhunglháng, nungmoq lé sé nháng bê nghut é yanmai, nungmoq lé, dui-nháng zosháng wui nghú, a wut ló e za, luzúm wui nghú wut é nghut lhê; hkásu mù gá le, dui-nháng zosháng gi, yhang yhumsing hpò é muzó lé a châng sé nghut ri.

16 Nungmoq, Ngo lé hkyin yu é a nghut, Ngo sheq, nungmoq lé, htoq e ló mù, gíng nyi é ashí zui rá matú hkyin masat tó é ru nghut lhê. Hau hkún sheq, Ngá é mying lé lang mù, haú Íwá chyáng nungmoq hái jung dung kôle, Yhang byi rá nghut lhê. 17 Nungmoq yhangchang chyitdap lhum keq; haú gi, Ngá é hkunmó nghut lhê.

Haú Mingkan Gi, Chángzô Pé Lé A Jú É Hkyô

18 Haú mingkan, nungmoq lé a jú é nghut jáng, Ngo lé hí a jú kut bê nghut é lé, sé nyi keq. 19 Nungmoq gi, haú mingkan eq sêng é bang nghut é nghut jáng, haú mingkan gi, yhang eq sêng é bang nungmoq lé chyitdap rá nghut lhê. Nghut kôlhang, nungmoq lé gi, Ngô, haú mingkan mai hkyin htoq yú bê nghut lui, nungmoq gi, haú mingkan eq a séng lo kô é yanmai, mingkan gi, nungmoq lé a jú é nghut ri. 20 'Dui-nhâng zoshâng gi, yhâng é yhumsing htoq je kô é a nghut.' nghú, Ngô, nungmoq lé tai é dang pé lé bún nyi keq. Ngo lé lhâng, yhangmoq zing-ri yú bekô nghut le gi, nungmoq lé le, zing-ri kó rá nghut lhê. Ngô mhoqshit é hkyô lé, yhangmoq cháng kô é nghut le gi, nungmoq mhoqshit é lé le, cháng kó rá nghut lhê. 21 Nghut kôlhang, yhangmoq gi, Ngá é mying é yanmai, nungmoq lé haú su kut kó rá nghut lhê; hkâsu mù gá le, haú Ngo lé nhang kat é Sù lé, yhangmoq a sé kôlui nghut ri. 22 Yhangmoq lé, Ngô a lé nyo wú é nghut le gi, yhangmoq mara bò kó rá a nghut; nghut kôlhang, ahkuí gi, yhangmoq mara wó tai hkyut rá a nghut lo. 23 Ngo lé a jú é sù gi, Ngá Wa lé le a jú é sù nghut ri. 24 Haú ó yuq lhâng a wó kut é muzó lé, Ngô, yhangmoq chyáng a kut é nghut le gi, yhangmoq mara bò kó rá a nghut; ahkuí kúm gi, laklai kumlhá haú pé lé yhangmoq myang nyi kôlhang, Ngô eq Ngá Wa lé a jú kô é nghut ri. 25 Haú gi, 'Yhangmoq gi, jumgúyô má Ngo lé a jú kut akó nghut ri.'* ga, yhangmoq é tará má ká tó é dang lé lhoq dik é nghut ri.

26 Haú Íwá chyáng má é, Ngô nhang kat rá nghut é, Íwa mai htoq lé lo é tengmán é Woi-nyí nghut é, haú hpaqchyí byi Sù jé lé é hkún, Ngá é hkyô lé saksé hkám byi rá nghut lhê. 27 Nungmoq le, Ngô eq rahá sâng-hi mai nyi bekô nghut é yanmai, saksé hkám byi ra kó rá nghut lhê.

16

1 Nungmoq gi, myit lingbat jowò a joq kó sháng gaq nghú, haú pé banshoq lé, Ngô, nungmoq lé tai kyo bê nghut lhê. 2 Yhangmoq gi, nungmoq lé, tarajong mai hkat htoq pyám kó rá nghut lhê; ó yuq nghut kôle, yhang mai nungmoq lé sat pyám é

hkún, yhang gi, haú dông mai Garai Gasang lé dojaú nyi lhê ga myit yu é ahkyíng, gè gè yhang, jé rá nghut lhê. 3 Yhangmoq gi, haú Íwa lé le, Ngo lé le, a sé kô é yanmai, haú su kut kó rá nghut lhê. 4 Nghut kôlhang, nungmoq lé, Ngô sidiq byi é hkyô lé, ahkyíng jé jáng nungmoq bún nyi kó sháng gaq nghú, Ngô haú hkyô tai kyô é nghut lhê. Ngô gi, nungmoq eq rahá nghut nyi é yanmai, haú hkyô lé, hí hkún nungmoq lé a tai kyô é nghut lhê.

Chyoiyúng Woi-nyí é muzó

5 Nghut kôlhang, ahkuí, Ngô gi, Ngo lé nhang kat Su chyáng ló rá nghut lhê. Nghut kôlhang, nungmoq ó yuq le, 'Nâng, hká shut ló rá lhú?' ga, Ngo lé a myi kó nghut ri. 6 Ngô, nungmoq lé, haú hkyô pé tai kyô é yanmai, nungmoq é i-myit unghkaú má iyon hkyô byíng to bekô nghut ri. 7 Nghut kôlhang, Ngô, nungmoq lé teng za tai kôlé, Ngô ló byuq é gi, nungmoq é matú je gè rá hkyô ru nghut lhê. Ngô ló byuq e za a nghut jáng, haú hpaqchyí byi Sù gi, nungmoq chyáng lé rá a nghut; Ngô ló jáng sheq, Yhang lé, Ngô, nungmoq chyáng nhang kat byi rá nghut lhê. 8 Yhang jé lé é hkún, Yhang gi, haú mara wó é eq séng lui le, dingmán hkyô eq séng lui le, tará jéyáng hkyô eq séng lui le, haú mingkan lé tún shit rá nghut lhê. 9 Haú yubak mara wó é eq séng lui ga jang, byu pé gi, Ngo lé a lumjíng kô é yanmai nghut ri. 10 Haú dingmán hkyô eq séng lui ga jang, Ngô gi, haú Íwá chyáng ló rá nghut lui, nungmoq, Ngo lé a myàng lo kó rá nghut é yanmai nghut ri. 11 Haú tará jéyáng hkyô eq séng lui ga jang, mingkan shi é zau gi, mara byi é lui é nghut é yanmai nghut ri.

12 Ngô gi, nungmoq lé tai rá hkyô myo myo wó ashí; nghut kôlhang, ahkuí, nungmoq wó hkám kó rá a nghut. 13 Nghut kôlhang, haú tengmán é Woi-nyí jé lé é hkún, Yhang gi, tengmán hkyô lhunglháng lé shuí sé rá nghut lhê. Yhang gi, Yhâng myit dông tai rá a nghut; Yhang, wó gô yu é hkyô lé za tai lui, dut lò rá hkyô pé lé le, nungmoq chyáng tai pyô rá nghut lhê. 14 Yhang gi, Ngô wó é lé, yú mù, nungmoq lé tai kyô é eq sé nhang é dông, Ngá é hpungwup shíngkang lé hú ló nhâng rá nghut lhê. 15 Haú Íwa wó é lhunglháng gi, Ngá é chyat nghut lhê. Hau é yanmai, haú Woi-nyí gi, Ngô wó é lé yú mù, nungmoq lé sé nhâng rá nghut lhê nghú, Ngô tai é nghut lhê.

16 Adé myáng má, nungmoq gi, Ngo lé a myàng lo kó rá nghut lhê; hau htàng, dum adé myáng má, nungmoq gi, Ngo lé myàng kó rá nghut lhê." gá ri.

Changzô Pé É Iyon Hkyô Gi, Gabú Hkyô Taiú Dut Rá

* 15:25 Hkya-on 35:19; 69:4

¹⁷ Yhâng é chángzô pé ra-am gi, "Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê.' gâ é eq 'Ngò gi, Íwâ chyáng ló rá nghut é yanmai nghut lhê.' ga, Yhang tai é gi, hai jung gâ nau é nghut lhê lú?" ga, rayuq eq rayuq myí lhum bum akô. ¹⁸ Hau htoq agó, yhangmoq gi, "Adê myáng má,' gâ é gi, Yhang hai jung gâ nau lhê lú? Nga-nhúng gi, Yhang hai tai nau é lé a sé gyo." ga, tai lhum bum akô nghut ri.

¹⁹ Yesuq gi, yhangmoq myi nau kô é hkyô lé sé ri; hau mù, Yhang, yhangmoq lé tai é gi, "Adê myáng má, nungmoq gi, Ngo lé a myàng lo kó rá nghut lhê; hau htâng, dum adê myáng má, nungmoq gi, Ngo lé myàng kó rá nghut lhê.' nghù, Ngò tai é lé, hai jung gâ nau lhê laq nghù, rayuq eq rayuq myi lhum nyi akô lú?" ²⁰ Ngò, nungmoq lé teng za tai kôlé, hau mingkan gi, gabú nyi é u lé, nungmoq gi, ngaù é eq iyon yón é hui kó rá nghut lhê. Nungmoq gi, iyon yón é hui kó rá nghut lhê; nghut kôlhang, nungmoq é iyon hkyô gi, gabú hkyô tau dut rá nghut lhê. ²¹ Myiwe gi, zoshâng hkù rá nghut jâng, zohkù-nò nó rá ahkyíng jé bê nghut é yanmai, myit chiq nyi ri; nghut kôlhang, zoshâng lé wó hku htoq kat é hkùn gi, mingkan htoq má zoshâng rayuq wó hku to bê nghut lui, yhang gabú é yanmai, hau no hpu é hkyô lé a bun byuq lo nghut ri. ²² Hau eq rajung za, ahkuí gi, nungmoq iyon yón é ahkyíng nghut ri; nghut kôlhang, Ngò, nungmoq lé dum hui é hkùn, nungmoq gi, gabú kó rá nghut lhê; nungmoq é gabú hkyô hau lé, nungmoq chyáng mai ó yuq èq le wó yu pyám byi rá a nghut. ²³ Hau buinyi má, nungmoq gi, Ngo lé, hai le a dung lo kó rá nghut lhê. Ngò, nungmoq lé teng za tai kôlé, nungmoq gi, Ngá myíng lang lui, Ngá Wá chyáng hai dung kôle, Yhang byi rá nghut lhê. ²⁴ Ahkuí jé shoq, nungmoq gi, Ngá myíng lé lang lui, hai le a dung wú shi kó nghut ri. Dung keq, hau hkùn, nungmoq myang hap yù kó rá nghut lui, nungmoq é gabú hkyô gi, byíng Jup lò rá nghut lhê.

²⁵ Ngò gi, nungmoq lé, dangtú đông hau pé tai kyo bê nghut lhê; nghut kôlhang, Ngò gi, dangtú a chùng ló e za, hau Íwa eq sêng é hkyô, nungmoq lé san za tai kyo é ahkyíng jé rá nghut lhê. ²⁶ Hau buinyi má, nungmoq gi, Ngá é myíng lé lang lui dung kó rá nghut lhê. Ngò gi, nungmoq é matú, hau Íwâ chyáng dung byi rá nghù tai nyi é a nghut. ²⁷ Hkâsu mù gâ le, nungmoq gi, Ngo lé chiytdap kó é eq, Ngò gi, Íwa Garai Gasâng chyáng mai jé lé é Sù nghut é lé, nungmoq lumjíng kô é yanmai, hau Íwa yhang, nungmoq lé chiytdap é nghut lhê. ²⁸ Ngò gi, hau Íwâ chyáng mai htoq lé mù, mingkan má lé jé wang é nghut

lhê; ahkuí, Ngò gi, mingkan mai htoq mù, hau Íwâ chyáng dum tau ló rá nghut lhê." gâ ri.

²⁹ Hau hkùn, Yesuq é chángzô pé gi, "Ahkuí, Nàng gi, dangtú a chùng é đông, san za tai kyô nyi é nghut bê! ³⁰ Nàng gi, lhungháng lé sé é sù nghut é lé le, Nàng lé, ó yuq èq le dangmyi myi nó a rá é hkyô lé le, ahkuí, ngamoq wó sé bê. Hau é yanmai, Nàng gi, Garai Gasâng chyáng mai lé é sù nghut é lé, ngamoq lumjíng lhê." ga tai bum akô.

³¹ Hau hkùn, Yesuq tú tai é gi, "Nungmoq, ahkuí lumjíng bekô lú?" ³² Nghut kôlhang, nungmoq gi, lhoq pyo pyám é hui lui, Nàng lé baú za to pyám to kômù, ó le ô yhùm shut ló byuq rá ahkyíng jé lo nyi bê nghut ri; ahkuí lhang jé to bê. Nghut kôlhang, Ngò gi, Ngò baú za a nghut; hkâsu mù gâ le, Ngá Wa gi, Ngò eq rahá nghut nyi lhê.

³³ Nungmoq gi, Ngò má nguigon hkyô wó kó sháng gaq nghù, Ngò gi, hau hkyô pé lé tai kyô é nghut lhê. Nungmoq gi, mingkan shí má, wuihke hkyô hui kó rá nghut lhê; nghut kôlhang, myit wum lhoq kíng keq. Ngò gi, mingkan lé ung pyám bê nghut lhê." gâ ri.

17

Yesuq Kyúdung É Hkyô

¹ Yesuq gi, hau su ga tai é htâng má, mauhkung shut tu wú lui, kyúdung é gi, "Áwa é, ahkyíng jé bê nghut ri; hau Nung Zo gi, Nang lé hpungwup shingkan wó hu nhâng sháng gaq, Nung Zo lé hpungwup shingkan hù ló nhâng laq ô! ² Hkâsu mù gâ le, Nàng mai Yhang lé ap byi tô é bang banshoq lé, Yhang, ahtum abyuq é asak wó byi sháng gaq ga, Nàng gi, byù lhungháng bang lé up rá ahkáng, Yhang lé byi tô é yanmai nghut ri. ³ Nang za tengmán é Garai Gasang nghut é eq Nang nhang kat é sù Yesuq Hkrisduq lé, sé é gi, ahtum abyuq é asak nghut lhê. ⁴ Ngò gi, Nàng, Ngo lé wùn waq nhang é muzó lé lhoq pán é đông, myidám htoq má, Náng é hpungwup shingkan lé lhoq htoq shit bê nghut lhê. ⁵ Áwa é, hau mingkan lhang a joq shí mai, Ngò, Nàng eq rahá chôm wó é hpungwup shingkan èq, ahkuí, Náng é myoq hí má, Ngo lé hpungwup shingkan dan hu nhâng laq.

Chángzô pé matú, Yesuq kyúdung byi é hkyô

⁶ Mingkan mai, Nàng, Ngo lé hkyin htoq yù byi é bang lé, Ngò gi, Náng é myíng lhoq htoq shit bê nghut lhê. Yhangmoq gi, Náng é byu pé nghut bekô; Nàng gi, yhangmoq lé, Ngá é loq má ap byi bê nghut lui, yhangmoq gi, Náng é dang lé châng kut bekô nghut ri. ⁷ Nàng, Ngo lé byi é lhungháng gi, Náng chyáng má é nghut é lé, ahkuí, yhangmoq sé

bekô nghut ri. ⁸ Hkâsu mù gà le, Nàng, Ngo lé byi kat é mungdang pé lé, Ngò, yhangmoq lé byi bê nghut lui, yhangmoq gi, hau pé lé hap yù bekô nghut ri; Ngò gi, Náng chyáng mai lé é sù nghut é lé le, yhangmoq hkyak sé akò; Nàng, Ngo lé nhang kat é hkyô lé le, yhangmoq lumjìng bekô nghut ri. ⁹ Ngò gi, yhangmoq é matú kyùdung byi lhê. Ngò gi, hau mingkan byu pé é matú dung byi nyi é a nghut; Nàng, Ngo lé ap byi tô é bâng é matú sheq dung byi nyi é ru nghut lhê; hkâsu mù gà le, yhangmoq gi, Náng é byu pé nghut akò. ¹⁰ Ngò wó é lhunglhang gi, Náng é chyat nghut mù, Nàng wó é lhunglhang le, Ngá é chyat nghut lhê. Hau mù, Ngò gi, yhangmoq má hpungwup shingkan hù é hui bê nghut lhê. ¹¹ Ngò gi, Nàng chyáng lò rà nghut lhê mù, mingkan htoq má nyi nyi rà a nghut lo; nghut kôlhang, yhangmoq gi, mingkan htoq má nyi nyi shirà nghut lhê; chyoyúng é Áwa ê! Ngá hpe gi, ragùng za nghut é su, yhangmoq le ragùng za wó dut nyi kó sháng gaq, Nàng, Ngo lé byi é, hau Náng myìng é a-tsam eq yhangmoq lé upzúng nyi aq. ¹² Ngò gi, yhangmoq eq rahá nghut nyi é u lé, yhangmoq lé upzúng bê nghut lui, Nàng, Ngo lé byi é myìng hau eq, yhangmoq lé rago zúng bê nghut lhê. Hau Chyúmdang lhoq dik sháng gaq ga, hau bang má é htên byoq hui rà sù mai lai lui, ó yuq le a byuq byuq é nghut lhê.

¹³ Ngò gi, ahkuí, Náng chyáng lò rà nghut bê; nghut kôlhang, Ngá é gabú hkyô gi, yhangmoq chyáng bying jup sháng gaq nghù, Ngò gi, hau pé lé mingkan má tai é nghut lhê. ¹⁴ Ngò gi, yhangmoq lé, Náng é mungdang byi bê nghut lhê; hau mingkan gi, yhangmoq lé a jú nghut ri; hkâsu mù gà le, Ngò gi, mingkan má é a nghut é su, yhangmoq le, mingkan má é a nghut kó é yanmai nghut ri. ¹⁵ Ngò kyùdung é gi, Nàng, yhangmoq lé mingkan mai shui htoq yù rà matú dúng é a nghut, hau agè ashop su chyáng mai, yhangmoq lé upzúng yù rà matú sheq dúng é ru nghut lhê. ¹⁶ Ngò gi, mingkan má é a nghut é su, yhangmoq le, mingkan má é a nghut kó. ¹⁷ Yhangmoq lé, hau tengmán hkyô eq lhoq sân-yúng yù laq; Náng é mungdang gi, tengmán hkyô nghut ri. ¹⁸ Nàng, Ngo lé, mingkan má nhang hâng kat é su, Ngò le, yhangmoq lé, mingkan má nhang hâng kat é nghut lhê. ¹⁹ Yhangmoq lé, tengmán hkyô má wó lhoq sân-yúng yù kó sháng gaq nghù, Ngò gi, yhangmoq é matú, yhumsing gùng lé lhoq sân-yúng yu é nghut lhê.

Lumjìng Bang Lunglhang É Matú, Yesuq Kyùdung Byi É Hkyô

²⁰ Ngò gi, yhangmoq é matú baú za kyùdung byi é a nghut; Yhangmoq é danglu é yanmai, Ngo lé lumjìng kó rà bâng é matú

le, Ngò kyùdung byi é nghut lhê. ²¹ Hau mù, yhangmoq banshoq bang gi, rading ralhum za dut nyi kó sháng gaq. Hau mingkan gi, Nàng, Ngo lé nhang kat é hkyô lé wó lumjìng sháng gaq; Áwa, Nàng gi, Ngò má nyi nyi mù, Ngò gi, Nàng má nyi nyi é su, yhangmoq le, ngá hpe má nyi nyi kó sháng gaq. ²² Ngá hpe gi, ragùng za nghut é su, yhangmoq le, rading ralhum za dut nyi kó sháng gaq nghù, Ngò gi, Nàng, Ngo lé byi é hpungwup shingkan lé, yhangmoq lé byi bê nghut lhê. ²³ Nàng, Ngo lé nhang kat bê hkyô eq Nàng, Ngo lé chyitdap é su, yhangmoq lé chyitdap é hkyô lé, hau mingkan wó sé rà matú, yhangmoq gi, gumjup shoq rading ralhum za wó dut kó sháng gaq nghù, Ngò gi, yhangmoq má nyi nyi lui, Nàng gi, Ngò má nyi nyi é nghut lhê.

²⁴ Áwa ê, hau mingkan lhang a joq shi mai, Nàng, Ngo lé chyitdap lui byi tô é hpungwup shingkan hau lé, Nàng, Ngo lé byi tô é bang, wó myàng kó rà matú le, Ngò nyi é jang má, Ngò eq rahá wó nyi kó rà matú le, Ngò ô nau ri.

²⁵ Dingmán é Áwa ê, hau mingkan gi, Nang lé a sé kôlhang, Ngò gi, Nang lé sê lhê; Nàng, Ngo lé nhang kat é hkyô lé gi, yhangmoq sé akò nghut ri. ²⁶ Nàng, Ngo lé chyitdap é chyitdap myit gi, yhangmoq má wó joq nyi rà matú le, Ngò gi, yhangmoq má wó nyi nyi rà matú le, yhangmoq lé, Ngò, Nang é hkyô sé nhâng bê nghut lui, xoq mù sé nhang nyi shirà nghut lhê." gà ri.

18

Yesuq Chyup Yù Hui É Hkyô

Mht 26:47-56; Mrk 14:43-50; Luk 22:47-

53

¹ Yesuq gi, hau su ga kyùdung é htàng má, Yhâng é chángzô pé eq rahá, Kedron wuihkung mai lai byit dap lò lui, hau hpoq má joq é hkyâm ralhum má wang e akò nghut ri.

² Hkyâm hau gi, Yesuq eq Yhâng é chángzô pé lhoq hui hui kut é jowò nghut é yanmai, hau Yesuq lé ap pyám rà sù Yudaq le sé ri.

³ Hau mù, Yudaq gi, hau hkyangjong agyi pé eq Hparishe pé chyáng mai nhang kat é noqkuq yhùm zúng bang ra-am eq gyezo rajùm lé, hau jowò shut shui wang lé lo ri. Hau bang gi, myihu, myibung eq shâm lham pé chung lé lo akò.

⁴ Yesuq gi, Yhang má dut lò rà hkyô lunglhang lé sé gù nghut mù, htoq ê lui, yhangmoq lé, "Nungmoq, ó yuq lé ho akò lú?" ga myi ri.

⁵ Hau hkùn, yhangmoq gi, "Nazaret wà byù Yesuq lé ho lhê." ga tù tai kôjáng, Yesuq gi, "Ngò gi, hau yuq nghut lhê." ga tai ri. (Yesuq lé ap pyám sù Yudaq le, yhangmoq eq rahá yap tô ri.) ⁶ "Ngò gi, hau yuq nghut

lhê." ga Yesuq tai kat é hkûn jáng, yhangmoq gi, nungzut zat mù, myigùng má lêng leq ló bum akô nghut ri.

⁷ Yhang gi, "Nungmoq, ó yuq lé ho akô lúhú?" ga, yhangmoq lé dum myi kat jáng, yhangmoq gi, "Nazaret wá byù Yesuq lé ho lhê." ga tai akô.

⁸ Háu hkûn, Yesuq gi, "Ngò gi, háu yuq nghut lhê nghû, nungmoq lé tai kyo bê nghut lhê; nungmoq, Ngo lé hô kô é nghut le gi, shí bang lé ló nhang pyám keq." ga tú tai ri. ⁹ Háu gi, "Nàng, Ngo lé byi tô é bang rayuq le lhang, Ngò, a lhoq hpyuq pyám." ga, Yhang tai tô é dang dik rá matú nghut ri.

¹⁰ Háu hkûn, Simun Petruq gi, shâm wun tô é nghut lui, shâm shê mù, háu hkyangjong mó é dui-nhâng zôshang é loqyo nohkyap lé zân hpyit kat byi ri. (Dui-nhâng zoshâng háu yuq é mying gi, Malhku gâ ri.)

¹¹ Háu mù, Yesuq gi, Petruq lé, "Náng é shâm lé, shambyâng má xâng pyám aq! Háu Íwa, Ngo lé byi é góm* lé, Ngò a shuq é wó nyi rá lúhú?" ga tai kat ri.

Yesuq Lé, Anna Chyang Shui É É Hkyô
Mht 26:57-58; Mrk 14:53-54; Luk 22:54

¹² Háu htâng, gyezo háu jûm eq yhangmoq é gyezau hpó, Yudaq byu pé é ming-suwún wú gi, Yesuq lé chyup yù mù, túi akô nghut ri. ¹³ Yhangmoq gi, háu zân má é hkyangjong mó Kayahpaq é yhâng-tsa Anna chyang hí, Yhang lé shui ló akô nghut ri. ¹⁴ Kayahpaq gi, byu pé é matú rayuq shí hkám byi le je gè rá nghut lhê ga, háu Yudaq byu pé lé hpaqchyí byi é sù yuq nghut ri.

Yesuq Lé, Petruq Sâng-hi Dam He-ngik Pyâm É Hkyô

Mht 26:69-70; Mrk 14:66-68; Luk 22:55-57

¹⁵ Simun Petruq eq gotú chángzo rayuq gi, Yesuq htâng châng e ló akô nghut ri. Gotú chángzo háu yuq gi, hkyangjong mó lé rago sé lhê nghut mù lui, hkyangjong mó é yhumwàng hkaú shut, Yesuq é htâng má châng wang ló ri. ¹⁶ Petruq kúm gi, hkúmdong shinggan má lánq yap tô ri. Háu hkyangjong mó lé rago sé é sù, gotú chángzo háu yuq gi, taù htoq ló mù, hkum zúng é myiwe myhí lé tai lui, Petruq lé shui hâng yu ri.

¹⁷ Háu hkûn, háu hkum zúng é myiwe myhí gi, Petruq lé, "Nàng gi, háu yuq é chángzo pé má é rayuq a nghut lúhú?" ga myi jáng, yhang gi, "Ngò a nghut." ga tú tai ri.

¹⁸ Háu u lé, gyoq é yanmai, dui-nhâng zoshâng wui eq noqkuq yhûm zúng bang gi, yhangmoq gyoq gâng rá matú myigyé eq mut tô é myihkyóm má, gyoq gang yap nyi bum akô. Petruq le, yhangmoq eq rahá gyoq gang yap tô ri.

Yesuq Lé, Hkyangjong Mó Myi Choq Wú É Hkyô

Mht 26:59-66; Mrk 14:55-64; Luk 22:66-71

¹⁹ Háu u lé, háu hkyangjong mó gi, Yesuq lé, Yhâng é chángzo pé hkyô eq Yhâng mhoqshit é hkyô eq séng lui myi ri.

²⁰ Háu hkûn, Yesuq gi, "Háu mingkan htoq má, Ngò, de de tai bê nghut lhê. Ngò gi, háu Yudaq byu pé banshoq bang chôm zing é, tarajong pé má le, noqkuq yhûm má le, ayang mhoqshit é nghut lhê. Ngò gi, haq záu lui tai é hkyô hai le a joq. ²¹ Nàng, hai mù Ngo lé myi lhê lúhú? Háu, Ngò tai é lé wó gyo é bang lé myi aq; Ngò hai tai é hkyô lé, yhangmoq gè gè sé akô nghut ri." ga tú tai ri.

²² Yesuq háu su ga tai jáng, háu nám má nyi tô é noqkuq yhûm zúng sù rayuq gi, Yhang lé ppyuq kat lui, "Hkyangjong mó lé wá, Nàng, háu su nghú dang tú lhê lúhú?" ga tai ri.

²³ Háu hkûn, Yesuq gi, "Ngò tai shut é nghut le gi, shut é hkyô lé saksé tún shit aq. Nghut kôlhang, Ngò gi, têng é dòng ru tai le nhing, nàng, hai mù Ngo lé ppyuq lhê lúhú?" ga tú tai ri. ²⁴ Háu htâng, Anna gi, Yhang lé túi to gù, háu hkyangjong mó Kayahpaq chyang dé kat nhang ri.

Yesuq Lé, Petruq Xoq He-ngik Pyâm É Hkyô

Mht 26:71-75; Mrk 14:69-72; Luk 22:58-62

²⁵ Háu Simun Petruq gyoq gang yap tô é hkûn, "Nàng gi, Yhâng é chángzo pé má é rayuq a nghut lúhú?" ga, yhang lé myi kôjáng, yhang gi, "Ngò a nghut." ga, dum he pyâm ri.

²⁶ Háu Petruq eq nohkyap zân hpyit pyám byi é hui su é buinùm nghut é sù, háu hkyangjong mó é dui-nhâng zoshâng rayuq gi, yhang lé, "Háu hkyâm má, nàng, Yhang eq rahá nghut nyi é lé, ngò a myang é su ngam lhê lúhú?" ga tai ri. ²⁷ Háu hkûn, Petruq gi, xoq he pyâm ri; háu u yhang, woq tún bê nghut ri.

Pilat É Myoq Hí Má, Yesuq Jé Nyi É Hkun Lhê Hkyô

Mht 27:1-2, 11-14; Mrk 15:1-5; Luk 23:1-5

²⁸ Háu htâng, yhangmoq gi, Yesuq lé, Kayahpaq chyang mai, háu mauzau hpó é yhûmwàng shut shui é ló akô. Háu u gi, napsún noq ashí nghut ri. Yhangmoq gi, agot a-ù a dut e za, htúngli dòng Lhoqlhai Poi lé wó zo rá matú, yhûmkaú má a wàng kó nghut ri. ²⁹ Háu mù lui, mauzau Pilat gi, yhangmoq chyang htoq é mù, "Shí yuq lé, nungmoq hai mara hûn nau akô lúhú?" ga myi ri.

³⁰ Háu hkûn, yhangmoq gi, "Shí yuq, a ge é muzó kut é a nghut le gi, Yhang lé, náng é

* 18:11 Góm lé shuq gâ é gi, jamjau hui rá eq shí hkám rá lé, tai nau é nghut lhê.

loq má ngamoq lé ap byi rà a nghut." ga tú tai akò.

³¹ Pilat gi, "Yhang lé, nungmoq yhang shui ló mù, nungmoq é tará đông ló jéyáng keq." ga tai jáng, hau Yudaq byu pé gi, "Nghut kólhang, ngamoq gi, ó yuq lé sat rà ahkáng le a wó é nghut lhê." ga tú tai akò nghut ri.

³² Hau su dut é hkyô gi, Yesuq, Yhang hká đông shí rà ga tai é dang lé lhoq dik rà matú nghut lhê.

³³ Hau mù, Pilat gi, yhúmhaú má tau wang ló mù, Yesuq lé wut yù lui, "Nàng gi, Yudaq byu pé é hkohkâm nghut lhê thú?" ga myí ri.

³⁴ Hau hkûn, Yesuq gi, "Hau gi, náng é myit đông tai é nghut lhê thú? A nghut jáng, góbang mai, nang lé, Ngá é hkyô tai kyo lui nghut lhê thú?" ga tú myí ri.

³⁵ Pilat gi, "Ngò gi, Yudaq byu nghut lhê thú? Hau Náng é byù myù eq Náng é hkyangjong agyi pé sheq, Nang lé, ngá loq má ap byi é ru nghut lhê. Nàng gi, hai kut é nghut lhê thú?" ga dum myí ri.

³⁶ Hau hkûn, Yesuq gi, "Ngá é mingdán gi, mingkan shí eq a séng. Mingkan shí eq séng é ru nghut le gi, hau Yudaq byu pé, Ngo lé a wó chyup yu lo shoq, Ngá é dui-nhang zoshâng wui, Ngo lé chôm hung yù kó rà nghut lhê. Nghut kólhang, Ngá é mingdán gi, mingkan shí eq a séng é ru nghut lhê." ga tai ri.

³⁷ Hau mù, Pilat gi, "Hau jáng, Nàng gi, hkohkâm nghut bê thú?" ga myi jáng, Yesuq gi, "Ngo lé, hkohkâm nghut lhê ga, nang tai nyi é jô ri. Gê gè ga jáng, Ngò gi, hau é yan-mai hku lé lo é sù nghut lhê; hau tengmán hkyô lé saksé hkám rà matú, Ngò, mingkan htoq má jé lé é nghut lhê. Hau tengmán hkyô eq séng é sù ó yuq le, Ngá é dang lé gyô ri." ga tú tai ri.

³⁸ Hau hkûn, Pilat gi, "Tengmán hkyô gá é gi, hai jung thú?" ga myí ri. Yhang gi, hau su ga myi lui, hau Yudaq byu pé chyáng dum htoq é mù, "Shí yuq chyáng mara hùn rà hkyô, ngò a myàng nghut ri. ³⁹ Nghut kólhang, hau Lhoqlhai Poí u lé, nungmoq é matú, ngò, htóng byú rayuq nhang htoq kat byi byi kut é htung, nungmoq wó akò. Hau mù, 'Yudaq byu pé é hkohkâm' lé, nhang htoq kat byi rá lé, nungmoq ô nau akò thú?" ga myí ri.

⁴⁰ Hau hkûn, yhangmoq gi, "Hau yuq lé a nghut! Barabaq lé sheq nhâng byi aq." ga, garú kat akò. Barabaq gi, damyaq nghut ri.

19

Yesuq Lé, Tapzîng Má Jén Sat Rà Matú Doqdân É Hkyô

Mht 27:15-31; Mrk 15:6-20; Luk 23:13-25

¹ Hau mù lui, Yesuq lé lêng she yù mù, nhuq bat rà matú, Pilat hkunmó hkyô ri.

² Hau gyezô pé gi, zujanmaú sai yù kôluí, Yesuq é ulhum má tsung byi kômú, Yhang lé, buhîng nè hut byi akò nghut ri. ³ Hau htâng, yhangmoq gi, Yhâng chyáng dum huí é è kut lui, "Yudaq byu pé é hkohkâm é! Chyung hîng xê hing nyi sháng gaq ô!" ga tai kômú, Yhâng é myoqdong má pyuq byi akò nghut ri.

⁴ Pilat gi, hau Yudaq byu pé chyáng radàm dum htoq é mù, "Wú keq, shí yuq chyáng mara hùn rà hkyô, ngò a myang é lé nungmoq sé sháng nghù, Yhang lé, ngò nungmoq chyáng shui htoq lé byi lhê." ga tai ri. ⁵ Yesuq gi, hau zumuq tsung tô é eq bu nè hîng wut to mù htoq lé jáng, Pilat gi, yhangmoq lé, "Wú keq, Yhang, shí yuq nghut lhê." ga tai ri.

⁶ Hau hkyangjong agyi pé eq yhangmoq é noqkuq yhùm zung bang gi, Yhang lé myang kat kôjáng, "Yhang lé tapzîng má jén sat pyám aq! Yhang lé tapzîng má jén sat pyám aq!" ga garú bum akò.

Nghut kólhang, Pilat gi, "Nungmoq shui yù mù, tapzîng má jén sat keq. Ngò gi, Yhâng chyáng mara hùn rà hkyô a myàng." ga tú tai ri.

⁷ Hau hkûn, hau Yudaq byu pé gi, "Ngamoq chyáng tará rahkat joq lhê; tará hau đông ga jang, Yhang gi, shí gîng bê nghut ri; hkâsu mù gá le, Yhang gi, Garai Gasâng é Yhangzo hau nghut lhê gá ri." ga xoq tai akò.

⁸ Pilat gi, dang hau lé wó gyo jáng, je gyô gyuq lui. ⁹ yhúmhaú shut dum wang ló mù, Yesuq lé, "Nàng, hkâmá é sù nghut lhê thú?" ga myí ri. Nghut kólhang, Yesuq gi, dang rahkun lhang a tú tai byi nghut ri. ¹⁰ Hau hkûn, Pilat gi, "Nàng, ngo lé a tú tai kut lhê thú? Ngò gi, Nàng lé, wó lhoq lhut kat é eq tapzîng má wó jén sat pyám é ahkáng wó sù nghut é lé, Nàng a sé thú?" ga myí ri.

¹¹ Yesuq gi, "Nàng lé, hau ahtoq mai ahkáng byi e za a nghut le gi, nàng, Ngo lé hai kut rà a-tsam le wó rà a nghut. Hau mù lui, Ngo lé, náng é loq má ap byi é sù gi, mara je bo é nghut lhê." ga tú tai ri.

¹² Hau hkûn mai, Pilat gi, Yesuq lé lhoq lhut kat byi nau nyi bê nghut ri. Nghut kólhang, hau Yudaq byu pé gi, "Nàng, hau yuq lé nhang pyám é nghut jáng, nàng gi, hkoséng Kehtaq é luzúm a nghut lo; yhum-sing gùng lé, hkohkâm gá é sù gi, hkoséng Kehtaq eq shai lhum é sù nghut lhê." ga, ru jâng garú nyi bum akò nghut ri.

¹³ Hau lé wó gyo jáng, Pilat gi, Yesuq lé shui htoq é mù, Hebre myíng đông Gabahta gá é Luqgok hkâng myhang to jang nghu é jowò má é tará jéyáng tanghkuq má zung tô ri. ¹⁴ Hau u gi, Lhoqlhai Poí é matú, Hên Lajâng é Buinyi nyi-káng raxe í hkyíng nghut ri.

Pilat gi, hau Yudaq byu pé lé, "Nungmoq é hkohkâm lé wú keq." ga tai ri.

¹⁵ Nghut kôlhang, yhangmoq gi, "Yhang lé yu pyám aq! Yhang lé yu pyám aq! Yhang lé tapzîng má jén sat pyám aq!" ga garû bum akô.

Hau hkûn, Pilat gi, "Nungmoq é hkohkâm lé wá, ngò, tapzîng má jén sat pyám rà lhu?" ga myi jâng, hau hkyangjong agyi pé gi, "Hau hkoséng Kehtaq mai lai lui, gotû hkohkâm ngamoq a wó." ga, tù tai akô nghut ri.

¹⁶ Hau htâng má, Pilat gi, Yesuq lé tapzîng má jén sat pyám rà matú, yhangmoq é loq má ap byí kat bê nghut ri. Hau mù lui, yhangmoq gi, Yesuq lé shuí ló bekô nghut ri.

Tapzîng Má Jén Pyám É Hkyô

Mht 27:32-44; Mrk 15:21-32; Luk 23:26-

43

¹⁷ Yesuq gi, yhumsing é tapzîng lé waq mù, Hebre myíng dông Golgahta gâ é, Ugyap joq é Jowò gâ é jang má htoq jé e ri. ¹⁸ Yhangmoq gi, hau má, Yesuq lé tapzîng htoq má jén tap pyám akô; Yhang eq raha, gotû í yuq lé le, rahkyam shut rayuq kut jén to kô é nghut lui, Yesuq gi, gyoro má nghut ri.

¹⁹ Pilat le, masat laiká kâ yù lui, hau tapzîng htoq má tap tó ri. Hau má gi, "YU-DAQ BYU PÊ É HKOHKÂM, NAZARET WÀ BYÙ YESUQ" gâ tó ri. ²⁰ Yesuq lé jén tó é jowò gi, myuq eq chyâng lhum é htoq agó, hau masat laiká gi, Hebre dông le, Latin dông le, Grik dông le, kâ tó é yanmai, hau Yudaq byu pé myo myo gi, masat laiká hau lé nghap bum akô nghut ri. ²¹ Hau Yudaq byu pé é hkyangjong agyi pé gi, Pilat lé, "Yudaq byu pé é hkohkâm' nghû hkáká, 'Ngò gi, Yudaq byu pé é hkohkâm nghut lhê ga, Yhang tai ri." nghû lui sheq ká aq." ga tai akô.

²² Hau hkûn, Pilat gi, "Ngò kâ é dông, ngò kâ to bê nghut lhê." ga tù tai ri.

²³ Hau gyezô pé gi, Yesuq lé tapzîng má jén tap pyám é htâng má, Yhâng é mebu pé lé yù mù, myi hkyam gâm lui, rayuq rahkyam yu akô; hau ahte bu lé le, gâm rà dâ akô; nghut kôlhang, hau gi, hkyupshi a bo e za, awang mai ahpyo hpyot kut woq tó é nghut ri.

²⁴ Hau mù, yhangmoq gi, "Bu shí lé gi, a lâng cheq e za, ó yuq myang yù ang rà laq, hkyîn shosé she wú sháng." ga, rayuq eq rayuq tai lhum akô.

Hau gi,

"Yhangmoq, Ngá é mebu lé chôm gam yù kó rà; Ngá é ahtê bû é matú, hkyîn shosé shê kó rà nghut lhê."^{*}

gâ é Chyúmdang lé lhoq dik rà matú dut é nghut lhê. Hau mù, gyezô pé gi, hau su kut bekô nghut ri.

²⁵ Hau Yesuq é tapzîng nàm má gi, Yhângnu, Yhângnú é yhanggu byizo eq,

Klopa é yhangmyi Mariq eq Magadalaq wà mã é Mariq pé, yap tó bum akô. ²⁶ Yesuq gi, Yhang nàm má, Yhang chyitdap é chángzo eq Yhâng nu yap tó é lé myang kat jâng, Yhâng nu lé, "Ánu é^{*} nung zo lé wú aq." ga tai mù, ²⁷ chángzo hau lé le, "Náng nu lé wú aq." ga tai ri. Hau hkún mai, chángzo hau yuq gi, Yesuq é yhângnu lé, yhâng é yhùm shut shuí ló bê nghut ri.

Yesuq Soqkâng Byit É Hkyô

Mht 27:45-56; Mrk 15:33-41; Luk 23:44-

49

²⁸ Hau htâng, Yesuq gi, ahkuí, muzó bàn bê nghut é lé sé lui, hau Chyúmdang lhoq dik rà matú, "Ngò, wuì shit ri." ga tai ri. ²⁹ Hau má, tsibiyiq wing chyín rayambú joq tó ri; hau mù, yhangmoq gi, wuìmaù lé tsibiyiq wing chyín hau má jum yù lui, jàm-yang ahpyo má tuí tap mù, Yhâng é nhutwuí jé shoq yhun byí akô nghut ri. ³⁰ Yesuq gi, tsibiyiq wing chyín hau lé shuq yù mù, "Mù bàn bê." ga tai ri. Yhang, hau su ga tai eq yhang, ulhum nhuq lò mù, kâng byit bê nghut ri.

³¹ Htang nyí gi, ahkyak é Bánno buinyi nghut lui, hau nyí gi, Hên Lajang Buinyi nghut ri. Hau mù, Yudaq byu pé gi, Bánno buinyi má, mâng pé lé tapzîng htoq má a joq to nhâng nau kô é yanmai, hkyí pé lé bat hkyuí pyám mù, mâng pé lé yù hkyô pyám nhâng rà matú, Pilat chyáng dúng tóngbân akô. ³² Hau mù lui, gyezô pé gi, lé mù, Yesuq eq jén hui su nhik mã é, rayuq é hkyí lé hí bat hkyuí pyám mù, rayuq é hkyí lé dum bat hkyuí pyám akô nghut ri. ³³ Nghut kôlhang, yhangmoq gi, Yesuq chyáng jé é hkûn, Yhang shi to lánng bê nghut é lé myàng kô mù, Yhâng é hkyí lé a bat hkyuí byi kó nghut ri. ³⁴ Nghut kôlhang, gyezo rayuq gi, Yesuq é namcham má lham eq htaù kat byi jâng, radá dâm sui eq wuì yuì htoq lo ri. ³⁵ Hau lé myàng é sù gi, saksé hkám byí ri; yhâng saksé hkám é hkyô gi, tengmán ri. Hau yhang tai kyô é hkyô gi, têng é lé, yhang sé mù, nungmoq le wó lumjîng kó sháng gaq ga, saksé hkám byí é nghut ri. ³⁶ Hau hkyô pé dut é gi, "Yhâng é showui rahkat lháng a lhoq hkyuì rà nghut lhê."^o gâ é Chyúmdang hau lhoq dik rà matú nghut lhê. ³⁷ Chyúmdang gotû ralhùm má le, "Yhangmoq ét hau htông é sù lé, yhangmoq tu wú kó rà nghut lhê."^o gâ é bo tó ashí nghut ri.

Yesuq Lé, Myhup Yhum É Hkyô

Mht 27:57-61; Mrk 15:42-47; Luk 23:50-

56

³⁸ Hau htâng, Yesuq é chángzo dut nyí é Aramahti myuq byú Yosep gi, hau Yudaq byu pé lé gyuq é yanmai, tsik za Pilat chyáng Yesuq é gungsó m lé, lé dúng ri. Pilat eq

^{*} 19:24 Hkya-on 22:18 ^{*} 19:26 Ánu é, gâ é lé, Grik dông gi, "myiwe myhí è" ga bo tó é nghut lhê. ^{*} 19:36 Htoq Ló 12:46; Gyung So 9:12; Hkya-on 34:20 ^{*} 19:37 Zhk 12:10

ahkáng byí kat jáng, yhang gi, gungsôm haú lé, lé yu lô bê nghut ri. ³⁹ Yhang gi, hí hkûn, myín lé, Yesuq lé é huí é sù, Nikodema eq rahá lé é nghut ri; Nikodema gi, mura eq achoyo nyhò tô é namngón jung sum xê joi kô yu lé ri. ⁴⁰ Yhangnhik gi, Yesuq é gungsôm lé yù mù, Yudaq byu pé é mâng yhum htûng eq rajung za, namngón jung eq rahá, pán yúng eq htop yup to byí akò. ⁴¹ Haú Yesuq lé tapzîng má jén sat pyâm é jowò nàm má, hkyâm ralhum joq ri; ó yuq lé le a lhez wú shí é, lup sik ralhum hkyâm hkaú má joq tô ri. ⁴² Haú nyí gi, Yudaq byu pé é Hên Lajang Buinyi nghut é yanmai le, lup haú le chyâng é yanmai le, yhangnhik gi, Yesuq lé, haú má é lhez tô akò nghut ri.

20

Lup Akôm

Mht 28:1-10; Mrk 16:1-8; Luk 24:1-12

¹ Bánno buinyi htâng, napsûn noq le mau a bó shimá, Magadalaq wà má é Mariq gi, haú lup má é jé le, lup hkum má é luqlong huí hpyuq to lánq é lé myang ri. ² Haú mù, yhang gi, Simun Petruq eq Yesuq chyitdap é chángzo góyuq chyâng din lé lò mù, "Haú Yhumsîng lé, lup mai yu htoq lô byuq bekò; hkâmá é kat to kô é lé, ngamoq a sé." ga tai ri.

³ Haú mù, Petruq eq chángzo haú gi, lup shut e lô akò. ⁴ Yhangnhik í yuq é din akò; nghut kôlhâng, chángzo haú gi, Petruq htoq má wò ãn luí, lup má hí ãn jé e ri. ⁵ Haú mù, yhang gi, ahkaú shut ngóm wú kat é hkûn, haú pán yúng htui leq tô é lé myang ri; nghut kôlhâng, yhang gi, a wang é nghut ri. ⁶ Hau htâng, Simun Petruq gi, châng jé luí, lup hkaú shut wang e ri; haú hkûn, yhang gi, haú má pán yúng htui joq tô é lé le, ⁷ haú Yesuq é ulhum má htop é panchoq lé le, myang ri. Panchoq haú gi, pán yúng htui eq rahá a nghut e za htui jup leq tô ri. ⁸ Haú lup má hí jé é chángzo le, ahkaú má wang é luí, myàng jáng, lumjáng bê nghut ri. ⁹ (Yesuq gi, shí é mai dum ãn toq lô rá nghut lhê ga bo tô é Chyúmdang lé, yhangnhik gi, a sê gyo shi kó nghut ri.) ¹⁰ Hau htâng, haú chángzò nhik gi, yhum taú lô bekò nghut ri.

Magadalaq Wà Má É Mariq Lé, Yesuq Htoq Shit É Hkyô
Mrk 16:9-11

¹¹ Nghut kôlhâng, Mariq gi, lup shinggan má ngau yap tô ri. Yhang gi, ngàu uchyang lup hkaú má ngóm wú kat ri. ¹² Haú hkûn, yhang gi, Yesuq é gungsôm lhez tô é jang má, hpyu é mebu wut é maumang lagyo í yuq hkyí htâng shut rayuq, umhtúng shut rayuq, zung to kô é lé, myang ri.

¹³ Yhangnhik gi, "Myiwe myhí ê, nàng, haú mù ngau nyi lhê lúhú?" ga myi kôjáng, yhang gi, "Ngá é Yhumsîng lé yù lô hpyuq kôluí,

Yhang lé hkâmá lô lhez to kô é lé, ngò a sê é yanmai nghut lhê." ga tù tai ri. ¹⁴ Haú su ga luí, yhang, lhing wú kat é hkûn, Yesuq yap tô é lé myàng kôlhâng, Yesuq nghut é lé yhang a wú sé nghut ri.

¹⁵ Yesuq gi, "Myiwe myhí ê, nàng, haú mù ngau nyi lhê lúhú? Nàng gi, ó yuq lé ho wún lhê lúhú?" ga myi jáng, yhang gi, hkyâm sai zo sù su ngam pyâm mù, "Sará ê, nàng, Yhang lé waq htop pyâm é nghut le gi, hkâmá é lhez tô é, ngo lé tai kyo laq, ngò, Yhang lé yu lô rá." ga tai ri.

¹⁶ Haú hkûn, Yesuq gi, yhang lé, "Mariq é" ga wut kat ri.

Mariq gi, Yhâng shut lhîng mù, Hebre myíng ãng, "Raboni!" ga wut kat ri. (Haú gi, "Sará ê" gá é lichyúm nghut ri.)

¹⁷ Yesuq gi, "Ngo lé hkázáng shi; hkásu mù gá le, Ngò gi, haú Íwá chyáng a taú ãng lô shí é nghut lhê. Nàng gi, Ngá é gumang wui chyáng lô mù, yhangmoq lé, 'Ngò gi, Ngá Wa eq nungmoq é Yhângwa, Ngá é Garai Gasang eq nungmoq é Garai Gasang nghut su chyáng ãng lô zó nghut lhê.' gá ri nghù, lô tai kyo aq." ga, yhang lé tai kat ri.

¹⁸ Magadalaq wà má é Mariq gi, chángzò pé chyáng lô mù, "Yhumsîng lé, ngò myàng bê!" ga tai luí, yhang lé shit kat é pé lé, tai kyô ri.

Yesuq, Yhâng É Chángzò Pé Lé Htoq Shit É Hkyô

Mht 28:16-20; Mrk 16:14-18; Luk 24:36-49

¹⁹ Haú nyí, Bánno buinyi htang myín lé, haú chángzò pé gi, Yudaq byu pé lé gyuq kô é yanmai, hkum tsing myhí pyâm mù, zîng tô bum kô é u lé, Yesuq gi, lé jé mù, yhangmoq é agùng má yap to luí, "Nungmoq nguínngón yuqyo nyi sháng gaq!" ga tai ri. ²⁰ Yhang gi, haú su ga tai é htâng má, yhangmoq lé, Yhâng é loq pé eq namcham lé tûn shit ri. Chángzò pé gi, haú Yhumsîng lé myàng kôjáng, gyai gabú bùm bekò nghut ri.

²¹ Yesuq gi, "Nungmoq nguínngón yuqyo nyi sháng gaq! Haú Íwa gi, Ngo lé nhang kat é su, Ngò gi, ahkuí, nungmoq lé nhang kat é nghut lhê." ga dum tai ri. ²² Haú su ga tai mù, Yhang gi, yhangmoq é ahtog má soq mut luí, "Haú Chyoiyúng Woi-nyí lé hap yù keq. ²³ Ó yuq é mara pé lé nghut kôle, nungmoq hkyut byí é nghut jáng, mara haú pé gi, hkyut pyâm byí é huí rá nghut lhê; nungmoq a hkyut byí é nghut jáng, mara haú pé gi, hkyut pyâm é huí rá a nghut." ga tai ri.

Htomaq Lé, Yesuq Htoq Shit É Hkyô

²⁴ Haú chángzo raxe í yuq má bo é, Zozúm le gá é Htomaq gi, Yesuq lé jé é hkûn, haú chángzò pé eq rahá a nyi to nghut ri. ²⁵ Haú mù luí, gotú chángzò pé gi, yhang lé, "Haú

Yhumsing lé, ngamoq myàng bê." ga tai kyô akô.

Nghut kôlhang, yang gi, yangmoq lé, "Ngô gi, Yhâng é loq pé mã é shamtoq zuhkô lé myàng mù, ngá é loqnyhui êq joi wú é eq, Yhâng é namcham mã, ngá é loq êq myang lap wú é za a nghut jáng, haù lé ngò lumjáng rá a nghut." ga tai ri.

²⁶ Rabat myáng jáng, chángzô pé gi, haù yhumhkaù mã dum nyi tô akô; Htomaq le, yangmoq eq rahá nghut nyi ri. Haù hkum pé myhi to kôlhang, Yesuq gi, lé jé mù, yangmoq é agùng mã yap to lui, "Nungmoq nguóngn yuqyo nyi sháng gaq!" ga tai ri.

²⁷ Hau htàng, Yang gi, Htomaq lé, "Náng é loqnyhui, shí mã lé joi mù, Ngá é loq pé lé wú aq. Náng é loq lhâm kat mù, Ngá é namcham mã lé lap wú aq. A lum hkakut, lumjáng nyi aq." ga tai ri.

²⁸ Haù hkùn, Htomaq gi, "Ngá é Yhumsing, ngá é Garai Gasang ê!" ga Yang lé tai ri.

²⁹ Yesuq gi, yang lé, "Nàng gi, Ngo lé myang é yanmai, lumjáng é a nghut thú? A myàng kôlhang, lumjáng é bang gi, hkungsô wó nyi ri." ga tai ri.

³⁰ Laiká buk shí mã a kâ tô é limik kumlhá pé gotù myo myo lé le, Yesuq gi, Yhâng é chángzô pé hí mã kut shit bê nghut ri.

³¹ Nghut kôlhang, Yesuq gi, Garai Gasang é Yhangzo Hkrisduq nghut é lé, nungmoq wó lumjáng rá matù eq, lumjáng é yanmai, nungmoq Yhâng é mying mã asak wó kó rá matù, shí hkyô pé lé kâ tô é nghut lhê.

21

Ngozo Wó Chyup Yu É Limik Kumlhá

¹ Hau htàng mã, Yesuq gi, Tiberi nhông yàm mã, Yhâng é chángzô pé lé dum htoq shit ri. Yang htoq shit é hkyô gi, a-ô mã é đông nghut ri. ² Simun Petruq, Zozum le gá é Htomaq, Galile mau Hkanaq wá mã mã é Nahtanelaq, Zebedi é yhangzo nhik eq gotù chángzo í yuq pé gi, rahá nyi to bum akô. ³ Haù hkùn, Simun Petruq gi, yangmoq lé, "Ngô gi, ngozo kóng é rá." ga tai jáng, yangmoq gi, "Ngamoq le châng lé rá." ga tai akô. Haù mù lui, yangmoq gi, htoq é mù, haù lhai mã wàng bekô nghut ri; nghut kôlhang, haù myin, radu lhang a wó kóng kó nghut ri.

⁴ Htang napkyô maubó lo é hkùn, Yesuq gi, wuiyàm mã yap tô ri; nghut kôlhang, haù chángzô pé gi, Yesuq nghut é lé a wú sé kó nghut ri.

⁵ Yesuq gi, yangmoq lé, "Luzum wui é, nungmoq, ngozo wó akô thú?" ga, wut myi kat jáng, yangmoq gi, "A wó." ga tú tai akô.

⁶ Haù hkùn, Yang gi, "Nungmoq é gùn lé, haù lhai é loqyo hkyam shut dú hkyô kat keq; haù jáng, nungmoq wó kóng yù kó rá nghut lhê." ga tai ri. Haù mù, yangmoq gi,

gùn dú hkyô kat é hkùn, ngozo lum myô é yanmai, haù gùn lé lhang a wó llang yù lo kó nghut ri.

⁷ Haù mù lui, haù Yesuq chyitdap é chángzo gi, Petruq lé, "Yhumsing ru nghut ri." ga tai ri. Simun Petruq gi, "Yhumsing ru nghut ri." gá é lé wó gyo eq yang, yang gi, mebu hkyut pyâm tô é yanmai, buhông mó lé, yhâng é gùng mã baiyup yù mù, wui hkaù mã byam wang ló bê nghut ri. ⁸ Haù chángzo góbang gi, wuiyàm eq ngo xê làm kô za wê é yanmai, ngozo bying tô é gùn lé, wuiyàm shut lhai mai she jé lo akô nghut ri. ⁹ Yhangmoq gi, wuiyàm mã jé dap ló kô é hkùn, myigyé gyúng é myihkyóm htoq mã ngozo nyhín tô é lé le, muk ratsuí joq tô é lé le, myang akô.

¹⁰ Yesuq gi, yangmoq lé, "Haù, ahkuí za nungmoq wó kóng yu é ngozo, ra-am yù lé keq." ga tai ri.

¹¹ Haù mù, Simun Petruq gi, lhai mã doq ji lui, kô é ngozo rasho ngó xe sùm du yang bo é gùn lé, dùng yàm mã she htoq tô ri. Ngozo haù myhó myo kôlhang, gùn gi, a jeq nghut ri. ¹² Yesuq gi, yangmoq lé, "Napzang lé zo keq." ga tai ri. Chángzô pé gi, Yang, haù Yhumsing nghut é lé sé kô é yanmai, ó yuq lhang, "Nàng, ó yuq nghut lhê?" ga, a wám myi kó nghut ri. ¹³ Yesuq gi, lé mù, muk lé é yù lui, yangmoq lé byi ri; ngozo lé le, haù su kut ri. ¹⁴ Yesuq gi, shí é mai lhoq dui toq yù lui é htàng, Yhâng é chángzô pé lé htoq shit é mã, shí gi, sum dâm nghù rá dâm nghut ri.

Yesuq Eq Petruq

¹⁵ Yhangmoq bàn zô bùm kô é htàng mã, Yesuq gi, Simun Petruq lé, "Yohan é yhangzo Simun é, nàng gi, shí bang htoq mã, Ngo lé teng za je chyitdap lhê thú?" ga myi jáng, yang gi, "Nghut lhê; Yhumsing é, ngò, Nàng lé chyitdap é hkyô lé, Nàng sé lhê." ga tú tai ri. Haù hkùn, Yesuq gi, "Ngá é sau zô pé lé, baù aq." ga, yang lé tai ri.

¹⁶ Hau htàng, Yesuq gi, "Yohan é yhangzo Simun é, nàng gi, Ngo lé teng za chyitdap lhê thú?" ga dum myi jáng, yang gi, "Nghut lhê; Yhumsing é, ngò, Nàng lé chyitdap é hkyô lé, Nàng sé lhê." ga tú tai ri. Haù hkùn, Yesuq gi, "Ngá é sau pé lé, rém aq." ga tai ri.

¹⁷ Dum radam, Yesuq gi, yang lé, "Yohan é yhangzo Simun é, nàng gi, Ngo lé chyit lhê thú?" ga myi ri.

Haù hkùn, Petruq gi, "Nàng gi, ngo lé chyitdap lhê thú?" ga, yang lé Yesuq eq sùm dam dam tai é yanmai, yhang myit nô lui, "Yhumsing é, Nàng gi, lhunglhang lé sé lhê; ngò, Nàng lé chyitdap é hkyô lé, Nàng sé lhê." ga tai ri.

Haù hkùn, Yesuq gi, "Ngá é sau pé lé, baù aq. ¹⁸ Ngò, nàng lé teng za tai lé, nàng, zorâm nghut é hkùn gi, yhumsing gùng

yhumsing hpyihit baiyup* yu mù, ê nau é jowò hkgámó má wó ê é nghut lhê; nghut kôlhang, nàng mang jáng gi, loq í loq lham luí, nang lé góyuq êq hpyihit baiyup byi mù, nàng a é nau é jowò shut shuí ê râ nghut lhê." ga tái ri. ¹⁹ (Yesuq haú su ga tái é gi, haú Petruq, hkâsu kut shi é đông mai, Garai Gasâng é hpungwup shinggang lé dan hu nhâng râ nghut é lé, tái nau é nghut ri.) Hau htâng, Yesuq gi, yhang lé, "Ngá htâng cháng aq." ga tái ri.

²⁰ Haú hkûn, Petruq gi, lhing wú kat le, haú Yesuq chytđap é chángzo, yhangmoq htâng châng wún é lé myàng ri. Chángzo haú gi, hí hkûn, myinzang zô é u lé, Yesuq chyáng leq ngè mù, "Yhumsing ê, Nang lé ap pyám rá sủ gi, ó yuq l hú?" ga, myi wú é sủ nghut ri. ²¹ Petruq gi, haú yuq lé myàng jáng, Yesuq lé, "Yhumsing ê, shí yuq gi, hkâsu dut rá l hú?" ga myí ri.

²² Yesuq gi, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê l hú? Nàng gi, Ngá htâng cháng aq." ga tủ tái ri. ²³ Dang hau é yanmai, chángzo haú yuq a shí râ nghut lhê gâ é danglám gi, haú gumang wui chyáng byo myin to bê nghut ri. Nghut kôlhang, Yesuq gi, haú yuq a shí râ hkyô lé tái é a nghut, "Ngò jé lé é hkûn jé shoq, Ngò, yhang lé dui nyi nhâng nau é nghut le gi, nàng eq haí sêng lhê l hú?" ga, tái é ru nghut lhê.

²⁴ Shí pé lé saksé hkám mù, shí pé lé kâ tô é sủ gi, chángzo haú yuq nghut lhê. Yhâng é saksé gi, têng é lé, ngamoq sê lhê.

²⁵ Yesuq gi, gotú muzó myo myo le kut ashí nghut ri. Muzó haú pé lhum jup lé, kâ htoq yu é ru nghut le gi, kâ tô é laiká buk haú pé gi, mingkan gón má lhang ngo rá a nghut nghủ, ngò wó myit ri.

* 21:18 Hpyihit baiyup gâ é lichyúm gi, mebu wut luí ri ri kut tô é lé gâ lhê.

LAGYO Laiká (Acts)

Yesuq, Mauhkúng Má Shuí Yù Huí É Hkyô

¹ Htohpiluoq ê, Yesuq yang hkyin yu tô é lagyo pé lé, Chyoiyúng Woi-nyí wum-o êq dang ban pying tô é htàng má, Garai Gasang yang lé mauhkúng shut shuí yu é buinyi jé shoq, ² Yang kut shit é hkyô pé eq, mho-qshit é hkyô pé banshoq lé, hí lhê é laiká buk má ngò kâ kat bê nghut lhê. ³ Yesuq gi, shí hkâm é htàng má, Yang dui toq bê hkyô lé, lumgíng é saksé myo myô êq yangmoq lé tún shit mù, buinyi myi xê nyí gyoro má yangmoq chyáng lé htoq shit shit kut lui, Garai Gasang é mingdán hkyô lé hko kyô ri. ⁴ Yang, yangmoq eq rahá zup tô é hkún, hkunmó hkyô é gi, "Nungmoq gi, Yerusalem wá mó mai a htoq é za, ngá chyáng mai wó gyô yu é, ngá wá é danggidiq byí tô é chyunghuoq lé láng nyí keq. ⁵ Hkâsu mù gà le, Yohan gi, wui êq wui-myhup hkâm byí é nghut lhê; nghut kôlháng, nungmoq kúm gi, buinyi hkâ-myháng a myáng má, Chyoiyúng Woi-nyí mai bapstisma wó hkam yù kó rá nghut lhê." gà ri.

⁶ Lagyo pé gi, Yang eq rahá chôm zup ming tô é hkún, Yang lé, "Yhumsíng é, nang, haú Israelaq byu pé lé mingdán dum xuq byí rá gi, ahkuí yang nghut bê lhú?" ga nyí akò.

⁷ Yesuq gi, "Áwa gi, Yhâng é ahkáng ayá êq kut tô bê é ahkyíng yam-yoq pé lé, nungmoq sé nó a ra. ⁸ Nghut kôlháng, Chyoiyúng Woi-nyí nungmoq chyáng jé jáng, nungmoq gi, wum-o a-tsam wó yù mù lui, Yerusalem wá mó eq Yuda mau banshoq, Samariq mau eq maumyí htáng shoq, ngá é saksé pé dut kó rá nghut lhê." ga lui, yangmoq lé tai ri.

⁹ Dang haú ban tai é htàng má, yangmoq wú nyí le, Yang gi, mauhkúng shut shuí yu é hui mù, yangmoq hí mai Yang lé a myáng loshoq, mhut êq htup ló byuq bê nghut ri.

¹⁰ Yesuq doq ló nyi é u lé, yangmoq mauhkúng shut ru wú tsuq nyi bum ashí le, hpyu é mebu wut é byù í yuq gi, radá dâm yangmoq nâm má htoq yap lò mù, ¹¹ "Galile byu pé é, haí mù lui mauhkúng shut wú tsuq nyi akò lhú? Nungmoq é hí mai mauhkúng shut shuí yù huí é, haú Yesuq mauhkúng shut doq ló é u lé, nungmoq myang kat é su, Yang dum jé lé rá nghut lhê." ga tai akò.

Yudaq É Jowò Má, Mahtiaq Lé Hkyin Kat É Hkyô

¹² Hau htàng má, yangmoq gi, Tsanlun Bùm mai, Yerusalem wá mó shut taú ló bekò. * Haú gyoro gi, Bánno buinyi má ge sô é í za wê ri. ¹³ Yangmoq jé ló kôjáng, yangmoq nyi nyi kô é yhúm ahtoq pyám má é wap shut doq ló akò; haú bang gi, Petruq, Yohan, Yakuq, Andre, Hpilip eq Htomaq, Barhtolume eq Mahte, Álhpe é yangzo Yakuq, Zelutuq dut é Simun, góyuq Yakuq é yangzo Yudaq pé nghut akò. ¹⁴ Yangmoq lhunglhâng bang gi, myiwe wui le, Yesuq é yhângnu Mariq le, yanggu pé le kut mù, i-myt rahkat za kyú chôm dung dung kut nyi akò.

¹⁵ Buinyi haú yoq má, Petruq gi, lumjíng é gumang gu-nhá† wui rasho í xê yuq kô zup zíng tô é gung gúng má, toq yap mù, ¹⁶ "Gumang gu-nhá wui é, Yesuq lé chyup é bang lé hkyô shuí hí é sù Yudaq eq séng lui, hí hpyang Dawiq é nhut mai Chyoiyúng Woi-nyí tai tô é Chyúmdang gi, dik byuq bê nghut ri. ¹⁷ Yang gi, nga-nhúng má nghap lhôm é hui mù, hpúng sará ayá wó bê sù nghut kôlháng shí hkyô dut bê nghut ri." ga tai ri.

¹⁸ (Yudaq gi, yang kut é agé ashop é muzó mai wó é ahpau êq myigúng ratóng wui yu é htàng, haú má yang, a-nghop dông byit gyó mù wam buq goq lui, ú banshoq buq myín byuq bê nghut ri. ¹⁹ Haú hkyô lé Yerusalem wá mó má nyi é lhunglhâng bang wó gyo kôjáng, myigúng haú lé yangmoq é myíng dông, 'Akeladama' ga myhíng akò; haú gi, 'Sui myigúng', gá é nghut ri.)

²⁰ Petruq xoq tai é gi, "Hkâsu mù gà le, Hkya-on Kungtôn Laiká má, 'Yhâng é jowò chamchyuiyui dut byuq sháng gaq; haú má ó le a nyi kó sháng gaq.'" ga lui le, dum

'Yang wó é ayá lé byù góyuq wó yu pyám byi sháng gaq.'" ga lui le, bo tô ri.

²¹⁻²² Haú mù lui, Yohan bapstisma byí hí é hkún mai, Yesuq lé nga-nhúng chyáng mai shuí yu é buinyi jé shoq, Yhumsíng Yesuq nga-nhúng eq rahá htoq htoq wàng wàng kut nyi é buinyi banshoq pé má, nga-nhúng eq yang zum nyi sù rayuq lé, hkyin kat rá dut ri. Haú yuq gi, Yesuq dum dui toq é hkyô lé nga-nhúng eq rahá saksé dut rá sù nghut lhê." gà ri.

²³ Haú hkún, yangmoq gi, Yustu ga le myhíng é, Barsabaq gá é Yosep eq Mahtiaq nhik lé hkyin tô akò. ²⁴⁻²⁵ Haú mù, yangmoq kyúdung kô é gi, "Byù banshoq é i-myt lé sê é Yhumsíng é, Yudaq Iskarut gi, yang ló gíng é jowò shut ló rá ga, tô pyám tô é

* 1:12 Tsanlun bùm eq Yerusalem gyoro gi, déng rawuí hkup kô we ri. † 1:15 Gumang gu-nhá gá é lé, Grik má gi, gumang za gà tô lhê. ✧ 1:20 Hkya-on 69:25 ✧ 1:20 Hkya-on 109:8

yhâng é lagyo ayá é matú shí nhik má é nàng hkyin tó é sù lé tún shit laq ò." ga akò. ²⁶ Hau htâng, yangmoq, byù hkyîn shosé she le, Mahtiaq chyáng ang bê. Haù mai, Mahtiaq lé gi, haù lagyo raxe rayuq má jat kat bê nghut ri.

2

Chyoiyúng Woi-nyí Jé Gyó Lo É Hkyô

¹ Penteko-ti* buinyi jé jáng, lumjínq bang banshoq gi, jowò ralhúm má za, chòm zup míng nyi tó akò. ² Haù hkún, laidun mó lo é su gá é htê gi, byodàn ratung, mauhkúng mai mying htoq lô mù luí, yangmoq zing tó é yhùm bying shoq dut to bê nghut ri. ³ Myishâm su dut é le byò myín htoq lô mù, yangmoq yuq jup é ahtoq má jé to bùm bê nghut ri. ⁴ Yhangmoq lhunglhâng bang gi, Chyoiyúng Woi-nyí bying lo bùm kòmù, Woi-nyí eq tai nhang é eq rajung za, laklaí dang dōng nyo lo bum akò.

⁵ Haù u lé, mauhkúng ô má joq é mingdán hkangmò má é, tará hkunggá é Yudaq byu pé gi, Yerusalem wá mó má bíng nyi bum akò. ⁶ Haù mying é htê lé wò gyó kójang, byù rajùm rayò zing lé lô kòmù, ó le ô é mying dōng sê gyó yù kò é yanmai, maú ùng-âng byuq bùm kòluí, ⁷ maú bùm uchyang tai kò é gi, "Wú keq, ahkuí dang tai nyi é byù shí bang lhunglhâng gi, Galile byu pé chyat a nghut kó thú? ⁸ Haù nghut é wa, hkâsu mù nga-nhúng ó le ô é yhumsing mau má é mying dōng sê gyó yu lhê thú? ⁹ Parhti, Medi, Elam mau má é bang eq Mesopotamiaq mau, Yuda eq Kapadokia mau, Pontuq eq Asia, ¹⁰ Hprugi eq Pamhpuí, Egutuq ming má nyi é bang eq Kuruni myuq nâm má nyi é Libya ming má é bang, Romaq myuq mai lé bíng nyi é Yudaq byu pé eq Yudaq no-qquq htúng má lling wang lò bang, ¹¹ Kreti zinlóng eq Arabiq mau má é bang, nga-nhúng gi, yangmoq hko kyô é Garai Gasâng é mauhpo muzò hkyô lé, yhumsing mau má é mying dōng yang wó sê gyó yu ri-nhung." gá ri. ¹² Yhangmoq banshoq bang gi, maú ùng-âng byuq kòmù, "Shí gi, haí wá nghut lhê thú?" ga le, rayuq eq rayuq myí lhùm bum akò.

¹³ Nghut kôlháng, byù ra-am gi, "Shí bang gi, í shuq wut é bang nghut akò." ga luí, tai jihpoi bum akò nghut ri.

Petruq Hko Kyô É Mungdang

¹⁴ Haù hkún, Petruq gi, lagyo góbang raxe rayuq eq toq yap mù, htê mó eq byù haù bang lé tai é gi, "Yudaq byu pé eq Yerusalem wá mó má nyi nyi é lhunglhâng bang ê, rago gyó wú keq! Ngò, nungmoq lé, shí hkyô tai kyo kôlé. ¹⁵ Shí bang gi, nungmoq sù-ngam é

dōng, shuq wut é bang a nghut; hkâsu mù gá le, ahkuí gi, napkyó gau hkying za ru nghut ashí. ¹⁶ Shí hkyô kúm gi, myiqhtoi Yoelaq tai tó é eq rajung za dut é nghut ri. ¹⁷ Yhang tai tó é gi,

'Garai Gasang ísu gá ri: Ló htâng é buinyi pé má, Ngò Ngá é Woi-nyí lé byù lhunglhâng bâng é ahtoq má hut gyun rá nghut lhê.

Haù mù, nungmoq é yuqzo byizò pé gi, myiqhtoi htoi kó rá; nungmoq é zorâm wui gi, myoqwup shing-rán myàng kó rá; nungmoq é hpaù mâng pé gi, yhupmoq myàng kó rá nghut lhê.

¹⁸ Buinyi haù pé má, Ngá é dui-nhâng zoshâng hpò pé eq dui-nhâng zoshâng myí pé é ahtoq má lháng, Ngò Ngá é Woi-nyí lé hut gyun mù luí, yangmoq gi, myiqhtoi htoi kó rá nghut lhê.

¹⁹ Ngò gi, ahtoq mauhkúng htoq má mauhpo muzò pé lé, a-ò myigùng htoq má, kumlhá pé lé, sui eq, myi eq, myihkau dùm pé eq kut mù tún shit rá.

²⁰ Haù Yhumsing é kò hkikhkam é buinyi a jé shimá, bui gi, mauchut byuq, lhamó gi, sui dut byuq é hí dut rá nghut lhê.

²¹ Haù hkún, Yhumsing é mying lé llang é bang yuq hkangmò gi, hkyi yu é hui kó rá nghut lhê.*

gá ri.

²² Israelaq byu pé ê, dang shí lé gyó yù keq, nungmoq sê é eq rajung za, Nazaret wá byù Yesuq nungmoq é hí má tún shit é, laklaí kumlhá, mauhpo muzò eq kumlhá pé gi, Yhang lé Garai Gasang nhang kat é saksé dut bê nghut ri. ²³ Shí yuq gi, Garai Gasang myit hpyit tó é hkyô eq, hí te sê é hpaqchyí dōng, nungmoq chyáng ap pyám é hui mù, nungmoq gi, agè ashop byu pé é loq eq, Yhang lé tapzing htoq má jén sat pyám nhâng bekò nghut ri. ²⁴ Nghut kôlháng, haù shí-nò hkyô gi, Yhang lé wó hkúm zing jung a nghut é yanmai, Garai Gasang gi, Yhang lé shí-nò jamjau mó mai, lhut pyám byi luí lhoq dui toq yù bê nghut ri. ²⁵ Dawiq gi, shí yuq eq séng luí tai é má,

'Haù Yhumsing gi, ngá é myoq hí má hkânám le nyi nyi é lé ngò myàng bê.

Yhang ngá é loqyo hkyam má nyi nyi é yanmai, ngo lé wó lhoq nhún rá a nghut lo.

²⁶ Haù mù, ngò i-myit gi, nguingón nyi luí, ngá nhut shò gabú hkya-ôn nyi ri; ngá é gungdu le myit myoqbyù jowò má nyi nyi rá nghut lhê.

²⁷ Hkâsu mù gá le, nàng, ngá é woi-nyí lé mo-sumhking má tó pyám to rá a nghut.

* 2:1 Penteko-ti gá é gi, Lhoqhai Poi lai é htâng ngo xê nyí jé é buinyi má, kut é poi lé gá lhê. ✧ 2:21 Yol 2:28-32

✧ 2:28 Hkya-on 16:8-11

Nàng, náng é Chyoiyúng Sù lé bup byuq é hui nhâng rá a nghut.

²⁸ Nàng, ngo lé asak dui é hkyô sé nhâng bê. Náng é myoq hí má, náng, ngo lé gabú hkyô lhoq pying byi rá nghut lhê.^{1*} gâ ri.

²⁹ Gumang wui ê, nga-nhông é ichyí iké Dawiq kâng byit mù, myhup pyám hui bê hkyô lé le, yhâng é lup gi, hkû-nyí jé shoq nga-nhông chyáng joq tô é lé le, ngo, nungmoq lé a gyuq a kyum wám tai lhê.

³⁰ Dawiq gi, myiqhtoi rayuq nghut é yan-mai, yhâng é awut ashin má é rayuq lé, yhâng é hkohkâm tanghkuq má zùng nhâng rá ga Garai Gasang byi tô é danggidiq lé sé to mù, ³¹ 'Hkrisduq† gi, mosumhkung má pyám to a hui rá eq, Yhâng é gungsho a bup byuq é za, dum dui toq ló rá nghut lhê.¹, gâ é hkyô lé te sé to luí tái tô ri. ³² Garai Gasang gi, haú Yesuq lé lhoq dui toq yù bê. Ngamoq banshoq bang gi, haú hkyo é saksé pé nghut nyi ri. ³³ Haú mù, Garai Gasang gi, Yesuq lé Yhâng é loqyo hkyam má lhoq toq to bê. Yesuq gi, Garai Gasang byi tô é danggidiq Chyoiyúng Woi-nyí lé hkam yù mù, hut hkyô kat bê nghut é yanmai, ahkuí nungmoq shí su wó myâng, wó gyo beko nghut ri. ³⁴⁻³⁵ Hkâsu mù gâ le, Dawiq gi, mauhkung htoq tsáng myhâng má a doq ló wú kôhang, yhang gi,

'Haú Yhumsing Garai gi, ngá é Yhumsing lé, "Ngò, náng é gye pé lé, náng é hkyí nang tanghkuq kut pyám byí é hkying jé shoq,

Ngá é loqyo hkyam shut zung nyi shi aq." gâ ri.^{2*} gâ ri.

³⁶ Hau é yanmai, Garai Gasang gi, nungmoq éq tapzing má jén sat pyám é haú Yesuq lé, Yhumsing eq Hkrisduq dùm nhang é hkyô, Israelaq byu pé lhunglhâng bang hkyak sé nyi kó sháng gaq ô." gâ ri.

Sâng-hi Lumjǎng É Bang

³⁷ Yhangmoq gi, haú lé wó gyô bùm kôjáng, yhangmoq é i-myt má záng kô é nghut mù luí, "Gumang wui ê, ngangq hkâsu kut lo rá lhú?" ga luí, Petruq eq lagyo gôbang lé myí akô.

³⁸ Petruq gi, "Nungmoq yuq hkangmó myit lhing mù, Yesuq Hkrisduq é mying mai wui-myhup hkâm yù keq; Haú jáng, nungmoq é yubak hkyut pyám byí é hui kó rá nghut lhê. Haú hkûn, Chyoiyúng Woi-nyí gâ é chyunghuq lé, nungmoq wó yù kó rá nghut lhê. ³⁹ Hkâsu mù gâ le, danggidiq haú gi, nga-nhông é Yhumsing Garai Gasang ji yù rá bang banshoq nghut é, nungmoq

eq nungmoq é yhangzo yhangshù pé eq le, mau we má nyi é lhunglhâng bang eq le, sêng lhê." ga luí, yhangmoq lé tái kyô ri.

⁴⁰ Yhang gi, dang gotú myo myô eq le saksé hkâm mù, "Shi agè ashop é amyú mai wó lut htoq lo keq ô!" ga luí, yhangmoq lé lhoq pun lhoq kyíng ri. ⁴¹ Dang haú lé guq yu é bang gi, wui-myhup hkâm yu bùm kôluí, haú nyí má byù sum hkyíng kô jat wàng lo bum beko nghut ri.

Lumjǎng Bang Zùm Yap É Hkyô

⁴² Haú bang gi, lagyo pé mhoqshit é hkyô, zùm yap é hkyô, muk hpé gam é hkyô† eq akyú dúng é hkyô má, i-myt rahkat za chôm châng nyi akô. ⁴³ Lagyo pé kut shit é mauhpo muzó eq limik kumlhá pé myo myô é yanmai, lhunglhâng bang gi, gyuq maú nyi bum akô nghut ri. ⁴⁴ Lumjǎng é lhunglhâng bang gi, rawò má za zup zing to mù, azing zè banshoq lé chôm chung nyi akô. ⁴⁵ Yhangmoq gi, yhumsing é sutzé pé lé, ùng pyám mù, yuq hkangmó lé, yhang rá tô é eq rajung za gám byí akô. ⁴⁶ Yhangmoq gi, nyí wuí myit rahkat za èq noqkuq yhùm wàng má nyi nyi akô. Yhumsing é yhùm pé má le muk hpé gam é hkûn, ⁴⁷ Garai Gasang lé hkya-on kungtôn uchyang, gabú é eq myit hui é eq chôm zo chôm shuq nyi bum akô; byù banshoq bâng é hí má le myoqdong wó bum akô. Haú Yhumsing gi, nyí wuí yhangmoq chyáng hkyi yù hui bang jat lò nhang ri.

3

Hkyi Hten Sù Rayuq Lé, Petruq Lhoq Gé

Byí É Hkyô

¹ Ahkuí, Petruq eq Yohan gi, myinhâng zó sum hkying lhê é kyúdung nám má, noqkuq yhùm shut doq e ló akô. ² Haú hkûn, ínù unghkaú mai hkyí hten lugù dut é byù rayuq lé, noqkuq yhùm má wang lé lô bâng chyáng mai dúng zo sháng gaq ga, Yunglho hkum ga myhíng é hkúmdong má nyí hkang nyí mó waq lé lô mù, lé nyhi to to kut akô. ³ Yhang gi, Petruq eq Yohan, noqkuq yhùm haú má wang e ló é lé, myàng luí, lhóm dúng nyi ri. ⁴ Petruq eq Yohan kúm gi, yhang lé chôm wú tsuq to mù, "Nga-nhik lé tu wú aq." gâ akô. ⁵ Haú mù, yhang, yhangnhik chyáng mai rajung jung wó yù rá lé myit myoqbyù luí, yhangnhik lé rago za saí wú tô ri.

⁶ Petruq kúm gi, "Ngùn, híng gi, ngò a wó; nghut kôhang, ngò wó é nang lé byi lé: Nazaret wá byù Yesuq Hkrisduq é mying mai toq sô ló aq." ga tái uchyang, ⁷ yhâng é loqyo loq má zui mù lǎng toq kat ri; haú hkûn jáng, yhâng é hkyí kochang-chap pé

† 2:31 Grik dong Hkrisduq gâ é gi, xú but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

* 2:34-35 Hkya-on 110:1 † 2:42 Muk hpé gam hkyô gâ é lé lichyúm í dǎng wó yu lhê -radǎng gi, rahá chôm zo chôm shuq é lé gâ lhê; radǎng gi, Poido chôm zó é lé gâ lhê.

wám bo lò bê nghut ri. ⁸ Haú mù, yhang gi, radá dâm toq yap mù sô kat lui, so uchyang, byàm uchyang Garai Gasang lé hkyá-on mù, yhangnhik eq rahá noqkuq yhum má wang ló ri. ⁹ Yhang sô e ló nyi é eq Garai Gasang lé hkyá-on kungton nyi é lé, lhunglhâng bang chôm myang akó. ¹⁰ Haú yuq gi, noqkuq yhum é Yunglho hkum gá é hkúmdong má zung to mù, dung zo sù nghut é lé yhangmoq matsing kô é nghut mù lui, yhang chyáng dut lò bê hkyo é yanmai, maú hong byuq bum akó nghut ri.

Petruq Hkô Kyô É Mungdang

¹¹ Petruq eq Yohan chyáng haú dung zo sù byin châng tô é hkún, shiwa byu pé gi, wú maú uchyang, Sholumon jirop shut, yhangmoq chyáng din yán wang lé lo bum akó. ¹² Petruq haú lé myàng jáng, shiwa byu pé lé tai é gi, "Israelaq byu pé ê, shí yuq é hkyô lé haí mù lui maú nyi akó lú? Nga-nhik é dingmán hkyô eq wum-o a-tsâm eq, shí yuq lé wó so nhang é su ngám lui, ngá-nhik lé wú tsuq bum akó lú? Haú dông a nghut. ¹³ Abraham, Isak eq Yakup pé é Garai Gasang, nga-nhông é ichyí iwa pé é Garai Gasang gi, Yhâng é dui-nhâng zoshâng Yesuq lé hpungwup shingakang lhoq htoq byi é nghut ri; nungmoq kúm gi, Yhang lé sat hui shoq ga ap pyám kômù lui, Pilat zau hpó mai Yhang lé nhang pyám rá ga myit to bê lé, nungmoq gi, Yhâng é hí má yhang, Yhang lé he-ngik pyám akó nghut ri. ¹⁴ Haú choyiyúng dingmán é Sù lé nungmoq he-ngik pyám kômù, byu sat sù lé sheq dúng htoq yú kólui, ¹⁵ Asak Yhumsing lé gi, sat pyám bekó. Garai Gasang kúm gi, haú yuq lé shi é mai lhoq dui toq yú bê nghut ri; ngá-nhik gi, haú hkyo é saksé nghut nyi lhê. ¹⁶ Yesuq é myíng lé lumjng é yanmai, haú lumjng myit mai za, shí nungmoq myang é sê é sù lé wum-o lhoq pyíng byi bê nghut ri; nghut bê, Yesuq lé lumjng é yanmai, shí yuq lé, nungmoq banshoq bâng é hí má, gumjup shoq lhoq ge to byi bê nghut ri.

¹⁷ Ahkuí, gumang wui ê, nungmoq é uphkâng bang kut é su, nungmoq lé haú hkyô lé a sé mù kut pyám é hkyô lé ngó sê nyi lhê. ¹⁸ Nghut kôlhâng, haú hkyô gi, Garaí é Hkrisduq shí-nò jamjau hui rá nghut lhê ga lui, myiqhtoi banshoq bang lé hí hí mai tai nhang tô é Garai Gasang yhang, lhoq dik é nghut ri. ¹⁹ Hau é yanmai, haú Yhumsing chyáng má é nguínón é ahkyíng yàm yoq jé lò rá matú le, ²⁰ nungmoq é matú hkyin tô é Hkrisduq nghut é Yesuq lé, Yhang nhang kat byi rá matú le, nungmoq é yubak mara hkyut pyám byi é hui rá matú le, nungmoq gi, myit lhing mù Garaí Gasang chyáng lhing lò keq. ²¹ Garaí Gasang gi, a-nham pyat mai, Yhâng é choyiyúng myiqhtoi pé é nhut mai,

taí nhang to bê eq rajung za, nyi mi-nyí, joq mijoq lé asik dum sai é pyat jé shoq, Yesuq lé mauhkúng htoq má nyi nhang to rá nghut lhê. ²² Hkâsu mù gá le, Mosheq tai tô é le, 'Haú Yhumsing Garaí Gasang gi, nungmoq é yhanggu yhangmâng pé chyáng mai, nungmoq é matú ngó sù é myiqhtoi rayuq pô htoq lô nhâng rá nghut lhê; haú yuq tai mitai nungmoq gyo ra rá nghut lhê. ²³ Myiqhtoi hau é dang lé a gyo sù ó yuq nghut kôlhâng, yhumsing é byù myú mai chyung hpyit pyám é hui rá nghut lhê.'* gá ri.

²⁴ Gè gè yhang, Samuelaq mai, yhâng é htâng má châng pô htoq lo é myiqhtoi pé banshoq bang hko kyô lo é má le, buinyi shí pé eq séng mù tai to bekó nghut ri. ²⁵ Nungmoq gi, haú myiqhtoi pé é dang silí wunlí eq, Garaí Gasang mai, Abraham lé, 'Náng é awut ashin é yanmai, mingkan htoq má é byù myú chângjup hkungsô wó kó rá nghut lhê!''* gá é eq rajung za, nungmoq é ichyí iwa pé eq tô tô é danggidiq lé wó hkam yú rá bang nghut akó. ²⁶ Garaí Gasang gi, nungmoq yuq hkangmó lé yhumsing agé ashop é hkyô mai wó lhing tau lò nhang é dông, shimân byi rá matú, Yhâng é dui-nhâng zoshâng lé pô htoq lô nhâng lui, nungmoq chyáng hí nhang kat byi bê nghut ri." gá ri.

4

Petruq Eq Yohan Nhik Chyup Hui É Hkyô

¹ Hkyangjông pé, noqkuq yhum zúng é suwún hpó eq Saduke pé gi, Petruq eq Yohan shiwa byu pé lé dang nyo nyi é hkún, htoq lé lò kômù, ² yhangnhik, shiwa byu pé lé mhoqshít é eq, Yesuq é yanmai shí byuq bê bang Yesuq má dum dui toq lô rá gá é hkyô lé tai nyi kô é yanmai, yhangmoq gyai yhang myit myô nyi bum akó. ³ Haú mù, yhangmoq gi, yhangnhik lé chyup yú lui, myinhântang mauchut lò bê nghut é yanmai, htang napkyó jé shoq htóng má lhung tô akó. ⁴ Nghut kôlhâng, mungdang lé wó gyô yu é bang myo myo gi, lumjng kômù lui, yuggé ngo hkyíng kô jé shoq myô jat lò bekó nghut ri.

Yudaq Byin Tú Wapdoq Má, Yhangnhik Lé Myi Jep Wú É Hkyô

⁵ Htang nyí, yhangmoq é zau wui, suwún wui eq tará sará pé gi, Yerusalem wá mó má chôm hui zap akó. ⁶ Hkyangjông mó Anna, Kayaqpa, Yohan, Alesander pé eq hkyangjông mó é amyú pé banshoq le, haú má bo tô akó. ⁷ Haú mù, yhangmoq gi, Petruq eq Yohan lé gung gung má nyi to lui, "Nungnhik gi, haí a-tsam, ó yuq é myíng mai mù shí lé kut akó lú?" ga myí akó.

⁸ Haù hkùn, Petruq gi, Chyoiyúng Woi-nyí bying tồ é nghut mù luí, yhangmoq lé tai é gi, "Mingbyù wui é zaugun suwún wui ê, ⁹ hkyí hten sù shí yuq lé lhoq gê byí é jeju yanmai, yhang hkâsu kut lhoq gè yù huí é hkyô lé, hkù-nyí nungmoq ngá-nhik lé myí gôn wú naù kô é nghut le gi, ¹⁰ nungmoq lhunglhâng bang eq Israelaq byu pé banshoq lé sé nhâng kôlé, nungmoq eq tapzing má jén sat pyám mù, Garai Gasâng eq shí é mai lhoq dui toq yu é, Nazaret wà byù Yesuq Hkrisduq é mying mai, shí yuq gi, nungmoq é hí má ísu wáng wáng zán zán yap tồ é nghut ri.

¹¹ Yhùm sai bang nungmoq hkyin htoq pyâm é luqgok gi, htungchyûn mã é ahkyak dik é luqgok dut bê.[✧] gâ é gi, Yesuq lé tai é đông nghut ri. ¹² Hkyi yù hkyô gi, Yhang mai lai luí gotù a nyi lo, hkâsu mù gâ le, nga-nhúng hkyi yu é hui rá matù, mauhkúng a-ô má, Yhâng é mying mai lai luí, xângzo byu pé lé byí tồ é mying gotù a joq lo é yanmai nghut ri." gâ ri.

¹³ Yhangmoq kúm gi, Petruq eq Yohan nhik a gyuq a kyum tai é lé myàng kôjáng, yhangnhik, jong a doq wú é, mayù byù za nghut é hkyô lé sé tồ kô é yanmai, máu nyi bum akô; nghut kôlhâng, hí hpyang Yesuq eq zum wún wú sù nhik nghut é lé, yhangmoq bûn kat akô nghut ri. ¹⁴ Hau htoq agô, lhoq gê byí é hui sù le, yhangnhik eq rahá yap tồ é lé, yhangmoq myàng kô é nghut mù luí, tai rá hkyô haí le a joq lo kô nghut ri. ¹⁵ Haù mù, yhangnhik lé, haù Yudaq byin tú wapdoq* mai lhoq htoq tồ mù, yhangmoq rayuq eq rayuq hpyé lhum kô é gi, ¹⁶ "Shí nhik lé hkâsu kut lé gè rá lhú? Yhangnhik kut shit e laklai kumlhá gi, Yerusalem wà mó má nyi é lhunglhâng bâng é hí má de za dut bê nghut é yanmai, nga-nhúng haù lé a wó hê lo nghut ri. ¹⁷ Nghut kôlhâng, mingbyù wui má shí hkyô je riyhang a byo myín ló sháng gaq, ahkuí mai mying haù lé lang mù ó lé le a tai kyo lo rá matù, yhangnhik lé kyuq hkúm pyám sháng." gâ bum akô.

¹⁸ Haù mù, yhangnhik lé dum wut hâng yù luí, Yesuq é mying lé lang mù, haí le hkâtai, hkâ-mhoqshit kô ga chôm hkúm akô. ¹⁹ Petruq eq Yohan kúm gi, "Garai Gasâng é mungdang lé gyo rá htoq má, nungmoq é dang gyo le gi, Garai Gasâng é hí má gè rá, a gè rá lé, nungmoq yhang doqdân yù keq. ²⁰ Nga-nhik kúm gi, myàng yù, wó gyô yù bê é hkyô pé lé, a tai é, a wó nyí nghut lhê." ga luí, yhangmoq lé dum tú tai akô.

²¹ Haù hkùn, yhangmoq gi, dut lai lò bê hkyô é yanmai, shiwa byu pé Garai Gasang lé hkyá-on kungton nyi bùm kôluí, yhangnhik lé dâm byi rá hkyô a myàng kô é nghut

mù luí, yhangnhik lé dum tân kyuq luí nhang pyám bekô nghut ri. ²² Hkâsu mù gâ le, haù laklai kumlhá đông lhoq gê byi huí é sù gi, asak myi xê zàn chyân bê sù nghut é yanmai nghut ri.

Lumjng Bâng É Kyúdung Dang

²³ Yhangnhik gi, nhang kat pyám é hui kôjáng, yhangnhik é luzúm wui chyáng taù ló kômù, hkyangjong agyi pé eq suwún wui eq yhangnhik lé hkyim é dang banshoq lé, ló tai kyo akô nghut ri. ²⁴ Haù hkyô lé wó gyo kôjáng, yhangmoq gi, myit rahkat zâ eq yhumsing é htê lhoq ko mù, Garai Gasang lé kyúdung kô é gi, "Mauhkúng eq myigùng, wuìshuq lung-aù eq, haù pé má, nyi mi-nyí lé hpan tồ é, ahko ahkúng lhunglhâng wó é Yhumsing ê, ²⁵ Nang, nang é dui-nhâng zoshâng, ngamoq é íchyí iké Dawiq é nhut mai, Chyoiyúng Woi-nyí eq tai tồ é gi,

"Haì mù luí, tủngbaù amyú pé gi, nhikjum yô akô? haì mù luí, byu pé gi, akôm dá pyám akô lhú?

²⁶ Haù Yhumsing eq Yhâng é Hkrisduq lé gumlau toq rá matù, mingkan hkohkâm pé gi, toq mù, zau suwún wui eq rahá zup zing bum akô.[✧]

gâ ri. ²⁷ Gè gè yhang, Herut eq Pontu Pilat nhik gi, tủngbaù pé eq Israelaq byu pé le mù, wà mó shí má chôm zing tồ kôluí, nang xù but byi é sù,† nang é Chyoiyúng dui-nhâng zoshâng Yesuq lé gumlau toq rá dá nyi akô, ²⁸ Nang é wum-o a-tsam eq nang ô nau é đông dut rá matù, hí hkùn mai nang myit hpyit doqdân tồ é hkyô lé, yhangmoq gi, kut pyám bekô nghut ri. ²⁹ Yhumsing ê, ahkuí yhangmoq tai kyuq nyi é dang lé myàng byi laq ô! Nang é dui-nhâng zoshâng wui, a gyuq a kyum é myit eq nang é dang lé tai rá matù wum-o byi laq! ³⁰ Nang é wum-o bo é loq lhâm kat luí, noli nojàng lé lhoq gê byi mù, nang é Chyoiyúng dui-nhâng zoshâng Yesuq é mying mai, limik kumlhá eq mauhpo muzô pé lé kut shit laq ô!" gâ akô.

³¹ Haù su, kyú ban dung kôjáng, yhangmoq zing tồ é jowô gi, dui nún lô mù, yhangmoq lhunglhâng bang gi, Chyoiyúng Woi-nyí bying lô luí, Garai Gasâng é mungdang lé a gyuq a kyum é za tai bùm bekô nghut ri.

Azing Zê Lé Chôm Gam Chùng Kô É Hkyô

³² Haù lumjng é lhunglhâng bang gi, i-myit rahkat za nghut nyi akô; ó yuq le, yhumsing wó é zè lé ngá é a gâ é za, banshoq eq chôm gam chung nyi akô. ³³ Lagyô pé le, haù Yhumsing Yesuq dum dui toq é hkyô lé a-tsam mó eq saksé hkâm nyi kô é nghut mù luí, yhangmoq banshoq bâng é ahtoq

✧ 4:11 Hkya-on 118:22 * 4:15 Yudaq byin tú wapdoq lé Grik đông gi, San-hedrin gâ lhê. ✧ 4:26 Hkya-on 2:1-2 † 4:27 Xù but é hkyô gi, Yudaq byu pé htung đông xù but byi jáng, rajung jung kut rá matù hkyin masat yu é hkyô nghut lhê. Xù but byi é sù gi, Grik đông Mesaia gâ é nghut lhê.

má jeju myo myo joq nyi ri. ³⁴ Yhangmoq chyáng a wó a lom é byù rayuq le a nyi kó. Hkâsu mù gâ le, maumyî ratóng wó é, a nghut jáng, yhùm wó é bang ó yuq nghut kôlhang, haù pé lé adàm dàm ùng pyám lui wó yu é ngùn le gi, ³⁵ lagyô pé é hkyî wang má lé to byî akò. Haù mù lui, a wó a lòm sù ó yuq lé le ra tô é eq rajung za gàm byî akò nghut ri.

³⁶ Haù hkûn, Barnaba ga lui lagyô pé eq myhíng byi é, Kupru ming má é Lewiq byù Yosep le, yhang wó é maumyî ratóng lé ung lui, wó yu é ngùn lé lagyô pé é hkyî wang má, lé to byî ri. ³⁷ Barnaba gâ é danglichyúm gi, myit wum byî su é yhangzo gâ é lichyúm nghut lhê.

5

Anani Eq Sahpira Nhik É Hkyô

¹ Nghut kôlhang, Anani ga sù gi, yhangmyi Sahpira eq rahá, yháng nhâm wó é maumyî ratóng lé ùng pyám lui, ² yhangmyi le bo sê é đông, ngùn haù ra-am lé gi, haq myhit yu to mù, ra-am lé za lagyô pé é hkyî wang má lé to byî akò.

³ Haù mù lui, Petruq gi, "Anani ê, Chyoiyúng Woi-nyí lé mhaù pyám rà matú eq, maumyî hpau má é ra-am lé haq yu to rà matú, haù mù lui, náng é myit má Tsadán le byíng nhang tô lhê lúh? ⁴ Maumyî haù joq tô le, náng é zè nghut lhê a nghut lúh? Wó ung é ngùn le náng é zè nghut ashí, a nghut lúh? Haù mù lui, náng haù đông dà lhê lúh? Byù lé mhaù é a nghut. Garai Gasang lé mhaù pyám bê nghut ri." ga tai ri.

⁵ Anani gi, dang haù lé wó gyô jáng, lêng mù, shi byuq bê nghut ri. Haù hkyô lé wó gyô é bang banshoq le, gyai yhang gyuq bùm bekò nghut ri. ⁶ Haù hkûn, zorám wui gi, toq mù, yháng é màng lé htup lui, é waq myhup pyám akò. ⁷ Hau htàng, sum hkyíng kó myáng jáng, yhangmyi le, wang lé lo ri. Haù su dut é hkyô lé gi, yhang a sé nghut ri.

⁸ Haù hkûn, Petruq gi, "Ngo lé tai kyô wú aq. Nungnhik ùng é maumyî hpau gi, shí gú za nghut lhê lúh?" ga myi jáng, yhang gi, "Nghut lhê, haù gú za nghut bê." ga tú tai ri.

⁹ Petruq gi, "Nungnhik gi, haù Yhumsing é Woi-nyí lé ísu kut chyam wú rà matú, hkâsu mù chòm myit huí akò lúh? Wú aq, náng é yhumsing hpó lé é myhup pyám bang gi, haù hkúmdong má jé bê; yhangmoq gi, nang lé le waq htoq pyám kó rà nghut lhê." ga tai ri.

¹⁰ Radá dâm, yhang le lagyo hpó é hkyî wang má lêng shi byuq bê. Zorám wui le wang lo wú le, myiwe haù shi to lánng é lé myàng kólui, waq é mù, yhanglang é nàm má, é myhup pyám bekò. ¹¹ Hau é yanmai, haù hkun lhê é hpúng byù banshoq bang eq, haù su dut é hkyô lé wó gyo má wó gyô é bang gi, gyai yhang gyuq bùm bekò nghut ri.

Byù Myo Myo Lé, Lagyô Pé Lhoq Gê Byî É Hkyô

¹² Ahkuí, lagyô pé gi, mingbyù wui é hí má limik kumlhá eq mauhpo muzó myo myo lé, kut shit nyi akò. Haù lumjng bang gi, i-myit rahkat zâ èq, Sholumon jirop má chòm hui hui kut bum akò. ¹³ Shiwa byu pé gi, yhangmoq lé hkunggâ nyi bùm kôlhang, yhangmoq lé a wám é zum bùm kó. ¹⁴ Nghut kôlhang, haù Yhumsing lé lumjng é myiwe yuqgê wui gi, myo sheq myô jat lò kómù, yhangmoq chyáng je myô jat lò bê nghut ri. ¹⁵ Haù mù lui, byu pé gi, Petruq lai lo é hkûn, yháng é wupzo za lánng rayuq yuq é ahtoq má zang sháng gaq ga, nôhpyo huí é bang lé, wá má é hkyô yàm má waq htoq é mù, yhuphpú pé eq taphkang pé má lheq tô akò. ¹⁶ Hau htoq agó, Yerusalem awui ayám má é wá pé mai le, byù ajùm ayò gi, no é bang eq agè ashop é nat wang zing-ri huí é bang lé shuí jé lé bum akò; haù bang lhunglhang gi, lhoq gê lhoq yô byî é huí bum akò nghut ri.

Lagyô Pé Zing-ri Huí É Hkyô

¹⁷ Hkyangjong mó eq yháng é luzúm wui, Saduke hpúng má é byu pé kúm gi, gyai yhang wú manon bùm kólui, toq mù, ¹⁸ lagyô pé lé chyup yù lui, wá má é htóng má lhung tô akò. ¹⁹ Nghut kôlhang, haù myín lé, Yhumsing é maumang lagyo rayuq gi, htóng hkum pé lé hpông pyám mù, yhangmoq lé shuí htoq yù uchyang, ²⁰ "Nungmoq htoq lò mù, noqkuq yhùm má é yap to lui, dui é asak hkyô sik eq sêng é danglù banshoq, shiwa byu pé lé tai kyo keq." ga tai ri.

²¹ Napsún myoqmyàng zó lé, yhangmoq gi, noqkuq yhùm má wàng mù yhangmoq wó gyô yu é eq rajung za, shiwa byu pé lé, mhoqshit hi lò akò.

Haù u lé, hkyangjong mó eq yháng é luzúm wui gi, Israelaq byu pé é suwún wui lhunglhang bang lé ji yù mù, Yudaq byin tú wapdoq chòm zung yù lui, lagyô pé lé é shuí yù rà matú htóng shut byù nhang kat akò. ²² Haù bang kúm gi, htong má jé é hkûn, lagyô pé lé a myàng kójáng, dum taù lò mù lo tai kyo kó é gi, ²³ "Htóng hkum le ging ging myhí to lánng ri, htóng zúng bang le hkum yám má yap tô akò. Nghut kôlhang, hpông wú le, ahkaù má ó le a nyi to lo nghut ri." gâ ri. ²⁴ Noqkuq yhùm zúng é zau hpó eq hkyangjong agyi wui gi, dang haù lé wó gyo kójáng, "Shí hkyô haù dut lò rà lúh?" ga, gyai gyuq maù bum akò.

²⁵ Haù hkûn, byù rayuq wang lé lô mù, "Wú keq, nungmoq eq htóng má lhung tô é bang gi, noqkuq yhùm má yap to mù byu pé lé mhoqshit nyi bum akò." ga lui, yhangmoq lé tai kyô ri. ²⁶ Haù mù lui, zau hpó haù gi, yháng é a-ò má é bang eq é mù, lagyô pé lé é shuí yu akò. Nghut kôlhang, shiwa byu pé

luqgok eq dù lô kó râ lé gyuq kô é yanmai, htân htân a wám kut kó nghut ri.

²⁷ Lagyo pé lé shuí jé lô kôjáng, Yudaq byin tú wapdoq hí má yhangmoq lé nyhi tô akò. Haú hkùn, hkyangjong mó gi, ²⁸ "Yesuq é mying lé lang luí a mhoqshit rá matú, nungmoq lé, htan é hkunmó hkyô to bê nghut lhê. Nghut kôle, nungmoq mhoqshit é hkyô gi, Yerusalem wà mó jâm shoq, nungmoq kut bekò nghut luí, Yesuq é sui lé, ngamoq é ahtog má ke byi rá dá nyi akò." ga luí, yhangmoq lé tai akò.

²⁹ Haú hkùn, Petruq eq gotú lagyo pé tú tai kô é gi, "Ngamoq gi, byù dang lé gyo ra htoq má Garai Gasâng é mungdang lé je luí gyo rá dut lhê. ³⁰ Nga-nhùng é ichyí iwâ pé é Garai Gasang gi, nungmoq eq tapzing má lhang sat pyâm é Yesuq lé, shí e mái lhoq dui toq kat bê nghut ri. ³¹ Israelaq amyú lé, myit lhing hkyô eq mara hkyut byi hkyô hpóng byi rá matú, up é ahkang wó Sú eq hkyi yú Sú kut nhâng rá ga, Garai Gasang gi, Yhang lé, Yhâng é loqyo loq* má waq toq to bê nghut ri. ³² Ngamoq le shí hkyô é saksé pé nghut nyi lhê; mungdang lé gyô yú luí châng é bang lé Garai Gasang byi tô é Chyoiyúng Woi-nyi le, shí pé é saksé nghut lhê." ga akò.

Gamalelaq Hpaqchyí Byí É Hkyô

³³ Yhangmoq gi, dang haú lé wó gyo kôjáng, lúm gyo nhik-yo naú kômù, lagyo pé lé sat pyâm rá lhang myit akò. ³⁴ Nghut kôlhang, mingbyù banshoq bang é hí má arónis wó é tará sará Gamalelaq gâ é Hparishe rayuq, haú Yudaq byin tú wapdoq má toq yap mù, lagyo pé lé razup zo lhoq htoq to nhâng luí, ³⁵ yhang tai é gi, "Israelaq byu pé é, shí bang lé hkásu kut rá hkyô, rago za hí myit wú keq. ³⁶ Hkásu mó gâ le, hí hpyang Htudaq gâ é byù rayuq pô htoq lô mù, yhanggùng yhang byù mó rayuq yuq nghut lhê ga tai jáng, byù myi shô kô yhang chyáng châng wú bekò. Yhang sat pyâm é hui luí, yhang htâng châng é lhunglhang bang le byo myín byuq kômù, haí le a wó kut dut byuq akò nghut ri. ³⁷ Hau htâng, mying jhpan guq yu é buinyi má, Yudaq gâ é Galile byù rayuq pô htoq mù, mingbyù wui lé yhâng hkyam shut mhoq hpyoq yu ri. Yhang le sat pyâm é hui mù, yhang htâng châng é lhunglhang bang le, byo myín byuq bekò nghut ri. ³⁸ Ahkuí le, shí bang lé haí le hkágon ko, yhangmoq kâm é dōng nghut nyí kó sháng gaq; yhangmoq kut nyi é hkyô eq dá nyi é hkyô pé gi, byù myit dōng kut é nghut jáng, htên byoq byuq rá za nghut lhê. ³⁹ Nghut kôlhang, Garai Gasâng chyáng má é nghut le gi, nungmoq wó lhoq hkyiing pyám kó rá a nghut. Garai Gasâng é gyé sheq dut lò kó rá nghut lhê." gâ ri.

⁴⁰ Dang haú lé yhangmoq gyô htuk bum akò. Haú mù, lagyo pé lé wut yù mù luí, nhuq bat yù kômù, Yesuq é mying lé lang luí mhoqshit é hkyô a ge kut rá nghut lhê ga tai kômù, nhang pyâm akò nghut ri.

⁴¹ Lagyo pé kúm gi, Yesuq é mying é yanmai ru hpuzô é hkyô gi, gingdán nyi ri, ga myit yù kômù, Yudaq byin tú wapdoq haú mai gabú myit eq htoq lô bekò. ⁴² Hau htâng, yhangmoq gi, nyi wui làng noqkuq yhùm má le, rayhùm htâng rayhùm má le, Yesuq gi, Hkrisduq nghut é hkyô gabú danglù lé mhoqshit hkò kyô nyi akò nghut ri.

6

Garúm Râ Byù Nyhit Yuq Lé Hkyin Yu É Hkyô

¹ Ahkuí, chángzô pé myô jat lo nyi é buinyi pé má, Grik dang nyo é Yudaq byu pé gi, yhangmoq é chuimó myhi pé lé, nyi wui lhê é gám tso gám huq é hkyô má rago a wó kut kô é yanmai, Hebre mying mù é Yudaq byu pé lé mara hún dang tai bum akò. ² Haú hkùn, lagyo raxe í yuq gi, chángzô pé lhunglhang bang lé wut yù mù, "Ngamoq, Iwa Garai Gasâng é mungdang hko kyô é muzó lé rap pyám to mù, zangbó amù lé za lajang nyi é nghut le gi, a htuk rá nghut lhê. ³ Haú mù luí, gumang wui é, Chyoiyúng Woi-nyi bying é eq hpaqchyí byéng-yá bo é nhik bo byù nyhit yuq lé nungmoq chyáng má é hkyin to keq. Haú bang lé muzó shí lhum hun to rá nghut lhê. ⁴ Ngamoq kúm gi, kyúdung é hkyô eq mungdang hkò é hkyô lé za, noqzuq tung kut nyi rá nghut lhê." ga tai akò.

⁵ Dang haú lé shiwa byù lhunglhang bang gyô htuk kômù luí, lumjing myit kô é, Chyoiyúng Woi-nyi bying é Stephan ga sù eq, Hphilip, Prokoru, Nikanora, Timun, Parmana, Yudaq noqkuq htung má lhing wang lò bê sù Antioku wà mó má é Nikolaq pé lé hkyin yù mù, ⁶ lagyo pé chyáng shuí lô akò; lagyo pé gi, kyúdung byi kômù, yhangmoq lé loq ke byi akò nghut ri.

⁷ Garai Gasâng é mungdang gi, je myô jam lò luí, Yerusalem wà mó má chángzô pé gyaí myô jat lawán lo é htoq agó, hkyangjong pé myo myo le, haú lumjing hkyô má châng nyi bum akò.

Stephan Chyup Yú Hui É Hkyô

⁸ Ahkuí, Stephan gi, Garai Gasâng é jeju chyunghuq eq wum-o a-tsam bying nyi é nghut mù, byu pé é hí má mauhoq muzó pé eq limik kumlhá mó pé tūn shít ri. ⁹ Haú hkùn, luthkyô ga bâng é tarajong eq sêng é Kuruni, Alesander eq Kiliki, Asia mau má é bang ra-am gi, toq mù, Stephan eq dang chyin chyin lhum akò. ¹⁰ Nghut kôlhang,

* 5:31 Garai é loqyo loq gâ é gi, hpautap hkungga ging é jowò lé tai nau é nghut lhê.

Stehpân é dang gi, Chyoiyúng Woi-nyí lom é hpaqchyí dang nghut é yanmai, yhangmoq a úng kó nghut ri.

¹¹ Haú mù, yhangmoq gi, "Shí yuq, Mosheq eq Garai Gasang lé rhoi dang tai nyí é lé, ngamoq wó gyô ri." ga luí, mhaú tai nhâng rà byù haq lung tô akò.

¹² Haú mù, yhangmoq gi, mingbyù wui eq nhik bô suwún wuí, tará sará pé lé, chun htau mù, Stehpan lé chyup yú nhâng luí, Yudaq byin tú wapdoq má shuí nyhi tô akò.

¹³ Mhaú é saksé byu pé lé le lhoq hâng kat luí, haú bang gi, "Shí yuq, shí chyoiyúng jowò* eq jep é tará lé shut shá é dang ru tai nyí ri. ¹⁴ Nazaret wà byù Yesuq ga sù gi, jowò shí lé hpyoq pyám mù, nga-nhúng lé Mosheq eq byí tô é htungking lé htaí pyám rà nghut lhê ga luí, yhang tai é dang lé ngamoq wó gyô é nghut lhê." ga tai akò.

¹⁵ Haú Yudaq byin tú wapdoq má zung to bang banshoq, yhang lé chôm wú tsuq nyí kô é hkún, yhâng é myoqdong gi, maumang lagyo é myoqdong su dut é lé, yhangmoq myang akò nghut ri.

7

Stehpan Tai É Dang

¹ Haú hkún, hkyangjong mó gi, "Dang haú pé têng lhê lhu?" ga luí, yhang lé myi jáng,

² Stehpan tú tai é gi, "Gumang wui eq íwa wui é, gyô wú keq, nga-nhúng lhunglhang bâng é íchýí Abraham gi, Haran wà má a ló nyí shí lé, Mesopotamiaq mau má nyi tô ashí hkún, hpungwup shingkang bo é Garai Gasang gi, yhâng chyáng lé htoq shit mù, ³ Náng é ming eq náng é amyú mai htoq ló luí, ngò tún shit rà ming shut e ló aq."* ga luí, yhang lé tai ri.

⁴ Haú mù, yhang gi, Hkaldea byu pé é mau mai htoq ló luí, Haran wà má ló nyi nyi ri. Yhâng wa shi byuq é htàng má, Garai Gasang gi, ahkuí, nungmoq nyi nyi é ming shí má yhang lé htot ló nhâng bê nghut ri. ⁵ Garai Gasang gi, shí ming má yhang lé silí wunlí nghú rà, hkyí rahkò nang í é myigúng lhang a byí é nghut kôlhang, yhang, zodù lhang a wò shí mai, yhang lé le, yhâng é awut ashín pé lé le, maumyí shí byi rà ga danggidiq byi to bê nghut ri. ⁶ Hau htoq agó, shí hkyô lé Garai Gasang xoq tai é gi, 'Náng é awut ashín pé, túngbaú ming má bíng nyí mù, haú ming bâng eq nyi shô zàn jùn zô é eq zing-rí é lé hui kó rà. ⁷ Nghut kôlhang, yhangmoq lé jùn zô é amyú lé le, ngò jéyáng rà nghut lhê.' gâ ri. 'Haú hkún, yhangmoq gi, haú ming mai htoq ló mù, jowò shí má ngo lé noqkuq kó rà nghut lhê.'* ga le, Garai Gasang tai ri. ⁸ Hau htàng, yhang lé ahyo-kuq hpyit byi rà hkyô eq séng é dangshikaq le, byi ri. Haú

mù, Abraham gi, Isak lé hku é htàng shit nyí buinyi má ahyo-kuq hpyit byi ri; Isak gi, Yakup lé hkú mù, Yakup gi, íchýí íwa achýúng raxe í yuq lé hku kat bê nghut ri.

⁹ Haú íchýí íwá pé gi, Yosep lé manôn kôluí, Egutuq ming shut jùn đông úng kat akò. Nghut kôlhang, Garai Gasang gi, yhang eq rahá nghut nyi mù luí, ¹⁰ wuítke jamjau banshoq mai yhang lé lhoq lthut yú mù, Egutuq hkohkâm Hpara-uq é hí má le myoqdong wó, hpaqchyí byéng-yá le bô nhang é yanmai, hkohkâm haú gi, Egutuq ming eq, yhâng é hkohkâm-wàng banshoq lé up nhang ri.

¹¹ Haú u lé, Egutuq ming eq Hkanan ming banshoq má mutmó gyô lô mù, wuítke jamjau mó hui bekò. Nga-nhúng é íchýí íwá pé le zoshuq a myang hô zo lo dut byuq bekò nghut ri. ¹² Ahkuí, Yakup gi, Egutuq ming má guqzo joq é hkyô lô wò gyo jáng, nga-nhúng é íchýí íwá pé lé sàng-hi dâm ê nhang ri. ¹³ Htang dâm dum é é hkún, Yosep gi, yhanggu yhangmang pé lé yhang ó nghut é hkyô tai kyô ri. Hpara-uq le Yosep é yhumbyù ikun hkyô lé sê yù byi bê nghut ri. ¹⁴ Hau htàng, Yosep gi, yhâng wa Yakup eq yhumbyù banshoq nyhit xe ngo yuq lé, yhâng chyáng pying yù bê nghut ri. ¹⁵ Yakup le Egutuq ming má jé gyô lô luí, yhang eq nga-nhúng é íchýí íwá pé gi, banshoq haú ming má shí ló byuq bekò nghut ri. ¹⁶ Yhangmoq é mâng lé gi, Shehkiem wà má yu taú ló mù, Shehkiem wà má é Hamora é yhangzo yhangshu pé chyáng mai, Abraham eq ngùn byi mù wui hpyit tô é lupdùng má ló myhup tô akò nghut ri.

¹⁷ Abraham lé Garai Gasang byí tô é danggidiq dik rà ahkying jé lo nyi é u lé, ¹⁸ nga-nhúng é amyú gi, Egutuq ming má Yosep lé a sê é hkohkâm pò htoq é pyat jé shoq, myoluq jebe lò bekò nghut ri. ¹⁹ Hkohkâm hpó haú gi, nga-nhúng é amyú htoq má a ge é hpaqchyí da luí, nyheqnú pé lé shí byuq sháng gaq ga, dù pyám nhang é đông mai nga-nhúng é íchýí íwá pé lé zing-ri bê nghut lhê.

²⁰ Haú u má, Mosheq lé hkú to bê. Yhang gi, Garai Gasang é hí má gyai yunglô é sú nghut ri; yhang gi, yhângwá é yhùm má lhamó sum hkyap baú tô é hui mù, ²¹ htot tô tô é hui jáng, yhang lé Hpara-uq é byizô eq xe yù mù, zosing kut yú luí, hku kô ri. ²² Mosheq gi, Egutuq ming má é hpaqchyí byéng-yá banshoq lé mhoq yú luí, nhut shô a-tsam eq hkyí loq a-tsam gyai bò sú nghut ri.

²³ Yhang asak myi xê zàn jé lò jáng, yhâng é gumang Israelaq byu pé chyáng é kúm wú rà ratú wó myit htoq kat ri. ²⁴ Ê jé jáng,

* 6:13 Shí chyoiyúng jowò gi, Yerusalem noqkuq yhùm lé gâ lhê. ✧ 7:3 Apùn 12:1 ✧ 7:7 Apùn 15:13-14

zing-ri hui nyi é sù rayuq lé é myâng luí, haú yuq lé búng mù, zing-ri nyi é Egotuq byù lé, loqchoq hpuq é đông sat pyâm ri. ²⁵ Mosheq gi, yhang é byu pé lé yhang é loq đông Garai Gasang hkyi yù hkyô byi nyi é lé, yhang é amyù pé sê gyo byi nhò ngàm kôlhang, yhangmoq a sê gyo byi kó nghut ri. ²⁶ Htang nyi lé, Israelaq byù yhangchang mabyoq htoq nyi é má, é ang mù, yhangnhik lé pyîn naù luí, 'Ahkaù nhik é, gumang yhangchang sheq ru nghut lhê nhing, haí mù rayuq eq rayuq byoq lhum nyi akò lú?' ga taí ngón wú ri.

²⁷ Luzúm hpó lé zing-ri nyi sù yuq gi, 'Ngamoq é ahtoq má zau eq tará agyi kut rá matú, nang lé ó yuq hkyin tó é lú?' ²⁸ A-nyi nap Egotuq byù lé sat pyâm é su, ngo lé le sat pyâm nau ri lú?'* ga luí, tũ taí uchyang yhang lé dũn chyũn pyâm ri. ²⁹ Mosheq gi, dang hau é yanmai, hpâng luí Midian ming má é nyi byuq ri. Haú má yuqzo í yuq é wó ri.

³⁰ Haú ming má myi xê zàn lai jáng, Sinaq Bùm yàm, yoso hkaù má é myi gyúng tó é mhanpúng mai, maumang lagyo rayuq gi, Mosheq lé htoq shit ri. ³¹ Mosheq gi, haú lé myàng jáng, hau é yanmai maù luí, wú wú rá ga huí é ló le, Yhumsing é hté htoq lo é gi, ³² 'Ngò gi, nang íchyí iwá pé é Garai Gasang, Abraham, Isak, Yakup é Garai Gasang nghut nyi lhê.*' gâ ri. Mosheq kúm gi, gyuq nán luí, a wám tu wú nghut ri.

³³ Haú Yhumsing gi, 'Náng é hkyí-tsong hkyut pyám aq, nang yap tó é jowò gi, chyoiyúng é myigúng nghut lhê. ³⁴ Egotuq ming má ngá é amyù pé zik zo huí nyi é hkyô lé, ngò gè gè yhang myàng bê; yhangmoq é ngau nhik ngau hté lé ngò wó gyo bê; yhangmoq lé hkyi yù rá matú ngò gyo lé é nghut lhê; ahkuí, lé aq, ngò, nang lé Egotuq ming shut nhang taù kat rá.*' ga luí, yhang lé dum taí ri.

³⁵ Yhangmoq eq, 'Nang lé zau eq tará agyi kut rá matú, ó yuq hkyin tó é lú?' ga luí hengik pyâm é Mosheq lé yhang, mhanpúng má htoq shit é maumang lagyo đông mai, Garai Gasang gi, yhangmoq é zau eq hkyi yù sù kut nhâng luí, taù nhang kat é nghut ri. ³⁶ Haú Mosheq yhang, Egotuq ming má le, Nòng Nè má le, yoso hkaù pé má le, myi xê zàn gyoro má mauhpo muzò pé eq limik kumlhá pé tũn shit uchyang, yhang é byù myù pé lé Egotuq ming mai shuí htoq ló ri.

³⁷ Israelaq byu pé lé, 'Nung gu nung mâng pé mai, nungmoq é matú ngò eq du é myiqhtoi rayuq lé, Garai Gasang gi, pò htoq lò nhâng rá nghut lhê.*' ga luí, taí tó é sù le Mosheq yhang nghut ri. ³⁸ Yoso hkaù má nghut nyi ashí hkũn lé, shiwa byù hpúng má,

Sinaq Bùm má yhang lé dang taí é maumang lagyo eq le, nga-nhúng é íchyí iwá pé eq le rahá nghut sù gi, yhang yhang nghut nyi ri; nga-nhúng lé ap byi rá asak dui é mungdang lé lom yu é sù le, yhang nghut nyi ri.

³⁹ Nghut kôlhang, nga-nhúng é íchyí iwá pé kúm gi, yhang é dang lé a kâm gyo kômù, yhang lé he pyám luí, Egotuq ming shut taù nau é myit bò bum akò. ⁴⁰ Haú mù, Arun lé, 'Egotuq ming mai nga-nhúng lé shuí htoq lo é Mosheq gi, haí dut byuq bê hkyô lé, ngamoq a sé lo; haú mù, nga-nhúng hí má so byi rá hparaù lhò pé saí byi aq.*' ga taí akò. ⁴¹ Haú buinyi pé má, hhangmoq gi, nojúng zo lhò saí mù, alhò haú lé hkungga nhòng byi uchyang, yhangmoq é loq eq saí tó é muzò jizò má gabù nhik dik nyi akò. ⁴² Haú mù luí, myiqhtoi pé é laiká má ká tó é gi,

'Israelaq byu pé é, myi xê zàn tup yoso má chung é shigu eq hkungga gi, ngo lé nhòng byi é nghut akò lú?'

⁴³ Nungmoq gi, nungmoq noq rá matú saí yu é alhò, Molak é zúm eq Rehpan hpara é kyí lé sheq, waq lhing wún ko é yanmai,

Babelon lai shoq ngò nungmoq lé lhoq lham pyám rá nghut lhê.*'

ga luí, bo tó é eq rajung za, Garai Gasang gi, yhangmoq chyáng mai myoqdong lhing pyám mù, mauhkúng htoq má é buí, kyí, lhamó pé lé noqkuq rá matú ap pyám bê nghut ri.

⁴⁴ Mosheq lé, nang myang é azòng eq rajung za saí aq ga, Garai Gasang taí é đông saí tó é saksé zúm lé, haú yoso má nga-nhúng é íchyí iwá pé wó yù bekò nghut ri. ⁴⁵ Haú mù, nga-nhúng é íchyí iwá pé gi, yhangmoq é myoq hí mai Garai Gasang eq hkat htoq pyám byi é byù myù pé é mau má, Yoshuq eq rahá wang nyi ló kò é hkũn, saksé zúm haú lé yu wang ló akò. Haú gi, Dawiq é pyat jé shoq joq tó bê nghut ri. ⁴⁶ Dawiq kúm gi, Garai Gasang hí má myoqdong wó sù nghut mù luí, Yakup é Garai Gasang matú nyi jowò saí rá ahkáng dung kôlhang, ⁴⁷ Sholumon eq sheq saí bê nghut ri.

⁴⁸ Nghut kôlhang, Myhang htáng htum Sù gi, byu é loq eq za saí é yhùm má nyi é a nghut, haú hkyô eq séng luí myiqhtoi wá taí tó é gi,

⁴⁹ 'Mauhkúng gi, ngá é zùng tanghkuq, myigúng gi, ngá é hkyí nang jang nghut nyi lhê;

ngá é matú hkasù é yhùm saí byi shi kó rá lú? Ngò nô yù rá jang gi, hkámá nghut kó rá lú?'

⁵⁰ Haú banshoq lé ngá é loq eq baú saí tó é a nghut kó lú? ga luí, haú Yhumsing taí ri.*'

gâ ri.

⁵¹ I-myyit htân mù, i-myyit eq nohkyap má ahpyo-kuq a hpyit é bang* ê, nungmoq gi, nungmoq é íchyí íwâ pé su, Choyoiyúng Woi-nyí lé hkâ-nhám le lhom he-ngik pyâm nyi akô; ⁵² Nungmoq é íchyí íwâ pé eq a zing-rí wú é myiqhtoi, ó yuq wá nyi lhê lhú? Haú Dingmán Sù pô htoq rá hkyô lé hko kyô é bang lé, yhangmoq sat pyâm é chyat nghut akô; ahkuí, nungmoq le, haú Dingmán Sù lé ap pyâm é bang eq sat pyâm é bang nghut nyi akô. ⁵³ Maumang lagyô eq shít kyo byí é tará lé nungmoq wó yú kôlhang, haú lé a cháng kó nghut ri." gâ ri.

Stehpan Lé Luqgok Êq Dú Sat É Hkyô

⁵⁴ Haú hkyô lé yhangmoq wó gyo kôjáng, yhangmoq é nhikhum má lùm htaú záng kô é yanmai, Stehpan lé, zui wang ngat kyáng shoq wú nhik-yô nyi akô. ⁵⁵ Stehpan kúm gi, Choyoiyúng Woi-nyí byíng mù, mauhkúng shut tu wú kat le, Garai Gasâng é hpungwup shíngkang lé le, Garai Gasâng é loqyo hkyam shut Yesuq yap tô é lé le, myang ri. ⁵⁶ Haú mù, yhang gi, "Wú keq, mauhkúng hpông tô é lé le, Garai Gasâng é loqyo hkyam shut haú Byu Yhangzo yap tô é lé le, ngò myàng ri." ga tái kat ri.

⁵⁷ Haú hkún, yhangmoq gi, htê mó o mó garu uchyang, yhumsing é nohkyap xaú pyâm mù, radá dâm yhang lé chóm htim kômù, ⁵⁸ yhang lé wà mai she htoq ló kôlú, luqgok êq chóm dú ló bekô nghut ri; saksé kut é bang gi, Sholuq gâ é zoram é hkyí wang má yhangmoq é buhíng pé lé hkyut bum tô akô.

⁵⁹ Luqgok eq dú nyi bùm kô é u lé, Stehpan gi, "Yhumsing Yesuq ê, ngá é woi-nyí lé hap yú laq." ga kyúdung ri. ⁶⁰ Hau htâng, yhang gi, hkyihput htuoq mù, "Yhumsing é, yhangmoq kut é mara haú lé hkyut pyâm byi laq." ga luí, htê mó eq wut dúng ri; haú ban tái jáng, yhang káng byit byuq bê nghut ri.

8

Hpúng Byú Lé Sholuq Zing-rí É Hkyô

¹ Sholuq gi, haú má nyi to mù, Stehpan lé sat pyâm é muzó má myit bo huí ri.

Haú nyí mai, Yerusalem wá mó má é noqkuq hpúng gi, zing-ri mó huí lo é nghut mù luí, lagyô pé mai lai luí, lumjíng bang lhunglhang gi, Yuda mau eq Samariq mau jowó hkgangmó má byo myín ló bekô. ² Nghut kôlhang, tará hkunggá é bang gi, Stehpan lé yhum pyâm é htâng má, yhang é yanmai iyon mó huí nyi akô nghut ri. ³ Sholuq kúm gi, rayhum htáng raihúm wàng mù, myiwe yuqgè lé she hkyut htoq yú luí, htóng má lhúng tô é dông mai, noqkuq hpúng haú lé lhoq hpyoq ló nyi ri.

* 7:51 I-myyit eq nohkyap má ahpyo-kuq a hpyit é bang gâ é gi, Garai dang lé a lùm a châng é bang lé gâ lhê.

Samariq Wà Má, Gabú Danglù Hkô Kyô É Hkyô

⁴ Byo htoq ló é bang kúm gi, jé é jowó hkgangmó má mungdang lé hkô kyô ló akô. ⁵ Haú hkún, Hpilip gi, Samariq mau má é myuq ra-myuq shut e ló mù, Hkrisduq é hkyô lé hkô kyô ri. ⁶ Byú ajùm ayò gi, Hpilip tái kyô é hkyô lé wó gyô é eq, yhang tún shít é limik kumlhá lé myàng kôjáng, i-myyit rahkat za eq yhâng é dang chóm gyô nyi bum akô. ⁷ Nat wang júng é byú myo myô pé chyáng mai, agè ashop é nat pé wut garu uchyang htoq ló byuq bum akô; gùngjum shi é bang eq hkyí htên é bang myo myo le, ge ló byuq bum akô. ⁸ Haú mù luí, haú myuq má gabú hkyô gyai yhang wó bekô nghut ri.

Myoqheq Sará Simun É Hkyô

⁹ Simun gâ é byú rayuq gi, hí lé haú myuq má myoqheq hpaqchyí kut shít mù, Samariq byu pé lé lhoq maú luí, yhâng gùng lé yhang, laklai sú nghut lhê gâ ri. ¹⁰ Byú tiq ko banshoq le, "Byú shí yuq gi, 'haú a-tsam mó' gâ é, Garai chyáng mai hpungwup a-tsam wó yú sú nghut ri." ga luí, yhâng é dang lé gyô bum akô. ¹¹ Haú yuq gi, myáng myáng yhâng é myoqheq hpaqchyí eq yhangmoq lé lhoq maú lo é yanmai, yhâng dang lé chóm lum bum akô. ¹² Nghut kôlhang, Hpilip hko kyô é Garai Gasâng é mingdán hkyô eq, Yesuq Hkrisduq é myíng eq sêng é gabú danglù hkyô lé, lumjíng kôjáng, myiwe yuqgè wui-myhup hkâm yu bum akô. ¹³ Simun yhang yhang le lumjíng mù luí, wui-myhup hkâm yú mù, Hpilip htâng châng wún ri. Hpilip é kumlhá mó eq laklai kumlhá pé lé myàng jáng, yhang gi, gyai maú byuq ri.

¹⁴ Garai Gasâng é mungdang lé Samariq byu pé, lhom hap yú bê hkyô lé, Yerusalem wá mó má nyi é lagyô pé wó gyô bùm kôjáng, yhangmoq gi, Petruq eq Yohan nhik lé haú má nhang kat akô. ¹⁵ Yhangnhik gi, lé jé jáng, byú haú bang Choyoiyúng Woi-nyí wó yú rá matú kyúdung byi akô. ¹⁶ Hkâsu mù gâ le, Choyoiyúng Woi-nyí gi, yhangmoq chyáng ó yuq é ahtoq má lé, a gyo ló shi; Yhumsing Yesuq é myíng mai wui-myhup hkâm yu é za ru nghut bùm ashí. ¹⁷ Haú mù luí, lagyô nhik yhangmoq é ahtoq má loq ke byi jáng, yhangmoq gi, haú Choyoiyúng Woi-nyí lé wó hkâm yú bekô nghut ri.

¹⁸ Lagyô nhik é loq ke kat jáng Choyoiyúng Woi-nyí wó hkâm yu é lé, Simun myàng jáng, yhang gi, yhangnhik lé ngún é byi wú mù, ¹⁹ "Hká yuq é ahtoq má nghut kôlhang, ngò loq ke byi jáng, haú yuq gi, Choyoiyúng Woi-nyí wó yú rá matú, haú su é a-tsam ngo lé le byi kó laq." ga dung ri.

²⁰ Petruq kúm gi, "Garai Gasâng é chyunghuq lé ngun eq wó wui yú rá nghut

lhê ga luí, myit é yanmai, náng é ngùn gi, nàng eq rahá htên byoq byuq sháng gaq. ²¹ Nàng gi, Garai Gasâng é hí má myit a dǐng sũ nghut é yanmai, shí hkyô má nàng wó bo lhóm rá a nghut. ²² Haú mù luí, shí agè ashop é hkyô mai myit lhǐng mù, Yhumsing Garaí chyáng dǔng tǒngbán aq. Haú hkún, náng é unghkaú má myit pyám é hkyô lé, mara hkyut pyám byi abe. ²³ Nàng gi, ladu lai shoq nhikhko zo mù, yubak mará èq tuí zing to huí é lé, ngò myàng ri." ga yhang lé tai ri.

²⁴ Haú hkún, Simun gi, "Nungnhik tai é hkyô hai le ngá chyáng a jé sháng gaq, ngá é matú haú Yhumsing chyáng kyúdung byi kó laq." ga tú tai ri.

²⁵ Yhangnhik kúm gi, haú Yhumsing é mingdang lé saksé hkám mù ban hko kyo jáng, Samariq byu pé é wà myo myo má, haú gabú danglù lé hko kyo uchyang, Yerusalem wà mó shut dum taú lò bekò nghut ri.

Hpilip Eq U-nuk Nhik É Hkyô

²⁶ Ahkuí, Yhumsing é maumang lagyo gi, Hpilip lé, "Toq aq, Yerusalem wà mó mai Gaza shut lò é hkyô jé shoq, maupyí shut nyàng za e ló aq. Hkyô haú gi, yoso hkyô nghut lhê." ga tai ri. ²⁷ Haú hkún, yhang toq mù e ló ri. Haú u lé, Ehtiopi ming lé up é hkohkám myhí Kandake é hí má ahko ahkáng mó wó mù, yhâng é sutzè banshoq lé zúm é, Ehtiopi byu u-nuk rayuq gi, noqkuq rá ga Yerusalem wà mó má é mù, ²⁸ dum taú lo é hkún, yhâng é myanglhêng má zùng luí, myiqhtoi Esai-aq laiká lé nghap nyi ri. ²⁹ Woi-nyí gi, Hpilip lé, "Myanglhêng shut chyáng e ló aq." ga tai ri.

³⁰ Haú mù, Hpilip gi, din é mù, myiqhtoi Esai-aq laiká nghap nyi é lé wó gyo jáng, "Nàng nghap nyi é hkyô lé sê gyo ri thú?" ga luí, yhang lé myi ri.

³¹ Haú yuq gi, "Mhoqshit sũ yuq a nyi le, ngò hkásu kut sê gyo rá thú?" ga tú tai mù, yhang eq rahá lo doq zùng aq ga Hpilip lé lung ri.

³² Yhang nghap é Chyúmdang gi, "Sat rá sau lé su, Yhang lé she e ló bê nghut ri;

sau zo gi, sau maú nyhám su é hí má zim za nyi tô é su, Yhang le nhut a hpông é za nyi tô ri.

³³ Yhânggùng lé lhoq shóm pyám to huí é hkún, Yhang lé a tara é dǒng doqdán pyám bekò;

Yhâng é asak lé myigùng htoq mai yù pyám bekò nghut mù luí, Yhâng é awut ashín lé ó yuq wó gôn kyo rá thú?"*

gã ri.

³⁴ Haú hkún, haú u-nuk wa gi, Hpilip lé, "Haú nghut le gi, ngo lé tai kyo laq! Myiqhtoi shí yuq gi, ó lé lhoq ang luí, tai é nghut lhê thú? Yhânggùng lé tai é nghut lhê thú? Haú a nghut jáng, góyuq é hkyô lé tai é nghut lhê thú?" ga myi ri. ³⁵ Haú hkún, Hpilip gi, Chyúmdang haú lé yù mù, Yesuq eq sêng é gabú danglù lé tai kyô ri.

³⁶ Haú su e ló kô le, wui joq é má jé jáng, haú u-nuk hpó gi, "Wú aq, shí má wui joq tô ri, wui-myhup hkám yù rá matú ngo lé hkúm rá jang hai joq ashí thú?" ga tai ri. ³⁷ Hpilip gi, "Nàng i-myt banshoq èq, nàng lumjǐng bê nghut le gi, hkám yu le ge lhê." ga tai ri; yhang le, "Yesuq Hkrisduq gi, Garaí Gasâng é Yhangzo nghut é lé, ngò lumjǐng bê." ga tú tai ri.* ³⁸ Haú hkún, yhâng é myanglhêng hkying nhâng mù, yhangnhik wui má gyo wàng luí, Hpilip gi, u-nuk hpó lé wui-myhup hkám byi ri. ³⁹ Wui hkaú mai htoq ló kô é hkún, haú Yhumsing é Woi-nyí gi, Hpilip lé myhik za shuí ló byuq mù, u-nuk hpó lé Hpilip lé dum a myàng lo; nghut kǒlhang, yhang gi, e ló é hkyô shut gabú myit èq xoq sô e ló bê nghut ri. ⁴⁰ Hpilip kúm gi, Azutu wà má lo htoq jé kat mù luí, Kesare wà mó jé shoq haú mau má é myuq pé wà pé hkgangmó má gabú danglù hkó kyô wún ri.

9

Sholuq Lhik Wang Lo É Hkyô

¹ Haú u lé, Sholuq kúm gi, Yhumsing é chángzò pé lé hkat kyuaq nha rá eq sat pyám rá ga, nhikmó-yò nyi é nghut mù luí, hkyangjong mó chyáng é mù. ² Yhumsing é Hkyô lé lumjǐng é myiwe yuqgè myàng mi-myàng lé chyup yú luí, Yerusalem wà mó shut wó she ló rá matú, Damaskuq myuq má é tarajong pé má byi rá laiká pé lé dǔng chǔng ri. ³ Yhang e ló le, Damaskuq myuq eq chyáng ló nyi é hkún, Yhâng é lhǐnghkyuq má mauhkǔng mai dân loq tung duqbo htoq ló ri. ⁴ Yhang myigùng má lèng ngop tô é u lé, "Sholuq, Sholuq, nàng ngo lé hai mù zing-rí nyi lhê thú?" ga luí, yhang lé tai é hté wó gyo ri.

⁵ Haú hkún, yhang gi, "Yhumsing é, nàng gi, ó yuq nghut lhê thú?" ga myi jáng, haú Yhumsing gi, "Nàng zing-rí nyi é Yesuq nghut lhê, ⁶ toq aq, myuq shing wang ló aq. Nàng zui sai rá hkyô lé lhóm tai kyo rá nghut lhê." ga tú tai ri.

⁷ Yhang eq rahá e ló é luzúm wui gi, hté haú wó gyo kǒlhang, ó yuq lé le a myàng kô é yanmai, maú hong yap tô bum akò. ⁸ Sholuq toq mù, myoq hpông kat wú le, hai lé le a myàng dut byuq mù luí, yhangmoq gi, yhang lé loq mai shê mù Damaskuq myuq shut shuí wang ló akò. ⁹ Sholuq gi, sum nyi

tup myoqjit byuq mù luí, a zo a shuq é nyi byuq ri.

¹⁰ Damaskuq myuq má Anani gâ é chángzo rayuq nyi ri. Yhumsing gi, yhang lé, "Anani ê." ga shing-rán đông wut ri.

Yhang gi, "Yhumsing ê, shí má nyi lhê." ga tú tai ri.

¹¹ Háu Yhumsing dum tai é gi, "Toq aq, Hkyô-Nyàng gâ é wà hkyô shut é mù, Yudaq é yhùm má, Tarshu byu Sholuq lé é hô aq, yhang gi, kyûdùng nyi ri. ¹² Yhang gi, Anani ga sù wang lé lô mù, yhang é myoq dum myàng sháng gaq ga, yhang é ahtaq má loq ke byí é lé, shing-rán đông myàng bê nghut ri." gâ ri.

¹³ Anani kúm gi, "Yhumsing ê, shí yuq gi, Yerusalem wà mó má, náng é sãn-yúng bang lé a ge é đông hkâ-myhó kut lai lo é hkyanglù lé ngò myo myo wó gyô wú bê; ¹⁴ Shí pé má le, náng é mying lé lãng é bang banshoq lé chyup rã ga, hkyangjong agyi pè chyáng mã é ahko ahkáng wó yu to sù nghut ri." ga tú tai ri.

¹⁵ Nghut kôlhang, Yhumsing gi, "Ru é aq, shí yuq gi, tũngbàu pé eq yhangmoq é hko hkam pè é hí má le, Israelaq byu pè é hí má le, ngá é mying lé wùn waq rã matú, ngò chúng rã ngũ luí hkyin to sù nghut lhê; ¹⁶ Ngá mying é yanmai hkâ-í hpuzo ra hkyô lé, Ngò, yhang lé tũn shit rã nghut lhê." ga tai ri.

¹⁷ Háu htàng, Anani gi, jé é mù, yhùm háu má wàng luí, Sholuq é ahtaq má loq kê to mù, "Gumang Sholuq é, náng myoq dum wó myàng mù, Choyiýung Woi-nyí byíng sháng gaq ga, náng lé lo é hkyô má, náng lé htoq shit é Yhumsing Yesuq èq ngo lé nhang kat é nghut lhê." ga tai ri. ¹⁸ Háu hkũn jàng, Sholuq é myoq mai akyap sù é wuí gyô byuq mù, yhang myoq dum wó myàng bê. Háu hkũn, yhang gi, toq mù wui-myhup hkãm yù luí, ¹⁹ zoshuq lé zo mù, wum-o dum lhoq pyíng yù bê nghut ri.

Sholuq, Damaskuq Myuq Má Mungdang Hko É Hkyô

Hau htàng, yhang gi, Damaskuq myuq má é chángzô pé eq rahá rayoq zo zùm yap nyi uchyang, ²⁰ Yesuq gi, Garai Gasàng é Yhangzo nghut é hkyô, háu hkũn jàng tarajong pé má hko kyô nyi bê nghut ri. ²¹ Sholuq é dang lé wó gyô é lhunglhang bang gi, maú byuq bùm kómù, "Shí yuq gi, Yerusalem wà mó má mying háu lãng é bang lé lhoq hten lhoq hpyoq sù nghut lhê, a nghut kó lúh? Ahkuí, shí má le, háu su é bang lé chyup yù mù, hkyangjong agyi pè chyáng ló ap rã da luí jé lé é sù a nghut kó lúh?" ga myi bum akò. ²² Sholuq kúm gi, a-tsam je bo lô mù, Damaskuq myuq má nyi é Yudaq byu pé lé tai hpyi kyo luí, Yesuq gi,

Hkrisduq yhang nghut nyi é hkyô lé saksé tũn shit ri.

²³ Buinyí tsómra myáng é htàng má, Yudaq byu pé gi, yhang lé sat pyám rã matú haq dà akò. ²⁴ Nghut kôlhang, yhangmoq dá é hkyô lé Sholuq sé pyám ri. Yhangmoq gi, yhang lé wó sat pyám shoq ga, nyi lé myín lé myuq hkum pé má lhom nyi akò. ²⁵ Sholuq é chángzô pé kúm gi, myín má yhang lé shuí yù mù, manghkoq má lũng nhàng luí, wà kyám xewám mai lhoq nyhum hkyô kat akò nghut ri.

Sholuq, Yerusalem Wà Mó Má Taiú Jé Lo É Hkyô

²⁶ Háu htàng, yhang gi, Yerusalem wà mó má jé lo é hkũn, chángzô pé eq zùm yap rã matú shikut wú kôlhang, yhang gi, chángzo dut bê hkyô lé a jing kò é yanmai, lhunglhang bang gi, yhang lé gyuq bum akò. ²⁷ Barnaba kúm gi, Sholuq lé lagyo pé chyáng shuí lò mù, Sholuq, hkyô má Yesuq eq hkãsu kut lui é hkyô lé le, Yesuq èq yhang lé tai é dang wó gyô é hkyô lé le, Damaskuq myuq má Yesuq é mying mai gyuq myit a bo é za hkãsu kut hko kyô é hkyô lé le, yhangmoq lé tai kyô ri. ²⁸ Háu mù, Sholuq gi, yhangmoq eq rahá Yerusalem wà mó má htoq htoq wàng wàng kut nyi uchyang, Yhumsing é mying mai a gyuq a kyum é za hko kyô nyi ri. ²⁹ Grik dang nyo é Yudaq byu pé eq le, tai he lhùm nyi akò; nghut kôlhang, yhangmoq gi, yhang lé sat pyám rã dà akò. ³⁰ Háu hkyô lé, gumang wui sé kójang, yhang lé Kesare wà mó má jé shoq dé mù, Tarshu myuq shut nhang kat akò nghut ri.

³¹ Yuda mau, Galile mau eq Samariq mau jowò hkangmó má é noqkuq hpúng gi, háu yoq pé má, lhoq ging lhoq tũng é hkyô wó yù mù, nguingón nyi akò; háu Yhumsing lé gyuq hkunggá é hkyô má le, Choyiýung Woi-nyí èq lhoq pun lhoq kyíng é hkyô pé má le châng nyi mù, myò jat lo bùm bekò nghut ri.

Ainea Ge Byuq É Hkyô

³² Háu hkũn, Petruq gi, háu mau pé má hkat kúm wùn uchyang, Ludaq wà mó má nyi é sãn-yúng bãng chyáng é jé ri. ³³ Háu wà má, gùngjum shí luí shit zãn tup yhupjang mai a wó toq é Ainea gâ é byu rayuq lé é myang ri. ³⁴ Háu mù, Petruq gi, "Ainea é, Yesuq Hkrisduq, nang lé lhoq gè byi bê nghut ri, toq mù, náng é yhuphú hen yù aq." ga luí, yhang lé tai ri. Háu hkũn jàng, Ainea wó toq yap bê nghut ri. ³⁵ Ludaq eq Sharon pá má nyi é lhunglhang bang gi, háu yuq lé myàng mù luí, Yhumsing Yesuq chyáng lĩng wang lo bum akò.

Dorka Ga Sù Dum Dui Lo É Hkyô

* 9:36 Dorka gâ é lichyúm gi, "chochí" gâ é nghut lhê.

³⁶ Ahkuí, Yopa myuq má Tabihtá gâ é chángzo myiwe rayuq nyi ri; mying haù lé Grik dang đông gi, Dorka* gâ é nghut lhê. Myiwe haù gi, ge é muzó kut nyi é sù eq, asho awuí bang lé alu byí nyi é sù nghut ri. ³⁷ Haù u lé, yhang gi, nõhpyo hui mù shi lô bê nghut ri. Yhâng mâng lé gi, chi mù lui ahtoq gok má jang tô akô. ³⁸ Ludaq wà mó gi, Yopa myuq eq chyáng é yanmai, haù myuq má Petruq nyi é lé chángzô pé wó gyo kôjáng, yhangmoq gi, byù í yuq lé nhang kat mù, "Ngamoq chyáng myap lé lô aq." ga jì nhang kat akô.

³⁹ Haù hkùn, Petruq gi, toq mù, haù nhik htâng châng e lô ri. Yhang jé jáng, ahtoq pyâm gok má shuí hâng yu akô. Chuimó myhí pé lhunglhâng bang gi, yhâng nàm má yap mù ngaù uchyang, yhangmoq eq rahá nyi tô ashí hkùn Dorka hkyup é buhíng eq gotù mebu pé lé tûn shit nyi akô.

⁴⁰ Petruq kúm gi, lhunglhâng bang lé htoq lô nhâng mù, hkyihput htuq lui, kyûdung mù, mâng shut lhing wú lui, "Tabihtá ê, toq aq!" ga tai ri, haù hkùn myiwe haù myoq hpóng lô mù, Petruq lé myàng jáng, toq zung lo ri. ⁴¹ Petruq gi, loq lhâm kat mù yhang lé lêng toq yù lui, lumjáng bang eq chuimó myhí pé lé wut yù mù, ùi gù ap byí ri. ⁴² Haù hkyô lé, Yopa myuq má é bang banshoq wó gyô lô kômù lui, byù myo myo gi, haù Yhumsing Yesuq lé lumjáng bum akô nghut ri. ⁴³ Haù mù, Petruq gi, shokuq loqmú sai é Simun ga sù eq rahá, Yopa myuq má rayoq zo nyi nyi ri.

10

Koneli É Shing-rán

¹ Ahkuí, Kesare wà mó má gyezo rashô up é Koneli gâ é gyezau rayuq nyi ri. Yhang gi, Itali gyedap má é nghut lhê. ² Yhang gi, tarâ hkungga myit bò lui, yhâng é yhumbyù banshoq bang eq rahá Garai Gasang lé gyuq hkunggá nyi lhê eq, myùng bang lé alu myo myo byi uchyang, Garai Gasang lé hkâ-nhâm le kyûdung nyi ri. ³ Ra-nyí lé, myinhâng sum hkying kô má, Garai Gasang é maumang lagyo rayuq gi, yhâng chyáng jé mù, "Koneli ê." ga lui, yhang lé wut é lé, shing-rán mai de de myang ri.

⁴ Haù mù, haù yuq lé wú tsuq to mù, "Yhumsing ê, hai hkyô nghut lhê thú?" ga gyuq myit eq myí ri.

Maumang kúm gi, "Náng é kyûdung dang eq alu byí é hkyô gi, Garai Gasang é hí má, hkungga masat đông hkyâng bê nghut ri. ⁵ Ahkuí, Yopa myuq shut byù lé nhang kat mù, Petruq gâ é sù Simun lé é shuí lò nhâng aq. ⁶ Yhang gi, wuimau yàm má é, shokuq hkyup zô é Simun yhâm má bíng nyi ri." ga tai ri.

⁷ Koneli gi, yhang eq dang tai é maumang lagyo lô byuq jáng, ùi-nhâng zoshâng í yuq eq, yhâng chyáng hkâ-nhâm le châng nyi bang má é, tarâ hkunggá é gyezo rayuq lé jì yù mù, ⁸ dut lai lo é hkyô banshoq, yhangmoq lé tai kyo lui, Yopa myuq shut nhang kat ri.

Petruq É Shing-rán

⁹ Htang nyi nyi-káng u lé, yhangmoq, Yopa myuq jé lô yàm má, Petruq gi, kyûdung rá ga, yhumhkung shut doq lô ri. ¹⁰ Haù hkùn, yhang gi, zòmút lui rajung jung zô nau nyi ri; nghut kôlhâng, zoshuq ru gá nyi ashí le, yhang moq byuq lô mù myoqwup shing-rán myang é gi, ¹¹ mauhkung bóng lô mù, hpajóng mó sù é lé, myi chyùn má zui lui myigùng shut lhoq hkyô kat é azing lé myang ri. ¹² Haù hkaù má, myigùng htoq má é hkyí myi hkyí dap é jung dusak ahú hú eq dô yê é jung ahú hú, mau má dang é nghoq ahú hú, lúng tô ri. ¹³ "Petruq ê, toq mù, sat zo aq." gâ é dangtê le mying htoq lo ri.

¹⁴ Petruq kúm gi, "Yhumsing ê, haù gi, a wó dut, achaq achyut é eq a sansêng é zè lé, ngò hkâ-nhâm le a zô wú." ga tú tai ri.*

¹⁵ Haù hkùn, "Garai Gasang lhoq san lhoq séng bê zè lé, a sansêng hkâ-nghù." ga lui, yhang lé dum tai kat ri.

¹⁶ Haù su ga sum dâm tai é htâng má, zè haù lé radá dâm mauhkung shut wup yu lô bê nghut ri.

¹⁷ Ahkuí, Petruq gi, yhang myang é shing-rán lé hai wá nghut lhê thú ga lui, myit mau nyi é hkùn, haù Koneli nhang kat é bang gi, Simun é yhâm lé myang hô kômù, hkumtot má yap to lui, ¹⁸ Petruq gâ é sù Simun, yhâm haù má nyi a nyi é lé, wut myí wú akô.

¹⁹ Petruq gi, shing-rán haù lé ru myit wú nyi ashí le, Woi-nyí gi, "Wú aq, byù sum yuq nang lé ho nyi akô, toq mù gyô lô aq; ²⁰ yhangmoq gi, ngò nhang kat é bang nghut é yanmai, myit hai a úng-âng é za, yhangmoq eq rahá bo lô aq." ga tai ri.

²¹ Haù mù, Petruq gi, haù bâng chyáng gyô lô lui, "Nungmoq hô nyi é sù gi, ngò nghut lhê, hai ra lui lé kô é thú?" ga myí ri.

²² Yhangmoq tai é gi, "Dingmán é, Garai Gasang lé gyuq hkunggá é, Yudaq amyù lhunglhâng bâng é hí má myoqdong wó é, shò up gyezau Koneli gi, nang lé yhâng é yhâm má jì hâng yù mù, nang tai é dang gyo yù rá matù, yhang lé chyoiyung maumang lagyo eq tai shit kyô é hkyô lé wó yù lui, ngamoq lé nhang kat é nghut lhê." ga akô. ²³ Haù mù lui, Petruq gi, yhangmoq lé wut hâng yù mù, bíng nhang ri. Hau htang nyi, yhang gi, toq mù, yhangmoq eq rahá bo lô ri; Yopa myuq má é gumang wui ra-am le châng akô nghut ri.

* 10:14 Nhang 11 lé wú aq.

Koneli Lé Petruq Huí É Hkyô

²⁴ Hau htang nyí, yhangmoq gi, Kesare wà mó shut wang ló akô. Koneli gi, yhang é gumang wui eq buinùm ji-myi wui lé ji tsing to mù, yhangmoq lé láng nyi ri. ²⁵ Petruq wang ló jáng, Koneli gi, te yù mù, yhang é hkyi wang má paí gop noqkuq ri. ²⁶ Petruq kúm gi, "Toq aq, ngò le byù ru nghut lhê." ga lui, tai uchyang yhang lé tu toq ri.

²⁷ Hau mù, Petruq gi, yhang eq dang nyô uchyang wang ló wú le, byù myo myo zup zing tô bum é lé myang ri. ²⁸ Hau hkùn, yhang gi, yhangmoq lé, "Yudaq byù rayuq gi, noqkuq htung dông tungbaù rayuq eq a wó zùm yap é, htoq htung wàng wàng a wó kut é hkyô lé, nungmoq sé lugù nghut akô. Nghut kôlháng, ó yuq lé le achayt achyut dut ri, a sanséng dut ri nghù a ge tai é hkyô lé gi, Garai Gasang, ngo lé tûn shit bê. ²⁹ Hau é yanmai, nungmoq ngo lé ji kat é hkùn, ngò a he pyâm é za châng lé lo é nghut lhê. Hau mù lui, hai ra kô é yanmai, ngo lé ji akô nghù ngò myí nau ri." ga tai ri.

³⁰ Hau hkùn, Koneli gi, "Lai lò bê myi nyi nyi, myinhâng sum hkying má, ngá é yhùm má, ngò kyûdùng nyi le, danso loq, duqbó é mebu wut é byù rayuq ngá é hí má yap htoq shit mù, ³¹ 'Koneli é, Garai Gasang gi, náng é kyûdung danghtë lé le gyo byi bê; náng alu byi é hkyô lé le, bun byi bê nghut ri. ³² Hau é yanmai, Yopa myuq shut byù nhang kat mù, Petruq gá é Simun lé ji nhâng aq. Hau yuq gi, wuimau yâm má é shokuq hkyup zó é Simun yhùm má bíng nyi ri.' ga tai ri. ³³ Hau mù lui, hau hkùn jáng ngò náng chyáng byù nhang kat bê nghut lhê. Ahkuí, náng jé é gi, gyaí gè bê nghut ri. Yhumsing yhang nang lé tai nhang é gù banshoq gyô yù rá matú, ahkuí ngamoq lhunglháng bang Garai Gasang é hí má nghut nyi lhê." ga tai ri.

Petruq Hko Kyô É Mungdang

³⁴ Hau hkùn, Petruq dang-hi hpông é gi, "Garai Gasang, myoqdong a hkyin é hkyô lé, ahkuí ngò gè gè yhang sé bê. ³⁵ Byù myú chângiup má, Yhang lé gyuq hkunggá é eq tengmán é muzó jizó sai é sù gi, Yhang é hí má myoqdong wó nyi ri. ³⁶ Nyi mi-nyí, joq mijoq é Yhumsing, Yesuq Hkrisduq é yanmai, nguínón hkyô eq séng é hkyô danglù lé hko kyo sháng gaq ga, Israelaq byu pé chyáng Garai Gasang hun kat é mungdang eq rajung za, ³⁷ baptisma hkyô lé, Yohan hko é htâng, Galile mau mai Yuda mau banshoq má tai pyo ló é hkyô lé, nungmoq sé gù nghut nyi lhê. ³⁸ Hau gi, Garai Gasang eq Chyoiyung Woi-nyí eq wum-o a-tsam byi to bê sù, Nazaret wà byù Yesuq é hkyô nghut nyi ri. Garai Gasang yhang eq rahá nghut nyi é yanmai, yhang gi, ge é muzó lé kut wún é eq, nat eq zing-ri huí é bang banshoq lé lhoq gè byi wún ri.

³⁹ Hau mù, Yudaq byu pé é ming má le, Yerusalem wà mó má le, yhang zui sai bê muzó banshoq é saksé pé gi, ngamoq nghut nyi lhê. Hau yuq lé yhang, yhangmoq sik zing má jén sat pyám bekô nghut ri. ⁴⁰ Garai Gasang kúm gi, sum nyi nghù rá buinyí má, hau yuq lé lhoq dui toq kat é nghut mù lui, byù banshoq é hí má a nghut e za, saksé kut rá matú Garai Gasang hkyin to gù nghut é bang ngamoq é hí má za htoq shit bê nghut ri. ⁴¹ Yhang shi é mai dum dui toq ló é htâng má, ngamoq yhang, Yhang eq rahá razo rashuq wó kut yu é nghut lhê. ⁴² Yhang gi, asak dui é bang eq shí bê bâng é tará agyi kut rá matú, Garai Gasang eq Yhang lé hkyin tô é sù nghut é hkyô lé, byu pé lé hko kyo rá eq, saksé hkâm rá matú, ngamoq lé hkunmó hkyô to bê nghut ri. ⁴³ Yhang lé lumjing é bang yuq hkgámó gi, Yhang é mying é yanmai, yubak hkyut pyám byi é hui kó rá nghut lhê.' ga lui, tai é myiqhtoi banshoq gi, Yhang é hkyô lé saksé hkam byi é bang nghut nyi akô." ga tai ri.

Chyoiyung Woi-nyí Lé, Tungbaù Pé Wó Hap Yu É Hkyô

⁴⁴ Petruq gi, hau hkyô lé ru tai nyi ashí le, dang hau wó gyô é banshoq bâng ahtoq má Chyoiyung Woi-nyí gyó jé lo ri. ⁴⁵ Tungbaù pé é htoq má lháng Chyoiyung Woi-nyí gá é chyunghuq lé hut hkyô kat é yanmai, Petruq eq rahá lé é, ahpyo-kuq hpyit bê é lumjing bang Yudaq byu pé gi, maù bum akô. ⁴⁶ Hkâsu mù gá le, yhangmoq gi, laklai dang nyo é lé le, Garai Gasang lé hkyá-on kô é lé le, wó gyô bùm kô é yanmai nghut ri.

⁴⁷ Hau mù, Petruq gi, "Ngamoq su Chyoiyung Woi-nyí hkâm yù bê bang lé, baptisma a byi nhâng rá gi, wui lé ó yuq wó hkùm to rá lúh?" ga tai ri. ⁴⁸ Hau htâng, yhang gi, yhangmoq lé Yesuq Hkrisduq é mying lang lui wui-myhup hkâm yù rá matú pying tô ri. Hau hkùn, yhangmoq gi, Petruq lé buinyi ra-í nyi, nyi gyó shi aq ga chóm hkùm akô.

11

Petruq, Yhang Kut É Muzó Lé Shit Kyô É Hkyô

¹ Tungbaù pé le, Garai Gasang é mungdang lhom yù bê gá é hkyô lé, lagyo pé eq Yuda mau pé má é gumang wui wó gyô akô. ² Hau mù, Petruq, Yerusalem wà mó má doq ló é hkùn, ahpyo-kuq hpyit hkyô lé myit zuq é lumjing bang gi, ³ "Náng gi, ahpyo-kuq a hpyit é bâng é yhùm má wàng mù, yhangmoq eq razo rashuq kut ri." ga lui, yhang lé mara lhom tai hun bum akô.

⁴ Hau hkùn, Petruq gi, hau dut lò bê hkyô lé awang mai ahpyo hpyot, yhangmoq lé tai sân kyô hi kat é má, ⁵ "Ngò gi, Yopa myuq má kyûdùng nyi le, moq byuq ló mù shing-rán

myang é gi, mauhkúng mai hpajóng mó sù é myi chýn shut zui lui, ngá shut lhoq hkyô kat é zé gyó jé lo é lé, myang ri. ⁶ Haú lé rago za saí wú le, myigùng htoq má hkyí myi hkyí dap é jung dusak, yosô zê, dô yê é jung eq, maulat nghoqzô pé bo tô é lé, ngò myàng lui, myit wú nyi é hkûn, ⁷ Petruq é, toq mù, sat zo aq.' gâ é danghtê lé, ngò wó gyô ri.

⁸ Ngò kúm gi, 'Yhumsing ê, haú gi, a wó dut, achaq achyt é eq a sansêng é zê, ngá é nhut má hkâ-nhám le a wang wú.' nghù tai kat é nghut lhê.

⁹ Haú hkûn, 'Garai Gasang lhoq san lhoq yúng bê zê lé, a sansêng hkâ-nghù.' ga lui, mauhkúng mai dum tai kat ri. ¹⁰ Haú su ga sum dâm tai é htâng má, haú pé banshoq lé mauhkúng shut dum wup yu lô bê nghut ri.

¹¹ Haú hkûn jáng, Kesare wá mó mai, ngá chyáng nhang kat é byù sum yuq gi, ngò nyi é yhùm hkumtot má jé nyi tô akò.

¹² Chyoiyung Woi-nyí gi, ngo lé myit a úng-âng é za, yhangmoq htâng châng é aq ga tai ri; shí gumang hkyuq yuq le ngò eq rahá é mù, Koneli é yhùm má ngamoq wang é.

¹³ Haú hkûn, haú yuq gi, yhang é yhùm má maumang lagyo lé htoq shit é hkûn, yhang hkâsu myang é hkyô lé le; maumang lagyo éq yhang lé, 'Yopa myuq shut byù nhang kat mù, Petruq gâ é sù Simun lé é jî nhâng aq; ¹⁴ nàng eq náng yhumbyù lhunglhang bang hkyi yù hui rá danglù, yhang, náng chyáng wun lé lô byi rá nghut lhê.' ga tai é hkyô lé le, ngamoq lé tai kyô ri.

¹⁵ Ngò dang tai hi lô nyi é u lé, Chyoiyung Woi-nyí gi, sâng-hi lé ngamoq é ahtoq má gyó lé é su, yhangmoq ahtoq má le gyó lé bê nghut ri. ¹⁶ Haú hkûn sheq, ngò gi, 'Yohan gi, wui éq wui-myhup hkám byí ri; nungmoq kúm gi, Chyoiyung Woi-nyí éq wui-myhup hkám byí é hui kó rá nghut lhê.' ga lui, Yhumsing tai é dang lé bún kat ri.

¹⁷ Haú mù lui, Yhumsing Yesuq Hkrisduq lé lumjúng é hkûn, ngamoq lé Garai Gasang jeju chyunguq byí é su, Yhang, yhangmoq lé le byí é nghut le gi, ngò gi, hkasú é byù nghut lui, Garai Gasang lé wó lhom hkùm pyám rá lhu?" ga tai ri.

¹⁸ Yhangmoq gi, haú hkyô lé wó gyô kôjáng, tai jang a joq lo kômù, "Ó! Nghut bê, Garai Gasang gi, tũngbaù pé lé le, asak ùi rá matù myit lhung hkyô byi bu-nhung!" ga lui, Garai Gasang lé chóm hkya-ôn akò nghut ri.

Antioku Wá Mã É Noqkuq Hpúng

¹⁹ Ahkuí, Stehpan lé sat pyám kô é htâng má, zing-ri hui kô é yanmai, byo myín lô é bang gi, Hpinisi mau, Kupru zinlóng eq Antioku wá mó jé shoq byo lô kômù, Yudaq byu pé lé baú za, mungdang haú hko kyô akò nghut ri. ²⁰ Nghut kôlhang, yhangmoq má é Kupru byù eq Kuruni byù ra-am gi, Antioku wá mó má châng jé lô kômù, Yhumsing

Yesuq é gabú danglù lé, Grik pé lé le tai kyô bum akò. ²¹ Haú Yhumsing é loq gi, yhangmoq eq rahá nghut nyi mù lui, byù myo myo gi, lumjúng mù, Yhumsing chyáng lhung wang lo bùm bekò nghut ri.

²² Haú bâng é hkyô lé, Yerusalem noqkuq hpúng é no má hkyang jé lô é nghut mù lui, yhangmoq gi, Barnaba lé Antioku wá mó jé shoq nhang kat akò. ²³ Yhang jé é hkûn, Garai Gasang jeju bo nyi é lé myàng jáng, yhang gi, gabú lui, yhangmoq é myit nhikhum banshoq eq haú Yhumsing má lhumzui nyi rá matù, lhunglhang bang lé myit wum byí ri. ²⁴ Hkâsu mù gâ le, Barnaba gi, byù gè nghut mù, Chyoiyung Woi-nyí le, lumjúng myit le byíng tô é sù nghut nyi ri. Haú mù, byù myo myo gi, haú Yhumsing chyáng jat wang lo bùm bekò nghut ri.

²⁵ Hau htàng, Barnaba gi, Sholuq lé é hô rá ga Tarshu myuq shut é mù, yhang lé myàng jáng, Antioku wá mó má shuí lo ri. ²⁶ Haú mù, yhangnhik gi, razàn gón noqkuq hpúng haú eq rahá zum nyi kô é nghut mù lui, byù myo myo lé wó mhoqshit akò. Chángzô pé gi, Hkristan gâ é myíng lé, Antioku wá mó má sâng-hi wó yù bekò nghut ri.

²⁷ Haú u lé, myihtoí pé ra-am gi, Yerusalem wá mó mai, Antioku wá mó má lé jé bum akò. ²⁸ Haú bang má é Agabu gâ é sù gi, toq yap mù, Romaq mingkan ting má mutmò gyó lô rá nghut é hkyô lé, Woi-nyí éq tũn shit é đông tai kyô ri; (Haú gi, hkohkâm Klodi é pyat má dut bê nghut lhê.) ²⁹ Haú mù lui, chángzô pé gi, Yuda mau mã é gumang wui lé, ó le ó wó dut é myhò garum kat rá ga, myit hpyit yu bum akò. ³⁰ Haú eq rajung za kut kômù, yhangmoq gi, chyunguq haú pé lé Barnaba eq Sholuq nhik é loq mai suwún wui pé chyáng hun kat bekò nghut ri.

12

Petruq, Htóng Mai Wó Lut Htoq Lo É Hkyô

¹ Haú u lé, Herut hkohkâm gi, hpúng byù ra-am lé chyup yù mù, zing-ri rá ga ngantsá nyi ri. ² Haú mù, Yohan é yhangmang Yakuq lé sham eq sat pyám nhang ri. ³ Haú hkyô lé Yudaq byu pé wú gabú é lé myàng jáng, yhang gi, Petruq lé le, jáng chyup yu ri. Haú dut é gi, mún a kat é muk zo poi u lé nghut ri. ⁴ Herut gi, Lhoqlhai Poí lai jáng sheq, mingbyù wui hí má jéyáng rá ga myit tô é yanmai, yhang lé chyup yu é htâng má, htóng má lhung to mù, yhang lé zúng rá matù, gýè myi yuq yuq kut myi hpúng lé ap tô ri.

⁵ Haú mù, Petruq gi, htóng má lúng tô ri; hpúng byù wui kúm gi, yhang é matù Garai Gasang chyáng kyú gýai chóm dung byí nyi akò nghut ri.

⁶ Petruq gi, Herut eq yang lé jéyang rá matú she htoq yú rá hí myín lé, shamtoq-tui í hkat eq tui é hui lui, gyezo í yuq é gyoro má yhup myhí tò ri; zúng é bang le htóng hkum má zúng nyi bum akò. ⁷ Haú hkún, Yhumsing é maumang lagyo rayuq lé htoq shit mù, gok haú má duqbó lo ri. Maumang lagyo haú gi, Petruq é namcham má é hpuk kat mù, "Myap toq wú aq." ga nhaú ri; haú hkún, Petruq é loq má é tojàng tui pé le gyut gyó ló bê nghut ri.

⁸ Maumang dum tai é gi, "Hpyihit hit mù, hkyí-tsung tsung aq." gá ri; Petruq le tai é eq rajung za kut ri. "Náng é bumó wut mù ngá htàng cháng aq." ga yang lé maumang lagyo dum tai ri. ⁹ Haú hkún, yang gi, htóng mai yhang htàng châng htoq ló ri; nghut kôhang, maumang lagyo kut é muzó haú gi, gè gè nghut é lé, yang a sé mù, shing-rán myang é nghut ri ga myit yu ri. ¹⁰ Ahkuí, yangnhik gi, zúng tò é jowò í wó lai mù, wá má htoq é shamtoq hkum má jé jáng, hkum haú le yang baú bóng lô mù, yangnhik htoq lui, wá hkyô rahkat má sô ló le, maumang lagyo gi, haú hkún jáng, yhang chyáng mai gáng ló byuq bê nghut ri.

¹¹ Ahkuí, Petruq gi, dum bún gyíng lò jáng, "Yhumsing gi, Yháng é maumang lagyo lé nhang kat mù, Herut é loq eq Yudaq byu pé myit myoqbyù tò é hkyô banshoq mai, ngo lé hkyi yù bê nghut é lé, ahkuí ngo gè gè sé bê." ga tai ri.

¹² Haú hkyô lé myit sé kat jáng, yang gi, byù myo myo zing mù, kyúdung nyi é jowò, Markuq gá é Yohan é yhangnu Mariq é yhúm má jé ló ri. ¹³ Haú mù, yang gi, yhúm wàng hkum lé ló bat é hkún, Roda gá é dui-nhàng zoshàng myiwe zo rayuq gi, gyô wú rá ga htoq ló lo ri. ¹⁴ Yang gi, Petruq é hté nghut é lé sé gyó kat jáng, lúm gabú lui hkum a hpóng byi shí é za, yhúmhaú shut din wang ló mù, "Petruq gi, hkum mhó lut má lo yap tò ri." ga ló tai kyô ri.

¹⁵ Yangmoq kúm gi, "Nàng na bê nghut ri." ga yang lé tai akò. Yang gi, gè gè nghut ri ga ru tai nyi ri. Dum, yangmoq gi, "Yháng é maumang lagyo nghut àng ri." ga tai akò.

¹⁶ Nghut kôhang, Petruq gi, hkum ru bat nyi mù, yangmoq hpóng kat é hkún, yang lé myàng kôjáng, chôm maú byuq bum akò. ¹⁷ Yang gi, yangmoq lé zim za nyi keq ga loq lik shit mù, yang lé Yhumsing eq htóng mai hkásu kut shuí htoq yu é hkyô lé tai kyo lui, "Shí hkyô lé Yakuq eq gumang wui lé tai kyô kat keq." ga tai ri. Hau htàng, yang htoq ló lui, jowò gó shut e ló bê nghut ri.

¹⁸ Ahkuí, maubó jáng, gyezò pé gi, Petruq hai dut byuq é hkyô lé a sé kò é yanmai, gyai maú gabyông bum akò. ¹⁹ Herut kúm gi, Petruq lé ho wú le a myàng jáng, zúng é bang

lé myí gôn wú mù, yangmoq lé sat pyám rá matú hkunmó hkyô ri.

Herut Hkohlâm Shi Byuq É Hkyô

Hau htàng, yang gi, Yuda mau mai Kesare wá mó má gyó ló mù ló nyi nyi ri. ²⁰ Haú gyoro má, Herut hkohlâm gi, Turuq eq Sidun byu pé lé gyai nhik-yô nyi ri. Haú mù lui, yangmoq gi, myit rahkat zâ eq yhàng chyáng é mù, Blastu gá é, hkohlâm wa lum tò é suwún hpó lé é lúm hkaú mù, simsaq hkyô é dùng akò. Hkásu mù gá le, yangmoq é zoshuq wó rá matú gi, Herut é ming lé lúm hkaú nyi kô é yanmai nghut ri.

²¹ Haú hkún, ding lhúm tò é buinyi má, Herut gi, hkohlâm hking wut chúng mù, hkohlâm tanghuq má zùng lui, yangmoq lé hkohlâm mungdang byi ri. ²² Haú jáng, mingbyù wui gi, "Hté shí gi, waxàng byu é hté a nghut, garai wá é hté sheq nghut ri." ga garú bum akò. ²³ Radá dâm, Herut gi, Garai Gasâng é hpungwup shingdang lé a tề byi é yanmai, Yhumsing é maumang lagyo gi, yang lé dâm byi lui, yang gi, luq eq hké é hui mù, shi byuq bê nghut ri.

²⁴ Haú Garai Gasâng é mungdang gi, sé é bang myô jat lò mù, je riyhang byo myín lò bê nghut ri.

²⁵ Barnaba eq Sholuq nhik gi, Yerusalem wá mó má yangnhik sai tùm nyi é muzó ban sai jáng, Markuq gá é Yohan lé shuí chúng mù, Antioku wá mó shut tau ló beko nghut ri.

13

Barnaba Eq Sholuq, Hkyin Nhang Kat Hui É Hkyô

¹ Ahkuí, Antioku wá mó má é noqkuq hpúng má, myightoi pé eq sará pé le lom nyi akò. Haú bang gi, Barnaba, Niger* gá é Simeon, Kuruni byù Luki, (Herut zau hpó eq zum kô lò sù) Manaen eq Sholuq pé nghut akò. ² Yangmoq gi, zoshuq gám lui Yhumsing lé noqkuq dojaú nyi é hkún, Choyiyúng Woi-nyí gi, "Ngá é mù wùn waq rá matú ji tò é Barnaba eq Sholuq nhik lé, hkyin to keq." ga tai ri. ³ Haú mù lui, yangmoq gi, zoshuq gám lui kyúdung mù, yangnhik ahtog má loq ke byi kô é htàng, yangnhik lé nhang htoq kat akò nghut ri.

Kupru Zinlóng Má Dut É Hkyô

⁴ Haú mù, yangnhik gi, Choyiyúng Woi-nyí eq nhang kat é eq rajung za, Seluki wá shut gyó ló mù, haú má é lhai ji lui, Kupru zinlóng má jé ló lui, ⁵ Salami wá mó má nyi nyi é hkún, Yudaq byu pé é tarajong pé má, Garai Gasâng é mungdang hko kyô akò. Markuq gá é Yohan le yangnhik lé htuqluq htuqbang kut nyi ri.

* 13:1 Grik dong Niger gá é gi, byù noq gá é nghut lhé.

⁶ Yhangmoq gi, haù zínlóng mai lai byit e ló mù Pahpu wà mó jé ló kô é hkùn, myiqhtoi pyoq nghut sù Bara-Yesuq gâ é Yudaq byù myoqheq sará rayuq eq htúng hui akò. ⁷ Haù yuq gi, Sergi Poluq gâ é, myit hpaqchyí kúng é ginwáng zau hpó é byù rayuq nghut lhê. Minggyi hpó haù gi, Garai Gasang é mung-dang gyô yù nàu mù, Barnaba eq Sholuq nhik lé ji yu ri. ⁸ Haù hkùn, myoqheq sará gâ é lichyùm dng myhng é Eluma le gâ é Bara-Yesuq kúm gi, ginwáng zau hpó lé haù lumjng hkyô má a jau ló nhâng nau é nghut mù lui, yhangnhik lé lhom he tang pyám ri. ⁹ Haù hkùn, Poluq le gâ é Sholuq gi, Chyoiyung Woi-nyí bying mù, yhang lé wú tsuq to lui, ¹⁰ "Myit goí é hkyô eq hpuq lô lhik é hkyô banshoq bying tô é, nat é yhangzo nghut sù, tengmán hkyô hkangmó é gyê hpó é, Yhumsing é tengmán hkyô lé a lhoq hpyoq é a wó nyí lúh? ¹¹ Ahkuí, wú aq, Yhumsing é loq gi, náng chyáng jé mù, nàng gi, rayoq zo builoq a wó myang é za, myoqjit byuq rá nghut lhê." ga tai ri.

Haù hkùn jáng, yhang é myoq gi, myhi-myhà ga lui mauchut tuq dut lò byuq ri; haù mù, yhang lé shê rá byù ho sop lhng wún ri. ¹² Haù hkyô lé ginwáng zau hpó myang jáng, Yhumsing eq sêng é mhoqshit é hkyô lé wú maú lui lumjng bê nghut ri.

Antioku Wà Mó Má Dut É Hkyô

¹³ Haù htâng, Poluq eq yhang luzùm wui gi, Pahpu wà mó mai lhai ji mù, Pamhpuli mau mà é Perga wà má jé ló akò. Markuq gâ é Yohan kúm gi, yhangmoq eq gang lui, Yerusalem wà mó shut tau lui byuq bê nghut ri. ¹⁴ Dum, yhangmoq gi, Perga mai toq e ló le, Pesidi ginwáng mà é Antioku wà mó má jé ló akò. Bánno buinyi má, yhangmoq gi, tarajong má wang zung tô akò. ¹⁵ Haù hkùn, Mosheq é tará laiká eq myiqhtoi laiká pé lé ban nghap jáng, tarajong má up bang gi, "Gumang wui ê, mingbyù wui lé myit wum byi dang joq kô é nghut le gi, ahkuí tai lo keq." ga lui, yhangmoq chyáng tai nhang kat ri.

¹⁶ Haù hkùn, Poluq gi, toq yap mù, zím byuq kô sháng gaq ga loq tú lui, "Israelaq byu pé eq Garai Gasang lé gyuq hkunggâ é byu pé é, chóm gyô yù keq. ¹⁷ Israelaq byu pé é Garai Gasang gi, ngamoq é ichyí ikê pé lé hkyin yù bê nghut mù lui, Egutuz ming má byubing dut nyi to ashí hkùn, yhangmoq lé kô myhâng nhâng mù, hpungwup a-tsam bo é loq eq haù mau mai shuí htoq ló ri. ¹⁸ Dum, myi xê zàn kô, yoso pé má yhangmoq é a-kyang lé jân pyám byi mù, ¹⁹ Hkanan ming má é byuhú nyhit hú lé lhoq htên pyám lui, haù bâng é mingdán mà é silí wunlí yhangmoq lé gám byi ri. Haù gi, myi shô ngo xê zàn kô myang ri.

²⁰ Haù htâng má, Garai Gasang gi, myiqhtoi Samuelaq é pyat jé shoq tará agyí pé lé to byí ri. ²¹ Haù htâng má, yhangmoq mai hkohkâm dung kômù, Garai Gasang gi, yhangmoq lé, Ben-yamain amyù mà é, Kisha é yhangzo Sholuq lé byi lui, yhang gi, myi xê zàn up bê nghut ri. ²² Haù htâng, Sholuq lé lhoq hkyô pyám mù, Dawiq lé, yhangmoq é hkohkâm kut nhang ri. Dawiq é hkyô lé Yhang saksé hkâm é gi, 'Ngò nhik dik é Yese é yhangzo Dawiq lé myang bê; yhang gi, ngò kut nhang é hkyô banshoq lé kut rá nghut lhê.' gâ ri.

²³ Garai Gasang gi, Yhang é danggidiq joq é eq rajung za, Israelaq byu pé é matú, haù yuq é awut ashin mai, hkyi yù Sù Yesuq lé, pò htoq nhâng bê nghut ri. ²⁴ Yesuq a jé lé shimá, Yohan gi, Israelaq byu pé banshoq lé myit lhng hkyô eq sêng é baptisma hkyô lé hko kyo bê nghut ri. ²⁵ Dum Yohan gi, yhang zuí é muzó ban ló é u lé, 'Ngo lé ó nghut é su ngâm tò akò lúh? Ngò gi, haù yuq a nghut, wú keq, ngá é htâng má rayuq jé rá nghut lhê, haù yuq é hkyi-tsung tui hpyí rá lhang ngò a gíng.' ga tai ri.

²⁶ Abraham é yhangzo yhangshù pé eq Garai Gasang lé gyuq hkunggâ é tungbaù, gumang wui é, shí hkyi yù hkyô mungdang lé, nga-nhúng chyáng byi kat bê nghut ri. ²⁷ Yerusalem wà mó mà é bang eq, yhangmoq é zau suwún wui gi, Yhang hkyi yù sù nghut é lé le, Bánno buinyi hkangmó nghap é myiqhtoi pé é dang lé le, a sé gyô kô é yanmai, Yesuq lé sat rá doqdán é hkùn, myiqhtoi pé é dang lé lhoq dik pyám bekò nghut ri. ²⁸ Yhang chyáng shí gíng é mara a myang kóhlang, Yhang lé sat pyám nhâng rá matú, Pilat chyáng dng akò. ²⁹ Yhangmoq gi, yhang eq séng lui, ká to má ká to ban lhoq dik kó jáng, Yhang lé tapzng mai yù hkyô mù, lup má kat tò akò nghut ri. ³⁰ Garai Gasang kúm gi, Yhang lé shi é mai lhoq dui toq yù bê nghut lhê. ³¹ Yhang gi, Galile mau mai Yerusalem wà mó jé shoq, hí lé Yhang htâng châng é bâng chyáng buinyi tsómra myáng shoq htoq shit shit kut ri. Haù bang gi, ahkuí, nga-nhúng Israelaq byu pé é hí má, Yhang é saksé dut bekò nghut ri.

³² Haù mù, í dam lhê é Hkya-on Kungtôn Laiká má,

'Nàng gi, Ngá Zo nghut ri. Hkù-nyí, Ngò gi, Náng Wa dut bê nghut lhê.'³²

ga lui, ká tô é eq rajung za, ³³ Garai Gasang gi, ichyí iwá pé lé byi tô é danggidiq lé, Yesuq lé lhoq dui toq byi é dng, yhangmoq é yhangzo yhangshu ngamoq é matú, lhoq dik byi é gabú danglú lé, nungmoq chyáng ngamoq wun lé byi bê. ³⁴ Haù htoq agó, Yhang htên byoq é hkâ-nhám a hui shoq, shi

é mai lhoq dui toq yû râ hkyô eq séng lui, Garai Gasang tai é gi,

'Dawiq lé byi tô é danggidiq eq rajung za, chyoiyúng é eq lumging é jeju lé, ngò nungmoq lé byi râ nghut lhê.^{1*}

gâ ri. ³⁵ Hkya-on Kungtôn Laiká gó wô má le,

'Náng é Chyoiyúng Sû lé, Nang htên byoq nhâng nau râ a nghut.'^{2*}

ga tai tô ri.

³⁶ Ahkuí, Dawiq gi, yhâng é pyat banshoq má Garai Gasang ô nau é đông ban wùn waq jáng, shi byuq lui, ichyi íwâ pé eq rahá myhup pyám hui mù, htên byoq byuq é hui bê nghut ri. ³⁷ Garai Gasang lhoq dui toq yu é sù kúm gi, htên byoq hui é a nghut.

³⁸ Háu nghut é yanmai, gumang wui é, háu yuq mai yubak wó hkyut pyám byí é hkyô lé, nungmoq lé hko kyô nyi é nghut é le, sê nyi keq. ³⁹ Hau htoq agó, Mosheq é tará èq mara hkyut san byí é a hui kôlháng, háu yuq lé lumjing é bang gi, hkyô lhumjup má mara hkyut san byí é hui râ nghut lhê. ⁴⁰ Hau é yanmai,

'Wú keq, jihpoi é bang ê, maú mù lui htum byuq keq;

nungmoq é buinyi pé má ngò rajung jung kut htoq râ nghut lhê;

⁴¹ háu hkyô lé, rayuq yuq, nungmoq lé hkaí kyo kôlháng, jing kó rà a nghut.'^{3*}

ga lui, myiqhtoi pé tai é dang, nungmoq má a ang sháng gaq, sidiq nyi keq." ga hko kyô nyi ri.

⁴² Ahkuí, Poluq eq Barnaba nhik tarajong mai htoq ló le, htâng lhê é Bánno buinyi má le, háu pé lé dum hkaí kyo râ matú yhangmoq chôm dúng akó. ⁴³ Chôm byo htoq ló kô é hkún, Yudaq byu pé eq Yudaq noqkuq htung má lhing wang lo é tará hkunggá é byù myo myo gi, yhangnhik é htâng má châng bùm kô é nghut mù lui, Garai Gasâng jeju má ging nyi râ matú, yhangnhik gi, yhangmoq lé lhoq pun lhoq kyíng akó nghut ri.

Tungbau Pé Chyang Lhìng Lo É Hkyô

⁴⁴ Hau htang lhê é Bánno buinyi má, Garai Gasâng é mungdang gyô yù râ matú, rawa bang aluq shoí banshoq, lé zup zing to bum akó. ⁴⁵ Yudaq byu pé kúm gi, byù moq mó háu lé myàng jáng, manon myit baú byíng bùm kômù lui, Poluq tai é dang lé tai htíng é eq nhíng pyám akó.

⁴⁶ Poluq eq Barnaba le gyyuq myit a bo é đông tai é gi, "Garai Gasâng é mungdang lé, nungmoq lé hí tai kyo râ dut é yanmai, ngá-nhik tai bê nghut lhê. Nghut kôlháng, nungmoq gi, háu lé lhom he-ngik pyám kômù, ahtum abyuq é asak eq gingdán é đông yhumsing gùng lé a myit yù kô é yanmai,

wú keq, ahkuí, ngá-nhik gi, tungbau pé shut lhing ló berá nghut lhê. ⁴⁷ Hkásu mù gâ le, háu Yhumsing gi,

'Hkyi yù hkyô lé maumyi htum shoq wó chùng jé râ matú, Ngò, nang lé tungbau pé é maubó dut nhâng bê.'^{4*}

ga lui, ngamoq lé hkunmó hkyô kat bê." gâ ri.

⁴⁸ Tungbau pé gi, dang háu lé wó gyo kôjáng, gabú é eq Yhumsing é mungdang lé hkya-on kungtôn nyi bum akó. Ahtum abyuq é asak lé wó râ matú hkyin to hui é lhunglháng bang le, lumjing bum akó nghut ri.

⁴⁹ Yhumsing é mungdang gi, háu ming gón jam lò bê nghut ri. ⁵⁰ Yudaq byu pé kúm gi, Poluq eq Barnaba nhik lé zing-ri râ matú, aróng wó é myiwe wui má é tará hkungga bang eq, háu wá mà é suwún wui lé, nhik lhoq yo kôluí, yhangnhik lé maukyo mai chôm hkat htoq pyám akó. ⁵¹ Yhangnhik gi, yhangmoq lé a nau é hkyô tún shit é đông, yhumsing é hkyi má é hpuilhau lé yhangmoq chyáng ko hkyô pyám to kômù, Ikoni wá mó shut ló byuq bekó nghut ri. ⁵² Chángzô pé kúm gi, gabú é htoq agó, Chyoiyúng Woi-nyi byíng nyi bum akó nghut ri.

14

Poluq Eq Barnaba Nhik, Ikoni Wà Mó Má Ló Jé É Hkún Lhê Hkyô

¹ Ahkuí, Ikoni wá mó má nghut nyi é hkún, Poluq eq Barnaba nhik gi, Yudaq byu pé é tarajong má rahá wàng mù, Yudaq byù eq tungbau pé ajùm ayò lumjing bùm kó shoq, wum kat hko kyô akó. ² Nghut kôlháng, a lumjing é Yudaq byu pé gi, lumjing é gumang wui lé a ngui rá đông tungbau pé lé mhoq hpyoq yù mù, shuí gumlaù akó. ³ Háu mù lui, yhangnhik gi, tsómra myang shoq háu má nyi mù, háu Yhumsing é matú gyyuq myit a bo é za hko kyô akó; Yhang Yhumsing le yhangnhik é loq mai limik kumlhá eq mauhpo muzó dut nhang é đông, Yhâng é jeju mungdang lé saksé hkám byí nyi ri. ⁴ Háu wá mà é bang kúm gi, myit byo ló bùm kô é nghut mù lui, Yudaq byu pé chyáng ra-am, lagyo pé chyáng ra-am, lom byuq ló akó. ⁵ Ahkuí, tungbau pé le, Yudaq byù eq yhangmoq é uphkáng bang le, yhangnhik lé rhoi mù luggok èq dù sat râ ga htím lo bum akó. ⁶ Nghut kôlháng, yhangnhik gi, háu hkyô lé bùn sê kat kôjáng, Lukaoni ginwáng má é Lustra eq Derbe wá mó eq, hau é awui ayám wá tiq wá zo pé shut hpang e ló akó. ⁷ Háu pé má le, gabú danglù xoq hko kyô wún akó nghut ri.

Lustra Wà Mó Má Ló Jé É Hkún Lhê Hkyô

⁸ Ahkuí, Lustra wà mó má, ínu unghkaú mài hkyí hten mù luí, hkâ-nhám le hkyô a wó sô wú é sù rayuq zung tô ri. ⁹ Yhang le Poluq taí é dang lé gyô nyi ri. Poluq gi, háu yuq lé wú tsuq kat é hkûn, wó lhoq gê byi hui rá nghut lhê gâ é lumjǐng myít yhang chyáng bo tô é lé, myàng byí ri. ¹⁰ Háu mù, Poluq gi, "Toq yap aq!" ga luí, htê mó èq yhang lé taí kat jǎng, yhang gi, byam toq kat mù, wó sô bê nghut ri.

¹¹ Háu mù, Poluq kut é muzó lé shiwa byu pé myàng kôjǎng, yhangmoq gi, Lukaoni dang dǒng, "Nat hparà pé gi, byú gǔng dǒng kut luí ngamoq chyáng gyó lô bekó nghut ri." ga luí, wut guru bum akó. ¹² Háu htàng, Poluq gi, dang myó taí sù nghut é yanmai, yhang lé Herme ga, Barnaba lé gi, Zeu ga myhǐng byí akó. ¹³ Háu wà yàm mã é Zeu hparà noqkuq yhûm hkyangjong hpó gi, wà hkum mã nohtó pé eq ban hkǒng pé yu lé mù, shiwa byu pé eq rahá yhangnhik lé hkungga nhǒng byi rá hen akó.

¹⁴ Nghut kǒlhang, lagyo nhik Barnaba eq Poluq gi, háu lé wó gyo kôjǎng, yhumǐng é mebu lǎng cheq pyám kǒluí, shiwa hpǒng gung gǔng shut ðin wang é kǒmù, garú taí kô é gi, ¹⁵ "Hkaú pé è, hái mù háu su kut lo akó lhú? Nga-nhik le nungmoq eq rajung za, xǎngzo byú za nghut lhê, akyú a bo é hkyô shí pé lé tô pyám to mù, mauhkǔng eq myǐgǔng, wuǐshuq lung-aú eq háu pé mã nyí mi-nyí, joq mǐjoq lé hpan to sù, rú ðui nyí é Garai Gasǎng chyáng lhing wang lò kó shǎng gaq ngǔh luí sheq, nungmoq lé gabú danglù hko kyô é nghut lhê. ¹⁶ Garai Gasang gi, byú myú chǎngjup lé hí hpyang lhê é pyat bán mã ó le ó kǎm é ðǒng kut nhǎng bê nghut ri. ¹⁷ Nghut kǒlhang, Yhang gi, mauhkǔng mai mau wô nhǎng luí, kyôshi zúí nhang é ahkyǐng yam-yoq byi mù, nungmoq lé zoshuq agǔn agó byí é eq, nungmoq lé i-myít ngón nhang nyí é ðǒng, Yhang gé é hkyô lé tǔn shit mù, Yhang nyí é hkyô lé saksé hkâm nyi ri." ga akó. ¹⁸ Háu su ga taí kô le lhǎng, yhangnhik lé shiwa byu pé mài hkungga nhǒng byi rá hkyô lé, yhangnhik gi, gyai wuihke luí sheq wó hkúm pyám akó nghut ri.

¹⁹ Háu htàng, Antioku wà mó eq Ikoni wà mó pé mã é Yudaq byu pé ra-am lé jé kǒmù, shiwa byu pé lé shuí-u luí, Poluq lé luqgok èq chǒm ðú kǒmù, yhang lé shi byuq bê su ngám kô é yanmai, wà shǐnggan shut shê hkyut htoq pyám akó. ²⁰ Nghut kǒlhang, Poluq gi, yhǎng é lhǐnghkyuq mã chǎngzô pé yap tô kô é hkûn, toq mù wà shut tau wang lô ri. Háu htang nyí, yhang gi, Barnaba eq rahá Derbe wà mó shut e lô bekó nghut ri.

Antioku Wà Mó Má Tau Jé Lô É Hkyô

²¹ Háu wà mã yhangnhik èq gabú danglù hkó kyo kô é yanmai, byú myo myo gi,

chǎngzô pé dut lo akó. Háu htàng, yhangnhik gi, Lustra, Ikoni, Antioku wà mó hkyô dum taú lô kǒmù, ²² chǎngzô pé lé myít lhoq ging byi uchyang, háu lumjǐng hkyô mã ru gǐng nyi rá matú myít wum byí akó, "Nga-nhǐng gi, Garai Gasǎng é mingdǎn mã wàng rá matú, wuihke jamjau myo myo hui ra rá nghut lhê." ga le, mhoqshit akó. ²³ Yhangnhik gi, noqkuq hpúng hkangmó mã, hpúng suwún kut rá bang lé hkyin yù mù, zoshuq gám luí kyúðung mù, yhangmoq lumjǐng nyi é Yhumǐng Garai chyáng ap byi tô akó. ²⁴ Háu htàng, yhangnhik gi, Pesidi ginwáng mai laí byit lô mù, Pamhpuli ginwáng mã jé lô akó nghut ri. ²⁵ Háu ginwáng mã é Perga wà mó mã mungdang hko kyo luí, Atali wà mó shut laí gyó lô akó nghut ri.

²⁶ Háu mai, lhai ji mù, ahkuí yhangnhik wún waq laí lô bê muzó é matú, Garai Gasǎng jeju mã ap luí yhangnhik lé nhang kat é Antioku wà mó mã dum jé lô bekó nghut ri. ²⁷ Jé lo é hkûn, yhangnhik gi, hpúng byú wui lé wut tsǐng yù mù, yhangnhik ðǒng mai Garai Gasang kut é hkyô bǎnshoq lé le, tǔngbaú pé lé háu lumjǐng hkyô hkum hpǒng byí é hkyô lé le, shit kyô akó. ²⁸ Háu mù, yhangnhik gi, háu wà mã chǎngzô pé eq tsómra myang shoq nyi nyi akó nghut ri.

15

Ahpyo-kuq Hpyit Hkyô Eq Sêng É Manghkǎng

¹ Ahkuí, Yuda mau mã é byú ra-am gi, Antioku wà mó mã lé jé mù, gumang wui lé, "Nungmoq gi, Mosheq é htǔngtará eq rajung za, ahpyo-kuq a hpyit é nghut jǎng, hkyi yu é hui rá a nghut." ga luí, mhoqshit bum akó.

² Háu é yanmai, myít a hui lhûm é hkyô htoq lô mù, Poluq eq Barnaba nhik gi, háu bang eq gyai yhang myǐng myít lhûm akó; háu mù luí, gumang wui gi, Yerusalem wà mó mã nyí é lagyo pé eq suwún wui chyáng, háu hkyô lé lô hpyé lhum rá matú, Poluq, Barnaba nhik eq rahá, yhangmoq chyáng mã é ra-am lé, nhang kat rá ga hkyin tô akó.

³ Háu mù, hpúng byú wui yhangmoq lé dé kat kôjǎng, yhangmoq gi, Hpinisi mau eq Samariq mau gyoro mai só laí lô uchyang, tǔngbaú pé lhing wang lò bê hkyô lé taí kyô akó. Háu mã é gumang wui lé gyai yhang gabú nhang akó nghut ri. ⁴ Yhangmoq, Yerusalem wà mó mã jé kô é hkûn, hpúng byú wui, lagyo pé eq suwún wui gi, yhangmoq lé lhom hkúlum yù kô é nghut mù luí, yhangmoq gi, yhangmoq ðǒng mai Garai Gasang kut é hkyô lhunghǎng lé, háu bang lé shit kyô akó.

⁵ Háu hkûn, Hparishe hpúng mã é lumjǐng bang ra-am gi, toq mù luí, "Tǔngbaú pé lé, ahpyo-kuq hpyit nhǎng rá eq, Mosheq é tará

đông cháng nhâng rã gi, ra yhang rã lhê." ga tai bum akô nghut ri.

Yerusalem Wà Mó Má Kut É Byìn Tú Wap Hpong

⁶ Ahkuí, lagyo pé eq hpúng suwún wui gi, shí hkyô lé chôm myit wú rã ga, zup tô bum akô. ⁷ Shí hkyô lé gyai yhang dang rhâng lhùm bùm kô é htâng má, Petruq gi, toq mù luí, "Gumang wui ê, Garai Gasang gi, ngá nhut mai tai é, hau gabú danglù lé, tungbaù pé gyô yù mù lumjìng kó shàng gaq ga, hí hkùn nungmoq chyáng mai ngo lé hkyin yù bê hkyô lé, nungmoq sé lugù nghut bê. ⁸ Hau mù, myit nhikhlum lé sé byi sù Garai Gasang gi, nga-nhúng lé byi é eq rajung za, yhangmoq lé, h Chyoiyúng Woi-nyí byi é đông, yhangmoq lé hap yù bê hkyô lé saksé tũn shit bê nghut ri. ⁹ Garai Gasang gi, yhangmoq lumjìng luí, yhangmoq é myit nhikhlum lé lhoq san lhoq yúng byi bê nghut é yanmai, nga-nhúng eq yhangmoq é gyoro má gamhkuí é hkyô a joq nhâng lo nghut ri. ¹⁰ Hau nghut le gi, íchyí iwá pé eq le, nga-nhúng eq le a ung é wòlai lé, hau chángzô pé é lingzing má ke byi é đông mai, hái mù, ahkuí Garai Gasang lé chyam wú nyi akô lú? ¹¹ Nghut kôlhàng, ngamoq gi, yhangmoq eq rajung za, Yhumsing Yesuq é jeju mai za hkyi yu é huí é hkyô lé lumjìng é bang nghut lhê." ga luí, yhangmoq lé tai ri.

¹² Hau hkùn, zup mĩng tô é bang lunglhang gi, zim za kut luí, Barnaba eq Poluq nhik mai, tungbaù pé chyáng, Garai Gasang eq yhangnhik é loq đông limik kumlhá pé eq mauhpo muzô pé kut shit é hkyô, tai kyô nyi é lé chôm gyô nyi akô. ¹³ Yhangnhik dang ban tai kôjáng, Yakuq gi, "Gumang wui ê, ngá dang lé gyô wú keq. ¹⁴ Garai Gasang gi, tungbaù pé chyáng mai Yhàng mying é matú byi ra-myù hkyin yù rã ga, yhangmoq lé sâng-hi mai hkásu kut lé kũm nyi é hkyô lé, Simun tai kyo bê nghut ri. ¹⁵⁻¹⁶ Shí hkyô gi,

"Hau é htàng má gi, ngò dum taù lò mù luí, lêng gyop byuq bê Dawiq é yhũm* lé dum sai rã nghut lhê.

Hau byoq htên tô é pé lé sai sai mù, hau lé dum lhoq toq rã nghut lhê.

¹⁷ Hau hkùn sheq, ngá mying mai ji yu é tungbaù pé eq, myit gyo tô é byù lunglhang bang gi, Yhumsing Garai lé hô kó rã nghut lhê ga,

¹⁸ a-nham mau htoq xàng hkun mai, shí hkyô pé lé sé nhang é Yhumsing Garai tai ri.¹⁸

ga myiqhtoi pé kã tô é dang eq rajung za nghut ri.

¹⁹ Hau mù luí, ngò tai nau é gi, tungbaù pé chyáng mai Garai Gasang shut lhing lo é

bang lé, gotù hai le a lhoq wui é za, ²⁰ hpara lhô pé lé kyáng byi é a sansêng é zoshuq pé lé le, ashop é đông gungsho zùm yap é hkyô lé le, lingzing mai myhik sat é dusak sho lé le, sui lé zô é hkyô lé le, koi pyám rã matú za, yhangmoq lé, nga-nhúng laiká mai wó shit kat lhê. ²¹ Hkásu mù gá le, gó hkùn mai yhang, Mosheq é tará lé wà hkangmó má hko kyô ló kômù, Bánno buinyi hkangmó tarajong pé má nghap kyo kyo kut bùm kô é nghut lhê." ga tai ri.

Lumjìng É Tungbaù Pé Chyáng Hun Kat É Laiká

²² Hau hkùn, lagyo pé, suwún wui eq, hpúng byù wui lunglhang bang gi, Poluq, Barnaba nhik eq rahá Antioku wà mó shut nhang kat rã byù lé, yhangmoq chyáng mai hkyin yù rã matú chôm myit hpyit akô. Hau eq rajung za, yhangmoq gi, gumang wui chyáng má é nhik bô suwún nhik Barsabaq gá é Yudaq eq Sila lé hkyin yu akô nghut ri.

²³ Yhangnhik é loq má, hun kat kô é laiká gi, "Antioku wà mó, Suriq mau eq Kiliiki mau pé má nyi é, tungbaù gumang wui é, nungmoq é gumang wui nghut é, ngamoq lagyo pé eq suwún wui gi, nguingón dang shit kyô kat lhê.

²⁴ Ngamoq nhang kat é le a nghut bang ra-am gi, ngamoq chyáng mai htoq lò mù, nungmoq lé dang eq lhoq byok pyám luí, nungmoq é myit lé lhoq nhúng byi nyi é hkyô lé, ngamoq wó gyo bê. ²⁵ Hau mù, ngamoq lunglhang bang gi, byù ra-am lé hkyin yù mù, ²⁶ nga-nhúng é Yhumsing Yesuq Hkrisduq é matú, yhumsing asak lé lhang a hã é nga-nhúng chyyitdap é Barnaba, Poluq nhik eq rahá, nungmoq chyáng nhang kat rã matú chôm myit hui bê. ²⁷ Hau mù luí, ngamoq gi, Yudaq eq Sila lé nhang kat lhê; yhangnhik gi, laiká má bo é eq rajung za, yhangnhik é nhut mai yhang tai kyo kó rã nghut lhê.

²⁸ Nungmoq é matú gi, hpara lhô pé lé tũng byi é zoshuq eq sui, lingzing mai myhik sat é dusak sho eq ashop é đông gungsho zùm yap é hkyô pé lé, koi pyám rã hkyô mai lai luí, gotù wòwùn hũn rã hkyô a joq nghũ luí, Chyoiyúng Woi-nyí le, ngamoq le, myit hui tô bê. ²⁹ Nungmoq hau pé lé koi pyám nyi kôjáng gi, gè rã nghut lhê.

Nguingón wángzán nyi kó shàng gaq ô!" ga kã tô ri.

³⁰ Yhangmoq lé nhang kat kôjáng, yhangmoq gi, Antioku wà mó má gyô jé lô kômù, hpúng byù wui lé ji tsing to kôluí, hau hũn kat é laiká lé ap byi akô nghut ri. ³¹ Hpúng byù wui gi, laiká hau lé ban nghap kôjáng, wum-o byi é danglù hau é yanmai, gabú nyi bum akô. ³² Yudaq eq Sila gi, myiqhtoi nhik le

* 15:15-16 Dawiq é yhũm gá é gi, Dawiq eq yhàng é awut ashĩn pé up é hkyô lé gá é nghut lhê. ✪ 15:18 Amo 9:11-12

nghut kômù luí, gumang wui lé mungdang myo myô èq lhoq pun lhoq kying kômù, wum-o lhoq gîng to byí akô. ³³ Rayoq zo haú má nyi nyi kô é htâng má, gumang wui gi, yhangmoq lé nhang kat é bâng chyáng, ngui ngui ngón ngón dum tau ló nhâng bekô nghut ri. ³⁴ (Sila kúm gi, yhang ô nau é dông nyi gyó tô ri.)† ³⁵ Poluq eq Barnaba kúm gi, Antioku và mó má nyi gyó to kômù, Yhumsing Yesuq é mungdang lé, góbang myo myo eq, mhoq kyo hko kyô akô nghut ri.

Poluq Eq Barnaba Nhik Gâng Lhum É Hkyô

³⁶ Hau htâng, buinyi tsómra myáng jáng, Poluq gi, Barnaba lé, "Yhumsing é mungdang hko kyô lai lo wú bê, và hkyap hkangmô má é gumang wui chyáng tau ló luí, yhangmoq hkâsu dut nyi é hkyô lé, ló dum kúm wú lo goq." ga tai ri. ³⁷ Barnaba gi, Markuq gâ é Yohan lé le shuí chung nau ri. ³⁸ Nghut kôlhang, Poluq gi, hau yuq lé a kâm shuí chung nau nghut ri; hkâsu mù gâ le, yhang gi, Pamhpuli mau má yhangnhik lé tô pyâm to mù, yhangnhik eq rahá muzô a kâm xoq zui nau é sù nghut é yanmai nghut ri. ³⁹ Hau é yanmai, yhangnhik gi, gyai yhang tai shai lhum kômù, rayuq eq rayuq gâng lhum bekô nghut ri. Barnaba gi, Markuq lé shuí chung luí, lai ji mù Kupru zinlóng shut é ló byuq bê nghut ri. ⁴⁰ Poluq kúm gi, Sila lé hkyin yù mù, gumang wui eq yhang lé Yhumsing Garai é jeju má ap kat kô é htâng má, yhangnhik gi, htoq é ló byuq bekô. ⁴¹ Haú mù, Poluq gi, Suriq mau eq Kiliki mau mai sô lai ló uchyang, hau má é noqkuq hpúng pé lé wum-o lhoq ging byí wún bê nghut ri.

16

Poluq Eq Sila Nhik Chyáng Timohti Châng É Hkyô

¹ Poluq gi, Derbe và mó má jé é htâng, Lustra và mó má dum jé ri. Haú và má, Timohti gâ é chángzo rayuq nyi ri. Yhâng nu gi, Yesuq lé lumjing é Yudaq myiwe myhi nghut ri; yhâng wa kúm gi, Grik amyú nghut ri. ² Timohti gi, Lustra và mó eq Ikoni và mó má nyi é gumang wui èq hkya-ôn é hui sù nghut ri. ³ Poluq gi, hkyowui má yhang lé shuí chung nau mù luí, ahpyo-kui hpyit byí ri. Hkâsu mù gâ le, yhâng wa gi, Grik nghut é hkyô lé hau má é Yudaq byu pé lhunglhang bang sé kômù, hau bang lé myit tê byí é yanmai nghut ri. ⁴ Haú mù, yhangmoq gi, rawa htâng rawa mai lai ló uchyang, Yerusalem và mó má é lagyô pé eq hpúng suwún wui, chôm myit hpyit tô é hkyô lé, cháng kó sháng gaq ga, yhangmoq lé tai kyô akô. ⁵ Haú mù luí, hpúng byú wui

gi, lumjing hkyô má wum-o bo lò kômù, ranyí èq ra-nyí byú du myô jat lo nyi ri.

Makedoni Byú Rayuq Lé, Poluq Shing-rán Myang É Hkyô

⁶ Ahkuí, yhangmoq gi, Asia mau má mungdang é hko kyo rà hkyô lé Chyoiyung Woi-nyí èq yhangmoq lé hkúm pyâm é yanmai, Hprugi mau eq Galatiq mau dông sô lai ló mù, ⁷ Musi mau kyo má jé ló kôjáng, Bihtuni mau shut wang ló rà dá akô; nghut kôlhang, Yesuq é Woi-nyí gi, yhangmoq lé ahkáng a byi nghut ri. ⁸ Haú mù, yhangmoq gi, Musi mau mai sô lai ló luí, Troa myuq má gyó jé ló akô. ⁹ Haú má, myín lé, Poluq gi, Makedoni byú rayuq lé yap to mù, "Makedoni mau shut dap lé luí, ngamoq lé le garúm yù laq." ga luí, yhang lé dung wut nyi é shing-rán myang ri. ¹⁰ Shing-rán hau lé Poluq myang é eq, Makedoni byu pé lé gabú danglù hko kyo rà matú, ngamoq lé Garai Gasang wut yù bê nghut ri ngú myit yù luí, hau hkún yhang, ngamoq gi, Makedoni mau shut dap é rà matú rì rì kut ló bê nghut lhê.

Ludia Gâ É Myiwe Myhi Hpúng Byú Dut Lo É Hkyô

¹¹ Haú mù luí, ngamoq gi, Troa myuq mai Samohtake zinlóng ang ang shut lai ji é mù luí, htang nyí gi, Neapoli và má jé bê nghut lhê. ¹² Haú mai lai jáng, Makedoni mau má, Romaq byu pé xuq tô é, hau ginwáng má é ahkyak và mó nghut é, Hpilipi myuq má ngamoq jé mù, hau má rayoq zo nyi nyi é nghut lhê.

¹³ Bánno buinyi jé jáng, ngamoq gi, kyúdung jowô joq nhô ngam mù, và hkum shinggan má é, wuilàng yàm shut htoq é luí, hau má zing to láng é myiwe wui lé, zung gyó mù nyo hi é nghut lhê. ¹⁴ Haú dang yuq nyi é bang má, Garai Gasang lé noqkuq é, Htuatira myuq byú, pán nê ung zo sù Ludia gâ é myiwe myhi rayuq bo ri; Yhumsing Garai gi, Poluq tai kyô é hkyô lé rago gyô yù sháng gaq ga, yhang lé myit hkum hpóng byí ri. ¹⁵ Yhang gi, yhang eq yhâng yhumbyú wui wui-myhup ban hkâm yù kôjáng, "Nungmoq gi, ngo lé hau Yhumsing Yesuq má lumjing bê sù nghut é dông, myit yù byi kô é nghut jáng, ngá yhùm má lé bíng keq." ga luí, ngamoq lé zuq zuq ji yu ri.

Poluq Eq Sila Nhik Htóng Lúng É Hkyô

¹⁶ Ra-nyí lé, ngamoq gi, hau kyúdung é jowô shut é ló nyi le, nat wang júng luí gumhpân hpan é jùnmyhi rayuq ngamoq lé lhom hui ri. Haú yuq gi, gumhpân hpan é dông yhâng yhumsing wui lé ngúnzê gyai yhang hô byí é sù nghut lhê. ¹⁷ Myiwe hau gi, Poluq eq ngamoq htâng má châng to mù,

† 15:34 Bun zo shí lhum gi, Grik Chyúmlaiká myo myo má a bò nghut lhê.

"Shí bang gi, nungmoq lé hkyi yù hkyô tái kyô wún é, Myhang Htâng é Garai Gasâng é dui-nhâng zoshâng wui nghut bum akô ô!" ga wut garû ri. ¹⁸ Buinyi myo myo haù su chyat châng garû wún é yanmai, Poluq gi, gyai yang myit hpêbu byuq mù, lhang wú kat luí, nat haù lé, "Yesuq Hkrisduq é myiêng lang luí ngò nang lé hkunmô hkyô kat lhê, yhang chyang mai htoq lô byuq aq." ga luí, nat haù lé, nhik-yô kat ri. Haù hkùn jâng, nat haù gi, yhang chyang mai htoq lô byuq bê nghut ri.

¹⁹ Ahkuí, myiwe hau é yhumsing wui gi, ngunzê myàng zo rá myoqbyu jowô a joq lo é hkyô lé sé kôjâng, Poluq eq Sila nhik lé chyup yù mù, gai mã é suwún wui chyang she hkyut e akô. ²⁰ Dum, yangmoq gi, yangnhik lé tarâ agyi pè chyang shui é mù, "Shí nhik gi, Yudaq byù nghut mù luí, ngamoq Romaq byu pé mai a ge châng é htungking lé mhoqshit byi nyi é dông, ²¹ nga-nhông é myuq lé gunjâng nyi akô nghut ri." ga tái kat ri.

²² Haù mù luí, shiwa byu pé gi, yangnhik lé chôm htím akô. Tarâ agyi pé gi, yangnhik é mebu lé lêng hkyut pyám luí, wumchûm hkat eq bat rá matú, hkunmô hkyô kat akô. ²³ Yangmoq gi, yangnhik lé gyai yang nhuq bat yu é htâng, htông má lhông kat mù, rago za wú zúng rá matú htông suwún lé hkunmô hkyô tô akô. ²⁴ Htông suwún hpô gi, haù sù é hkunmô lé wó jâng, yangnhik lé hkyi kyum hut luí, htông mã é, je ahtê gok má lhông tô ri.

Htông Suwún Hpô Hkyi Yù Hui É Hkyô

²⁵ Nghut kôlhang, gunggâm yoq lé, Poluq eq Sila nhik gi, kyúdung luí, Garai Gasang lé mahkôn hkyá-ôn nyi kô é hkùn, htông byù gôngang gi, yangnhik é htê lé chôm gyô nyi bum akô. ²⁶ Haù hkùn, byodàn ratung layàng mó nún lô mù htông yhúm gón le nún lô luí, hkum pé banshoq le radá dâm bóng há lo bum ri; dum nghut jâng, yuq hkangmô mã é toqjâng tui pé le gyut gyô byuq bê nghut ri. ²⁷ Htông suwún hpô gi, yhup bún lò mù, htông hkum pé bóng há tô bum é lé myang kat jâng, htông byu pé ban hpang byuq bùm bekô rá nghut lhê ga myit yù luí, shâm shê mù, yhanggùng yang sat shí rá dâ ri. ²⁸ Nghut kôlhang, Poluq gi, "É, náng gung yang nang haù su hkâkut, ngamoq banshoq shí má nyi tô lhê." ga luí, htê mó eq wut garu tái kat ri.

²⁹ Haù hkùn, yang gi, duq é myibung lé dúng yù mù, ahkaù shut din wang lô luí, Poluq eq Sila nhik é hí má gyuq nán é eq ngóm gop tô ri. ³⁰ Hau htâng, yang gi, yangnhik lé shui htoq yù luí, "Sarâ nhik é, ngò hkyi yu é hui rá matú, haí kut ra rá lú?" ga myi kat ri.

³¹ Haù hkùn, yangnhik gi, "Yhumsing Yesuq lé lumjâng jâng, nang eq nang yhang-byù lhunglhang bang hkyi yu é hui rá nghut lhê." ga tái akô. ³² Hau htâng, yangnhik gi, haù htông suwún hpô eq yhang yhum-byù lhunglhang lé, Yhumsing é mungdang hko kyô akô. ³³ Haù myin haù u lé yang, htông suwún hpô gi, yangnhik lé shui é mù, yangnhik é dâm pé lé tsing chí pyám byi luí, haù htâng, yang eq yhang yhumbyù banshoq bang wui-myhup hkâm yù bekô nghut ri. ³⁴ Hau htâng, yang gi, yangnhik lé, yhang é yhumkaù má shui wang lô mù, zoshuq hkang byi ri. Yang eq yhang yhumbyù banshoq bang gi, Garai Gasang lé wó lumjâng bekô nghut é yanmai, gyai gabú nyi bum akô nghut ri.

Haq Nhang Pyám Râ Lé A Dông É Hkyô

³⁵ Ahkuí, maubó jâng, tarâ agyi wui gi, "Haù nhik lé nhang pyám aq." ga, htông suwún hpô chyang pyata pé lé tái nhang kat akô. ³⁶ Haù hkùn, htông suwún hpô gi, "Nungnhik lé nhang pyám aq ga, tarâ agyi wui mai byù nhang kat ri; haù mù, ahkuí, nungnhik gi, ngón za htoq lô lo keq." ga luí, Poluq lé tái ri.

³⁷ Poluq kúm gi, "Nga-nhik gi, Romaq mingdán byù sheq ru nghut le wa, myí gôn wú é hkyô le a bo é, byu pé hí má ngá-nhik lé nhuq bat mù, htông má hkyô kat kôluí nhing, ahkuí tsik za haq nhang pyám rá dâ akô nhung lhi? A wó dut, yangmoq yhang sheq lé shui htoq yù kó sháng gaq." ga luí, yangmoq lé tù tái kat ri.

³⁸ Pyata pé gi, tarâ agyi wui lé dang haù pé lô tái kyo kôjâng, tarâ agyi wui gi, Poluq eq Sila nhik Romaq mingdán byù nghut é hkyô lé wó gyo kôjâng, gyô gyuq kôluí, ³⁹ yangmoq yhang, yangnhik chyang lé mù, tóngbán luí, shui htoq yù mù, wá haù mai htoq lô byuq rá matú chôm dúng akô. ⁴⁰ Haù mù, Poluq eq Sila nhik gi, htông mai htoq lô é htâng, Ludia é yhum má wang lô akô; haù má, gumang wui eq le hui kômù, yangmoq lé wum-o byi luí, htoq lô bekô nghut ri.

17

Htesaloni Wà Mó Má Mungdang Hko Kyô É Hkyô

¹ Hau htâng, yangmoq gi, Amhpoli wá mó eq Apolon wá mó mai sô lai lô mù, Htesaloni wá mó má jé akô. Haù wá má gi, Yudaq byu pé é tarajong rallhum joq ri. ² Poluq gi, yang lhaq kut nyi é eq rajung za, tarajong má wàng luí, Bánno buinyi sum nyi yang, Chyúmdang má bo é eq séng mù, yangmoq eq chôm mung lhum uchyang, ³ Hkrisduq wuihke jamjau hui mù, shí bê mai dum dui toq lô rá hkyô lé tái hkoq san kyo luí, "Nungmoq lé, ngò hko kyô nyi é

haú Yesuq gi, Hkrisduq nghut lhê." ga tai ri. ⁴Yudaq byu pé má é ra-am gi, gyô jing kômù, Poluq eq Sila nhik chyáng lé xoq yu akò; haú eq rajung za, Garai Gasang lé hkunggá é Grik pé myo myo eq, ahkyak é myiwe wui tsómra myo shoq le, gyô jing kômù, lé xoq yu akò.

⁵ Nghut kólhang, a gyô jing é Yudaq byu pé gi, manôn kólui, gai má é byùgang jùm ra-am lé lung yù mù, byù moq mó tsing yù lui, rawa é shui gabyong kômù, shiwa byu pé é hí má Poluq eq Sila nhik lé wó shui htoq shit shoq ga, Yason é yhùm má hùm e ló akò. ⁶ Nghut kólhang, yhangnhik lé a myàng kôjáng, yhangmoq gi, Yason eq gumang wui ra-am lé, yhangmoq é wá suwún wui chyáng lãng she é kômù, "Mingkan gón lé atau ahù kut é byù shí nhik, ahkuí shí má jé jáng, Yason gi, yhang é yhùm má lhom hkúlum yu ri. ⁷ Yhangmoq lhunglhãng bang gi, Yesuq gá é hkohkãm góyuq nyi lhê ga kólui, hkoséng Kehtaq é tará lé lhoq shai é dông kut é bang nghut akò." ga tai garú bum akò. ⁸ Shiwa byu pé eq wá suwún wui gi, dang haú lé wó gyô kôjáng, myit wui myit hke dut nyi bum akò. ⁹ Hau htãng, yhangmoq gi, manghkáng a lhoq htoq rá matú Yason eq góbang lé danggidiq zè byi nhãng mù, nhang pyãm bekò nghut ri.

Beria Wà Mó Bang, Mungdang Lé Lhom Yu É Hkyô

¹⁰ Haú myin jãng yhang, gumang wui gi, Poluq eq Sila nhik lé Beria wá mó shut nhang kat akò; yhangnhik gi, haú wá má jé jãng, Yudaq byu pé é tarajong má wang ló akò nghut ri. ¹¹ Haú Beria wá mó byu pé gi, Htesaloni wá mó byu pé htoq má je riyhang nhik bo bum akò; haú mù, danglù haú lé gyai ô nau é myit èq hap yù mù, danglù shí teng a teng é hkyô lé wó sé shoq ga, nyi wui Chyúmdang lé chôm nghap wu nyi akò nghut ri. ¹² Haú mù lui, Yudaq byu pé myo myo gi, lumjing bum akò, haú eq rajung za, aróng wó é Grik myiwe wui eq yuqgè wui myo myo le, lumjing bùm bekò nghut ri.

¹³ Poluq gi, Beria wá mó má le, Garai Gasang é mungdang hko kyô nyi é hkyô lé, Htesaloni wá mó má é Yudaq byu pé sé kôjáng, yhangmoq gi, haú má lé kômù, wá byù wui lé mhoq hpyoq lui, gabyong lò nhang akò. ¹⁴ Haú hkùn, gumang wui gi, Poluq lé wuimau yãm jé shoq, radá dãm dé kat akò; nghut kólhang, Sila eq Timohti nhik gi, Beria wá mó má nyi gyô tò akò nghut ri. ¹⁵ Poluq lé chãng dé é bang gi, Ahten myuq jé shoq lé dé to kômù, Sila eq Timohti nhik lé hãn hãn chãng ló rá matú pying kat é dang lé wun chũng mù, dum tau lò bekò nghut ri.

Poluq, Ahten Myuq Má Nyi É ULhê Hkyô

¹⁶ Ahkuí, Poluq gi, Ahten myuq má haú nhik lé lãng nyi tò é u lé, haú wá má rawa é hparà lhô baú dut tò é lé myàng mù lui, yhang i-mytit gyai yhang a ngón dut byuq ri. ¹⁷ Hau é yanmai, yhang gi, tarajong pé má Yudaq byu pé eq Garai Gasang lé gyuq hkunggá é Grik pé eq le, gai pé má hui mihui bang eq le, nyi wui tai sãn kyô lhùm nyi akò nghut ri. ¹⁸ Haú mù lui, Epikuri hpaqchyí eq Sto-i hpaqchyí* lé sé é, myit wú hpaqchyí bo é bang ra-am gi, yhang eq dang chyin chyin lhùm akò; haú hkùn, yhang gi, Yesuq é hkyô eq dum toi q hkyô é gabú danglù lé hko kyô é yanmai, ra-am gi, "Byù pyok shí yuq gi, hai wá tai nyi lhê lhu?" ga; ra-am gi, "Góming hparà pé é hkyô lé tai kyo sũ nghut sam ri." ga, tai bum akò nghut ri. ¹⁹ Hau htãng, yhangmoq gi, Aripagu gá é byin tú wap shut Poluq lé shui doq lò mù, "Nang mhoqshit é hkyô asik, ngamoq lé sé nhang le a gè lhu? ²⁰ Nang èq tai é maú nhô za gá é hkyô lé ngamoq wó gyô ri; haú é dang kying lé ngamoq sé nau ri." ga tai bum akò. ²¹ (Ahten byu pé eq haú má nyi é góming byu pé lhunglhãng bang gi, dang sik lù sik haú lé tai kún gyô kún mù, yhangmoq é ahkying lé lhoq pãn nyi bum akò nghut ri.)

Poluq, Aripagu Zuphpong Má Mungdang Hko É Hkyô

²² Haú u lé, Poluq gi, Aripagu zuphpong má toq yap mù, "Ahten byu pé é, nungmoq gi, hkyô hkat hkangmó má hparà lhô pé lé gyai yhang dat gyuq hkungga kò é lé, ngò myang ri. ²³ Hkãsu mù gá le, ngò sô lhing wún mù nungmoq jaú é ze pé lé rago wú wú lé, 'A sé é Garai matú.', ga lui, kã tò é hkungga gyap ralhùm lé myang zãng ri; haú nungmoq a sé é za jaú nyi é Garai hkyô lé, ngò, nungmoq lé hkaí kyo kólé.

²⁴ Myidãm htoq eq haú má jioq lé hpan tò é Garai Gasang gi, mauhkũng eq myigũng é Yhumsing le nghut lhê mù lui, byu loq èq sai é noqkuq yhùm má nyi rá a nghut. ²⁵ Yhang gi, byù lhunglhãng bang lé asak, soq, ra mira gumjup shoq byi to sũ nghut nyi é yanmai, rajung jung rá é sũ lé su, byu loq èq dojaú rá sũ a nghut. ²⁶ Yhang gi, gunchyng rayuq mai za byuhú chãngjup myô lò nhãng mù, myidãm htoq jãm shoq má nyi nhãng lui, yhangmoq é matú hí hí mai ahkying yam-yoq eq nyi rá jowò masat to byi bé nghut ri. ²⁷ Yhang gi, nga-nhũng yuq hkangmó eq a we to kòle, byu pé yhang lé chãng hò mù, myang hò kó shãng gaq ga shí hkyô lé kut é nghut ri. ²⁸ Hkãsu mù gá le, nungmoq é jihkyang kat bang, 'Nga-nhũng le yhang é awut ashin pé nghut nyi

* 17:18 Epikuri hpaqchyí gi, htang pyat a joq, ahkuí ngón yù rá za ahkyak gá é nghut lhê. Sto-i hpaqchyí gi, hai wá dut kólhang i-mytit zim za kut mù, htang pyat matú chiq a ra gá é nghut lhê.

lhê.' ga tai tô bum é eq rajung za, nga-nhúng gi, Yhang é yanmai wó nyí, wó dui é eq ísu wó dut é nghut lhê.

²⁹ Haú mù, nga-nhúng gi, Garai Gasâng é yhangzó pé nghut nyi é yanmai, Garai gúng gi, byu é hpaqchyl loq eq kyúng kâ tô é hng, ngùn, luggok pé eq púng lhê ngù luí hkâ-myt yù kó. ³⁰ Lai lò bê haú myoq a bóng shí é pyat lé, Garai Gasang gi, hai le a ga lhai pyâm to kôlhang, ahkuí gi, jowò hkangmó má é byù lhunglhang bang lé, myit lhing keq ga hkunmó hkyô to bê nghut ri. ³¹ Hkâsu mù gâ le, Yhang hkyin to sù mai mingkan gón lé tara é dòng jéyang rá buinyi ra-nyí masat to bê nghut ri. Shí hkyô lé, byù lhunglhang bang é hí má wó lum é saksé dut sháng gaq ga, Yhang haú yuq lé shí é mai lhoq dui toq yù bê nghut ri." ga tai ri.

³² Shí é mai dum dui toq lo é hkyô lé wó gyô bùm kôjáng, ra-am gi, tai hpoi pyám byí akô; ra-am kúm gi, "Nàng shí hkyô tai é lé ngamoq dum gyô wú nau ashí." ga tai akô. ³³ Hau htàng, Poluq gi, haú zuphpong mai htoq ló byuq bê nghut ri. ³⁴ Nghut kôlhang, byù ra-am gi, Poluq é htàng cháng kômù, lumjáng bang dut beko nghut ri. Haú bang má, Aripagu zuphpong má bo é Dionisi ga sù le bo ri. Hau htoq agó, Damari gâ é myiwe rayuq eq gotú byu pé le, bo bum akô nghut ri.

18

Poluq, Korinhtuq Myuq Má Nyi É U Lhê Hkyô

¹ Hau htàng má, Poluq gi, Ahten myuq mai htoq luí, Korinhtuq myuq má jé lo ri. ² Haú má, yhang gi, Romaq myuq mai Yudaq byù lhunglhang bang htoq ló byuq rá dut lhê ga, hkohkâm Klodi eq hkunmó hkyô é yanmai, a myáng shí lé Itali ming má yhangmyi Priskila eq htoq jé lo é, Pontuq mau byù nghut é, Akula gâ é Yudaq byù rayuq lé hui luí, yhangnhik chyáng é ri. ³ Yhangmoq gi, jonghpang sai zo bang chyat nghut kó é yanmai, muzó púng kôluí, Poluq gi, yhangnhik eq rahá nyi nyi mù, muzó chôm sai akô. ⁴ Bánno buinyi hkangmó, Poluq gi, tarajong má Yudaq byù eq, Grik pé lé, tai sân kyo luí, lhoq pun lhoq kyng yu ri.

⁵ Ahkuí, Sila eq Timohti nhik Makedoni mau mai châng jé jáng, Poluq gi, mungdang hkô hkyô má za wum kat luí, haú Yesuq gi, Hkrisduq yhang nghut lhê ga, Yudaq byu pé lé saksé hkâm kyô ri. ⁶ Nghut kôlhang, Yudaq byu pé hí, lom he-ngik pyám kômù, yhang lé rhoí dang tai pyám akô; haú mù, Poluq gi, yhang mebu ko shit é dòng yhangmoq lé a nau é hkyô tún shit uchyang, "Nungmoq é sui mara gi, nungmoq é ulhum má jé sháng

gaq, ngò eq hai a séng lo; ahkuí mai, ngò gi, túngbaú pé chyáng e ló berá nghut lhê." ga luí, yhangmoq lé tai ri.

⁷ Hau htàng, yhang gi, tarajong mai htoq luí, jong haú eq yhep nghut é, Garai Gasang lé noqkuq é Titu Yustu ga su é yhùm má wang ló ri. ⁸ Krispu gâ é tarajong má up sù gi, yhang yhumbyù lhunglhang bang eq rahá, Yhumsing lé lumjáng akô. Korinhtuq myuq byu pé myo nyi bum lhê." gâ ri. ¹¹ Haú mù luí, Poluq gi, Garai Gasâng é mungdang mhoqshit uchyang, razán eq lhamó hkyuq hkyap yhang, haú myuq má nyi nyi ri.

⁹ Ra-myin lé, shing-rán ralhum má Yhumsing mai Poluq lé tai é gi, "Hkâgyuq, tai aq, zim za hkâ-nyí. ¹⁰ Ngò nàng eq rahá nghut nyi lhê, nàng lé ó yuq eq le hai wó kut rá a nghut, hkâsu mù gâ le, myuq shí má, ngá é byù myo nyi bum lhê." gâ ri. ¹¹ Haú mù luí, Poluq gi, Garai Gasâng é mungdang mhoqshit uchyang, razán eq lhamó hkyuq hkyap yhang, haú myuq má nyi nyi ri.

¹² Galio ga sù, Ahkaia mau má é ginwáng zau kut nyi é u lé, Yudaq byu pé gi, myit rahkat zá eq Poluq lé chôm chyup yù kôluí, tará hpyit wap má she háng kômù, ¹³ "Byù shí yuq gi, jep é tará eq shai lhùm é dòng, Garai Gasang lé noqkuq rá matú, byu pé lé mhoq hpyoq wún ri." ga mara hún akô.

¹⁴ Haú hkùn, Poluq tú tai rá dà lò jáng, Galio gi, Yudaq byu pé lé, "Yudaq byu pé é, muzó shí gi, tará lu lai é muzó, haú a nghut jáng, agé ashop é muzó mai, dut lo é nghut le gi, nungmoq lé ngò gyo byi rá hkyô joq lhê. ¹⁵ Nghut kôlhang, muzó shí gi, nungmoq é tará eq séng luí, dang eq séng luí, mying eq séng luí, tai lhum kó é hkyô nghut é yanmai, nungmoq yhang ru ló hpyit lum keq. Haú sù é muzó má, ngò gi, tará agyi kut byi rá a nghut." ga tai mù, ¹⁶ tará hpyit wap mai yhangmoq lé hkat htoq pyám nhang ri. ¹⁷ Haú hkùn, yhangmoq lhunglhang bang gi, tarajong má up sù Sositeni lé chyup yù mù, tará hpyit wap hí má chôm bat akô. Galio kúm gi, haú hkyô lé hai gùn a kut byi nghut ri.

Poluq, Antioku Wà Mó Má Dum Taué Jé É hkyô

¹⁸ Poluq gi, Korinhtuq myuq má buinyi tsómra myáng shoq lumjáng bang eq nyi nyi ri. Hau htàng, yhang gi, haú bang lé shi-kyâm to luí, Priskila eq Akula nhik lé byinzùm kut mù, lhai ji luí Suriq mau shut e ló akô. Hau hí má, yhang gi, danggididq tô tô é yanmai, Kenhkrea wà má xâm nyhâm pyâm ri.* ¹⁹ Yhangmoq Ehpesu myuq má jé kó é hkùn, Poluq gi, Priskila eq Akula nhik lé nyhi pyâm to luí, yhang baú tarajong má wàng mù, Yudaq byu pé lé tai sân kyo byi ri. ²⁰ Haú má é bang gi, yhangmoq eq rahá

* 18:18 Xâm nyhâm pyâm é gi, Yudaq htùng dòng rajung jung kut rá matú danggididq to luí, haú lé ban kut jáng, yhumsing xâm lé nyhâm pyâm é nghut lhê.

rayoq zo nyi shi râ dông yhang lé dung kô é nghut kôlhang, yhang gi, a nhô lo nghut ri.

²¹ Haù mù, yhang gi, Ehpesu myuq mai lhai ji mù htoq lô uchyang, "Garai Gasang ô nau é hkyô nghut le gi, ngò nungmoq chyáng dum jé lé râ nghut lhê." ga, yhangmoq lé danggidig byi tô ri. ²² Ahkuí, Poluq gi, Kesare wà mó má lô jé dap jáng, Yerusalem wà mó shut doq lô mù, noqkuq hpúng lé lô huí tô é htàng, Antioku wà mó má dum gyô lô ri.

²³ Yhang gi, haù wà má rayoq zo nyi é htàng, htoq lô mù, Galatiq mau eq Hprugi mau mai sô lai lô uchyang, rawa htàng rawa má é chángzô pé lé wum-o lhoq ging byi ri.

Apolo Zui Saí É Muzô

²⁴ Ahkuí, Alesandru myuq byù nghut é sù, Apolo gâ é Yudaq byù rayuq gi, Ehpesu myuq má jé lé ri. Yhang gi, hpaqchyí bò sù nghut é htoq agó, Chyúmdang le gyai kùng é sù nghut ri. ²⁵ Yhang gi, Yohan é baptisma hkyô lé za sé sù nghut kôlhang, Yhumsing é hkyô lé mhoq yù bê nghut lui, Yesuq é hkyô pé lé mhoq yu to bê eq rajung za wum zuq tung ga lui, hkyak hkyak mhoqshit byi ri. ²⁶ Ahkuí, yhang gi, gyuq kyùm myit a bo é za tarajong má tai hí lô ri. Haù hkún, Priskila eq Akula nhik gi, haù lé wó gyô kôjáng, yhang lé ji yù mù, Garai Gasang é mungdang hkyô lé azó tung tai sân kyo byi akò nghut ri.

²⁷ Apolo gi, Ahkaia mau shut dap e lô nau é hkún, gumang wui gi, yhang lé wum saí byi mù, yhang lé lhom hkùlum yù râ matú, chángzô pé chyáng laiká ká byi kat akò; yhang gi, jé jáng, Garai Gasang jeju mai lumjing bê bang lé, gyai yhang wó garúm sù dut bê nghut ri. ²⁸ Hkásu mù gâ le, yhang mai, Yesuq gi, Hkrisduq yhang nghut nyi ri ga lui Chyúmdang má tún shit uchyang, byu pé hí má Yudaq byu pé lé, wum kat wó tai ung pyám é yanmai nghut ri.

19

Poluq, Ehpesu Myuq Má Nyi U Lhé Hkyô

¹ Ahkuí, Apolo gi, Korinhutq myuq má nyi tô é hkún, Poluq gi, mau káng mai sô lai lô mù, Ehpesu myuq má jé ri. Haù má, yhang gi, chángzô pé ra-am eq lui lui, ² yhangmoq lé, "Nungmoq gi, lumjing é hkún, Chyoiyúng Woi-nyí lé, wó yù bekô lhu?" ga myí ri.

Haù hkún, yhangmoq gi, "Chyoiyúng Woi-nyí nyi lhê gâ é lháng, ngamoq a wó gyô wú." ga tù tai akò.

³ Haù mù, Poluq gi, "Haù nghut jáng, nungmoq gi, hai jung baptisma hkam yù kô é lhu?" ga lui, yhangmoq lé myi jáng, yhangmoq gi, "Yohan é baptisma hkam yu é nghut lhê." ga tù tai akò.

⁴ Haù hkún, Poluq gi, "Yohan é baptisma nghu é gi, myit lhing mù wui-myhup hkám yu é hkyô lé gâ lhê. Yohan gi, yhang é htàng

má jé lé râ sù, haù Yesuq lé sheq lumjing rá lhê ga shiwa byu pé lé tai ri." ga tai ri.

⁵ Yhangmoq gi, dang haù lé wó gyô kôjáng, Yesuq é mying lang lui baptisma byi é lé, hkam yu bum akò. ⁶ Poluq gi, yhangmoq é htoq má loq ke byi jáng, haù Chyoiyúng Woi-nyí gi, yhangmoq htoq má jé lé mù, yhangmoq gi, laklai dang nyo lo é htoq agó myiqhtoi le htoi lo bum akò. ⁷ Haù bang lhunglháng gi, yuqgê raxe í yuq kó nghut ri.

⁸ Hau htàng, Poluq gi, tarajong má wàng lui, gyuq kyùm myit a bo é za lhamó sum hkyap Garai Gasang é mingdán hkyô lé tai sân kyo mù, lhoq pun lhoq kyíng yu ri.

⁹ Nghut kôlhang, ra-am gi, myit htan lo bùm kôlui a kám lumjing kô é htoq agó, haù Yhumsing é Hkyô lé byu pé hí má lhoq hpoi pyám byi kôjáng, Poluq gi, yhangmoq chyáng mai htoq lui, chángzô pé lé shui chúng mù, Turanu gá su é hpaqchyí mhoq jong má, nyi wui tai sân kyô lhum nyi akò.

¹⁰ Haù su kut í zân yhang mhoqshit nyi é yanmai, Asia mau gón má é Yudaq byu pé eq Grik pé lhunglháng bang gi, Yhumsing é mungdang lé wó gyô yu bum akò nghut ri.

Skewa É Yhangzo Nyhit Yuq É Hkyô

¹¹ Garai Gasang gi, Poluq é loq dông laklai kumlhá kut ri. ¹² Haù mù, Poluq chyáng má é hpajet eq hpyihit rajung jung lé, nô bang chyáng yu lô mù, lô záng byi jáng lháng, yhangmoq é nôhpyo ge lô byuq é eq, agé ashop é nat pé lé yhangmoq chyáng mai htoq lô byuq bum akò.

¹³ Haù u lé, nat hkat htoq wun é Yudaq byu pé ra-am gi, agé ashop é nat pé lé, "Poluq hko tai é Yesuq é mying mai, ngò, nungmoq lé hkat htoq lhê." ga, agé ashop é nat wang jung to bâng é ahtoq má, Yhumsing Yesuq é mying lé lang lui, hkat chyam wú akò. ¹⁴ Skewa gâ é, Yudaq hkyangjong agyi rayuq é yuzzo nyhit yuq le haù su kut wun akò. ¹⁵ Ra-nyí lé, agé ashop é nat gi, yhangmoq lé, "Yesuq lé ngò sê lhê; Poluq é hkyô lé le ngò sê lhê; nghut kôlhang, nungmoq gi, ó pé nghut akò?" ga tù tai mù, ¹⁶ agé ashop é nat haù wang jung é byù gi, yhangmoq htoq má byam doq jí to lui, nhuq bat yù mù yhangmoq lé ung pyám ri. Yhangmoq gi, yhum haù mai gungchín sui nê yang yang hpang htoq lô bekô nghut ri.

¹⁷ Haù hkyô lé, Ehpesu myuq má nyi é Yudaq byu pé eq Grik pé sé kôjáng, yhangmoq lhunglháng bang gi, chòm gyô gyuq bum akò. Yhumsing Yesuq é mying gi, hkyá-on lhoq toq é lui bê nghut ri. ¹⁸ Lumjing bê bang myo myo gi, lé mù, yhumsing kut shut é agé ashop hkyô lé, myo myô hí má yín yu akò. ¹⁹ Myoqheq hpaqchyí kut zô é bang le, yhangmoq é laiká lé yu lé kôlui, shiwa byu pé hí má nyhé hkyô pyám akò. Mausau haù pé é ahpau lé sôn wú le, ngùn chap ngo mun

záng ri. ²⁰ Haú dông mai, haú Yhumsing é mungdang gi, ko lam lò mù, wum-o a-tsam je bo lò bê nghut ri.

Ehpesu Myuq Má Gabyông É Hkyô

²¹ Shí pé ban dut lai htâng má, Poluq gi, Makedoni mau eq Ahkaia mau dông sô lai lò mù, Yersalem wá mó má ló jé rá ga myit hpyit yú luí, "Haú má ló jé tó é htâng má, ngò, Romaq myuq má le, jé wú rá dut ashí." ga tái ri. ²² Haú mù, yang lé htuqbang garúm é Timohti eq Erastu nhik lé hí Makedoni mau shut nhang kat luí, yang gi, Asia mau má rayoq rabun zo nyi gyó tó ri.

²³ Haú yoq lé, haú Yhumsing é Hkyô yanmai gyai yang gabyông lo bum akô. ²⁴ Demetri gá é ngùn bat zo sù rayuq gi, Artemi hpara é ngùn yhùm zông zo sai luí, mù sai luzúm wuí lé wó sùt nhang nyi ri. ²⁵ Yang gi, yhang é ngùn bat zo luzúm wuí eq haú jung amú kut é góbang lé le ji tsing to mù, tái é gi, "Luzúm wuí é, muzó shí lhùm é yanmai, nga-nhúng nyi ngón yuqyo nyi é hkyô lé, nungmoq sê lhê. ²⁶ Nghut kôle, ahkuí gi, Ehpesu myuq má za le a nghut lo, Asia mau lhang aluq jam shoq, byu loq eq sai é zè lé, garaí pé a nghut ga, shí Poluq ga sú mai byú myo myo lé mhoq hpyoq yú mù, hkyô shuí lhoq nghoq nyi é hkyô lé, nungmoq wó myâng, wó gyô nyi akô. ²⁷ Haú mù luí, nga-nhúng é muzó shí gi, hpoi byuq rá lé chiq rá é za a nghut, hpara myhí mó Artemi é noqkuq yhùm gi, hai a dut byuq luí, Asia mau gón eq mingkan gón mai noq é hpara myhí é shingkan hpoi byuq rá lé le myit chiq rá dut bê." gá ri.

²⁸ Yangmoq gi, dang haú lé wó gyô bùm kôjáng, nhik mó gyô yo kôluí, "Ehpesu myuq byu pé é Artemi gi, kô nyi sháng gaq ôi" ga chôm garú bum akô. ²⁹ Hká-myháng a nghut má, rawa bang gabyông lò bekô. Shiwa byu pé gi, Poluq é byinzùm Makedoni byú Ge-u eq Aristakuq nhik lé chyup she yú mù, yangmoq é poi wàng mó shut radá dâm chyín chyap wang lò bum akô. ³⁰ Poluq gi, moq hpúng hau hí má htoq shit naú kôlhang, chángzô pé gi, yang lé a wàng nhâng kó nghut ri. ³¹ Poluq é luzúm wuí nghut é, haú mau má é suwún wuí ra-am lhang, yang lé poi wàng hkaú má a é rá matú, hkùm pyám nhang akô nghut ri.

³² Zing tó é bang gi, hai hù háng le a sé lo dut byuq kômù luí, ra-am rajung ga garú bum akô. Myo mi-myô gi, hái mù luí yangmoq haú má nyi tó é lé lhang a sê bùm kó nghut ri. ³³ Yudaq byu pé gi, Alesander lé hí má chôm chyún htoq kat kôluí, shiwa hpong mai ra-am gi, yang hká dông tái rá hkyô lé mhoq byi kat akô. Alesander le shiwa hpong lé tái san kyo nau luí, zim byuq rá matú loq tu ri. ³⁴ Nghut kôlhang,

Alesander, Yudaq byú nghut é lé sé kôjáng, yangmoq lhunglhang bang gi, rahté za kut kôluí, "Ehpesu myuq byu pé é Artemi gi, kô nyi sháng gaq ôi" ga hkying hkum í hkum kô garú bum akô.

³⁵ Haú, myuq chyare hpó gi, shiwa moq mó lé lhoq zim luí tái é gi, "Ehpesu myuq byu pé é, Ehpesu myuq shí gi, Artemi myhí mó é noqkuq yhùm eq mauhkung mai byit gyó lo é yhang é alhó lé, wú zung nyi é wà nghut é hkyô lé, mingkan má a sé é ó yuq wa nyi lhê lhu? ³⁶ Haú mù luí, shí hkyô pé gi, wó he pyám jung a nghut é yanmai, zim za nyi le ge lhê, hân so hân dùn hkátuk zo. ³⁷ Shí nhik gi, noqkuq yhùm lé hpyoq zo su nhik le a nghut, nga-nhúng é hpara myhí lé lhoq hpoi su nhik le a nghut kô é le nhúng, nungmoq shuí lé bekô nghut ri. ³⁸ Demetri eq yhang é ngùn bat zo luzúm wuí gi, rayuq yuq é ahtoq má mara hùn rá hkyô joq kô é nghut jáng, tará rùng pé hpông tó lhê. Tará agyi pé nyi lhê. Haú má yangmoq é kó sháng gaq. ³⁹ Nungmoq tái nau é gó hkyô rajung jung joq é nghut le kúm gi, tará wang zuphong mó má chôm tái pyám rá nghut lhê. ⁴⁰ Hkú-nyí gabyông é mù shí má, mù htoq wang a bo é yanmai, nga-nhúng lé mara hùn rá chiq rá ri. Shí su kut chôm ming é hkyô lé, hai é yanmai nghut lhê nghú, nga-nhúng a wó tái kyo nghut ri." gá ri. ⁴¹ Shí pé ban tái é htâng má, yang gi, shiwa moq mó lé lhoq pyo kat bê nghut ri.

20

Makedoni Mau Éq Grik Mau Dông Lai Ló É U Lhê Hkyô

¹ Haú gabyông é hkyô zim byuq é htâng má, Poluq gi, chángzô pé lé ji yú luí, yangmoq lé wum byi dang tái to mù, shi-kyâm to luí, Makedoni mau shut htoq e lò bê nghut ri. ² Yang gi, haú mau mai sô lai lò uchyang, byu pé lé wum byi é dang myo myo tái luí, Grik mau má ló jé bê. ³ Yang haú má lhamó sum hkyap nyi yú mù, lhai ji luí Suriq mau shut é rá hen nyi é hkùn, Yudaq byu pé gi, yang lé ngám nyi kô é yanmai, yang gi, Makedoni mau dông tau lò rá lé myit hpyit bê nghut ri. ⁴ Yang eq rabyin za châng é bang gi, Beria wá mó má é Purú yangzo Sopata, Htesaloni wá mó má é Aristakuq eq Sekundu nhik, Derbe wá mó má é Ge-u, Timohti, Asia mau má é Tuhkiku eq Trohpimu nhik pé nghut akô. ⁵ Yangmoq gi, hí só lạng luí, ngá-nhik lé Troa myuq má ló lạng nyi akô. ⁶ Nghut kôlhang, ngá-nhik gi, Azuma Poi* lai é htâng má, Hpilipi wá mó mai lhai ji ló le, ngo nyi nghú jáng, Troa myuq má yangmoq lé hui luí, haú má nyhit nyi chôm nyi é nghut lhê.

* 20:6 Múnchi a bo é Muk zo Poi lé, Azuma Poi le gá lhê.

Troa Wà Má, Utuhku Ga Sû Lhoq Tui Toq Hui É Hkyô

⁷ Rabat é sâng-hi nyí lé, ngamoq gi, muk hpê gâm rá matú lé chôm zup zing tô é hkûn, Poluq gi, htang nyí ló byuq rá ga hen tô é yanmai, chángzô pé lé gunggâm jé shoq hko kyô nyí ri. ⁸ Ngamoq zup zing nyí é haú ahtôq pyâm wap má, myibung myo myo le duq tô ri. ⁹ Poluq dang nyo hing nyí é u lé, Utuhku gá é zorâm zo rayuq gi, hkohot hkum yâm má yhup mui zung tô ri. Haú yuq gi, yhupmó myi byuq luí, yhûm sum tsáng mai byit gyó mù, yang lé bún toq wú le shi byuq bê nghut ri. ¹⁰ Haú hkûn, Poluq gi, gyó ló mù, po ngop to luí, "Hkâdân ko, yang soq bo ashí." ga taí ri. ¹¹ Haú mù, yang gi, dum tau doq ló luí, muk lé hpé mù, zo luí, maubó shoq yhangmoq eq dang nyo kún mù htoq ló bê nghut ri. ¹² Zorâm zo haú lé duí gù shuí ló kômù, nhik ting é gyai yang hui bekô nghut ri.

Troa Wà Eq Melitu Wà Gyoro Má É Hky-owui

¹³ Poluq gi, myí hkyô ló rá matú hen tô é yanmai, yang lajang byí é eq rajung za, yang lé Asu wà má lhaí lhom shuí ji rá matú, ngamoq gi, lhaí ji mù hí ló láng bê nghut lhê. ¹⁴ Haú mù, yang gi, Asu wà má ngamoq eq hui luí, ngamoq gi, yang lé lhaí má shuí jí chûng mù, Mitulene myuq shut e ló bê. ¹⁵ Htang nyi, ngamoq gi, haú mai lhaí ji mù, Kiu zinlóng yâm mai laí ló luí, hau htang nyí gi, Samu zinlóng má lai dap ló luí, htang nyí gi, Melitu wà mó má jé ló bê nghut lhê. ¹⁶ Poluq gi, wó dut é nghut jáng, Penteko-ti buinyi lé Yerusalem wà mó má wó jé shoq gá é yanmai, Asia mau má buinyi a kâm lhoq htm nau mù luí, Ehpesu myuq lé lhaí pyâm to rá matú, myit hpyit to bê nghut ri.

Ehpesu Hpúng Suwún Wuí Lé, Poluq Shi-kyâm Tô É Dang

¹⁷ Poluq gi, Melitu wà mó mai Ehpesu shut byu nhang kat luí, hpúng suwún wuí lé é ji nhang ri. ¹⁸ Haú bang jé lé kôjáng, yang yhangmoq lé taí é gi, "Ngò, Asia mau má sâng-hi jé é buinyi mai, nungmoq eq hkásu kut nyí nyí é ahkyíng banshoq lé le; ¹⁹ Yudaq byu pé jeq hô luí, ngò wúihke jamjau hui zo kôhang, haú Yhumsing é muzó lé, ngò myit gyai lhoq nyhûm é eq ngaubyi ngaú nhap é eq wùn waq é hkyô lé le; ²⁰ nungmoq é matú akýú bo é hkyô banshoq lé, a myhit to loshoq taí é hkyô lé le; shiwa byu pé hí eq rayhûm htang rayhûm má ngò nungmoq lé mhoqshit é hkyô lé le; ²¹ ngò gi, Yudaq byu pé eq Grik pé lé, myit lhing mù Garai Gasáng chyáng lhing lò ra eq, nga-nhûng é Yhumsing

Yesuq lé lumjing ra hkyô lé, saksé hkâm kyo lugú nghut bê lé le, nungmoq sé nyí akô.

²² Ahkuí, ngò gi, Woi-nyí má túi tô é hui bê yanmai, Yerusalem wà mó má e ló lhê; haú má, ngò hai ló dut rá lé kúm gi, a sé nghut ri. ²³ Ngò gi, htông eq wúihke jamjau hkyô ngo lé láng tô ri ga, wà hkangmó má Chyoiyung Woi-nyí eq lhoq pûn é hkyô lé za sé nyí lhê. ²⁴ Nghut kôhang, ngò gi, òn rá hkyô ban òn rá eq, Garai Gasáng jeju eq séng é gabú danglù lé saksé hkâm rá matú, Yhumsing Yesuq ngo lé byi tô é muzó lé ban wùn waq rá za nghut jáng, ngá asak lé ratsuí le a myit ha lô é nghut lhê.

²⁵ Garai Gasáng é mingdán hkyô lé hko kyô wún é hkûn, ngò eq hui é nungmoq lhunglhâng bang gi, htang nùng má ngo lé a myàng lo kó rá nghut é lé, ahkuí ngò sê to bê.

²⁶ Haú mù luí, ó yuq nghut kôhang, yubak mara má shi byuq ló é nghut le, haú yuq é sui chyín gi, ngò má a dap lô é hkyô lé, hkû-nyí, ngò saksé hkâm tô lhê. ²⁷ Hkásu mù gá le, Garai Gasang ô nau é hkyô banshoq nungmoq lé hko kyo rá matú, ngò záu tô é hkyô a joq wú é yanmai nghut lhê. ²⁸ Nungmoq gi, yhumsing gung lé le, nungmoq lé Chyoiyung Woi-nyí eq up zung nhang é sau hpung[†] lhunglháng lé le, zung nyí keq. Garai Gasang Yhâng suí eq wui tô é noqkuq hpung lé le, rém zung nyí keq. ²⁹ Ngò ló byuq é htang má, sau hpung lé a shogyó é, ashop é wamhkuí gi, nungmoq chyáng jé rá nghut é hkyô lé, ngò sê lhê. ³⁰ Hau htoq agó, chángzô pé lé wó mhoq hpyoq yú shoq ga, shut é dong taí é byu pé lhâng nungmoq chyáng mai htoq ló rá nghut lhê. ³¹ Haú mù luí, nungmoq yuq hkangmó lé, ngò sum zân tup ngaubyi ngaú nhap eq nyí myín a hkying loshoq, lhoq pun lhoq kyíng tô é dang pé lé, nungmoq gi, myit bun mù machya nyí keq.

³² Ahkuí, ngò gi, nungmoq lé, Garai Gasáng chyáng le, nungmoq lé wó lhoq ging lhoq ting mù, lhoq chyoiyung é hui bê bang eq nungmoq lé silí wunlí wó byí é, Yhâng é jeju mungdang má le, ap tô lhê. ³³ Ngò gi, ó yuq é hing, ngùn, mebu pé lé le a myoqnoq wú. ³⁴ Ngá é loq shí i loq gi, ngò eq ngá htang châng é bang ra châ é lé kut byi bê hkyô lé, nungmoq yang sé gù nghut lhê. ³⁵ Ngò kut é muzó banshoq gi, nungmoq é alik dut bê nghut luí, shí su kut shikut é dong mai, nga-nhûng gi, wum-o nyhóm bang lé htuq bang luí, 'Lhom yu é htoq má luí é gi, je riyhang hkungsô wó nyí ri.' ga luí, Yhumsing Yesuq taí é dang lé bún nyí sháng." gá ri.

³⁶ Poluq gi, haú su ga ban taí jáng, hkyih-put htuq mù, yangmoq lhunglhâng bang eq rahá za kyúdüng ri. ³⁷ Yhangmoq lhunglhâng bang gi, yang lé po to luí, bopuq puq mù, chôm ngaú akô. ³⁸ Htâng

[†] 20:28 Sau hpúng gá é gi, lumjing é bang lé gá lhê.

nùng má, yang lé dum myàng rã a nghut lo gã é dang yanmai, yangmoq gi, je riyhang yón kuq bum akô. Yang lé, hai má jé shoq lé châng dé kat akô nghut ri.

21

Yerusalem Wà Mó Shut Doq Lô Nyi É U Lhê Hkyô

¹ Ngamoq gi, yangmoq lé kang pyâm to lui, hai jĩ chung mù, nyàng za Kusa zinzóng má jé é nghut lhê. Hau htang nyi gi, Rode zinzóng má jé mù, hau mai Patara wã má dum jé bê. ² Háu wã má Hpinisi mau shut dap ló é hai lé, ngamoq myàng lui, hau mai chòm jĩ chung bê. ³ Háu hkún, ngamoq gi, Kupru zinzóng lé myàng jáng, hau é loqyo hkyam đông lai ló lui, Suriq mau shut e ló le, hpugá zê lé hkyô rá matú, Turuq myuq má nô é nghut lhê. ⁴ Háu wã má, chángzô pé lé myang hô lui, yangmoq chyáng nyhit nyi bíng yu é. Chángzo háu bang gi, Chyoiyung Woi-nyí eq lhoq pún é đông Poluq lé Yerusalem wã mó shut a ló rá matú, chòm hkúm akô. ⁵ Nghut kólhang, nyhit nyi hau lai jáng, ngamoq gi, ngamoq é hkyowui shut dum xoq só htoq ló bê. Chángzô pé lunglhang bang gi, yangmoq é myi zo wui eq rahá, ngamoq lé wã shinggan jé shoq châng dé kôlui, ngamoq gi, yangmoq eq rahá wuiyâm má hkyihput htuq mù, kyú chòm dung bê nghut lhê. ⁶ Hau htang, rayuq eq rayuq ban shi-kyâm lhum jang, ngamoq gi, hai má wàng bê; yangmoq gi, yhum shut dum tau ló byuq bekô nghut ri.

⁷ Ngamoq gi, Turuq myuq mai hai jĩ chung mù, Toleme wã má jé ló bê. Ngamoq gi, háu wã má é gumang wui lé shichyên yù mù, yangmoq eq rahá ra-nyí chòm nyi kún é nghut lhê. ⁸ Htang nyi gi, ngamoq háu wã mai htoq ló mù, Kesare wã mó má dum jé bê. Háu wã má, hau htuqluq htuqbang nyhit yuq* má bò sù, gabú danglù hko tai é Hpilip gá su é yhum má, ngamoq wang bíng bê nghut lhê. ⁹ Yang gi, yang hku tô é byizo zomyi myiqhtoi myi yuq wó ri.

¹⁰ Ngamoq gi, hau yhum má rayoq zo nyi é htang má, Agabu gã é myiqhtoi rayuq, Yuda mau mai jé lé ri. ¹¹ Yang gi, ngamoq chyáng jé lé lui, Poluq é hpyihit lé yù mù, yhanggung yang loq eq hkyí pé má tui mù lui, tai é gi, "Shi hpyihit yhumsing lé, Yerusalem wã mó má é Yudaq byu pé mai shi su kut lhom tui lui, tungbau pé é loq má ap pyám kó rá nghut lhê; ga lui, Chyoiyung Woi-nyí tai ri." gã ri.

¹² Dang hau lé wó gyo jang, hau má é bang eq ngamoq gi, Poluq lé Yerusalem wã mó má a doq ló rá matú, gayi yang chòm hkúm bê nghut lhê. ¹³ Nghut kólhang, Poluq gi, "Nungmoq gi, hai mù lui ngaubyi ngau-nhap kut é eq, ngo lé myit wum gyui rá đông

kut nyi akô lúh? Ngò gi, Yhumsing Yesuq é yanmai, Yerusalem wã mó má, tui é hui rá za a nghut, shi hkâm rá matú le ri ri nghut lhê." ga tũ tai pyâm ri. ¹⁴ Yang lé wó tai hkúm rá su a dut lo jang, ngamoq gi, "Garai Gasang ô nau é đông nghut shang gaq." nghu lui, zim za chòm nyi bum bê.

¹⁵ Hau htang má, ngamoq gi, zê món chung mù Yerusalem wã mó shut doq ló bê nghut lhê. ¹⁶ Kesare wã mó má é chángzô pé ra-am le, ngamoq eq rabyin za nghut kôlui, yangmoq gi, ngamoq lé Kupru byu Manason ga sũ, hí hí lhê é chángzo rayuq é yhum má shui ló mù, yhang chyáng bíng nhang akô.

Yerusalem Wà Mó Má, Yakuq Lé Ê Hui É Hkyô

¹⁷ Yerusalem wã mó má ngamoq jé é hkún, gumang wui gi, ngamoq lé gabú tung lhom hkúlum yu akô. ¹⁸ Htang nyi, Poluq eq ngamoq gi, Yakuq lé é hui le, hpung suwún wui le zing nyi to lán akô. ¹⁹ Poluq gi, yangmoq eq ban shichyên jang, yang wun waq lai lo é hpung mù đông mai, Garai Gasang eq tungbau pé chyáng kut byi bê hkyô pé lé, jihkúm nuqguq shit kyô ri.

²⁰ Yangmoq gi, hau lé wó gyo kôjang, Garai Gasang lé hkyá-ôn akô. Hau htang, Poluq lé tai kô é gi, "Ámang ê, Yudaq byu pé má lumjing é bang hká-myhó hkying mun nghut bê lé, nàng sê lhê. Háu bang lunglhang gi, jep é tará má myit zuq to bê bang chat nghut bum akô. ²¹ Nghut kólhang, yangmoq lunglhang bang gi, tungbau pé chyáng nyó lúng tô é Yudaq byu banshoq bang lé, nàng, yhumsing yangzo yangshú pé é matú ahpyo-kuq hpyit a ra nghu é eq nga-nhùng é htung tará lé châng nyi a ra nghu lui, Mosheq é tará lé tô pyám rá đông mhoqshit ri gã é dang lé, wó gyo yù bum bekô nghut ri. ²² Nàng jé bê hkyô lé, yangmoq wó gyo berá za nghut lhê. Ahkuí, ngamoq hkásu kut lo rá lúh? ²³ Háu mù, ngamoq tai é đông kut aq, ngamoq chyáng danggidid qoi byi bê byu myi yuq nyi lhê. ²⁴ Nàng gi, hau bang lé jĩ yù mù, yangmoq eq rahá lhoq san lhoq yung yù aq, yangmoq lé u wó wuq yù rá matú, ahpaule htoq byi aq. Háu hkún sheq, byu lunglhang bang gi, yangmoq wó gyo tô é hkyô a têng byuq é eq, nàng yang lhang, jep é tará lé, châng kut nyi sũ nghut é hkyô lé, sé kó rá nghut lhê. ²⁵ Lumjing é tungbau pé é matú kum gi, hpará lhô pé lé tung byi é zoshuq, sui, lingzing mai myhik sat é dusak sho eq ashop é đông gungsho zùm yap é hkyô pé lé, yangmoq koi pyám rá matú, ngamoq chòm doqdan lui, kã hùn kat bê nghut lhê." ga akô.

²⁶ Háu mù lui, Poluq gi, hau htang nyi hau bang lé jĩ yù lui, yangmoq eq rahá, lhoq san lhoq yung yù mù, noqkuq yhum má

* 21:8 Lagyo 6:1-6

wàng luí, yangmoq yuq hkangmó é matú hkungga wó byi shoq ga, yangmoq é lhoq san lhoq yúng buinyi ngap bê hkyô lé, tai kyô ri.

Poluq Chyup Yú Huí É Hkyô

²⁷ Buinyi nyhit nyí haú ngap rá yàm má, Asia mau má é Yudaq byu pé ra-am gi, noqkuq yhúm má Poluq lé myàng kômú, shiwa byu pé lé shuí gabyong lui, yang lé chyup yú mù, garú tai kô é dang gi, ²⁸ "Israelaq byu pé ê, garúm yú keq, shi yuq gi, nga-nhúng byuhú lé le, jep é tará lé le, jowò shí lé le, shut shai é dǒng jowò hkangmó má é byú banshoq lé mhoqshit sù nghut ri. Hau htoq agó, noqkuq yhúm má Grik pé lé shuí háng é eq, chyoiyúng jowò shí lé achauq achyut kut é sù nghut ri." gá akó. ²⁹ (Hkásu mù gá le, yangmoq gi, Ehpesu myuq byú Trohpimu ga sù eq Poluq wá hkaú má rahá nghut kô é lé, myàng kômú, haú yuq lé noqkuq yhúm shut shuí háng nhò ngam pyám kô é yanmai nghut ri.)

³⁰ Rawá gón gabyông lo mù, shiwa byu pé lhinghkyuq mai din lé ló kólui, Poluq lé chyup zing to uchyang, noqkuq yhúm shing-gan shut she hkyut htoq ló akó. Haú hkún jáng, hkum pé lé myhí pyám akó nghut ri. ³¹ Poluq lé yangmoq sat rá dá nyi kô é hkún, Yerusalem wá gón gabyông nyi akó gá é hkyô lé, Romaq dap up zaú é no má, ló jé ri. ³² Haú mù, yang gi, radá dâm shó up gyezau ra-am eq gyezô pé lé shuí chùng mù, byú hpúng shut, din yán gyó ló akó. Yangmoq gi, gyezau eq gyezô pé lé lhom myàng kôjáng, Poluq lé nhuq nyi é mai hkyiing byuq akó nghut ri.

³³ Haú hkún, dap up zau hpó gi, Poluq chyáng ê jé mù, yang lé chyup yú lui, toqjáng tui í hkat eq tui to nhang ri; hau htáng, yang ó yuq nghut é hkyô lé le, haí kut shut é hkyô lé le myí wú ri. ³⁴ Shiwa byu pé kúm gi, rayuq rajung ga garú bum akó. Haú mù, gyezau hpó gi, lúm garu kô é yanmai, têng é hkyô lé rago a wó sê yú jáng, Poluq lé gyewap má shuí ló nhang ri. ³⁵ Poluq gi, zumhtáng wang má jé lo é hkún, byú moq mó lúm htím chyín chyap ló kô é yanmai, gyezô pé gi, yang lé waq doq ló akó. ³⁶ Shiwa byu pé gi, "Yang lé sat pyám keq." ga châng garú nyi akó nghut ri.

Poluq, Yhumsing Gùng Mara A Bo É Lé Tai Sân Kyô É Hkyô

³⁷ Gyezô pé gi, Poluq lé gyewap má shuí wàng rá za nghut é hkún, Poluq gi, dap up zau hpó lé, "Ngó nàng lé dang wó nyô rá lú?" ga myi jáng, dap up zau hpó gi, "Nàng, Grik myíng dat mu lhé lú?" ³⁸ Nàng gi, hí hkún gumlau kut mù, byú sat wún bang myi hkyiing lé, yoso shut shuí htoq ló é sù, Egotuq byú a nghut lú?" ga tau myí ri.

³⁹ Haú hkún, Poluq gi, "Ngó gi, Kiliki mau Tarshu myuq má é Yudaq byú nghut lhé; ngó nyi é wá gi, wá chyap wá zo za a nghut, jeju mai, byú shí bang lé ngó dang tai rá ahkáng byi laq." ga dǒng ri.

⁴⁰ Gyedap up zau hpó ahkáng byi jáng, Poluq gi, zumhtáng má yap to mù, shiwa byu pé shut loq he ri. Haú hkún, yangmoq lhunglhang bang zim byuq kômú, Poluq, yangmoq lé Hebre myíng dǒng tai é gi,

22

¹ "Gumang wui eq íwa pé ê, ahkuí, ngó mara a bò nghu tai é dang lé gyô wú shi keq." gá ri.

² Yangmoq gi, yang Hebre myíng dǒng tai é dang lé wó gyô bùm kôjáng, gyai yang zim byuq bekò. Haú mù, Poluq xoq tai é gi,

³ "Ngó gi, Yudaq byú rayuq nghut lhé. Kiliki mau Tarshu myuq má choq hpyit kólhang, wá mó shí má nyi kô ló sù nghut lhé. Ngó gi, nga-nhúng íchyí íwa pé é jep é tará lé, Gamalelaq é loq má jikhúm nuqguq mhoq yú lui, hkú-nyí lhé é nungmoq lhunglhang bang su, Garaí Gasang lé gyai myit zing zuq é sù nghut lhé. ⁴ Ngó gi, shí Hkyô cháng bang lé shí é jé shoq, zing-rí wú é sù eq, myiwe yuqgè ó yuq lé nghut kólhang, chyup yú mù htóng má lhùng pyám wú bê sù nghut lhé. ⁵ Hkyangjong mó eq byin tú wap suwún wui lhunglhang bang gi, ngá é saksé pé nghut akó. Ngó gi, Damaskuq myuq má nyi é yangmoq é Yudaq gumang wui lé byi rá laiká yangmoq chyáng mai wó yu chùng lui, haú má é bang lé le Yerusalem wá mó má dam byi rá matú, chyup tui ló rá nghú, Damaskuq myuq shut é é nghut lhé.

⁶ Nyigúng tú zó lé, ngó Damaskuq myuq shut sô chyáng ló nyi é hkún, maubó gi, ngá é lhinghkyuq má mauhkúng mai byodàn tung duqbo to bê nghut ri. ⁷ Haú mù, ngó myigúng má lèng gop tó le, wó gyó kat é danghté gi, 'Sholuq, Sholuq, nàng ngó lé haí mù zing-rí nyi lhé lú?' gá ri.

⁸ Ngó le, 'Yhumsing é, nàng ó nghut lhé lú?' nghu myí kat jáng, 'Ngó gi, nàng zing-rí wún é sù, Nazaret wá byú Yesuq nghut lhé.' ga lui, Yang tú tai kat ri. ⁹ Ngó eq rahá é ló é bang kúm gi, maubó lé myàng kólhang, ngó lé tai é danghté lé a sê gyo kó nghut ri.

¹⁰ Dum, ngó gi, 'Yhumsing é, ngó haí kut ra rá lú?' nghu myi jáng, haú Yhumsing gi, 'Toq mù, Damaskuq myuq má wang ló aq, nàng kut rá matú wò byí tó é hkyô pé lhunglhang, nang lé haú má lhom tai kyo berá nghut lhé.' ga ngó lé dum tai ri. ¹¹ Haú maubó é shingkáng é yanmai, ngó myoqjit byuq mù, ngá é byinzúm wui gi, Damaskuq myuq shut ngo lé loq mai she wang ló akó.

¹² Haú hkún, Anani gá é yuqgè rayuq ngá chyáng lé huí ri. Yang gi, jep é tará lé gyuq hkunggá é eq, haú má nyi é Yudaq byú

lunglhang bâng é hí má myoqdong gyai wó é sú nghut ri. ¹³ Yhang gi, ngá nâm má yap to luí, 'Gumang Sholuq é, náng myoq myàng aq hkoí!' ga tai ri. Háu hkún jáng yhang, yhang lé ngò wó myang kat bê nghut lhê.

¹⁴ Yhang dum xoq tai é gi, 'Nga-nhùng íchyi íwa pê é Garai Gasang gi, nang lé, Yhang ô nau é hkyô sé sháng gaq ga luí le; Dingmán Sù lé wó myàng luí, Yhâng é nhut má é mung-dang lé wó gyo sháng gaq ga luí le, hkyin to bê nghut ri. ¹⁵ Háu mù, nàng gi, nàng myang é eq wó gyo yu é hkyô pé lé, byù lunglhang bâng é hí má, Yhâng é matú saksé hkâm byi rá su dut rá nghut lhê. ¹⁶ Ahkuí, nung hái lé láng nyi ashí lúhú? Toq aq, Yhâng é myiàng lé lang luí wui-myhup hkâm yu é eq, náng é yubak mara pé lé chí sân pyám aq.' gâ ri.

¹⁷ Háu htàng, ngò gi, Yerusalem wá mó má dum taú jé ló mù, noqkuq yhùm má kyú ê dúng nyi le, moq byuq ló mù, ¹⁸ 'Nàng, ngá é hkyô lé saksé hkâm rá dang lé, yhang-moq a lhom hap yu kó rá nghut é yanmai, Yerusalem wá mó mai hân htoq ló aq.' ga Yhumsing ngo lé tai nyi é lé, myoqwup shing-rán đông myang ri.

¹⁹ Háu mù, ngò gi, 'Yhumsing ê, tarajong ralhùm htàng ralhùm má nang lé lumjing bang lé, htóng má chyup lhung pyám é eq, hkat bat lhung wún é hkyô lé, yhangmoq sé bum akô. ²⁰ Náng é saksé Stehpan sat hui luí suí shun u lé, ngò nâm má yhang yap to mù, háu hkyô lé myit bo hui luí, yhang lé sat pyám bâng é mebu lé zúng byi é nghut lhê.' nghú tú tai bê.

²¹ Háu hkún, Yhumsing gi, 'Ê aq, ngò, nang lé, wê gâng é tưngbaù pê chyáng nhang kat rá.' ga, ngò lé tai ri.' gâ ri.

Poluq, Romaq Mingdán Byù Nghut É Hkyô

²² Shiwa byu pé gi, dang haù hkun jé za gyo yù kômù, "Shí sù é byù gi, myigùng htoq má nyi a gíng, sat pyám keq." ga, htê mó éq garú bum akô.

²³ Yhangmoq gi, háu su garu uchyang, yhumshing buhíng lé hkyut dú pyám lhê, hpuilhup lé mauhkung shut kyaq táng lhê, kut nyi kôjáng, ²⁴ dap up zau hpó gi, Poluq lé gyewap má shuí háng yù nhàng mù, yhang lé shiwa byu pé háu mù shí su ga garú bum kô é hkyô lé wó sé shoq ga, nhuq bat nhàng luí, myí choq nhang ri. ²⁵ Nhuq bat rá matú shokuq tuí eq tuí kôjáng, Poluq gi, nâm má yap tô é shò up gyezau lé, "Romaq mingdán byù ru nghut sù lé nhing, lhang a jéyáng shimá, nungmoq nhuq bat le gi, tará wang akô lúhú?" ga tai ri.

²⁶ Rashò up gyezau gi, dang haù lé wó gyo jáng, dap up zau chyáng ló mù, "Nàng hái kut rá dá nyi lhê lúhú? Shí yuq gi, Romaq

mingdán byù sheq ru nghut ri." ga luí, yhang lé ló tai kyô ri.

²⁷ Háu mù, dap up zau gi, Poluq chyáng é mù, "Nàng gi, Romaq mingdán byù nghut lhê lúhú? Tai kyô wú laq." ga myí ri.

Poluq gi, "Ngò, Romaq mingdán byù nghut lhê." ga tú tai ri.

²⁸ Háu hkún, dap up zau hpó gi, "Ngò lhang ahpau myo myo byi pyám luí sheq, Romaq mingdán byù ru wó dut é nghut lhê." ga tú tai jáng, Poluq gi, "Ngò kúm gi, Romaq mingdán byù dut gú hku lé lo é sú nghut lhê." ga tai ri.

²⁹ Yhang lé myí choq wú rá gâ é bang gi, háu hkún jáng, yhâng chyáng mai hui zut ló bùm bekô. Gyedap up zau hpó le, Poluq gi, Romaq mingdán byù nghut é lé sé jáng, yhang lé tuí pyám bê nghut é yanmai, gyuq byuq bê nghut ri.

Yudaq Byin Tú Wapdoq Suwún Wuí Gam Hkoq Byuq É Hkyô

³⁰ Htang nyí, dap up zau hpó gi, Yudaq byu pé mai Poluq lé hun é mara hái nghut é hkyô lé hkyak wó sé shoq ga, Poluq lé tuí hpyi pyám byi mù, hkyangjong agyi pé eq Yudaq byin tú wapdoq suwún wuí lunglhang lé jì tsing to luí, yhangmoq é gung gung má Poluq lé shuí wàng mù, shap to bê nghut ri.

23

¹ Háu hkún, Poluq gi, Yudaq byin tú wapdoq suwún wuí lé wú tsuq to mù, "Ngá gumang wui é, ngò gi, hkú-nyí jé shoq Garai Gasâng é hí má sansêng é i-myit eq asak dui nyi bê nghut lhê." ga tai ri. ² Háu mù luí, hkyangjong mó Anani gi, Poluq nâm má yap to bang lé, yhâng nhut má bat byi keq gâ ri. ³ Háu hkún, Poluq gi, yhang lé, "But hpyu tô é xewâm* nàng ê, nàng lé sheq Garai Gasâng eq bat rá nghut lhê. Nàng gi, tará eq rajung za ngo lé jéyáng rá matú shí má zung to luí nhing, hái mù tará eq shut shai é đông ngo lé bat nhang lhê lúhú?" ga tai ri.

⁴ Poluq nâm má yap tô é bang gi, yhang lé, "Nàng gi, Garai Gasâng é hkyangjong mó lé wám rhoi lhê lúhú?" ga luí, chôm tai akô.

⁵ Poluq gi, "Gumang wui é, yhang gi, hkyangjong mó nghut é lé ngò a sé pyám mù nghut bê, Chyúmdang má le, 'Nàng amyú lé up é sù lé wó rhoi rá a nghut.'* ga le kâ tô é nghut lhê." ga tú tai ri.

⁶ Háu htàng, háu zing tô é bang má é ram gi, Saduke pé, góbang gi, Hparishe pé nghut é lé, Poluq gi, sé jáng, Yudaq byin tú wapdoq suwún wuí lé, "Gumang wui é, ngò gi, Hparishe awut ashín má é, Hparishe rayuq nghut lhê. Shí bê bang dum dui toq ló rá hkyô lé myit myoqbyù é yanmai, ngò jéyáng é hui nyi ri." ga luí, garú tai kat ri.

* 23:3 But hpyu tô é xewâm gâ é gi, gegùn labyoq kut bang lé gâ lhê. ✧ 23:5 Htoq Ló 22:28

7 Yhang haù su ga taí kat jáng, Hparishe pé eq Saduke pé gi, dang jet jet lhúm lò kômù, Yudaq byìn tú wapdoq hpong gi, gam hkoq lò byuq bekò nghut ri. ⁸ (Hkâsu mù gà le, Saduke pé gi, dum dui toq hkyô a joq; maumang lagyo pé le, sobyo pé le, a nyì ga taí bum akò. Hparishe pé kúm gi, haù pé joq lhê ga, lumjìng bang nghut akò.)

⁹ Haù mù luí, gyai yhang taí garù bum akò. Haù hkùn, Hparishe hpúng mã é tará sará pé ra-am gi, toq mù, "Shí yuq chyáng hai mara le, ngamoq a myàng nghut ri. Sobyô a nghut jáng, maumang lagyo rayuq yuq, yhang lé dang taí bê nghut jáng gi, hkâsu nghù kò rá lhú?" ga luí, zuq zuq taí htìng lhúm akò nghut ri. ¹⁰ Haù su kut gyai yhang taí htìng lhúm lò kôjáng, dap up zau hpó gi, Poluq lé láng myha pyám kó rá lé chié é yanmai, yhangmoq chyáng gyó é mù, Poluq lé haù bâng é gung gung mai é lú shuí lò luí, gyewap mã shuí wang lò rá matú, gyezô pé lé nhang kat ri.

¹¹ Haù myín, Yhumsìng gi, Poluq é nàm mã yap to luí, "Hkâgyuq, Yerusalem và mó mã nàng ngá é hkyô lé saksé hkám bê eq rajung za, Romaq myuq mã le saksé hkám ra shirà nghut lhê." ga, yhang lé taí ri.

Poluq Lé Sat Râ Haq Dâ É Hkyô

¹² Htàng napkyô, Yudaq byu pé gi, Poluq lé sat rá hpaqchyí chôm da kômù, yhang lé a wó sat sat gi, a zo a shuq rá nghut lhê ga, ó le ó dakam yu akò nghut ri. ¹³ Hpaqchyí shí le chôm dâ é bang gi, myi xê yuq chyân nghut bum akò. ¹⁴ Yhangmoq gi, hkyangjong agyi pé eq suwún wui chyáng é kômù, "Poluq lé a wó sat sat gi, ngamoq haí le a zo nghù, chôm dakam yu to bê nghut lhê. ¹⁵ Hau é yanmai, ahkuí nungmoq gi, Yudaq byìn tú wapdoq suwún wui eq rahá kut luí, Poluq é hkyô lé rago za myí gon wú rá nghu mhaù é dông, yhang lé nungmoq chyáng wut yù rá matú, dap up zaù chyáng dưng kat keq. Haù hkùn, ngamoq gi, hkyolat mã yhang lé lhom sat pyám rá ri ri kut to rá nghut lhê." ga taí akò.

¹⁶ Nghut kôlhang, haù lhom haq sat kó rá gà é hkyô lé, Poluq é yhàng nhammó é yhangzo yuqgè zo wó gyó yù luí, yhang gi, gyewap mã wang é mù, Poluq lé é taí kyô ri.

¹⁷ Haù hkùn, Poluq gi, shô up gyezau rayuq lé ji yù mù, "Zorâm shí lé dap up zaù chyáng shuí é aq, yhang, yhang lé shít kyo rá hkyô rajung joq lhê ga." ga taí ri. ¹⁸ Haù mù luí, shô up gyezau hpó gi, zorâm haù lé dap up zaù chyáng shuí é mù, "Zorâm shí nang lé shít kyo rá hkyô rajung joq lhê gà ri ga, yhang lé náng chyáng shuí lé rá matú, htông byù Poluq gi, ngo lé ji yù mù taí ri." ga, yhang lé taí ri.

¹⁹ Haù jáng, dap up zau hpó gi, jauwò mã zorâm haù lé yhàng loq mai she é mù, "Nàng ngo lé haí jung shít kyô nau ri lhú?" ga, yhang lé baù tsik za myí ri.

²⁰ Haù hkùn, zorâm haù gi, "Yudaq byu pé gi, Poluq lé rago za saí myí wú rá su kut mhaù mù, napmá, Yudaq byìn tú wapdoq mã shuí yù rá matú, náng chyáng dung kó rá ga, myit chôm huí to bekò nghut ri. ²¹ Haù mù luí, yhangmoq ô nau é dông hkâgyo byi, hkâsu mù gà le, Poluq lé a wó sat sat gi, haí le a zo a shuq rá nghut lhê ga, byù myi xê yuq chyân yhang, ó le ó dakam yù bekò nghut ri. Haù bang gi, yhang lé lhom chypu yù rá matú haq lhom to láng kó rá nghut lhê. Ahkuí lhang, yhangmoq gi, mù haù kut rá matú rì ri nghut bùm bekò; náng é ahkáng lé za láng nyi bum akò nghut ri." ga shít kyô ri.

²² Haù hkùn, dap up zau hpó gi, zorâm haù lé, "Nàng, ngo lé shí hkyô shít kyo bê hkyô lé, ó yuq lé le hkâtaí kyo." ga, sidiq byi mù, taù nhang kat bê nghut ri.

Mingzau Hpilik Chyáng Poluq Lé Dé Kat É Hkyô

²³ Hau htàng, yhang gi, shô up gyezau í yuq lé ji yù mù, "Hkù-myín sum hkyíng[†] mã Kesare và mó shut é rá matú, gyezô pé í shô, myang ji bang nyhit xê, lham chúng bang í shô kut mù, rì ri hen to keq. ²⁴ Hau htoq agó, Poluq lé mingzau Hpilik chyáng ngón za wó dé kat rá matú, yhang ji rá myang pé le lajang byi keq." ga, yhangnhik lé pying kat ri.

²⁵ Laiká hun kat é le:

²⁶ "Aróng wó dik é mauzau Hpilik é, ngo Klodi Lusi gi, nguóngón danglù shít kyô kat lhê.

²⁷ Shí yuq lé gi, Yudaq byu pé eq chyup yù mù sat pyám rá dá nyì bekò za nghut lhê. Nghut kôlhang, ngo gi, gyezô pé eq rahá é wú le, yhang Romaq mingdán byù nghut é lé wó sê yu é yanmai, yhangmoq chyáng mai yhang lé hkyi lo é nghut lhê.

²⁸ Haù su mù, haí mù yhang lé mara hún kó é hkyô lé sé nau é yanmai, yhangmoq é Yudaq byìn tú wapdoq mã yhang lé shuí je byí wú bê nghut lhê. ²⁹ Haù hkùn, yhangmoq é tará hkyô eq séng luí za mara hun bùm kô é lé ngo myang ri. Nghut kôlhang, shí gíng é eq htông lhang gíng é mara haí le a bò nghut ri. ³⁰ Shí yuq lé sat pyám rá hpaqchyí da kó é hkyô, ngo lé shít kyo kô é hkùn, radá dâm, yhang lé ngo náng chyáng dé nhang kat bê. Yhang lé mara hún nau é bang lé gi, nang hí mã yhang hun lhum keq nghù pying kat bê nghut lhê." gà ri.

³¹ Haù mù luí, gyezô pé gi, haù pying kat é dang eq rajung za, myín lé yhang, Antipatri

[†] 23:23 Myín sum hkyíng gi, nga-nhùng é myín gau hkyíng nghut lhê.

wà mó jé shoq Poluq lé dé kat bekô nghut ri. ³² Htang nyi, myang ji bang lé é châng dé nhâng kômù, yhangmoq gi, gyewap shut dum taù lò bekô nghut ri. ³³ Myang ji é gyezô pé gi, Kesare wà mó má jé kô é hkûn, mauzau hpô lé laiká byi mù, Poluq lé le jâng ap byi akô nghut ri. ³⁴ Haù hkûn, mauzau hpô gi, laiká haù lé ban nghap jáng, Poluq hká mau mà é byù nghut é hkyô lé myí wú luí, Kiliki mau mà é byù nghut é lé sé jáng, ³⁵ "Nang lé mara hùn bang jé jáng sheq, náng mù lé ngò gôn wú rá," ga taí ri. Hau htàng, yhang gi, Poluq lé Herut é hkohkâm-wàng má byam zúng byi keq ga hkunmó hkyô tô ri.

24

Poluq, Mara Hùn Hú É Hkyô

¹ Hau htàng, ngo nyi lai jáng, hkyangjong mó Anani gi, suwún wui ra-am eq tará sé sù Tertulu lé shuí gyó ló mù, mauzau hpô hí má Poluq lé mara lé tai hun bum akô. ² Haù hkûn, Poluq lé hí má ji hâng tô é nghut mù, Tertulu, yhang lé mara hùn dang tai hí é gi, "Aróng wó dik é Hpilik è, ngamoq gi, nyi-ngón yuqyo é hkyô lé nang é yanmai gyai myáng shoq wó hkam yu bum é nghut lhê. Nang sé up sé hkang é jeju lé, byù myú shí wó hkâm zô nyi é yanmai, ³ ngamoq gi, haù lé hkyô hkat hkangmó eq jowò hkangmó má jeju bún é myit eq hkam yu nyi bê nghut lhê. ⁴ Nghut kôlháng, ngò nang lé lhoq hkyik é dông a dut sháng gaq, tai rá dang ratot zo lé, myit hng hng to mù gyo byi laq nghú dúng tóngbán lhê ô!

⁵ Shí yuq gi, byù lé gunjang sù, mingkan gón mà é Yudaq byu pé lhunglhang lé shuí gabyong sù eq, haù Nazaret hpung mà é hkyô-u shé sù nghut é lé, ngamoq myang ri. ⁶ Hau htoq agó, yhang gi, noqkuq yhùm lé achag achyut kut rá dà nyi luí, yhang lé ngamoq chyup yù mù, (ngamoq é tará dông jéyáng rá hen nyi é hkûn, ⁷ dap up zau Lusi gi, lé lò mù, ngamoq é loq mai yhang lé lé lú shuí yù luí, yhang lé mara hùn bang lé, náng chyáng jé keq ga hkunmó hkyô tô é nghut lhê.) ⁸ Haù mù, náng, yhang lé myí wú jáng, ngamoq yhang lé hun é mara banshoq têng é hkyô lé, náng wó sé rá nghut lhê." gá ri.

⁹ Yudaq byu pé le, haù pé gi, têng lhê ga bo chòm tai akô nghut ri.

Poluq, Mara A Bò É Lé Tai Hung É Hkyô

¹⁰ Mingzau hpô gi, Poluq lé dang tai rá dông loq lik kat jáng, Poluq tai é gi, "Zau è, shí mau bâng é ahtoq má, náng zanwut myo myo jéyáng byi nyi é hkyô lé, ngò sé é yanmai, ngò gabú myit eq yhumsing matú, mara a bo é hkyô tai bá. ¹¹ Ngò, Yerusalem wà mó má noqkuq rá matú doq e é buinyi raxe í nyi lhang a chyân shí é gi, náng lui za wó sé rá nghut lhê. ¹² Noqkuq yhùm

má ngò ó yuq eq tai htng lhùm é lé lhang, tarajong, a nghut jáng, wà hkaù hká jowò má le byu pé lé shuí gabyông é lé lhang, ngo lé mara hun é bang gi, a myàng kó. ¹³ Ahkuí, ngo lé yhangmoq hun é mara pé lé, náng hí má yhangmoq saksé lhang a wó tún shít kó nghut ri. ¹⁴ Nghut kôlháng, náng hí má ngò yín yù rá hkyô rahkat gi, yhangmoq eq shut shai hkyô ga myhng tô é Hkyô lé châng lui, ngamoq é ichyí wáng pé é Garai Gasang lé noqkuq nyi lhê. Jep é tará eq myightoi laiká pé má ká tô é lhunglhang lé le lumjng lhê. ¹⁵ Ngò gi, dingmán é bang eq a dingmán bâng é dum dui toq lò rá hkyô jing é lé, yhangmoq eq rajung za Garai Gasang má myit myoqbyu nyi é sù nghut lhê. ¹⁶ Haù mù luí, Garai Gasang eq byu é hí má, ngò gi, rá é hkyô a bo é za, myit é hkyô san za wó dut nyi shoq, shikut nyi lhê.

¹⁷ Zanwut tsómra lai é htàng má, ngò gi, ngá é byù myú mà é myùng bang lé chyunghuq byi rá eq alu kat rá matú, Yerusalem wà mó shut ló jé bê nghut lhê. ¹⁸ Haù su kut nyi é hkûn, ngò eq rahá hai byù moq mó le a nyi, hai jung gabyông é hkyô le a htoq, ngò noqkuq yhùm má lhoq san lhoq yung yù bê hkyô lé za, yhangmoq myang akô. ¹⁹ Nghut kôlháng, Asia mau mà é Yudaq byù ra-am gi, haù má nyi tô é nghut lhê; yhangmoq mai ngo lé mara hùn rá hkyô joq kô é nghut le gi, shí wáng é hí má yhangmoq lé jé kó ra nghut lhê. ²⁰⁻²¹ Haù a nghut jáng, shí má nyi tô é bang gi, ngò Yudaq byin tú wapdoq hí má yap to mù, 'Shi byuq bâng é dum dui toq rá hkyo é yanmai, hkú-nyí nungmoq ngo lé jéyáng nyi akô.' nghú lui, garú é dang hkûn mai lai lui, ngò má gotú mara myàng shí kô é nghut le gi, yhangmoq yhang tai kyo kó sháng gaq." gá ri.

²² Hpilik gi, Hkyô haù lé rago sé lhê nghut mù, "Gyedap up zau Lusi jé jáng sheq, ngò, nungmoq é mù lé doqdan byi rá nghut lhê." ga lui, yhangmoq lé ahkying htot kat byi ri. ²³ Poluq lé le, zúng za zúng to mù, yhâng é buinùm ji-myi wui mai yhang ra chá é hkyô lajang byi naù kô é bang nyi le gi, ahkáng byi keq ga lui, shò up gyezau lé hkunmó hkyô kat ri.

²⁴ Buinyi rayoq zo lai é htàng má, Hpilik gi, Yudaq myiwe myhí nghut é sù yhangmyi Drusila eq jé lé mù, Poluq lé ji lò nhâng lui, yhang, Hkrisduq Yesuq lé lumjng hkyô tai kyô é le gyô yu ri. ²⁵ Poluq gi, dingmán hkyô, yhumsing gung lé hkang é hkyô eq, jé lò rá tará dara hkyô lé mhoqshit jáng, Hpilik gi, gyô gyuq mù, "Nàng ahkuí wó lò bê, ngò jin jáng sheq nang lé dum ji yù rá nghut lhê." ga tai ri. ²⁶ Hpilik kúm gi, Poluq eq ngùn haq byi rá lé myit myoqbyu mù, yhang lé anum num ji yù lui, yhang eq nyo lhum lhum kut ri.

²⁷ Zanwut í zân lai jáng, Hpilik é mauzau ayá má Porku Hpestu lé htaí kat pyâm akô. Nghut kôlhang, Hpilik gi, Yudaq byu pê é hí má myoqdong wó nau é yanmai, Poluq lé htóng má jâng lhùng pyâm to bê nghut ri.

25

Poluq, Kehtaq Chyáng Jé Râ Matú Dúng Ē Hkyô

¹ Hpestu gi, haú mau má jé é sum nyí lai jáng, Kesare wà mó mai Yerusalem wà mó shut doq ló ri. ² Haú hkûn, hkyangjong agyi pé eq Yudaq byu hkyô-u shê bang gi, yhang lé Poluq é hkyô lé hkyang lhom shit kômù, ³ yhangmoq gi, Poluq lé hkyolat má lhom haq sat pyám rà dâ to kômù luí, jeju ralhüm kut byí é dông Poluq lé Yerusalem wà mó shut dé kat byí rà matú, Hpestu lé lhom dúng akô. ⁴ Nghut kôlhang, Hpestu gi, "Poluq lé Kesare wà mó má sheq ru lhùng tô lhê, hkâ-myháng a myáng má, ngò yhang le haú má dum taú ló rá nghut lhê. ⁵ Haú mù, nungmoq má é hkyô-u shê bang ra-am, ngò eq rahá gyó ló mù, haú yuq kat shut é hkyô bo é nghut jáng gi, yhang lé mara lé hün kó sháng gaq." ga tú tai ri.

⁶ Hau htâng, yhang gi, shit nyí, raxê nyí kô yhangmoq chyáng nyí yù luí, Kesare wà mó má taú ló mù, htang nyí gi, tarâ tanghkuq má zùng luí, Poluq lé yhâng hí má shuí wang ló rá matú hkunmó hkyô kat ri. ⁷ Poluq jé jáng, Yerusalem wà mó mai gyó lo é Yudaq byu pé gi, yhâng é lhinghkyuq má yap to kôluí, saksé a wó tün shit é mara mó myo myo lé, yhâng é ahtoq má chôm tai hun akô nghut ri.

⁸ Haú hkûn, Poluq gi, "Yudaq byu pê é jep é tarâ eq shai é dông le, noqkuq yhüm lé shut é dông le, Kehtaq* lé shut é dông le, ngò a kut wú." ga luí, mara a bo é hkyô tai ri.

⁹ Nghut kôlhang, Hpestu gi, Yudaq byu pé é hí má myoqdong wó nau mù, Poluq lé, "Nàng, Yerusalem wà mó má doq ló luí, shí hkyô pé lé ngò haú má doqdan byi rà matú, nàng dóng lhê thú?" ga myí ri.

¹⁰ Poluq kúm gi, "Ngò gi, doqdan hui rá nghut jáng, shí doqdan é jowó, Kehtaq é tarâ hpyit wap má ahkuí yap to bê nghut lhê. Nàng sê é eq rajung za, ngò gi, Yudaq byu pé lé haí lhang a shut wú sù nghut lhê.

¹¹ Laqma mù, shí gíng é mara lé, ngò kut shut pyâm é nghut le gi, shí hkám rá hkyô lé ngò a he pyám; nghut kôlhang, shí Yudaq byu pé mai ngo lé mara hun é hkyô a teng é nghut jáng gi, ó yuq lhang ngo lé yhangmoq é loq má ap byí rà ahkáng wó rá a nghut, ngò gi, Kehtaq chyáng wang tai rá nghut lhê." ga tú tai ri.

¹² Haú hkûn, Hpestu gi, yhâng é byin tú wap bang eq ban hpyé lhum jáng, "Nàng Kehtaq chyáng wang tai rá ga bê nghut lhê,

Kehtaq chyáng wang ló aq hkoí!" ga tai kat ri.

Poluq Lé, Hkohkâm Agripa Hí Má Shuí Hâng Yu Ē Hkyô

¹³ Hau htâng, buinyi hkâ-myháng a myáng má, Hkohkâm Agripa eq yhanggu myiwe zo Bernike gi, Kesare wà mó má jé lé mù, Hpestu lé lé huí nyo akô nghut ri. ¹⁴ Haú mù, yhangnhik tâng gi, buinyi tsómra myáng nyi nyi é htâng má sheq, Hpestu gi, haú Poluq é hkyô lé hkohkâm wa eq tai kyô lhùm é gi, "Hpilik, lhùng to lóng é htóng byu rayuq nyi ri. ¹⁵ Ngò Yerusalem wà mó má nyi tô é hkûn, hkyangjong agyi pé eq Yudaq byu pê é suwún wui gi, haú yuq é hkyô lé tai kyo kôluí, haú yuq lé mara byi rá matú ngo lé chôm dúng akô.

¹⁶ Haú hkûn, ngò gi, mara hun é hui sù, mara hun é bang eq chyung chyog yoq kut luí, yhangmoq hun é mara lé yhumsing matú mara a bo é hkyô a wó tai shi lé, ó yuq lé ap byi pyám rá le, Romaq htung a joq ngü luí yhangmoq lé tai kyo bê nghut lhê.

¹⁷ Yhangmoq ngá htâng châng gyó lô kô é hkûn, ngò gi, a nô yu é za, htang nyí jáng tarâ tanghkuq má zùng luí, haú yuq lé shuí wang ló rá matú hkunmó hkyô kat é. ¹⁸ Haú hkûn, haú yuq lé yhangmoq mara chôm hun büm kôle, ngò myit ngàm tô é su mara ralhüm le a hun htoq lô kô nghut ri. ¹⁹ Yhangmoq é noqkuq htung hkyô eq, haú dui nyi ri ga Poluq eq tai é, shí byuq bê Yesuq é hkyô lé za dang jet jet lhùm bum akô. ²⁰ Haú mù, ngò gi, haú hkyô lé hká dông gon yù rá le a sé lô é yanmai, haú hkyô lé Yerusalem wà mó má doqdan é lô hkam yù rá matú, yhang dóng a dóng é hkyô lé myí wú le, ²¹ Poluq yhang sheq, Hkoséng mó chyáng jé rá ga tai é yanmai, Kehtaq chyáng a dé kat shi é u lé, yhang lé zùng nyí shirá matú, ngò hkunmó hkyô kat é nghut lhê." ga ri.

²² Haú hkûn, Agripa gi, "Ngò le haú yuq é dang gyó wú nau ri." ga, Hpestu lé tai jáng, yhang gi, "Napma, nàng wó myang gyo rá nghut lhê." ga tú tai ri.

²³ Htâng nyí, Agripa eq Bernike nhiktâng gi, shing kang bò bò za lé lô mù, dap up zau wui eq wá má é agyi suwún wui eq rahá, rùng gok mó má wang zung tô büm kô é hkûn, Hpestu hkunmó hkyô kat jáng, Poluq lé shuí hâng tô akô. ²⁴ Haú hkûn, Hpestu tai é gi, "Hkohkâm Agripa eq ahkuí shí má zup zing tô é lhunglhang bang é, Yerusalem wà mó eq shí wá má é Yudaq byu pé banshoq bang, ngá chyáng lé tai kôluí, shí yuq lé asak a wó dui nhang to lo ga garú büm é gi, ahkuí nungmoq myang é shí yuq yhang nghut bê.

²⁵ Nghut kôlhang, shí yuq zui sai é má shí gíng é mara haí lé lhang ngò a myàng nghut ri. Yhang gi, Hkoséng chyáng wäng rá ga

* 25:8 Kehtaq gá é gi, "hkoséng" gá é nghut lhê.

taí é yanmai, yhang lé Romaq myuq shut dé kat rá matú ngò myit hpyit to bê. ²⁶ Dé kat bá ngù jáng le, ngá é yhumsing Hkosêng chyáng yhang é hkyô jikhkúm nuqguq kâ hun kat rá hái le a bò nghut ri. Haú mù luí, yhang lé ban myí gôn wù jáng sheq, ká rá hkyô rajung jung hkhálang ngò myàng abe ngù, nungmoq banshoq bâng é hí má le, je riyhang nàng Hkohkâm Agripa é hí má le, yhang lé ngò lhoq htoq shit é nghut lhê. ²⁷ Hkâsu mù gâ le, htóng byú rayuq yuq lé dé kat é hkûn, yhang lé hun é mara a wó tún shit lé gi, a htuk ngù luí, ngò myit lhê." gâ ri.

26

Poluq É Hí Hpyang Lhê É Nyi Yap Hkyô

¹ Haú hkûn, Agripa gi, Poluq lé, "Nàng, náng matú dang tai rá ahkáng wó bê." ga tai ri.

Haú mù luí, Poluq loq tú kat mù mara a bo é hkyô tai é gi, ²⁻³ "Hkohkâm Agripa é, nàng gi, Yudaq byu pé é htungkhing banshoq eq tai htung lhùm é hkyô hkat hkangmó lé, gyai sê to sù nghut é yanmai, Yudaq byu pé ngò lé hun é mara hkat hkangmó lé, ngò hkû-nyí náng é hí má mara a bò é hkyô myang tai é gi, ngá matú gabú hpo yhang nghut ri ngù myit yu nyi lhê; haú mù luí, ngá dang lé myit hing é eq gyô yù byi laq ngù, dúng tóngbán kat lhê.

⁴ Ngò gi, zoshàng hkûn mai, ngá amyú má le, Yerusalem wá mó má le, hkâsu kut nyi kô lo é hkyô lé, Yudaq byu pé lhunglhang bang gi, sé gù nghut akô. ⁵ Yhangmoq gi, ngo lé hí hkûn mai sé kô é yanmai, ngò, ngamoq é noqkuq htung má é tarâ htan dik é hpung má bo é Hparishe rayuq nghut é hkyô lé, saksé hkâm naú kô é nghut jáng, yhangmoq wó hkâm lhê. ⁶ Nghut kôlhang, doqdân é huí zo rá matú, ahkuí ngò shí má yap tô é gi, Garai Gasang eq ngamoq é ichyí íwa pé lé byí tô é danggidiq lé myit myoqbyú nyi é yanmai nghut lhê. ⁷ Ngamoq é byú myú raxe í hú gi, danggidiq jeju haú lé wó hkam yù shoq ga, Garai Gasang lé nyí myin noqkuq dojaú shikut nyi bum akô; Hkohkâm wa é, myit myoqbyú hkyô hau é yanmai, ngo lé Yudaq byu pé mara hun bum akô nghut ri. ⁸ Garai Gasang gi, shí bê bang lé dum lhoq túi lhê gâ é hkyô lé, a wó lùm ngù, hái mù myit yu akô lhú?

⁹ Ngò le, Nazaret wá byú Yesuq é mying eq shai lhùm é đông myo myo wó kut rá nghut lhê ngù, gè gè yhang myit yu wú bê nghut lhê. ¹⁰ Gè gè haú đông le Yerusalem wá mó má kut wú bê nghut lhê; hkyangjong agyi pé chyáng má é ahkáng wó yú luí, ngò gi, sân-yúng bang myo myo lé htóng má kat pyám é eq, yhangmoq sat huí kôjáng le, ngò myit bo huí wú bê nghut lhê. ¹¹ Ngò gi, tarajong banshoq má a lhang lhang yhangmoq lé dam

byi luí, Yesuq lé rhoi dang tai kó shoq shikut wú bê nghut lhê; nhik mó góng yú luí, gó mau má é wá pé lhang jé shoq, yhangmoq lé châng zing-rí wú bê nghut lhê.

Poluq Hpung Byú Dut Lo É Hkyô

¹² Haú hkûn, radâm lé, ngò gi, hkyangjong agyi pé chyáng mai ahko ahkáng eq hkunmó lé yu chùng mù, Damaskuq myuq shut e ló nyi le, ¹³ Hkohkâm wa é, nyigùng tu ló zó lé, búi htoq má je duq é maubó gi, haú hkyô má, ngò eq ngá é luzúm wui é lhinghkyuq má, mauhkung mai duq bó htoq ló é lé myang ri. ¹⁴ Haú hkûn, ngamoq banshoq bang myigùng má lêng gop tô bum le, Hebre mying đông, 'Sholuq, Sholuq, nàng, ngo lé hái mù zing-rí nyi lhê lhú? Zuchún lé pik le gi, náng é matú gyai yhang wú lhê.' ga luí, ngo lé tai é danghté lé ngò wó gyô kat ri.

¹⁵ Haú mù, ngò gi, 'Yhumsing ê, nàng gi, ó yuq nghut lhê lhú?' ngù luí, myi jáng, haú Yhumsing tú tai é gi, 'Nàng zing-rí nyi é Yesuq nghut lhê. ¹⁶ Ahkuí toq yap aq, hkâsu mù gâ le, ahkuí, nàng, ngo lé myàng bê hkyô eq, ngò, nang lé tún shit shirâ nghut é hkyô pé é matú, ngá é mù wù rá byu eq saksé dut nhâng rá đông nang lé hkyin to rá ngù, ngò náng chyáng lé htoq shit é nghut lhê. ¹⁷ Náng é amyú pé é loq mai le, tưngbaù pé é loq mai le, ngò, nang lé hkyi yù nyi rá nghut lhê. ¹⁸ Yhangmoq, yubak hkyut pyám byí é jeju wó yù rá eq, ngo lé lumjing é yanmai, lhoq sân-yúng huí é bang eq rahá silí wunlí wó hkam yù kó sháng gaq ngù, yhangmoq é myoq lhoq hpóng byi mù, mauchut hkaú mai maubó shut, Tsadân é a-tsam hkaú mai Garai Gasang shut yhangmoq lhang ló rá matú, ngò, náng lé yhangmoq chyáng nhang kat rá nghut lhê.' gâ ri.

Poluq Kut É Muzô Hkyô

¹⁹ Haú mù luí, hkhokâm Agripa é, ngò gi, mauhkung má é myoqwup shing-rán haú lé a gyô é a wó é nyí nghut lhê. ²⁰ Ngò gi, yhangmoq myit lhang luí, Garai Gasang shut lhang taù lò mù, myit lhang bê hkyô lé, hkyí zó loq zó đông mai tún shit kó sháng gaq ngù, sân-hi má Damaskuq myuq má nyi é bâng chyáng mai hí luí, Yerusalem wá mó má é bâng chyáng má le, Yuda mau gón má é bâng chyáng má le, tưngbaù pé chyáng má le, hkô kyo bê nghut lhê. ²¹ Hau é yanmai, Yudaq byu pé gi, ngo lé noqkuq yhum má chyup yú luí, sat pyám rá da kô é nghut lhê. ²² Nghut kôlhang, ngò gi, hkû-nyí jé shoq Garai Gasang eq garúm é lé wó yú luí, ahkuí shí má yap to mù, tiq ko banshoq bang lé saksé wó hkâm kyô é nghut lhê. ²³ Ngò tai é má, Hkrisduq gi, hpuzo luí, shí bê bang mai sân-hi dui toq lò mù, Yhang é amyú eq tưngbaù amyú pé lé maubó é hkyô lé wó tai kyo rá nghut lhê ga luí, dut lò rá hkyô lé,

myiqhtoí pé eq Mosheq taí tò é hkyô mai lai luí, ngò gotú haí le a taí é nghut lhê." gâ ri.

²⁴ Yhang haú su ga mara a bo é hkyô taí é lé, Hpestu gi, "Poluq ê, nang na bê! Lúm mhoq myô yu é yanmai na bê nghut ri." ga lau, htê mó eq dang lai taí hpyit kat ri.

²⁵ Poluq kúm gi, "Aróng wó dik é Hpestu ê, ngò gi, nâ é a nghut, ngò taí é dang gi, tengmán é dang eq dang gyíng nghut lhê.

²⁶ Shí hkyô lé hkohkâm wa yhang le sê to gù nghut lhê mù, yhâng é hí má ngò a gyuq a kyum taí é nghut lhê. Hkâsu mù gâ le, shí hkyô gi, nungwò má kut é a nghut é yanmai, hkohkâm wa yhang a bo sê é gi, haí le a joq ra nghut lhê nghú, ngò myit lum nyi lhê.

²⁷ Hkohkâm Agripa é, nang gi, myiqhtoí pé é dang lé lumjíng lhê lúhú? Nang lumjíng é hkyô lé ngò sê lhê." ga tù taí ri.

²⁸ Haú hkún, Agripa gi, Poluq lé, "Razup za má, nang, ngo lé Hkristan rayuq wó dut nhâng nhò ngam ri lúhú?" ga tai ri.

²⁹ Dum Poluq gi, "Razup za má nghut nghut, myáng myáng má nghut nghut, shí shamtoq-tui pé mai lai luí, nang za a nghut, hkú-nyí ngò taí é dang lé gyô nyi é lhunglhang bang, ngò su dut rà matú, ngò gi, Garai Gasang lé kyúdung nyi lhê." ga tù taí ri.

³⁰ Haú hkún, hkohkâm wa gi, ginwáng zau hpó eq Bernike le mù, haú má zùng tò é bang eq rahá toq yap ri. ³¹ Yhangmoq htoq lò kò é hkún, "Shí yuq gi, sat gíng é mara eq htóng lhúng gíng é mara haí le a kut shut nghut ri." ga, rayuq eq rayuq taí lhum bum akò nghut ri.

³² Agripa gi, Hpestu lé, "Shí yuq gi, yhang mai Kehta q chyáng jé rà ga a taí tò é nghut le gi, yhang lé wó nhang pyám berá nghut lhê." ga tai ri.

27

Poluq, Romaq Myuq Shut Wui-sanghpo Mai ELó É Hkyô

¹ Ahkuí, ngamoq lé Itali ming shut wui-sanghpo mai gù dap lò nhâng rà matú myit hpyit to kólú, yhangmoq gi, Poluq eq htong-byú góbang ra-am lé, Augustuq Hkosêng é gyewap mó mâ é, Yuliu gâ é shò up gyezaú é loq má ap byí kat akò. ² Haú hkún, Asia mau mâ é wuimau gin-gau cháng luí wà pé má wang jón lò é, Adramuti myuq mai toq é wui-sanghpo má ngamoq wang jí bê nghut lhê. Htesaloni wà mó mâ é Aristakuq gâ é Makedoni byú rayuq le ngamoq eq rahá nghut lhê.

³ Htang nyí, ngamoq gi, Sidun myuq má no bê nghut lhê. Yuliu gi, Poluq lé shogyo mù, yhâng chyáng rà é hkyô lé yhâng é buinùm wui mai lhom lajang byi kó sháng

gaq ga, yhangmoq eq é hui rà matú ahkáng byí kat ri. ⁴ Haú mai dum toq lò é hkún, lai tau mut é yanmai, Kupru zínlóng lé lai hkaú uchyang jí lai lò mù, ⁵ Kiliki eq Pamhpuli mau má é wuimau đông lai byit lò le, Laiki mau má é Mura myuq má jé bê nghut lhê.

⁶ Haú má, shò up gyezau hpó gi, Itali ming shut dap e lò é, Alesandru myuq má é wui-sanghpo lé myang hkyup luí, ngamoq lé haú má jí nhâng bê nghut ri. ⁷ Haú mai buinyi myo myo yó hó hó lé za jí e lò luí, awui ahke yhang Kidu wà mó eq ang má wó jé lò jáng, lai tau mut é yanmai, hí shut a wó lai lò lò mù, ngamoq gi, lai lé cháng luí, Kreti zínlóng lé lai hkaú mù, Salamone kongzô é tù tap áng é mai lai lò é nghut lhê. ⁸ Haú má é wuiyám mai awui ahke jí lò lé, Lasea wà eq a wê lhum é Yuygo é Guhkan gâ é jowò má jé ri.

⁹ Ahkuí, buinyi tsómra lhoq lhai pyám luí, haú Zoshuq gám poí lai bê nghut é yanmai, wui-sanghpo mai sô wún le gi, gyuq chíq rà nám jé bê nghut ri. Haú mù, yhangmoq lé Poluq taí pun taí kyíng é gi, ¹⁰ "Áhkaú pé é, shí dâm lhê é wui hkyô gi, wuihke mó hui luí, wui-sanghpo eq zè pé sùm pyám rà htoq agó, nga-nhúng é asak lhang sum rà dut é hkyô lé, ngò byu myang ri." gâ ri. ¹¹ Nghut kólhang, shò up gyezau hpó gi, Poluq é dang lé gyo rà malaí, wui-sanghpo hkáng sù eq wui-sanghpo yhumsing é dang lé, je lum ri. ¹² Guhkan haú gi, gyoqmyò* wó lhoq lhai rà su a dut é yanmai, myo hpyang gi, Hponik guhkan má wó jé le jé mù, haú má gyoqmyò lò nyi lhai rà matú chòm myit hui akò. Guhkan haú gi, Kreti zínlóng má maupyí buiwàng hkyam eq mautsúng buiwàng hkyam shut hu tò é jowò nghut ri.

Wuimau Má, Laidun Mó Htúng Huí É Hkyô

¹³ Maupyí shut má é lai hó le hik lò jáng, yhangmoq myit tò é má hkyak nghut bê su ngam pyám kólú, shamtoq goknghe lé lhoq toq yú kómú, Kreti zínlóng yám đông jí e lò bê nghut lhê. ¹⁴ Nghut kólhang, hká-myháng a myáng má, Buihtoq mautsúng lai gâ é laidun mó gi, haú zínlóng mai mut lò luí, ¹⁵ wui-sanghpo lé lo mut htúng é yanmai, hí shut a wó lò lo jáng, ngamoq gi, lai mut lò é shut cháng yóng lò bê nghut lhê. ¹⁶ Ngamoq gi, Koda gâ é zínlóng zo lé lai hkaú uchyang yóng lò nyi é hkún, haú sakhkyílhai lé gyaí shikut é eq wó llang yú luí, ¹⁷ wui-sanghpo ahtoq má llang toq to bê. Wui-sanghpo lé gi, a byoq lo shoq tuí èq tuí kíng to bê nghut lhê. Dum, yhangmoq gi, Surti gâ é semui bùm má lò kê gyâm to rà lé chíq kò é yanmai, wui-sanghpo má é panlong pé lé lhoq nyhum hkyô yú mù, cháng yóng lò bekò nghut ri.

* **27:12** Gyoqmyò lé, haú mau má laidun mó lò lò dut mù, yóng wún le gyuq chíq nám nghut lhê.

¹⁸ Laidun mó lûm htan é yanmai, htang nyi yhangmoq gi, hpugá zê pé lé hkyom dú hkyó pyám bekò nghut ri. ¹⁹ Sum nyi nghu é nyi má, yhangmoq gi, wui-sanghpo zê pé lé yhumsing é loq èq yhang hkyó pyám bekò. ²⁰ Buinyi myáng myáng, bui lé le, kyí pé lé le a myáng é eq, laidun mó za ru mut nyi é yanmai, wó lut rà nghú myit myoqbyu tô é hkyó lé, ngamoq tô pyám bê nghut lhê.

²¹ Yhangmoq zoshuq a zô é, buinyi tsómra myáng lô bê nghut mù luí, Poluq gi, yhangmoq é gung gung má yap to mù, "Áhkaú pé é, nungmoq ngá é dang gyo luí, Kreti zinlóng mai a htoq lô é nghut le gi, shí su htên byoq é marop hui zo rà a nghut. ²² Ahkuí nghut kôlháng, ngò tai é dang lé gyo yù mù myit wum yù keq; nungmoq má é hká yuq lé asak sum rà a nghut, wui-sanghpo za sheq htên byoq byuq rà nghut lhê. ²³ Hkásu mù gâ le, ngo lé sing é, ngò dojaú nyi é Garai Gasâng é maumang lagyo rayuq, amàn ngá é nàm má lé yap to mù, ngo lé tai é gi, ²⁴ "Poluq é, hkâgyuq, Kehtaq é hí má nàng wó yap rà nghut lhê. Wui-sanghpo shí má nàng eq rahá jí tô é lhunglháng bâng é asak lé, Garai Gasang gi, nàng é yanmai, lai lai byi rà nghut lhê." gá ri. ²⁵ Hau é yanmai, áhkaú pé é, myit wum yù keq, ngo lé tai kyó é eq rajung za dut lò rà nghut lhê nghú luí, Garai Gasang lé ngò lumjng nyi lhê. ²⁶ Nghut kôlháng, nga-nhúng gi, zinlóng ralhú lhum má lô htúng chyap to rà nghut lhê." ga luí, yhangmoq lé i-myit tai tng ri.

²⁷ Buinyi raxe myi nyi myín má, gunggám yoq lé, ngamoq gi, Adria wuimau má yòng lhung wún é hkún, sanghpo hkàng bang gi, dùng yàm eq chyâng lo nyi é su gâ é lé sê gyo kat akò. ²⁸ Háu su mù, wui ník é lé kê wú lé, loqlam í xê kò ník é lé wó sê akò. Razup zo má dum kê wú le, loqlam raxe ngò kò za ník é lé myàng akò nghut ri. ²⁹ Háu mù luí, luqmó má lô záng htung rà lé chiq kômù, yhangmoq gi, wui-sanghpo htâng shut má é shamtoq goknghe myi lhum lé lhoq hkyó kat luí, mau hân bó sháng gaq ga kyúdüng nyi bum akò nghut ri. ³⁰ Wui-sanghpo hkàng bang gi, wui-sanghpo lé tô pyám to-lú hpàng rà dà é myit eq, wui sanghpo-u shut má é shamtoq goknghe pé lé lhoq hkyó rà su kut mhaú luí, sakhkyilhai lé wui má lhoq hkyó nyi bum akò. ³¹ Háu mù, Poluq gi, shô up gyezau eq gyezô pé lé, "Shí bang wui-sanghpo má a nyi le gi, nungmoq wó lut rà a nghut." ga tai ri. ³² Háu hkún, gyezô pé gi, sakhkyilhai lé tui tô é tui lé zân hpyit kat kólú, sakhkyilhai gi, byit gyó byuq bê nghut ri.

³³ Maubó lô jáng, Poluq gi, yhangmoq banshoq bang lé zang zo rà matú myit wum byi é gi, "Nungmoq gi, myit chiq luí, zoshuq hai le a zô é, hkú-nyí raxe myi nyi myáng

lô bê. ³⁴ Háu mù luí, zoshuq rajung jung zo keq! Háu gi, nungmoq wó lut rà matú nghut lhê. Nungmoq chyâng má é ó yuq é xám rahkat lháng byuq rà a nghut." gá ri. ³⁵ Háu su ga ban tai é eq, yhang gi, muk lé yù luí, yhangmoq banshoq bâng é hí má Garai Gasâng jeju lé hkya-on mù, muk lé hpé luí, zô hí bê nghut ri. ³⁶ Háu hkún sheq, banshoq bang gi, myit wum wó yù kômù, zoshuq zô bum bekò nghut ri. ³⁷ Wui-sanghpo háu má é byù lhunglháng gi, í sho nyhit xe hkyuq yuq nghut lhê. ³⁸ Yuq hkangmó hàn zô gyí é htâng má, wui-sanghpo sóm rà matú, sunsgò pé lé wui má dú kat pyám akò nghut ri.

Wui-Sanghpo Htên Gyop Byuq É Hkyó

³⁹ Myoq san za myàng jáng, yhangmoq gi, jowò háu lé a sé kôlháng, semui-jàng chyún ralhú lé byu myàng kólú, wó dut é nghut jáng, háu má sanghpo lé kôn gyam rà matú chóm doqdán yu akò nghut ri. ⁴⁰ Háu mù, yhangmoq gi, shamtoq goknghe pé lé wuimau má hkyut hkyó pyám tô akò. Lhaishap tui lé le hkyut yù luí, wui-sanghpo ulhum má é panlong lé lhoq toq yù mù, lai hkyó cháng luí wuiyàm shut mut lò bê nghut ri. ⁴¹ Nghut kôlháng, semui lò bum tô é jowò ralhú má, wui-sanghpo lô htúng chyap byuq luí, sanghpo u gi, a wó dú lò mù, sanghpo htâng lé gi, wuillheng èq lò bat hkyop myha pyám bê nghut ri.

⁴² Háu hkún, gyezô pé gi, htongbyú pé wuili lí hpang byuq kó rà lé gyuq kó é yanmai, yhangmoq lé sat pyám rà chóm dá akò. ⁴³ Nghut kôlháng, shô up gyezau hpó gi, Poluq lé hkyi yù nàu luí, yhangmoq dá é hkyó lé hkún pyám mù, wuili dat li bang gi, wui má byam gyó luí wuiyàm shut hí li dap lò kó sháng ga luí le, ⁴⁴ góbang gi, siklong eq wui-sanghpo má é gotú zê pé má zui mù, gu dap lò sháng ga le, hkunmó hkyó kat ri. Háu dòng mai lhunglháng bang gi, wuiyàm shut rago wó jé dap lò bekò nghut ri.

28

Malata Zinlóng Má Jé Nyi Tô É U Lhê Hkyó

¹ Ngamoq wó lut dap lò jáng sheq, zinlóng háu gi, Malata gâ é lé sê ri. ² Zinlóng byu pé gi, ngamoq lé shogyo myit gyai lhom tün shit akò. Mau ru jáng wo nyi luí gyoq é yanmai, yhangmoq gi, myi mut byi mù, ngamoq banshoq bang lé hkúlum yu akò. ³ Háu hkún, Poluq gi, htang rawaq guq tsing yù mù, myihkyóm má kat kat é hkún, myi soq htan lò jáng, duq htân lhangmui radu gi, htoq lò mù, yhâng é loq má htê zing tô ri. ⁴ Zinlóng byu pé gi, Poluq é loq má lhangmui háu htê lhâng tô é lé myàng kôjáng, "Shí yuq gi, gè gè yhang byù sat é sù teng rà dut ri; wui mai wó lut lò kôlháng, yhang asak dui nyi rà matú, Tengmán tará gi, a

dóng lo nhung!" ga luí, rayuq eq rayuq tái lhum bum akò nghut ri. ⁵ Poluq kúm gi, lhangmui haù lé myihkyóm má ko hkyô kat luí, haì le a dut é za nyi tô ri. ⁶ Yhangmoq gi, yhanggung wâm lò berâ, haù a nghut jáng, byodân ratung shi hkyaq lêng lò berâ, ga myit láng nyi bum akò. Nghut kôlhang, myáng myáng láng wú nyi bum le, yhang má haì le a dut lo é lé myàng kôjáng, yhangmoq é i-myt dum htaì pyám kôluí, shí yuq gi, hparà rayuq sheq nghut ri ga dum tái bum akò nghut ri.

⁷ Hau é nàm má, zínlong agyì hpó Popli sing é maumyí pé joq tô ri. Haù yuq gi, ngamoq lé lhom te yù mù, yhang yhùm má sum nyi yhang lalúm la-nye lhom hkúlum yu ri. ⁸ Haù u lé, Popli é yhangwa gi, ài nyé no nyi é eq wuiwam shun leq tô ri. Poluq gi, haù yuq chyáng wàng mù, kyúdung byi luí, yhang é ahtoq má loq ke byi mù, yhang lé lhoq gê byi ri. ⁹ Haù su dut é yanmai, zínlong má é nô byù gôbang banshoq le, lé luí lhoq gê byi é hui bekô nghut ri. ¹⁰ Yhangmoq gi, ngamoq lé a hkyô hkyô dòng hkungga kôluí, ngamoq wui-sanghpo ji mù, dum toq lò rá hkùn, ngamoq rá é gú lé cháng byi kat akò nghut ri.

Romaq Myuq Má, Poluq Jé É Hkyô

¹¹ Lhamó sum hkyap lai jáng, Alesandru myuq má é, "Hparà zozùm nhiktàng" gâ é alhò dap é wui-sanghpo má, ngamoq wang ji htoq lò bê nghut lhê. Wui-sanghpo haù gi, gyoqmyò lé zínlong haù má joq lai é nghut ri. ¹² Surakusa wà mó má jé jáng, haù má ngamoq sum nyi nô yu é nghut lhê. ¹³ Haù mai ji xoq lhing lò le, ngamoq gi, Regi wà mó má jé ri. Htang nyi gi, maupyi lai hik lò mù luí, í nyi nyi má nghut jáng, Potioli wà mó má jé lò bê nghut lhê. ¹⁴ Haù má é gumang wui ra-am eq hui luí, ngamoq lé nyhit nyi no rá matú lùng kômù, ngamoq gi, nô yù bê; hau htàng, Romaq myuq má jé lò bê nghut lhê. ¹⁵ Haù má é gumang wui gi, ngamoq jé lo nyi é hkyô lé wó gyo kôjáng, te yù rá ga, Api Gai gâ é wà eq Bing Yhùm Sùm Lhum gâ é wà jé shoq lé akò. Poluq gi, haù bang lé lhom myàng jáng, Garai Gasang lé hkya-on kungtôn mù, myit wum wó yù bê nghut ri. ¹⁶ Ngamoq, Romaq myuq má jé wàng lò é hkùn, Poluq gi, yhang lé zúng rá gyezo rayuq eq gotù san nyi rá matú, ahkáng wó ri.

Poluq, Romaq Myuq Má, Mungdang Hko Kyô É Hkyô

¹⁷ Buinyi sum nyi lai é htàng má, Poluq gi, haù má é Yudaq suwún wui lé ji yu ri. Yhangmoq jé lé bùm kôjáng, yhang gi, "Gumang wui ê, ngò gi, nga-nhung é amyú lé le, ichyí iwa pé é htunghkìng lé le, shut shai

é dòng haì le a kut wú; nghut kôlhang, ngò gi, Yerusalem wà mó má chyup yu é hui mù, Romaq byu pé é loq má ap byí kat é hui bê nghut lhê. ¹⁸ Romaq zau wui kúm gi, ngo lé ban jep gôn wú jáng, ngá chyáng shí gíng é mara lé a myàng kô é yanmai, ngo lé nhang kat nau akò nghut ri. ¹⁹ Nghut kôlhang, haù lé Yudaq byu pé a dòng kô é yanmai, ngò hkâsu a dat kut lo mù, Kehtaq chyáng jé rá matú dúng é nghut lhê. Haù nghut kôle, ngá amyú lé mara hùn rá jowò joq é yanmai gi, a nghut. ²⁰ Haù mù luí, Israelaq amyú é myit myoqbyù hkyô* é yanmai, shí shamtoq-tuí èq tuí é ngò hui zô é hkyô eq séng luí, nungmoq eq nyo kún rá matú, ngò, nungmoq lé ji kat é nghut lhê." ga luí, yhangmoq lé tái ri.

²¹ Haù hkùn, yhangmoq gi, "Náng é hkyô eq séng luí Yuda mau má é laiká ngamoq a wó yù nghut ri. Haù mai lé é gumang wui ó yuq le, nàng eq séng é a ge é luhkyang lé shit kyô é a bò kó nghut ri. ²² Nghut kôlhang, shí nàng lom é hpung gi, jowò hkangmó má tái he pyâm é hui é hkyô lé, ngamoq sê é yanmai, nàng byu myang é hkyô lé ngamoq gyô wú nau ri." ga tú tái akò.

²³ Yhangmoq gi, yhang eq hui kún rá buinyi ding to kôluí, yhang bíng é yhùm má byu myo myo lé zing bum akò. Haù hkùn, yhang gi, napkyô mai myín htàng jé shoq, Garai Gasang é mingdán hkyô lé saksé hkâm kyô é eq, Mosheq é tarà eq myightoi pé é dang má cháng mù, yhangmoq lé shikut luí, Yesuq é hkyô tái pun tái kyíng ri. ²⁴ Yhang tái é hkyô lé, ra-am gi, lumjing bum akò; ra-am kúm gi, a lumjing kó nghut ri. ²⁵ Yhangmoq rayuq eq rayuq haù su myit a hui lhùm bùm kô é yanmai, Poluq gi, yhangmoq lé, "Chyoiyung Woi-nyí, Myightoi Esai-aq é nhut mai nungmoq é ichyí iwa pé lé tái é dang gi, gyai yhang téng ri. Dang haù gi,

²⁶ 'Byù haù hù chyáng ê mù,

"Nungmoq gyô tsuq to kôlhang, sê gyo kó rá a nghut;

wú tsuq to kôlhang, wú sé kó rá a nghut.", ngù é tái aq.

²⁷ Hkâsu mù gâ le, amyú shi é i-myt gi, htan byuq luí,

yhangmoq é nohkyap gi, htu byuq bê nghut ri;

yhangmoq é myoq gi, chùm byuq bê nghut ri;

haù a nghut le gi, yhangmoq é myoq èq myàng mù,

yhangmoq é nohkyap èq wó gyo luí, yhangmoq é i-myt má sé hkyàng kômù,

ngá chyáng lhing lò kôluí, ngò yhangmoq lé lhoq gê byi berâ nghut lhê.*
gâ ri.

* **28:20** Israelaq amyú é myit myoqbyù hkyô gi, Mesaia gâ é hkyi yù sú lé myoqbyù nyi é nghut lhê. * **28:27** Esai 6:9,10

²⁸ Haû mù luí, shí Garai Gasâng é hkyi yù hkyô lé, tûngbaù pè chyáng byí kat bê nghut luí, yhangmoq lhom gyô yù berâ hkyô lé, nungmoq yhang sê nyí keq ô!" ga luí, danghkun haù taí kat é htâng má, yhangmoq gi, htoq ló byuq bùm bekô nghut ri. ²⁹ (Poluq haù su ga taí é htâng má, Yudaq byu pé gi, yhangmoq yhangchang dang jet jet lhum uchyang ló byuq bekô nghut ri.)

³⁰ Poluq gi, yhang nghô lúng é yhûm má í zân tup nyí é u lé, yhâng chyáng lé má lé é bang lé lhom hkúlum yu ri. ³¹ Haù mù, a gyuq a kyum é za, Garai Gasâng é mingdán hkyô lé hko taí kyô é eq, Yhumsing Yesuq Hkrisduq eq sêng é hkyô lé mhoqshit byí ri; yhang lé, ó le a hkûm zing to kó nghut ri.

ROMAQ Pê Chyáng Hun Kat é Laiká (Romans)

¹ Hkrisduq Yesuq é dui-nhâng zoshâng eq lagyo dut rá matú, Garai Gasâng eq ji yu é hui luí, chyoyúng Chyúmdang pé má, ² Garai Gasang gi, hí hí mai Yhâng é myiqhtoi pé dông danggidiq byi to bê nghut é, Yhâng é Yuqzô é hkyô nghut é, Garai Gasâng é gabú danglu é matú hkyin to hui é sù, ngò Poluq gi, Romaq myuq má nyi é, Garai Gasâng eq chyitdap é hui luí, sán-yúng bang dut rá matú ji yu é bang banshoq lé, dang kyô kat lhê. ³ Yhâng é Yuqzo haú gi, byú hkyam dông ga jáng, Dawiq é awut ashín nghut ri; ⁴ Yhang gi, shi é mai dum dui toq é dông, Garai Gasâng é Yhangzo nghut é hkyô lé, chyoyúng hkyo é Woi-nyí dông mai, hpungwup a-tsâm eq sé nhâng bê nghut ri. Yhang gi, nga-nhúng é Yhumsing Yesuq Hkrisduq nghut ri. ⁵ Yhang dông mai le, Yhâng myíng é matú le, ngamoq gi, byú myú chângiup mai byú ji yu mù, lumjng hkyô lé châng nyi nhâng rá matú, jeju eq lagyo ayá lé wó hkam yú bê nghut lhê. ⁶ Nungmoq le, Yesuq Hkrisduq eq séng rá matú ji yu hui é bang má lóm bekô nghut ri.

⁷ Nga-nhúng é Iwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyí sháng gaq ô!

Poluq, Romaq Myuq Má Ló Kum Nau É Hkyô

⁸ Nungmoq é lumjng hkyô lé, mingkan gón má tái pyo ló bê nghut é yanmai, sâng-hi má, ngò gi, Yesuq Hkrisduq é myíng mai, nungmoq banshoq bâng é matú, ngá é Garai Gasang lé, jeju hkya-on lhê. ⁹ Ngá é kyúdung dang pé má, ngò, nungmoq lé hká-nhám le bün nyi é hkyô lé, Yhâng é Yuqzô é hkyô gabú danglù lé hko kyô nyi é má, ngá é myit nhikhlum banshoq eq dojaú é Garai Gasang gi, ngá é saksé nghut lhê; ¹⁰ Garai Gasang ô nau é nghut jáng, hká-i a myáng má, ngò, nungmoq chyáng wó jé lé rá hkyô htong byi rá matú, ahkuí, ngò kyúdung lhê.

¹¹ Ngò gi, nungmoq lé, woi-nyí hkyô eq séng é chyunghuq wó gám byi mù, nungmoq lé wum-o wó lhoq kng byi rá matú, nungmoq lé gyai yhang myáng nau nyi ri. ¹² Haú sù nghu é gi, nga-nhúng rayuq eq rayuq é lumjng hkyô dông mai, nungmoq eq ngò, myit wum byi é hui rá matú nghut lhê. ¹³ Gumang wui é, ngò gi, haú tungbaù pé chyáng mai ashi wó yu é eq rajung za, nungmoq chyáng mai le ashi wó yú rá matú, nungmoq chyáng lé jé rá nghú adàm dàm

dá wú é nghut kôlhang, ahkuí jé shoq hkúm tang pyám hui é hkyô lé, nungmoq lé sé nhâng nau ri.

¹⁴ Ngò gi, Grik pé lé le, Grik a nghut bang lé le, hpaqchyí bò bang lé le, hpaqchyí a bò bang lé le, chyin dap to sù nghut lhê. ¹⁵ Haú nghut é yanmai, ngò gi, Romaq myuq má é bang nungmoq lé le, haú gabú danglù gyai yhang hko kyo nau nyi é nghut lhê.

¹⁶ Haú gabú danglù hkyô má, ngò gi, a hoq é nghut lhê; hkâsu mù gà le, haú gi, sâng-hi má Yudaq byu pé, hau htàng tungbaù pé má, lumjng é sù yuq hkangmó lé hkyi yu é wó hui nhâng rá nghut é, Garai Gasâng é hpungwup a-tsam nghut lhê. ¹⁷ Hkâsu mù gà le, lumjng myit mai wó yú luí, lumjng myit má gíng nyi é, Garai Gasâng chyáng má é dingmán hkyô lé gi, gabú danglù hau má hpông shit bê nghut ri. Haú gi, "Haú dingmán sù gi, lumjng myit mai asak dui rá nghut lhê." ¹⁸ ga kâ tô é eq rajung za nghut ri.

Xângzo Byu Pé Htoq Má Garai Nihkmo-yô É Hkyô

¹⁸ Haú tengmán hkyô lé, yhumsing é agè ashop hkyo eq zik hkúm pyám é byu pé é agè ashop hkyô eq garai a bo é hkyô pé banshoq htoq má, mauhkung mai Garai Gasâng é nihkmo-yo hkyô lé hpông shit bê nghut ri. ¹⁹ Haú mù gà le, Garai Gasang gi, Yhang eq séng é hkyô, yhangmoq lé san za tún shit bê nghut é yanmai, Garai Gasang lé sé âng é hkyô gi, yhangmoq chyáng san za dut bê nghut ri. ²⁰ Hkâsu mù gà le, mau htoq xâng hkun mai, hpan tô é zè pé lé wú jáng, Yhâng é a byu-myang é isâm nghut é, ahtum abyuq é hpungwup a-tsam eq Garaí é myit sámlai lé gi, san za wó myâng, wó sè gyô é nghut lhê. Haú mù luí, byu pé gi, mara mai wó he lut rá hkyô a joq lo nghut ri.

²¹ Haí mù gà le, yhangmoq gi, Garai Gasang lé sê to kôlhang, Yhang lé Garai dông a shigyaú kô é eq, jeju a hkya-on kó nghut ri; yhangmoq myit é hkyô pé gi, akôm dut byuq é eq, nhik a gyíng é yhangmoq é myit nhikhlum gi, chut byuq bê nghut ri. ²² Yhangmoq gi, hpaqchyí bò bang nghut lhê ga kôlhang, a-ngok é bang dut byuq bekô nghut ri. ²³ Haú mù, htén byoq a sê é Garai Gasâng é hpungwup shingkan lé, htén byoq sê é byú zông, nghoq lhô, dusak lhô eq yê jung dusak lhô pé eq, htai lhik pyám bekô nghut ri.

²⁴ Hau é yanmai, Garai Gasang gi, yhangmoq é gungdu lé rayuq eq rayuq hpau a tap lum kó rá matú, a sansêng é gungsho züm-yap hkyô kut rá nghut é, yhangmoq é yut yut ô nau é i-myt má, yhangmoq lé ap pyám bê nghut ri. ²⁵ Yhangmoq gi, haú Garai Gasâng é tengmán hkyô lé, mhaú é hkyo eq htai lhik pyám kômú, hpan Sù lé noqkuq dojaú rá malaí, mhaú hkyô nghut é hpan tô é zè pé

lé noqkuq mù, dojaú akò nghut ri. Hpân Sû haú gi, ahtum abyuq hkya-on hui sú nghut ri. Amen.

²⁶ Haú nghut é yanmai, Garai Gasang gi, yhangmoq lé, ahoq ahí é yut yut ô nau hkyô má ap pyâm bê nghut ri. Yhangmoq é myiwe wui lháng gi, htúng akying lé tô pyâm kômù, haú eq shai é dông htaí lhik pyâm nyi akò nghut ri. ²⁷ Haú eq rajung za, yuggè wui le, myiwe wui eq zum é htúng akying lé tô pyâm kômù, rayuq eq rayuq, myi su nyé shoq yut yut ô nau lhum kômù, yuggè yhangchang rayuq eq rayuq agot a-ù hkyô kut shut lhum kôluí, yhangmoq kut shut é eq gingdán é yubak dam lé, yhumsing gùng yhumsing hkam yù nyi bekò nghut ri.

²⁸ Hau htoq agó, haú Garai Gasang lé sê é hkyô gi, akyù bo é a nghut ga yhangmoq myit yù kô é yanmai, a kut ãng é hkyô kut nhâng rá matú, Garai Gasang gi, yhangmoq lé, htên byoq sê é myit má ap pyâm é nghut lhê. ²⁹ Yhangmoq gi, agè agau hkyô ajung jung, agè ashop hkyô, myoqnoq hkyô eq a jú lhùm é hkyô pé bying jup tô é bang dut bekò nghut ri; manon é, byù sat é, mabyoq jishùm htoq é, mhaú zô é eq myit goí bo é pé le bying bum ri. ³⁰ Yhangmoq gi, lumu é bang, gansang é bang, Garai lé a jú é bang, byù rhoi é bang, nghutbùn é bang, gyáng é bang, agè ashop kut rá hkyô lhoq htoq é bang, mó wui é jino a gyô é bang nghut akò. ³¹ Yhangmoq gi, a gying a hâng é bang, gidíq a zung é bang, chyit myit a bo é bang, shogyo nhikmyin a sê é bang nghut akò. ³² Haú pé lé kut é bang gi, shí ging lhê gá é, Garai Gasang é dingmán tará joq é lé, yhangmoq sê to kôlháng, haú pé lé, yhangmoq xoq kut nyi kô é htoq agó, haú hkyô lé kut é bang lé le, hkya-on waq toq akò nghut ri.

2

Garai Gasang Tará Jéyáng É Hkyô

¹ Haú mù luí, góyuq lé tará jéyáng é sú nàng ê, nàng gi, mara mai wó he lut rá hkyô a joq lo; hkásu mù gá le, nàng yhang jéyáng nyi luí, mù haú pé lé, nàng kut nyi é yanmai, byù góbang lé jéyáng é hkùn, nàng gùng nàng mara byi nyi bê nghut ri. ² Haú dông kut nyi é bang lé, Garai Gasang gi, tengmán é dông tará jéyáng é lé, nga-nhúng sê nyi lhê. ³ Haú mù, byù za nghut to luí, góbang lé gi, jéyáng mù, yhumsing gi, haú dông roq châng kut nyi é sú nàng ê, nàng gi, Garai Gasang é tará jéyáng hkyô mai wó hpang lut rá su ngam nyi lhê lhú? ⁴ Haú a nghut jáng, nàng gi, Garai Gasang é ge é hkyô eq nang lé myit wó shuí lhing nhang é lé a sê é za, Yhâng é agùn agó é ge é hkyô lé le, myit hing é hkyô

eq jân shirang é hkyô lé le, wú tiq pyâm nyi lhê lhú?

⁵ Nghut kôlháng, náng é myit htên hkyô eq myit a lhing é nhikhùm é yanmai, haú Garai Gasang dingmán é dông tará jéyáng shít rá nghut é, Yhâng é nhikmo-yô é buinyi má hkâm zo rá nhikmo-yo hkyô lé, yhumsing gùng yhang hkong tô nyi bê nghut ri. ⁶ Garai Gasang gi, yuq hkangmó lé, ó le ó kut é má cháng luí, hkâm zo nhâng rá nghut lhê. ⁷ Jân shirang mù, ge é hkyô kut nyi é dông, hpungwup shing kang lé le, aróng eq htên byoq a sê é hkyô lé le, ho é bang lé, Yhang gi, ahtum abyuq é asak byi rá nghut lhê.

⁸ Nghut kôlháng, haú yhumsing wuizat hkyô za hô luí, tengmán hkyô lé he-ngik pyâm mù, agè ashop hkyô lé cháng bâng é matú gi, nhikmo-yo hkyô eq nhikjum yo hkyô jé rá nghut lhê. ⁹ Wuíhke hkyô eq iyon yon hkyô gi, agè ashop kut é xàngzo byù yuq hkangmó chyáng jé rá nghut lhê; sâng-hí má Yudaq byu pé chyáng jé mù, túngbaú pé chyáng le jé rá nghut lhê. ¹⁰ Nghut kôlháng, hpungwup shing kang, aróng eq nguingón hkyô gi, haú ge é hkyô kut é bang yuq hkangmó chyáng jé rá nghut lhê: sâng-hi má Yudaq byu pé chyáng jé mù, túngbaú pé chyáng le jé rá nghut lhê. ¹¹ Hkásu mù gá le, Garai Gasang gi, myoqdong a hkyin é Sû nghut lhê.

¹² Haú jep é tará lé a sê é mara kut shut é bang lhunglháng gi, jep é tará dông a nghut é za htên byoq kó rá nghut lhê. Haú jep é tará hkaú má mara kut shut é bang lhunglháng gi, jep é tará dông jéyáng é hui zo kó rá nghut lhê.* ¹³ Hkásu mù gá le, haú jep é tará lé wó gyô é bang lé, Garai Gasang é hí má dingmán bang gá é a nghut é za, jep é tará lé châng kut é bang za sheq, dingmán bang gá é hui rá nghut lhê. ¹⁴ Haú jep é tará lé a wó é túngbaú pé gi, jep é tará hkyô lé, yhang baú yhang châng nyi kô é hkùn, jep é tará lé a wó kôlháng, yhumsing gùng yhumsing é matú tará dut bekò nghut ri. ¹⁵ Yhangmoq gi, haú jep é tará hkyô pé lé, yhangmoq é i-myt unghkaú má ká to bê nghut é lé, tún shít bekò nghut mù, yhangmoq é myit má hkâm zô é hkyô le, haú lé saksé hkám byi nyi é eq, yhangmoq myit é hkyô gi, ahkuí mara hun kat, ahkuí mara hkyut kat kut nyi ri. ¹⁶ Haú hkyô gi, ngò tai pyo é gabú danglú eq rajung za, byu pé é zaú nghop tô é hkyô pé lé, Hkrisduq Yesuq dông mai Garai Gasang eq tará jéyáng é buinyi má dut rá nghut lhê.

Yudaq Byu Pé Eq Jep É Tará

¹⁷ Nghut kôlháng, nàng gi, náng gùng nàng Yudaq byu rayuq nghut lhê ga mù, haú jep é tará lé lumhkau nyi é eq Garai Gasang lé xoq é hkyô má nghutbùn nyi é sú; ¹⁸ Yhâng ô nau é hkyô lé sê é eq haú jep é tará mhoqshit

* **2:12** Haú jep é tará lé a sê bang gá é gi, túngbaú pé lé gá é nghut lui, haú jep é tará hkaú má é bang gá é gi, Yudaq byu pé lé gá é nghut lhê.

é hkyô wô yû bê nghut é yanmai, je ahkyak é hkyô lé sê gâm hkoq é sù; ¹⁹ haù jep é tarà má, hpaqchyí eq tengmán hkyo é alik wó sù nghut é yanmai, haù myoqjit bãng é matú hkyô-u shê sù eq mauchut hkaù má é bãng é matú maubó nghut sù; ²⁰ byù ngok pé lé mhoqshit sù eq zoshâng wui é sará nghut sù nghut é lé, sê gyô to sù nghut é nghut le gi, ²¹ nãng, góbang lé mhoq byi sù nhing, yhumsing gung yhumsing a mhoq yû lú? A wó hkau ga hko taí luí nhing, nãng gi, hkaù lhê a nghut lú? ²² Su-myi sulàng lú hkyô a wó kut ga byu pé lé taí luí nhing, nãng gi, su-myi sulàng lú hkyô kut lhê a nghut lú? Hpara lô lé a jú dik sù nãng gi, noqkuq yhùm lé hpyoq zo hpyoq shuq nyi lhê a nghut lú? ²³ Jep é tarà eq séng luí nghutbun sù nãng gi, haù jep é tarà lé lu lai é dng, Garai Gasang lé a hkungga kut lhê a nghut lú? ²⁴ Haù gi, "Garai Gasang é mying gi, nungmoq é yanmai, tungbaù pé chyáng lhoq hpoi pyâm é huí ri."* ga kâ tô é eq rajung za nghut ri.

²⁵ Haù jep é tarà lé nãng châng é nghut jáng, ahpyo-kuq hpyit hkyô gi, akyû bò bê nghut ri. Nghut kôlhâng, nãng, jep é tarà lé lu lai é nghut jáng, a hpyit é eq rajung za dut bê nghut ri. ²⁶ Ahpyo-kuq a hpyit kôlhâng, jep é tarà hkyô pé lé châng é bang lé gi, ahpyo-kuq hpyit bê bang dng ge sôn byi lhê a nghut kô lú? ²⁷ Kâ tô é tarà lé wó mù, ahpyo-kuq hpyit hkam to gù nghut é, tarà lu lai é sù nãng lé, gungsho má ahpyo-kuq a hpyit kôlhâng, jep é tarà lé châng é sù gi, mara hùn rá nghut lhê.

²⁸ Hkâsu mù gâ le, shinggan má za Yudaq byù nghut é sù gi, Yudaq byù kyíng a nghut; gungsho má za ahpyo-kuq hpyit é gi, ahpyo-kuq hpyit kyíng a nghut. ²⁹ Ahte myit hkaù má Yudaq byù nghut sù za, Yudaq byù kyíng nghut lhê. Kâ tô é tarà dng a nghut é za, Woi-nyí eq myit má ahpyo-kuq hpyit é gi, ahpyo-kuq hpyit kyíng nghut bê. Haù yuq é hkyá-on kungtôn hkyô gi, byù mai lo é a nghut, Garai mai lo é ru nghut lhê.

3

Garai É Lhumzui Hkyô

¹ Haù dng ga jang, Yudaq byù rayuq dut nyi é gi, hai akyû hkâm zo rá lú? Ahpyo-kuq hpyit hkyô gi, hai akyû bò rá lú? ² Hkyô hkangmó má gyai akyû bò lhê! Je hí má gi, haù Garai Gasang é mungdang lé yang, yangmoq lé ap byi bê nghut ri.

³ Yangmoq má é ra-am lumjng myit a bo é nghut le gi, hkâsu kô lú? Yangmoq lumjng myit a bo é yanmai, Garai Gasang é lhumzui hkyô lé akyû a bò nhâng wó dut rá lú? ⁴ Hkâ dng le a wó dut!

"Haù mù, nãng dang taí é hkùn, dingmán é hkyô wó lhoq htoq rá eq, nãng jéyáng huí é hkùn, ùng rá nghut lhê."*

ga kâ tô é eq rajung za, byù yuq hkangmó gi, byù-mhaù wó kôlhâng, Garai Gasang gi, tengmán nyí sháng gaq.

⁵ Nghut kôlhâng, nga-nhùng é a dingmán hkyô gi, Garai Gasang é dingmán hkyô lé san za je lhoq htoq shit é nghut lhê; haù nghut jáng, nga-nhùng hkâsu nghù taí rá lú? Nga-nhùng lé Garai Gasang nhikmo-yô é hkyô gi, Yhang a tarà mù nghut lhê lú? (Ngò gi, byù hkyam dng taí htng é nghut lhê.) ⁶ Ratsuí lhang a nghut! Haù su ru nghut le gi, haù mingkan lé, Garai Gasang hkâsu wó jéyáng rá lú? ⁷ Rayuq yuq, "Ngò mhaù é hkyô gi, Garai Gasang tengmán é hkyô lé lhoq kng jat mù, Yhâng é hpungwup shingkan lé je wó lhoq hu nhang é nghut le nhing, hai mù luí, ngò, yubak byù rayuq dng mara byí é huí zô nyi ra shirà lú?" ga taí dang-rháng rá nghut lhê. ⁸ "Ge é hkyô htoq sháng gaq, nga-nhùng, agè ashop hkyô kut sháng." nghù hai mù a taí kô é lú? Dang haù lé ngamoq taí é nghut lhê ga luí, ngamoq lé lumú gansang é dng byù ra-am taí akò. Haù bang gi, mara dam byí é huí zo gíng bang nghut akò.

Dingmán Byù A Nyi

⁹ Haù jáng, hkâsu nghù lo rá lú? Nga-nhùng gi, je gè bang nghut lhê lú? Ratsuí lhang a nghut. Yudaq byù nghut nghut, tungbaù pé nghut nghut, yubak mara hkaù má é bang chyat nghut lhê nghù, ngamoq taí san kyô wú bê nghut lhê. ¹⁰ Chyúmdang má kâ tô é le,

"Dingmán é byù a nyi, rayuq lhang a nyi nghut ri;

¹¹ Sê gyô é byù rayuq le a nyi, Garai Gasang lé ho é byù le a nyi nghut ri;

¹² Lhunglhang bang gi, lhing ló byuq bekò; yangmoq gi, hpau a dap bang chyat dut byuq bekò nghut ri.

Ge é kut sù ó a nyi, rayuq lhang a nyi nghut ri."*

gâ ri.

¹³ "Yangmoq é hkyung gi, hpông tô é lup pé nghut akò; yangmoq é shô gi, mhaù akò."*

"Yangmoq é nhutwuí pé má gi, shíduq bò lhangmui é duq dap bum ri."*

gâ tô ri.

¹⁴ "Yangmoq é nhut pé gi, nhing myíng nhing hté eq myit nò danghko baù byíng zan tô ri."*

gâ tô ri.

¹⁵ "Yangmoq é hkyí pé gi, byù sat sui lhoq htoq rá matú, lawán nau akò;

* 2:24 Esai 52:5 * 3:4 Hkya-on 51:4 * 3:12 Hkya-on 14:1-3 * 3:13 Hkya-on 5:9 * 3:13 Hkya-on 140:3

* 3:14 Hkya-on 10:7 * 3:17 Esai 59:7-8

¹⁶Yhangmoq sô nyi é hkyô pé gi, htên byoq é eq wuîhkê é akhô tông tô é nghut mù, ¹⁷nguingón é hkyô lé gi, yhangmoq a sé kó nghut ri."^{*}

gâ tô ri.

¹⁸"Yhangmoq é myoq hí má Garai Gasang lé gyuq hkunggá é hkyô, a bò kó nghut ri."^{*}

gâ tô ri.

¹⁹Byù yuq hkanmó é nhut gi, tù tai jang a joq dut byuq mù, mingkan gón gi, Garai Gasâng é hí má mara bo é bang dut nyi sháng gaq ga, haù jep é tarâ má tai é lhunglhang gi, jep é tarâ ô má nyi é bang lé tai é nghut é hkyô lé, nga-nhung é lhê. ²⁰Haù mù luì, jep é tarâ lé châng é đông mai, ó yuq le, Yhâng é hí má dingmán sù gâ é wó hui rà a nghut; jep é tarâ đông gi, yubak mara bo é hkyô lé wó sê yu é za nghut lhê.

Lumjínng Jáng, Dingmán Sù Wó Dut É Hkyô

²¹Ahkuí kúm gi, jep é tarâ đông a nghut é za, haù jep é tarâ eq myiqhtoi laiká pé mai saksé hkâm tô é Garai Gasâng chyáng mã é dingmán hkyô lé, sé nhâng bê nghut ri. ²²Garai Gasâng chyáng mã é dingmán hkyô haù gi, Yesuq Hkrisduq lé lumjínng é đông mai nghut mù, lumjínng bang banshoq htoq má jé é nghut lhê. Gamhkuí é hkyô a joq. ²³Hkâsu mù gâ le, lhunglhang bang gi, yubak mara kut shut bê bang chyat nghut mù, Garai Gasâng é hpungwup shingkang lé a hkyit hkap byuq lo kó nghut ri. ²⁴Ahkuí kúm gi, Hkrisduq Yesuq mai lo é hkyi yù hkyô đông, Garai Gasâng é jeju èq, mara hkyut san byí é lai lai wó hui bê nghut ri. ²⁵Garai Gasang gi, Yesuq é sui lé lumjínng bâng matú, shíhtai gunglik hkungga ralhum đông, Yesuq lé byí pyám bê nghut ri. Haù gi, lai lò bê yubak mara lé lhut pyám byi shoq, Garai Gasang myit hng byi bê nghut é yanmai, Yhâng é tengmán hkyô lé tún shit é nghut ri. ²⁶Garai Gasang haù su kut é gi, Yhânggung yhang dingmán Sù nghut é eq, Yesuq lé lumjínng é sù lé mara hkyut san byí é Sù nghut rá matú, ahkuí lhê ipyat má, Yhâng é tengmán hkyô lé shit byí é nghut lhê.

²⁷Haù su nghut jáng, nghutbun jowó joq ri lú? A joq. Hai tarâ mai a joq dut byuq é lú? Haù jep é tarâ châng é yanmai nghut lhê lú? A nghut, lumjínng hkyo é yanmai sheq a joq dut byuq é nghut lhê. ²⁸Hkâsu mù gâ le, byù gi, haù jep é tarâ châng é đông a nghut é za, lumjínng luì, mara hkyut san byi hui é hkyô lé, ngamoq lum nyi lhê. ²⁹Garai Gasang gi, Yudaq byu pé é Garai Gasang za nghut lhê lú? Tungbàu pé é Garai Gasang le a nghut lú? Nghut lhê, tungbàu pé é Garai Gasang le nghut lhê. ³⁰Hkâsu mù gâ le, Garai Gasang gi, rayuq za nghut é

yanmai, rajung za lumjínng luì, ahpyo-kuq hpyit hkam é bang lé le, ahpyo-kuq a hpyit é bang lé le, Yhang, mara hkyut san byi rà nghut lhê. ³¹Haù nghut jáng, nga-nhung gi, lumjínng myit hau èq, jep é tarâ lé lhoq hpoi pyám rà lú? Ratsui lhang a nghut! Nga-nhung gi, jep é tarâ haù lé lhoq ging ting é bang ru nghut lhê.

4

Abraham, Mara Hkyut San Hui É Hkyô

¹Haù su nghut jáng, nga-nhung é ichyí iwa Abraham gi, haù hkyô mai hai wó sê yu ri nghù, tai rà lú? ²Abraham gi, zui sai é đông mai, mara hkyut san byi hui é ru nghut le gi, yhang nghutbun jang joq rà nghut lhê; nghut kôlhang, Garai Gasâng é hí má gi, yhang haù đông a nghut. ³Chyúmdang má hkâsu gâ tô ri lú gâ le, "Abraham gi, Garai Gasang lé lumjínng bê nghut mù, yhang lé, dingmán sù ga sôn byi bê nghut ri."^{*} gâ ri.

⁴Zui sai é sù gi, yhâng é zuihpau lé, chyunghuq đông wó yu é a nghut é za, wó yù gíng luì, wó yu é ru nghut lhê. ⁵Nghut kôlhang, zui sai é hkyô đông a nghut é za, haù agé ashop hkyô lé mara hkyut san byí é Garai Gasang lé lumhkau é sù gi, yhâng é lumjínng myit é yanmai, dingmán sù ga sôn byi hui é nghut lhê. ⁶Haù eq rajung za, yhang zui sai é hkyô đông a nghut é za, Garai Gasâng èq dingmán sù ga sôn byi hui é, Garai Gasâng chyáng mã é shimân jeju wó é sù eq séng luì, Dawiq tai é gi,

⁷"Tarâ lu lai é lé mara hkyut pyám byi hui é eq yubak mara lé nghop pyám byi hui é bang gi, hkungso wó nyi ri.

⁸Bo tô é mara lé, Yhumsing èq mara a sôn byí é hui sù gi, hkungso wó nyi ri."^{*} gâ ri.

⁹Haù sù é jeju gi, ahpyo-kuq hpyit hkâm bâng é matú za nghut lhê lú? Ahpyo-kuq a hpyit bâng é matú le nghut lhê lú? Hkâsu mù gâ le, Abraham é lumjínng myit lé, dingmán sù ga sôn byi bê nghut lhê nghù, ngamoq tai nyi bê nghut lhê. ¹⁰Haù su sôn byí é gi, hkâm-nhám nghut lhê lú? Ahpyo-kuq hpyit hkâm é htàng má lú? A nghut jáng, hí má lú? Haù gi, ahpyo-kuq hpyit hkâm é htàng má a nghut é za, hí má ru nghut lhê. ¹¹Hau htoq agó, Abraham gi, yhang, ahpyo-kuq hpyit a hkam yù kôlhang, lumjínng luì wó é dingmán hkyô gâ é dizik nghut é, ahpyo-kuq hpyit masat lé myang hkam yù bê nghut ri. Haù mù, yhang gi, haù ahpyo-kuq hpyit a hkam yù kôlhang, lumjínng é lhunglhang bang lé dingmán bang ga sôn byí é wó hui rà matú, haù bâng é iwa dut bê nghut ri. ¹²Haù ahpyo-kuq hpyit hkâm é za a nghut, nga-nhung é iwa Abraham, ahpyo-kuq hpyit a hkam yù shi má

* 3:18 Hkya-on 36:1

* 4:3 Apùn 15:6,22

* 4:8 Hkya-on 32:1-2

wó é lumjǎng hkyo é hkyî-kám lé cháng luí ahpyo-kuq hpyit bǎng é íwa le, yhang nghut ri.

¹³Mingkân é amyú hkúng xoq pé dut rǎ ga, Abraham eq yhâng é awut ashín pé lé byi tô é danggidiq gi, jep é tara é yanmai a nghut é za, lumjǎng hkyô mai lo é dingmán hkyô dông ru nghut lhê. ¹⁴Hkâsu mù gà le, jep é tarâ dông nyi yap é bang gi, amyú hkúng xoq pé nghut é nghut jǎng, lumjǎng hkyô gi, akyú a bo é eq, danggidiq gi, hpau a dap é dut hyuq lhê. ¹⁵Haù jep é tarâ gi, nhikmo-yo hkyô lhoq htoq é nghut lhê; nghut kôlháng, jep é tarâ a joq jǎng gi, tarâ lu lai hkyô le joq rǎ a nghut.

¹⁶Haù mù luí, danggidiq gi, Abraham é awut ashín lhunglháng bǎng chyáng, jeju mai za lo é eq gingtǎng nyi é dut shǎng gaq ga, lumjǎng hkyô mai lo é nghut lhê. Haù gi, jep é tarâ má lòm bǎng é matú baú za a nghut, Abraham é lumjǎng hkyô má lòm bǎng é matú le nghut lhê. Abraham gi, nga-nhúng lhunglháng bǎng é íwa nghut ri. ¹⁷"Ngò gi, nang lé, byù myú myo myô é íwa dut nhǎng bê."^o ga kâ tô é eq rajung za, haù shi byuq bê bang lé wó lhoq dui é eq a joq wú é zè lé joq shoq wó kut é, yhang lumjǎng é sù Garai Gasǎng hí má, Abraham gi, nga-nhúng é íwa nghut lhê.

¹⁸"Nǎng é awut ashín pé le, haù eq rajung za myô lò rǎ nghut lhê."^o ga yhang lé tai kyô to bê eq rajung za, yhang gi, myit myoqbyù jowó haí a joq kôlháng, lumjǎng luí myoqbyù nyi é nghut mù, byù myú myo myô é íwa dut bê nghut ri. ¹⁹Yhang gi, rashô zàn kô jé byuq bê nghut mù, yhǎnggùng gi, shi é gyá dut é hui zô é eq Sarah é zoyhùm shibô le shum byuq kôlháng, yhang gi, lumjǎng myit a yom byuq nghut ri. ²⁰Hau htoq agó, Garai Gasǎng é danggidiq eq séng luí, a lumjǎng a dut é eq hê myit mhô myit a dut é za, yhǎng é lumjǎng myit lé saí lhoq ging tǎng mù, Garai Gasang lé hkya-on kungtôn luí, ²¹Garai Gasang gi, Yhang byi tô é danggidiq eq rajung za wó kut rǎ a-tsam bò sù nghut é lé, yhang myit zing nyi ri. ²²Hau é yanmai, "Yhang lé, dingmán sù ga són byi bê nghut ri."^o gâ tô é nghut lhê. ²³"Yhang lé, són byi bê." ga, kâ tô é dang gi, yhang é matú za a nghut, ²⁴nga-nhúng é Yhumsǎng Yesuq lé, shi é mai lhoq dui toq yú sù Garai Gasang lé lumjǎng luí, Yhang eq dingmán bang ga són byi rǎ nghut é, nga-nhúng é matú le nghut lhê. ²⁵Yhumsǎng Yesuq gi, nga-nhúng é yubak mará é matú, shi hkám byi rǎ dông ap pyâm é hui luí, nga-nhúng, mara hkyut san byi é hui rǎ matú, lhoq dui toq é hui bê nghut ri.

5

Nguingón Hkyô Eq Gabú Hkyô

¹Haù mù luí, nga-nhúng gi, lumjǎng é dông mai mara hkyut san byi é hui bê nghut é yanmai, nga-nhúng é Yhumsǎng Yesuq Hkrisduq dông, Garai Gasang eq buinùm wó xoq yú bê nghut lhê. ²Yesuq é yanmai, nga-nhúng gi, ahkuí wó yu to bê jeju shí má, lumjǎng luí wó wǎng bê nghut mù, Garai Gasǎng é hpungwup shǎngkang lé myoqbyù luí gabú gumrong nyi lhê. ³Haù za a nghut, nga-nhúng gi, wuihke jamjau hkyô pé má le gabú gumrong nyi lhê. Hkâsu mù gà le, wuihke jamjau hkyô gi, hkam jan hkyô lhoq htoq ri; ⁴hkam jan hkyô gi, myit a-tsam lhoq htoq lhê; myit a-tsam gi, myoqbyu to hkyô lhoq htoq é lé, nga-nhúng sê lhê. ⁵Myoqbyu to hkyô haù gi, nga-nhúng lé myit wum gyui nhang é a nghut; hkâsu mù gà le, Garai Gasang gi, Yhǎng é chyitdap myit lé, Yhang mai, nga-nhúng lé byi tô é Chyoiyúng Woi-nyí dông, nga-nhúng é i-myt unghkaú má hut kat byi bê nghut ri.

⁶Hkâsu mù gà le, nga-nhúng gi, a-tsam a bò dut tô ashí u lé, ahkyíng hkyak má yhang, Hkrisduq gi, yubak dap bang nghut é nga-nhúng é matú shí hkám byi bê nghut ri. ⁷Gè gè ga jǎng, dingmán su é matú shí hkám byi rǎ byù gi, shau rǎ nghut lhê; nghut kôlháng, byù gè rayuq é matú kúm gi, wám shí hkám é byù nyi sê lhê. ⁸Nghut kôlháng, nga-nhúng gi, yubak dap bang nghut nyi ashí hkún, nga-nhúng é matú Hkrisduq shí hkám byi é má, Garai Gasang gi, Yhǎng é chyitdap myit, nga-nhúng lé shit byi bê nghut ri.

⁹Nga-nhúng gi, ahkuí, Yhǎng é sui mai mara hkyut san byi é hui bê nghut mù, Yhǎng é yanmai, Garai Gasǎng é nhikmo-yo hkyô má, hkyi yu é je riyhang hui rǎ nghut lhê. ¹⁰Hkâsu mù gà le, nga-nhúng gi, Garai Gasǎng é gyè pé nghut nyi ashí u le, Yhǎng Zo shí hkám byi é dông, Garai Gasang eq buinùm wó xoq yu é hui bê nghut lhê. Wó xoq yu to bê nghut jǎng, nga-nhúng gi, Yhǎng é asak dông mai, gè gè yhang hkyi yu é hui rǎ nghut lhê. ¹¹Haù su za a nghut, nga-nhúng gi, nga-nhúng é Yhumsǎng Yesuq Hkrisduq dông mai, buinùm wó xoq yu é jeju lé, ahkuí wó yu to bê nghut mù, Yhǎng é yanmai, Garai Gasang má le, gabú gumrong nyi lhê.

Shi É Gi, Adam É Yanmai, Dui É Asak Gi, Hkrisduq É Yanmai

¹²Byù rayuq dông mai, yubak mara gi, mingkan má jé wǎng bê nghut luí, shí-nô hkyô gi, yubak mará é yanmai chǎng jé bê nghut ri; haù dông mai, byù lhunglháng bang gi, yubak dap bang chyat nghut byuq mù, shí-nô hkyô gi, byù lhunglháng bǎng chyáng jé bê nghut ri. ¹³Hkâsu mù gà le,

haũ jep é tarâ lé a byi shimá, yubak mara gi, mingkan má joq to bê nghut lhê. Nghut kôlhang, jep é tarâ a joq shî é hkûn gi, yubak mara lé mara su a ngàm shî é nghut lhê. ¹⁴ Haũ su ga kôlhang, Adam su hkunmô lé lu lai é dông mara a kut shut bãng é ahtoq má lhang, shî-nò hkyô gi, Adâm é ipyat mai Mosheq é ipyat jé shoq up nyi bê nghut ri. Adam gi, jé lé lò rà su é azông nghut ri.

¹⁵ Nghut kôlhang, jeju chyunghuq gi, haũ mara kut shut é hkyô su a nghut; hkâsu mù gà le, mara kut shut é byù rayuq é yanmai, byù myo myo shi pyâm é nghut le gi, Garai Gasâng jeju eq Yesuq Hkrisduq gà é byù rayuq é jeju mai lo é chyunghuq gi, byù myo myô é htoq má hkâ-í yhang byíng mui nyi ri-nhung! ¹⁶ Garai Gasâng jeju chyunghuq gi, byù rayuq kut é yubak mara su a nghut; hkâsu mù gà le, tarâ jéyáng é hkyô gi, byù rayuq é mara má cháng mù, mara dam byí é hkyô lhoq htoq é nghut lhê; nghut kôlhang, jeju chyunghuq gi, tarâ lu lai bang myo myo má cháng mù, mara hkyut san byi hkyô lhoq htoq é nghut lhê. ¹⁷ Hau htoq agó, byù rayuq tarâ lu lai lui, haũ rayuq é yanmai, shî-nò hkyô up nyi bê nghut lhê, ahkuí kúm, haũ Garai Gasâng é agùn agó shimán jeju eq dingmán hkyo é chyunghuq lé hap yu é bang gi, Yesuq Hkrisduq gà é byù rayuq dông mai, je riyhang asak ùi hkyô má uphkanq nyi kó rà nghut lhê.

¹⁸ Haũ mù lui, tarâ lu lai é hkyô ralhùm é yanmai, byù lhunglhang bang gi, mara dam byí é hui zo kó é su, dingmán hkyo é muzô ralhùm é yanmai, byù lhunglhang bang gi, asak ùi hkyô eq séng é mara hkyut san byi hkyô lé wó bê nghut ri. ¹⁹ Hkâsu mù gà le, byù rayuq jino a gyô é yanmai, myo myo gi, yubak dap bang dut byuq é su, byù rayuq jino gyô é yanmai, myo myo gi, dingmán bang gà é hui kó rà nghut lhê.

²⁰ Haũ jep é tarâ jat é gi, tarâ lu lai hkyô je myo rà matú nghut lhê. Nghut kôlhang, yubak mara myô jat é hkûn, jeju gi, je riyhang myô jat lo é nghut lhê. ²¹ Haũ mù, yubak mara gi, shî-nò hkyô dông uphkanq bê su, jeju gi, nga-nhung é Yhumsing Yesuq Hkrisduq é yanmai, ahtum abyuq é asak wó byí é dingmán hkyô dông up rà nghut lhê.

6

Hkrisduq Eq Rading Ralhum

¹ Haũ nghut jáng, nga-nhung gi, hkâsu nghu táí rà lú? Jeju myô jat lò sháng gaq nghu, nga-nhung, yubak mara kut xoq nyi rà lú? ² Haũ su a nghut sháng gaq! Nga-nhung gi, yubak mara eq shi gang bê bang nghut lhê; hkâsu mù haũ má wó ùi nyi lo rà lú? ³ Hkrisduq Yesuq eq rading ralhum za dut rà matú, wui-myhup hkâm yù bê bang nga-nhung banshoq gi, Yhâng é shi hkâm

hkyô má le rading ralhum za dut rà matú, wui-myhup hkâm yù bê nghut é lé, nungmoq a sé kó lú? ⁴ Haũ mù lui, Hkrisduq gi, íwá é hpungwup shingkang eq, shi bê mai lhoq ùi toq hui é su, nga-nhung le, asak asik dông wó ùi nyi sháng gaq nghu, nga-nhung gi, wui-myhup hkâm é dông, Yhang eq rahá, shi hkâm é eq myhup yhum é hui bê nghut lhê.

⁵ Nga-nhung gi, Yhang shi hkâm é hkyô má, Yhang eq rading ralhum za dut bê nghut jáng, Yhâng é dum ùi toq hkyô má le, Yhang eq rading ralhum za hkyak dut rà nghut lhê. ⁶⁻⁷ Hkâsu mù gà le, shi bê sù gi, yubak mara mai lhoq lhut é hui bê nghut é yanmai, nga-nhung gi, yubak mará é jùn dut nó a ra lo mù lui, yubak mara gùng gi, lhoq htên pyâm é hui rà matú, nga-nhung é byù xau gi, Yhang eq rahá jên sat pyâm é hui bê nghut é hkyô lé, nga-nhung sé lhê.

⁸ Haũ mù, nga-nhung gi, Yhang eq rahá shi hkâm bê nghut jáng, Yhang eq rahá ùi nyi rà nghut lhê nghu, lumjing lhê. ⁹ Hkâsu mù gà le, Hkrisduq gi, shi bê mai lhoq ùi toq é hui bê nghut mù, Yhang gi, dum wó shi lo rà a nghut é lé, nga-nhung sé lhê; shi-nò hkyô gi, Yhang lé hkâ-nhám le wó sing to rà a nghut lo. ¹⁰ Yhang shi hkâm é shi-nò hkyô gi, banshoq bãng é matú, yubak mara eq séng lui radàm za shi hkâm byi bê nghut ri; nghut kôlhang, Yhang ùi nyi é asak gi, Garai Gasâng hí má ùi nyi é nghut lhê.

¹¹ Haũ eq rajung za, nungmoq gi, yubak mara eq shi gang lui, Hkrisduq Yesuq dông Garai Gasâng é matú asak ùi nyi lhê nghu, sôn yù keq. ¹² Haũ mù lui, nungmoq é htên byoq sé é gungdu má, yubak mara lé hkâ-uphkanq nhâng, uphkanq nhâng kó é nghut jáng, gungdu yut yut ô nau é agé ashop hkyô lé, nungmoq châng é nghut bê. ¹³ Nungmoq é gungdu showui showang pé lé, agé ashop hkyo é chùng zé pé dông yubak mara má hkâ-ap byi pyám kó, shi bê mai lhoq ùi toq yù hui é bang su, yhumsing gùng yhumsing, Garai Gasâng chyáng kúm ap byi keq; nungmoq é gungdu showui showang pé lé, dingmán hkyo é chùng zé pé dông, Garai Gasâng chyáng ap byi keq. ¹⁴ Hkâsu mù gà le, nungmoq gi, jep é tarâ hkaũ má a nghut lô é za, jeju hkaũ má nghut nyi bekó yanmai, yubak mara gi, nungmoq lé sng sù wó dut rà a nghut lo.

Dingmán Hkyo É Jùn Pé

¹⁵ Haũ jáng gi, hkâsu kó lú? Nga-nhung gi, jep é tarâ hkaũ má a nghut lo é za, jeju hkaũ má nghut nyi bekó yanmai, mara wó kut shut kó rà lú? Haũ su a wó kut! ¹⁶ Nungmoq gi, rayuq yuq é jino gyo rà matú, yhumsing gùng lé jùn pé dông ap pyâm é hkûn, shi-nò hui rà nghut é yubak mará é jùn dông nghut kôlhang, dingmán hkyô

wó rã nghut é jìno gyo hkyô nghut kôlhang, nungmoq châng nyi é nghut le gi, nungmoq, haù é jùn dut bê lé, a sé kó lú? ¹⁷ Nungmoq gi, yubak marâ é jùn dut wú bê bang nghut kôlhang, nungmoq hkam yu to bê mhoqshit hkyô lé, nungmoq é myit nhikhlum ban-shoq èq châng bekô nghut é yanmai, Garai Gasang lé jeju hkyâ-on sháng. ¹⁸ Nungmoq gi, yubak mara mai lhoq lhut é hui bang nghut kômù, dingmán hkyo é jùn dut bekô nghut ri.

¹⁹ Nungmoq gi, sê gyô é nyan má wum nyhôm é bang nghut kô é yanmai, byu pé sê gyo rá đông ngò táí rá ga jáng; nungmoq gi, nungmoq é gungdu showui showang pé lé, a sansêng é hkyô eq agê ashop hkyô myô jat nhang é má jùn đông lhang ap byi wú bekô nghut é su, ahkuí gi, chyoyiung hkyô wó yú rá matú, haù pé lé, dingmán hkyô má jùn đông ap byi keq. ²⁰ Nungmoq gi, yubak marâ é jùn dut nyi kô é hkûn, dingmán hkyo eq uphkang é mai lut nyi kô é nghut lhê. ²¹ Ahkuí, nungmoq hoqjung nghu wú htoq é pé gi, haù u lé, hai akyú wó yú kô é lú? Hau pé gi, shi byuq é má htûm é chyat nghut ri. ²² Nghut kôlhang, ahkuí gi, nungmoq, yubak mara mai lhoq lhut é hui bekô nghut mù, Garai Gasang é jùn dut bekô nghut ri; hau é akyú gi, chyoyiung hkyô wó yu é nghut mù, ahtum abyuq é asak wó rá nghut lhê. ²³ Hkâsu mù gâ le, yubak marâ é ahpau gi, shi é hkyô nghut ri; nghut kôlhang, Garai Gasang é chyunghuq gi, nga-nhung é Yhumsing Hkrisduq Yesuq é yanmai, ahtum abyuq é asak nghut ri.

7

Tarâ Mai Lut É Hkyô

¹ Gumang wui ê, ngò gi, tarâ lé sê é bang nungmoq lé tai nyi lhê: haù tarâ gi, byu rayuq lé, yhang, asak dui nyi é u lé za wó uphkang é lé, nungmoq a sé kó lú? ² Dangké, ikun wàng bê myiwe myhí rayuq gi, yhang é yhumsing hpó asak dui nyi é ahkying má, tarâ èq up zing tô é hui ri; nghut kôlhang, yhang é yhumsing hpó shi byuq é nghut jang gi, haù ikun wàng tarâ mai, yhang wó lut bê nghut ri. ³ Haù nghut é yanmai, yhang é yhumsing hpó asak dui nyi ashí u lé, yuqgê góyuq eq hâng lhùm é nghut jang gi, yhang lé, sulàng lú sù ga kó rá nghut lhê. Nghut kôlhang, yhang é yhumsing hpó shi byuq é nghut jang gi, yhang, tarâ haù mai lut bê nghut lú, yuqgê góyuq eq hâng lhùm kôlhang, sulàng lú sù a nghut lo.

⁴ Haù mù lú, ngá é gumang wui ê, nungmoq le, haù shi byuq é mai lhoq dui toq yú hui bê sù Yuqgê chyáng wó xoq mù, nga-nhung gi, Garai Gasang lé ashí wó zui byi sháng gaq ga, Hkrisduq é gungdu đông mai,

jep é tarâ eq shi gang bê nghut lhê. ⁵ Hkâsu mù gâ le, nga-nhung, yubak gungsho má nghut nyi é hkûn, nga-nhung gi, shí-nò hkyo é ashí zui sháng gaq ga, jep é tarâ é yanmai htoq lo é yubak yut yut ô nau é hkyô gi, nga-nhung é gungdu pé má mù zui nyi é nghut lhê. ⁶ Nghut kôlhang, ahkuí gi, nga-nhung lé up zing tô é jep é tarâ eq shi gang bê nghut mù, jep é tarâ mai lut bê nghut é yanmai, kâ tô é hkyô xau đông a nghut é za, Woi-nyi é hkyô sik đông nga-nhung dojaú nyi é nghut lhê.

Jep É Tarâ Eq Yubak Mara

⁷ Haù jang, nga-nhung hkâsu táí rá lú? Jep é tarâ gi, yubak mara nghut lhê lú? Ratsuí lhang a nghut! Gê gè ga jang, haù jep é tarâ đông mai za a nghut le, yubak mara lé, ngò wó sê é a nghut. Hkâsu mù gâ le, "myoqnoq myit hkâbô"⁹ ga jep é tarâ má a tai tô é nghut jang, myoqnoq é hkyô lé, ngò sé rá a nghut. ⁸ Nghut kôlhang, yubak mara gi, hkunmó é ahkáng lé chùng mù, ngò má myoqnoq hkyô jung hkangmó lhoq htoq byi ri; hkâsu mù gâ le, jep é tarâ hkaú má a nghut jang, yubak mara gi, shi é za nghut lhê. ⁹ Ngò gi, tarâ hkaú má a nghut é za asak dui wú bê nghut lhê; nghut kôlhang, haù hkunmó htoq lô jang, yubak mara gi, dui lò sé rá, ngò gi, shí bê nghut lhê. ¹⁰ Haù mù lú, asak dui nhang rá matú nghut é hkunmó haù gi, shí-nò hkyô dut byuq é lé, ngò wó sê é nghut lhê. ¹¹ Hkâsu mù gâ le, yubak mara gi, hkunmó é ahkáng lé chùng mù, ngo lé mhaù yú lú, hau èq ngo lé shí nhang ri. ¹² Hau pé lé wú jang, jep é tarâ gi, chyoyiung ri; haù hkunmó gi, chyoyiung, dingmán é eq ge é nghut ri.

¹³ Haù nghut jang, ge é hkyô haù gi, ngá é matú shí-nò hkyô dut byuq bê lú? Haù đông a nghut! Nghut kôlhang, yubak mara lé gi, yubak mara đông hkyak wó lhoq htoq shit rá matú, haù ge é hkyô đông mai, yubak mara gi, ngò má shí-nò hkyô lhoq htoq bê nghut lú, yubak mara gi, gè gè yhang agê ashop dut é lé, hkunmó đông mai tân shit é nghut lhê.

¹⁴ Hau htoq agó, jep é tarâ gi, woi-nyi eq sêng é hkyô nghut é lé, nga-nhung sé lhê; nghut kôlhang, ngò má gi, gungsho eq sêng é hkyô za bo é nghut lú, yubak mara má jùn đông ung zô é hui bê nghut lhê. ¹⁵ Ngò haù kut nyi é hkyô lé, ngò a sé. Hkâsu mù gâ le, ngò kut nau é hkyô lé gi, a kut é za, ngò a jú é hkyô lé kut é yanmai nghut lhê. ¹⁶ Ngò a kut nau é lé kut é nghut jang gi, haù jep é tarâ ge é lé, ngò myit hui é nghut lhê. ¹⁷ Ahkuí gi, haù lé ngò yhang kut nyi é a nghut lo, ngò má lúng tô é haù yubak sheq kut é ru nghut lhê. ¹⁸ Ngò má, nghut bê, ngá é yubak gungsho má ge é hkyô haù le a bo é lé, ngò sé lhê. Hkâsu mù gâ le, ge é hkyô lé kut nau

é myit ngò má bò kôhlang, haù lé a wó kut htoq nghut ri. ¹⁹ Hau é yanmai, ngò kut nau é ge é hkyô lé gi, a kut é za, ngò a kut nau é agè ashop hkyô lé gi, ngò xoq kut nyi ri. ²⁰ Ahkuí, a kut nau é hkyô lé ngò kut nyi é nghut jáng, haù lé ngò yhang kut nyi é a nghut lo é za, ngò má lúng tô é haù yubak sheq haù lé kut nyi é ru nghut lhê.

²¹ Haù mù, ge é hkyô lé ngò kut nau é hkún, ngò má agè ashop hkyô htoq lô lô mù é tarâ lé, ngò myang ri. ²² Hkâsu mù gà le, ngò gi, Garai Gasâng é tarâ lé, ngá é i-myit unghkaù má myit ngui gabú nyi lhê. ²³ Nghut kôhlang, ngá é gungdu showui showang pé má bo é gotú tarâ gi, ngá é i-myit tarâ eq majan zân lhùm é nghut luí, ngá é gungdu showui showang hkaù má mù zui nyi é yubak é tarâ má, ngo lé shúmbyú dut nhang é lé, ngò myang ri. ²⁴ Ngò gi, shogyo rayhup dut sú nghut ri-nhung! Shí nhang é gungdu shí mai, ó yuq wá, ngo lé wó hkyi yù rá lú? ²⁵ Nga-nhung é Yhumsing Yesuq Hkrisduq đông mai wó lut bê nghut mù, Garai Gasang lé jeju hkya-ôn nyi lhê!

Haù mù luí, ngò yhang, myit é đông gi, Garai Gasâng é tarâ lé châng lhê, nghut kôhlang, yubak gungsho đông gi, yubak é tarâ lé châng lhê.

8

Haù Woi-nyí Mai Asak Dui É Hkyô

¹ Haù mù luí, ahkuí, Hkrisduq Yesuq má nghut nyí bâng é matú gi, mara byí é hkyô a joq lô é nghut lhê. ² Hkâsu mù gà le, asak dui hkyô eq sêng é Woi-nyí é tarâ gi, Hkrisduq Yesuq đông, yubak mara eq shí-nò hkyô é tarâ mai, ngo lé lhoq lhut yù bê nghut lhê. ³ Haù jep é tarâ gi, yubak gungshô é yanmai, wum nyhóm luí a wó kut é hkyô lé, Garai Gasang gi, yubak mara hkungga dut nhang rá matú, yubak byu é gunghkyang đông, Yhang Zo sîng lé nhang kat é đông kut pyám bê nghut ri. ⁴ Haù mù, Garai Gasang gi, yubak gungsho đông asak a dui é za Woi-nyí đông asak dui bang nghut é nga-nhung má, haù jep é tarâ má bo é hkyô pé lé, wó lhoq dik rá matú, gungsho ralhùm má, mara lé doqđân pyám bê nghut ri.

⁵ Haù yubak gungsho đông asak dui é bang gi, gungsho yut yut ó nau é hkyô pé lé myit zuq nyi akò; haù Woi-nyí đông asak dui é bang kúm gi, Woi-nyí ó nau é hkyô pé lé myit zuq nyi akò nghut ri. ⁶ Haù yubak byu é myit gi, shí é hkyô nghut ri; haù Woi-nyí eq hkang to huí su é myit kúm gi, asak eq nguingón hkyô nghut ri. ⁷ Haù yubak myit gi, Garai é tarâ ô má a nyi é htoq agó, haù lé a wó châng kut é yanmai, Gtao é gye nghut ri. ⁸ Haù yubak gungshô eq hkang tô é hui

bang gi, Garai Gasang lé a wó gabú nhang kó nghut ri.

⁹ Nghut kôle, Garai Gasâng é Woi-nyí gi, nungmoq chyáng lúng nyí bê nghut jáng, nungmoq gi, haù yubak gungshô eq hkang to huí é bang a nghut lô é za, Woi-nyí eq hkang to huí é bang nghut akò. Rayuq yuq gi, Hkrisduq é Woi-nyí lé a wó é nghut jáng, Hkrisduq eq a sêng é sù nghut lhê. ¹⁰ Nghut kôhlang, nang má Hkrisduq nyi nyi é nghut jáng, nang é gungdu gi, yubak marâ é yanmai shí kôhlang, nang é woi-nyí gi, dingmán hkyo é yanmai dui nyi ri. ¹¹ Hau htoq agó, Yesuq lé shí é mai lhoq dui toq yù Su é Woi-nyí gi, nungmoq má nyi nyi é nghut jáng, Hkrisduq Yesuq lé shí é mai lhoq dui toq yù Sù gi, nungmoq má nyi nyi é, Yhâng é Woi-nyí đông mai, nungmoq é, shí sê é gungdu pé lé le, asak dui nhang rá nghut lhê.

¹² Haù mù luí, Gumang wui é, nga-nhung gi, yubak gungsho đông asak dui rá matú, wó wó é bang a nghut. ¹³ Hkâsu mù gà le, haù yubak gungsho đông asak dui kò é nghut jáng, nungmoq gi, shí rá nghut lhê; nghut kôhlang, haù gungshô é shut shaí hkyô lé, Woi-nyí eq sat pyám kò é nghut jáng, nungmoq gi, asak dui rá nghut lhê. ¹⁴ Garai Gasâng é Woi-nyí eq shuí u é hui bang gi, Garai Gasâng é yhangzô pé nghut lhê. ¹⁵ Hkâsu mù gà le, nungmoq gi, gyuq rá matú, nungmoq lé jùn dum taù dut nhang é woi-nyí lé, a hap yu é za, nga-nhung lé zo yin yu é Woi-nyí lé hap yu tò é bang ru nghut lhê; haù mù, nga-nhung gi, Yhang é yanmai, "Aba,* Áwa é" ngò wut é nghut lhê. ¹⁶ Nga-nhung gi, Garai Gasâng é yhangzô pé nghut é lé, Woi-nyí haù gi, nga-nhung é woi-nyí eq rahá saksé hkâm nyi ri. ¹⁷ Ahkuí, nga-nhung gi, zo wui nghut bê yanmai, Hkrisduq eq rahá, Garai Gasâng é amyú hkúngxoq pé wó dut é nghut lhê. Nga-nhung gi, Hkrisduq é wuihke jamjau pé lé, gè gè yhang bo hui zô é nghut jáng, Yhâng é hpungwup shinggang lé le, bo myang hkam yù rá nghut lhê.

Htàngnung Lhê É Hpungwup Shinggang

¹⁸ Nga-nhung é ahkuí lhê é wuihke jamjau hkyô pé gi, nga-nhung lé shit rá nghut é hpungwup shinggang eq whuí rá a gingdán nghú, ngò wó myit ri. ¹⁹ Haù hpan to huí é lhunglhang gi, Garai Gasâng é yhangzô pé lé lhoq htoq shit byi rá lé, gyaí yhang myit lán nyi akò nghut ri. ²⁰ Hkâsu mù gà le, haù hpan to huí é lhunglhang gi, akyú a bo é chyat dut byuq bê nghut ri. Haù gi, yhumsing hkyin yu é đông a nghut é za, haù su dut nhang Sù ó nau é đông kut é nghut ri. ²¹ Haù hpan to huí é lhunglhang gi, htên byoq byuq rá matú shúm dut é mai lhoq lhut é hui luí, Garai Gasâng é yhangzô pé

* 8:15 Aba gá é gi, Aramaik dang đông "áwa" gá é lichyúm nghut lhê.

é hpungwup bo é luthkyô má wó wâng rá matú, myoqbyu tô é nghut lhê.

²² Haú hpan to huí é lhunglhang gi, ahkuí hkying jé shoq, zohkú-nò no é su nò-kying kyíng nyí kô é lé, nga-nhung sê lhê. ²³ Haú pé za a nghut, Woi-nyí é sâng-hi ashí† lé wó yú bê bang nga-nhung le, zo pé dông yín yu é jeju lé láng uchyang, i-myt unghkaú má nò-kying kyíng é nghut lhê. Zo pé dông yín yu é jeju haú gi, nga-nhung é gungdu hkyi xe yú hkyô nghut lhê. ²⁴ Hkâsu mù gà le, nga-nhung gi, myit myoqbyu hkyô haú mai hkyi yu é huí bê nghut lhê. Nghut kôlhang, byu-myang é lé myit myoqbyu é gi, myit myoqbyu é hkyô ratsuí le a nghut. Yhumsing myang to bê é lé, ó yuq wá myit myoqbyu shirá lúhú? ²⁵ Nghut kôlhang, nga-nhung gi, a wó shí é lé myit myoqbyu é nghut jáng, myit húng húng kut láng é nghut lhê.

²⁶ Haú eq rajung za, Woi-nyí gi, nga-nhung wum nyhôm é hkyô má garúm byí ri. Nga-nhung gi, haú dung rá é lé a sé kôlhang, haú Woi-nyí yhang gi, dang mai a wó tai htoq é nò-kying htê dông, nga-nhung é matú bo dúng xoq byí ri. ²⁷ Nga-nhung é i-myt unghkaú lé gôn wú é Sû gi, haú Woi-nyí myit é hkyô lé sê lhê, hkâsu mù gà le, haú Woi-nyí gi, Garai Gasang ô nau é dông, sân-yúng bâng é matú bo dúng xoq byí ri.

Banshoq Lé Je Wó Ung Pyám Râ Hkyô

²⁸ Garai Gasang gi, Yhang myit sôn tô é eq rajung za, ji yú luí, Yhang lé chyitdap bâng é matú, lhunglhang lé ge é dông chyat kut é hkyô lé, nga-nhung sê lhê. ²⁹ Hkâsu mù gà le, Yhang Zo gi, gumang wui myo myo má zomún dut sháng gaq ga, Garai Gasang gi, hí te sê tô é bang lé, Yhang Zô é sâmlai eq wó púng nhâng rá matú, hí mai masat to bê nghut ri. ³⁰ Hau htoq agó, Yhang, hí mai masat to bê bang lé gi, ji yu ri; ji yú bê bang lé gi, mara hkyut san byí ri; mara hkyut san byí é huí bang lé gi, hpungwup shing kang bô nhang ri.

³¹ Haú jáng gi, shí hkyô eq séng luí, nga-nhung haú tai shirá lúhú? Garai Gasang gi, nga-nhung hkyam shut nghut jáng, nga-nhung lé, ó yuq wá gye wám kut rá lúhú? ³² Yhumsing é Yhangzo lé lhang a ha bún é za, nga-nhung banshoq bâng é matú ap byí pyám é Sû gi, Yhang lé le, lhunglhang lé le, rahá láí láí byi rá a nghut lúhú? ³³ Garai Gasang eq hkyin yu to bê bang lé, ó yuq wá mara wó hún rá lúhú? Garai Gasang gi, mara hkyut san byi Sû nghut ri. ³⁴ Hkrisduq Yesuq gi, shí hkám luí, shí hkám é htoq agó, shí é mai lhoq dúm toq yu é huí mù, Garai Gasang é loqyo hkyam má nghut nyí luí, nga-nhung é matú bo dúng xoq byí nyí bê nghut é yanmai, ó yuq wá mara wó byi rá

lúhú? ³⁵ Hkrisduq é chyitdap myit mai, nga-nhung lé, hai eq wá wó lhoq kang rá lúhú? Gunjang huí é hkyo eq luq? Wuíhke huí é hkyo eq luq? Zing-ri huí é hkyo eq luq? Mutmó huí é hkyo eq luq? Gùng chin dut huí é hkyo eq luq? Gyuq jung eq luq? Sham eq luq? ³⁶ Haú gi,

"Náng é yanmai, ngamoq, nyí wuí sat pyám é huí nyi ri;

sat rá matú nyhi tô é sau pé lé su, ngamoq lé myit pyám akô."^{*}

ga kâ tô é eq rajung za nghut ri. ³⁷ A wó lhoq kang; nga-nhung lé chyitdap Su é yanmai, nga-nhung gi, haú pé banshoq lé je wó ung pyám é nghut lhê. ³⁸ Hkâsu mù gà le, shí kôlhang, byún kôlhang, maumang lagyô pé nghut kôlhang, agé ashop é nat pé nghut kôlhang, shí ipyat nghut kôlhang, htang pyat nghut kôlhang, hai jung a-tsam pé nghut kôlhang, ³⁹ htoq tsáng má é nghut kôlhang, a-ô tsáng má é nghut kôlhang, hpan tô é gotú hai nghut kôlhang, nga-nhung é Yhumsing Hkrisduq Yesuq má bo é Garai Gasang é chyitdap myit mai, nga-nhung lé wó lhoq kang pyám rá a nghut nghú, ngò gi, hkyak wó sê yu ri.

9

Garai Gasang Hkyin Yu É Israellaq Byu Pé

¹ Ahkuí, ngò gi, Hkrisduq má tengmán é dang tai rá; ngò a mhaú é lé, haú Chyoiyúng Woi-nyí gi, ngá é unghkaú myit má hkyak saksé hkâm nyi ri. ² Ngò gi, ngá é myit nhikhum má, gyai yhang yón kuq nyi é eq ayang hpuzô nyi lhê. ³ Hkâsu mù gà le, ngò gi, ngá é byuhú, ngá é gumang wui é matú, nhing é huí luí Hkrisduq eq gang le lhang gè rá su gà ri. ⁴ Haú bang gi, Israellaq byu pé nghut lhê. Zo yín yú huí é hkyô le, hpungwup shing kang le, dangshikaq pé le, tará lé myang hap yu é hkyô le, noqkuq yhúm má noqkuq é hkyô le, danggididí pé lé le, yhangmoq wó yu akô nghut ri. ⁵ Haú mying hú é ichyí íwá pé gi, yhangmoq é ichyí íwá pé nghut luí, byu é hkyam dông gon jáng, Hkrisduq gi, yhangmoq amyú má é nghut ri. Yhang gi, lhunglhang lé up é, ahtum abyuq hkyu-on huí é Garai Gasang nghut ri! Amen.

⁶ Haú gi, Garai Gasang é danggididí akóm dut byuq bê nghú nau é a nghut. Hkâsu mù gà le, Israellaq byu pé banshoq bang gi, Israellaq byu akying chyat a nghut kó nghut ri. ⁷ Abraham é awut ashín banshoq bang gi, yhang é zo wuí akying chyat nghú a wó tai é nghut lhê. Hau é malaí, "Isak dông mai lo é lé, náng é awut ashín nghú sôn byi rá nghut lhê."^{*} gâ tô ri. ⁸ Radông tai sháng ga jáng, gungsho mai hku é zo wuí gi, Garai Gasang é zo wuí akying a nghut kó, danggididí eq séng

† 8:23 Woi-nyí é sâng-hi ashí gá é gi, Woi-nyí gi, Garai Gasang byí é chunghuq pé má é sâng-hi lhum nghut lhê. * 8:36 Hkyu-on 44:22 * 9:7 Apùn 21:12

é zo wui za sheq, Abraham é awut ashín pé dõng sòn byí é nghut lhê. ⁹ Hkâsu mù gâ le, "Masat tô é ahkying má, nõ dum taú lé mù, Sarah gi, yuqzo hkú rá nghut lhê."* ga taí tô é danggidiq é yanmai nghut lhê.

¹⁰ Haú za a nghut, Rebeka é yhangzõ nhik-tang é iwa gi, nga-nhúng é iwa nghut su Isak rayuq za nghut lhê. ¹¹⁻¹² Nghut kólhang, Garai Gasang myit hpyit to mù hkyin yu é hkyõ gi, muzó mai a nghut é za, hkyin ji yu Su é yanmai nghut é lé, wó gíng nyi sháng gaq ga, haú zozúm nhik a hku lé shí é htoq agó, ge é eq a ge é muzó hai háng a kut shimá, "Haú ko sú yuq gi, tiq sú yuq lé dojaú rá nghut lhê."* ga, Rebeka lé taí kyõ tô é nghut lhê. ¹³ Haú gi, "Yakup lé, nõ chyitdap lhê, nghut kólhang, Eso lé gi, a ngui é nghut lhê."* ga kâ tô é eq rajung za nghut ri.

¹⁴ Haú nghut é yanmai, nga-nhúng hkâsu nghú taí rá? Garai Gasang gi, a tará é sú nghut lhê lúh? Ratsuí lhang a nghut! ¹⁵ Hkâsu mù gâ le,

"Nõ, shogyo nhikmyin naú sú lé, shogyo nhikmyin rá nghut lhê;

Nõ, jeju byi naú sú lé, jeju byi rá nghut lhê."*

ga, Mosheq lé Yhang taí ri. ¹⁶ Haú mù luí, haú hkyin yu é hkyõ gi, byu yut yut ô nau é yanmai le a nghut, shikut é yanmai le a nghut, Garai Gasang é shogyo nhik-myín é yanmai za nghut lhê. ¹⁷ Hkâsu mù gâ le, Chyúmdang má, "Náng chyáng Ngá é a-tsam wó tún shit rá eq mingkan gón má Ngá é mying lhoq pyo é hui rá matú sheq, Nõ, nang lé lhoq toq kat é nghut lhê."* ga, Hpara-uq lé taí ri. ¹⁸ Haú mù luí, Garai Gasang gi, shogyo nhikmyin naú sú lé, shogyo nhikmyin mù, myit lhoq htân byi naú sú lé, myit lhoq htân byi ri.

¹⁹ Nungmoq má é rayuq yuq, "Haú jáng, Garai Gasang gi, ngamoq lé hai mù mara hun nyi ashí lúh? Yhang ô nau é hkyõ lé, ó yuq wá wó hkúm pyâm lhê lúh?" ga, ngo lé taí kó rá nghut lhê. ²⁰ Nghut kólhang, Garai Gasang lé dang tu sú byi nang gi, ó yuq wá nghut lhê lúh? Saí to hui bê é zé pé gi, "Náng, hai mù ngo lé shí su kut saí tô lhê lúh?" nghú saí é Sú lé wó taí rá lúh? ²¹ Tso-au saí sú gi, tsohtung ralhun mai za, hkik é tso-au pé eq a hkik é tso-au pé saí rá ahkáng wó lhê a nghut kô lúh?

²² Garai Gasang gi, Yhâng é nhikmo-yo hkyõ tún shit luí, Yhâng é a-tsam lé sé nháng nau kólhang, htên byoq rá matú hen tô é, nhikmo-yo gíng é tso-au pé lé, myit hng hng shirang pyâm nyi é hkyõ lé, taí rá jang hai joq ashí lúh? ²³ Hpunqwp shingkáng é matú noq mai hen to bang nghut é, Yhang shogyo nhikmyin huí é bang

lé, Yhâng é agùn agó é hpungwup shingkang lé sé nháng nau mù, Yhang haú su kut é nghut jáng, taí rá hai joq ashí lúh? ²⁴ Haú bang gi, Yudaq byu pé mai za a nghut, tungbaú pé mai lé ji yu huí é bang nga-nhúng nghut lhê. ²⁵ Haú eq rajung za, Hosea laiká má Yhang taí tô é gi,

"Ngá é byu myú a nghut é bang lé, 'Ngá é byu myú' nghú;

Nõ a chyit é byizo lé 'Nõ chyit sú' nghú wut rá nghut lhê."*

gâ ri. ²⁶ Haú mù,

"Nungmoq gi, ngá é byu myú pé a nghut.' nghú yhangmoq lé taí é jowó má yhang,

yhangmoq gi, 'Rú dui nyi é Garai Gasang yhangzõ pé' ga wut é hui kó rá nghut lhê."*

gâ ri.

²⁷ Esai-aq le, Israelaq byu pé eq séng luí garu taí é gi,

"Israelaq yhangzo yhangshú pé gi, wuishuq lung-au yâm má é semú su myo kólhang,

myit gyó tô é bang za sheq hkyi yu é hui kó rá nghut lhê.

²⁸ Hkâsu mù gâ le, haú Yhumsing gi, myidám htoq má Yhâng é tará jéyáng hkyõ lé hân hân lhoq dik lhoq htúm pyám rá nghut lhê."*

gâ ri.

²⁹ Haú eq rajung za, hí lé Esai-aq taí tô é gi, "A-tsam dik shoq bò sú haú Yhumsing za, nga-nhúng lé, awut ashín a myhit to byí é nghut jáng,

nga-nhúng gi, Sodom wá su dut byuq luí, Gomoraq myuq eq pung byuq rá nghut lhê."*

gâ ri.

Israelaq Byu Pé A Lumjng Kó É Hkyõ

³⁰ Haú mù, nga-nhúng hkâsu nghú taí rá lúh? Dingmán hkyõ lé a châng hkat é tungbaú pé gi, haú lé wó yu bekó; haú gi, lumjng hkyo é yanmai wó yu é dingmán hkyõ nghut ri. ³¹ Nghut kólhang, tará eq séng é dingmán hkyõ lé châng hkat é Israelaq byu pé gi, haú lé a wó yu kó nghut ri. ³² Hai mù a wó yu kó é lúh? Yhangmoq gi, lumjng myit eq châng hkat kó é a nghut é za, muzó pé eq châng hkat kó é yanmai, a wó yu kó é nghut ri. Yhangmoq gi, "htung hté rá luqgok" má htung leng bekó nghut ri. ³³ Haú,

"Wú keq, htung leng rá luqgok eq myit leq-bat nhâng rá luqmó cham lé, Nõ, Zi-un bùm má lheq to luí,

Yhang lé lumhkaú sú gi, hkâ-nhám le hoq hpu é hui rá a nghut."*

ga kâ tô é eq rajung za nghut ri.

* 9:9 Apùn 18:10,14 * 9:11-12 Apùn 25:32 * 9:13 Mal 1:2-3 * 9:15 Htoq Ló 33:19 * 9:17 Htoq Ló 9:16

* 9:25 Hos 2:23 * 9:26 Hos 1:10 * 9:28 Esai 10:22-23 * 9:29 Esai 1:9 * 9:33 Esai 8:14; 28:16

10

¹ Gumang wui ê, ngò gi, haù Israelaq byu pé hkyi yu é hui kó sháng gaq nghú, gyai yang myit shirông lui, Garai Gasâng chyáng yangmoq é matú kytdung byi nyi lhê. ² Hkâsu mù gâ le, yangmoq gi, Garai Gasâng é hkyô lé gyai yang myit zuq é bang nghut é lé, ngò saksé hkâm lhê; nghut kôlhang, yangmoq myit zuq é hkyô gi, hpaqchyí bo é dông a nghut kó. ³ Yhangmoq gi, Garai Gasâng chyáng mai jé lé é dingmán hkyô lé a sé kômù, yhumsing dingmán bûn é hkyô lé za ho shikut nyi kó é yanmai, Garai Gasâng é dingmán hkyô hkaù má a nyi kó nghut ri. ⁴ Hkrisduq gi, lumjing bang yuq hkangmó, dingmán é má wó jé kó sháng gaq ga, jep é tará lô htúm jang dut bê nghut ri.

⁵ Mosheq gi, "Haù pé dông châng é sù gi, haù pé mai asak dui rá nghut lhê."* ga, jep é tará eq sêng é dingmán hkyô lé kâ sân kyô tô é nghut lhê. ⁶ Nghut kôlhang, lumjing hkyô eq sêng é dingmán hkyô gi, "Náng é myit nhikhlum má, 'Mauhkúng má, ó yuq doq lô rá lúhú?*" (Haù gi, Hkrisduq lé shuí gyó lô rá gá nau é nghut lhê), ⁷ haù a nghut jáng, "Nik é jang má, ó yuq gyó wáng rá lúhú?*" (Haù gi, Hkrisduq lé, shi é mai dui toq nhâng rá gá nau é nghut lhê.), nghú hkâtaí kó." gâ tô ri. ⁸ Haù jáng, hkâsu gâ tô ri lúhú? "Haù mungdang gi, náng eq chyáng nyi ri; náng é nhut má le, náng é myit nhikhlum má lé nghut nyi ri."* gâ tô ri. Haù gi, ngamoq hko taí é lumjing hkyô eq sêng é mungdang nghut lhê. ⁹ Haù mù, "Yesuq gi, Yhumsing nghut ri." nghú náng é nhut eq yin yù mù, Garai Gasang gi, Yhang lé, shi é mai dui toq nhâng bê nghut lhê nghú, náng é myit nhikhlum má lumjing é nghut jáng, náng gi, hkyi yu é hui rá nghut lhê. ¹⁰ Hkâsu mù gâ le, byù gi, myit nhikhlum má lumjing jáng, mara hkyut san byí é hui mù, nhut mai yin yù jáng, hkyi yù huí é nghut lhê. ¹¹ Haù Chyúmdang taí é gi, "Yhang lé lumhkaú é sù ó yuq le, hkânhám lhang hoq hpú é hui rá a nghut."* gâ ri. ¹² Hkâsu mù gâ le, Yudaq byù eq tungbaù pé é gyoro má gam hkoq é hkyô haí le a joq é za, haù Yhumsing gi, banshoq bâng é Yhumsing nghut lhê mù, Yhang lé wut dung bang lhunglhang lé, agùn agó shimán byí ri. ¹³ Hkâsu mù gâ le, "Haù Yhumsing é mying lé llang é bang yuq hkangmó gi, hkyi yu é hui rá nghut lhê."* gâ tô ri.

¹⁴ Haù nghut lé gi, yangmoq a lumjing é sù lé nhing, hkâsu wó wut dung kó rá lúhú? Yhangmoq a wó gyô wú é sù lé nhing, hkâsu wó lumjing kó rá lúhú? Hko kyô é sù a nyi lé nhing, hkâsu wó gyo kó rá lúhú? ¹⁵ Nhang kat é a hui le gi, yangmoq hkâsu kut wó

hko kyo kó rá lúhú? Haù eq rajung za, "Gabú danglù pé hko kyo bâng é hkyi-kám pé gi, hkâ-í yhang yung ri myhi-nhung!"* ga kâ tô ri.

¹⁶ Nghut kôlhang, Israelaq byu pé banshoq bang gi, gabú danglù lé hap yù kô é a nghut. Hkâsu mù gâ le, Esai-aq gi, "Yhumsing é, ngamoq é danglù lé ó yuq wá lumjing é lúhú?*" ga taí ri. ¹⁷ Haù nghut mù lui, lumjing myit gi, danglù lé wó gyô é mai lò mù, danglù gyô yu é gi, Hkrisduq é mungdang mai lo é nghut lhê. ¹⁸ Nghut kôlhang, ngò myi kó lé: yangmoq gi, a wó gyô wú kó é nghut lhê lúhú? Yhangmoq gi, wó gyo gù za nghut lhê, haù eq rajung za,

"Yhangmoq é htê gi, myidám htoq banshoq má jâm bê nghut ri;

yhangmoq é mungdang pé gi, mingkan htungchyùn hkangmó má jé bê nghut ri."*

gâ tô ri. ¹⁹ Ngò dum myi kó lé: Israelaq byu pé gi, a sé gyo kó é nghut lhê lúhú? Mosheq sâng-hi má taí é gi,

"Byù rahú lhang a nghut bang eq, Ngò, nungmoq lé manôn nhâng rá;

sê gyo nyan a bo é amyu eq, Ngò, nungmoq lé wú nhik-yo nhâng rá nghut lhê."*

gâ ri. ²⁰ Hau htoq agó, Esai-aq a gyuq a wám taí é gi,

"Ngo lé a ho é bang gi, Ngo lé myang hô bekó nghut ri;

Ngá hkyô lé a myí é bang lé, Ngò htoq shít bê nghut lhê."*

gâ ri. ²¹ Nghut kôlhang, Israelaq byu pé eq séng lui, Yhang taí é gi,

"Ngò gi, jìno a gyô é eq ngegàng-htu é byù myí lé, nyi wui Ngá loq lham mù jì nyi lhê."*

gâ ri.

11

Israelaq Byu Pé Lé A He-ngik Pyám

¹ Haù mù lui, ngò myi kó lé, Garai Gasang gi, Yhâng é byu pé lé he-ngik pyám bê nghut lhê lúhú? Ratsui lhang a nghut! Ngò yhang le, Israelaq byu myú nghut lui, Abraham é awut ashín eq Ben-yamyin hú má é sù nghut lhê. ² Garai Gasang gi, Yhang te sé to gù nghut é, Yhâng é byu pé lé a he-ngik pyám é nghut lhê. Eliyaq eq sêng é hkyô Chyúmdang má bo tô é lé, nungmoq a sé kó lúhú? Garai Gasâng é hí má, yhang, Israelaq byu pé lé mara hùn é, ³ "Yhumsing é, yangmoq gi, Náng é myiqhtoi pé lé sat pyám kô é eq Náng é hkungga gyap pé lé tu lhêng pyám akó nghut ri; ngò rayuq za myit gyô tô é nghut lui, ngo lé sat rá matú le yhangmoq

* 10:5 Nhong 18:5 * 10:6 Tará Pun 30:12 * 10:7 Tará Pun 30:13 * 10:8 Tará Pun 30:14 * 10:11 Esai 28:16 * 10:13 Yol 2:32 * 10:15 Esai 52:7 * 10:16 Esai 53:1 * 10:18 Hkya-on 19:4 * 10:19 Tará Pun 32:21 * 10:20 Esai 65:1 * 10:21 Esai 65:2 * 11:3 1 Hko 19:10,14

ho nyi akò nghut ri."^{*} gâ ri. ⁴ Garai Gasang gi, yang lé, hkâsu ga tú taí é nghut lhê lú? Haú gi, "Balaq hpara é hí má hkyihput a htuoq shí é byù nyhit hkying lé, Ngá é matú myhit to lhê."^{*} gâ é nghut lhê. ⁵ Haú eq rajung za, ahkuí gi, jeju yanmai hkyin yù huí é bang za myit gyó tô é nghut lhê. ⁶ Jeju yanmai nghut é nghut le gi, muzó é yanmai a nghut lo; muzó dòng ru nghut le gi, jeju gi, jeju a nghut lo.

⁷ Haú nghut jáng, hkâsu lú? Israelaq byu pé gyai ho shikut kôhang, a wó kô é lé, hkyin htoq yù huí é bang kúm gi, wó bekò nghut ri. Góbang gi, myit lhoq htân byí é hui akò nghut ri; ⁸ haú gi,

"Garai Gasang gi, hkú-nyí jé shoq, yangmoq lé nhikshi jit é woi-nyí lé le, a wó myang é myoqjí lé le, a wó gyó é nohkyap lé le, byí to bê nghut ri."^{*}

ga kâ tô é eq rajung za nghut ri. ⁹ Dawiq taí é le,

"Yangmoq é zangbó gi, yangmoq é matú, dumzo eq lhai, myit leqbat jowò eq lató hpuq hkyô dut sháng gaq;

¹⁰ Yangmoq myoq a wó myâng shoq, myoqjí lhoq chut pyám byí é hui sháng gaq;

yangmoq é nungkhúng gi, ayang wólai wun goí nhang é hui sháng gaq."^{*}

gâ ri.

Túngbaú Pé Lé Hkyi Yu É Hkyô

¹¹ Ngò dum myi kó lé: Israelaq byu pé gi, a wó dum gè rá í leqbat byuq bekò lú? Ratsuí lháng a nghut! Yangmoq é tará lu lai hkyo é yanmai, yangmoq lé manôn nhâng rá matú, hkyi yù hkyô gi, túngbaú pé chyáng jé byuq é nghut lhê. ¹² Nghut kôhang, yangmoq é tará lu lai hkyô gi, mingkân é matú wó sùt hkyô eq, yangmoq sum pyám é hkyô gi, túngbaú pé é matú wó sùt hkyô dut é nghut jáng, yangmoq é bying jup hkyô gi, je riyhang kô é wó sùt hkyô dut rá nghut ri-nhung!

¹³ Nungmoq túngbaú pé lé ngò taí nyi lhê: ngò gi, túngbaú pé é lagyo nghut nyi é u má, ngá é hpungmú lé hpautap nyi lhê. ¹⁴ Haú gi, ngá é amyú pé lé manôn myit wó bô nhâng mù, yangmoq ra-am lé wó hkyi yù rá lé myit myoqbyu é hkyô nghut lhê. ¹⁵ Hkâsu mù gâ le, yangmoq lé he-ngik pyám é hkyô gi, mingkân é matú Garai eq buinôm xoq hkyô dut bê nghut jáng, yangmoq lé dum hap yu é hkyô gi, shí é mai dui toq é dòng dut bê a nghut lhi? ¹⁶ Hau htoq agó, sâng-hí ashí dòng nhông byí é mún ra-am gi, chyoiyúng é nghut jáng, muk htung gón gi, chyoiyúng é nghut lhê; haú amyit gi, chyoiyúng é nghut jáng, akoq pé le chyoiyúng é nghut lhê.

¹⁷ Haú tsanlun akoq pé^{*} ra-am gi, lhoq hkyui pyám é hui luí, yosó tsanlun a-nyuq[†] nghut sù náng gi, haú pé má xoq é hui mù, haú tsanlun amyit é xú lé bo shuq lom é nghut jáng, ¹⁸ akoq haú pé lé hkâwú tiq pyám kó. Nungmoq haú su kut é nghut jáng, nungmoq gi, haú amyit lé htuoq é a nghut é za, amyit haú sheq nungmoq lé htuoq é hkyô lé, nungmoq myit sé keq. ¹⁹ Nungmoq kúm gi, "Ngò, haú má xoq é hui rá matú sheq, akoq haú pé gi, lhoq hkyui pyám é hui é ru nghut lhê." ga taí rá nghut lhê. ²⁰ Haú su gi, nghut lhê. Nghut kôhang, yangmoq gi, a lumjáng é yanmai, lhoq hkyui pyám é hui kômù, nungmoq kúm gi, lumjáng é yanmai, wó ging ting nyi é nghut lhê. Hká gumrong nyi, gyuq kyum nyi keq. ²¹ Hkâsu mù gâ le, Garai Gasang gi, akoq akying pé lé a ha bún é nghut le gi, nungmoq lé ha bun rá a nghut.

²² Haú mù luí, Garai Gasang é shogyo nhikmyin hkyô eq htân htân kut pyám é hkyô lé, myit wú keq: leqbat é bang lé htân htân kut pyám kôhang, nungmoq gi, Yhâng é shogyo nhikmyin hkyô má xoq nyi nyi é myhâng, nungmoq lé gi, shogyo nhikmyin nyi rá nghut lhê. Haú a nghut jáng, nungmoq le, zán hpyit pyám é hui rá nghut lhê.

²³ Yangmoq gi, a lumjáng hkyô lé tô pyám kô é nghut jáng, dum xoq yu é hui kó rá nghut lhê; hkâsu mù gâ le, Garai Gasang gi, yangmoq lé dum wó xoq yu é Sù nghut lhê. ²⁴ Haí mù gâ le, yosó tsanlun gám akoq nghut gù nungmoq lé hpyit yù mù, htung a nghut é dòng, hô é tsanlun agám má xoq é nghut le gi, haú akoq akying pé nghut é yangmoq gi, ó le ó é tsanlun-ngut akying má xoq yu é lé je riyhang hui rá nghut lhê ó!

Israelaq Byu Pé Hkyi Yu É Hui Rá Hkyô

²⁵ Haú mù, gumang wui é, nungmoq a nghutbun kó sháng gaq ngàú, zau tô é hkyô shí lé, nungmoq a sé dut rá lé, ngò a ô nau é nghut lhê; haú gi, túngbaú pé wang lo é laké bying é hkún jé shoq, Israelaq byu pé ra-am gi, myit lhoq htan é hui é hkyô nghut lhê.

²⁶ Hau htâng sheq, Israelaq amyú banshoq bang hkyi yu é hui rá nghut lhê. Haú gi,

"Hkyi yù Sù gi, Zi-un bùm mai htoq lô rá nghut lhê;

Yhang gi, Garai lé nunghtáng tô pyám é hkyô lé, Yakup é awut ashín mai huí sêng pyám byi rá nghut lhê.

²⁷ Ngò, yangmoq é yubak mara lé huí sêng pyám byi jáng,

haú gi, yangmoq lé Ngò byí tô é Ngá é dangshikaq nghut lhê."^{*}

ga kâ tô é eq rajung za nghut ri.

²⁸ Haú gabú danglú eq sêng luí ga jang, yangmoq gi, nungmoq é matú gyè nghut

^{*} 11:4 1 Hko 19:18 ^{*} 11:8 Tará Pun 29:4 ^{*} 11:10 Hkya-on 69:22-23 ^{*} 11:17 Tsanlun akoq pé gi, Israelaq byu pé lé taí nau é nghut lhê. [†] 11:17 Yosó tsanlun a-nyuq gi, túngbaú pé lé taí nau é nghut lhê. ^{*} 11:27 Esai 59:20-21; 27:9

akô; nghut kôlhang, hkyin htoq yû hkyô eq séng luí ga jang, yhangmoq gi, mying hú é íchyí íwa pé é yanmai, chyitdap é huí akô nghut ri; ²⁹ Hkâsu mù gà le, Garai Gasâng é chyunghuq pé eq Yhang ji yu é hkyô lé gi, wó htaí lhik pyâm é a nghut. ³⁰ Nungmoq gi, Garai Gasâng é jino a gyô é bang radâm dut wú kô é nghut kôlhang, yhangmoq jino a gyô é yanmai, ahkuí kúm, shogyo nhikmyin hkyô wó hkam yû wó bekô nghut é su, ³¹ ahkuí, yhangmoq gi, nungmoq wó hkam yu é Garai Gasâng é shogyo nhikmyin hkyo é yanmai, shogyo nhikmyin hkyô lé wó hkam yû kó sháng gaq ga, yhangmoq le, ahkuí, jino a gyo bang dut bekô nghut ri. ³² Hkâsu mù gà le, Garai Gasang gi, byû lhunglhang bang lé, shogyo nhikmyin hkyô wó tún shit shoq ga, lhunglhang bang lé, jino a gyo hkyo é shum dut nhang to bê nghut ri.

Hkya-on Kungton Dang

³³ Ô! Garai Gasâng é agùn agó é sùt nghut é, hpaqchyí byéng-yá eq nyan hpaqchyí gi, hkâ-i yhang nik ri-nhung!

Yhâng é tará jéyang hkyô gi, ung sê jung a nghut nhung!

Yhang kut é hkyô pé gi, hkâ-i yhang ho htoq wú jung nghut ri-nhung!

³⁴ "Haù Yhumsing é myit lé, ó yuq wá ung sê lhê lú? Yhâng é hpaqchyí byi sù gi, ó yuq wá dut wú é lú?"[✧] gâ ri.

³⁵ "Garai Gasâng eq jeju dum tau byi rá dut shoq, ó yuq wá, Garai Gasang lé byi wú é lú?"[✧] gâ ri.

³⁶ Hkâsu mù gà le, joq mijog gi, Yhâng chyáng mai nghut mù, Yhang dông mai nghut luí,

Yhâng é matú chyat nghut ri. Haù hpungwup shing kang gi,

Yhâng chyáng ahtum abyuq ru joq nyí sháng gaq ô! Amen.

12

Dui É Hkungga Pé Dut Râ Hkyô

¹ Haù mù luí, gumang wui ê, nungmoq é gungdu pé lé, Garai Gasang myit ngui ô nau é eq chyoyíung é, dui é hkungga dông nhông byi keq nghú, Garai Gasâng é shogyo nhikmyin hkyô mai, ngò, nungmoq lé wum byi kat lhê. Haù gi, woi-nyí hkyô dông nungmoq noqkuq dojaú é hkyô nghut lhê. ² Mingkan shí lhum é sâmlai dông a cháng lo é za, myit sik wó yû rá dông nungmoq é a-kyang lé htaí pyám byi nhâng keq. Haù hkún sheq, Garai Gasâng é ge é, myit ngui é eq gumjup é ô nau hkyô lé, nungmoq wó chyám, wó sê gâm hkoq yû kó rá nghut lhê.

³ Hkâsu mù gà le, ngo lé byí tô é jeju yanmai, nungmoq yuq hkangmó lé ngò tai kôlé: nungmoq gi, yhumsing gung lé lai shoq a nghutbún é za, ó le ó lé, Garai Gasâng eq lumjáng myit tsing gâm byí to bê eq rajung za, myit yû gíng é í za myit yu keq. ⁴ Nga-nhung yuq hkangmó é gungdu ralhummá gi, gungdu showui showang pé myo myo bo é nghut luí, gungdu showui showang haù pé banshoq gi, jai chùng jang a pung é nghut lhê. ⁵ Haù eq rajung za, myo myo nghut é nga-nhung le, Hkrisduq má gungdu ralhummá za dut luí, yuq hkangmó gi, rayuq eq rayuq gungsho séng lhum é bang chyat nghut lhê.

⁶ Nga-nhung lé byí tô é jeju yanmai, nga-nhung wó é chyunghuq gi, gotú tú nghut lhê. Byû rayuq é chyunghuq gi, myiqhtoi htoi é nghut jáng, yhâng é lumjáng hkyô eq rajung za htoi sháng gaq; ⁷ dojaú é nghut jáng, dojaú sháng gaq; mhoq kyô é nghut jáng, mhoq kyo sháng gaq; ⁸ myit wum byí é nghut jáng, myit wum byi sháng gaq; ra chá é bang lé garúm byí é nghut jáng, a ha bún é za byi sháng gaq; shuí u é nghut jáng, lumluq tung shuí u sháng gaq; shogyo nhikmyin hkyô shit é nghut jáng, gabú myit eq kut sháng gaq.

Chyitdap Myit

⁹ Chyitdap myit má gegùn labyoq a ge bò. Agè ashop dut é lé, nhik noq pyám keq; ge é lé, myit tú nyi keq. ¹⁰ Rayuq eq rayuq, gumang chyitdap myit mai lhumzui lhum keq. Rayuq eq rayuq, yhumsing gung htoq je hpaupat lhum keq. ¹¹ Myit zuq hkyô má, hkâ-nhám le wum a lhoq shôm é za, nungmoq é woi-nyí hkyô má myit toq nyí mù, haù Yhumsing lé dojaú nyi keq. ¹² Myit myoqbyû hkyô má gabú keq; wuihke hkyô má hkam jan keq; kyúdung hkyô má lhumzui keq. ¹³ Ra chá tô é Garai Gasâng é byu pé lé gâm byi keq. Bíng hkulum é lé rago kut keq.

¹⁴ Nungmoq lé zing-rí é bang lé shimân byi keq; shimân byi keq, hkâ-nhing kó. ¹⁵ Gabú é bang eq rahá bo gabú keq; yón é bang eq rahá bo yón keq. ¹⁶ Rayuq eq rayuq byin hpyé gohut huí nyi keq. A nghutbún é za, nyí yap hkyô nyhúm bang eq zùm yap keq. Hpaqchyí bo é sù su hkâ-myt ngàm kó.

¹⁷ Ó yuq lé le, agè ashop é yanmai, agè ashop é dông lató hkâhpuc kó. Yuq hkangmó é myoq hí má ge é lé kut rá rago myit keq. ¹⁸ Wó dut é nghut jáng, nungmoq wó dut é í, yuq hkangmó eq nguingón shoq nyi keq. ¹⁹ Ngá é buinùm wui ê, lató a hpuc é za, Garai Gasâng é nhikmo-yo hkyô lé sheq lánng nyi keq. Hkâsu mù gà le, "Ngò sheq lató hpuc rá sù nghut lhê; ngò lató hpuc rá."[✧] ga, haù Yhumsing tai ri ga ká tô ri. ²⁰ Haù mù,

"Nungmoq lé gyè kut sù zòmút é nghut le gi, byi tso keq; yhang wuishit é nghut le gi, rajung jung byi huq keq.

Haù dông kut jáng, nàng, yhâng é ulhum htoq má gyúng é myigye bum to byi é nghut lhê."[✧]

ga le kâ tô ri. ²¹ Agè ashop é gi, nungmoq lé a ung pyám sháng gaq, ge é hkyo èq agè ashop é lé ung pyám keq.

13

Ahkáng Ayá Wó Bàng Ó Má Nyi Râ É Hkyô

¹ Yuq hkanmó gi, up é ahkáng ayá wó bàng é a-ò má nyi ra rà nghut lhê; hkâsu mù gà le, Garai Gasâng chyàng mai za a nghut le gi, up é ahkáng ayá joq é a nghut. Joq tô é ahkáng ayá pé gi, Garai Gasâng èq byi tô é chyat nghut lhê. ² Hau é yanmai, up é ahkáng ayá lé gumlau toq é sù gi, Garai Gasang byi tô é up é ahkáng ayá lé gumlau toq é sù nghut ri; haù su kut é bang gi, tarâ jéyáng é hui zo rà hkyô lé ho yù nyi é bang nghut akô. ³ Hkâsu mù gà le, uphkan é bang gi, ge é hkyô kut bàng é matú gyuq nán hpo a dut é za, shut shaí hkyô kut bàng é matú sheq dut é ru nghut lhê. Up é ahkáng wó sù lé gyuq é mai lut nau lhê a nghut líh?

Haù jáng, ge é hkyô kut aq, haù hkân, yhang, nang lé hkya-on rà nghut lhê. ⁴ Hkâsu mù gà le, yhang gi, náng é matú ge é akyû kut byi rà nghut é, Garai Gasâng é dui-nhâng zoshâng nghut lhê. Nghut kôhang, nàng, shut shaí hkyô kut é nghut le gi, gyuq nán nyi aq; haù mù gà le, yhang gi, shâm lé ajè wun tô é a nghut. Yhang gi, Garai Gasâng é dui-nhâng zoshâng nghut mù, shut shaí hkyô kut sù lé dam byi rà matú nhikmo-yo Su é gunglik nghut lhê. ⁵ Haù mù luí, dam byi rà lé chiq é yanmai za a nghut, yhumsing nhik bô rà é yanmai le, haù up é ahkáng ayá wó bàng é a-ò má nyi rà dut lhê.

⁶ Nungmoq hkansé kat rà é gi, hau é yanmai le nghut lhê; hkâsu mù gà le, haù up é ahkáng ayá wó bang gi, Garai Gasâng é dui-nhâng zoshâng wui nghut lhê mù, uphkan é mù lé, ahkying bying shoq wun waq nyi akô nghut ri. ⁷ Yuq hkanmó lé byi àng é eq rajung za byi keq: hkansé kat byi ang sù lé gi, hkansé kat byi keq; kang kat byi ang sù lé gi, kang kat byi keq; gyuq kyum ang sù lé gi, gyuq kyum keq; hkungga ang sù lé gi, hkungga keq.

Rayuq Eq Rayuq Chyitdap Lhum Râ Hkyô

⁸ Rayuq eq rayuq chyitdap lhùm é chyin mai lai luí, hai chyin le hkâdap lhùm kó; hkâsu mù gà le, góyuq lé chyitdap é sù gi, haù jep é tarâ lé lhoq dik bê sù nghut ri. ⁹ "Su-myi sulàng lú hkyô hkâkut," "Byù hkâsat," "Hkâhkau," "Hkâ-myoqnoq,"[✧] gà tô

é hkunmó pé eq gotú hkunmó hai nghut nghut, "Náng gúng lé nàng chyitdap é su, náng é chyangnâm má é bang lé le chyitdap aq."[✧] gà é tarâ má lo jup to bê nghut lhê. ¹⁰ Chyitdap myit gi, chyangnâm má é byù lé a ge é haí le a kut é nghut lhê. Haù mù luí, chyitdap myit gi, haù jep é tarâ lé lhoq dik é hkyô nghut ri.

¹¹ Haù mù, ahkuí lhê é ahkying yàm-yoq lé sê gyo luí, haù hkyô lé kut keq. Nungmoq yhup mui é mai bân gyíng rà ahkying jé bê; hai mù gà le, nga-nhúng é hkyi yù hkyô gi, lumjing hí é hkun lhê htoq má ahkuí je chyáng bê nghut ri. ¹² Haù myin ahkying gi, lai byuq ló rà za nghut bê; nyi ahkying gi, jé lô berâ nghut lhê. Haù mù luí, mauchut é muzó lé tô pyám mù, maubó é gyecking lé wut to sháng. ¹³ Ye lhai é eq shuq wut é, ashop é dông gungsho zùm yap é eq shut é dông nyi zô lhùm nau é myit bo é, mabyoq jishùm htoq é eq manon é pé a kut é za, nyi-káng lhê su, ge é a-kyang dông nyi yap sháng. ¹⁴ Hau htoq agó, Yhumsing Yesuq Hkrisduq lé, mebu su wut to keq; yubak gungsho ô nau é dông lhoq dik rà matú hkâ-myt kó.

14

Gumang Wui Lé A Jéyáng Râ Hkyô

¹ Lumjing myit má wum nyhóm sù lé, mying myo nhô zâ é hkyô pé lé a jéyáng byi é za hap yù keq. ² Byù rayuq é lumjing myit gi, jung hkanmó zô ri; nghut kôhang, lumjing myit nyhóm sù gotú rayuq gi, mhan-haq hpoqnoq za zô ri. ³ Jung hkanmó zô sù gi, a zo sù lé a ge wú tiq pyám; jung hkanjung mó a zo sù gi, zo sù lé mara a ge byi; hkâsu mù gà le, Garai Gasang gi, yhang lé hap yu to bê nghut ri. ⁴ Nàng gi, ó yuq wá nghut mù, góyuq é dui-nhâng zoshâng lé jéyáng lhê luí? Yhang, yap ging kôhang, leqbat kôhang, yhâng é yhumsing myit za nghut lhê. Yhang gi, wó yap ging rà nghut lhê; hkâsu mù gà le, haù Yhumsing gi, yhang lé wó yap ging nhâng Sù nghut lhê.

⁵ Rayuq myit é gi, buinyi ra-nyí gi, gó nyi htoq je ge lhê gà ri; dum rayuq myit é gi, nyi wui rajung za nghut lhê gà ri. Yuq hkanmó gi, yhumsing myit yu é lé a úng-àng nyi sháng gaq. ⁶ Buinyi ra-nyí lé, ahkyak lhê ga myit yù sù gi, haù Yhumsing é matú kut é nghut ri. Zô é sù gi, Garai Gasang lé jeju hkya-ôn é yanmai, haù Yhumsing lé bun luí zô nyi ri; a zo sù le, haù Yhumsing lé bun luí Garai Gasang lé jeju hkya-ôn nyi ri. ⁷ Hkâsu mù gà le, nga-nhúng ó yuq nghut kôle, yhumsing matú za asak dui é a nghut; ó yuq nghut kôle, yhumsing matú za shi é a nghut. ⁸ Nga-nhúng asak dui nyi le gi, haù Yhumsing é matú dui é ru nghut lhê; nga-nhúng shi byuq le gi, haù Yhumsing é matú

✧ 12:20 Sânghkyang 25:21-22 ✧ 13:9 Htoq Lô 20:13-15

✧ 13:9 Nhong 19:18

shi é ru nghut lhê. Haù mù, asak dui nyi kôlhang, shi byuq kôlhang, nga-nhúng gi, haù Yhumsing eq sêng é bang nghut lhê.

⁹ Haù su mù, Hkrisduq gi, shi byuq bang eq asak dui bâng é Yhumsing dut sháng gaq, shi hkám mù dum dui toq é nghut lhê.

¹⁰ Haù mù, nàng gi, haù mù nàng é gumang hpó lé jéyáng nyi lhê lúh? Haù mù nàng é gumang hpó lé wú tiq nyi lhê lúh? Nga-nhúng lhunglhang bang gi, Garai Gasang é tará jéyáng tanghkuq hí má yap rá bang chyat nghut lhê. ¹¹ Hkâsu mù gà le,

"Haù Yhumsing gi, 'Ngò rú dui nyi é eq rajung za, Ngá é hí má hkyihput hkangmó htur rá nghut lhê;

Garai Gasang lé, shô hkangmó eq yín yú kó rá nghut lhê.' ga tai ri."*

ga kâ tô ri. ¹² Haù mù luí, nga-nhúng yuq hkangmó gi, yhumsing kut lai lo é hkyô lé, Garai Gasang chyáng shit ra rá nghut lhê.

¹³ Haù nghut mù, nga-nhúng gi, rayuq eq rayuq tará jéyáng lhùm é hkyô lé tô pyám sháng. Ó yuq nghut kôlhang, yhumsing é gumang é hkyowui má, myit leqbat jowò eq htung htê jowò a to byi rá matú, myit sidiq keq. ¹⁴ Haù Yhumsing Yesuq má nghut nyi é sù ngò gi, haù jung zoshuq nghut kôlhang, yhang baù yhang a sansêng a dut é hkyô lé, hkyak wó sé luí, jing nyi lhê. Nghut kôlhang, ó yuq le, rajung jung lé a sansêng ga myit yu é nghut jáng, yhang é matú, zê haù gi, a sansêng é nghut lhê. ¹⁵ Nàng zô é zoshuq yanmai, nàng é gumang hpó myit a ngón é nghut le gi, nàng, chyitdap myit mai sô nyi é sù a nghut lo. Hkrisduq shi hkám byi bé sù nghut é, nàng é gumang hpó lé, nàng zoshuq é đông mai hkálhoq hten pyám. ¹⁶ Nàng, ge ri ngù myit yu é hkyô lé, agé ashop é đông hkâtai pyám nhâng. ¹⁷ Hkâsu mù gà le, Garai Gasang é mingdán gi, zo zo shuq shuq hkyô a nghut é za, dingmán hkyô, nguingón hkyô eq Chyoiyung Woi-nyi má gabú é hkyô ru nghut lhê. ¹⁸ Haù mù gà le, shi hkyô đông mai Hkrisduq lé dojaù é sù gi, Garai Gasang ô nau é sù eq byu pé eq hkyá-ôn é hui sù nghut ri.

¹⁹ Haù mù luí, nguingón hkyô má nyi rá eq, rayuq eq rayuq wum byi lhum rá hkyô lé, shikut nyi keq. ²⁰ Zoshuq é yanmai, Garai Gasang é muzó lé hkálhoq hten pyám. Zoshuq lhunglhang gi, sansêng é chyat nghut lhê; nghut kôlhang, góyuq lé myit leqbat nhang é jung lé zô é sù gi, shut é nghut lhê. ²¹ Tsibiyiq wing shuq é eq sho zô é hkyô má nghut kôlhang, gotú haù jung kut é nghut kôlhang, nàng é gumang hpó lé myit leqbat nhang é nghut le gi, a kut le je ge lhê.

²² Haù mù, haù pé eq séng luí, nàng lumjing é haù nghut kôle, nàng eq Garai

Gasang gyoro má za joq nyi sháng gaq. Yhumsing ge lhê gà é eq, yhumsing gùng yhumsing mara byi jang a joq é sù gi, hkungso wó nyi ri. ²³ Nghut kôlhang, úng-àng é myit eq zô é nghut le gi, mara byi é hui ri, haù mù gà le, yhang zô é gi, lumjing myit mai a nghut; lumjing myit mai a kut é haù nghut kôlhang, mara nghut ri.

15

Góyuq Lé Myit Ngón Nhâng Râ Hkyô

¹ Lumjing hkyô má wum-o bo é nga-nhúng gi, yhumsing myit ngón rá hkyô lé a ho é za, wum-o a bô bâng é wum nyóm hkyô lé, hkam jan byi nyi rá dut lhê. ² Nga-nhúng yuq hkangmó gi, yhumsing é chyangnâm má é su é ge é hkyô dut rá matú, yhang wó kô myhang lò shoq, yhang lé lhoq ngón byi nyi sháng. ³ Hkâsu mù gà le, Hkrisduq lhang gi, Yhânggung yhang lhoq ngón é a nghut; haù gi, "Nang lé rhoi bâng é dang gi, Ngá chyáng gyó ke bê nghut ri."* ga, kâ tô é eq rajung za nghut ri. ⁴ Hkâsu mù gà le, lai lô bê hkún kâ tô é lhunglhang gi, nga-nhúng lé mhoq byi rá matú chyat kâ tô é nghut lhê; haù gi, Chyúmdang má é hkam jan hkyô eq myit wum byi hkyô đông mai, nga-nhúng myit myoqbyù hkyô wó rá matú nghut lhê.

⁵ Haù hkam jan hkyô eq myit wum byi hkyô lé byi é Garai Gasang gi, nungmoq, Hkrisduq Yesuq é htang châng nyi é u lé, nungmoq yhangchang rading ralhum za dut é woi-nyi byi sháng gaq; ⁶ haù jáng sheq, nungmoq gi, i-myt rahkat eq nhut htê ralhum eq za, nga-nhúng é Yhumsing Yesuq Hkrisduq é Yhângwa nghut Sù, Garai Gasang lé, wó hkyá-on kungtôn kó rá nghut lhê.

⁷ Haù mù luí, Hkrisduq gi, nungmoq lé hap yu bé é eq rajung za, Garai Gasang é hpungwup shing kang lé lhoq htoq shit rá matú, nungmoq le, rayuq eq rayuq hap yu lhum keq. ⁸ Hkâsu mù gà le, ngò, nungmoq lé tai kôle, haù mying hù é ichyi iwá pé lé byi tô é danggididq pé lé lhoq ging rá matú, Hkrisduq gi, Garai Gasang é tengmán hkyô é malaí, Yudaq byu pé é dui-nhâng zoshâng dut bê nghut ri. ⁹ Haù mù, Garai Gasang é shogyo nhikmyin hkyô é yanmai, haù tungbaù pé, Garai Gasang lé wó hkyá-on kungtôn kó rá nghut lhê. Haù hkyô gi,

"Haù mù luí, tungbaù pé chyáng má, Nang lé, ngò hkyá-on rá nghut lhê;

Nàng é mying lé, ngò hkyá-on mahkôn rá nghut lhê."*

ga kâ tô é eq rajung za nghut ri. ¹⁰ Dum, "Tungbaù pé ê, Yhâng é byu pé eq rahá gabú nyi keq."*
gâ tô ri. ¹¹ Dum,

* 14:11 Esai 45:23 * 15:3 Hkya-on 69:9 * 15:9 Hkya-on 18:49 * 15:10 Hkya-on 32:43 * 15:11 Hkya-on

"Nungmoq tũngbaù pé lhunglhang bang ê, haù Yhumsing lé hkyá-on keq, byù myù lhunglhang bang ê, Yhang lé hkyá-on mahkôn hkôn keq."¹²

gâ tô ashí nghut ri. ¹² Hau htoq agó, Esai-aq taí é gi,

"Yese é Amyit gi, yuq htoq lô lui, Yhang gi, byù myù chãngjup é ahtoq má up rá sù nghut lhê;

tũngbaù pé gi, Yhang má myit myoqbyù kó rá nghut lhê."¹³

gâ ri.

¹³ Haù myit myoqbyù hkyô byí é Garai Gasang gi, Yhang lé lumhkau nyi é bang nungmoq lé, gabú hkyô banshoq eq ngu-ingón hkyô lhoq pyíng byi sháng gaq; haù jáng sheq, nungmoq gi, Chyoiyúng Woi-nyí é wum-o a-tsâm èq, myit myoqbyù hkyô wó byíng mui nyi kó rá nghut lhê.

A Gyuq A Wam É Za, Poluq Laiká Ká É Hkyô

¹⁴ Ngá é gumang wui ê, nungmoq gi, ge é hkyô byíng jup é bang, hpaqchyí má gumjup é bang, rayuq eq rayuq mhoqshit lhùm é má kũng é bang nghut é lé, ngá gũng ngò yhang hkyak lumjĩng lhê. ¹⁵ Ngò gi, nungmoq lé dum lhoq pũn é dõng, ahkyak é pé ra-am lé a gyuq a wãm ká kat bê nghut lhê. ¹⁶ Hkâsu mù gâ le, tũngbaù pé gi, Chyoiyúng Woi-nyí dõng mai lhoq sân-yũng é hui lui, Garai Gasang èq hap yù gĩng é hkungga wó dut kó sháng gaq ga. Garai Gasang é gabú danglù lé hkò rá hkyangjong é wò dõng, tũngbaù pé chyáng, Hkrisduq Yesuq é hpungmũ wũn sù dut rá matú, Garai Gasang, ngò lé jeju byí é yanmai nghut lhê.

¹⁷ Haù mù lui, ngò gi, Garai Gasang lé dojaù é hkyô eq séng lui, Hkrisduq Yesuq má nghutbũn nyi lhê. ¹⁸ Ngò gi, ngò taí é eq zui saí é muzó dõng le, haù Woi-nyí é a-tsam chũng mù, kumlhá pé eq laklái kumlhá pé dõng le, tũngbaù pé lé, Garai Gasang é jĩno gyo shoq shuá ù é má, ngo lé Hkrisduq nhang é muzó hkyô lé taí é mai lai lui, gotú haí lé le wãm taí é a nghut. ¹⁹ Haù mù lui, ngò gi, Yerusalem wá mó mai Lurihkam mau jé shoq é hkyô awui ayám jãm shoq, Hkrisduq é gabú danglù lé hko kyo bê nghut lhê. ²⁰ Ngò hkâ-nhám le myit tuí nyi é hkyô gi, góyuq hi tô é apũn awang má dum a puq saí pyám é za, Hkrisduq lé a sé shi é jowò má gabú danglù hko kyo rá hkyô nghut lhê. ²¹ Haù gi,

"Yhâng é hkyô lé, taí kyô é a hui shí é bang, myàng kó rá nghut lui,

a wó gyô wú é bang, sê gyo kó rá nghut lhê."²²

ga ká tô é eq rajung za nghut ri. ²² Haù mù lui, ngò, nungmoq chyáng lé jé rá lé, anum

num hkyikyo luqlhum dut nyi é gi, muzó hau é yanmai nghut lhê.

Romaq Myuq Lé Lô Kum Rá Sôn É Hkyô

²³ Nghut kólhang, ahkuí gi, shí mau pé má ngò zui saí rá jowò a joq lo é nghut mù, nungmoq lé myàng nau nyi é zanwut myo myo nghut bê eq rajung za, ²⁴ ngò, Sipin ming shut ló é hkũn, nungmoq chyáng wàng rá sôn tô lhê. Ngò gi, lai ló é hkũn, nungmoq lé lò sô kum mù, nungmoq eq rayoq zo zùm yap ngón é htàng má sheq, ngá é hkyowui matú, nungmoq haù mai htuqbang kat rá lé, ngò myoqbyu tô lhê. ²⁵ Ahkuí, ngò kũm gi, Yerusalem wá mó má é sân-yũng bang lé dojaù rá matú, haù wá shut é ló é hkyolat má nghut nyi lhê. ²⁶ Hkâsu mù gâ le, Makedoni eq Ahkaia mau má é bang gi, Yerusalem wá mó má é sân-yũng bãng chyáng má é myũng bãng é matú, garũm chyunghuq hkyui tsing nau bũm bekò nghut ri. ²⁷ Yhangmoq gi, haù su kut nau bũm bekò nghut ri, gè gè ga jáng, haù gi, yhangmoq chyín dap tô é dõng ru nghut lhê. Hkâsu mù gâ le, haù Yudaq byu pé é woi-nyí eq séng é shimân jeju lé, tũngbaù pé bo hkam yù bê nghut le gi, yhangmoq é sutzè shimân jeju lé, Yudaq byu pé eq chõm chũng rá chyín dap tô é dõng nghut lhê. ²⁸ Haù mù lui, ngò gi, muzó shí lhum ban kut mù, garũm chyunghuq shí lé, yhangmoq wó hap yù bê lé hkyak sê é htàng má, Sipin ming shut ló rá nghut mù, lai ló uchyang, nungmoq chyáng lé sô kum rá nghut lhê. ²⁹ Ngò gi, nungmoq chyáng lé jé é hkũn, nungmoq é matú Hkrisduq é shimân jeju byíng jup é èq jé lé rá nghut é lé, ngò sê lhê.

³⁰ Gumang wui ê, ngá é matú Garai Gasang chyáng kyũdung byí é dõng, ngò wum kat yhang shikut é hkyô má nungmoq bo wàng lòm rá matú, nga-nhũng é Yhumsing Yesuq Hkrisduq eq Woi-nyí é chyitdap myit é yanmai, ngò, nungmoq lé wum taí tsuq kat lhê. ³¹ Yuda mau má é a lumjĩng bãng chyáng mai, ngò hkyi yu é wó hui lui, Yerusalem wá mó má ngò wũn waq é muzó lé, haù má é sân-yũng bang hap yù gĩng é wó dut rá matú kyù bo dung byi keq. ³² Haù jáng sheq, ngò gi, Garai Gasang ô nau é dõng mai, gabú myit èq nungmoq chyáng wó jé lé mù, nungmoq eq rahá wum-o wó yù rá nghut lhê. ³³ Haù nguĩngón hkyo é Garai Gasang gi, nungmoq banshoq bang eq rahá rù nyi nyi sháng gaq ó. Amen.

16

Shi-kyám Dang

¹ Ngò gi, Kenhkrea noqkuq hpũng má é hpungtè, nga-nhũng é gu-nhá Hpobe lé, nungmoq chyáng shichyen byí kat lhê.

² Nungmoq gi, sân-yúng bang kut gíng é eq rajung za, haú Yhumsíng má yhang lé hap yú lui, yhang rá tô é hkyô hai nghut kôle, yhang lé htuqbang keq. Hkâsu mù gâ le, yhang gi, byú myo myo lé le, ngo lé le, gyai yhang garúm lai bê sú nghut lhê.

³ Hkrisduq Yesuq má ngò eq mù wùn luzúm nhik nghut é, Priskila eq Akula lé bo shi-kyám byi keq. ⁴ Yhangnhik gi, ngá é asak é matú, yhangnhik é asak sum rá í yhang dut wú kó é nghut mù, ngò za a nghut, túngbaù pè é noqkuq hpúng pé banshoq le, yhangnhik lé jeju bún lhê.

⁵ Yhangnhik é yhúm má chòm huí zup é noqkuq hpúng lé le, bo shi-kyám byi keq.

Asia mau má, Hkrisduq lé sâng-hi lumjíng wang lo é, ngò chyitdap é Epanetu lé bo shi-kyám byi keq.

⁶ Nungmoq é matú gyai yhang shikut wú bê sú nghut é Mariq lé bo shi-kyám byi keq.

⁷ Ngò eq rahá htóng lúng wú bê nghut é, ngá é buinùm, Androniku eq Yunia nhik lé bo shi-kyám byi keq. Yhangnhik gi, lagyô pé má myoqdong wó su nhik nghut é htoq agó, ngá é hí má, Hkrisduq má ngò a nyi shi le nyi bê sú nhik nghut akó.

⁸ Haú Yhumsíng má, ngò chyitdap é sú, Ampliatu lé bo shi-kyám byi keq.

⁹ Hkrisduq má, ngamoq é mù zui luzúm nghut é Orban eq ngá é chyitdap luzúm Staku lé, bo shi-kyám byi keq.

¹⁰ Hkrisduq má chyam é hui mù, wó lúm bê sú, Apele lé bo shi-kyám byi keq.

Aristobulu eq sêng é yhumbyú wui lé bo shi-kyám byi keq.

¹¹ Ngá é buinùm Herudion lé bo shi-kyám byi keq.

Haú Yhumsíng má nghut nyí bê bang, Narkiso é yhumbyú wui lé bo shi-kyám byi keq.

¹² Haú Yhumsíng má mù zui shikut é myiwê nhik, Truhipena eq Truhiposa lé bo shi-kyám byi keq.

Haú Yhumsíng má mù zui gyai yhang shikut é myiwe góyuq, ngá é chyitdap luzúm Persi lé bo shi-kyám byi keq.

¹³ Haú Yhumsíng má hkyin yu é hui bê sú, Ruhpu lé le, ngá nu dōng nghut wú bê nghut é Ruhpú é yhângnu lé le, bo shi-kyám byi keq.

¹⁴ Asunkritu, Hpelegon, Herme, Patroba, Herma eq yhangmoq eq rahá nyi é gumang wui lé, bo shi-kyám byi keq.

¹⁵ Hpilologu, Yulia, Nerea eq yhâng é nhammó eq, Olumpa, yhangmoq eq rahá nyi é sân-yúng bang banshoq lé, bo shi-kyám byi keq.

¹⁶ Rayuq eq rayuq, chyoiyúng bopuq é èq shi-kyám lhum keq.

Hkrisduq é noqkuq hpúng pé banshoq gi, nungmoq lé shi-kyám dang sang kat akó nghut ri.

¹⁷ Gumang wui ê, nungmoq é lumjíng hkyô má, nungmoq mhoq hkam yú bê nghut é mhoqshit hkyô eq shai lhum é, gam hkoq hkyô pé eq myit leqbat hkyô pé lhoq htoq é bang lé sidiq keq nghú, wum tai tsuq kat lhê. Yhangmoq lé koi pyám keq. ¹⁸ Hkâsu mù gâ le, haú sú é bang gi, nga-nhúng é Yhumsíng Hkrisduq lé dojaú é bang a nghut é za, yhumsing é wamdaú matú dojaú é bang nghut akó. Yhangmoq gi, myit nū-nhâm é bang lé, dang ngón dang nguí dōng mhaú zô akó nghut ri. ¹⁹ Nungmoq, jino gyo kó é hkyô lé, yuq hkangmó wó gyo bê nghut ri; haú mù, ngò gi, nungmoq é matú gyai yhang gabú nyi lhê; nghut kôlháng, ge é hkyô eq séng lui gi, nungmoq hpaqchyí bò mù, agé ashop hkyô eq séng lui gi, nungmoq a bo lóm rá lé, ngò ô nau ri.

²⁰ Nguingón hkyo é Garai Gasang gi, a myáng má, nungmoq é hkyiwa ô má Tsadán lé nang pyeq pyám rá nghut lhê.

Nga-nhúng é Yhumsíng Yesuq é jeju gi, nungmoq eq rahá nghut nyí sháng gaq ô.

²¹ Ngá é mù zui luzúm Timohti gi, nungmoq lé shi-kyám dang sang kat ri; haú eq rajung za, ngá é buinùm wui Luki, Yason eq Sosipata pé le, shi-kyám dang sang kat akó nghut ri.

²² Laiká shi lé bo ká sú ngò Tertiu gi, haú Yhumsíng má nungmoq lé shi-kyám kat lhê.

²³ Ngo lé le, noqkuq hpúng gón lé le, bíng hkulum é sú Ge-u gi, nungmoq lé shi-kyám dang sang kat ri.

Haú wa má é ngùnzi sù Erastu eq nga-nhúng é gumang hpó Kuartu gi, nungmoq lé shi-kyám dang sang kat akó. ²⁴ Nga-nhúng é Yhumsíng Yesuq Hkrisduq é jeju gi, nungmoq lhunglháng bang eq rahá nghut nyí sháng gaq. Amen.*

²⁵ Byú myú chângjup bang lumjíng lui, Yhang é jino gyo sháng gaq ga, a-nham pyat mai haq tô é hui kôlháng, ²⁶ ahkuí, ahtum abyuq é Garai Gasáng é hkunmó é yanmai, myiqhtoi laiká pé dōng hpōng shit é eq sé nháng bê nghut é, sê gyo wui é hkyo é shing-rán má cháng lui, ngá é gabú danglù eq Yesuq Hkrisduq é hkyô tai pyo é dōng, nungmoq lé wó lhoq ging títg byí é, ²⁷ rayuq za é hpaqchyí bo sú Garai Gasáng chyáng, Yesuq Hkrisduq dōng mai, hpungwup shingkang gi, ahtum abyuq ru joq nyí sháng gaq ô! Amen.

* 16:24 Chyúmding ra-am má chyúbun 24 shi a bo é nghut lhê.

KORINHTUQ

Pê Chyáng Hî Dàm Hun Kat é Laiká (1 Corinthians)

¹ Garai Gasang ô nau é eq rajung za, Hkrisduq Yesuq é lagyo dut rá matú jì yù huí é sù ngò Poluq eq, ngamoq é gumang hpó Sositeni gi, ² jowò hkangmó má nga-nhùng é Yhumsing Yesuq Hkrisduq é mying lé lãng é bang eq rahá, chyoiyúng bang dut rá matú jì yù huí é eq Hkrisduq Yesuq má lhoq sân-yúng é huí é bang nghut é, Korinhtuq myuq má é, Garai Gasang é noqkuq hpúng lé, dang kyô kat lhê; Hkrisduq gi, ngamoq é eq yhangmoq é Yhumsing nghut lhê.

³ Nga-nhùng é Iwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyl sháng gaq ô.

Hkrisduq É Yanmai Wó É Jeju

⁴ Garai Gasang jeju lé Hkrisduq Yesuq đông mai nungmoq lé byi bê nghut mù luí, ngò gi, nungmoq é matú Garai Gasang lé ayang jeju hkya-ôn nyi lhê. ⁵ Hkâsu mù gâ le, nungmoq gi, Hkrisduq đông mai, nungmoq dang tai é hkyô banshoq eq nungmoq é sumpsé hpaqchyí banshoq má je lhoq gumjup é huí bekô nghut ri. ⁶ Haú gi, Hkrisduq Yesuq eq séng luí, ngamoq saksé hkâm é hkyô têng é lé, nungmoq chyáng shit nyi é nghut lhê. ⁷ Haú mù, nga-nhùng é Yhumsing Yesuq Hkrisduq dum htoq shit rá lé, nungmoq gyai myoqbyu láng nyi é u má, nungmoq gi, woi-nyi hkyô eq séng é chyunhuq hái lé le langhpyut kô rá a nghut. ⁸ Nga-nhùng é Yhumsing Yesuq Hkrisduq é buinyi má, nungmoq lé mara hún rá hkyô a bò shoq, Hkrisduq gi, nungmoq lé, htàng shoq gingtúng nhang nyi rá nghut lhê. ⁹ Nga-nhùng é Yhumsing nghut é Yhang Zo Yesuq Hkrisduq eq rahá zùm yap rá matú, nungmoq lé jì yù bê sù Garai Gasang gi, lhumzui Sù nghut ri.

Noqkuq Hpúng Má Gam Hkoq Lhùm É Hkyô

¹⁰ Gumang wui ê, nungmoq hkaú má gam hkoq lhùm é hkyô pé a joq é za, nungmoq é myit eq myit sôn wú é hkyô má gumjup shoq rading ralhum za dut nyi sháng gaq, nungmoq lhunglhang bang rayuq eq rayuq byin hpýé gohut huí nyi keq ngúh, ngò, nungmoq lé, nga-nhùng é Yhumsing Yesuq Hkrisduq é mying mai dúng tóngbán kat lhê. ¹¹ Ngá é gumang wui ê, Hkloe é yhùm byù wui gi, nungmoq hkaú má mabyoq htoq hkyô joq é lé, ngo lé hkyáng lo shit akô. ¹² Ngò haú

su ngúh tai é gi, nungmoq má é rayuq yuq gi, "Ngò gi, Poluq htàng châng lhê." ga, góyuq gi, "Ngò gi, Apolo htàng châng lhê." ga, dum rayuq gi, "Ngò gi, Kehpa htàng châng lhê." ga, dum góyuq gi, "Ngò gi, Hkrisduq htàng châng lhê." ga, tai bùm kô é yanmai nghut lhê.

¹³ Hkrisduq gi, gam hkoq é huí bê lhú? Ngò Poluq gi, nungmoq é matú tapzìng má jén sat é huí bê lhú? Nungmoq gi, ngá é mying mai wui-myhup hkâm yù kô é lhú? ¹⁴ Ngò gi, Krispu eq Ge-u nhik mai lai luí, nungmoq ó yuq lé le wui-myhup a hkâm byi wú é yanmai, ¹⁵ nungmoq ó yuq lé, ngá é mying mai wui-myhup hkâm yù bê ngúh a wó tai é nghut mù, ngò, Garai lé jeju hkya-ôn lhê. ¹⁶ (Stehpana é yhumbyù wui lé le, ngò wui-myhup hkâm byi é nghut lhê, haú mai lai luí gotú ó lé hkâm byi zàng ashí laq, ngò a myit bun lo nghut ri.) ¹⁷ Hkâsu mù gâ le, Hkrisduq, ngo lé nhang kat é gi, wui-myhup hkâm byi rá matú a nghut, gabú danglù hko kyo rá matú sheq nhang kat é ru nghut lhê; nghut kólhang, waxàng zô wui é hpaqchyí byéng-yá dang đông hko kyô é a nghut mù, Hkrisduq é tapzìng é a-tsam gi, akôm a dut byuq é nghut lhê.

Garai É A-tsam Eq Hpaqchyí Byéng-yá Gi, Hkrisduq

¹⁸ Hkâsu mù gâ le, tapzìng má Yesuq shí hkâm é hkyô eq séng é danglù gi, htên byoq hui rá bang é matú, danggang dut byuq ri; nghut kólhang, hkyi yu é huí nyi bang nga-nhùng é matú gi, Garai Gasang é a-tsam nghut ri. ¹⁹ Hkâsu mù gâ le, Chyumdang má kâ tô é gi, "Hpaqchyí bò bang é hpaqchyí byéng-yá lé, Ngò lhoq htên pyám rá nghut lhê; nyan bò bang é nyan lé, Ngò, ajè dut pyám nhâng rá nghut lhê."²⁰

ga ri.

²⁰ Hpaqchyí byéng-yá bò bang gi, hkâmá lhú? Hpaqchyí laiká kung bang gi, hkâmá lhú? Ipyat shi é dang tai kung bang gi, hkâmá lhú? Garai Gasang gi, mingkân é hpaqchyí byéng-yá lé lhoq ngok pyám bê a nghut lhú? ²¹ Hkâsu mù gâ le, Garai Gasang é hpaqchyí byéng-yá mai ga jang, mingkan zo wui gi, yhumsing é hpaqchyí byéng-yá đông mai Garai Gasang lé a wó sé kô é yanmai, danggang gâ pyám byi kô é mungdang lé hko kyô é đông lumjáng bang lé hkyi yù rá matú, Garai Gasang myit hpyit é nghut lhê. ²² Yudaq byu pé gi, limik kumlhá pé lé dúng akô; Grik byu pé gi, hpaqchyí byéng-yá lé ho akô nghut ri. ²³ Nghut kólhang, ngamoq gi, tapzìng má jén sat huí é Hkrisduq é hkyô lé hko kyô lhê. Haú gi, Yudaq byu pé é matú myit leqbat jowò eq túngbaú pé é matú danggang dut byuq ri. ²⁴ Nghut kólhang,

Garai Gasâng êq ji yù huí é Yudaq byu pé eq Grik byu pé é matú, Hkrisduq gi, Garai Gasâng é a-tsam eq Garai Gasâng é hpaqchyí byéng-yá nghut ri. ²⁵ Hkásu mù gà le, Garai Gasâng é ngok hkyô gà é lhang gi, byu é hpaqchyí byéng-yá htoq má je gyaú ri; Garai Gasâng é wum nyhóm hkyô gà é lhang gi, byu é wum-o htoq má je gyaú ri.

²⁶ Gumang wui é, Garai Gasang, nungmoq lé ji yu é hkùn, nungmoq hkásu dut nyi é hkyô lé myit wú keq. Waxâng zô wui é nyi yap a-tsáng đông hpaqchyí byéng-yá bo é bang, ahkáng ayá wó é bang, zaugun suwún amyú má é bang a myô é nghut lhê.

²⁷ Nghut kôlhang, Garai Gasang gi, hpaqchyí byéng-yá bò bang lé hoq lhoq hpu rà matú, mingkan má é ngok bang gà é lé hkyin yu é nghut lhê; Garai Gasang gi, wum bò bang lé hoq lhoq hpu rà matú, mingkan má é wum nyhóm bang gà é lé hkyin yu é nghut lhê. ²⁸ Yhang gi, mingkân êq ahkyak tò é lé lhoq htên pyám rà matú, haí a nghut é lé le, mingkan má é aróng a bo é eq wú tiq pyám huí é lé le, hkyin yu é nghut lhê. ²⁹ Haú gi, ó yuq le, Yhâng é hí má a ge nghutbun rà matú nghut ri. ³⁰ Garai Gasâng é yanmai, nungmoq gi, Hkrisduq Yesuq má nghut nyí bekô nghut ri; Hkrisduq gi, nga-nhúng é matú, Garai Gasâng chyáng má é hpaqchyí byéng-yá dut bê nghut ri. Haú gi, nga-nhúng é dingmán hkyô, chyoiyúng hkyô eq hkyi yù hkyô nghut ri. ³¹ Haú mù lui, "Gumrong é sú gi, haú Yhumsing má gumrông sháng gaq."* ga kâ tò é eq rajung za nghut ri.

2

Woi-nyí Mai Lo É Garai Gasâng É Hpaqchyí Byéng-yá

¹ Gumang wui é, ngò gi, Garai Gasang eq sêng é saksé hkyô lé nungmoq chyáng tai pyô rà matú jé lé é hkùn, dang tai kung é eq hpaqchyí byéng-yá mó bo é đông lé é a nghut. ² Hkásu mù gà le, ngò, nungmoq eq rahá nyi é u lé, Yesuq Hkrisduq eq Yhang tapzing má jén sat huí é hkyô mai lai lui, jung hkanmó lé tô-myhí pyám rà ngù myit hpyit yù bê nghut lhê. ³ Ngò gi, nungmoq chyáng jé lé é hkùn, wum nyhóm é eq gyal yhang gyuq nán é nghut lhê. ⁴ Ngá é danglù eq ngò hko kyô é hkyô gi, hpaqchyí bo é eq mhui yu é dang pé đông a nghut é za, Woi-nyí é a-tsâm eq nungmoq lé shit é đông ru nghut mù, ⁵ nungmoq é lumjing myit gi, byù é hpaqchyí byéng-yá má a nghut é za, Garai Gasâng é hpungwup a-tsam má nghut nyi lhê.

⁶ Nghut kôlhang, ngamoq gi, myit ding bê bang lé hpaqchyí byéng-yá đông nyo lhê; shí pyat lhê é hpaqchyí byéng-yá eq htên byoq nyi huí é shí pyat má é zâu wui é hpaqchyí

byéng-yá đông kúm a nghut. ⁷ Ngamoq tai é gi, haq tò é eq, ahkying ngu é lhang a joq shí mai nga-nhúng é hpungwup shingkang é matú Garai Gasang tò to byí é hpaqchyí byéng-yá nghut é, Garai Gasâng é zâu tò é hpaqchyí byéng-yá lé tai é ru nghut lhê. ⁸ Shí pyat lhê é zau wui gi, hpaqchyí byéng-yá haú lé rayuq lhang a sê gyo kó nghut ri; yhang-moq sê gyo kô é ru nghut le gi, hpungwup shingkang bo é Yhumsing lé tapzing má jén sat pyám kó rà a nghut. ⁹ Nghut kôlhang, Chyúmdang má,

"Ó yuq eq le a myang wú, ó yuq eq le a wó gyô wú, ó yuq eq le a bün myit wú é hkyô lé, Garai Gasang gi, Yhang lé chyitdap bang é matú lajang to byi bê nghut ri."*

ga kâ tò é eq rajung za nghut ri. ¹⁰ Nghut kôlhang, Garai Gasang gi, haú hkyô lé, Yhâng é Woi-nyí đông nga-nhúng lé hpông shit bê nghut ri.

Woi-nyí haú gi, jung hkanmó lé ho gôn wú é nghut lui, Garai Gasâng é zâu tò é hkyô lé lhang ho gôn wú é sú nghut ri. ¹¹ Byù má lung é woi-nyí za a nghut jang gi, byù rayuq myit é hkyô pé lé, ó yuq wá wó sê lhê lú? Haú eq rajung za, Garai Gasâng é Woi-nyí za a nghut jang, Garai Gasang myit é hkyô lé, ó yuq le wó sê é a nghut. ¹² Nga-nhúng gi, mingkân é woi-nyí lé hap yu tò é a nghut é za, Garai Gasâng eq nga-nhúng lé byí to bê jeju lé, ngamoq wó sê gyo rà matú, Garai Gasâng chyáng má é Woi-nyí lé sheq hap yu tò é ru nghut lhê. ¹³ Haú mù lui, ngamoq gi, waxâng zô wui é hpaqchyí byéng-yá eq mhoq byí é dang đông tai é a nghut, Garaí é Woi-nyí eq mhoq byí é dang đông tai é sheq ru nghut mù, woi-nyí eq sêng é tengmán hkyô lé woi-nyí eq sêng é dang đông tai sân kyô é nghut lhê. ¹⁴ Haú Woi-nyí lé a wó é sú gi, Garai Gasâng é Woi-nyí mai lo é hkyô pé lé a hap yu é nghut lhê; haí mù gà le, haú pé gi, yhang é matú ngok é hkyô nghut lui, woi-nyí hkyô đông mai haú hkyô lé a wú é yanmai, yhang gi, haú pé lé a wó sê gyo nghut ri. ¹⁵ Woi-nyí eq sêng é byù gi, lunglhang lé wó jéyang lhê, nghut kôlhang, yhang lé kúm gi, ó yuq eq le wó jéyang é a nghut. ¹⁶ Chyúmdang má,

"Hkásu mù gà le, ó yuq wá, haú Yhumsing é myit lé sé mù, Yhang lé wó mhoqshit wú é lú?"*

ga kâ tò ri. Nghut kôlhang, nga-nhúng gi, Hkrisduq é myit lé wó é bang nghut lhê.

3

Noqkuq Hpúng Má Gam Hkoq Lhùm É Hkyô

¹ Gumang wui é, hí hkùn, ngò gi, nungmoq lé, Woi-nyí eq sêng é bang lé đông wó tai

é a nghut; mingkan eq sêng é bang đông nghut kômù, Hkrisduq má zonú su dut bang lé đông sheq taí wú é nghut lhê. ² Nungmoq gi, zoshuq apat lé a wó zo shí kó nghut é yan-mai, ngò gi, nungmoq lé naú byi huq é nghut lhê.* Ahkuí lhang, nungmoq gi, zoshuq apat lé a wó zo shí kó nghut ri. ³ Nungmoq gi, mingkan eq sêng é bang ru nghut nyi ashí kó nghut ri. Hkásu mù gà le, manôn hkyô eq byoq lhum hkyô gi, nungmoq chyáng joq nyi é yanmai, nungmoq gi, mingkan eq sêng é bang nghut lhê a nghut kó luq? Mingkan zo wú su nyi yap bum lhê a nghut kó luq? ⁴ Rayuq gi, "Ngò gi, Poluq htàng châng lhê." ga, góyuq gi, "Ngò gi, Apolo htàng châng lhê." ga taí nyi bùm kô é nghut jáng, nungmoq gi, mingkan zo wú nghut nyi bum lhê a nghut kó luq?

⁵ Apolo gi, ó wá nghut lhê? Poluq gi, ó wá nghut lhê? Nga-nhik gi, Garai é dui-nhâng zoshâng za nghut lui, ó le ó lé, haú Yhumsing eq hun tô é muzó eq rajung za wùn waq é nghut lui, nungmoq gi, ngá-nhik đông mai wó lumjáng kô é ru nghut lhê. ⁶ Ngò gi, gabú danglù amyui lé hô kat, Apolo gi, wui hpyun byi, nghut kôlhang, yuq kô lò nhang é gi, Garai Gasang za ru nghut lhê. ⁷ Haú mù, amyui hô kat sù eq wui hpyun byi sù gi, ahkyak mó a nghut, yuq kô lò nhang é Garai Gasang za sheq ahkyak ru nghut lhê. ⁸ Amyui hô kat sù eq wui hpyun byi su nhik myoqbyu tô é hkyô gi, rajung za nghut ri; nghut kôlhang, yhumsing shikut é eq rajung za, ó le ó é shigyaú chyunghuq wó yú kó rá nghut lhê. ⁹ Hkásu mù gà le, ngamoq gi, Garai Gasâng é mù zui luzúm wui nghut lhê; nungmoq gi, Garai Gasâng é yò, Garai Gasâng é yhùm nghut nyi akó.

¹⁰ Garai Gasang, ngo lé byi to bê jeju eq rajung za, yhùm sai kung sù rayuq đông, ngò gi, yhùm apùn awang hi to bê nghut lhê; gotù byù gi, hau é ahtoq má sai toq jat nyi é nghut lhê. Nghut kôlhang, yuq hkangmó gi, yhumsing sai é má rago sidiq rá lhê. ¹¹ Hkásu mù gà le, hi to gù nghut é, Yesuq Hkrisduq nghu é yhùm apùn awang mai lai lui, ó yuq le, gotù yhùm apùn awang lé wó sai é a nghut. ¹² Yhùm apùn awang hau é ahtoq má, hng, ngùn, hpaudap luagok pé, sik, mhan, hkowá pé lé chùng mù sai jat kô é nghut jáng, ¹³ yuq hkangmó é muzó hkásu nghut é hkyô lé lhoq htoq shit é hui rá nghut lhê. Haí mù lui gà le, haú Yesuq é Buinyi gi, haú lé byu-myàng nhâng mù, haú buinyi lé gi, myí eq lhoq htoq shit rá nghut lhê. Haú myí gi, yuq hkangmó sai é muzó hkasú é nghut é lé chyám rá nghut lhê. ¹⁴ Rayuq yuq sai é yhùm gi, ru gíng nyi é nghut jáng, haú yuq gi, yhang é shigyaú chyunghuq wó yú rá nghut lhê.

¹⁵ Nghut kôlhang, yhùm haú nyé gyó byuq é nghut jáng, yhang gi, yhùm sùm byuq é hui zo rá nghut lhê; yhang gi, asak lut kôlhang, myishâm mai wó lut é byù su dut rá nghut lhê.

¹⁶ Nungmoq gi, Garai Gasâng é noqkuq yhùm nghut lui, Garai Gasâng é Woi-nyí gi, nungmoq má lúng nyi bê hkyô lé a sé kó lhu? ¹⁷ Rayuq yuq, Garai Gasâng é noqkuq yhùm lé lhoq htên é nghut jáng, Garai Gasang gi, haú yuq lé lhoq htên pyám rá nghut lhê. Hkásu mù gà le, Garai Gasâng é noqkuq yhùm gi, chyoyíung lhê; nungmoq gi, noqkuq yhùm haú nghut akó.

¹⁸ Nungmoq gi, yhumsing gùng yhumsing hkálhoq nghoq kó. Nungmoq má é rayuq yuq, shí ipyat má é byù nyi a-tsáng đông hpaqchyí byéng-yá bò sù ga myit é nghut jáng, hpaqchyí byéng-yá akying bò sù wó dut sháng gaq, yhang gi, a-ngok sù dut rá lhê. ¹⁹ Hkásu mù gà le, mingkan shí má é hpaqchyí byéng-yá gi, Garai Gasâng é hí má ngok é hkyô nghut ri. Haú gi, "Garai Gasang gi, hpaqchyí byéng-yá bò bang lé, yhangmoq é hpaqchyí má yhang myí to nhang ri."* ga ká tô é eq rajung za nghut ri. ²⁰ Hau htoq agó, "Haú Yhumsing gi, hpaqchyí byéng-yá bò bang myit é hkyô pé akóm nghut é lé sê lhê."* ga le ká tô ri. ²¹ Haú mù lui, ó yuq le, byù eq sêng é hkyô má gyáng é dang a taí kó sháng gaq! Lhunglhang gi, nungmoq é chyat nghut lhê. ²² Poluq le, Apolo le, Kehpa le, mingkan le, dui nyi é hkyô le, shi é hkyô le, ahkuí lhê hkyô eq htàngnùng má é hkyô le, banshoq gi, nungmoq é chyat nghut ri. ²³ Nungmoq gi, Hkrisduq é nghut akó; Hkrisduq gi, Garai Gasâng é nghut ri.

4

Hkrisduq É Lagyô Pé

¹ Haú mù lui, byu pé gi, ngamoq lé, Hkrisduq é dui-nhâng zoshâng wui đông eq Garai Gasâng é záu tô é hkyô pé lé taí pyô rá matù ap byi tô é hui bang đông sôn yù rá lhê. ² Haú đông nghut jáng, ap byi tô é hui bang gi, yhumsing lhumzui hkyô lé saksé shit rá dut lhê. ³ Nungmoq eq nghut nghut, waxàng zô wui é tará rùng mai nghut nghut, ngo lé jéyáng kô le, ngá é matù atiq azo za nghut lhê; gè gè ga jáng, ngá gùng ngò lhang a jéyáng é nghut lhê. ⁴ Haí mù gà le, ngá gùng ngò mara a bò bôn é nghut kôlhang, haú gi, ngo lé wó lhoq sân-yáng byí é a nghut. Ngo lé jéyáng é sù gi, haú Yhumsing nghut lhê. ⁵ Haú mù, masat tô é ahkying a jé shimá hai lé le a jéyáng é za, haú Yhumsing jé lé shoq, lánng nyi keq. Yhang gi, mauchut hkaú má haq tô é pé lé byu-myàng nhâng mù, byu pé é myit nhikhum má lúng é hkyô lé lhoq htoq

* 3:2 Nungmoq lé naú byi huq é, gà é gi, lui é hkyô pé lé hí mhoq byí é lé gà lhê. * 3:19 Yob 5:13 * 3:20 Hkya-on 94:11

shit râ nghut lhê. Haú hkûn, yuq hkangmó gi, ó le ó wó gíng é hkya-ôn hkyô lé, Garai Gasâng chyáng mai wó yù râ nghut lhê.

⁶ Gumang wui ê, ngò gi, "Kâ tò é gù mai hkâlai." gâ é sanghkyáng é lychyum lé, ngamoq chyáng mai nungmoq wó mhoq yù sháng gaq nghû, nungmoq é akyu é matú, ngò eq Apolo má háu pé lé yù mù dangtú kut é nghut lhê. Haú hkûn, nungmoq gi, nghutbùn é đông, rayuq lé gi, wú ko, góyuq lé gi, wú shóm, a kut kó râ nghut lhê. ⁷ Ó yuq wá, nang lé, góyuq eq shai shoq kut lhê lú? Nang hap yu é a nghut le gi, wó râ lú? Nang, hap yu é nghut le gi, a hap yu é đông hai mù nghutbùn nyi lhê lú?

⁸ Nungmoq gi, râ é lhunglhang gumjup bang nghut bekô nhung! Nungmoq gi, wó bang dut gù nghut bekô nhung! Ngamoq a lom é za, nungmoq gi, hkohkam pé dut bekô nhung! Ngamoq le, nungmoq eq rahá hkohkam pé wó dut sháng gaq, nungmoq gi, gè gè yhang hkohkam pé dut to bekô râ lé, ngò hkâ-í yhang ô nau nyi lhê ô! ⁹ Nghut kôlhang, sat râ matú doqdan huí é shúm byù pé lé su, Garai Gasang gi, lagyô pé nghut é ngamoq lé de de kut htoq shit bê nghû, ngò wó myit ri. Ngamoq gi, nyi mi-nyi, joq mijoj, maumang lagyô pé eq waxâng zô wui é hí má, wú kûn jung đông dut nhang é huí nyi gù bê nghut lhê. ¹⁰ Ngamoq gi, Hkrisduq é yanmai ngok é bang đông sôn yu é huí kôlhang, nungmoq kúm gi, Hkrisduq má hpaqchyí gyaí bo é bang đông dut bekô nhung! Ngamoq gi, wum nyhôm é bang đông sôn yu é huí kôlhang, nungmoq kúm gi, wúm bo é bang đông dut bekô nhung! Nungmoq gi, hkunggâ é huí akô; ngamoq kúm gi, hkunggâ é huí nhung! ¹¹ Shi hkyíng shí u jé shoq, ngamoq gi, zômut wuítshit huí é, mebu ajeq amyhâ dut huí é, nhuq bat huí é, yhumsing é nyi jowô a wó é bang nghut nyi lhê. ¹² Ngamoq gi, yhumsing loq eq yhang mù zui wum kat nyi lhê. Ngamoq gi, nhing pyâm é huí jáng, shimân byi, zing-ri é huí jáng, jân pyâm kut lhê. ¹³ Ngamoq gi, lumú gansang é huí jáng, dang ngón dang nguí tú nyo lhê. Ngamoq gi, ahkuí jé shoq, myidâm htoq má é hpoqkyuq hpoqpyâng eq mingkân é buzaq pé đông sôn yu é huí nyi lhê.

¹⁴ Ngò gi, nungmoq lé hoq lhoq hpu râ matú háu pé lé kâ é a nghut, ngá é chyt-dap zo wui lé đông lhoq pún kying râ matú ru nghut lhê. ¹⁵ Nungmoq gi, Hkrisduq má mhoqshit bang ra mun wó kô é a nghut; hkâsu mù gâ lé, ngò gi, háu gabú danglù đông mai, Hkrisduq Yesuq má nungmoq é

íwa dut é nghut lhê. ¹⁶ Haú mù luí, ngò kut é su cháng keq nghû, ngò, nungmoq lé lung kat lhê. ¹⁷ Hau é yanmai, ngò gi, háu Yhumsing má lhumzui sù nghut é, ngò chyt-dap é ngá zo đông nghut sù Timohti lé, nungmoq chyáng nhang kat é nghut lhê. Yhang gi, Hkrisduq Yesuq má é ngá é asak dui hkyô lé, jowô hkangmó má é noqkuq hpúng hkangmó lé ngò mhoq byí é eq rajung za, nungmoq lé lhoq pun byi râ nghut lhê.

¹⁸ Nungmoq má é ra-am gi, nungmoq chyáng ngò a dum jé lé râ su ngam pyâm kômú, nghutbùn byuq bekô nghut ri. ¹⁹ Nghut kôlhang, háu Yhumsing gyô é nghut jáng, ngò gi, nungmoq chyáng hân za jé lé râ nghut lhê; háu hkûn, ngò gi, nghutbùn é byù háu bang hai tai é hkyô lé za a nghut, yhangmoq hai a-tsam wó é hkyô lé le gón htoq râ nghut lhê. ²⁰ Hkâsu mù gâ le, Garai Gasâng é mingdán gi, tai é dang má bo é a nghut, a-tsam má sheq ru nghut lhê. ²¹ Nungmoq hká đông ô nau akô lú? Ngò gi, nungmoq chyáng, nuichûm hkat eq, a nghut jáng, chyt-dap é eq nú-nhâm é myit mai lé lô ra râ lú?

5

Ashop É Đông Gungsho Zùm Yap É Hkyô Kut É Sù Lé Lhoq Htoq Pyâm Râ Hkyô

¹ Nungmoq chyáng, ashop é đông gungsho zùm yap é hkyô joq é lé, hkyak tai hú lô bekô; háu gi, a lumjúng bâng chyáng lhang a dut wú é hkyô nghut é, yuqgê rayuq gi, yhangwá é myiwe eq nyi zô lhum nyi é hkyô nghut ri. ² Nghut kôle, nungmoq gi, nghutbùn nyi bum akô nhung! Háu đông a nghut é za, nungmoq gi, yón é myit tún shit mù, háu su kut é byù lé, nungmoq é hpúng mai lhoq htoq pyâm le, a gè kó lú? ³ Ngò gi, ngá gungdu, nungmoq eq rahá a nyi to kôlhang, ngá é i-myt gi, nungmoq eq rahá nghut nyi luí, gungdu jé nyi tô é đông mai, háu hkyô kut é sù lé jéyáng doqdan gù nghut lhê. ⁴ Nungmoq gi, nga-nhung é Yhumsing Yesuq é mying mai zup zing mù, ngá é i-myt gi, nungmoq eq rahá nghut nyi luí, nga-nhung é Yhumsing Yesuq é a-tsam le, nungmoq eq rahá nghut nyi é hkûn, ⁵ byù háu yuq lé, Tsadán é loq má ap byí pyâm keq.* Háu jáng, Yhumsing é buinyi má, yhang é woi-nyi gi, hkyi yu é huí râ matú, yhang é yubak gungsho gi, lhoq htên pyâm é huí râ nghut lhê.

⁶ Nungmoq é nghutbun hkyô gi, ge é a nghut. Mún† ra tsuí zo gi, muk long gón lé wó lhoq daú nhang é lé, nungmoq a sé kó lú? ⁷ Nungmoq gi, múnchi a bo é bang

* 5:5 Tsadán é loq má ap byí pyâm keq gâ é gi, hpúng byù wui eq a zùm yap nhâng lo râ lé tai é nghut lhê. † 5:6 Mún gâ é gi, yubak mara lé tai nau é nghut lhê. Lhoqhai Poi jé jáng, Israelaq byu pé gi, yhangmoq wó é múnchi banshoq lé lhuí pyâm mù, múnchi a bo é muk sai kô é nghut lhê.

nghut nyí kô é eq rajung za, múnci a bo é muk htung asik su wó dut kô sháng gaq, múnci axau lé lhuí pyám keq. Hkâsu mù gâ le, nga-nhông é Lhoqlhai Poi sauzo, Hkrisduq gi, hkungga nhong é hui bê ngut lhê.⁸ Haú mù luí, nga-nhông gi, agê agáu hkyô eq hpuzo nhâng hkyô ngut é múnci axau bo é đông a ngut é za, lhumzui hkyô eq tengmán hkyô é muk ngut é, múnci a bo é muk eq, Poi haú lé kut nyí sháng.

⁹ Ashop é đông gungsho zùm yap é bang eq hkâzùm kó ngù, ngò, nungmoq lé, ngá é laiká má kâ kat byí bê ngut lhê.¹⁰ Ngut kôhlang, mingkan shí eq sêng é, ashop é đông gungsho zùm yap é bang, myoqnoq é bang, mhaú zô é bang eq hparà noq é bang lé hkâzùm yap kó ngù é gi, a ngut. Haú su ru ngut le gi, mingkan htoq shí mai nungmoq htoq ló byuq ra kô rá ngut lhê.¹¹ Ngut kôhlang, yhânggùng yhang gi, gumang ga kôle, ashop é đông gungsho zùm yap é, myoqnoq é, hparà noq é, lumù gansang é, í shuq wut é, mhaú zô é sù ó yuq eq le a ge zùm yap kô rá ngut lhê ngù, ahkuí, ngò, nungmoq lé kâ kat nau é ngut lhê. Haú sù é byu eq gi, rahá lhang hkâzo kó.

¹² Haú noqkuq hpúng shinggan má é bang lé jéyáng rá gi, ngò eq haí sêng lhê lhuí? Ngut kôhlang, hpúng ahkaú má é bang lé nungmoq jéyáng rá dut lhê.¹³ Hpúng shinggan má é bang lé gi, Garai Gasang jéyáng rá ngut lhê. Ngut kôhlang, "Haú agê agáu é sù lé, nungmoq chyáng mai lhoq htoq pyám keq."* gâ tô ri.

6

Lumjng Bâng Hkaú Má Jéyáng Lhùm É Hkyô

¹ Nungmoq má é rayuq yuq gi, gumang góyuq eq dang-rhâng lhùm tô é ngut jáng, haú hkyô lé jéyáng nhâng rá matú, haú sân-yúng bâng é hí má tái rá malaí, Garai a wó bâng é hí má wám tái rá lhuí? ² Haú sân-yúng bang gi, mingkan lé jéyáng rá ngut é hkyô lé, nungmoq a sé kô lhuí? Nungmoq gi, mingkan lé jéyáng rá bang ngut kôle nhing, tíq é mù pé lé wó jéyáng é bang a ngut kô lhuí? ³ Nga-nhông gi, maumàng pé lé jéyáng rá ngut é hkyô lé, nungmoq a sé kô lhuí? Haú mù, shí pyat má é hkyô pé lé, gè gè yhang wó jéyáng kô rá ngut lhê ô!⁴ Haú mù luí, nungmoq gi, dang-rhâng lhùm é mù pé joq é ngut jáng, noqkuq hpúng má ahkyak a ngut é bang lé tará agyi kut nhâng kô rá lhuí? ⁵ Ngò, haú su ngù tái é gi, nungmoq lé hoq hpu nhâng rá matú ngut lhê. Lumjng bâng chyáng dang-rhâng lhùm é hkyô lé wó jéyáng rá hpaqchyí luq shoq bo é byù, nungmoq chyáng rayuq lhang a nyi dut kô rá lhuí? ⁶ Ngut kôhlang, nungmoq

gi, gumang yhangchang rayuq eq rayuq, a lumjng bâng é hí má lhang rùng shok lhum akô nhung!

⁷ Nungmoq hkaú má mù jéyáng lhùm é hkyô joq é ngut jáng, nungmoq gi, sum lugù ngut bê. Góyuq eq shut le lhang rù ge lhê a ngut kô lhuí? Mhaú zô é hui le lhang rù gè lhê a ngut kô lhuí? ⁸ Ngut kôle, nungmoq yhang gi, mhaú zo kô é eq shut kô é ngut luí, haú gi, nungmoq é gumang wui lé kut é ngut lhê.

⁹ Agê agáu é bang gi, Garai Gasang é mingdán má é shimán jeju a myang hkam yù kô rá ngut é hkyô lé, nungmoq a sé kô lhuí? Hkâ-nâ nyi kô. Ashop é đông gungsho zùm yap é bang le, hparà noq é bang le, su-myi sulàng lú é bang le, shiwa hpó kut é bang le, yuqgê yhangchang nyi zô lhùm é mara kut shut é bang le,¹⁰ hkau bang le, myoqnoq bang le, í shuq wut bang le, lumù gansang é bang le, mhaú zô é bang le, Garai Gasang é mingdán má é shimán jeju lé myang hkam yù kô rá a ngut.¹¹ Nungmoq má é ra-am gi, haú su kut kô é bang ngut akô. Ngut kôhlang, nungmoq gi, nga-nhông é Garai Gasang é Woi-nyí eq Yhumsing Yesuq Hkrisduq é mying mai, mara hkyut san byí é, lhoq sân-yúng é eq chí sân pyám byí é hui bekô ngut ri.

Ashop É Đông Gungsho Zùm Yap É Hkyô

¹² "Jung hkangmó kut rá ahkáng ngò wó lhê." Ngut kôhlang, jung hkangmó gi, akyú byí é a ngut. "Jung hkangmó kut rá ahkáng ngò wó lhê." Ngut kôhlang, haí jùng eq le ngo lé wó sing pyám rá a ngut.¹³ "Zoshuq gi, wamdaú é matú ngut mù, wamdaú gi, zoshuq é matú ngut ri." ga nungmoq ra-am tái kô rá ngut lhê. Ngut kôhlang, Garai Gasang gi, haú í jùng é lé lhoq htên pyám rá ngut lhê. Gungdu gi, ashop é đông gungsho zùm yap hkyô é matú a ngut é za, haú Yhumsing é matú ngut mù, haú Yhumsing gi, gungdú é matú ngut ri.¹⁴ Garai Gasang gi, Yhâng é a-tsâm eq, haú Yhumsing lé, shi é mai lhoq dui toq yù bê ngut mù, nga-nhông lé le lhoq dui toq yù rá ngut lhê.¹⁵ Nungmoq é gungdu pé gi, Hkrisduq é gungsho showui showang pé yhang ngut é lé, nungmoq a sé kô lhuí? Haú ngut le nhing, Hkrisduq é gungsho showui showang pé lé yù mù, shiwa myhi pé eq rading ralhum za kut pyám nhâng kô rá lhuí? Hkâ-nhám le a ge dut nhâng!¹⁶ Shiwa myhi eq gungsho zum é sù gi, yhang eq gungsho ralhum za dut bê hkyô lé, nungmoq a sé kô lhuí? Hkâsu mù gâ le, "Yhangnhik gi, gungsho ralhum za dut kô rá ngut lhê."* ga tái tô ri.¹⁷ Ngut kôhlang, haú Yhumsing eq rading ralhum za dut é sù gi, woi-nyí má Yhang eq ralhum za dut bekô ngut ri.

¹⁸ Ashop é dông gungsho zùm yap é hkyô lé koi pyám keq. Byù rayuq kut shut é gotù mara pé banshoq gi, yhang é gungdu shing-gan má nghut lhê; nghut kôlhang, ashop é dông gungsho zùm yap é hkyô kut shut é sù gi, yhumsing gung lé mara shut é sù nghut ri. ¹⁹ Nungmoq é gungdu gi, Garai Gasâng chyáng mai nungmoq wó yù bê nghut é, nungmoq má lúng nyi é Chyoiyúng Woi-nyi é noqkuq yhùm nghut é lé, nungmoq a sé kô lú? Nungmoq gi, yhumsing gung lé sing é bang a nghut. ²⁰ Hkâsu mù gâ le, nungmoq gi, ahpau ralhum byi mù wui hpyit tô é hui bê bang nghut akô. Haù mù luí, nungmoq é gungdu èq, Garai Gasang lé, hkunggâ é hkyô shut nyi keq.

7

Myi Yu É Eq Sêng É Hkyô

¹ Ahkuí, nungmoq kâ kat é hkyô pé eq séng luí ga jang, yuggê rayuq gi, myi a yu le gè ri. ² Nghut kôlhang, ashop é dông gungsho zùm yap é hkyô gyai myô é yan-mai, yuggê hkangmó gi, yhumsing é myiwe wó rá lhê; myiwe hkangmó gi, yhumsing é yuggê wó rá lhê. ³ Haù yhumsing hpó gi, wò joq é eq rajung za, yhang yhumsing myhi eq zùm sháng gaq; haù dông za, yhumsing myhi le, yhang yhumsing hpó eq zùm sháng gaq. ⁴ Haù yhumsing myhi é gungdu gi, yhanggung yhang za séng é a nghut, yhang é yhumsing hpó eq le séng lhê. Haù eq rajung za, yhumsing hpó é gungdu gi, yhanggung yhang za séng é a nghut, yhang é yhumsing myhi eq le séng lhê. ⁵ Nungmoq myit hui lhum luí, kyúdung é má rago ap nóng rá ahkying ayoq za a nghut jáng gi, rayuq eq rayuq hkâhe lhum kó. Nungmoq yhumsing gung lé a wó hkang é yanmai, Tsadán eq gunglau é a hui kô sháng gaq, ahkying ayoq haù lai jáng, rahá dum zùm keq. ⁶ Ngò, haù su nghù tái é gi, hkunmó hkyô é dông a nghut, ahkáng byi kat é dông ru nghut lhê. ⁷ Byù banshoq bang gi, ngò su nyi rá lé ô nau ri. Nghut kôlhang, yuq hkangmó gi, ó le ô é chyunghuq lé Garai Gasâng chyáng mai wó bum akô nghut ri; rayuq gi, rajung chyunghuq, góyuq gi, gó jung chyunghuq wó bum akô.

⁸ Ahkuí, myiwe a yù lô é bang eq chuimó pé lé ngò tái kôlé, ngò su, haù dông jáng nyi pyám kô é nghut le, yhangmoq é matù ge é hkyô nghut ri. ⁹ Nghut kôlhang, yhumsing gung lé a wó hkang kô é nghut le gi, yhang-moq, myi yù myi lô rá lhê; hkâsu mù gâ le, myi su nyé luí ô nau nyi rá malaí, myi yu myi lô le je ge lhê.

¹⁰ Myi yù bê bang lé, ngò, hkunmó hkyô kôlé, shí gi, ngò dông hkyô é a nghut, Yhumsing chyáng mã é ru nghut lhê: Yhumsing myhi gi, yhang é yhumsing hpó chyáng mai

a ge gang rá nghut lhê. ¹¹ Nghut kôlhang, yhang gâng é nghut jáng, myi a dum ló é za nyi rá lhê, haù a nghut jáng, yhang é yhumsing hpó eq dum xoq yù rá lhê. Yhumsing hpó le, yhang é yhumsing myhi lé a ge káng pyám rá nghut lhê.

¹² Góbang lé ngò shí su nghù tái kôlé, shí gi, Yhumsing chyáng mã é a nghut, ngò dông mai tái é ru nghut lhê. Gumang rayuq yuq gi, lumjing sù a nghut é yhumsing myhi wó é nghut le, myiwe haù, yhang eq rahá nyi nau é nghut jáng, yhang lé a ge káng pyám rá nghut lhê. ¹³ Myiwe rayuq gi, lumjing sù a nghut é yhumsing hpó wó é nghut le, yuggê haù, yhang eq rahá nyi nau é nghut jáng, yhang eq a ge gang rá nghut lhê. ¹⁴ Hkâsu mù gâ le, haù a lumjing sù yhumsing hpó gi, yhang yhumsing myhi dông mai lhoq sân-yúng é hui bê nghut mù, a lumjing sù yhumsing myhi le, lumjing sù nghut é yhang é yhumsing hpó dông mai lhoq san lhoq yung é hui bê nghut ri. Haù a nghut jáng, nungmoq é zo wui gi, a sanséng dut kô rá nghut lhê; nghut kôlhang, yhangmoq gi, haù dông mai, chyoiyung beko nghut ri.

¹⁵ Nghut kôlhang, haù a lumjing sù gâng ló nau jáng gi, gâng ló sháng gaq. Lumjing é yuggê nghut nghut, myiwe nghut nghut, haù sù é hkyô pé má gi, hkùm zing tô é hkyô a joq é nghut lhê. Garai Gasang gi, nga-nhung lé, nguingón shoq nyi sháng gaq ga ji yù bê nghut lhê. ¹⁶ Yhumsing myhi é, náng é yhumsing hpó le wó hkyi yù rá nghù, hkâsu wó sé rá lú? Yhumsing hpó é, náng é yhumsing myhi lé wó hkyi yù rá nghù, hkâsu wó sé rá lú?

¹⁷ Hkâ dông nghut kôlhang, yuq hkangmó gi, Garai Gasang, yhang lé ji yu tô é hkùn, haù Yhumsing mai yhang lé nyi nhang tô é dông asak dui nyi rá lhê. Haù gi, noqkuq hpung pé banshoq mã ngò tô to byi é tará nghut lhê. ¹⁸ Byù rayuq gi, ji yu é hui é hkùn, ahpyo-kuq hpyit hkam yu to gù bê nghut jáng, ahpyo-kuq hpyit a hkâm sù dông a dut byuq sháng gaq. Byù rayuq gi, ji yu é hui é hkùn, ahpyo-kuq hpyit a hkam yu to shí é nghut jáng, ahpyo-kuq hpyit a hkam yù sháng gaq. ¹⁹ Ahpyo-kuq hpyit hkâm hkyô gi, haù ahkyak a nghut; ahpyo-kuq hpyit a hkâm hkyô gi, haù ahkyak a nghut. Garai Gasâng é hkunmó pé lé châng nyi é za sheq ahkyak nghut lhê. ²⁰ Yuq hkangmó gi, yhang lé Garai Gasâng eq ji yu é hkùn lhê su xoq nyi nyi rá lhê. ²¹ Náng gi, ji yu hui é hkùn jùn dut nyi é lú? Haù hkyô lé hkâ-myit chiq. Nghut kôlhang, náng gi, luthkyô wó yu é nghut jáng, haù dông nyi aq. ²² Hkâsu mù gâ le, haù Yhumsing eq ji yu é hui é hkùn, jùn dut nyi é sù gi, haù Yhumsing eq lhoq lhut yu é byù nghut bê. Haù eq rajung za, ji yu é hui é hkùn, luthkyô wó é sù gi, Hkrisduq é jùn nghut ri. ²³ Nungmoq gi,

Garai Gasâng eq ahpau byi mù wui hpyit yu é hui bê bang nghut akô. Haù mù, byu pê é jùn hkâdut kó. ²⁴ Gumang wui ê, yuq hkangmó gi, yhumsing lé Garai Gasâng eq ji yu é hui tò bê đông, Yhâng é hí má xoq nyi nyi rá lhê.

²⁵ Ahkuí, zomyi zorâm wui é hkyô tái kôlê. Haù Yhumsing chyáng mã é hkunmó gi, ngò a wó; nghut kôlhang, Yhumsing é shogyo nhikmyin é yanmai, lumging sù rayuq nghut nyi é đông, ngò, nungmoq lé hkyô shit rá nghut lhê. ²⁶ Ahkuí hui zô é wuihke hkyo é yanmai, nungmoq gi, yhumsing nyi to é su xoq nyi nyi le je ge ri ngù, ngò wó myit ri. ²⁷ Nang, myiháng bê a nghut lhi? Lhoq kang rá hkâda lo. Nang, myi a háng shi a nghut lhi? Myi hkâhò lo. ²⁸ Nghut kôlhang, nang, myiháng é nghut le gi, mara a nghut. Zomyi gi, myi ló é nghut jáng, mara a nghut. Nghut kôlhang, myiháng é bang gi, shí pyat má wuihke hkyô pé myo myo hui kó rá nghut mù, ngò, nungmoq lé haù mai hkyi yù nau ri.

²⁹ Gumang wui ê, ngò tái nau é lichyúm gi, ahkyíng tot byuq bê nghut mù, ahkuí mai, myi wó é bang gi, a wó é bang đông nyi kó sháng gaq. ³⁰ Yón ngaù hui é bang gi, a hui é bang su; gabú é bang gi, a gabú é bang su; sutzè lé wui yu é bang gi, sutzè a wó é bang su; ³¹ haù mingkan zè pé lé chung é bang gi, haù pé lé a myit tui é bang su, nghut kó sháng gaq. Hkâsu mù gâ le, shí mingkân é ahkuí lhê é azông isâm gi, lai ló nyi é nghut lhê.

³² Ngò gi, nungmoq lé a myit myo nhâng naù. Myi a yù shí é sù gi, haù Yhumsing lé hkâsu wó gabú nhâng rá matú, haù Yhumsing é muzó lé myit chiq nyi ri. ³³ Nghut kôlhang, myi yù bê sù gi, yhâng é yhumsing myhi lé hkâsu wó gabú nhâng rá matú, mingkan shi é muzó eq séng lui myit chiq nyi ri. ³⁴ Haù mù, yhâng shirong é myit gi, byo myin nyi ri. Myi a ló é myiwe nghut nghut, zomyi gyíng nghut nghut gi, yhâng é gungdu eq woi-nyi má haù Yhumsing lé rago wó ap nóng rá matú, Yhumsing é muzó pé eq séng lui myit chiq nyi ri. Nghut kôlhang, myi ló bê myiwe gi, yhâng é yhumsing hpó lé hkâsu wó gabú nhâng rá matú, mingkan shi é muzó eq séng lui myit chiq nyi ri. ³⁵ Ngò, haù su ngù tái é gi, nungmoq é matú ge é hkyô nghut lhê; nungmoq lé tara eq zui zing é a nghut é za, myit a byò lo shoq Yhumsing lé wó ap nóng rá matú, jô é đông asak wó duí kô sháng gaq ngù é hkyô ru nghut lhê.

³⁶ Nghut kôlhang, rayuq yuq gi, yhang dúng tò é zomyi gyíng lé a htuk é đông kut nyi é su wó myit ngâm jáng, myiwe haù asak

kô lo nyi mù, hâng yù rá dut bê ngù myit é nghut le gi, yhang ô nau é đông kut sháng gaq. Yhang mara kut é a nghut. Yhangnhik gi, hâng lhum rá lhê. ³⁷ Nghut kôlhang, yhang gi, haù hkyô lé yhâng é myit mai wó lhoq zím pyâm é nghut mù, yut yut ô nau hkyo é ahkaù má a nghut é za, yhumsing ô nau é hkyô lé wó hkum zing pyâm é sù nghut lui, haù zomyi gyíng lé a hâng yù rá matú wó myit hpyit bê sù nghut é nghut jáng, yhang gi, ge é hkyô kut bê nghut ri. ³⁸ Haù mù lui, zomyi gyíng haù lé hâng yu é sù gi, jô é hkyô kut bê nghut ri; nghut kôlhang, zomyi gyíng haù lé a hâng yu é sù gi, je ge é hkyô kut bê nghut ri.

³⁹ Myiwe rayuq gi, yhâng é yhumsing hpó rú dui nyi nyi, yhang eq xoq tô ashí nghut lhê. Nghut kôlhang, yhâng é yhumsing hpó shi byuq é nghut jáng, yhang gi, myi ló rá ahkáng dum wó bê nghut lhê, nghut kôle, haù yuq gi, Yhumsing eq séng é sù dut rá lhê. ⁴⁰ Ngò jéyáng é đông ga jáng, myi a dum ló é wó nyi le gi, yhâng é matú je gabú hkyô dut rá nghut lhê. Ngò le, Garai Gasâng é Woi-nyi wó sù ngù wó myit ri.

8

Hparà Lhò Lé Tíng Byi É Zoshuq

¹ Ahkuí, hparà lhò pé lé tíng byi é zoshuq hkyô: nga-nhúng banshoq bang gi, haù hkyô eq séng lui sê lhê. Sê é hkyô gi, nghut-bun sê lhê; nghut kôlhang, chyitdap myit gi, lhoq kô myhang lhê. ² Byù rayuq yuq gi, rajung jung lé sé bûn é nghut le, yhang sé àng é lé lhang a sé shi nghut ri. ³ Nghut kôlhang, Garai Gasang lé chyitdap é sù gi, Garai Gasâng eq sé é sù nghut ri.

⁴ Haù mù lui, hparà lhò pé lé tíng byi é zoshuq lé zô é eq séng lui gi: hparà lhò gi, mingkan má hai lhang a nghut é hkyô lé le, Garai Gasang gi, Yhang rayuq mai lai lui gotù a nyi é lé le, nga-nhúng sê lhê. ⁵ Hkâsu mù gâ le, mauhkúng htoq má nghut nghut, myigíng htoq má nghut nghut, byù ra-am mai hparà pé ga bang nyi mù, "hparà pé" myo myo eq "yhumsing pé" myo myo nyi kôlhang ⁶ nga-nhúng é matú gi, Íwa nghut é Garai Gasang rayuq za nyi é nghut mù, lhunglhang gi, Yhang mai hpan é nghut lui, nga-nhúng gi, Yhâng é matú asak dui nyi é nghut lhê. Yesuq Hkrisduq ngù é Yhumsing rayuq za nyi é nghut mù, lhunglhang gi, Yhang đông mai hpan é nghut lui, nga-nhúng gi, Yhang đông mai asak dui nyi é nghut lhê.

⁷ Nghut kôlhang, yuq hkangmó gi, haù hkyô lé sê gam hkoq yu é a nghut. Ra-am gi, ahkuí jé shoq hparà lhò pé má mán byuq kô é yanmai, haù sù é zoshuq lé yhangmoq zô

* 7:29 A wó é bang đông nyi kó sháng gaq gâ é gi, Garai mù lé je myit zuq nyi sháng gâ nau é nghut lhê.

é hkûn, hparà lhô lé tîng byî é zoshuq dông myit sôn yu akô. Yhangmoq myit sôn sê é hkyô wum nyhôm é yanmai, mara wó bûn akô nghut ri. ⁸ Nghut kôlhang, zoshuq gi, nga-nhúng lé, Garai Gasâng shut shuí chyâng e é a nghut. Nga-nhúng a zô é nghut le gi, je sôm byuq lô é a nghut, zô é nghut le gi, je ge lo é a nghut.

⁹ Haù su ga kôlhang, nungmoq a htung a htê zô é hkyô gi, lumjîng myit wum nyhôm bâng é matú myit leqbat jowò a dut shoq sidiq keq. ¹⁰ Hkâsu mù gà le, sumpsé hpaqchyí wó é bang nungmoq gi, hparà lho é noqkuq yhùm má zô nyi kô é lé, haù myit sôn sê é hkyô má wum nyhôm é sù rayuq yuq myang é nghut jâng, hparà lhô pé lé tîng byî é zoshuq lé, yhang wám zo rà lé wum byî é a dut kô rà lhú? ¹¹ Haù mù, Hkrisduq shí hkám byi bê nghut é, wum nyhôm é gumang hpó haù yuq gi, nungmoq é sumpsé hpaqchyí eq lhoq htên pyâm é hui berà nghut lhê. ¹² Nungmoq gi, haù hkyô dông mai, nungmoq é gumang wui lé mara kut shut é eq, yhangmoq é myit sôn sê é hkyô wum nyhôm é lé nõ nhang é hkûn, Hkrisduq lé mara kut shut é nghut bekô. ¹³ Haù mù luí, ngò zô é gi, ngá é gumang hpó lé mara kut shut nhang é nghut jâng, yhang lé myit a leqbat nhâng sháng gaq, ngò, hkâ-nhám le, sho lé a zo lo rà nghut lhê.

9

Lagyo Rayuq É Ahko Ahkáng

¹ Ngò gi, lut sù a nghut lhú? Ngò gi, lagyo rayuq, a nghut lhú? Ngò gi, nga-nhúng é Yhumsing Yesuq lé myang wù bê sù, a nghut lhú? Nungmoq gi, haù Yhumsing má, ngò zui saí é muzó é ashi pé chyat, a nghut kô lhú? ² Ngò gi, góbâng chyâng lagyo a nghut kôlhang, nungmoq chyâng ge ge nghut lhê! Hkâsu mù gà le, nungmoq gi, haù Yhumsing má, ngò lagyo nghut é hkyô saksé dizik nghut bum akô.

³ Ngá ahtoq má jéyâng bang lé, ngá gûng ngò tai hung kat kôlé. ⁴ Ngamoq gi, zo rà shuq rà ahko ahkáng a wó é bang nghut lhê lhú? ⁵ Gotú lagyo pé eq Yesuq é yhanggu yuqzô pé eq Kehpa kut é su, lumjîng sù nghut é yhumsing myhí shuí chúng rà, ngamoq, ahko ahkáng a wó é nghut lhê lhú? ⁶ Ngò eq Barnaba baù za, asak dui hkyo é matú mù zui ra rà lhú?

⁷ Ó yuq wá, yhumsing zoshuq wùn luí, gyé mù wùn waq rà lhú? Ó yuq wá, tsibiyiq hkyâm saí mù, haù má é tsibiyiq shi a zo kut rà lhú? Ó yuq wá, sau rém mù, sau naú a shuq kut rà lhú? ⁸ Ngò gi, shí hkyô pé lé xângzo hkyam dông za tai é nghut lhê lhú? Haù tarâ má le, rajung za tai tô lhê, a nghut lhú? ⁹ Hkâsu mù gà le, haù Mosheq é tarâ

má, "Guq nâng nyi é no lé nhuttsung hkâ-tsúng to byi."¹⁰ ga kâ tô ri. Garai Gasang gi, no eq séng luí za chiq é nghut lhê lhú? ¹⁰ Gè gè yhang, yhang gi, nga-nhúng é matú tai é a nghut kô lhú? Nghut lhê, haù gi, nga-nhúng é matú kâ to byi é nghut lhê. Haù mù gà le, yò hpuq sù, yò hpuq é eq, guq bat sù, guq bat é gi, kyô chôm shù yù rà lé myoqbyù luí, kut kô é nghut lhê. ¹¹ Ngamoq gi, nungmoq chyâng woi-nyí amyui sân kat bê nghut mù, nungmoq chyâng mâ é mingkan zê lé shù yu é nghut jâng, lùm myô é dut byuq bekô lhú? ¹² Góbang gi, nungmoq chyâng mai garúm é ahko ahkáng wó kô é nghut jâng, ngamoq gi, haù lé je wó rà lhê a nghut kô lhú?

Nghut kôlhang, ngamoq gi, ahko ahkáng haù lé a yu é nghut lhê. Haù yù rà malaí, Hkrisduq é gabú danglù gi, hkùm zing pyâm é a hui rà matú sheq, jung hkangmó lé ngamoq hkam jân nyi lhê. ¹³ Haù noqkuq yhùm má mù zui é bang gi, yhangmoq é zoshuq lé haù noqkuq yhùm mai wó é hkyô eq, hkungga gyap má dojaú é bang gi, hkungga gyap má nhông byí é ra-am lé myàng zô é hkyô lé, nungmoq a sé kô lhú? ¹⁴ Haù eq rajung za, gabú danglù hko kyô é bang gi, gabú danglù hkyô má yhangmoq é asak baù rà lhê ga, haù Yhumsing hkunmó hkyô to bê nghut ri.

¹⁵ Nghut kôlhang, ngò gi, ahko ahkáng haù pé hai lé le a yu é nghut lhê. Nungmoq, ngò lé haù su lhom kut byi rà lé myoqbyù mù, ngò, shí hkyô lé kâ é a nghut. Hkâsu mù gà le, ngò haù su gumrong é hkyô lé, rayuq yuq lhoq htên pyâm byi rà htoq má, ngò shí byuq le lháng je ge ri. ¹⁶ Nghut kôlhang, gabú danglù lé ngò hko kyô é hkûn, ngò gumrong jang a joq; hkâsu mù gà le, haù gi, ngò a kut a ge é ngá wó nghut lhê. Haù gabú danglù lé ngò a hko kyô é nghut le gi, ngò dingnyé wó rà nghut lhê. ¹⁷ Yhumsing nau é myit mai ngò hko é nghut jâng, shigyaú chyunghuq wó rà nghut lhê; yhumsing nau é myit mai a nghut jâng gi, ngò lé lùm luí ap tô é lé, agon za wùn waq nyi é dut rà nghut lhê. ¹⁸ Haù mù luí, ngá é shigyaú chyunghuq gi, hai nghut lhê lhú ga jang, haù gabú danglù lé hko kyô é hkûn, ngò gi, ahpau a yu é za wó ap nóng luí, gabú danglù hko kyo hkyô má é ngá é ahko ahkáng pé lé ngò a yu é amyat nghut lhê.

¹⁹ Ngò gi, ó yuq é a-ô má le a nyi é za, lut sù nghut kôlé, byù wó myô é myhó shuí lhing yù rà matú, ngá gûng ngò, yuq hkangmó é jùn kut nyi lhê. ²⁰ Ngò gi, Yudaq byu pé lé shuí lhing yù rà matú, Yudaq byu pé chyâng nghut nyi é hkûn, Yudaq byù rayuq dông dut nyi lhê. Ngò gi, tarâ hkaù má nyi sù a nghut kôlhang, tarâ hkaù má é bang lé shuí lhing yù rà matú, tarâ hkaù má nyi bâng

chyáng nghut nyi é hkûn, tarâ hkaû mâ é byù rayuq dông dut nyi lhê. ²¹ Ngò gi, tarâ a wó bang lé shuí lhing yù râ matú, tarâ a wó bang chyáng nghut nyi é hkûn, tarâ a wó sù rayuq dông dut nyi lhê. Nghut kôlhang, gè gè ga jáng, Garai Gasâng é tarâ mai a lut htoq é za, Hkrisduq é tarâ hkaû má nyi sù nghut lhê. ²² Ngò gi, wum nyhóm bang lé shuí lhing yù râ matú, wum nyhóm bang chyáng nghut nyi é hkûn, wum nyhóm sù rayuq dông dut nyi lhê. Ngò gi, wó dut é hkyô dông mai byù ra-am lé wó hkyí sháng gaq nghú, byù lhunglhang bâng chyáng, byù ajàjà dông nyi nyi lhê. ²³ Ngò gi, gabú danglù mai wó é shimân jeju pé lé wó chòm hkam yù sháng gaq nghú, gabú danglù é yanmai haù pé banshoq lé kut é nghut lhê.

²⁴ Din shingjóng poi má din râ bang banshoq din kôlhang, rayuq za shigyaù chyunghuq wó é hkyô lé, nungmoq a sé kô lhu? Chyunghuq wó râ matú din keq. ²⁵ Sup poi má shingjóng lhum é bang yuq hkanmó gi, yhumsing gung yhumsing tarâ htan é dông lhoq mhân yù râ lhê. Yhangmoq gi, gíng nyi râ a nghut é janmaù wó râ matú, haù su kut é nghut akó; nghut kôlhang, nga-nhúng gi, ahtum abyuq gíngtíng nyi râ nghut é janmaù wó râ matú shikut é nghut lhê. ²⁶ Haù mù luí, ngò gi, jum din din é byù rayuq su din é sù a nghut. Ngò gi, lai lé bat é byù rayuq su, akóm má bat é sù le a nghut. ²⁷ Ngò gi, góbâng chyáng mungdang hko é htàng má, ngá gúng ngò, shigyaù chyunghuq eq a gíngdán sù a dut sháng gaq nghú, ngá gúng lé gyaì yang lhoq mhân yù mù, ngá gung lé jùn kut yu nyi lhê.

10

Israellaq Pé É Labaù Mai Sidiq Byi É Hkyô

¹ Gumang wui è, ngò gi, dut lai lo é hkyô lé, nungmoq lé a sé a dut nhâng nau é nghut lhê; hí hkûn, nga-nhúng é ichyí iwa pé banshoq bang gi, mhutdùm ô má nyi mù, Nhông Nè mai wó lai byit kô é nghut lhê.* ² Yhangmoq banshoq bang gi, mhutdùm eq Nhông Nè má, Mosheq é chángzò pé dông baptisma hkam yu é bang chyat nghut bekò. ³ Yhangmoq banshoq bang gi, rajung zâ é woi-nyí zang zo kô é eq, ⁴ rajung zâ é woi-nyí wui shuq kô é nghut lhê; hkâsu mù gà le, yhangmoq eq rahá nghut nyi é woi-nyí eq sêng é luqbum mó mai, yhangmoq shuq kô é nghut lhê; luqbum mó haù gi, Hkrisduq nghut bê. ⁵ Nghut kôlhang, yhangmoq myo hpyang lé, Garai Gasang a nau é nghut mù, yhangmoq é gúng sôm lé yoso pé má myhín so san kut pyám é hui bekò nghut ri.

* **10:1** Bun zo ralhüm mai raxè lhum gi, Htoq Ló Laiká má bo é Mosheq htàng cháng bâng é hkyô lé ká tô é nghut lhê.

✧ **10:7** Htoq Ló 32:6

⁶ Haù hkyô pé dut htoq é gi, agè ashop hkyô má yhangmoq myit tuí bùm é su, nga-nhúng a myit tuí nyi râ matú nga-nhúng é azông dut bê nghut ri. ⁷ "Byu pé gi, zúng mù, zo luí shuq luí, a lumjíng bang kut é dông, toq mù, ye bum akò."[✧] gá kô tô é eq rajung za, yhangmoq má é ra-am hparà noq é bang dut byuq é su, nungmoq hkâdut kó. ⁸ Yhangmoq má é ra-am gi, ashop é dông gungsho zùm yap é hkyô shut kômù, ra-nyí má za í mûn sum hkyíng yuq shi byuq é su, ashop é dông gungsho zùm yap é hkyô le, nga-nhúng gi, a ge kut shut râ nghut lhê. ⁹ Yhangmoq má é ra-am gi, haù Yhumsing lé chyám luí, lhangmui pé eq hte sat é hui bùm kô é su, haù Yhumsing lé, nga-nhúng gi, a ge chyám râ nghut lhê. ¹⁰ Yhangmoq má é ra-am gi, nhutluq shô-myo kôluí, lhoq htên é maumâng eq sat pyám é hui kô é su, nungmoq gi, nhutluq shô-myo hkâkut kó.

¹¹ Yhangmoq chyáng wú yù râ azông dông haù pé dut htoq luí, ló htàng râ ipyat pé má nyi àng to bang nga-nhúng é matú sidiq byi râ dông ká to bê nghut ri. ¹² Haù mù luí, nungmoq gi, yap gíng nyi bê su ngàm kô é nghut jáng, a leqbat râ matú sidiq nyi keq! ¹³ Byu chyáng htoq sê é gungláu hkyô za nungmoq hui râ nghut lhê. Garai Gasang gi, lhumzui sù nghut lhê mù, nungmoq a wó jân é gungláu hkyô lé hui nhâng râ a nghut. Nghut kôlhang, nungmoq gungláu hui é hkûn, Yhang gi, haù lé nungmoq wó jan râ matú, hkyô htong byi râ nghut lhê.

Hparà Lhô Noq Hkyô Lé Koi Pyám Râ Hkyô

¹⁴ Haù mù luí, ngò chyitdap é luzúm wui è, hparà hô noq hkyô lé koi pyám keq. ¹⁵ Nhik gyíng bang lé ngò tai lhê; ngò hai tai nyi é hkyô lé nungmoq gúng myit sôn yu keq. ¹⁶ Nga-nhúng, jeju bûn nyi é jeju góm lé shuq é hkûn, Hkrisduq é sui má chòm zùm bê a nghut kô lhu? Nga-nhúng, myhik hpè é muk lé zô é hkûn, Hkrisduq é gungdu má chòm zùm bê a nghut kô lhu? ¹⁷ Hai mù gà le, muk htung ralhüm za nghut mù, nga-nhúng gi, myo myo nghut kôle ragúng za nghut nyi lhê. Hkâsu mù gà le, nga-nhúng banshoq bang gi, haù rahtung zâ é muk lé chòm gám zô é bang chyat nghut lhê.

¹⁸ Israellaq byu pé é hkyô lé myit wú keq. Haù hkungga lé zô é bang gi, hkungga gyap má chòm lom é bang nghut lhê, a nghut kô lhu? ¹⁹ Hparà hô, a nghut jáng, hparà hô lé tíng byi é hkungga gi, rajung jung nghut lhê nghú, ngò tai é lhu? ²⁰ Haù su tai é a nghut, a lumjíng bâng é hkungga gi, Garai Gasang lé nhông byi é a nghut, nat gâng pé lé tíng byi é ru nghut lhê. Ngò gi, nungmoq, nat gâng pé eq chòm zùm nyi bang dut râ lé a ô nau

é nghut lhê. ²¹ Nungmoq gi, haù Yhumsing é góm lé le, nat gâng pè é góm lé le, ge shuq rà a nghut; nungmoq gi, haù Yhumsing é zangbó má le, nat gâng pè é zangbó má le, rahá ge bo lóm rà a nghut. ²² Nga-nhúng gi, haù Yhumsing lé manôn nhâng nau é bang dut rà a nghut kô lú? Nga-nhúng gi, Yhâng htoq je wúm bo é bang nghut lhê lú?

Lumjng Su É Luthkyô

²³ "Jung hkgangmó kut rà ahkáng wó lhê." nghut kôlhng, jung hkgangmó gi, akyú wó é a nghut. "Jung hkgangmó kut rà ahkáng wó lhê." nghut kôlhng, jung hkgangmó gi, byù lé wó kô làm nhang é a nghut. ²⁴ Ó yuq le, yhumsing é gè hkyo matú ho é a nghut é za, gôbâng é gè hkyo é matú hô rà dut lhê.

²⁵ Sho úng gai má úng é hái lé lé, úng-âng é myit èq a myí gôn é za zo keq. ²⁶ Hkâsu mù gà le, "Myidàm htoq eq haù má joq é jung hkgangmó gi, Yhumsing é chyat nghut lhê."* gà tô ri.

²⁷ A lumjng bang ra-am, nungmoq lé zang zo jì mù, nungmoq é nau é nghut jáng, úng-âng é myit èq a myí gôn é za, nungmoq hí má to byí é gú lé zo keq. ²⁸ Nghut kôlhng, rayuq yuq, nungmoq lé, "Shí gi, hparà lhô lé tng byi bè nghut lhê." ga tái kyô é nghut jáng, nungmoq lé tái kyo su é yanmai le, myit úng-âng é yanmai le, haù lé hkâzo kó. ²⁹ Úng-âng é myit haù gi, nungmoq é a nghut, góyuq é úng-âng é myit lé tái nau é ru nghut lhê. Ngá é luthkyô lé, hái mù góyuq é úng-âng é myit èq jéyáng é huí nhang lhê lú? ³⁰ Ngò jeju bún é myit mai bo zo bo shuq yu é nghut jáng, Garai Gasang lé jeju hkya-on bè nghut é zoshuq hau é yanmai, hái mù lumu pyâm é ngò huí rà lú?

³¹ Haù mù luí, nungmoq zo kôlhng, shuq kôlhng, hái kut kôlhng, Garai Gasang é hpungwup shingkang é matú chyat kut keq. ³² Ngò gi, yuq hkgangmó lé, hkyô hkgangmó má shikut luí myit ngón nhang é eq rajung za, nungmoq gi, Yudaq byu pé lé nghut nghut, Grik byu pé lé nghut nghut, Garai Gasang é noqkuq hpúng má é byù lé nghut nghut, ó yuq lé le myit hkâleqbat nhâng kó. ³³ Hkâsu mù gà le, ngò gi, yhangmoq hkyi yu é wó huí kó sháng gaq ngù, ngá é gè hkyô ho é a nghut é za, myo myô é matú gè hkyô ho nyi é ru nghut lhê.

11

¹ Ngò gi, Hkrisduq é alik châng é su, nungmoq gi, ngá é alik cháng keq.

Noqkuq É Má Htap Htuk Râ Hkyô

² Nungmoq gi, hkyô hkgangmó má ngo lé bún nyi kô é yanmai le, nungmoq lé ngò lhai byi bè mhoqshit hkyô pé lé myhik zing nyi

kô é yanmai le, ngò, nungmoq lé hkya-ôn lhê.

³ Ahkuí, ngò, nungmoq lé sè hkyâng nhâng nau é hkyô gi: yuggè hkgangmó é ulhum gi, Hkrisduq nghut ri; myiwe hkgangmó é ulhum gi, yuggè nghut ri; Hkrisduq é ulhum kúm gi, Garai Gasang nghut ri. ⁴ Yuggè hkgangmó gi, kyúdüng le nghut nghut, my-ichtoi htoi le nghut nghut, yhâng é ulhum lé nghop tô é nghut jáng, yhâng é ulhúm é aróng lé lhoq hpoi pyâm é nghut bè. ⁵ Myiwe hkgangmó gi, kyúdüng le nghut nghut, my-ichtoi htoi le nghut nghut, yhâng é ulhum lé a nghop tô é nghut jáng, yhâng é ulhúm é aróng lé lhoq hpoi pyâm é nghut bè. Haù gi, yhâng é ulhum lé wuq pyâm é eq rajung za nghut ri. ⁶ Myiwe rayuq gi, yhâng é ulhum lé a nghop pyâm é nghut jáng, yhâng é xâm lé nyhâm pyâm ra rà nghut lhê. Nghut kôlhng, xâm nyhâm pyâm é nghut nghut, xâm wuq pyâm é nghut nghut, myiwe rayuq é matú aróng hpoi lhê nghut jáng, yhang gi, yhâng é ulhum lé nghop to ra rà nghut lhê. ⁷ Yuggè gi, Garai Gasang é azông isâm eq hpungwup shinggang nghut é yanmai, yhâng é ulhum lé a nghop rà é nghut lhê. Myiwe kúm gi, yuggè é hpungwup shinggang nghut ri. ⁸ Hkâsu mù gà le, a-nham sâng-hi má, yuggè gi, myiwe mai lo é a nghut, myiwe sheq yuggè mai lo é ru nghut lhê.* ⁹ Hau htoq agó, yuggè lé gi, myiwe é matú hpan tô é a nghut, myiwe lé sheq, yuggè é matú hpan tô é ru nghut lhê. ¹⁰ Haù nghut é yanmai le, maumang lagyo pé é yanmai le, myiwe gi, ahko ahkáng kumlhá đông yhâng é ulhum lé nghop rà dut lhê.

¹¹ Nghut kôlhng, haù Yhumsing hí má, myiwe gi, yuggè lé nghehkau é su, yuggè le, myiwe lé nghehkau é nghut lhê. ¹² Hkâsu mù gà le, myiwe gi, yuggè mai lo é su, yuggè le, myiwe mai hku lé é nghut lhê. Nghut kôlhng, jung hkgangmó gi, Garai Gasang mai lo é nghut lhê. ¹³ Myiwe rayuq, ulhum a nghop é za Garai Gasang lé kyúdüng é gi, htuk kô rà lú? Nungmoq, yhumsing gung é matú doqđán yù keq. ¹⁴ Yuggè xâm hng tô é nghut jáng, yhâng é matú aróng hpoi é hkyô dut é nghut kôle, ¹⁵ myiwe xâm hng tô é nghut jáng, yhâng é matú hpungwup shinggang nghut é hkyô lé, htunglí èq nungmoq lé mhoqshit lhê, a nghut kô lú? Hkâsu mù gà le, xâm hng tô é gi, nghop rà zè đông yhang lé byi tô é nghut lhê. ¹⁶ Rayuq yuq, haù hkyô lé tái dang-rhâng nau é nghut jáng, ngamoq chyáng le, Garai Gasang é noqkuq hpung pé chyáng le, gotú htunglí a joq é nghut lhê.

Yhumsing É Myinzang

† **10:23** Bun zo 23 má é dangnghe gi, Korinhtuq byu pé lhaq tái é dang nghut lhê. * **10:26** Hkya-on 24:1 * **11:8** Apún 2:21-23

¹⁷ Nungmoq é zuphpong pé gi, gè hkyô kut râ htoq má akyû a bo é hkyô je kut kô é yanmai, a-ô má hkyô shit tô é pé má, ngò, nungmoq lé hkya-ôn é a nghut. ¹⁸ Sâng-hi má, noqkuq hpúng ralhum đông nungmoq zup zing é hkûn, nungmoq hkaû má gam hkoq hkyô joq é lé wó gyô é nghut lui, têng é le bò râ nghû, ngò lumjing lhê. ¹⁹ Ô pé gi, Garai Gasang o é hkyam shut nghut é lé wó shit râ matú, nungmoq ahkaû má gam hkoq lhum hkyô joq râ dut lhê. ²⁰ Nungmoq rahá zup zing kô é hkûn, nungmoq gi, haû Yhumsing é myinzang zô é a nghut kô. ²¹ Hkâsu mù gâ le, nungmoq zô é hkûn, góyuq lé le a lánq é za, ó le ó hí yû zô akò. Haû mù, rayuq gi, zo mut huí nyí, góyuq gi, shuq wut to dut akò nghut ri. ²² Nungmoq gi, zo jang shuq jang yhûm a wó bang nghut akò lú? Garai Gasang é noqkuq hpúng lé wú tiq pyám kô é eq, a wó bang lé hoq hpu nhâng kô é, nghut akò lú? Nungmoq lé ngò hkâsu nghû tai kó râ lú? Haû pé é yanmai, ngò, nungmoq lé hkya-on râ lú? Ratsuí lhang a wó dut!

²³ Hkâsu mù gâ le, haû Yhumsing chyáng mai ngò wó hap yu é gû lé, nungmoq lé hai byi bê nghut lhê. Haû Yhumsing Yesuq gi, Yhang lé ap pyám huí é myin má, muk lé yù mù, ²⁴ jeju hkya-ôn é htâng má, haû lé myhik hpé mù, tai é gi, "Shí gi, nungmoq é matú Ngá é gungsho nghut lhê; Ngo lé bûn nyí râ matú, shí su kut nyí keq." gâ ri. ²⁵ Haû eq rajung za, myinzang bàn zô é htâng má, Yhang gi, góm lé le yù mù, "Góm shí gi, Ngá é sui má é dangshikaq asik nghut lhê; hkâ-nhám le, nungmoq shí shuq é hkûn, Ngo lé bûn nyí râ matú shí su kut keq." gâ tai ri. ²⁶ Hkâsu mù gâ le, nungmoq gi, muk shí lé zo lui, góm shí lé shuq é hkangmó, haû Yhumsing shí hkâm é hkyô lé, Yhang jé lé shoq, shit kyô nyí râ lhê.

²⁷ Haû mù lui, ó yuq nghut kôle, a gingdán é đông Yhumsing é muk haû lé zo mù, góm haû lé shuq é nghut jáng, haû Yhumsing é gungdu eq sui lé shut é mara wó bê nghut lhê. ²⁸ Haû mù, ó yuq le, muk zo góm shuq râ hí má, yhumsing gùng yhumsing jep wú ra râ nghut lhê. ²⁹ Hkâsu mù gâ le, ó yuq nghut kôle, haû Yhumsing é gungdu eq sêng é hkyô lé a sê gyô é za muk zo góm shuq é nghut jáng, yhanggùng yhang mara zô bò shuq bo yu é nghut lhê. ³⁰ Haû nghut é yanmai, nungmoq má é byù myo myo gi, wum nyhôm é, nõhpyo huí é nghut bum akò. Ra-am gi, shi lo byuq bekò nghut ri. ³¹ Nghut kôlhang, nga-nhúng gi, yhumsing gùng yhumsing hí sôn sê yu é nghut jáng tará jéyáng é hui râ a nghut. ³² Nga-nhúng gi, mingkan eq rahá, mara byí é a hui zo sháng gaq ga, nga-nhúng lé haû Yhumsing eq jéyáng é hkûn, nga-nhúng gi, mhoqshit é hui nyí gù bê nghut lhê.

³³ Haû mù lui, ngá é gumang wui è, nungmoq gi, zo râ nghû rahá zup zing é hkûn, rayuq eq rayuq lánq lhum keq. ³⁴ Nungmoq rahá zup zing é hkûn, jéyáng é a hui zo kó sháng gaq, rayuq yuq zômút é nghut jáng, yhûm má zô chúng râ lhê.

Gotû myit tô é hkyô pé gi, ngò jé lé é hkûn sheq shit kyo râ nghut lhê.

12

Woi-nyí Hkyô Eq Sêng É Chyunghuq Pé

¹ Gumang wui è, woi-nyí hkyô eq sêng é chyunghuq pé lé, nungmoq a sê gyo râ lé ngò a ô nau é nghut lhê. ² Nungmoq gi, a lumjing bang nghut nyí kô é hkûn lé, dang a nyo é hpará lhò noq râ matú hkyô shui nghoq é hui kô é hkyô lé, nungmoq sê lhê. ³ Haû mù lui, "Yesuq gi, nhing pyám é hui sháng gaq." ga, Garai Gasang é Woi-nyí mai tai é byù ó yuq le a nyí é eq, haû Chyoiyung Woi-nyí mai za a nghut jáng, "Yesuq gi, Yhumsing nghut lhê." ga, ó yuq le a wó tai é nghut lhê nghû, ngò, nungmoq lé tai kyô é nghut lhê.

⁴ Woi-nyí hkyô eq sêng é chyunghuq ajung jung joq lhê; nghut kôlhang, Chyoiyung Woi-nyí mai chyat nghut lhê. ⁵ Dojaú é hkyô ajung jung joq lhê; nghut kôlhang, Yhumsing rayuq lé za dojaú é nghut lhê. ⁶ Zui sai é hkyô ajung jung joq lhê, nghut kôlhang, Garai Gasang yhang za, byù lhunglhang bang má, haû pé banshoq lé kut é nghut lhê.

⁷ Woi-nyí é hpông shit hkyô gi, byù pé é gè hkyô matú, yuq hkangmó lé byi bê nghut ri. ⁸ Rayuq lé gi, Woi-nyí haû mai, hpaqchyí byéng-yá bying é danglù byí é nghut ri; góyuq lé gi, Woi-nyí hau eq za, sumsé hpaqchyí bying é danglù byí é nghut ri; ⁹ góyuq lé gi, Woi-nyí hau eq, lumjing myit byí é nghut ri; dum góyuq lé gi, Woi-nyí hau eq, nõ lhoq ge é chyunghuq byí é nghut ri; ¹⁰ dum, góyuq lé gi, hpungwup a-tsam pé; dum, góyuq lé gi, myiqhtoi htoi é ahkáng; dum, góyuq le gi, woi-nyí pé lé sê gam hkoq é ahkáng; dum, góyuq lé gi, laklai dang ahú hú ge tai é ahkáng; dum, góyuq lé gi, dang hau pé é lichyúm tai sân kyô é ahkáng, byí é nghut ri. ¹¹ Chyunghuq hau pé banshoq gi, Woi-nyí hau eq za kut é loqmú chyat nghut mù, Yhang myit hpyit é đông yuq hkangmó lé hau pé tsing gam byí é nghut ri.

Gungbun Myo Kôlhang, Ra Gùng Za

¹² Gungdu gi, gungsho showui showang pé myo myo lé pong tô é nghut kôlhang, ragùng za nghut ri; gungsho showui showang pé banshoq myo myo nghut kôlhang, gungdu ra gùng za dut tô é nghut ri. Haû eq rajung za, Hkrisduq eq le haû đông nghut ri. ¹³ Hkâsu mù gâ le, nga-nhúng banshoq bang gi, Yudaq byù nghut nghut, Grik byù nghut nghut, jùn nghut nghut, lut

bang nghut nghut, gungdu ra lhum za dut rã matú, Woi-nyí rayuq mai za wui-myhup hkâm yù bê nghut luí, Woi-nyí rayuq lé za chòm shuq yù bê bang nghut lhê.

¹⁴ Haù gungdu gi, gungsho showui showang ra bun lé za kut tó é a nghut é za, myo myo lé pong tó é nghut lhê. ¹⁵ Haù hkyí gi, "Ngò, loq a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a sêng wó dut é a nghut. ¹⁶ Dum, haù nohkyap gi, "Ngò, myoqjí a nghut é yanmai, gungdu eq a sêng é nghut lhê." gâ é nghut jáng, hau é yanmai, gungdu eq a sêng wó dut é a nghut. ¹⁷ Ragùng dù é gi, myoqjí za nghut é nghut jáng, gyô é hkyô gi, hkâmá nghut rã lhú? Ragùng du é gi, nohkyap za nghut é nghut jáng, shôm nam é hkyô gi, hkâmá nghut rã lhú? ¹⁸ Nghut kôlhàng, Garai Gasang gi, gungsho showui showang hkangmó lé, Yhang dut nhâng nau é eq rajung za, gungdu má kut to bê nghut ri. ¹⁹ Gungsho showui showang gi, ra bun za nghut é nghut jáng, gungdu gi, hkâmá nghut rã lhú? ²⁰ Hkyak ga jang, gungsho showui showang pé myo kôlhàng, gungdu gi, ragùng za nghut ri.

²¹ Haù myoqjí gi, loq lé, "Ngò, nang lé a ra!" nghù a ge taí. Haù ulhum gi, hkyí lé, "Ngò, nang lé a ra!" nghù a ge taí. ²² Haù za a nghut, gungdu má é gungsho showui showang pé má wum je nyhôm é su dut é pé le, a bò a ge é chyat nghut lhê. ²³ Hau htoq agó, hpau a lùm tap rã su myit ngam é gungsho showui showang pé lé, nga-nhúng je hpautap rã lhê. Haù a shit é jung gungsho pé lé, nga-nhúng hpautap é dồng rago nghop rã lhê. ²⁴ Nga-nhúng é wó shit é gungsho pé kúm gi, haù hkyô é ra nghut ri. Nghut kôlhàng, Garai Gasang gi, gungdú é gungsho showui showang pé lé pong to mù, aróng nyhum é lé, je riyhang aróng byi bê nghut ri. ²⁵ Haù mù, gungdu má gamhkuí lhúm é hkyô a bo é za, gungsho showui showang pé ralhum eq ralhum, rajung za kut wó myit té byí lhum kó rã nghut lhê. ²⁶ Haù gungsho showui showang ralhum jamjau huí é nghut jáng, lhum hkangmó bo jamjau rã nghut lhê. Ralhum hpautap huí é nghut jáng, lhum hkangmó bo gabú é nghut lhê.

²⁷ Ahkuí, nungmoq gi, Hkrisduq é gungdu nghut kôluí, nungmoq yuq hkangmó gi, haù é gungsho showui showang pé nghut akò. ²⁸ Garai Gasang gi, noqkuq hpúng má, sâng-hi lé, lagyó pé, í lhum nghù rã má, myiqhtoi pé, sùm lhum nghù rã má, mhoqshit bang, hau htàng má, laklai kumhá pé kut rã bang, nò wó lhoq gê rã chyunghuq wó é bang lé le, góbang lé wó garúm é bang, shuí-u rã chyunghuq wó é bang, laklai dang ahú hù ge taí é bang lé, masat to bê nghut ri. ²⁹ Banshoq bang gi, lagyó pé nghut lhê lhú? Banshoq bang gi, myiqhtoi pé nghut

lhê lhú? Banshoq bang gi, mhoqshit bang nghut lhê lhú? Banshoq bang gi, laklai kumhá kut akò lhú? ³⁰ Banshoq bang gi, nò lhoq ge é chyunghuq wó é nghut lhê lhú? Banshoq bang gi, laklai dang ahú hù ge taí lhê lhú? Banshoq bang gi, dang hau pé é lichyúm ge taí sân kyô lhê lhú? ³¹ Nghut kôlhàng, nungmoq gi, je gyaú é chyunghuq lé gyai yhang ô nau nyi keq.

Chyitdap Myit

Hau htoq agó, ahkuí, ngò, nungmoq lé, je gyaú dik é hkyô ralhum shit kôle.

13

¹ Ngò gi, byu pé é eq maumang lagyô pé é myíng pé lé sê taí é nghut kôlhàng, chyitdap myit a bo é nghut jáng, myíng hung htê bo é ut eq myíng tui htê bo é chapchêng su za dut byuq rã nghut lhê. ² Ngò gi, myiqhtoi htôi é chyunghuq, zaú tó é hkyô pé banshoq lé sê gyô é nyan, sumpsé hpaqchyí banshoq lé wó é eq, bùm pé lé wó htot nhang é lumjng myit bo é nghut kôlhàng, chyitdap myit a bo é nghut jáng, ngò haí a nghut sù dut berã nghut lhê. ³ Ngò gi, wó é sutzê banshoq myíng bang lé byí pyám é eq, ngá é gungdu lé nyhê pyám rã matú ap pyám é nghut kôlhàng, chyitdap myit a bo é nghut le gi, hai akyú a bò nghut ri.

⁴ Chyitdap myit gi, myit hing lhê, nú-nhâm lhê. Chyitdap myit gi, a manôn, gyâng dang a taí, a nghutbùn é nghut lhê. ⁵ Chyitdap myit gi, hpau a dap é hkyô a kut, yhumsing é akyú baú za a hò, lui za nhikjum a yo, shut é mara a matsing é nghut lhê. ⁶ Chyitdap myit gi, agé ashop é má a gabú é za, haù tengmán hkyô má gabú nyi ri. ⁷ Chyitdap myit gi, hkâ-nhám le wú magum ri, hkâ-nhám le lumhkau ri, hkâ-nhám le myit myoqbyu ri, hkâ-nhám le hkam jân ri.

⁸ Chyitdap myit gi, hkâ-nhám le htùm byuq é a nghut. Myiqhtoi htôi é hkyô pé gi, byuq byuq rã nghut lhê; laklai dang ahú hù ge taí é hkyô gi, zim byuq rã nghut lhê; sumpsé hpaqchyí hkyô gi, lai ló byuq rã nghut lhê. ⁹ Hkâsu mù gâ le, nga-nhúng sê é gi, ra-am rahtàng ru nghut lhê. Nga-nhúng myiqhtoi htôi é gi, ra-am rahtàng ru nghut lhê. ¹⁰ Nghut kôlhàng, gumjup hkyô jé lé é hkùn, a gumjup hkyô gi, byuq byuq rã nghut lhê. ¹¹ Ngò, zoshàng nghut ashí hkùn gi, zoshàng dồng dang taí, zoshàng dồng myit, zoshàng dồng myit sôn wú é nghut lhê. Ngò, suwún nghut jáng gi, zoshàng nyi yap hkyô pé lé tó pyám bê nghut lhê. ¹² Ahkuí, nga-nhúng gi, myoqjám hkaú má é rago a sân é wuppe lé za myàng é nghut lhê; nghut kôlhàng, htàng má, myoqdong hkyúm wó myàng rã nghut lhê. Ahkuí, ngò gi, ra-am rahtàng za sê é ru nghut lhê; nghut kôlhàng, Garai Gasang gi,

ngo lé gumjup shoq sê é su, ngò le, htâng má, gumjup shoq sé rà nghut lhê.

¹³ Ahkuú, lumjúng myit, myit myoqbyù hkyô, chyitdap myit shí sùm lhum myit tô ri. Nghut kôlháng, haú pé má é kô dik é gi, chyitdap myit nghut ri.

14

Myiqhtoi Htoi É Chyunghuq Pé Eq Laklai Dang Nyo É Chyunghuq Pé

¹ Chyitdap hkyô má le cháng mù, woi-nyí hkyô eq sêng é chyunghuq lé le gyai yhang myit o nyi keq. Myiqhtoi htoi é chyunghuq lé je riyhang myit o nyi keq. ² Hkâsu mù gâ le, laklai dang ahú hú nyo é sù ó yuq le, byù lé nyo é a nghut é za Garai Gasang lé nyo é ru nghut lhê. Yhang lé ó yuq eq le a sê gyô byi, záu tô é hkyô pé lé haú Woi-nyí eq nyo htoq é nghut ri. ³ Nghut kôlháng, myiqhtoi htoi é sù yuq hkangmó gi, byu pé lé wum byi dang eq nhik ting dang tai ri. ⁴ Laklai dang rahú nyo é sù gi, yhumsing gùng lé htuqbang byi ri, nghut kôlháng, myiqhtoi htoi é sù gi, noqkuq hpúng lé htuqbang byi ri. ⁵ Ngò gi, nungmoq yuq hkangmó laklai dang ahú hú pé nyò rà lé ô nau ri, nghut kôlháng, nungmoq myiqhtoi htoi rà lé je ô nau é nghut lhê. Hkâsu mù gâ le, laklai dang ahú hú nyo é sù gi, haú noqkuq hpúng lé wó htuqbang rà matú, lichyúm lé tai sân kyô é za a nghut jáng, myiqhtoi htoi sù gi, yhang htoq je gyaú é nghut lhê.

⁶ Ahkuú, gumang wui é, ngò gi, nungmoq chyáng lé je mù, laklai dang pé nyo é nghut kôle, shing-rán nghut nghut, sumpsé hpaqchyí nghut nghut, myiqhtoi dang nghut nghut, mhoqshit dang nghut nghut, nungmoq lé a tai kyô é nghut le gi, nungmoq é matú ngò hai akyú htoq rà lú? ⁷ Htê lhoq htoq é asak a bo jung zè pé má hláng gi, sampyí nghut nghut, ting nghut nghut, gam hkoq tô é htê a joq é nghut jáng, mut myhíng bat myhíng é htê hai nghut é lé, hkâsu wó sé rà lú? ⁸ Dum, tut htê le gam hkoq é dông a mut kyô é nghut jáng, majan htoq rà rì rì ó yuq wá hên rà lú? ⁹ Nungmoq chyáng le haú dông nghut lhê. Nang, laklai dang ahú hú nyo le, sê gyô é dangkhun mai nyo é za a nghut jáng, nang hai tai nyi é lé ó yuq wá hkâsu wó sé rà lú? Nungmoq gi, maulat má za tai háng pyám nyi kó rà nghut lhê. ¹⁰ Mingkan má dang ahú hú yhang joq é nghut lhê, nghut kôle, dang lichyúm a htoq é dang gi, a joq é nghut lhê. ¹¹ Haú mù luí, rayuq yuq hai tai nyi é lichyúm lé ngò a dat chyup é nghut jáng, ngò gi, haú dang tai su é matú maigan byù dut mù, yhang gi, ngá é matú maigan byù dut é nghut lhê. ¹² Nungmoq chyáng le haú dông nghut lhê. Nungmoq gi, woi-nyí hkyô eq sêng é

chyunghuq pé lé gyai yhang ô nau nyi bekô nghut mù, haú noqkuq hpúng lé kô myháng nhang é chyunghuq pé lé je ho shikut nyi keq.

¹³ Haú nghut é yanmai, laklai dang ahú hú tai é sù ó yuq le, yhang haú tai é lichyúm wó tai sân kyo sháng gaq, kyúdung rà dut lhê. ¹⁴ Hkâsu mù gâ le, laklai dang ahú hú dông ngò kyúdung é nghut jáng, ngá é woi-nyí mai dúng é nghut lhê; nghut kôlháng, ngá é myitnyân é matú, hai akyú a wó nghut ri. ¹⁵ Haú mù, ngò hkâsu kut rà lú? Ngò gi, ngá é woi-nyí mai le kyúdung rà, ngá é myitnyan mai le kyúdung rà nghut lhê; ngò gi, ngá é woi-nyí mai le mahkôn hkôn rà, ngá é myitnyan mai le mahkôn rà nghut lhê. ¹⁶ Nungmoq gi, nungmoq é woi-nyí mai za Garai Gasang lé hkya-on kô é nghut jáng, a sê gyô é bang má é rayuq gi, nungmoq hai tai é lé a sê é nghut mù, nungmoq jeju hkya-on é hkùn, "Amen" ga hkâsu wó tai rà lú? ¹⁷ Nungmoq gi, ge dik shoq jeju hkya-on kô é abe, nghut kôlháng, góbang gi, htuqbang é a hui kó nghut ri.

¹⁸ Ngò gi, nungmoq banshoq bâng htoq má laklai dang ahú hú je wó tai é yanmai, Garai Gasang lé jeju bún ri. ¹⁹ Nghut kôlháng, noqkuq hpúng má, laklai dang rahú dông dangkhun ramun ngò tai rà htoq má, góbang lé mhoqshit rà akyú bo é dang ngo hkun tai rà lé ngò je ô nau ri.

²⁰ Gumang wui é, zosháng wui su myit nyi é lé nô pyám keq. Agé ashop hkyô eq sêng é má gi, nyheqnú dông kut mù, nungmoq myit é hkyô má gi, ko bang dông kut keq. ²¹ Haú jep é tará má kâ tô é gi,

"A wó gyô wú é dang dông mai le, góming byu pé é nhutwuí dông mai le, byù shí bang lé ngò tai rà nghut lhê;

nghut kôlháng, yhangmoq gi, ngá dang gyô kó rá a nghut."

ga Yhumsing tai ri."^{*}
gâ ri.

²² Haú mù, laklai dang ahú hú nyo é hkyô gi, lumjúng bâng matú kumlhá a nghut é za, a lumjúng bâng matú sheq ru nghut lhê. Myiqhtoi dang kúm gi, a lumjúng bâng matú a nghut é za, lumjúng bâng matú sheq ru nghut lhê. ²³ Haú nghut mù, noqkuq hpúng gón chôm zing mù, yuq hkangmó laklai dang ahú hú nyò kô é nghut jáng, a sê gyô é bang nghut nghut, a lumjúng é bang nghut nghut, wang lé kô é hkùn, yhangmoq gi, nungmoq nâ bùm bekô ga a tai kó rà nghut lhê lú? ²⁴ Nghut kôlháng, yuq hkangmó, myiqhtoi dang tai nyi é u má, a lumjúng sù nghut nghut, a sê gyô é sù nghut nghut, wang lé é nghut jáng, yhang gi, yubak dap sù rayuq nghut é lé, banshoq eq lhoq pún kyíng é hui rà eq, banshoq eq jéyáng é hui rà nghut é

* 14:21 Esai 28:11-12

htoq agó, ²⁵ yhâng é i-myt má zaú tô é hkyô pé lé de de lhoq htoq shit é hui rá ngut lhê. Haú mù, yhang gi, ngóm gop lui, Garai Gasang lé noqkuq mù. "Garai Gasang gi, gè gè yhang, nungmoq chyáng rahá ngut nyi ri!" ga tái pyo htoq kat rá ngut lhê.

Shuq Shuq Tap Tap Za Noqkuq Râ Hkyô

²⁶ Haú jáng, gumang wui ê, nga-nhúng hái tái rá lúh? Nungmoq rahá lé chóm zing é hkún, yuq hkangmó gi, Garai hkyon mahkôn ngut ngut, mhoqshit é dang ngut ngut, shing-rán ngut ngut, laklai dang ahú hú nyo é hkyô ngut ngut, tái sân kyô é ngut ngut pé lé, wó le ge ri. Haú pé banshoq gi, noqkuq hpúng lé wum-o byi rá matú chyat kut é dut rá lhê. ²⁷ Rayuq yuq, laklai dang ahú hú nyo é ngut jáng, í yuq eq myô htm sum yuq mai a lai é za, rayuq htàng rayuq nyô rá dut é htoq agó, rayuq yuq haú lé tái sân kyo ra rá dut lhê. ²⁸ Tái san kyô é sù a nyi é ngut jáng, laklai dang ahú hú nyo é sù gi, noqkuq hpúng má zim za nyi rá dut mù, yhânggùng yhang eq Garai Gasang lé za nyo rá dut lhê.

²⁹ Myiqtói í yuq ngut ngut, sum yuq ngut ngut tái kyo rá dut lhê; góbang gi, hái tái é lé rago gyô chyam wú rá dut lhê. ³⁰ Ngut kólhang, zung tô é sù rayuq yuq chyáng shing-rán jé é ngut jáng, hí tái nyi é sù gi, nô byuq rá dut lhê. ³¹ Hkâsu mù gà le, yuq hkangmó gi, mhoqshit é eq myit wum byi é wó hui kó sháng gaq, nungmoq banshoq bang gi, rayuq htàng rayuq myiqtói wó htoi é ngut lhê. ³² Haú myiqtói pé é woi-nyí pé gi, myiqtói pé uphkang é a-ô má ngut nyi ri. ³³ Hkâsu mù gà le, Garai Gasang gi, atau ahú dut é Garai Gasang a ngut é za, nguínón hkyô é Garai Gasang ru ngut lhê.

Sân-yúng bâng zing tô é hpúng banshoq má é eq rajung za, ³⁴ myiwe wui gi, noqkuq hpúng pé má zim za nyi rá dut lhê. Yhangmoq gi, dang tái ahkáng a wó é ngut mù, haú jep é tará má bo é eq rajung za a-ô má nyi kó sháng gaq. ³⁵ Yhangmoq gi, rajung jung sé nâú kô é ngut jáng, yhùm má yhangmoq é yhumsing hpô pé chyáng myi kó sháng gaq; hkâsu mù gà le, myiwe rayuq noqkuq hpúng má dang tái é gi, ahoq ahí hkyô ngut ri.

³⁶ Haú Garai Gasang é mungdang gi, nungmoq chyáng mai htoq lo é ngut lhê lúh? Haú gi, nungmoq chyáng za lé jé bê ngut lhê lúh? ³⁷ Rayuq yuq, yhang gi, myiqtói, a ngut jáng, woi-nyí chyunghuq byi é hui sù ngut lhê ga myit é ngut jáng, ngó, nungmoq lé ká byi é pé gi, haú Yhumsing é hkunmó ngut é lé, yhang sê yù sháng gaq. ³⁸ Yhang gi, haú lé hái su a ngám kut é ngut jáng, yhânggùng le, hái su a ngám kut é hui zo rá ngut lhê.

³⁹ Haú mù lui, ngá é gumang wui ê, myiqtói htoi rá lé ô nau nyi mù, laklai dang ahú hú nyo é lé hkâhkùm pyám kó. ⁴⁰ Ngut kólhang, jung hkangmó gi, htuq é dng eq shuq shuq tap tap zâ é hkyô dng kut é dut rá lhê.

15

Hkrisduq É Dui Toq Hkyô

¹ Gumang wui ê, ngó, nungmoq lé hko kyo bê ngut mù, nungmoq le hap yù lui, nungmoq yap gíng tô é jowò ngut é gabú danglù hkyô lé, ahkuí, ngó, nungmoq lé lhoq pún kat nau ri. ² Ngó, nungmoq lé hko kyo bê é mungdang lé, nungmoq gíng gíng myhik zing nyi kô é ngut jáng, nungmoq gi, gabú danglù hau é yanmai hkyi yù hui é ngut akó. Haú a ngut jáng, nungmoq lumjng é gi, akóm dut bê ngut lhê.

³ Ngó hap yu tô é pé lé, sâng-hi ahkyak é dng, ngó, nungmoq lé hai byi bê ngut lhê. Haú pé gi: Chyúmdang eq rajung za, Hkrisduq gi, nga-nhúng é yubak mará é matú shí hkám byi bê gà é ngut ri; ⁴ Yhang gi, myhup yhùm é hui lui, Chyúmdang eq rajung za sum nyi ngu é nyi má lhoq dui toq é hui bê ngut mù, ⁵ Petruq lé htoq shit lui, haú lagyo raxe í yuq lé le htoq shit ri. ⁶ Hau htàng má, Yhang gi, ra-u má za, gumang wui ngo shô yuq chyán lé htoq shit ri. Haú bang má é myo hpyang gi, ahkuí jé shoq asak dui nyi bum akó; ra-am kúm gi, shí ló byuq bekó ngut ri. ⁷ Hau htàng, Yhang gi, Yakuq lé htoq shit mù lagyo pé banshoq bang lé htoq shit ri. ⁸ Ló htàng má, Yhang gi, hkú buinyi a jé shí é má hku é dng ngut sù ngo lé le htoq shit bê ngut ri.

⁹ Hkâsu mù gà le, ngó gi, lagyo pé má é tiq dik sù ngut lhê. Haú Garai Gasang é noqkuq hpúng lé zing-ri sù ngut é yanmai, ngó gi, lagyo rayuq ngú rá lhang a gíngdán é sù ngut lhê. ¹⁰ Ngut kólhang, ngó ahkuí ísu wó ngut nyi é gi, Garai Gasang jeju mai ngut lhê. Yhâng é jeju gi, ngá chyáng akóm a dut é za, ngó gi, yhangmoq banshoq bâng htoq má je riyhang mù wùn waq shikut lhê. Haú gi, ngó kut é a ngut, ngó eq rahá ngut nyi é Garai Gasang jeju sheq ru ngut lhê. ¹¹ Haú mù lui, ngó ngut ngut, yhangmoq ngut ngut, ngamoq hko kyô é gi, haú hkyô chyat ngut lui, nungmoq lumjng é le, haú hkyô ngut ri.

Shi Byuq Bâng É Dui Toq Hkyô

¹² Ngut kólhang, haú Hkrisduq shi é mai lhoq dui toq é hui bê hkyô lé hko kyô nyi bê ngut mù, nungmoq má é ra-am gi, shí byuq bâng é dui toq hkyô a joq ngú, hkâsu wó tái kó rá lúh? ¹³ Shi byuq bâng é dui toq hkyô a joq é ru ngut le gi, Hkrisduq le lhoq dui toq é hui berá a ngut. ¹⁴ Hau htoq agó, Hkrisduq gi, lhoq dui toq é a hui

é ru nghut le gi, ngamoq hko kyô é hkyô eq, nungmoq é lumjing hkyô gi, akôm dut byuq râ nghut lhê. ¹⁵ Hau htoq agó, Garai Gasang gi, haú Hkrisduq lé shi é mai lhoq dui toq bê hkyô lé, ngamoq saksé hkâm bê nghut é yanmai, ngamoq gi, Garai Gasang é hkyô má saksé apyoq pé dut byuq râ za nghut lhê. Nghut kôlhang, shi byuq bang lhoq dui toq huí é hkyak a joq é ru nghut le gi, Garai Gasang, Yhang lé lhoq dui toq kat rá a nghut. ¹⁶ Hkâsu mù gâ le, haú shi byuq bang lhoq dui toq é a huí é nghut jang, Hkrisduq le, lhoq dui toq é huí berá a nghut. ¹⁷ Hkrisduq gi, lhoq dui toq é a huí é nghut jang, nungmoq é lumjing hkyô gi, akôm dut lui, nungmoq gi, nungmoq é yubak mara hkaú má ru nyi nyi shi kó rá nghut lhê. ¹⁸ Haú nghut jang, Hkrisduq má shi ló byuq bê bang le, htên byoq byuq rá za nghut lhê. ¹⁹ Nga-nhung gi, shi ipyat lhê é matú za, Hkrisduq má myit myoqbyu hkyô wó é nghut jang, byú banshoq bâng htoq má shogyo rayhup dut é je huí zo bang dut kó rá nghut lhê.

²⁰ Nghut kôlhang, Hkrisduq gi, gè gè yhang shi é mai lhoq dui toq é huí bê nghut mù, shi ló byuq bâng é sâng-hi ashí dut bê nghut ri. ²¹ Hkâsu mù gâ le, shí-nò hkyô gi, byú rayuq dòng mai ló bê nghut é eq rajung za, shi byuq bâng é dui toq hkyô le, byú rayuq dòng mai lo é nghut lhê. ²² Hkâsu mù gâ le, lhunglhang bang gi, Adam é yanmai shi byuq é su, lhunglhang bang gi, Hkrisduq eq rading ralhum za nghut é yanmai lhoq dui toq é huí rá nghut lhê. ²³ Nghut kôlhang, yuq hkangmó gi, ó le ó áng é hkún lhoq dui toq é huí rá nghut lhê: Hkrisduq gi, sâng-hi lhoq dui toq huí é sú nghut lhê. Hau htâng má, Yhang jé lé é hkún, Yhang eq sêng é bang lhoq dui toq é huí rá nghut lhê. ²⁴ Hau htâng, jiltúm jé rá nghut lhê; haú hkún, Yhang gi, up é bang banshoq, ahkáng ayá eq a-tsam pé lé ban lhoq htên pyâm é htâng, haú Iwa nghut sú Garai Gasang lé mingdán ap byi rá nghut lhê. ²⁵ Hkâsu mù gâ le, Yhang gi, Yhâng é gye pé banshoq lé, Yhâng é hkyí wang ô má tô pyâm é hkún jé shoq up nyi ra rá nghut lhê. ²⁶ Haú lhoq htên pyâm é huí rá nghut é ló htâng é gye gi, shí-nò hkyô nghut ri. ²⁷ Hkâsu mù gâ le, "Garai Gasang gi, jung hkangmó lé, Yhâng é hkyí wang ô má tô pyâm bê nghut ri."* gâ Chyúmdang má ká tô ri. "Jung hkangmó lé" Yhâng é a-ó má tô pyâm bê ga taí é hkún, jung hkangmó lé Hkrisduq é a-ó má tô pyâm bê sú Garai Gasang yhang kúm a lom é hkyô, san za nghut nyi ri. ²⁸ Yhang gi, haú hkyô ban kut é htâng má, haú Zo yhang le, jung hkangmó lé Yhâng é a-ó má to byi bê sú Garai Gasang é

a-ô má nyi sú dut nhang é huí rá nghut mù, Garai Gasang gi, lhunglhang htoq má gyaú sú nghut lui, lhunglhang lé sâng sú nghut rá nghut lhê.

²⁹ Dui toq hkyô a joq é ru nghut le gi, shi byuq bê bâng é matú wui-myhup hkâm byí bùm kô é gi, hai akyú bò kó rá lú? Haú shi byuq bang lhoq dui toq é a huí kô é ru nghut le gi, yhangmoq matú hai mù byu pé wui-myhup hkâm yú kó rá lú? ³⁰ Ngamoq gi, ngamoq é matú, hkyíng hkangmó hai mù chiq rá jowó má nyi rá lhê lú? ³¹ Gumang wui é, ngò gi, nyi wui aluq shoí shoí shi é huí zô é nghut lhê. Haú su nghú é gi, nga-nhung é Yhumsing Hkrisduq Yesuq má, nungmoq é hkyô lé ngò hkyak wó gumrong é yanmai nghut lhê. ³² Ngò gi, xângzo hkyam dòng mai za, Ehpesu myuq má tân jung dusak pé lé majan zân nyi é nghut jang, ngá é matú hai akyú bò rá lú? Shi byuq bang lhoq dui toq é a huí é ru nghut le gi,

"Nga-nhung gi, nappá shi rá nghut é yanmai, zo sháng, shuq sháng."*

ngú rá za nghut lhê.* ³³ "A ge é zùm yap luzúm wui gi, ge é nyi yap sámlai lé hten nhang é nghut lhê." gâ é sanghkyang eq rajung za, hkyô shui nghoq é hkâhu zo kó! ³⁴ Nungmoq gi, tau bân gyíng lò mù, mara hkâkut shut lo kó; hkâsu mù gâ le, Garai Gasang lé a sê é byú ra-am nyi akó. Ngò haú su nghú taí é gi, nungmoq hoq bun rá matú nghut lhê.

Dui Toq É Gungdu

³⁵ Nghut kôlhang, rayuq yuq gi, "Haú shi byuq bê bang, hkâsu kut lhoq dui toq é huí kó rá lú? Yhangmoq gi, hkasú é gungdu nghut kó rá lú?" ga myi rá nghut lhê. ³⁶ Haú-í nghá sú ê! Nang hô hkyô kat é pé gi, shi byuq é za a nghut jang, yuq htoq lò rá a nghut mhai. ³⁷ Nang, kyô hkyô é hkún, yuq lò rá nghut é agám lé hô hkat e a nghut é za, sungsó amyui nghut nghut, gotú amyui rajung jung nghut nghut lé za hô kat é ru nghut lhê. ³⁸ Nghut kôlhang, Garai Gasang gi, Yhang myit hpuyit to bê eq rajung za haú lé gungdu ralhum byi mù, kyôshi myui hkangmó lé, ó le ó é gungdu byi ri. ³⁹ Gungsho lhunglhang gi, rajung za a nghut. Byú pé é gungsho gi, rajung, dusak pé é gi, gó jung, nghoq pé é gi, gó jung, ngozo pé é gi, gó jung ru nghut lhê. ⁴⁰ Mauhkung gung pé le joq é nghut lui, myidam gung pé le joq ri; nghut kôlhang, mauhkung gung pé é shing kang gi, rajung, myidam gung pé é shing kang gi, gó jung ru nghut lhê. ⁴¹ Haú bui má bo é shing kang gi, rajung, lhamó má é gi, gó jung, kyí pé má é gi, gó jung ru nghut

* 15:27 Hkya-on 8:6

* 15:32 Esai 22:13

* 15:32 Dang ngho shí gi, a lumjing bang taí é dang nghut lhê.

lhê; kyî racham eq rachâm é shing kang le gotû tù shai lhûm lhê.

⁴² Haû mù, shi byuq bê bang é dui toq hkyô le, haû eq rajung za nghut ri. Haû hô hkyô kat é gungdu gi, htên byoq sê é nghut lui, lhoq dui toq huî é gungdu kúm gi, htên byoq a sê é nghut lhê. ⁴³ Hô hkyô kat é hkûn gi, arông a bò, lhoq dui toq huî é hkûn gi, hpungwup shing kang bo ri. Hô hkyô kat é hkûn gi, wum nyhóm mù, lhoq dui toq huî é hkûn gi, a-tsam bo ri. ⁴⁴ Gungsho gungdu gi, hô hkyô é hui mù, woi-nyí gungdu gi, lhoq dui toq é huî ri.

Gungsho gungdu joq é nghut le gi, woi-nyí gungdu le joq é nghut lhê. ⁴⁵ Haû nghut mù, "Haû sâng-hi yuq byù Adam gi, asak dui é xângzo dut bê nghut ri."* ga kâ tô ri. Haû lô htâng é Adam kúm gi, asak byí é woi-nyí nghut ri.† ⁴⁶ Haû woi-nyí eq sêng é hí lé joq é a nghut é za, gungsho eq sêng é hí lé joq é htâng má sheq, woi-nyí eq sêng é lé joq é ru nghut lhê. ⁴⁷ Haû sâng-hi yuq byù gi, myidàm má é tseyûn lé sai é nghut mù, htang lhê yuq byù gi, mauhkûng htoq má é nghut ri. ⁴⁸ Haû myidàm byù nghut sù su, myidàm eq sêng é bang le nghut nyi akô; haû mauhkûng htoq má é byù nghut sù su, mauhkûng eq sêng é bang le nghut nyi akô. ⁴⁹ Nga-nhúng gi, myidàm byù é gungghyâng isâm lé hkam yù bê nghut é su, mauhkûng htoq má é byù é gungghyâng isâm lé le myang hkam yù rá nghut lhê.

⁵⁰ Gumang wui ê, ngò, nungmoq lé shit kyo kôlé, gungsho eq sui gi, Garai Gasâng é mingdán é sili wunli lé wó yù rá a nghut, htên byoq sê é le, htên byoq a sê é sili wunli lé wó yù rá a nghut. ⁵¹ Gyo to keq, zaú tô é hkyô lé, ngò, nungmoq lé taí kyo kôlé: Nga-nhúng banshoq bang gi, shi byuq rá a nghut é za, htaí lhik é hui rá ru nghut lhê. ⁵² Haû gi, lô htâng é tut htê mying é hkûn, ralhap za, myoqkuq ralap má dut rá nghut lhê. Hkâsu mù gà le, tut htê mying rá nghut lhê, haû hkûn, shi byuq bê bang gi, htên byoq a sê é shut lhoq dui toq yu é hui rá nghut mù, nga-nhúng gi, htaí lhik é hui rá nghut lhê. ⁵³ Hkâsu mù gà le, htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù rá dut é nghut lhê. ⁵⁴ Haû htên byoq sê é gi, htên byoq a sê é lé htaí wut yù mù, shi byuq sê é gi, shi byuq a sê é lé htaí wut yù é hkûn sheq, "Shi-nò hkyô gi, ùng budâng eq myui pyâm é hui bê nghut ri."* ga kâ tô é eq,

⁵⁵ "Shi-nò hkyô ê, náng é ùng budang gi, hkâmá lhu? Shi-nò hkyô ê, náng é nyin gi, hkâmá lhu?"*

gâ tô é sanghkyang gi, dik rá nghut lhê.

⁵⁶ Haû shi-nò hkyô é nyin gi, yubak mara

nghut ri; yubak marâ é a-tsam gi, jep é tarâ nghut ri. ⁵⁷ Nghut kôlhag, Garai Gasang lé jeju hkyá-ôn lhê! Yhang gi, nga-nhúng é Yhumsing Yesuq Hkrisduq dông mai, nga-nhúng lé ùng budang byí é nghut ri.

⁵⁸ Haû mù lui, ngá é chyitdap gumang wui ê, yap gingting nyi keq. Hai êq le, nungmoq lé hkâlhoq dui nún nhâng kó. Nungmoq gi, haû Yhumsing má nungmoq wùn waq é muzó akóm a nghut é lé sé kó é nghut lhê yanmai, haû Yhumsing é muzó lé ayang wùn waq shikut nyi keq.

16

Yerusalem Wà Mó Mã É Lumjing Bàng É Matú Alu Hkyuí Râ Hkyô

¹ Ahkuí, Garai Gasâng é byu pé é matú alu hkyuí rá hkyô eq séng lui gi, haû Galatiq mau má é noqkuq hpung pé lé ngò kut nhang é su kut keq. ² Ngò jé lé é hkûn, alu hkyuí rá hkyô a kut ra rá dông, bat hkangmó má é sâng-hi nyi má, yuq hkangmó gi, yhumsing wó ho é má châng mù, gam tô to láng keq. ³ Ngò jé lé é hkûn, ngò gi, nungmoq hkyin tô é byu pé lé, shit kyô é laiká pé byi mù, nungmoq é chyunghuq lé, Yerusalem wà mó mã é dé nhâng rá nghut lhê. ⁴ Ngò le é ang rá dut é nghut jáng, yhangmoq gi, ngá é byinzùm kut rá nghut lhê.

Poluq Lum Kat É Hkyô Pé

⁵ Ngò gi, Makedoni mau lai byit é htâng, nungmoq chyáng jé lé rá nghut lhê. Hkâsu mù gà le, ngò gi, Makedoni mau lai byit rá za nghut lhê. ⁶ Ngò hkâmá é kôlhag, ngá é hkyowui má nungmoq wó garúm kat kó rá matú, ngò gi, rayoq zo nghut nghut, gyoqmyó lháng lai shoq nghut nghut, nungmoq eq rahá nyi abe. ⁷ Ngò gi, lai lô uchyang za nungmoq lé lé kum rá nghut mù, ahkuí wó myâng rá lé a nau é nghut lhê; ngò gi, haû Yhumsing dóng é nghut jáng, nungmoq eq rahá rayoq nyi rá lé myit myoqbyu lhê. ⁸ Nghut kôlhag, ngò gi, Penteko-ti poi buinyi jé shoq Ehpesu myuq má nyi rá nghut lhê. ⁹ Hai mù gà le, ngo lé htuq htíng é bang myo myo nyi é nghut kôlhag, akyú htoq é muzó é matú hkum mó ngo lé hpông to byí é yanmai nghut lhê.

¹⁰ Timohti jé lé jáng, yhang, nungmoq eq rahá nyi é u má, gyuq é hkyô hai le a joq rá matú wù byi keq; hkâsu mù gà le, yhang gi, haû Yhumsing é muzó lé, ngò su wùn waq wún é sù nghut lhê. ¹¹ Haû mù, ó yuq le, yhang lé hkáwú shóm kó. Yhang gi, ngá chyáng wó dum taú jé sháng gaq, yhang é hkyowui má nguingón é dông nhang kat keq. Haû gumang wui eq rahá lò kó rá lé, ngò myit láng nyi lhê.

* 15:45 Apûn 2:7

† 15:45 Lô htâng é Adam gi, Yesuq lé taí nau é nghut lhê.

* 15:54 Esai 25:8

* 15:55 Hos

¹² Ahkuí, nga-nhùng é gumang Apolo é hkyô eq séng lui ga jang: yhang gi, haù gumang wui eq rahá nungmoq chyáng lé rá lé, ngò, gyai yhang wum tai tsuq lhê. Yhang kúm gi, ahkuí lé nau é myit a dê bò shi, nghut kôlhang, yuqyo é ahkying wó jáng, yhang lé lô rá nghut lhê.

¹³ Machya nyi keq; lumjing hkyô má ging ging ting ting yap nyi keq; gyuq kyum myit hkábô kô; wum bo nyi keq. ¹⁴ Jung hkangmó lé, chyitdap myit eq zui sai keq.

¹⁵ Stehpana eq yhâng é yhumbyù wui gi, Ahkaia ming má sâng-hi hpúng wâng bang nghut lui, yhangmoq gi, yhumsing gùng lé, haù sân-yúng bâng é dojàu hkyô má ap nóng bekô lé, nungmoq sê akô nghut ri. Gumang wui é, ngò, nungmoq lé wum tai tsuq kat kôlé, ¹⁶ haù sù é bâng é a-ô má le, haù muzó má bo wang lòm mù, mù zui shikut bang yuq hkangmó é a-ô má le, nyi keq. ¹⁷ Ngò gi, Stehpana, Hportunatu eq Ahkaiku pé jé lo é hkún, gyai gabú é nghut lhê, hái mù gá le, yhangmoq gi, nungmoq a kut byí é hkyô lé, lhoq pying byi bekô nghut ri. ¹⁸ Hkásu mù gá le, yhangmoq gi, ngá é woi-nyí eq nungmoq é woi-nyí lé lhoq ngón byi bekô nghut ri. Haù sù é bang lé, hpautap nyi keq.

Ló Htâng É Shi-kyâm Dang

¹⁹ Asia mau mâ é noqkuq hpúng pé gi, nungmoq lé shi-kyâm kat akô. Akula eq Priskila nhik le, yhangnhik é yhùm má chòm huí é noqkuq hpúng lé, haù Yhumsing má nungmoq lé gyai yhang shi-kyâm kat akô. ²⁰ Shí má nyi é gumang wui banshoq bang gi, nungmoq lé shi-kyâm kat akô. Rayuq eq rayuq chyoiyúng é chyitpuq eq shi-kyâm lhum keq.

²¹ Ngò, Poluq gi, shi-kyâm dang shí lé, ngá é loq eq yhang ká é nghut lhê.

²² Rayuq yuq, haù Yhumsing lé a chyitdap é nghut jáng, haù yuq gi, nhing pyâm é hui sháng gaq. Yhumsing é, jé lé aq hkoil!

²³ Haù Yhumsing Yesuq é jeju gi, nungmoq eq rahá nghut nyi sháng gaq.

²⁴ Ngá é chyitdap myit gi, Hkrisduq Yesuq má nungmoq banshoq bâng chyáng joq nyi sháng gaq. Amen.

KORINHTUQ

Pê Chyáng Htang Dàm Hun Kat é Laiká (2 Corinthians)

¹ Garai Gasang ô nau é eq rajung za, Hkrisduq Yesuq é lagyo rayuq dut sú ngò Poluq gi, nga-nhùng é gumang Timohti le kut, Korinhtuq myuq mã é, Garai Gasâng é noqkuq hpúng lé le, Ahkaia mau gón mã é sán-yúng bang banshoq chyáng le, dang kyô kat lhê: ² Nga-nhùng é Íwa nghut é Garai Gasang eq haù Yhumsing Yesuq Hkrisduq chyáng mã é jeju eq nguóngón hkyô gi, nungmoq chyáng ru joq nyí sháng gaq.

Nhik ting hkyô banshoq é Garai Gasang

³ Nga-nhùng é Yhumsing Yesuq Hkrisduq é Yhângwa eq Garai Gasang, shogyo nhik-myin hkyo é Íwa eq nhik ting hkyô banshoq é Garai Gasang gi, hkyá-on kungton é huí nyí sháng gaq. ⁴ Garai Gasâng chyáng mai ngamoq wó yú bê nghut é nhik ting hkyo eq, hkású é wuìhke hkyô hui bang lé le nga-nhùng wó nhik ting byi sháng gaq ga, Yhang gi, ngamoq é wuìhke hkyô banshoq mã nhik ting byí ri. ⁵ Hkásu mù gá le, Hkrisduq hui zô é jamjau hkyô myo lé ngamoq hò hui zô é su, Hkrisduq đông mai, ngamoq é nhik ting hkyô le byíng mui nyi é nghut lhê. ⁶ Ngamoq, myit myo uhkyí é huí é nghut jáng, nungmoq é nhik ting hkyô eq hkyi yú hkyo é matú nghut nyi ri; ngamoq, nhik ting é huí é nghut jáng, nungmoq é nhik ting hkyo é matú nghut lui, haù gi, ngamoq jamjaù é eq rajung za nghut é jamjau hkyô lé, myit hing é đông mai wó ján pyám rà a-tsam, nungmoq chyáng lhoq htoq byí é nghut lhê. ⁷ Haù mù, ngamoq é jamjau hkyô pé mã nungmoq hò lòm bekô nghut é su, ngamoq é nhik ting hkyô mã le nungmoq hò lòm bekô nghut é hkyô lé, ngamoq sê é yanmai, nungmoq lé ngamoq myit myoqbyu kat é hkyô gi, hkyak wó lum to bê nghut lhê.

⁸ Gumang wuì ê, Asia mau mã, wuìhke jamjaù é ngamoq gyai yhang hui zô é hkyô lé, ngamoq gi, nungmoq lé kyô kat nau ri. Ngamoq wó ján é a-tsam lháng htum shoq hpuzô é nghut lui, ngamoq gi, asak duì lo rà lháng a myit myoqbyu lò é nghut lhê. ⁹ Gè gè yhang, ngamoq gi, sat hui berá nghú, ngamoq é i-myt mã lumjing pyám é nghut lhê. Nghut kôlháng, haù gi, ngamoq gùng ngamoq a lumhkaú é za, shí bê bang lé lhoq duì toq sú Garai Gasang lé lumhkaù rà matú dut é nghut lhê. ¹⁰ Garai Gasang gi, haù sú é shí rà hkyô mai hkyi yú bê nghut mù, ngamoq lé hkyi yú rà za nghut lhê. Yhang gi, ngamoq é matú nungmoq kyúdung byí nyi é u mã, xoq lui ngamoq

lé hkyi yú rà za nghut lhê nghú, ngamoq gi, Yhang lé myit myoqbyu to bê nghut lui, ¹¹ myo myo kyúdung byí é lé gyo byí é mã ngamoq shimân jeju wó mù, byù myo myo gi, ngamoq wó é shimân jeju é yanmai Garai Gasang lé jeju hkyá-on kó rà nghut lhê.

Poluq, Hen Tô É Muzô Htaí Pyám É Lé Tai Hung É Hkyô

¹² Ngamoq nghutbùn é gi, Garai Gasâng chyáng mã é chyoiyúng hkyô eq lhumzui hkyô mã, mingkan zo wuì eq ngamoq asak duì bê hkyô lé le, je lui nungmoq eq zám yap é hkyô lé le, ngamoq é myit sôn sê é hkyo eq, saksé hkám byí é hkyô nghut lhê. Ngamoq haù su kut é gi, mingkan hpaqchyí byéng-yá đông mai kut é a nghut é za, Garai Gasâng é jeju đông mai kut é ru nghut lhê. ¹³ Hkásu mù gá le, ngamoq gi, nungmoq a dat nghap é eq a sê gyô é haí le a ká byí kat é nghut lhê. Ngò, myit myoqbyu kat é gi, ¹⁴ nungmoq gi, ngamoq é hkyô ra-am lé wó sê gyô yú bê eq rajung za, haù Yhumsing Yesuq é buinyi mã nungmoq é hkyô lé ngamoq nghutbun rà nghut é su, ngamoq é hkyô lé nungmoq wó nghutbun rà matú, nungmoq, banshoq lé sê gyo kó rà nghut lhê.

¹⁵ Haù hkyô lé, ngò hkyak myit lum to bê nghut é yanmai, nungmoq gi, akýú í dam wó hkam yú kó sháng gaq nghú, ngò gi, nungmoq chyáng hí lé kum rà matú hen to bê nghut lhê. ¹⁶ Ngò gi, Makedoni mau shut e lò é hkyowuì mã nungmoq lé hí lé kum mù, Makedoni mau mai nungmoq chyáng dum taù lò lui, Yuda mau shut e é hkyowuì mã, nungmoq, ngo lé garúm kat kó rà lé myit lum to bê nghut lhê. ¹⁷ Ngò gi, haù hkyô hen é hkún, agon za hen hkyat é nghut lhê lú? Haù a nghut jáng, ngò hen é pé gi, ra-u mã za, "Nghut lhê, nghut lhê." nghú é eq, "A nghut, a nghut." nghu é wó tai rà matú, mingkan myit đông hen é nghut lhê lú?

¹⁸ Gè gè yhang, Garai Gasang gi, lhumzui sú yhang nghut é eq rajung za, ngamoq é danglù gi, nungmoq chyáng "Nghut lhê" lé, "A nghut" nghu é a nghut. ¹⁹ Hkásu mù gá le, ngo eq le, Sila eq le, Timohti eq le, nungmoq chyáng hko kyo bê nghut é sú, Garai Gasâng é Yhangzo Yesuq Hkrisduq gi, "Nghut lhê" nghu é eq "A nghut" nghu é sú a nghut é za, Yhang mã gi, hká-nhám le "Nghut lhê" nghu é za joq lhê. ²⁰ Hkásu mù gá le, Garai Gasang gi, danggidíq hká-myhó to kôle, haù pé gi, Hkrisduq mã "Nghut lhê" chyat nghut lhê. Haù mù, Garai Gasâng é hpungwup shingkàng é matú, Yhâng đông mai, nga-nhùng gi, "Amen" nghú tai é nghut lhê. ²¹ Ngamoq eq nungmoq lé Hkrisduq mã yap gingting nhang é sú gi, Garai Gasang nghut ri. Yhang gi, nga-nhùng lé masat é xú but byi mù, ²² Yhang sing lhê gá é dizik, nga-nhùng lé htung tap byi lui, jé lò rà hkyô pé

hkyak joq lhê nhu é masat zê đông, Yhâng é Woi-nyí lé nga-nhúng é i-myyit unghkaú má kat byi bê nghut ri.

²³ Ngò gi, nungmoq hkyamsa râ matú, Korinhtuq myuq má a dum taú lé é hkyô têng é lé, ngá é saksé dut râ đông Garai Gasang lé wut dúng lhê. ²⁴ Haú gi, nungmoq é lumjǫng hkyô lé ngamoq sing pyám byí é a nghut é za, nungmoq é gabú hkyo é matú, nungmoq eq rahá chòm zui saí é ru nghut lhê; haí mù gá le, lumjǫng myit mai za nungmoq wó yap gǫng nyi bùm kô é ru nghut lhê.

2

¹ Haú mù luí, ngò gi, nungmoq lé myit nõ nhâng é dut râ đông, lé dum kúm é a kut râ nghú, myit hpyit tò bê nghut lhê. ² Hkásu mù gá le, nungmoq lé ngò yón kuq nhang é nghut le gi, ngò yón kuq nhâng bê bang nungmoq mai lai luí, ó yuq wá ngo lé wó gabú nhâng râ lhú? ³ Ngò jé lé é hkún, ngo lé gabú nhâng râ âng é bâng èq, ngo lé myit nõ nhang é a hui sháng gaq nghú, ngò gi, ngò kut é eq rajung za laiká ká kat bê nghut lhê. Ngá é gabú hkyô lé nungmoq banshoq bang wó bo gabú kó râ nghut lhê nghú, nungmoq banshoq bang lé ngò hkyak myit lum tò lhê. ⁴ Hkásu mù gá le, ngò gi, nungmoq lé laiká ká é hkún, myit myo uhkyí mó èq le, myit má yón kuq é èq le, ngaubyi ngau-nhap é èq le, ká kat bê nghut lhê. Haú gi, nungmoq lé yón kuq é hui nhâng râ matú a nghut é za, nungmoq lé ngò hká-í chyitdap é hkyô lé sé nhâng râ matú ru nghut lhê.

Mara Hkyut Byi Lhum Râ Hkyô

⁵ Yón kuq hkyô lhoq htoq é sù gi, yhang, nungmoq banshoq bang lé ahkyô hkyô pé má yón kuq nhang é su, ngo lé gyai wá yón kuq nhang é a nghut. Haú hkyô eq séng luí, ngò gyai wá yhang zuq zuq a tai nau é nghut lhê. ⁶ Nungmoq myo hpyâng èq yhang lé mara dam byi é hkyô gi, yhâng é matú gé bê nghut ri. ⁷ Nghut kôlháng, ahkuí, nungmoq gi, yhang a wó jan loshoq myit yón é a hui zo râ matú, yhang lé mara hkyut pyám byi mù, nhik tǫng byi keq. ⁸ Haú mù luí, nungmoq é chyitdap myit gi, yhang é ahtoq má dum lhoq gǫng shít nyí keq nghú, nungmoq lé ngò wum tai tsuq kat lhê. ⁹ Ngò, nungmoq lé haí mù laiká ká byí kat é hkyô gi, nungmoq chyam wú hui é hkyô lé wó ján é hkyô eq jung hkangmó má jino gyo hkyô bò a bo é lé, wó sé râ matú le nghut lhê. ¹⁰ Nungmoq, rayuq yuq lé mara hkyut byi é nghut le gi, ngò le, haú yuq lé mara hkyut byi lhê. Mara hkyut râ rajung jung joq é nghut jáng, ngò mara hkyut é gi, Tsadán èq nga-nhúng lé a wó ùng râ matú, nungmoq é yanmai, Hkrisduq é myoq hí má ngò mara hkyut byi bê nghut lhê. ¹¹ Hkásu mù gá le,

Tsadán hen é hkyô pé lé nga-nhúng a sê é a nghut.

Dangshikaq Asik Mâ É Hpungmû Wùn Bang

¹² Ngò gi, Hkrisduq é gabú danglù hko kyo râ matú, Troa myuq má é jé é hkún, haú Yhumsing gi, ngo lé hkum hpóng byí é lé, ngò myang ri. ¹³ Nghut kôlháng, ngò gi, ngá é gumang Tituq lé haú má a myang ho é yanmai, myit myo mù, yhangmoq lé shi-kyâm to luí, Makedoni mau shut xoq é ló é nghut lhê.

¹⁴ Nghut kôlháng, Hkrisduq má, ngamoq lé hká-nhám le ùng budang hkyô shut shuí-ù yù mù, Hkrisduq lé sê é samsé hpaqchyí é nam ngón shôm lé, ngamoq đông mai jowò hkangmó má tai pyo é sù, Garai Gasang gi, jeju hkyá-ôn é hui nyi sháng gaq. ¹⁵ Hkásu mù gá le, ngamoq gi, hkyi yu é hui nyi bâng chyáng le, htên byoq ló é hui nyi bâng chyáng le, Garai Gasâng é matú Hkrisduq é nam ngón shôm nghut nyi lhê. ¹⁶ Ngamoq gi, htên byoq nyi bâng é matú shí-nò hkyo é shôm dut mù, hkyi yù hui nyi bâng é matú nghut jáng, asak hkyo é nam ngón shôm dut é nghut lhê. Haú mù, ó yuq wá muzó shí eq htuk râ lhú? ¹⁷ Ngamoq gi, amyat wó râ matú Garai Gasâng é mungdang lé hkat ung zô é byù myo myo su a nghut é za, Garai Gasâng chyáng mai nhang é byu pé su, Garai Gasâng é hí má, Hkrisduq é byu pé đông lhumzui myit mai tai é nghut lhê.

3

¹ Ngamoq gi, yhumsing gùng yhumsing dum owaq hí ló é nghut lhê lhú? Byù ram kut é su, nungmoq chyáng, ngamoq é matú htuqluq htuqbáng laiká ká byi kô é ngamoq ra râ luq, nungmoq yuq ngamoq é matú ká byi ra kó râ luq? ² Nungmoq gùng yhang gi, ngamoq é myit nhiklum má ká tô é, yuq hkangmó èq nghap luí sé yu é laiká gùng pé nghut akó. ³ Nungmoq gi, nungmoq chyáng ngamoq hpungmû wùn waq é yanmai, Hkrisduq chyáng má é laiká nghut kô é hkyô lé shít nyi akó. Haú gi, ká jung chí èq ká tô é đông a nghut é za, rù dui nyi é Garai Gasâng é Woi-nyí èq ká tô é nghut é htoq agó, luqlong pé má ká tô é đông a nghut é za, xângzo byu é myit nhiklum long pé má ká tô é ru nghut lhê.

⁴ Haú su nghú hkyak wó myit lum é hkyô gi, Garai Gasâng é hí má, Hkrisduq đông mai ngamoq wó yu é nghut lhê. ⁵ Ngamoq gi, yhumsing gùng haí lé le wó kut lhê nhu é a nghut, ngamoq é a-tsam gi, Garai Gasâng chyáng mai lo é nghut lhê. ⁶ Yhang gi, ngamoq lé, dangshikaq asik lé wó wùn waq râ a-tsam byi bê nghut ri. Dangshikaq asik haú gi, tará laiká mai lo é a nghut é za, Woi-nyí mai lo é ru nghut lhê. Hkásu mù gá le, laiká

gi, shí dàm byi lhê, Woi-nyí kúm gi, asak byi é nghut lhê.

4

Dangshikaq Asik É Hpungwup Shingkaq

⁷ Ahkuí, haù Mosheq é myoqdong má é hpungwup shingkaq é yanmai, haù Israe-laq byu pé gi, yhang é myoqdong lé a wó wú tsuq to kó nghut ri. Hpungwup shingkaq haù shúm lo byuq sê é nghut kôhang, luq-long má dok ká tô é, shí-nò hkyô lhoq htoq é tará muzó gi, hpungwup shingkaq eq rahá jé lé é nghut lhê. ⁸ Haù su nghut jáng, haù Woi-nyí é muzó gi, hpungwup shingkaq je riyhang dut rá a nghut kó lúh? ⁹ Gè gè yhang, haù byú lé mara byí é tará muzó lhang, hpungwup shingkaq bo é nghut le gi, dimgán nhang é hkyô sik gi, je riyhang hpungwup shingkaq bo é nghut lhê ô! ¹⁰ Hkásu mù gá le, hpungwup shingkaq bo é tará muzó gi, hpungwup shingkaq je bo é dangshikaq asik eq whuí é hkún, hpungwup shingkaq a bò lo dut byuq bê nghut ri. ¹¹ Shum byuq ló é tará lhang gi, hpungwup shingkaq eq rahá lé jé bê nghut le gi, ru gíng nyi é dangshikaq asik é hpungwup shingkaq gi, je riyhang gyaú rá nghut lhê ô!

¹² Haù mù luí, ngamoq gi, haù sù é myoqbyú hkyô wó é yanmai, gyuq kyum myit a bo é hkyô shit é nghut lhê. ¹³ Ngamoq gi, Mosheq su a nghut. Yhang gi, duqbang é hkyô shúm byuq ló é hkún, haù Israe-laq byu pé haù lé a wú tsuq rá matú, yhang é myoqdong lé myoqgo eq nghop pyâm é sù nghut ri. ¹⁴ Nghut kôhang, yhangmoq é myit gi, lhoq chut byí é hui beko nghut ri; hkásu mù gá le, hkú-nyí jé shoq, dangshikaq axau lé nghap é hkún, rajung zá é myoqgò gi, ru nghop to byí ashí nghut ri. Haù gi, hui sèng pyâm é a hui shí, haí mù gá le, Hkrisduq dngng za haù lé wó yu pyâm é nghut lhê. ¹⁵ Hkú-nyí jé shoq lhang, Mosheq é laiká lé nghap é hkún, yhangmoq é myit nhiklhum má myoqgò eq nghop tô é nghut ri. ¹⁶ Nghut kôhang, ó yuq le, Yhumsing chyáng hká u lhang lò kôhang, haù hkún jáng, myoqgò gi, hí pyám byí é hui rá nghut lhê. ¹⁷ Yhumsing gi, haù Woi-nyí nghut mù, Yhumsing é Woi-nyí nyi é jowó má, luthkyô le joq lhê. ¹⁸ Haù Yhumsing é hpungwup shingkaq lé lhoq htoq shit é bang banshoq nghut é myoqdong má myoqgò a nghop é bang nga-nhung gi, ru myo jat nyi é hpungwup shingkaq lhoq htoq byi hkyô nghut é, Yhang é isâm shut htaí lhik wang é hui nyi bê nghut lhê. Haù hkyô gi, haù Woi-nyí nghut sù Yhumsing chyáng mai lo é nghut lhê.

Tseyam Pé Má Bo É Sutzè

¹ Ngamoq gi, Garai Gasang jeju mai muzó hkyô haù wó é nghut mù, myit wum a gyuí é nghut lhê. ² Ngamoq gi, zaú tô é eq hoq htoq é hkyô pé lé tò pyám lui, mhaù zô é hkyô le a kut, Garai Gasang é mungdang lé le ahpuq alhik a kut é bang nghut lhê. Haù su kut rá malaí, ngamoq gi, haù tengmán hkyô lé san za lhoq htoq shit é dngng, Garai Gasang é hí má yuq hkangmó é myit sôn sê é hkyô má, yhumsing gung yhumsing htuk shoq nyi lhê. ³ Ngamoq é gabú danglú gi, myoqgo eq nghop pyâm é hui é nghut jáng, haù gi, htên byoq nyi bang chyáng za nghop pyám hui é ru nghut lhê. ⁴ Haù Garai Gasang é azòng isâm nghut sù, Hkrisduq é hpungwup shingkaq bo é gabú danglú é maubó lé, a lumjing bang a wó myáng kó sháng gaq ga, ipyat shi é garai* gi, yhangmoq é myit lé lhoq chit byi bê nghut ri. ⁵ Haù nghut é yanmai, ngamoq gi, yhumsing gung eq séng lui hko kyó é a nghut é za, Yesuq Hkrisduq gi, Yhumsing nghut é hkyô lé le, Yesuq é matú, ngamoq gung yhang gi, nungmoq é jùn pé nghut é hkyô lé le, hko kyó é ru nghut lhê! ⁶ Hkásu mù gá le, "Mauchut hkaù mai maubó htoq lò sháng gaq."* ga taí é Garai Gasang gi, Yesuq Hkrisduq é myoqdong má é Garai Gasang é hpungwup shingkaq é maubó lé sê gyô é nyan lé, nga-nhung lé byí é dngng, Yhang é maubó lé, nga-nhung é i-myt unghkaù má duqbó nháng bê nghut ri.

⁷ Nghut kôhang, ngamoq gi, sutzè haù bo é tseyam pé[†] nghut nyi lhê. Haù gi, gyaú dik é a-tsam mó gi, ngamoq chyáng má é a nghut é za Garai Gasang chyáng má é nghut é hkyô lé tân shit rá matú nghut lhê. ⁸ Ngamoq gi, wuihke hkyo eq lhanghkyuq mai gyai yhang nhê zik é hui kôhang, a gyop byuq é nghut lhê; myit lhoq nhung pyâm é hui kôhang, myit a htúm byuq é nghut lhê; ⁹ zing-ri é hui kôhang, kang pyám hui é a nghut; bat lhang pyâm é hui kôhang, htên byoq hui é a nghut. ¹⁰ Haù Yesuq é asak dù hkyô le, ngamoq é gungdu má lhoq htoq shit é hui sháng gaq nghú, ngamoq gi, Yesuq shi é hkyô lé, hká-nhám le, ngamoq é gungdu má wun waq wún é nghut lhê. ¹¹ Hkásu mù gá le, Yesuq é asak dù hkyô gi, nga-nhung é shí sê é gungdu má lhoq htoq shit é hui sháng gaq nghú, asak dù nyi é bang ngamoq gi, Yesuq é matú é yanmai, hká-nhám le, shi byuq hkyô shut ap pyâm é hui nyi ri. ¹² Haù mù lui, shi byuq hkyô gi, ngamoq má mù zú nyi ri; asak dù hkyô kúm gi, nungmoq má mù zú nyi é nghut ri.

* 4:4 Ipyat shi é garai gá é gi, Tsadán lé gá é nghut lhê. ✪ 4:13 Hkya-on 116:10

† 4:7 Tseyam pé gá é gi, nga-nhung é wum

¹³ "Ngò gi, lumjǐng bê nghut lhê, haù mù, ngò tai é nghut lhê."^{*} ga kâ tô é eq rajung za, ngamoq le, lumjǐng hkyô hau èq yhang, lumjǐng bê nghut mù tai é nghut lhê. ¹⁴ Haù mù gà le, haù Yhumsing Yesuq lé shi é mai lhoq dui toq é Sù gi, ngamoq lé le, Yesuq eq rahá lhoq dui toq mù, nungmoq eq rahá, ngamoq lé Yhâng é hí má shuí jé rá nghut é lé, ngamoq sê lhê. ¹⁵ Haù jeju wó é byu pé gi, je riyhang myô jat lò mù, Garai Gasâng é hpungwup shingkang é matú, jeju hkya-ôn é hkyô gi, bying mui nyi sháng gaq ga, haù pé banshoq gi, nungmoq é akyu é matú nghut nyi ri.

¹⁶ Haù mù luí, ngamoq gi, myit wum a gyuí é nghut lhê. Ngamoq é shinggan gungdu gi, htên byoq lò nyi kôlhang, i-myyit unghkaù gi, ra-nyí eq ra-nyí asik dut nhang é huí nyi ri. ¹⁷ Hkâsu mù gà le, ngamoq é tiq é eq razup zâ é wuìhke hkyô pé gi, ngamoq é matú haù pé htoq gyai hkik é ahtum abyuq é hpungwup shingkang lé, wó yú nhang ri. ¹⁸ Haù mù, nga-nhúng é myoq gi, byu-myang é lé wú tsuq nyi é a nghut é za, a byu-myang é lé sheq wú tsuq nyi é ru nghut lhê. Hkâsu mù gà le, byu-myang é gi, razup rahtâng zâ é nghut mù, a byu-myang é kúm gi, ahtum abyuq é nghut lhê.

5

Mauhking Htoq Mã É Yhũm

¹ Haù myidám zúm nghut é nga-nhúng lúng nyi é gungdu gi, htên byoq sê é nghut kôlhang, byu loq eq sai é a nghut é za, mauhkung htoq má joq é ahtum abyuq é yhũm* nghut é, Garai Gasâng chyáng mã é yhũm lé, nga-nhúng wó é hkyô lé, nga-nhúng sê lhê. ² Nghut kôlhang, ahkuí, nga-nhúng gi, nga-nhúng é mauhkung yhũm lé tũ hut byí é lé gyai yhang hui naù mù, nò-kying su kyíng nyi lhê. ³ Haù mù gà le, nga-nhúng gi, hut byí é hui jáng, gungdu a bò bang a dut lo rá nghut lhê. ⁴ Hkâsu mù gà le, nga-nhúng gi, zúm shi má lúng nyi é u lé, wólai wùn mù, nò-kying su kyíng nyi lhê; haù gi, shi byuq sê é lé, asak dui é eq wó htaí lhik pyám sháng gaq ngũ, nga-nhúng gi, a hut byí é hui rá lé a ô nau é za, nga-nhúng é mauhkung yhũm lé tũ hut byí é hui rá lé ô nau é yanmai nghut lhê. ⁵ Ahkuí kúm, jeju haù hkam yù rá matú, nga-nhúng lé lajáng to byí é sũ gi, Garai Gasang nghut mù, jé lò rá hkyô gi, hkyak joq lhê ngũ é masat zé đông, nga-nhúng lé haù Woi-nyí byi bê nghut ri.

⁶ Haù mù luí, ngamoq gi, hkâ-nhám le hkyak lum tô lhê. Gungdu shi má yhũm đông ru lúng nyi nyi gi, haù Yhumsing eq wé gâng nyi ashí nghut é lé ngamoq sê nyi lhê. ⁷ Ngamoq gi, byu-myang é đông mai a nghut

é za, lumjǐng myit mai asak dui é ru nghut lhê. ⁸ Ngamoq gi, hkyak myit lum tô lhê ngũ, ngò tai lhê, haù mù, gungdu shi mai wé gang luí, haù Yhumsing eq rahá nyi rá lé ngamoq je riyhang ô nau é nghut lhê. ⁹ Haù mù, ngamoq gi, gungdu shi má yhũm đông lúng nyi é nghut nghut, haù mai wé gâng é nghut nghut, ngamoq myit myoqbyu tô é jowò gi, Yhang lé gabú nhâng rá matú nghut lhê. ¹⁰ Hkâsu mù gà le, yuq hkangmó gi, gungdu shi má yhũm đông lúng nyi é u lé, ge é nghut nghut, a ge é nghut nghut, kut é eq rajung za hkam yù rá matú, Hkrisduq é tará jéyáng tanghkuq hí má, nga-nhúng banshoq bang htoq shit ra rá nghut lhê.

Nguingón Hkyô Xoq É Muzó

¹¹ Haù mù, Yhumsing lé gyuq hkungga rá hkyô haù nghut é lé ngamoq sê é nghut luí, ngamoq gi, byu pé lé tai pún kyíng shikut lhê. Ngamoq haù nghut é gi, Garai Gasâng chyáng san za nghut nyi mù, nungmoq é myit sôn sê é hkyô má le san za nghut rá lé, ngò myit lum lhê. ¹² Haù myit nhiklhum má bo é lé gumrông rá malaí, byu-myang é lé gumrong é bang lé, nungmoq wó tũ tai kó sháng gaq ngũ, ngamoq gi, nungmoq chyáng yhumsing gung lé dum owaq shikut é a nghut é za, ngamoq é hkyô lé, nungmoq wó gumrông rá ahkáng, nungmoq lé byí é ru nghut lhê. ¹³ Ngamoq a gyíng é đông nghut le gi, Garai Gasâng é matú a gyíng é nghut lhê; ngamoq gyíng é đông nghut le gi, nungmoq é matú gyíng é nghut lhê. ¹⁴ Hkâsu mù gà le, Hkrisduq é chyitdap myit eq ngamoq lé kut nhang nyi é nghut lhê. Haù gi, banshoq bâng é matú rayuq shi hkám byi bê nghut mù, banshoq bang shi é đông nghut bê ngũ, ngamoq hkyak sê gyô é yanmai nghut lhê. ¹⁵ Yhang gi, asak dui nyi é bang, yhangmoq yhumsing gung é matú a dui lò é za, yhangmoq é matú shi hkám byi luí, lhoq dui toq é huí Su é matú dui kó sháng gaq ga, banshoq bâng é matú shi hkám byi bê nghut ri.

¹⁶ Haù mù, ngamoq gi, ahkuí mai, ó yuq eq séng luí le, mingkan hkyam đông mai a wú lò é nghut lhê. Ngamoq gi, hí hkũn Hkrisduq lé haù đông wú é nghut kôlhang, haù su hkâ-nhám le a kut lò é nghut lhê. ¹⁷ Haù nghut mù luí, rayuq yuq gi, Hkrisduq má nghut nyi é nghut jáng, yhang gi, asik hpân hui sũ dut bê nghut ri; haù axau gi, byuq byuq mù, lhunglhang asik dut bu-nhung! ¹⁸ Haù pé banshoq gi, Garai Gasâng chyáng mã é chyat nghut lhê. Yhang gi, Hkrisduq đông mai nga-nhúng lé Yhânggung eq nguingón hkyô xoq yú luí, nguingón hkyô xoq é muzó ngamoq lé byi bê nghut ri. ¹⁹ Haù gi, Garai Gasang gi, byu pé é mara lé a matsing byí é za, Hkrisduq đông mingkan lé Yhânggung eq

* **5:1** Mauhkung htoq má joq é ahtum abyuq é yhũm gà é gi, nga-nhúng, mauhkung mingdán má jé é hkũn wó rá gungdu asik lé gà é nghut lhê.

nguingón hkyô xoq yû bê nghut lui, Yhang gi, nguingón hkyô xoq yu é mungdang haû lê, ngamoq lé ap byi to bê nghû nau é nghut lhê. ²⁰ Haû mù lui, ngamoq gi, Hkrisduq é gunglik pé nghut lhê mù, Garai Gasang gi, ngamoq dông mai nungmoq lé lhoq pûn kyîng nyi é nghut lhê. Garai Gasang eq nguingón hkyô xoq yû keq nghû, ngamoq gi, Hkrisduq é gunglik dông nungmoq lé dúng tôngbán nyi lhê. ²¹ Nga-nhúng gi, Hkrisduq dông mai Garai Gasang é dingmán bang wó dut kó sháng gaq ga, Garai Gasang gi, yubak mara a bò Sù lé, nga-nhúng é matú yubak mara hkungga dut nhâng bê nghut ri.

6

¹ Ngamoq gi, Garai Gasang é mù zui byinzùm wui nghut nyi é eq rajung za, Garai Gasang jeju lé akyû a bo é dông hkâhap yû kó nghû, nungmoq lé wum tai tsuq kat lhê. ² Hkâsu mù gà le, "Ngò ô nau é ahkyíng má, nang lé ngò gyo byi bê nghut mù, hkyi yù hui rá buinyi má, nang lé ngò garúm bê nghut lhê."^{*}
ga lui, Yhang tai ri. Ngò, nungmoq lé tai kyo kôlê, ahkuí gi, Garai Gasang ô nau é ahkyíng, ahkuí gi, hkyi yu é buinyi nghut ri.

Poluq É Wuîhke Hkyô Pé

³ Ngamoq é hpungmù gi, tai hpoi pyâm é a hui sháng gaq nghû, ngamoq gi, ó yuq é hkyô má le, leqbat jung a to byi é nghut lhê. ⁴ Haû kut rá malaí, ngamoq gi, Garai Gasang é dui-nhâng zoshâng wui nghut é hkyô lé, hkyô hkangmó má yhumsing gùng yhumsing shit nyi lhê. Gyai hkam jân é hkyô má le, jamjau hkyô pé má le, wuîhke hkyô pé má le, myit myo uhkyi hkyô pé má le shit nyi lhê. ⁵ Nhuq bat hui é pé má le, htóng lhung hui é eq toq gabyông é má hũm é hui é má le, mù zui shikut é má le, a myang yhuq é myín pé má le, zòmut hui é má le, shit nyi lhê. ⁶ Sân-yúng é má le, sê gyô é hkyô má le, myit hing é eq myit ge é má le, Chyoiyung Woi-nyí eq chyitdap myit akying má le, ⁷ tengmán é mungdang hko é má le, Garai Gasang é a-tsam má le, loqyô loqpai má dingmán hkyô nghû é laknak pé dông le, shit nyi lhê. ⁸ Hpungwup shingkan byi é hui kô é dông eq a hkunggâ é hui kô é dông nghut kôle, a ge é luhkyang eq ge é luhkyang tai kôle, shit nyi lhê. Ngamoq gi, tengmán kôlhang, mhaû zo bang dông sôn yu akó nghut ri. ⁹ Ngamoq lé sê kôlhang, a sê é dông kut akó nghut ri; shi ló nyi kôlhang, rû dui nyi é bang nghut lhê; nhuq bat é hui kôlhang, sat pyâm é a hui shi é bang nghut lhê. ¹⁰ Yón hkyô byíng nhâng kôlhang, hkânhám le gabú nyi lhê; myùng kôlhang, byù

myo myo lé wó sùt nhang nyi lhê; haî le a wó kôlhang, jung hkangmó lé sing é dông nghut lhê.

¹¹ Korinhtuq bang ê, ngamoq gi, nungmoq lé san za tai bê nghut lui, ngamoq é myit nhikhlum lé, nungmoq é matú làm shoq hpông to byi bê nghut lhê. ¹² Ngamoq gi, ngamoq é chyitdap myit lé, nungmoq chyáng mai lêng taû yu nyi é a nghut, nungmoq sheq, ngamoq chyáng mai lêng taû yu nyi kô é ru nghut lhê. ¹³ Nungmoq le, myit nhikhlum lé làm shoq dum taû hpông keq nghû, ngò gi, ngá zô pé lé dông tai lhê.

A Lumjîng Bang Eq A Nhungkut Râ Hkyô

¹⁴ A lumjîng bang eq rahá kandang hkâwaq kó. Hkâsu mù gà le, dingmán é hkyô eq agê ashop é hkyô gi, haî sêng lhum lhê lú? Maubó eq mauchtut gi, hkâsu wó zùm yap kó rá lú? ¹⁵ Hkrisduq eq Beliala* gi, hkâsu kut myit wó hui lhum kó rá lú? Lumjîng sù rayuq eq a lumjîng sù gi, hkâsu wó pung lhum kó rá lú? ¹⁶ Garai Gasang é noqkuq yhùm eq hparâ lhô pé gi, hkâsu wó hùm rá lú? Hkâsu mù gà le, nga-nhúng gi, rû dui nyi é Garai Gasang é noqkuq yhùm nghut lhê. Haû gi, "Ngò gi, yhangmoq eq rahá nyi mù, yhangmoq chyáng sô nyi rá nghut lui, Ngò gi, yhangmoq é Garai Gasang dut mù, yhangmoq gi, Ngá é byu pé dut kó rá nghut lhê."^o ga Garai Gasang tai tô é eq rajung za nghut ri.

¹⁷ "Haû mù lui, yhangmoq chyáng mai htoq lô mù, gotú san za nyi keq. A sansêng é zê lê hkázang kó, haû hkûn, Ngò, nungmoq lé lhom hap yù rá nghut lhê."^o

ga haû Yhumsing tai ri.

¹⁸ "Ngò gi, nungmoq é İwa dut mù, nungmoq gi, Ngá é byizo yuqzô pé dut kó rá nghut lhê."^o

ga haû wum-o a-tsam dik shoq bò Sù Yhumsing tai ri.

7

¹ Chyitdap é luzùm wui ê, nga-nhúng gi, danggidid haû pé lé wó tô é bang nghut é yanmai, gungdu eq woi-nyí lé agot a-ù dut nhang é jung hkangmó mai, yhumsing gùng yhumsing lhoq sân-yúng yù lui, Garai Gasang lé gyuq hkunggâ é myit eq chyoiyung hkyô má lhoq gumjup yu nyi sháng.

Poluq É Gabú Hkyô

² Nungmoq é i-myit unghkaû má ngamoq lé jowò byi keq. Ngamoq gi, ó yuq lé le a shut wú, ó yuq lé le a lhoq htên wú, ó yuq lé le a mhaû zô wú é nghut lhê. ³ Ngò gi, nungmoq lé mara byi rá matú haû su tai é a nghut.

* 6:2 Esai 49:8 * 6:15 Beliala gà é gi. Tsadán é myíng rajà nghut lhê.

* 6:16 Nhung 26:12; Yer 32:38; Ezk 37:27

* 6:17 Esai 52:11; Ezk 20:34,41 * 6:18 2 Sam 7:14

Ngamoq gi, asak dui kôle, shî kôle, nungmoq eq rahá wó dut shoq, nungmoq gi, ngamoq é i-myt unghkaû má lúng nyi é nghut lhê nghû, hí hkûn ngò tái wú bê nghut lhê. ⁴Ngò gi, nungmoq lé, hkyak yhang myit lum to bê nghut lhê. Ngò gi, nungmoq é yanmai gyai yhang gumrong nyi lhê. Ngò gi, myit wum byí é gyai yhang huí ri; jamjau hkyô pé myo myo ngamoq hui kôlhang, ngò, gyai yhang gabú nyi lhê.

⁵Hkâsu mù gà le, ngamoq gi, Makedoni mau má jé é hkûn, ngamoq é gungdu gi, zim za a myang nyi é htoq agó, hkyô hkangmó má ngamoq wuihke jamjau hui zô é nghut lhê. Shinggan má gi, mabyoq htoq, akkaû má gi, gyuq kyum nyi é nghut lhê. ⁶Nghut kôlhang, nhik ngê bang lé nhik tîng é Garai Gasang gi, Tituq lé jé lé nhang é đông mai, ngamoq lé nhik tîng byi bê nghut ri. ⁷Yhang jé lé é đông mai za a nghut, yhang lé nungmoq nhik tîng byí é hkyô đông mai le nghut lhê. Ngá é gabú hkyô gi, gó nám lhê htoq má je myo shang gaq ga, yhang gi, nungmoq ngo lé myit tui nyi é hkyô, nungmoq gyai yhang shut bûn é hkyô, ngá é matú nungmoq gyai myit chiq byí é hkyô pé lé, ngamoq lé tái kyo bê nghut ri.

⁸Ngá é laikâ èq, nungmoq lé yón nhang é nghut kôle, ngò gi, nungngham wó é a nghut. Sâng-hi le, ngò nungngham wó é nghut kôlhang, ngá é laiká gi, nungmoq lé rayoq zo za lhoq yón nhang é lé, ngò sê lhê. ⁹Nghut kôlhang, ngò gi, akhuí gabú lhê; haû gi, nungmoq lé yón hui nhang é yanmai a nghut é za, nungmoq é yón hkyo èq, nungmoq lé myit lhing nhang é yanmai ru nghut lhê. Nungmoq gi, Garai Gasang ô nau é đông yón hui é bang dut bekô nghut mù, nungmoq lé, ngamoq èq hai akyû le a lhoq yôm byí é nghut lhê. ¹⁰Hkâsu mù gà le, Garai o é đông yón kuq hui é hkyô gi, nungngham wó hkyô a bo é za, hkyi yû hkyô wó shoq, myit lhing nhang é nghut ri. Nghut kôlhang, mingkân é yón kuq hkyô gi, shi é hkyô lhoq htoq é nghut ri. ¹¹Garai o é đông, nungmoq chyáng akyû lhoq htoq byí é yón kuq hkyô lé wú wú keq! Haû gi, gyai yhang myit zuq é hkyô, yhumnging gung mara a bo é lé tûn shit rá lé myit ngui é hkyô, nhikmo-yo é hkyô, gyuq dan é hkyô, myit ô nau nyi é hkyô, myit chiq byí é hkyô, tengmán hkyô kut rá rì rì nghut é hkyô pé nghut lhê. Nungmoq gi, haû hkyô má mara a bo é lé hkat hkangmó má saksé tûn shit bekô nghut ri. ¹²Haû mù luí, ngò, nungmoq lé kâ kat é nghut kôlhang, kut shut su é yanmai le a nghut, kut shut é hui zo su é yanmai le a nghut é za, ngamoq lé nungmoq hkâ-í ap nóng byí é hkyô lé, Garai Gasang hí má nungmoq gung nungmoq wó myâng rá matú kâ kat é sheq ru nghut lhê. ¹³Haû pé

banshoq đông mai, ngamoq gi, myit wum byí é huí ri.

Ngamoq myit wum byi huí é htoq agó, Tituq hkâ-í yhang gabú é lé myang mù, ngamoq gi, je riyhang myit gabú é nghut lhê. Haû mù yhang gabú é gà lé, nungmoq banshoq bang èq yhang é myit lé lhoq ngu-ingón byi kô é yanmai nghut ri. ¹⁴Ngò gi, nungmoq eq sêng é hkyô, yhang lé gumrong kyô é nghut kôle, nungmoq é yanmai hoq a hpú é nghut lhê. Nungmoq lé ngamoq tái é lhunglhang gi, têng é eq rajung za, Tituq hí má, nungmoq é hkyô lé ngamoq gumrong é le têng lhê. ¹⁵Nungmoq banshoq bang jìno gyo kômù, gyuq nân é myit mai yhang lé lhom hap yû kô é lé, yhang myitbûn é hkûn, yhang nungmoq lé chyitdap é myit gi, je riyhang kô dik nyi ri. ¹⁶Ngò gi, nungmoq lé banshoq wó lum to bê lé sê é yanmai, gabú nyi lhê.

8

Byí É Hkyô

¹Gumang wui é, akhuí, ngamoq gi, Makedoni mau má é noqkuq hpûng pé lé Garai Gasang byí é jeju eq sêng é hkyô, nungmoq lé sé nhang nau ri. ²Yhangmoq gi, wuihke jamjau hkyô myo myô èq chyam lik é huí é nghut kôlhang, yhangmoq é a ung tái loshoq gabú é hkyô eq yhangmoq é gyai yhang myung é hkyô gi, agùn agó byi nau é myit bò nhang ri. ³Hkâsu mù gà le, yhangmoq gi, yhangmoq wó dut é myhó byi kô é htoq agó, yhangmoq é a-tsam lai shoq lhang byi kô é hkyô lé, ngò saksé hkám lhê. Yhangmoq gi, yhangmoq é myit hkaû mai yhang haû su kut kô é nghut ri. ⁴Yhangmoq gi, haû sân-yung bang lé wó bo dojau rá matú, ngamoq lé gyai yhang ahkáng dung kô é nghut ri. ⁵Yhangmoq gi, ngamoq myit ngam tô é htoq má lhang lai shoq, Garai Gasang ô nau é hkyô lé châng é đông, yhangmoq gung lé hí haû Yhumnging lé ap byí pyám kômù, hau htang sheq ngamoq lé ap kô é nghut ri. ⁶Haû mù luí, Tituq yhang hí kut hi nyi bê nghut é yanmai, ngamoq gi, jeju haû lé nungmoq chyáng le shuí lhoq bying jup byi rá matú, yhang lé wum byi bê nghut lhê. ⁷Nungmoq gi, lumjing myit má, dang nyo é hkyô má le, sumsé hpaqchyí hkyô má le, myit zuq hkyô banshoq eq ngamoq lé nungmoq chyitdap é hkyô má le, jung hkangmó má agùn agó dut bekô eq rajung za, nungmoq gi, byi nau é jeju shi má le agùn agó dut rá lé, bûn nyi keq.

⁸Ngò gi, nungmoq lé hkunmó hkyô é a nghut, nghut kôlhang, góbang é myit zuq é hkyô eq whuí wú é đông, nungmoq é chyitdap myit jet é hkyô lé chyam wú nau luí sheq ru nghut lhê. ⁹Hkâsu mù gà le, nungmoq gi, nga-nhung é Yhumnging Yesuq

Hkrisduq é jeju lé sê akô nghut ri. Yhang gi, Yhâng é myùng hkyô đông mai nungmoq wó bang dut kó sháng gaq ga, jung hkgangmó wó sù nghut kôlhang, nungmoq é matú é yanmai, myùng sù dut bê nghut ri.

¹⁰ Shí hkyô eq séng é má, nungmoq é matú ge dik é hkyô ngò hpaqchyí byi kôlê: A-nhik, nungmoq gi, sâng-hi, byí hí kô é za a nghut, haù su kut nau é myit bo é bang le nghut akô. ¹¹ Nungmoq wó dut é eq rajung za, haù lé lhoq pân é đông nungmoq é gyai yhang kâm kut é myit lé wó lhoq dik ko sháng gaq, ahkuí, muzó haù lhoq pân keq. ¹² Hkâsu mù gâ le, byí nau é myit bo é nghut jâng, chyunghuq haù gi, yhang a wó é má cháng luí a nghut é za, yhang wó é má cháng luí, hap yù gíng é nghut lhê.

¹³ Nungmoq é matú gi, wòlai dut, góbang gi, hkyamsâ nyí rà lé, ngamoq ô nau é a nghut, rawuí za wó dut kó rà lé sheq ô nau é ru nghut lhê. ¹⁴ Nungmoq haì rà tô é lé, yhangmoq agùn agó wó é má é wó dum taù htuqbang byi kó sháng gaq, ahkuí lhê é ahkying má, yhangmoq haì rà tô é lé, nungmoq agùn agó wó é má é htuqbang byi keq. Haù jâng sheq, wuí wú za wó dut kó rà nghut lhê. ¹⁵ Haù gi, "Myo myo tsing yu é sù gi, lùm myo shoq wó é a nghut, shau za tsing yu é sù gi, lùm shau shoq wó é a nghut."* ga kâ tô é eq rajung za nghut ri.

Tituq Lé Korinhtuq Myuq Shut Nhang Kat É Hkyô

¹⁶ Nungmoq é matú ngò myit chiq byí é eq rajung zâ é myit lé, Tituq é i-myyit má kat byí é Garai Gasang lé, ngò jeju hkya-ôn lhê. ¹⁷ Hkâsu mù gâ le, Tituq gi, ngamoq dũng tôngbán é lé za lhom hap yu é a nghut, gyai yhang myit toq mù, yhânggũng yhang myit hpyit yù luí, nungmoq chyáng lé lô gù za nghut ri. ¹⁸ Ngamoq gi, haù gabú danglù lé dojaú é má noqkuq hpũng pé banshoq eq hkya-on huí é gumang hpó haù lé le, yhang eq rahá nhang kat lhê. ¹⁹ Hau htoq agó, ngamoq garúm rà myit bo nyí é hkyô lé tún shít mù, haù Yhumsing lé hkungga rà matú ngamoq wú gôn nyí hkyô nghut é, alu lé ngamoq yu chung é hkùn, ngamoq é byinzùm kut rà matú, noqkuq hpũng pé eq hkyin yu é sù le yhang nghut lhê. ²⁰ Ngamoq gi, myit lòm luí byí é chyunghuq shí lé ngamoq wú gôn nyí é hkyô má, ó yuq eq le mara hò rà hkyô a htoq shoq sidiq nyí lhê. ²¹ Hkâsu mù gâ le, jô é hkyô kut rà matú ngamoq shikut nyí é gi, haù Yhumsing é myoq hí má za a nghut, byu pé é myoq hí má le nghut lhê.

²² Hau htoq agó, ngamoq gi, hkyô myo myo má shirong é myit bo é hkyô le anum num ngamoq chyáng saksé shít é sù, ngamoq é gotú gumang hpó lé le yhangnhik eq rahá nhang kat lhê. Yhang gi, ahkuí

lhang, nungmoq lé gyai yhang myit lum tô é yanmai, shirông myit je riyhang bo nyí ri. ²³ Tituq é hkyô ga jâng, yhang gi, ngá é zùm yap luzùm eq ngò eq rahá nungmoq chyáng mù zui sù nghut ri. Nga-nhũng é gumang nhik é hkyô ga jâng, yhangnhik gi, noqkuq hpũng pé é gunglik eq Hkrisduq é arông nghut akô. ²⁴ Haù mù luí, haù noqkuq hpũng pé wó myâng kó sháng gaq, nungmoq má ngamoq haì mù gumrong é hkyô eq nungmoq é chyitdap myit é saksé lé, haù bang lé tún shít keq.

9

¹ Ngò gi, haù sãn-yúng bang lé htuqbang rà hkyô eq séng luí, nungmoq lé kâ kat rà a ra nghut ri. ² Hkâsu mù gâ le, nungmoq gyai garúm nau é myit lé ngò sê lhê, haù mù, ngò gi, Makedoni mau bang lé, haù hkyô eq séng luí gumrong kyo mù, a-nhik mai yhang, Ahkaia mau má nungmoq byi rà ri ri nghut bê hkyô lé, yhangmoq lé taí kyô é nghut lhê. Nungmoq é gyai yhang myit toq é hkyô gi, yhangmoq myo hpyang lé, htuqbang nau é myit nhaù toq byi bê nghut ri. ³ Nghut kôlhang, shí hkyô má nungmoq eq séng luí ngamoq gumrong é gi, hká đông le dangsôm a dut byuq sháng gaq, ngò taí bê eq rajung za nungmoq ri ri wó hen to rá matú, ngò gi, gumang wuí lé nhang kat é nghut lhê. ⁴ Hkâsu mù gâ le, Makedoni mau bang gi, ngò eq rahá lé mù, nungmoq ri ri a hen tô é lé, lé myang ang kô é nghut jâng, nungmoq za hoq hpu rà a nghut, nungmoq lé, nungmoq lé lùm yhang lum pyâm é yanmai, hoq bo hpu rà nghut lhê. ⁵ Haù mù luí, nungmoq danggidiq byi to bê nghut é, chyunghuq lé rago wó lajâng pân to rá matú, gumang wuí lé wum taí tsuq mù, nungmoq lé hí, lé kum nhâng rà gi, ra yhang rà lhê nghũ ngò wó myit ri. Haù hkùn sheq, a nau é đông byí é a nghut é za, byí nau é chyunghuq đông hen tô é dut rà nghut lhê.

Agùn Agó Byí É Hkyô

⁶ Shau za sãn hkyô sù gi, shau za shù yù rà nghut mù, agùn agó sãn hkyô sù gi, agùn agó shù yù rà nghut lhê gâ é dang lé, myitbùn nyí keq. ⁷ Yuq hkgangmó gi, a kâm byí é eq byí nhang é đông a nghut é za, yhumsing myit má byí nau é myhó lé myit hpyit yù mù byí é đông dut rà lhê. Hkâsu mù gâ le, Garai Gasang gi, gabú myit eq byí sù lé chyitdap ri. ⁸ Haù mù, ahkying hkgangmó jung hkgangmó má, nungmoq rà é banshoq wó mù, ge é muzó hkgangmó lé nungmoq je myo wó kut kó sháng gaq ga, Garai Gasang gi, jeju lunglhang lé, nungmoq lé wó byí é sù nghut lhê. ⁹ Haù gi, "Yhang gi, a ha bũn é za myùng bang lé yhâng é chyunghuq tsing gãm byi bê

nghut ri; Yhâng é dingmán hkyô gi, ahtum abyuq gíng nyi ri."[✧]
ga kâ to eq rajung za nggut ri. ¹⁰ Kyô hkyô sú lé kyôshi, zoshuq matú muk byí é Sû gi, nungmoq lé kyôshi byi mù, lhoq myô jat byi rá eq, nungmoq é dingmán hkyô é ashi lé myô lò nhâng rá nggut lhê. ¹¹ Nungmoq gi, ayoq abun hkangmó má agùn agó byí é bang wó dut kó rá matú, hkyô hkangmó má sùt wó é bang dut é hui kó rá nggut lhê. Nungmoq agùn agó byí é hkyô lé, ngamoq lhai byi mù, Garai Gasang lé jeju hkya-ôn é hkyô dut rá nggut lhê.

¹² Nungmoq dojaú é hkyô shí gi, Garai Gasâng é byu pé rá é hkyô lé lajang byí é za a nggut, Garai Gasang lé jeju bún é dang byíng mui nyi nhang é le nggut lhê. ¹³ Dojaú hkyô hau é yanmai, nungmoq lhuzui hkyô saksé tún shít bekô nggut mù, byu pé gi, Hkrisduq é gabú danglù lé nungmoq yín yú luí jìno gyo kô é yanmai le, yhangmoq eq yuq hkangmó lé, nungmoq é a ha bún é myit mai shuí gam chùng kô é yanmai le, Garai Gasang lé hkya-on kó rá nggut lhê. ¹⁴ Hau htoq agó, Garai Gasang gi, nungmoq lé jeju lai shoq byí tò é yanmai nungmoq é matú yhangmoq kyúdung byí é u má, yhangmoq é myit nhiklhum gi, nungmoq chyáng htoq jé rá nggut lhê. ¹⁵ A ung htoq taí é Garai Gasâng é chyunghuq é yanmai, jeju hkya-on hkyô gi, Yhâng chyáng ru nggut nyí sháng gaq ô!

10

Poluq, Yhâng É Hpungmú Lé Tai Hung É Hkyô

¹ Nungmoq eq myoqdong hkyûm nggut é hkûn gi, gyuq kyûm myit bo ri ga, wê gâng é hkûn gi, a gyuq a wám dut ri ga kô é sú, ngò Poluq gi, Hkrisduq é nûm é hkyô eq nú-nhâm é hkyô dông mai, nungmoq lé pying kat lhê. ² Shí mingkân é nyi yap a-tsang dông ngamoq asak dui ri ga myit ngam é byu ra-am lé, ngò a gyuq a wam é myit lé shít rá dá tò lhê. Ngò jé lé é hkûn, nungmoq lé hau sú é myit a shít ra sháng gaq, ngò nungmoq lé dúng tóngbân kat lhê. ³ Hkâsu mù gâ le, ngamoq gi, mingkan shí má asak dui nyi kôhang mingkan byu pé kut é dông majan zân é a nggut. ⁴ Ngamoq majan zân é lankak gi, mingkan shí é lankak a nggut é za, shut shai é dông dang-rhâng hkyô nggut é, gíngtíng é gyedap pé lé lhoq htên pyám rá matú Garai é a-tsam byíng é lankak ru nggut lhê. ⁵ Ngamoq gi, dang-rhâng rhâng lhùm é hkyô pé eq Garai Gasang lé sê é hkyô lé shut shai shoq yhumsing gùng yhumsing lhoq myhang mhaú é hkyô hkangmó lé lhoq htên pyám mù, Hkrisduq é jìno gyo rá matú, myit sôn é hkyô hkat hkangmó lé shúm kut

yu é nggut lhê. ⁶ Nungmoq é jìno gyo hkyô gi, gumjup é hkûn, jìno a gyo é hkyô hkangmó lé ngamoq dam byi rá ri ri dut rá nggut lhê.

⁷ Nungmoq gi, ahtoq pyám lé za wú nyi é bang nggut akô. Rayuq yuq gi, Hkrisduq eq sêng é sú hkyak nggut lhê ga myit lum tò é nggut jáng, ngamoq lé, yhang eq rajung za, Hkrisduq eq sêng é bang nggut é lé, yhang dum bún sê nyi sháng gaq. ⁸ Hkâsu mù gâ le, nungmoq lé lãng hkyô rá nó gi, nungmoq lé kô myhâng nhâng rá matú, ngamoq lé hau Yhumsing byí é ahko ahkáng lé gyai gumrong le lháng, ngò gi, hoq hpú é hui rá a nggut. ⁹ Ngò gi, ngá é laiká pé eq nungmoq lé kyuq é su a dut nhâng nau é nggut lhê. ¹⁰ Hkâsu mù gâ le, ra-am gi, "Yhâng é laiká pé gi, gâng bo é eq wum-o bo é nggut ri; nggut kôhang, yhànggùng gi, byuwup a bo é nggut mù, yhang taí é dang pé gi, haí a nggut." ga taí akô. ¹¹ Ngamoq gi, wê gâng é hkûn, ngamoq é laiká pé má bo é eq rajung za nggut é hkyô eq, rahá nggut nyi é hkûn, ngamoq zui saí rá nggut é hkyô lé, hau sú é bang sê gyo rá dut lhê.

¹² Ngamoq gi, hau yhumsing gùng yhumsing owaq é bâng é hpúng má bo lom é hkyô nggut nggut, yhangmoq eq whuí é hkyô nggut nggut, a wám kut é nggut lhê. Yhangmoq gi, yhangmoq gùng yhangmoq chún lhùm wú é eq yhangmoq gùng yhangmoq whuí lhùm wú kô é hkûn, hpaqchyí a bo é bang dut bekô nggut ri. ¹³ Nggut kôhang, ngamoq gi, âng é mai lai shoq gumrông rá a nggut é za, ngamoq lé Garai Gasang masat to byí é, nungmoq chyáng lháng hkyit jé shoq nggut é maukyo hkaú má za gumrông rá nggut lhê. ¹⁴ Ngamoq gi, nungmoq chyáng a jé lé wú é dông mai, gyai yhang gumrong nyi rá a nggut; hkâsu mù gâ le, ngamoq gi, Hkrisduq é gabú danglù chùng mù, nungmoq chyáng lháng lé jé bê nggut lhê. ¹⁵ Dum, ngamoq gi, góbang kut é muzó lé le, âng é mai lai luí gumrong lhai é a nggut. Ngamoq myoqbyu é hkyô gi, nungmoq é lumjìng myit kô myhang jat nyi jáng sheq, nungmoq chyáng ngamoq zui saí é jowó gyai wó lhoq lám rá nggut lhê. ¹⁶ Hau gi, nungmoq é mau lháng lai shoq, gabú danglù lé ngamoq wó hko kyo rá matú nggut lhê. Hkâsu mù gâ le, ngamoq gi, góyuq eq zui saí to bê loqzó eq séng luí, gumrông nau é a nggut. ¹⁷ Nggut kôhang, "Gumrong é sú gi, hau Yhumsing má gumrông sháng gaq."[✧] ga kâ tò ri. ¹⁸ Hkâsu mù gâ le, yhumsing gùng yhumsing owaq é sú gi, hap yú huí é a nggut é za, hau Yhumsing eq owaq byí é sú sheq, hap yú huí é ru nggut lhê.

11

Lagyo Apyoq Pé Eq Poluq

¹Ngò gi, ngá é ratsuí ngok é dang lé, nungmoq jân pyám byi rà lé myoqbyu é nghut lhê; gè gè yhang, nungmoq gi, haù su kut nyi gù nghut bekò. ²Haì mù gà le, ngò gi, Garai Gasang mai nungmoq lé magum é myit èq, nungmoq é matú magùm byi lhê. Ngò gi, nungmoq lé, sân-yúng é zomyi gyíng lé su, Hkrisduq chyáng wò shit sháng gaq nghù, Hkrisduq nghut é yhumsíng hpò chyáng za nungmoq lé byi zo rà nghù, danggidiq byi to bê nghut lhê. ³Nghut kôlhang, Ewaq gi, lhangmui hpaqchyí dâ é èq mhaù zò é huí é su, nungmoq myit é hkyô pé gi, Hkrisduq chyáng nungmoq é lhumzui é eq sansêng é i-myit ap nóng é hkyô mai shuí nghoq ló byuq é huí rà lé, ngò myit chiq ri. ⁴Hkâsu mù gà le, rayuq yuq gi, nungmoq chyáng lé jé mù, nungmoq hko kyô é Yesuq é hkyô eq shai é đông hko kyô é nghut nghut, nungmoq hap yu to bê Woi-nyí eq a pung é woi-nyí lé nungmoq hap yu é nghut nghut, nungmoq lhom yu to bê gabú danglù eq a pung é danglù lé lhom yu é nghut nghut, nungmoq gi, haù lé lui lui za lhom hap yu é dut bekò nghut ri. ⁵Nghut kôlhang, ngò gi, "Ahkyak-lagyo pé" ga bâng é htoq má ratsuí lhang gyamgyi gyó sù a nghut nghù myit ngam é nghut lhê. ⁶Ngò gi, dang tái hpaqchyí kung sù rayuq a nghut kôlhang, sumsé hpaqchyí bò sù nghut lhê. Ngamoq gi, hkyô hkanngmó má, nungmoq lé haù hkyô hkyáng shoq sé nhâng bê nghut lhê.

⁷Ngò, nungmoq lé, Garai Gasâng é gabú danglù lé ahpau a yu é za hko kyô é đông, nungmoq lé waq toq rá matú, ngá gùng ngò lhoq nyhum é gi, ngá é mara dut byuq bê lúh? ⁸Ngò, nungmoq lé dojaù rá matú, gotú noqkuq hpûng pé mai htuqbâng é lé hap yu é gi, haù bâng chyáng mai ngò zik lú yu é đông dut bê nghut lhê. ⁹Ngò gi, nungmoq eq rahá nyi mù, rajung jung rá é hkûn, ó yuq lé le wôlai a dut nhang é nghut lhê; hkâsu mù gà le, Makedoni mau mai lé jé é gumang wui gi, ngò haì rá é lé htuqbang byi kò é yanmai nghut lhê. Hká đông nghut kôlhang, ngò gi, ngá gùng lé, nungmoq é matú wôlai a dut nhâng shoq kut bê nghut mù, xoq lui le haù đông kut nyi rà nghut lhê. ¹⁰Haù Hkrisduq é tengmán hkyô gi, ngò má hkyak yhang bo é nghut lhê mù, Ahkaia mau mã é bang ó yuq lhang, ngò haù su gumrong é hkyô lé wó hkûm zing rá a nghut. ¹¹Haì mù lúh? Ngò, nungmoq lé a chyyitdap é yanmai nghut lhê lúh? Ngò, nungmoq lé chyyitdap é hkyô lé, Garai Gasang sê lhê. ¹²Ngò gi, yhangmoq zui sai é lé gumrong é hkyô pé má ngamoq eq rawú za són byi rà ahko ahkáng ó nau é bang lé ahkáng a byi rà matú, ngò kut nyi é su xoq lui kut shi rà nghut lhê.

¹³Hkâsu mù gà le, haù sù é bang gi, lagyo apyoq pé, mhaù zò é mù zui bang, Hkrisduq

é lagyo pé đông kut mhaù é bang nghut akò. ¹⁴Haù gi, mau ra hkyô a joq, hkâsu mù gà le, Tsadán lhang gi, maubó é maumang lagyo rayuq đông kut mhaù é sù nghut lhê. ¹⁵Haù mù, Tsadán é dui-nhâng zoshâng wui gi, dingmán hkyô é dui-nhâng zoshâng wui đông kut mhaù é nghut jáng, mau dân rà hkyô a joq é nghut lhê. Yhangmoq é ló htàng má gi, yhangmoq kut é eq rajung za hui zo kó rà nghut lhê.

Yhâng É Wuíhke Jamjau Hkyô Eq Séng Lui, Poluq Gumrong É Hkyô

¹⁶Ngò puq tái kôlé, ó yuq le, ngo lé byù gò đông a són yù kó sháng gaq. Nghut kôlhang, nungmoq són yu é nghut jáng, ngò ratsuí wó gumrong sháng gaq, byù gò lé nungmoq hap yu é su, ngo lé hap yù kó laq. ¹⁷Ngò, haù su gumrong é hkyô gi, haù Yhumsíng o é đông ngò tái nyi é a nghut, byù gò rayuq đông tái nyi é ru nghut lhê. ¹⁸Byù myo myo gi, mingkán é hkyô đông zoshâng nyi bum lhê nghut mù, ngò le gumrong rá nghut lhê. ¹⁹Nungmoq gi, hpaqchyí lúm bo kò é nghut mù, byù go pé lé gabú myit èq jân nyi akò nhung! ²⁰Gè gè yhang, nungmoq gi, nungmoq lé jùn kut é sù lé le, nungmoq lé rhoi zò é sù lé le, nungmoq chyáng akyú hô zò yu é sù lé le, yhang gùng yhang owaq é sù lé le, nungmoq lé bo-pyuq pyuq é sù lé le, jân nyi akò nghut ri. ²¹Ngamoq gi, nungmoq lé haù hkyô kut rá má wum gyai nyhôm lhê nghù yín yù rà lé, ngò, hoq ri!

Rayuq yuq, haì lé wám gumrong é nghut jáng, ngò le, haù lé wám gumrong lhê nghù, byù gò rayuq đông ngò tái nyi é nghut lhê. ²²Yhangmoq gi, Hebre byu pé nghut akò lúh? Ngò le nghut lhê. Yhangmoq gi, Israelaq byu pé nghut akò lúh? Ngò le nghut lhê. Yhangmoq gi, Abraham é awut ashín pé nghut akò lúh? Ngò le nghut lhê. ²³Yhangmoq gi, Hkrisduq é dui-nhâng zoshâng wui nghut akò lúh? (Ngò gi, myit a gyíng é sù đông haù su tái é nghut lhê.) Ngò gi, je nghut lhê. Ngò gi, mù zui je shikut bê, htóng anum num je lúng wú bê, je riyhang bat é huí wú bê, shí rá í é adàm dàm huí wú bê nghut lhê. ²⁴Ngò gi, Yudaq byu pé nuichum eq bat é myi xê dàm byíng rá radàm ra ra dut é, ngo lình huí zò wú é nghut lhê. ²⁵Ngò gi, dumbáng eq nhuq huí é sum dàm, shí sháng gaq ga luqqok eq dú huí é radàm, wui-sanghpo byoq huí é sum dàm, wuimau má myù byóm é ra-nyí ra-myin huí zò wú bê nghut lhê. ²⁶Ngò gi, xoq xoq hkyowui htoq e ló é hkûn, wui gù é gyuq chiq jung, danyaq huí é gyuq chiq jung, ngá é amyù wui chyáng mã é gyuq chiq jung, tûngbaù pé chyáng mã é gyuq chiq jung, myuq hkaù pé mã é gyuq chiq jung, yoso pé mã é gyuq chiq jung, wuimau mã é gyuq chiq jung eq gumang apyoq pé chyáng mã é gyuq chiq

jung pé hui zô wú bê nghut lhê. ²⁷ Ngò gi, mù lé zuí ngu zuí hkyik mù, anum num a myang yhup shoq dut wú bê nghut lhê. Ngò gi, zòmut wui shít huí é eq zoshuq a wó é anum num huí lai lo wú bê nghut lhê. Ngò gi, gyoq hpú é eq gùngchín dut é huí wú bê nghut lhê. ²⁸ Haù pé lhunglhang htoq má, noqkuq hpúng pé banshoq é matú ngò myit chiq byí é hkyô gi, nyí wui ngò má wòlai dut nyi ri. ²⁹ Rayuq yuq wum nyhóm le, ngò le wum a nyhóm rá lú? Rayuq yuq mara shuí kut shut é hui le, ngò myit a nyé rá lú?

³⁰ Ngò gumrông rá dut é nghut le gi, ngò wum nyhóm é hkyô lé tún shít é pé lé gumrông rá nghut lhê. ³¹ Ngò a mhaù nyi é hkyô lé pyat dedu hkya-on huí é sù, haù Yhumsing Yesuq é Íwa eq Garai Gasang sé lhê. ³² Damaskuq myuq má, Hkohlkâm Areta é a-ô má é mauzau gi, ngo lé chypur rá matú, myuq lé zúng nhang é nghut lhê. ³³ Nghut kólhang, ngò gi, manghkoq má lúng mù, myuq xêwâm má é hkohot dong mai lhoq hkyô kat é hui lui, yhang é loq mai wó lut é nghut lhê.

12

Poluq É Myoqwup Shing-rán Pé

¹ Ngò gi, rú gumrông nyi rá za nghut lhê. Akyú wó rá a nghut kólhang, haù Yhumsing chyáng mai lo é myoqwup shing-rán pé eq hpông shít é shing-rán pé lé gumrông rá nghut lhê. ² Ngò gi, lai lò bê raxe myí zân hkún, mauhkúng sum tsáng nghu é má shuí toq yu huí é, Hkrisduq má é byù rayuq* é hkyô lé sê lhê. Yhang gi, gungdu eq nghut é luq, a nghut é luq, ngò a sé, nghut kólhang, Garai Gasang gi, sé lhê. ³ Yhang hparadisu má shuí toq yu huí é gi, ngò sé lhê. Yhang gi, gungdu eq nghut lhê luq, a nghut é luq, ngò a sé, nghut kólhang, Garai Gasang gi, sé lhê. ⁴ Yhang gi, byu pé tai kyô htoq rá ahkáng a wó é hkyô pé nghut é, a wó tai sân kyô é hkyô pé lé wó gyô ri. ⁵ Ngò gi, haù yuq sù é byu é hkyô eq séng lui gumrông rá nghut lhê; nghut kólhang, ngò gi, ngá é wum nyhóm hkyô eq séng lui, gumrông é mai lai lui, ngá gùng ngò gumrông rá a nghut. ⁶ Ngò gi, gumrông hkyô lé hkyin yù rá dut é nghut jáng lhang, byù gò dut rá a nghut, haù mù gâ le, ngò gi, tengmán hkyô tai nyi rá nghut lhê. Nghut kólhang, ó yuq le, ngò kut é eq ngò tai é mai myit lum to kó é htoq má, ngo lé, je a myit lo ko sháng gaq nghú, ngò a gumrông kut pyám nyi lhê.

⁷ Haù laklai dik é dong ngo lé hpông shít é shing-rán mó pé é yanmai, ngò a nghutbùn byuq sháng gaq ga, ngo lé gungjang rá matú, Tsadán é lagyo nghut é zu lé, ngá é gungsho má kat byí to bê nghut ri. ⁸ Haù lé

ngá chyáng mai yu pyám byi rá matú, ngò, Yhumsing lé sum dâm dúng tôngbán wú bê nghut lhê. ⁹ Nghut kólhang, Yhang gi, "Ngá é jeju gi, náng é matú luqduq é nghut lhê; hkásu mù gâ le, Ngá é a-tsam gi, wum nyhóm é hkyô má lhoq gumjup é hui ri." ga lui, ngo lé tai ri. Haù mù lui, Hkrisduq é a-tsam gi, ngò má wó joq nyi sháng gaq nghú, ngò gi, ngá é wum nyhóm é hkyô pé eq séng lui, gabú myit mai je riyhang gumrông rá nghut lhê. ¹⁰ Haù nghut mù lui, ngò gi, Hkrisduq é yanmai, wum nyhóm é hkyô pé má le, rhoi huí é hkyô pé má le, wuihke jamjau huí é hkyô pé má le, zing-ri huí é hkyô pé má le, awui ahke dut é hkyô pé má le, gabú nhik diknyí lhê. Hkásu mù gâ le, ngò wum nyhóm é hkún sheq, ngò wúm bo é nghut lhê.

Poluq Chiq Byí É Hkyô

¹¹ Ngò gi, ngá gùng ngò byù gò lhoq kut yú bê nghut ri, nghut kólhang, haù gi, nungmoq kut nhang é nghut lhê. Ngò gi, nungmoq eq owaq é hui ang sù nghut lhê; hkásu mù gâ le, ngò gi, haù a nghut kólhang, "Ahkyak lagyo pé" ga bâng é htoq má ratsuí lhang gyamgyi gyó sù a nghut. ¹² Lagyo rayuq é masat kumlhá nghut é, kumlhá pé, mauhpo muzó pé eq laklai kumlhá pé lé, ngò gi, gyai yhang hkam jan mù nungmoq chyáng kut bê nghut lhê. ¹³ Ngò gi, nungmoq é matú, hká-nhám le wòlai a dut é nhing, nungmoq gi, hkásu mù, gotú noqkuq hpúng pé htoq má gyamgyi gyó nyi akó lú? Ngò, haù hkyô má shut é nghut jáng, mara hkyut pyám byi kó laq!

¹⁴ Ahkuí, ngò gi, nungmoq lé, sum lhang nghú rá dâm, lé kum rá ri ri nghut bê mù, nungmoq é matú wòlai gi, a dut rá nghut lhê. Haù mù gâ le, ngò gi, nungmoq é sutzè lé ô nau é a nghut, nungmoq lé sheq ru nghut lhê. Hká dong nghut kôle, zo wui gi, mó wui é matú sutzè hkong to byi rá dut é a nghut, mó wui sheq, zo wui é matú hkong to byi rá dut é nghut lhê. ¹⁵ Haù mù lui, ngò gi, gyai yhang gabú é myit mai, ngò wó é jung hkangmó lé nungmoq é matú chung jai rá nghut mù, ngá gùng lé lhang chúng jai rá nghut lhê. Ngò, nungmoq lé myó chytidap é yanmai, nungmoq gi, ngo lé shaù chytidap kó rá lú? ¹⁶ Ngò gi, nungmoq chyáng wòlai a dut é hkyô têng lhê. Nghut kólhang, ngò gi, hpaqchyí haq da sù dut mù, mhaù lhik é dong nungmoq lé chypur yú sù dut byuq bê ga nungmoq ra-am myit akó myhi-nhung! ¹⁷ Ngò gi, nungmoq chyáng nhang kat byí é byù dong, nungmoq chyáng amyat kut zô yú bê nghut lhê lú? ¹⁸ Ngò gi, Tituq lé nungmoq chyáng lé rá matú wum tai tsuq mù, ngamoq é gumang lé, yhang eq rahá nhang kat bê nghut lhê. Tituq gi, nungmoq

* 12:2 Hkrisduq má é byù rayuq gâ é gi, Poluq yhanggung yhang lé tai nyi é nghut lhê.

chyáng amyat kut zô é nghut lhê lúh? Nga-nhik gi, rajung zâ é myit đông chyat kut mù, rajung zâ é hkyô lé chyat châng é su nhik nghut lhê, a nghut kó lúh?

¹⁹ Ngamoq gi, nungmoq hí má ngamoq gùng ngamoq tai hung yu nyi ri nghũ, ahkuí jé shoq myit nyi akò lúh? Ngamoq gi, Hkrisduq mã é byu pé đông, Garai Gasâng hí má tai nyi é nghut lhê. Chyitdap é gumang wui ê, ngamoq kut é jung hkangmó gi, nungmoq é akyu matú chyat nghut lhê. ²⁰ Hkâsu mù gâ le, ngo lé jé é hkũn, ngò, nungmoq lé dut nhâng nau é su, nungmoq a wó dut kó rá eq, nungmoq, ngo lé dut nhâng nau é su, ngò a wó dut rá lé, ngò myit gyuq ri. Ngò gi, mabyoq jishũm htoq é, manon é, nhik-ũn buq é, byu hpũng gam é, gansang é, lumu é, gyaí nghutbũn é eq atau ahũ dut é hkyô pé joq rá lé gyuq ri. ²¹ Ngò dum lé jé é hkũn, ngá é Garai Gasang gi, nungmoq é hí má ngo lé myit nyhũm nhâng mù, yhangmoq ô nau é myit châng é má shut é đông nyi zô lúhũ nau é i-myit, gungsho zũm yap é yubak mara eq a sân-yúng é hkyô kut shut é mai myit a lĩng bang myo myó é yanmai, yón kuq é hui zo rá lé, ngò myit chiq ri.

13

Ló Htàng Má Sidiq Byi É Dang Pé

¹ Ahkuí, ngò, nungmoq chyáng lé kum rá gi, sum lĩng nghũ rá dàm nghut lhê. Haũ gi, "Mara hun é hkyô hkangmó lé, í yuq sum yuq saksé hkâm é eq lhoq teng ra rá nghut lhê."^{*} ga kâ tô é eq rajung za nghut lhê. ² Ngò gi, í lĩng nghũ rá dàm nungmoq eq rahá nyi é hkũn, nungmoq lé sidiq byi gũ bê nghut lhê. Ahkuí le, nungmoq eq wê gâng tô é u lé, dum tái kólé, ngò dum jé lé é hkũn, noq mai mara shut tô é bang lé nghut nghut, góbang ó yuq lé nghut nghut, hkyamsa a byi lo rá nghut lhê. ³ Haũ gi, ngò đông mai Hkrisduq dang tai nyi é hkyô saksé shit rá lé, nungmoq dũng nyi kômù nghut lhê. Yhang gi, nungmoq é hkyô lé hkâsu kut shui-ũ é hkyô má wum nyhôm é a nghut, nungmoq chyáng a-tsam mó shit sũ sheq ru nghut ri. ⁴ Hkâsu mù gâ le, Yhang gi, wum nyhôm é má jén sat é hui bê nghut kôlháng, Garai Gasâng é a-tsâm eq dui nyi é gi, hkyak têng lhê. Haũ eq rajung za, ngamoq gi, Yhang su wum nyhôm kôlháng, nungmoq lé dojaũ rá matú, Garai Gasâng é a-tsâm eq, Yhang eq rahá dui nyi rá nghut lhê.

⁵ Nungmoq gi, lumjĩng hkyô má nghut nyi lhê luq, yhumsing gũng yhumsing myi wú keq. Yhumsing gũng yhumsing chyam wú keq. Nungmoq gi, chyam é má sũm byuq é za a nghut jáng, nungmoq chyáng Hkrisduq Yesuq lũng nyi bê hkyô lé sé kó rá nghut lhê. ⁶ Ngamoq gi, chyam é má a sũm é hkyô

lé, nungmoq wó sé kó rá nghut lhê nghũ, ngò hkyak lum tô lhê. ⁷ Ahkuí, ngamoq gi, nungmoq shut é hkyô haĩ a kut kó rá matú, Garai Gasâng chyáng kyũdung byi lhê. Haũ gi, ngamoq chyám hui lũ wó lut é hkyô lé byu pé myàng kó rá matú a nghut é za, ngamoq sũm é su dut kôlháng, nungmoq ge é hkyô kut kó rá lé myàng rá matú nghut lhê. ⁸ Hkâsu mù gâ le, ngamoq gi, haũ tengmán hkyô eq shaĩ é đông hai le a ge kut é za, tengmán hkyo é matú za kut rá dut é nghut lhê. ⁹ Ngamoq wum nyhôm kôlháng, nungmoq wum bo é hkũn, ngamoq gabú é nghut lhê; ngamoq kyũdũng é gi, nungmoq gumjup rá matú nghut lhê. ¹⁰ Ngò gi, wê gâng tô é hkũn, haũ hkyô pé lé haĩ mù kâ é gâ le, ngò jé lé é hkũn, ahkáng ayá lé ngò chung é má htân htân a kut rá matú nghut lhê. Ahkáng ayá haũ gi, nungmoq lé lhoq htên pyám rá matú a nghut, nungmoq lé kó myháng lo nhâng rá matú, haũ Yhumsing ngo lé byi é sheq ru nghut lhê.

Ló Htàng É Shi-kyám Dang

¹¹ Ló htàng má ngò tai nau é gi, gumang wui ê, nguingón yuqyo nyi keq. Gumjup hkyô shut só nyi keq, ngò dũng tòngbán é dang lé gyo keq, myit rahkat za dut nyi keq, nguingón shoq asak dui nyi keq. Haũ hkũn, chyitdap hkyô eq nguingón hkyo é Garai Gasang gi, nungmoq eq rahá nyi nyi rá nghut lhê.

¹² Chyoiyúng é bopuq puq é eq, rayuq eq rayuq shi-kyám lhum keq. ¹³ Sân-yúng bang banshoq gi, nungmoq lé shi-kyám kat akò.

¹⁴ Haũ Yhumsing Yesuq Hkrisduq é jeju, Garai Gasâng é chyitdap myit eq Chyoiyúng Woi-nyí é zũm yap hkyô gi, nungmoq banshoq bãng chyáng ru joq nyi sháng gaq ô.

* 13:1 Tarâ Pun 19:15

GALATIQ

Mau Bâng Chyáng Hun Kat é Laiká (Galatians)

¹ Byu pê chyáng mai le a nghut, ó yuq eq nhang é le a nghut e za, hau Yesuq Hkrisduq lé shí bê mai dum lhoq dui toq yu é sú Iwa Garai Gasang eq Yesuq Hkrisduq chyáng mai nhang kat é lagyo rayuq nghut sú, ngò Poluq gi, ² ngò eq rahá nyi é gumang wui banshoq bang le mù, Galatiq mau má é noqkuq hpung pê chyáng dang kyô kat lhê.

³ Nga-nhúng é Iwa Garai Gasang eq Yhumsing Yesuq Hkrisduq chyáng mã é, jeju eq nguingón hkyô gi, nungmoq chyáng ru joq nyi sháng gaq ô. ⁴ Hau Hkrisduq gi, nga-nhúng é Iwa Garai Gasang ô nau é eq rajung za, agè ashop é ipyat shí mai, nga-nhúng lé xe yù rà ga, nga-nhúng é yubak mará é matú yhanggung lé Yhang byí pyám bê nghut ri. ⁵ Hau hpungwup shingkaq gi, Garai Gasang chyáng pyat dedu ahtum abyuq ru joq nyi sháng gaq ô. Amen.

Gotú Gabú Danglù A Joq É Hkyô

⁶ Ngò gi, hau Hkrisduq é jeju mai nungmoq lé ji yù Sù lé, nungmoq hau-i han kâng pyám to kôlu, shai é gabú danglù shut lhing ló nyi kô é hkyô lé, gyai yhang maú nyi ri. ⁷ Danglù hau gi, gabú danglù ratsui lhang a nghut. Byu ra-am mai nungmoq lé lhoq shuk byi lui, hau Hkrisduq é gabú danglù lé, shikut lui lhoq shai nhang pyám nyi kô é hkyô za nghut lhê. ⁸ Nghut kôlhang, nungmoq lé ngamoq hkô kyo bê gabú danglù mai lai lui, ngamoq nghut nghut, mauhkung htoq mã é maumang lagyo rayuq nghut nghut, shai é gabú danglù, nungmoq lé hko kyô é nghut jáng, hau yuq gi, ahtum abyuq dam byí é hui zo sháng gaq ô! ⁹ Ngamoq tai wú bê eq rajung za, ahkuí le, ngò dum tai kôlé: rayuq yuq mai, nungmoq hap yu to bê é gabú danglù mai lai lui, gotú hko nyi e nghut jáng, hau yuq gi, ahtum abyuq dam byí é hui zo sháng gaq ô!

¹⁰ Hau su nghu tai é gi, ahkuí, ngò, byú é hí má myoqdong wó rá matú shikut nyi é nghut lhê lhu? Hau a nghut jáng, Garai Gasang é hí má myoqdong wó rá matú shikut nyi é nghut lhê lhu? Byú lé gabú nhang rá matú, ngò shikut nyi é nghut lhê lhu? Ngò gi, byu pé lé za ru gabú nhang nau nyi é nghut le gi, Hkrisduq é dui-nhang zoshâng dut rá a nghut.

Poluq Lé, Garai Gasang Ji Yu É Hkyô

¹¹ Gumang wui é, ngò hko kyô é gabú danglù hau gi, byu eq kut htoq é hkyô a

nghut é lé, ngò, nungmoq lé sé nhang nau ri. ¹² Ngò gi, hau lé, byu chyáng mai wó yu é le a nghut, góyuq eq mhoq byí é le a nghut e za, Yesuq Hkrisduq eq shing-rán byí é dòng wó hap yu é ru nghut lhê.

¹³ Ngò, Yudaq noqkuq htung má nghut nyi ashí hkún, Garai Gasang é noqkuq hpung lé ladu lai shoq hkásu kut zing-ri lui, hau lé lhoq htên shikut wún é, ngá é hí hpyang lhê é asak dui hkyô lé, nungmoq wó gyô wú bekô rá nghut lhê. ¹⁴ Ngò gi, ngò eq rakyam zâ é Yudaq byu pé myo myó é htoq má, Yudaq noqkuq htung lé je cháng sú nghut é htoq agó, ngá é ichyí Iwa pé é htungli lé ladu lai shoq myit zing zuq sú nghut lhê. ¹⁵ Nghut kôlhang, ngá nú é unghkaú mai yhang hkyin to lui, Yhang é jeju yanmai ngo lé ji yu é Garai Gasang gi, ¹⁶ hau Yhang Zô é hkyô gabú danglù lé, ngò mai tungbau pê chyáng hko kyo sháng gaq ga, Yhang Zo lé ngá chyáng htoq shit nhang rá matú myit hpyit yu é hkún, ngò gi, ó yuq eq le a hpyé yù, ¹⁷ Yerusalem wá mó má doq ló lui, ngá hí má lagyo kut é bang lé le a ló hui é za, radá dâm Arabiq mau shut é lui, Damaskuq myuq má dum tau ló bê nghut lhê.

¹⁸ Sum zân lai é htâng má, ngò gi, Yerusalem wá mó má doq ló mù, Petruq* lé ló hui lui, yhang eq raxe ngo nyi, ló nyi nyi é nghut lhê. ¹⁹ Hau má, Yhumsing é yhanggu Yakuq mai lai lui, lagyo góbang lé ngò a myàng nghut ri. ²⁰ Nungmoq lé ngò ká byí kat é má, mhaú é hkyô a bò nghu lui, Garai Gasang hí má, hkyak, ngò tai lhê. ²¹ Hau htâng má, ngò gi, Suriq mau eq Kiliki mau má é jé é nghut lhê. ²² Hau hkún, hau Hkrisduq má nghut é, Yuda mau má é noqkuq hpung byu wui gi, ngò lé myoqno a shú kó nghut ri. ²³ Yhangmoq gi, "Hí hkún, nga-nhúng lé zing-ri sú gi, yhang mai lhoq hten rá matú radám shikut wú é lumjínq hkyô hau lé, ahkuí hko nyi ri." gá é hkyanglù lé wó gyô wú kôlu za, ²⁴ ngá é yanmai, Garai Gasang lé hkyá-ôn bum akô nghut ri.

2

Poluq Lé Lagyo Pé Lhom Hap Yu É Hkyô

¹ Raxe myi zân lai é htâng má, ngò gi, Barnaba eq rahá Yerusalem wá mó má dum doq ló é hkún, Tituq lé le shui chung é nghut lhê. ² Garai Gasang byí é shing-rán eq rajung za doq ló lui, ngò kut wú bê muzó eq ahkuí kut é muzó pé akôm a dut pyám sháng gaq nghu, tungbau pê chyáng ngò hko kyô nyi é gabú danglù lé, hau suwún dut bâng é hí má za shap kyô é nghut lhê. ³ Nghut kôlhang, ngò eq rahá nghut é Tituq gi, Grik byu nghut kôlé, yhang lé ahpyo-kuq a hpyit nhang kó nghut ri. ⁴ Hau hkaú wang lo é mhaú

* 1:18 Petruq lé Kehpa le gá lhê.

é gumang wui gi, Hkrisduq Yesuq má ngamoq wó é luthkyô má jowú luí, nga-nhúng lé jùn dut nhâng râ dá kô é yanmai, haú hkyô gabyông htoq lo é nghut ri.* ⁵ Nghut kôhâng, haú gabú danglu é tengmán hkyô gi, nungmoq chyáng joq gíng nyi sháng gaq nghú, razup za lháng, yhangmoq é dang lé ngamoq gyo byí é a nghut.

⁶ Ahkyak é byù su dut é bang gi, yhangmoq haí jung kut kôhâng, ngò eq a séng nghut ri; Garai Gasang gi, du lé wú mù jéyáng é sù a nghut; byù haú bang gi, ngá é mungdang má haí le a jat kat e za, ⁷ Petruq gi, Yudaq byu pé[†] lé, haú gabú danglù hko kyo rá mù má lum tó é hui bê eq rajung za, ngò gi, tungbaù pé[‡] lé, haú gabú danglù hko kyo rá mù má lum tó é hui bê hkyô lé za, yhangmoq myang akò nghut ri. ⁸ Hkâsu mù gà le, Yudaq byu pé é matú Petruq lé lagyo ayá dang byi é sù Garai Gasang gi, tungbaù pé matú ngo lé le lagyo ayá dang byi bê nghut lhê. ⁹ Haú hkungmó-zing su ahkyak é, Yakuq, Petruq eq Yohan pé gi, ngò lé byi tó é jeju lé myang sé kôjáng, ngò eq Barnaba lé, zùm yap hkyô gà é loqyo loq eq shi-kyâm yù kôluí, yhangmoq gi, Yudaq byu pé shut, ngá-nhik lé gi, tungbaù pé shut é rá lhê ga, myit hui bekò nghut ri. ¹⁰ Yhangmoq gi, ngá-nhik mai myùng bang lé ru bún nyi rá matú za pying kat akò; haú gi, ngò gyai yhang kut nau nyi é hkyô nghut lhê.

Petruq Lé Poluq Htuq Htúng É Hkyô

¹¹ Antioku wà mó má Petruq jé lé é hkún, yhang lé mara hùn rá hkyô joq é yanmai, ngò gi, byu hí má yhang, yhang lé lhom htuq htúng é nghut lhê. ¹² Hkâsu mù gà le, Yakuq chyáng mai lé é bang a jé shí é u lé, yhang gi, tungbaù pé eq rahá chòm zo chòm shuq lhaq kut ri. Nghut kôhâng, haú bang jé é hkún, yhang gi, ahpyo-kuq hpyit rá lhê gà é hpúng má lom é bang lé gyuq é yanmai, tungbaù pé chyáng mai htoq gang luí, yhang baù nyi tô ri. ¹³ Yhang, gegùn labyoq kut é hkyô má, gotú Yudaq byu pé le bo châng kut akò nghut mù luí, Barnaba lháng yhangmoq kut é gegùn labyoq hkyô má bo châng nghoq ló bê nghut ri. ¹⁴ Haú gabú danglu é tengmán hkyô eq rajung za, yhangmoq a cháng kô é lé myàng jáng, ngò gi, yhangmoq banshoq bâng é hí má, Petruq lé, "Nàng gi, Yudaq byu nghut tò mù luí, Yudaq byu rayuq đồng a nyi e za, tungbaù rayuq đồng nyi luí nhing, tungbaù pé lé Yudaq byu pé é htúngli hkâsu kut wò cháng nhâng rá lú?"

¹⁵ Ngamoq gi, yubak dap bang gà é tungbaù pé a nghut e za, hkú é buinyi mai yhang, Yudaq byu nghut gú bê nghut lhê.

¹⁶ Byù gi, jep é tarâ lé cháng luí mara hkyut san byi hui é a nghut e za, Yesuq Hkrisduq lé lumjíng é yanmai sheq mara hkyut san byi hui é hkyô lé, ngamoq sê lhê. Haú mù luí, ngamoq gi, jep é tarâ lé cháng luí a nghut e za, Yesuq Hkrisduq lé lumjíng é yanmai, mara hkyut sân pyám byí é hui sháng gaq nghú, Yesuq Hkrisduq lé lumjíng bê nghut lhê; hkâsu mù gà le, ó yuq le, jep é tarâ lé châng é yanmai, mara hkyut san byí é hui rá a nghut.

¹⁷ Ngamoq gi, Hkrisduq má ngamoq é mara hkyut san byí é hui rá hkyô ho nyi é hkún, yubak dap é bang ngamoq nghut é lé myang é nghut jáng, mara lé gi, Hkrisduq mai kut nhang é nghut lhê lúhú? Ratsuí le a nghut. ¹⁸ Ngò gi, ngò hpyoq pyám bê hkyô lé dum sai kut é nghut jáng, tarâ lu lai é byù ngò nghut é lé tún shit ri. ¹⁹ Ngò gi, jep é tarâ eq séng é má, jep é tarâ é yanmai shí jáng sheq, Garai Gasang é matú wó dui nyi rá nghut lhê. ²⁰ Ngò gi, Hkrisduq eq rahá jén sat é hui bê nghut mù luí, ngá gúng ngò dui nyi é a nghut lo, Hkrisduq sheq ngò má dui nyi é ru nghut lhê. Ahkuí, ngò gungsho má asak dui nyi é gi, ngò lé chytidap luí, ngá é matú yhanggúng lé Yhang byí pyám é, haú Garai Gasang é Yhangzo lé lumjíng é yanmai ru nghut lhê. ²¹ Ngò gi, Garai Gasang é jeju lé tô pyám é a nghut, hkâsu mù gà le, dingmán é hkyô lé, jep é tarâ đồng wó yu é ru nghut le gi, Hkrisduq shí hkâm é gi, akôm dut byuq rá nghut lhê." nghú taí é nghut lhê.

3

Lumjíng Myit Lúhú? Jep É Tarâ Lúhú?

¹ Galatiq mau má é byúbâm pé é! Yesuq Hkrisduq gi, tapzing má jén sat hui bê hkyô lé, nungmoq é myoq má bò nhang tò bê le nhing, ó yuq eq wá nungmoq lé làng nghoq yù bekò lúhú? ² Nungmoq gi, haú Woi-nyí lé, jep é tarâ cháng luí wó yù kô é nghut lhê lúhú? A nghut jáng, nungmoq wó gyô yu é gabú danglù lé lumjíng luí wó yù kô é nghut lhê lúhú? Haú rahkat lé za, ngò sé yù nau ri. ³ Nungmoq gi, haú-í yhang bâm akò lúhú? Haú Woi-nyí lé lumhkaú mù kut hí kôluí nhing, ahkuí, gungsho wum-o lé lumhkaú mù, yhumsing myit tô é hkyô lé htoq pán rá matú shikut nyi akò lúhú? ⁴ Nungmoq, myo myo hpuzò pyám é gi, akôm nghut akò lúhú? Gè gè yhang, haú gi, akôm nghut byuq bekò lúhú? ⁵ Garai Gasang, nungmoq lé Yhang é Woi-nyí byí é htoq agó, nungmoq chyáng laklai kumlhá kut é gi, jep é tarâ lé nungmoq châng é yanmai nghut akò lúhú? A nghut jáng, nungmoq wó gyô é gabú danglù lé, nungmoq lumjíng é yanmai nghut akò lúhú?

* 2:4 Yudaq byu pé ra-am gi, hpúng asik wang é bang lé Yudaq htúng tarâ cháng nhâng nau akò nghut ri. † 2:7 Grik má ahpyo-kuq hpyit hkâm é bang ga bo tô ri. ‡ 2:7 Grik má ahpyo-kuq hpyit a hkâm é bang ga bo tô ri. ✧ 3:6 Apùn 15:6

⁶ Abraham gi, Garai Gasang lé lumjǐng luí, yhang lé dingmán sù ga sôn yu é hui bê nghut ri.^{*} ga, Abraham eq séng luí taí tô é lé myit wú keq. ⁷ Haú mù luí, lumjǐng myit bo é bang gi, Abraham é yhangzô pé^{*} yhang dut bê nghut é hkyô lé sé keq. ⁸ Lumjǐng myit é yanmai, tǔngbaù pé lé Garai Gasang mara hkyut san byi rá nghut lhê ga, Chyúmdang mai hí byu-myang to bê nghut mù luí, Abraham lé hí shit kyô tô é gabú danglù gi, "Nang é yanmai, byuhú chǎngjup gi, shimǎn jeju wó yú kó rá nghut lhê."^{*} gá ri. ⁹ Haú mù luí, lumjǐng myit bo é bang gi, lumjǐng myit bo é Abraham eq rahá, shimǎn jeju lé myang hkam yú kó rá nghut lhê.

¹⁰ Jep é tará chǎng é hkyô má ngè hkau é lhunglhǎng bang gi, nhǐng pyám é hui bang chyat nghut lhê. Hkásu mù gá le, "Tará laiká má ká tô é lhunglhǎng lé a xoq kut é sù, ó yuq nghut kôle, nhǐng pyám é hui kó rá nghut lhê."^{*} ga luí, ká tô ri. ¹¹ Hau htoq agó, "Haú dingmán sù gi, lumjǐng myit mai asak ðui rá nghut lhê."^{*} ga ká tô é yanmai, ó yuq nghut kôle, Garai Gasǎng é hí má jep é tará lé chǎng luí, mara hkyut san byi é a huí é hkyô gi, san za nghut bê nghut ri. ¹² Haú jep é tará gi, lumjǐng myit eq hai a séng é nghut luí, "Haú pé ðong chǎng é sù gi, haú pé mai asak ðui rá nghut lhê."^{*} ga ká tô ri. ¹³ Haú Chyúmdang má, "Sik zǐng má jén lhǎng to huí é sù ó yuq nghut kôle, nhǐng pyám é hui sù nghut ri."^{*} ga ká tô é eq rajung za, Hkrisduq gi, nga-nhúng é matú nhǐng pyám é hui sù dut bê nghut é yanmai, jep é tará má é nhǐng é hkyô mai nga-nhúng lé hkyi yú bê nghut ri. ¹⁴ Haú Abraham lé byi tô é shimǎn jeju gi, Hkrisduq Yesuq é yanmai tǔngbaù pé chyǎng le jé shǎng gaq ga, Yhang nga-nhúng lé hkyi yu é nghut ri; haú mù luí, nga-nhúng gi, danggididq byi tô é Woi-nyí haú lé, lumjǐng myit mai wó yú rá nghut lhê.

Jep E Tará Eq Danggididq

¹⁵ Gumang wui ê, nyi wui é asak ðui hkyô má é lé dangtú yú mù, ngò nungmoq lé taí kôlé, byù mai chòm tô tô é dangshikaq lé, ó yuq eq le wó lhoq hpyoq pyám rá a nghut, ó yuq eq le haú má wó jat kat rá a nghut. ¹⁶ Abraham eq yhǎng é awut ashín lé byi tô é danggididq le haú eq rajung za nghut ri. "Awut ashín pé lé" gá é dang gi, byù myo myo lé gá lhê; nghut kólhang, haú Chyúmdang má, haú lé taí nau é a nghut e za, "nǎng é awut ashín lé"^{*} ga taí nau é ru nghut lhê, haú é lichyúm gi, byù rayuq lé za taí é nghut lhê, haú gi, Hkrisduq nghut ri; ¹⁷ haú mù luí, ngò taí nau é gi, Garai Gasang, dangshikaq tô tô é htǎng, myí sho sum xé

zàn má lé joq é tará gi, dangshikaq haú lé le wó lhoq hpyoq pyám rá a nghut, danggididq lé le wó lhoq htǎn pyám rá a nghut. ¹⁸ Hkásu mù gá le, haú silí wunlí gi, jep é tará eq séng lhúm é nghut jáng, danggididq eq gi, hai le a séng lhum lo nghut ri; nghut kólhang, Garai Gasang gi, Yhǎng é jeju yanmai, Abraham lé danggididq ðong silí wunlí haú byi to bê nghut ri.

¹⁹ Haú su nghut jáng, haú jep é tará gi, hai akyú bò rá lúhú? Haú gi, danggididq ðong lhoq áng tô é Awut ashín nghut é sù jé lé é hkún jé shoq, mara kut shut nyi bùm kô é yanmai, jat kat tô é nghut lhê; jep é tará haú gi, maumang lagyô pé mai gyoro só xoq byi sù[†] é loq ðong byi tô é ru nghut lhê. ²⁰ Gyoro só xoq byi sù gi, rahkyam shut má é bang eq baù séng é a nghut, nghut kólhang, Garai Gasang gi, rayuq za nghut lhê.

²¹ Haú mù luí, jep é tará gi, Garai Gasǎng é danggididq pé eq htuq htǐng lhúm lhê lúhú? Ratsui le a nghut. Hkásu mù gá le, ðui é asak wó byi é jep é tará lé byi to bê nghut le gi, gè gè yhang, dingmán hkyô gi, jep é tará mai lò rá nghut lhê. ²² Nghut kólhang, mingkan gón má é bang gi, yubak mará é htongbyu pé chyat nghut akó ga Chyúmdang má bo tô ri; haú mù luí, haú byi to bê danggididq lé gi, Yesuq Hkrisduq lé lumjǐng é bang lé byi rá nghut lhê.

²³ Lumjǐng hkyô haú a jé shimá, nga-nhúng gi, haú jep é tara eq htongbyú ðong lhúng tô é hui luí, lumjǐng hkyô haú htoq shit é hkún jé shoq myhi lhúng tô é hui wú bê nghut lhê. ²⁴ Haú mù luí, nga-nhúng gi, lumjǐng é yanmai mara hkyut san byi é hui shǎng gaq ga, jep é tará gi, nga-nhúng lé Hkrisduq chyǎng shuí é rá matú, nga-nhúng é hkyô-u shê sù dut bê nghut ri. ²⁵ Ahkuí kúm gi, haú lumjǐng hkyô jé bê nghut é yanmai, nga-nhúng gi, haú jep é tará mai hkyô-u shê é loq hkau má a nghut lo.

Garai Gasǎng É Yhangzô Pé

²⁶ Nungmoq lhunglhǎng bang gi, Hkrisduq Yesuq lé lumjǐng é yanmai, Garai Gasǎng é yhangzô pé nghut bê; ²⁷ Hkrisduq má wui-myhup hkám bê é bang nungmoq banshoq gi, Hkrisduq lé mebu su wut to bekô nghut ri. ²⁸ Nungmoq lhunglhǎng bang gi, Hkrisduq Yesuq má rading ralhum za nghut é yanmai, Yudaq byù ngú é eq Grik nghu é, jùn nghu é eq luthkyô nghu é, yuqgè nghu é eq myiwe nghu é, a gam hkoq lo nghut ri. ²⁹ Nungmoq gi, Hkrisduq eq séng bekô nghut jáng, Abraham é awut ashín pé le, haú danggididq eq rajung za silí wunlí hkam yú bang le, nghut akó nghut ri.

* **3:7** Abraham é yhangzô pé gá é gi, Garai Gasǎng é yhangzô pé lé gá é nghut lhê. * **3:8** Apún 12:3 * **3:10** Tará Pun 27:26 * **3:11** Hbk 2:4 * **3:12** Nhong 18:5 * **3:13** Tará Pun 21:23 * **3:16** Apún 12:7; 13:15; 24:7 † **3:19** Gyoro só xoq byi sù gi, Mosheq nghut ri.

4

¹ Ngò tái nau é lichyúm gi, haù amyú hkúng xoq dut rá sù gi, ikun sutzè ban-shoq lé sîng ang sù nghut kôlhang, yhang, zoshâng nghut ashí hkún gi, jùn hpó eq haù a shaí nghut ri. ² Yhang gi, yhâng wa masat tô é ahkýing jé shoq, yhang lé zúng é sù eq yhúm lé up su é a-ô má ru lúng nyi ashí nghut ri. ³ Haù eq rajung za, nga-nhúng le zoshâng* nghut é hkún gi, mingkan uphkáng tará ô má jùn dut nyi é bang nghut lhê. ⁴ Nghut kôlhang, ahkýing lo ngap jáng, zo dut rá ahkáng lé byíng shoq, nga-nhúng wó yú sháng gaq ga, Garai Gasang gi, jep é tará hkaú má é byu pé lé hkyi yú rá matú, ⁵ jep é tará hkaú má, myiwe mai hku kat nhang é Yhang Zo lé, nhang kat byi bê nghut ri. ⁶ Hkásu mù gà le, nungmoq le, zo wú nghut bê yanmai, "Aba, Áwa ê." ga dat wut é, Yhang Zô é Woi-nyí lé, Garai Gasang gi, nga-nhúng é i-mytit unghkaú má kat byi bê nghut ri. ⁷ Haù mù luí, nàng gi, jùn a nghut lô e za, zo rayuq nghut bê nghut ri; nàng gi, zo rayuq nghut é yanmai, Garai Gasang gi, nang lé Yhâng é amyú hkúng xoq dut nhâng bê nghut ri.

Galatiq Mau Bang Lé Poluq Myit Chiq Byí É Hkyô

⁸ Hí hkún, Garai Gasang lé nungmoq a sé shí é u lé, nungmoq gi, nat hpará lháng a nghut bâng é a-ô má jùn dut é bang nghut ri. ⁹ Ahkuí kúm, Garai Gasang lé nungmoq sé bê nghu é htoq agó, Garai Gasang gi, nungmoq lé sé bê nghut le nhíng, nungmoq gi, hkásu mù, haù wum nyhôm é eq akyú a byí é, mingkan uphkang é tará shut dum lhing taù ló nyi akó lhú? Nungmoq gi, haù pé eq jùn zô é dum hui zó nau akó lhú? ¹⁰ Nungmoq gi, buinyi wú, lohokyap wú, ahkýing yam-yoq wú, zanwut wú é hkyô pé lé, ahkyak kut nyi ashí kó nhung! ¹¹ Nungmoq chyáng ngò wum kat pyám é hkyô gi, akôm dut bê abe nghú, nungmoq é matú ngò myit chiq nyi ri.

¹² Gumang wui ê, ngò gi, nungmoq su dut bê nghut é yanmai, nungmoq le ngò su dut keq[†] nghú, nungmoq lé dúng tóngbán kat lhê. Nungmoq gi, ngo lé hai le a kut shut wú kó é nghut lhê. ¹³ Sâng-hí dàm ngò nungmoq lé gabú danglù hko kyo é hkyô gi, nungmoq sé é eq rajung za, ngò nòhpyo huí é yanmai nghut lhê. ¹⁴ Ngá é nòhpyo gi, nungmoq é matú wuífke hkyô dut kôlhang, nungmoq gi, ngo lé a wú tiq pyám kó é htoq agó, a wú chaq pyám kó e za, Garai Gasang é maumang rayuq lé su le, Hkrisduq Yesuq lé su yhang le, ngo lé lhom hap yú kó é nghut lhê. ¹⁵ Haù sù é nhíng, nungmoq é

gabú hkyô banshoq gi, haù dut byuq bekó lhú? Nungmoq gi, ru wó dut é nghut jáng, nungmoq é myoqjí lé choq yú mù, ngo lé wám byí pyám kó rá í dut lai lò bê hkyô lé, ngò saksé wó hkám lhê. ¹⁶ Ahkuí, ngò gi, nungmoq lé haù tengmán hkyô tái kyô é yanmai, nungmoq é gyê dut to bê nghut lhê lhú?

¹⁷ Haù byú góbang gi, nungmoq lé gyai shirong é hkyô tún shit ri; nghut kôlhang, ge é hkyô hai a bò; yhangmoq ô nau é hkyô gi, yhangmoq lé nungmoq taù shirong kó abe ga, nungmoq lé ngamoq chyáng mai lhoq káng yú rá matú ru nghut lhê. ¹⁸ Ge é hkyô lé shirong é gi, ge lhê; ngò eq rahá nyi é hkún za a nghut, hká-nhám le haù su shirong le ge lhê. ¹⁹ Ngò chyitdap é zo wui é, Hkrisduq é a-kyang nungmoq má gumjup lo é jé shoq, ngò gi, zo hkú nò no é su radàm dum hkám zô nyi luí, ²⁰ nungmoq é hkyô lé myit wuífke tô é yanmai, ahkuí, nungmoq eq rahá myang nyi mù, ngò tái é danghté wó htaí rá matú, gyai yhang myoqbyu nyi lhê ô.

Hagara eq Sarah Nhik É Hkyô

²¹ Haù jep é tará ô má nyi nau é bang é, nungmoq gi, jep é tará má tái é hkyô lé a sé gyo kó é nghut lhê lhú? Ngo lé tái kyô wú kó laq. ²² Hkásu mù gà le, Abraham gi, yuqzo í yuq wó ri; rayuq gi, jùn myhí é yhangzo, rayuq gi, jùn myhí a nghut su é yhangzo, ga ká tô ri. ²³ Haù jùn myhí é yhangzo gi, gungsho dòng hku lé é sù nghut kôlhang, jùn myhí a nghut su é yhangzo kúm gi, danggidiq eq rajung za hku lé é sù ru nghut lhê.

²⁴ Haù hkyô pé gi, dangtú ru nghut lhê, myiwe haù í yuq gi, dangshikaq í lhum eq wui lhê; dangshikaq ralhum gi, Sinaq Bùm má é[†] nghut luí, jùn dut rá nghut é zo wui lé hku kat é Hagara lé tái nau é nghut ri. ²⁵ Hagara haù gi, Arabiq mau má é Sinaq Bùm lé tái nau é nghut luí, ahkuí lhê é Yerusalem eq wui nyi ri. Hkásu mù gà le, Yerusalem haù gi, yhang zó pé eq rahá, jep é tara é jùn dut nyi kó é yanmai nghut lhê. ²⁶ Nghut kôlhang, ahtoq má é Yerusalem gi, jùn myhí a nghut sù nghut luí, nga-nhúng é ìnu nghut ri. ²⁷ Hkásu mù gà le, "Zoshâng a hku é baùdung myhí ê, gabú nyí aq. Zo hkú nò a no wú shí é myiwe gi, gabú luí, gabú garú nyi aq; hkásu mù gà le, haù chamchyuyui dut é myiwe myhí gi, làng wó é myiwé htoq má zo wui je myóm wó bê nghut ri." ga ká tô ri.*

²⁸ Gumang wui ê, ahkuí, nungmoq gi, Isak su, danggidiq byí tô é zo wui nghut bê nghut

* 4:3 Bun zo shí má, zoshâng gá é lichyúm gi, Yesuq lé a lumjîng shí é bang lé gà lhê. † 4:12 Ngò su dut keq gá é lichyúm gi, nungmoq le ngò su jep é tará mai lut htoq keq gá nau é nghut lhê. ‡ 4:24 Sinaq Bùm má é dangshikaq gi, jep é tará eq sêng é dangshikaq nghut lhê. ✧ 4:27 Esai 54:1

ri. ²⁹ Haú hkún lé, haú gungsho dông hku lé lo é sù gi, Woi-nyí wum-o dông hku lé lo é sù lé zing-rí ri. Haú eq rajung za, ahkuí le dut nyi ri. ³⁰ Nghut kôlhang, Chyúmdang má hkásu ga kâ tò ri lúhú gâ le, "Haú jùn myhí eq yhangzo yuqzo lé hkat htoq pyám aq; hkásu mù gâ le, haú jùn myhí é yhangzo yuqzo gi, jùn myhí a nghut su é yhangzo yuqzo eq rahá, silí wunlí lé wó chóm hkam yù rá a nghut."^o gâ ri. ³¹ Haú mù luí, gumang wui é, nga-nhúng gi, jùn myhí é yhangzò pé a nghut e za, jùn myhí a nghut su é yhangzò pé ru nghut lhê.

5

Hkrisduq Mâ É Luthkyô

¹ Nga-nhúng luthkyô wó rá matú, Hkrisduq gi, nga-nhúng lé lhoq lhut kat bê nghut ri. Haú mù luí, haú má ru gíng nyi mù, yhumsing gùng lé jun é wòlai hkaú má hkátaú bainaí nyi kó.

² Ngá dang lé matsing yù keq! Ngò Poluq, nungmoq lé tai kyo kólê, nungmoq ahpyokuq hpyit hkam yù kô é nghut jáng, Hkrisduq gi, nungmoq é matú hai akyú le bò kó rá a nghut. ³ Hau htoq agó, ahpyokuq hpyit hkam yu é sù ó yuq lé nghut kôle, ahpyokuq hpyit é sù gi, jep é tará lhunglhang lé châng kut rá lhê nghú, ngò kyô kat lhê. ⁴ Jep é tará châng shikut é dông mara hkyut san byí é hui naú bang, nungmoq gi, Hkrisduq eq gâng lhum to bekò nghut luí, haú Garaí jeju mai le byit gyó byuq bekò nghut ri. ⁵ Ngamoq kúm gi, myit myoqhyi tò é dingmán hkyô lé, haú Woi-nyí é yanmai lumjín myit eq gyai yhang lán nyi é bang nghut lhê. ⁶ Hkásu mù gâ le, Hkrisduq Yesuq má gi, ahpyokuq hpyit é nghut nghut, ahpyokuq a hpyit é nghut nghut, hai akyú a bò nghut ri; chyitdap myit mai htoq lo é lumjín myit za sheq, akyú bo lhê.

⁷ Nungmoq gi, rago din wú bekò* nghut é wá, haú tengmán hkyô lé a cháng sháng gaq ga, nungmoq lé ó yuq eq hkúm zing pyám kô é lúhú? ⁸ Haú su kut mhoq hpyoq yu é hkyô gi, nungmoq lé ji yù Su chyáng mai htoq lo é a nghut. ⁹ "Mún ratsuí zo gi, muk long gón lé wó lhoq daú lhê."[†] gâ é dang joq lhê. ¹⁰ Nghut kôlhang, nungmoq gi, gotú hkyô dông a lhom yù kó rá nghut lhê nghú, Hkrisduq má hkyak ngò myit lum nyi lhê. Nungmoq lé lhoq byok byí é sù, ó yuq nghut kôle, yhumsing é mara eq rajung za dam byí é hui zo rá nghut lhê. ¹¹ Gumang wui é, ahpyokuq hpyit é hkyô lé, ngò rú hko nyi ashí nghut le gi, haí mù luí, zing-rí é lé ngò hui zò nyi rá lúhú? Haú su kut é nghut jáng,

haú tapzín eq séng luí, manghkáng joq rá a nghut lo. ¹² Nungmoq lé lhoq byok nyi é bang gi, hau htoq chyân luí, yhumsing gùng yhumsing banshoq hpyit pyám kó sháng gaq nghú, ngò wó myit ri.

¹³ Gumang wui é, nungmoq gi, luthkyô wó rá matú ji yù hui é bang nghut akò; nghut kôlhang, nungmoq é luthkyô ahkáng lé, yubak gungsho má hkáchang nhâng kó, chyitdap myit mai kúm gi, rayuq eq rayuq dojaú lhum nyi keq. ¹⁴ Hkásu mù gâ le, "Náng gùng lé náng chyitdap é su, náng é chyangnâm mâ é bang lé le chyitdap aq."^o gâ é hkunmó má za, jep é tará banshoq lo bo to bê nghut lhê. ¹⁵ Nungmoq, rayuq eq rayuq ngat lhum myui lhum nyi kô é nghut le gi, rayuq eq rayuq lhoq htên pyám lhum kó rá nghut é lé, sidiq nyi keq.

Woi-nyí Êq Asak Dui Rá Hkyô

¹⁶ Nghut kôlhang, ngò tai kólê, Woi-nyí shuí ú é dông asak dui nyi keq; haú hkún, nungmoq gi, yubak gungsho ô nau é hkyô cháng kó rá a nghut. ¹⁷ Hkásu mù gâ le, yubak gungsho ô nau hkyô gi, Woi-nyí eq shai lhum nyi; Woi-nyí gi, yubak gungsho ô nau hkyô eq shai lhum nyi, dut ri. Haú í lhum gi, gyè dut lhum ri; haú mù, nungmoq gi, yhumsing ô nau é dông hkákut kó. ¹⁸ Nghut kôlhang, nungmoq lé Woi-nyí eq hkyô hí é nghut jáng, nungmoq gi, jep é tará ô má a nghut lo nghut ri.

¹⁹ Yubak gungsho é muzó gi, de de yhang nghut lhê; haú pé gi, ashop é dông gungsho zúm yap é hkyô, a sán-yúng é hkyô, shut é dông nyi zò lhum nau é myit, ²⁰ hpara noq hkyô, myoqheq mù kut é hkyô, a jú é hkyô, byoq lhum é hkyô, manon é hkyô, nhiksoq sup é hkyô, yhumsing wuizat é hkyô, gâng lhum sê é hkyô, hpúng gam é hkyô, ²¹ ningsú é hkyô, í shuq wut é hkyô, zo yé shuq yé mù achaq achyut kut é hkyô pé eq haú pé su kut é gotú hkyô pé nghut ri; haú su kut nyi yap é bang gi, Garaí Gasâng mingdán é silí wunlí lé wó hkam yù rá a nghut nghú, ngò, hí hkún nungmoq lé tai wú bê eq rajung za, ahkuí lé, nungmoq lé ngò sidiq byí nyi lhê.

²² Nghut kôlhang, Woi-nyí é ashí gi, chyitdap hkyô, gabú hkyô, nguínón hkyô, myit hng hkyô, nhik-u nú é hkyô, ge é hkyô, lhumzui hkyô, ²³ nùm é hkyô, yhumsing gùng lé wó hkang é hkyô pé nghut ri. Haú hkyô pé lé hkúm zing pyám rá tará hai le a joq nghut ri. ²⁴ Hkrisduq Yesuq eq séng bê bang kúm gi, yubak gungsho ô nau hkyô lé le, hau é yut yut ô nau myit eq shirong é hkyô pé lé le, tapzín má jén sat pyám bekò nghut ri. ²⁵ Nga-nhúng gi, Woi-nyí mai asak dui bê nghut mù, haú Woi-nyí htàng châng

* 4:30 Apùn 21:10 * 5:7 Rago din wú bekò gâ é gi, woi-nyí hkyô má kó myhang lai lò bè lé tai nau é nghut lhê. † 5:9

Shut é dông mhoqshít é hkyô ratsuí gi, muk long gón lé mún eq wó lhoq daú é su, nungmoq banshoq lé wó lhoq nghoq yu pyám lhê. * 5:14 Nhong 19:18

nyi sháng. ²⁶ Nga-nhúng gi, akôm gyáng dang tái lui, rayuq eq rayuq jeq ho lhum é eq manon lhum é bang, a dut nyi sháng gaq.

6

Lhunglhang Bang Lé, Ge É Hkyô Kut Byi Râ Hkyô

¹ Gumang wui ê, rayuq yuq gi, mara záng kut shut é nghut jáng, Woi-nyí wum-o bò bê bang nungmoq gi, nùm é myit eq haú yuq lé lhoq pun lhoq kyng yù keq. Nghut kôlhang, nàng gi, gunglau é a hui sháng gaq, sidiq nyi aq. ² Rayuq eq rayuq é wòlai lé tê byi lhum nyi keq; haú đông mai, nungmoq gi, Hkrisduq é tarâ lé wó lhoq dik kó rá nghut lhê. ³ Rayuq yuq gi, yhumsing gùng haú le a nghut é wá, ahkyak su ngam é nghut jáng, haú yuq gi, yhumsing gùng lé mhaú pyâm é sù nghut ri. ⁴ Yuq hkangmó gi, yhumsing nyi yap é hkyô lé taú myit wú keq; haú hkûn, yhumsing gùng lé góbang eq whui nó a râ e za, yhumsing gùng má aróng wó yù rá nghut lhê. ⁵ Hkâsu mù gâ le, yuq hkangmó gi, ó le ô wò lé wùn waq ra rá dut lhê.

⁶ Haú mungdang lé mhoq yu é sù gi, mhoqshit byi sù lé, ge é zè banshoq gàm byi sháng gaq.

⁷ Garai Gasang lé gi, wó rhoi râ a nghut, yhumsing gùng yhumsing mhauzô é hkâhui nhâng kô; byù gi, hô kat é eq rajung za, shù yù rá nghut lhê. ⁸ Haú yhumsing é yubak gungsho lé lhoq ngón rá matú hô kat é sù gi, myit haú mai htên byoq é hkyô lé myang hkam yù rá nghut lhê; haú Woi-nyí lé lhoq ngón rá matú hô kat é sù kúm gi, Woi-nyí haú mai ahtum abyuq é asak lé myang hkam yù rá nghut lhê. ⁹ Nga-nhúng gi, ge é hkyô kut é má ngu byuq é bang a dut sháng gaq, hkâsu mù gâ le, haú lé nga-nhúng a tô pyâm é nghut jáng, ahkyíng yam-yoq jé é hkûn, nga-nhúng gi, akyú myang hkam yù rá nghut lhê. ¹⁰ Haú mù lui, nga-nhúng gi, kut rá ahkyíng wó tô é u lé, byù lunglhang bang lé ge é hkyô kut byi sháng, haú lumjíng hkyô eq sêng é ikun byu pé lé, je riyhang kut byi sháng.

Ahpyo-kuq Hpyit É Hkyô A Nghut E Za, Byù Sik Hpân Huí É Hkyô

¹¹ Ngò, nungmoq lé, ngá é loq eq hkâ-í kô é laiká cham kâ kat byi é lé, wú wú keq!

¹² Ahtoq pyâm za ge é hkyô lé kut shit nau é bang gi, ahpyo-kuq hpyit kó sháng gaq ga, nungmoq lé zik shikut nyi é bang nghut akô; yhangmoq haú su kut é hkyô gi, Hkrisduq é tapzing é yanmai zing-ri huí é hkyô lé, koi pyâm rá matú za nghut ri. ¹³ Hkâsu mù gâ le, haú ahpyo-kuq hpyit é bang lhang jep é tarâ lé a cháng kó nghut ri; nghut kôlhang, yhangmoq gi, nungmoq é gungsho eq séng

lui wó gumrông kó sháng gaq ga, nungmoq lé ahpyo-kuq hpyit nhâng nau akô nghut ri.

¹⁴ Ngò kúm gi, nga-nhúng é Yhumsing Yesuq Hkrisduq é tapzing eq séng lui gumrông é mai lai lui, hai má le a gumrông sháng gaq; Yhang é yanmai, mingkan gi, ngá é matú jén sat é hui bê; ngò gi, mingkân é matú jén sat é hui bê nghut lhê. ¹⁵ Ahpyo-kuq hpyit é hkyô nghut nghut, a hpyit é nghut nghut, hai akyú a bò; byù sik hpân huí é hkyô za sheq, ahkyak é nghut lhê. ¹⁶ Tarâ haú lé cháng é lunglhang bang é ahtoq má le, haú Garai Gasang é Israelaq byu pé* é ahtoq má le, nguóngon hkyô eq shogyo nhikmyin hkyô gi, ru joq nyi sháng gaq ó.

¹⁷ Ahkuí mai gi, ó yuq le ngo lé jamjau a lhoq htoq byi lo sháng gaq; hkâsu mù gâ le, ngò gi, Hkrisduq é dui-nhâng zoshâng nghut é saksé damhkô lé wun wùn lhê.

¹⁸ Gumang wui ê, nga-nhúng é Yhumsing Yesuq Hkrisduq é jeju gi, nungmoq é woi-nyí eq ru joq nyi sháng gaq. Amen.

* 6:16 Bun zo shí lhum má é Israelaq byu pé gâ é gi, hpúng byù wui banshoq lé tai nau é nghut lhê.

EHPESU Pê Chyáng Hun Kat é Laiká (Ephesians)

¹ Garai Gasang ô nau é eq rajung za, Hkrisduq Yesuq é lagyo nghut sù, ngò Poluq gi, Ehpesu myuq má nyí é, Hkrisduq Yesuq má lhumzui bang nghut é, haù sân-yúng bang chyáng nguóngon dang shit kyô kat lhê.

² Nga-nhúng é Íwa Garai Gasang eq Yhumsing Yesuq Hkrisduq chyáng má é, jeju eq nguóngon hkyô gi, nungmoq chyáng ru joq nyí sháng gaq ô!

Hkrisduq Má É, Woi-nyí Hkyô Shimân Jeju Pé

³ Mauhkúng htoq tsáng myhâng má, woi-nyí hkyô eq sêng é shimân jeju jung hkangmó lé, Hkrisduq má nga-nhúng lé shimân byi sù, nga-nhúng é Yhumsing Yesuq Hkrisduq é Yhângwa, Garai Gasang gi, hkungsó wó nyí sháng gaq. ⁴ Hkâsu mù gâ le, nga-nhúng gi, Garai Gasâng é hí má, choyoyúng é bang eq mara a bo é bang dut rá matú, Garai Gasang gi, mingkan lé a hpân shi mai, Hkrisduq Yesuq má nga-nhúng lé hkyin yu to bê nghut ri. ⁵ Hau htoq agó, Yhang, nga-nhúng lé chytidap é yanmai, Yhang myit ngui ô nau é eq rajung za, Yesuq Hkrisduq mai yhangzô pé kut yu rá matú, hí mai nga-nhúng lé masat to bê nghut ri.

⁶ Haù mù, Yhang chytidap é Sù* má, nga-nhúng lé láí láí byi bê nghut é, hpungwup shingkan bo é jeju chyunhuq lé, chôm hkyá-on sháng. ⁷ Garai Gasâng é agùn agó é jeju yanmai, nga-nhúng mara hkyut byi é hui lui, Yhang Zô é sui dòng mai, nga-nhúng gi, Yhang má hkyi yù hkyô wó yu é nghut lhê. ⁸ Jeju haù lé gi, hpaqchyí byéng-yá eq sê gyô é nyan banshoq le kut, Yhang, nga-nhúng lé agùn agó byi bê nghut lhê. ⁹ Garai Gasang gi, Yhang myit ngui é eq rajung za, Hkrisduq dòng mai kut rá matú hen to bê nghut é, Yhâng é záu tô é hkyô lé, nga-nhúng lé shit bê nghut ri. ¹⁰ Sê gyo wui é hkyô haù gi, lhoq dik rá ahkýing jé jáng, mauhkúng htoq eq myigùng htoq má é lhunglhang lé, Hkrisduq má rading ralhum za kut rá nghut é hkyô nghut lhê.

¹¹ Hkrisduq má sâng-hi myit myoqbyù bang nghut é nga-nhúng gi, Yhâng é hpungwup shingkan lé hkyá-on kungtôn sháng gaq ga, ¹² Garai Gasang gi, Yhang myit sôn tô é lhunglhang lé ban kut mù, Yhâng ô nau é dòng, hí mai myit hpyit doqdân to bê eq rajung za, nga-nhúng lé le, Hkrisduq má hkyin yu to bê nghut ri. ¹³ Hau htoq agó, nungmoq le, nungmoq é hkyi yù hkyo

é gabú danglù gâ é tengmán mungdang lé wó gyo kô é hkùn, Hkrisduq eq sêng é bang dut bekô nghut ri. Nungmoq gi, Hkrisduq lé lumjing bekô nghut é yanmai, haù gidig byi tô é Choyoyúng Woi-nyí dizik htùng tap byi é hui bekô nghut ri. ¹⁴ Garai Gasâng é hpungwup shingkan lé hkyá-on rá matú, Yhang eq sêng é byu pé hkyi xe yù hui é hkying jé shoq, Choyoyúng Woi-nyí haù gi, nga-nhúng é muizé lé hkyak wó yù rá nghu é masat nghut ri.

Poluq Kyúdung Byi É Hkyô

¹⁵ Haù mù lui, Yhumsing Yesuq lé nungmoq lumjing é hkyô eq sân-yúng bang lhunglhang lé nungmoq chytidap é hkyô lé, ngò wó gyô é yanmai, ¹⁶ ngò gi, ngá é kyúdung dang má nungmoq lé myit bun uchyang, anum yhang, nungmoq é matú jeju hkyá-on nyi lhê. ¹⁷ Nga-nhúng é Yhumsing Yesuq Hkrisduq é Garai Gasang nghut é, hpungwup shingkan bò sù haù Íwa gi, Yhang lé nungmoq je sé rá matú, hpaqchyí byéng-yá wó byi é eq san za wó sé nhang é Woi-nyí, nungmoq lé byi sháng gaq nghù, ngò, Yhâng chyáng dúng nyi lhê. ¹⁸ Hau htoq agó, Yhang, nungmoq lé ji yu é myit myoqbyù hkyô, hkasù é nghut é lé le, Yhâng é hpungwup shingkan bo é muizé gi, sân-yúng bang chyáng agùn agó joq nyi é hkyô lé le, Yhâng é kô dik é a-tsam mó gi, lumjing bang nga-nhúng é matú nghut é lé le, ¹⁹ nungmoq wó sé rá matú, nungmoq é myit myoqji lhoq gyeng byi é hui sháng gaq nghù, ngò kyúdung byi nyi lhê. A-tsam mó haù gi, Garai Gasang, Hkrisduq lé shi é mai lhoq dui toq yù mù, ²⁰ mauhkúng htoq tsáng myhâng má, Yhâng é loqyò hkyam shut zung nhang é hkùn, chung é wum-o a-tsam mó eq rajung za nghut ri. ²¹ Hkrisduq gi, uphkan é, ahkáng ayá wó é, a-tsam bo é eq up zô é bang banshoq htoq má le, ahkúi pyat eq htang pyat má myhng é mying lhunglhang é htoq má le, je gyaú é sù nghut lhê. ²² Hau htoq agó, Garai Gasang gi, lhunglhang lé Yhâng é hkyiwa ô má tô to lui, haù noqkuq hpung é matú, Yhang lé, jung hkangmó é ushuq dut rá dòng masat to bê nghut ri. ²³ Noqkuq hpung haù gi, Hkrisduq é gungdu nghut lui, hkyô hkangmó má jung hkangmó lhoq bying jup é Hkrisduq bying nyi é nghut ri.

2

Hkrisduq Má Asak Dui É Hkyô

¹ Láí ló bê hkùn, nungmoq gi, tará lu láí é eq mara kut shut é hkyô pé é yanmai, shi tô é bang dut kô é nghut lhê. ² Haù hkùn, nungmoq gi, mingkan ngón hkyô htoq má lhaq châng nyi kô é htoq agó, haù tará

* 1:6 Yhang chytidap é Sù gâ é gi, Yesuq lé táí nau é nghut lhê.

a cháng bâng é myit má ahkuí mù zuí nyi é sobyò nghut é, maulat lé up sù htàng châng nyi kô é bang nghut lhê. ³ Nga-nhúng ban-shoq bang le, yhangmoq su kut nyi lai lo é bang chyat nghut mù, yubak mara byíng é suisho ô nau gadaú hkyô má nyi é bang nghut é htoq agó, gungsho ô nau é hkyô pé eq myit é hkyô pé đông za châng wú é bang nghut lhê. Haú mù, góbang eq rajung za, nga-nhúng gi, Garai Gasâng é nhikmo-yo hkyô eq gíngdán wú é bang chyat nghut lhê. ⁴ Nghut kôlhang, shogyo nhikmyin myit gyaí bo é Garai Gasang gi, nga-nhúng, tará lu lai lui shi byuq bê bang dut kôlhang, Yhâng é chyitdap myit mó eq, nga-nhúng lé chyitdap lui, Hkrisduq eq rahá asak dui nhâng bê nghut ri. ⁵ Haú mù, nungmoq gi, Garai jêú eq za hkyi yu é hui bekô nghut ri. ⁶ Garai Gasang gi, Hkrisduq Yesuq má, nga-nhúng lé, Yhâng é ge é hkyô shít bê nghut mù, a ung tai é Yhâng é jeju lé, htang pyat má wó shít sháng gaq ga, ⁷ nga-nhúng lé, Hkrisduq eq rahá lhoq dui toq yú mù, mauhkúng htoq tsáng myhâng má, Yhang eq rahá zúng nhang to bê nghut ri. ⁸ Hkásu mù gá le, nungmoq gi, lumjíng é đông mai Garai jêú eq za hkyi yu é hui bekô nghut ri. Haú gi, nungmoq chyáng má é a nghut, Garai Gasâng jeju chyunghuq za ru nghut lhê. ⁹ Haú gi, yhumsing é muzó mai wó é a nghut é yanmai, ó yuq le nghutbun rá hkyô a joq. ¹⁰ Hkásu mù gá le, nga-nhúng gi, Garai Gasâng é loqmú pé nghut mù, nga-nhúng zui saí rá matú, hí hí mai, Garai Gasang hen lajâng tô é ge é muzó pé lé zui saí rá matú, Hkrisduq Yesuq má hpan to hui bê bang nghut lhê.

Hkrisduq Má Rading Ralhum

¹¹ Haú mù lui, nungmoq gi, hí hkún, hku lé lo é mai yhang tungbaú pé nghut é hkyô lé le, byu loq eq za gungsho má kut é, "ahpyo-kuq hpyit hkâm bang" gá é bang mai, nungmoq lé, "ahpyo-kuq hpyit a hkâm bang" ga byi kô é hkyô lé le, myitbun keq. ¹² Haú u lé, nungmoq gi, Hkrisduq eq gâng lhúm tô é bang; Israelaq mingbyu a nghut é bang; danggidíq eq sêng é dangshikaq pé má gó ming byu nghut é bang; mingkan htoq má, myoqbyu jowò a joq é eq Garai a wó é bang nghut é lé, myitbun keq. ¹³ Nungmoq gi, hí hkún wê gâng nyi é bang nghut kôlhang, ahkuí kúm, Hkrisduq é sui đông mai Hkrisduq Yesuq má shuí chyâng htep é hui bekô nghut ri.

¹⁴ Hkásu mù gá le, Yhânggung yhang gi, nga-nhúng é nguínghón hkyô nghut ri. Yhang gi, gyo-ro má kyo tô é madin nghut é a nau a wom hkyô lé hpyoq hpyi pyám byi lui, haú

í myú* dut nyi é lé, rahú za dut nhâng bê nghut ri. ¹⁵ Haú hkunmó pé eq hkang tô é tará pé bo é jep é tará lé, Yhâng é gungsho má lhoq htúm pyám bê nghut ri. Haú mù, Yhang ô nau é hkyô gi, haú í myú dut tô é lé, Yhânggung má yhang, byu sik ra-myú za hpan to rá matú nghut ri; haú đông, simsaq hkyô kut byi bê nghut ri. ¹⁶ Yhang gi, a nau a wôm lhúm é hkyô lé, haú tapzng má lhoq htúm pyám byi mù, haú tapzng đông mai, byu myu í myu é lé ragung za kut lui, Garai Gasang eq xoq byi bê nghut ri. ¹⁷ Yhang gi, wê gâng nyi é bang† nungmoq lé le, chyâng htep nyi é bang‡ lé le, simsaq hkyo é danglù lé hko kyo bê nghut ri. ¹⁸ Hkásu mù gá le, nga-nhúng í myú gi, Yhang đông mai, Woi-nyí ralhú zâ eq, haú Íwá chyáng wàng rá hkyô dong bê nghut ri.

¹⁹ Hau é yanmai, nungmoq gi, tungbaú pé eq byu bíng pé a nghut lô é za, Garai é byu pé eq rahá, mingbyu wui eq yhum-byu wui chyat nghut bekô nghut lui, ²⁰ haú lagyo pé eq myiqhtoí pé, hí tô é apùn awang htoq má xuq tô é bang chyat nghut akó; Hkrisduq Yesuq yhang, haú má é ahkyak é htungchyún luqgok dut bê nghut ri. ²¹ Yhang má, wahpang lhum gón xoq lhúm bùm é nghut mù, haú Yhumsing má chyoiyung noqkuq yhum ralhú dut lò bê nghut ri. ²² Woi-nyí đông mai, Garai Gasang nyi rá jang dut rá matú, nungmoq le, Yhang má, wahpang su tsuq é chôm hai nyi bùm bekô nghut ri.

3

Poluq, Tungbaú Pê É Tará Hkô Sará

¹ Haú su nghut mù, Hkrisduq Yesuq é hkyô lé, nungmoq tungbaú pé chyáng hko kyô é yanmai, htongbyu dut sù, ngò Poluq gi, nungmoq é matú kyúdung byi lhê.

² Nungmoq lé dojaú rá é matú, ngo lé byi tô é Garai Gasâng jeju ayá shí lé, nungmoq gè gè wó gyò wú bekô rá nghut lhê. ³ Haú gi, hí hkún, ngò, tot é đông kê tô wú bê eq rajung za, haú záu tô é hkyô lé, shing-rán đông ngo lé sé nhang é nghut ri. ⁴ Haú hkyô lé, nungmoq nghap wú é hkún, Hkrisduq eq sêng é záu tô é hkyô, ngò rago sé é lé, nungmoq wó sé kó rá nghut lhê. ⁵ Haú lé, lai lò bê ipyat pé má é byu pé lé a sé nhang é nghut kôlhang, ahkuí gi, Garai Gasâng é chyoiyung é, lagyo pé eq myiqhtoí pé lé, haú Woi-nyí eq hpông shít bê nghut ri. ⁶ Záu tô é hkyô haú gi, gabú danglù đông mai, Hkrisduq Yesuq má, Israelaq byu pé eq rahá, tungbaú pé le, hkúng xoq bang wó dut lui, gungdu ralhúm é gungsho showui showang pé chyat dut é

* 2:14 I myú gá é gi, Israelaq byu pé eq tungbaú pé lé gá lhê.

† 2:17 Wê gâng nyi é bang gá é gi, tungbaú pé lé gá lhê.

‡ 2:17 Chyâng htep nyi é bang gá é gi, Israelaq byu pé lé gá lhê.

eq, danggidiq byi tô é lé wó chôm hkam yu é bang dut é hkyô nghut ri.

⁷ Yhâng é hpungwup a-tsam mai, ngo lé byi tô é Garai Gasâng jeju chyunghuq é yanmai, ngò gi, gabú danglù shí tai rá dui-nhâng zoshâng dut é nghut lhê. ⁸ Ngò gi, haù Garai Gasâng é byu pé mâ é tiq dik sù htoq má lhâng je tiq sù nghut kôlhâng, haù Hkrisduq é a ung htoq tai é wó sùt hkyô lé, tûngbaù pé chyâng hko kyo rá matú le, ⁹ haù lhunglhâng lé hpan é Garai Gasang má, lai lò bê ipyat pé má zaù tô é, zaù tô é hkyô haù lé hkâsu kut tô é lé, yuq hkangmó lé tai sán kyo rá matú le, jeju shí, ngo lé byi bê nghut ri. ¹⁰ Haù gi, nga-nhúng é Yhumsing Hkrisduq Yesuq má lhoq pán bê nghut é, Yhang ahtum abyuq myit hpyit tò bê eq rajung za, ¹¹ haù Garai Gasâng é hpaqchyí mó góng lé, noqkuq hpúng dông mauhkúng htoq tsáng myhâng mà é uphkâng bang eq ahkáng ayá wó bang lé, ahkuí sé nhâng rá matú nghut lhê. ¹² Nga-nhúng gi, nga-nhúng é Yhumsing Hkrisduq Yesuq eq rading ralhú za nghut é yanmai le, Yhang lé lumjing é yanmai le, Garai Gasang chyâng, wám é myit eq a gyuq a wám é myit eq wó htep ê é nghut lhê. ¹³ Haù mù luí, ngò, nungmoq lé dúng tóngbân nau é gi, nungmoq é matú, ngò wuihke jamjau hui zô é yanmai, nungmoq i-myt hkâgyui kó; haù gi, nungmoq é matú akyú bò rá hkyô nghut lhê.

Ehpesu Myuq Byu Pé Lé Kyûdung Byí É Hkyô

¹⁴ Haù pé é yanmai, ngò gi, haù Îwâ é hí má hkyihput htuq lui kyûdung é nghut lhê. ¹⁵ Mauhkúng eq myigúng htoq mà é Yhâng é ikun byù lhunglhâng gi, Yhâng chyâng mai mying wó yu é chyat nghut lhê. ¹⁶ Nungmoq é lumjing myit mai, nungmoq é i-myt unghkaù má Hkrisduq wó nyi nyi sháng gaq nghù, ¹⁷ Yhang é hpungwup shing kang bó é agùn agó wó sùt é mai, nungmoq é i-myt unghkaù mà é sù lé, Yhâng é Woi-nyí dông, hpungwup a-tsâm eq wum-o lhoq king byi rá matú, ngò kyûdung byi lhê. Hau htoq agó, nungmoq gi, chyitdap myit má amyit chin to lui, awang hi to mù, ¹⁸ sân-yúng bang eq rahá, hau é apyí, a-tsúng, myhâng, nik, hkâ-i nghut é lé, rago wó sé kôluí, ¹⁹ Garai Gasâng é gumjup é hkyô lhunglhâng èq wó lhoq gumjup yù kó sháng gaq nghù, sè é nyan htoq má gyaú é Hkrisduq é chyitdap hkyô lé, nungmoq wó sé rá matú, ngò kyûdung byi lhê.

²⁰ Ahkuí, nga-nhúng é hkaù má mù zui nyi é, Yhâng é wum-o a-tsâm é yanmai, nga-nhúng dúng é banshoq eq myit é hkyô lhunglhâng htoq je wó kut byí é Su chyâng, ²¹ haù noqkuq hpúng é yanmai le, Hkrisduq Yesuq é yanmai le, pyat pyat zaí zaí,

ahtum abyuq, hpungwup shing kang rú bó nyi sháng gaq ô! Amen.

4

Hkrisduq É Gungdu Má Rading Ralhú Za

¹ Haù mù luí, nungmoq gi, nungmoq lé wut yù bê nghut mù, wut yu é hkyô eq gingdán é dông asak duì keq nghù, haù Yhumsing é yanmai, htóng lúng sù ngò Poluq gi, nungmoq lé lhoq pun lhoq kyíng kat lhê. ² Hkyô hkat hkangmó má i-myt lhoq nyhum é eq i-myt nú-nhâm nyi keq; myit hing é eq chyitdap myit mai rayuq eq rayuq hkam jân lhúm nyi keq. ³ Haù Woi-nyí eq byí é myit hui hkyô lé, nguingón hkyô dông mai châng nyi rá matú, wó dut é í shikut nyi keq. ⁴ Nungmoq gi, wut yù hui kó é hkùn, myit myoqbyù hkyô rashut za wut yù hui bekò nghut é eq rajung za, gungdu ralhú eq Woi-nyí ralhú za nghut nyi ri. ⁵ Yhumsing rayuq za, lumjing hkyô rahkat za, bapisma ralhú za nghut nyi ri. ⁶ Banshoq bâng é Îwa nghut sù Garai Gasang le, rayuq za nghut nyi ri; Yhang gi, banshoq bâng é ahtoq má nghut lui, lhunglhâng dông mai mù kut é eq lhunglhâng é ahkaù má lúng nyí sù nghut ri.

⁷ Nghut kôlhâng, nga-nhúng yuq hkangmó gi, jeju chyunghuq lé, Hkrisduq mai ké byí é dông wó yu é nghut lhê. ⁸ Hau é yanmai, "Yhang gi, myhang é jowò shut doq ló é hkùn, shúm zung é bang lé gi, shuí chùng mù, byu pé lé gi, chyunghuq tsiung gam byí ri."⁹

ga, Chyúmdang má tai tô é nghut lhê. ⁹ Haù "doq ló" gâ é lichyúm gi, myigúng é a-o tsáng má le, Yhang gyó jé bê nghut lhê, gá nau é a nghut lhi? ¹⁰ Haù gyó lé é Sù gi, junghkang jungmó lé lhoq bying jup rá matú, mauhkúng banshoq é ahtoq má doq ló é Sù yhang nghut lhê. ¹¹ Yhang gi, ram lé, lagyó pé, ram-ám lé, myiqhtoi pé, ram-ám lé, gabú danglù hko kyo rá bang, ram-ám lé, hpúng-up pé eq sará pé kut tsiung byí to bê nghut ri. ¹² Haù bang gi, Garai Gasâng é byu pé lé wùn wang âng é muzó pé é matú, hen lajâng é bang nghut ri. Hau hkùn sheq, Hkrisduq é gungdu gi, ¹³ haù lumjing hkyô eq Garai Gasâng é Yhangzo lé sè é hkyô má, nga-nhúng banshoq bang rading ralhú za wó dut mù, kô ding bang dut lui, Hkrisduq é gumjup é isâm banshoq lé wó yu é hkùn jé shoq, wó kô jat nyi rá nghut lhê.

¹⁴ Haù mù, nga-nhúng gi, wuibaù pé èq hí shut htâng shut bat myhú é su dut é eq, byu pé é agé ashop é eq haq dâ é mhoq hpyoq hpaqchyí pé eq mhoqshít hkyô laidun hkangmó èq, shí shut hé shut mut tâng é su dut é lé hui zô é zoshâng jup

su a nghut lô é za, ¹⁵ chyyitdap myit tai tengmán é dang lé tai nyi jáng, Hkrisduq nghu é ulhum má hkyô hkangmô kô myhang lò râ nghut lhê. ¹⁶ Yhang đông mai, gungdu gón gi, ralhumm eq ralhumm htuqbâng é gungsho showui showang pé lé xoq byi to bê nghut mù, gungsho showui showang haú pé gi, yhumsing é muzô lé zui sai nyi é nghut jáng, gungdu haú gi, chyyitdap myit má, yhanggung yhang kô lò myhang lò râ nghut lhê.

Byù Sik Đông Asak Dui Râ Hkyô

¹⁷ Haú mù luí, haú Yhumsing é ahko hákang mai ngò nungmoq lé tai nau é hkyô gi, haú tungbau pé gi, akyû a bo é lé myit mù, asak dui kô é su, nungmoq gi, hkâkut kô. ¹⁸ Yhangmoq gi, sê gyô é nyan chut byuq bekô nghut é eq yhangmoq myit htan nyi kô é nghut mù, hai le a sé kô é yanmai, Garai Gasang byi é asak eq wê gâng byuq bekô nghut ri. ¹⁹ Yhangmoq gi, gyuq hoq hkyô a bo byuq lò kô é yanmai, myoqnoq myit đông a sansêng é hkyô jung hkangmô lé je wó kut xoq nyi shoq ga, yhumsing gung lé, gungsho ô nau gadaú é hkyô má ap pyám bekô nghut ri.

²⁰ Nungmoq kúm gi, Hkrisduq é hkyô lé haú đông mhoq yû kô é a nghut. ²¹ Nungmoq gi, Yesuq chyáng má é tengmán hkyô đông, Yhâng é hkyô lé wó gyô wú é eq mhoq yu wú bekô nghut lhê. ²² Haú mù, nungmoq gi, hí hpyang lhê é nungmoq é nyi yap sâmlai nghut é, ô nau gadaú luí, yhumsing gung yhumsing mhaú pyám é đông htên byoq lò nyi é nungmoq é byù xau lé tò pyám rá matú mhoq yû bê eq rajung za, ²³ nungmoq é i-myit lé asik htaí pyám nhâng keq; ²⁴ hau htoq agó, nungmoq gi, tengmán é eq sêng é dingmán hkyô eq chyoiyung hkyô má, Garai Gasang eq dù shoq hpan to hui bê nghut é byù sik lé, yu wut to keq.

²⁵ Haú mù, nga-nhung banshoq bang gi, gungdu ralhumm é gungsho showui showang pé chyat nghut é yanmai, nungmoq yuq hkangmô gi, mhaú é hkyô lé tô pyám luí, yhumsing é chyangnâm má é sù lé, tengmán é dang tai ra râ nghut lhê. ²⁶ "Nungmoq nhikjum yô é hkûn, mara hkâkut kô."^{*} nungmoq gi, bui wàng shoq nhikjum hkâyô nyi kô. ²⁷ Nat Tsadán lé le, jowô hkâyô kô. ²⁸ Hkâu sù gi, a dum hkau lo sháng gaq; rá nyi é bang lé, rajung jung wó gâm byi shoq, yhumsing é loq èq akyû bo é hkyô pé lé kut nyi luí, muzô zui shikut ra râ nghut lhê.

²⁹ Nungmoq é nhut mai agê agau é dang hai le hkâhtoq nhâng kô; wó gyô é bang akyû bò shoq, yhangmoq rá tô é má cháng luí, haú bang kô lam lò râ dang za tai keq. ³⁰ Haú

hkyi yù râ buinyi é matú, dizik đông nungmoq lé tap to byi é Garai Gasang é Chyoiyung Woi-nyi lé hkâhoq yón kó. ³¹ Haú myit tot é, nhikjum yô é, nhik-yô é, byoq lhum byoq cheq é eq lumù gansang é, agê agau é hkyô pé banshoq lé, nungmoq tô pyám keq. ³² Nungmoq gi, rayuq eq rayuq, ge é hkyô eq shogyo nhikmyin é hkyô tân shit lhum luí, Garai Gasang gi, Hkrisduq má, nungmoq lé mara hkyut byi é su, nungmoq yhangchang le mara hkyut byi lhum nyi keq.

5

¹ Haú mù, nungmoq gi, chyyitdap dik é zoshâng wui nghut é yanmai, Garai Gasang lé alik yu é bang kut keq. ² Hkrisduq gi, Yhanggung lé namgón jung hkungga eq shigu hkungga đông, nga-nhung é matú Garai Gasang chyáng Yhanggung yhang ap byi pyám shoq, nga-nhung lé chyyitdap é su, nungmoq lé chyyitdap myit èq asak dui nyi keq.

³ Hau htoq agó, ashop é đông gungsho zùm yap é hkyô, a sansêng é hkyô hkangmô eq myoqnoq é hkyô pé lé, nungmoq tai lhang hkâtai kô; hkâsu mù gà le, nungmoq gi, Garai Gasang é chyoiyung byu pé nghut lhê. ⁴ Haú eq rajung za, a tai gíng é, ahoq ahí dang, dangsôm eq hkunchuq đông gyá é dang pé lé a tai é za, jeju hkya-on dang za tai nyi keq. ⁵ Hkâsu mù gà le, ashop é đông gungsho zùm yap é hkyô kut shut sù, a sansêng é sù eq hparà noq é sù nghut é myoqnoq sù ô yuq nghut kôlhang, Hkrisduq eq Garai Gasang é mingdán má muizè a wó é hkyô lé, nungmoq sê nyi keq. ⁶ Ô yuq nghut kôle, dangsôm* đông mai nungmoq lé a wó mhaú kô sháng gaq; hkâsu mù gà le, haú hkyô pé é yanmai, Garai Gasang é nhikmo-yo hkyô gi, haú jino a gyo bâng é ahoq má je rá nghut lhê. ⁷ Haú mù luí, haú bâng chyáng hkâbo wang lom kô.

⁸ Hkâsu mù gà le, nungmoq gi, hí hpyang mauchut tuq dut é bang nghut lhê; nghut kôlhang, ahkuí gi, haú Yhumsing má maubó pé nghut bekô nghut ri. ⁹ Haú Yhumsing ô nau é hkyô hai nghut é lé ho htoq yû mù, maubó é yhangzô pé đông asak dui keq. ¹⁰ Hkâsu mù gà le, haú maubó é ashí gi, ge é hkyô banshoq, dingmán é hkyô eq tengmán hkyô chyat nghut ri. ¹¹ Haú ashí a zui é mauchut tuq muzô má a bo wang lom é za, yhangmoq é mara lé tân shit keq. ¹² Hkâsu mù gà le, haú jino a gyo bang haq zaú kut é hkyô lé gi, tai htoq lé lhang hoq hpo nghut ri. ¹³ Nghut kôlhang, jungkhang jungmô lé, haú maubó èq tân shit jáng gi, wó byu-myang é chyat dut rá nghut lhê. ¹⁴ Hkâsu mù gà le,

* 4:26 Hkya-on 4:4

* 5:6 Dangsom gà é gi, Garai Gasang é nhikmo-yo hkyô a je rá ga tai é dang nghut lhê.

junghkang jungmó lé byu-myàng nhang é gi, maubó nghut ri. Hau é yanmai, "Yhup ngón nyi sù ê, toq aq, haù shi é mai dui toq aq hkoi; haù jáng, Hkrisduq gi, nang lé duqbó byi rà nghut lhê."[†] ga lui tai tó é nghut lhê.

¹⁵ Hau mù lui, nungmoq hkásu kut asak dui é hkyô má gyai sidiq nyi keq; hpaqchyí a bò bang su a nghut é za, hpaqchyí bò bang su kut nyi keq. ¹⁶ Buinyí ahkyíng shí pé gi, agé ashop é yanmai, wó é ahko ahkáng banshoq lé ge dik é dōng chung jai keq. ¹⁷ Hau é yanmai, byu ngok pé a dut é za, haù Yhumsing ô nau é hkyô gi, haù nghut é lé, sé gyô yu nyi keq. ¹⁸ Haù achaq achyut é yubak hkyô lhoq htoq é í lé hkâshuq wut kó; Woi-nyí lé kúm byíng nhang nyi keq. ¹⁹ Nungmoq gi, hkya-on kungtôn dang dōng le, hkya-on mahkôn dang dōng le, woi-nyí eq séng é mahkôn dōng le, rayuq eq rayuq dang nyo lhum lui, nungmoq é i-myt unghkaú mai, haù Yhumsing lé mahkôn hkôn mù, lhoqngón nyi keq. ²⁰ Nga-nhúng é Yhumsing Yesuq Hkrisduq é myíng lé lang lui, jung hkangmó é matú, haù Íwa Garai Gasang lé, hkâ-nhám le jeju hkya-ôn nyi keq.

²¹ Hkrisduq lé hkungga hpaupat é myit èq, rayuq eq rayuq hpaupat lhũm nyi keq.

Myi Eq Làng

²² Ikun myhí pé ê, haù Yhumsing uphkan é dōng chāng é su, nungmoq é ikun hpô pé uphkan é dōng chāng nyi keq. ²³ Hkásu mù gà le, Hkrisduq gi, haù noqkuq hpúng é ulhum nghut é su, haù ikun hpô gi, ikun myhí é ulhum nghut nyi ri; Hkrisduq gi, haù Yhàng gungdu nghut é noqkuq hpúng lé hkyi yù Sù nghut ri. ²⁴ Haù noqkuq hpúng gi, Hkrisduq uphkan é dōng chāng é su, ikun myhí pé le, hkyô hkat hkangmó má, yhangmoq é ikun hpô pé uphkan é dōng chāng nyi rà lhê.

²⁵ Ikun hpô pé ê, Hkrisduq gi, haù noqkuq hpúng lé chyitdap lui, hau é matú Yhànggung lé Yhang ap pyám é su, nungmoq é ikun myhí pé lé chyitdap nyi keq. ²⁶ Yhang haù su kut é gi, haù noqkuq hpúng lé, mung-dang dōng wui má chí pyám lui, lhoq sân-yúng yù rà eq, ²⁷ haù noqkuq hpúng gi, agé agau é eq a-ká akōng é hkyô haù le a bo é za, mara hũn rà hkyô a bo é eq chyoiyúng é, hpungwup shingkan bo é noqkuq hpúng dōng, Yhànggung lé wó ap byi rà matú nghut lhê. ²⁸ Haù eq rajung za, ikun hpô pé gi, yhangmoq é ikun myhí pé lé, yhumsing gungdu lé su chyitdap rà dut lhê. Yhumsing é ikun myhí lé chyitdap é sù gi, yhumsing gung lé le, chyitdap é sù nghut bê. ²⁹ Ó yuq le, yhumsing gung lé a chyitdap a kut é za, Hkrisduq gi, haù noqkuq hpúng lé kut byi

nyi é su, yhumsing gung lé byi tso byi huq lui, rago wú zúng nyi é nghut lhê. ³⁰ Hkásu mù gà le, nga-nhúng gi, Yhàng é gungdú é gungsho showui showang pé chyat nghut lhê. ³¹ Haù mù, "Hau é yanmai, yuqgè gi, ínu íwa eq gang lui, yhangmyi eq zùm-yap mù, yhangnhik í yuq gi, gungsho ralhum za dut kó rà nghut lhê."[✧] gà tô ri. ³² Haù hkyô gi, gyai yhang zaú tó é hkyô nghut ri. Nghut kólhang, ngò gi, haù Hkrisduq é hkyô eq noqkuq hpúng é hkyô lé tai nyi é nghut lhê. ³³ Haù mù, nungmoq yuq hkangmó gi, yhumsing gung lé chyitdap é su, yhumsing é ikun myhí lé le chyitdap rà dut lhê; haù ikun myhí le, yhàng é ikun hpô lé hkungga rà dut lhê.

6

Zo Wuí Eq Mó Wui É Hkyô

¹ Zoshàng wui é, haù Yhumsing má, nungmoq é mó wui é jino gyo keq; hkásu mù gà le, haù gi, kut gíng é hkyô nghut ri. ² "Náng é ínu íwa lé hkungga aq. ³ Haù jáng, nang, nyi ngón yuqyô mù, myidám htoq má náng é asak chyungxe hing nyi rà nghut lhê."[✧] gà é dang gi, danggidíq lom é sâng-hí lhum hkunmó nghut ri.

⁴ Íwa pé ê, nungmoq é zo wui lé nhikjum a lhoq yô é za, haù Yhumsing é mhoq kyo hkyô eq mhoqshit lhoq pun hkyô dōng yhangmoq lé baù kô nyi keq.

Jùn Pé Eq Junsing Pé É Hkyô

⁵ Jùn pé ê, nungmoq gi, Hkrisduq é jino gyô é su, yuq hkunggá é eq lhumsuz é myit mai, nungmoq é myidám htoq má é junsing pé é jino gyo keq. ⁶ Nungmoq gi, yhangmoq é hí má za, myoqdong ho é dōng kut é a nghut é za, Hkrisduq é jùn pé su, Garai Gasang ô nau é hkyô lé, nungmoq é i-myt unghkaú mai chāng kut nyi keq. ⁷ Byú lé za dojaú é dōng a nghut é za, haù Yhumsing lé dojaú nyi é dōng le, shirōng myit èq dojaú nyi keq. ⁸ Hkásu mù gà le, jùn nghut nghut, luthkyô wó sù nghut nghut, ge é hkyô kut nyi é nghut jáng, haù Yhumsing gi, yuq hkangmó lé shigyau rà nghut é lé, nungmoq sê nyi lhê.

⁹ Junsing pé ê, nungmoq le, nungmoq é jùn pé lé haù eq rajung za kut byi nyi keq. Yhangmoq lé hkákyuq zo kó; nungmoq sê é eq rajung za, yhangmoq eq nungmoq é Yhumsing hpô gi, mauhkung htoq má nyi é nghut lui, Yhang gi, myoqdong hkyin é hkyô a bo é sù nghut lhê.

Garai Gasang É Gyè Hking

¹⁰ Ló htàng má, tai nau é hkyô gi, haù Yhumsing eq Yhàng é hpungwup a-tsam mó má wum-o bo nyi keq. ¹¹ Haù nat Tsadán

[†] 5:14 Dang ngho shí gi, hí lhê é noqkuq hpúng pé tai gyó lo é dang nghut lhê. ✧ 5:31 Apùn 2:24 ✧ 6:3 Htoq Ló 20:12

wá dâ é hpaqchyí pé lé, nungmoq wó he-
ngik pyám kó sháng gaq, haù Garai Gasâng
é gyè hking banshoq lé wut to keq. ¹² Hkâsu
mù gâ le, nga-nhúng gi, gungsho eq sui lé
htuq htíng é bang a nghut é za, haù uphkâng
bang, ahkáng ayá wó bang, mauchut tuq
dut é mingkan shi é a-tsam pé eq mauhkûng
htoq tsáng myhâng mã é agè ashop é byò
eq sêng é wum-o pé lé, htuq htíng é bang
ru nghut lhê. ¹³ Haù mù luí, Garai Gasâng
é gyè hking banshoq lé wut to keq; haù
hkûn sheq, nungmoq gi, agè ashop hkyô jé é
buinyi má, yhumsing jowò mã wó yap gíng
to mù, hkyô hkat hkangmó lé ban kut jáng,
wó yap gíng títng nyi kó rá nghut lhê. ¹⁴ Haù
mù, nungmoq é hpyidum mã tengmán hkyô
hpyihit hit mù, dingmán hkyô wànggò-long
lé gò luí, ¹⁵ nungmoq é hkyi má gi, haù
simsaq hkyô byi é gabú danglù hkò rá rì rì
kut to mù, gíng gíng yap nyi keq. ¹⁶ Haù
htoq agó, haù agè ashop su é myiduoq é
myoshi lhunglháng lé wó sat ung pyám rá
matú, lumjítng hkyô nghu é golong lé chung
to keq. ¹⁷ Hkyi yù hkyô shamtoq muq
lé tsúng to luí, Garai Gasâng é mungdang
nghut é, haù Woi-nyí é shâm lé wun chûng
keq. ¹⁸ Ahkyítng hkangmó mã, kyúdung dang
eq dúng tóngbán é dang ajung jítng èq, haù
Woi-nyí mã kyúdung nyi luí, machya nyi
uchyang, sân-yúng bang banshoq é matú,
hkâ-nhám le, xoq xoq kyúdung byi nyi keq.

¹⁹ Haù gabú danglù é yanmai, shamtoq-
tui hut huí é lagyo rayuq ngò nghut nyi
kólhang, haù gabú danglù nghut é záu tô é
hkyô lé, a gyuoq a wàm wó tái kyo luí, ²⁰ ngò
tái rá dut é lé, a gyuoq a wàm wó tái sân kyo
shoq, ngá nhut hpóng hkangmó, ngò tái rá
mungdang pé lé byi sháng gaq, ngá é matú
le, kyú bo dung byi nyi keq.

Shi-kyám Dang

²¹ Haù Yhumsing mã, chyitdap é gumang
eq lhumzuí é dui-nhâng zoshâng nghut sù,
Tuhkiku gi, nungmoq lé jung hkangmó tái
kyo rá nghut luí, ngò hkâsu nghut nyi é hkyô
eq haì kut nyi é hkyô lé, nungmoq wó sé
kó rá nghut lhê. ²² Ngamoq hkâsu nghut
nyi é hkyô lé, nungmoq wó sé rá eq, yhang,
nungmoq lé myit wum wó byi rá matú za
myit myoqbyù luí, yhang lé, ngò, nungmoq
chyáng nhang kat é nghut lhê.

²³ Íwa Garai Gasang eq Yhumsing Yesuq
Hkrisduq chyáng mã é lumjítng hkyô mã bo
é chyitdap myit eq nguínón hkyô gi, haù
gumang wui chyáng ru joq nyí sháng gaq
ô! ²⁴ A dat htúm é chyitdap myit mai, nga-
nhúng é Yhumsing Yesuq Hkrisduq lé chyit-
dap é lhunglhâng bang chyáng, Garaí jeju gi,
ru joq nyí sháng gaq ô!

HPILIPÍ Pê Chyáng Hun Kat é Laiká (Philippians)

¹ Hkrisduq Yesuq é jùn nhik, Poluq eq Timohti gi, Hpilipi wà mó má nyi é, Yesuq Hkrisduq má sâ-n-yung bang lunglhang eq, hpung-up, hpungte pé lé, dang kyô kat lhê.

² Nga-nhùng é Iwa Garai Gasang eq Yhumsing Yesuq Hkrisduq chyáng má é jeju eq nguingón hkyô gi, nungmoq chyáng ru joq nyi sháng gaq ô.

Jeju Hkya-ôn É Hkyô

³ Ngò gi, nungmoq lé myit bün kat hkangmó, ngá é Garai Gasang lé jeju hkya-ôn nyi lhê. ⁴ Ngò gi, kyüdung hkangmó, hkâ-nhâm le nungmoq banshoq bâng é matú gabú myit eq dung byi nyi lhê. ⁵ Hkâsu mù gà le, nungmoq gi, sâng-hi nyi mai ahkuí jé shoq, gabú danglù má ngò eq chôm züm yap nyi é yanmai nghut lhê. ⁶ Haü nungmoq má ge é muzó kut hi é sù Garai Gasang gi, Yesuq Hkrisduq é buinyi jé shoq muzó haü lé lhoq pán rá nghut lhê ngü, ngò hkyak myit lum tô lhê.

⁷ Nungmoq banshoq bang gi, ngá é i-myyit má bo to bê bang nghut é yanmai, nungmoq banshoq bang eq séng lui, ngò shí dông myit nyi é gi, gíng lhê; hkâsu mù gà le, ngò kyum hut huí tô é u lé le, haü gabú danglù hkyô lé tai hung lui, lhoq gíng é u lé le, nungmoq gi, ngò eq rahá Garai Gasang jeju chôm hkâm yu é bang nghut lhê. ⁸ Hkrisduq Yesuq é chyitdap myit dông, nungmoq banshoq bang lé, ngò hkâ-í myit chyit nyi é hkyô lé, Garai Gasang gi, ngá é saksé nghut lhê.

⁹ Hau htoq agó, nungmoq gi, je ge é hkyô lé dat gam hkoq mù, Hkrisduq é buinyi má sanséng lui mara a bo é za, ¹⁰ Garai Gasang é hpungwup shing kang eq hkya-on kungtón hkyo é matú, Yesuq Hkrisduq é yanmai lo é dingmân hkyo é ashí wó bying nyi sháng gaq ngü le; ¹¹ nungmoq é chyitdap myit gi, tengmán é hpaqchyi eq wó sê é nyan banshoq má je riyhang kô jat lò sháng gaq ngü le, ngò kyüdüng nyi lhê.

Dui Nyi Le Gi, Hkrisduq É Matú

¹² Gumang wüi ê, ahkuí ngò nungmoq lé sé nhâng nau é hkyô gi, ngò má hai dut lai lò bê hkyô pé gi, ge gè yhang gabú danglù ríng jat lò rá matú dut lò bê nghut ri. ¹³ Hau é yanmai, haü hkohkâm-wâng zúng é lunglhang bang eq gotú banshoq bâng é hí má, Hkrisduq é yanmai ngò kyum hut huí é hkyô, de de dut htoq bê nghut ri. ¹⁴ Hau htoq agó, ngò htóng lúng é yanmai, haü Yhumsing Yesuq má gumang wüi nghut é myo mi-myo gi, myit wum wó yú kômù, Garai Gasang

é mungdang lé, je riyhang a gyuq a kyum wám hko kyo bekó nghut ri.

¹⁵ Gè gè yhang byü ra-am gi, Hkrisduq é hkyô lé manon é myit eq lú lhum bat zik é myit mai hko kyô nyi bum akò. Nghut kôlháng, byü ra-am gi, ge é myit mai hko kyô bum akò nghut ri. ¹⁶ Ge é myit mai hko é bang gi, gabú danglù lé hung rá matú ngo lé hkyin é hkyô lé, yhangmoq sé kômù, chyitdap myit eq hko kyô é bang nghut akò.

¹⁷ Haü góbang chyaü gi, sansêng é i-myyit eq a nghut é za, ngò kyum wut é hkyô má wuñke jamjau jat byi rá matú, myit nyi büm kô é nghut mù lui, Hkrisduq é hkyô lé yhumsing é wuizat é dông za, hko tai nyi bum akò nghut ri. ¹⁸ Nghut kôlháng, haü gi, hai rá ri lú? Yhumsing wuizat é dông hko é nghut nghut, tengmán é dông hko é nghut nghut, hkyô hkat hkangmó má Hkrisduq é hkyô lé hko pyo kat é nghut mù lui, ngò gi, hau é yanmai, gabú nyi lhê.

Gè gè yhang, ru gabú nyi shirá nghut lhê. ¹⁹ Hkâsu mù gà le, nungmoq kyüdung byi é eq Yesuq Hkrisduq é Woi-nyi garúm é yanmai, ngò má dut lai lò bê hkyô gi, ngò wó luthkyó dut rá nghut é lé ngò sê lhê. ²⁰ Ngò myit láng tô é eq myit myoqbyü tô é má, ngò gi, hoq nó hai a rá é za, hí hkun lhê su, ahkuí le, dui nyi kôlháng, shi byuq kôlháng, gyuq kyum myit a bo é hkyô lé wó yú mù lui, Hkrisduq gi, ngá gúng má hkya-on waq toq é huí rá nghut lhê. ²¹ Hkâsu mù gà le, ngò, asak dui nyi le gi, Hkrisduq é matú, shí jàng gi, ngá e amyat nghut ri. ²² Nghut kôlháng, ngò gi, gungsho má rü dui nyi mù, ngò kut é muzó má ashí zui lo é nghut le gi, hká lhum lé sheq hkyin yu le gè rá lú? ²³ Ngò gi, hkyô í hkat gyoro má hká hpyang le a hkap dut tô ri; shi lò lui Hkrisduq eq rahá nyi rá lé gi, ngò ô nau ri, hkâsu mù gà le, haü gi, je ge é hkyô nghut ri. ²⁴ Nghut kôlháng, ngò gungsho má dui nyi le gi, nungmoq é matú akyü je bò rá nghut lhê. ²⁵ Haü mù, ngò gi, shí hkyô lé hkyak myit lum to lui, lumjáng hkyô má nungmoq kô jat lo é eq gabú nyi rá matú, nyi gyó lui, nungmoq lunglhang bang eq nyi nyi rá hkyô lé, ngò sê lhê. ²⁶ Haü mù lui, ngò nungmoq chyáng dum jé lé é hkün, ngá é yanmai, Hkrisduq Yesuq má nungmoq é gabú hkyô gi, je riyhang jat lò rá nghut lhê.

²⁷ Hai wá dut kôlháng, nungmoq gi, Hkrisduq é gabú danglù eq gingdán é dông nyiyap keq. Haü jàng, ngò, nungmoq chyáng jé mù huí lhum é hkün nghut nghut, we gang lhum tô é hkün nghut nghut, nungmoq gi, woi-nyi ralhum má za yap gíng to mù, haü gabú danglù lé lumjáng hkyô má, i-myyit rahkat zâ eq shikut nyi kô é hkyô lé le; ²⁸ nungmoq gi, hká hkyô má nghut kôlháng, gyè pé eq kyuq zô é lé a gyuq lò kô é hkyô lé le, ngò sé rá nghut lhê. Haü gi, yhangmoq é matú

htên byoq hui rã kumlhá dut lò bê nghut lhê; nghut kôlhang, nungmoq gi, hkyi yù hui rã nghut lhê. Haù gi, Garai Gasang kut é nghut lhê. ²⁹ Hkãsu mù gà le, Hkrisduq má wó lumjng rã é jeju za a nghut, Yhang é matú wũhke jamjau hui rã jeju le, nungmoq hkam yù bekô nghut ri. ³⁰ Haù gi, hí hpyang nungmoq ngò má myang wú é eq, ahkuí nungmoq ngá é hkyô lé wó gyô wú é, ngò hui zô é jamjau hkyô eq rajung za nghut nyi ri.

2

Yesuq, Myit Lhoq Nyhum É Hkyô

¹ Hkrisduq eq rading ralhum za nghut nyi é yanmai, myit wum byi é hkyô, Yhâng é chyyitdap myit mai nhik tng é hkyô, Woi-nyi eq zùm yap é hkyô, nú-nhâm é myit eq shogyo nhikmyin é hkyô rajung jung lé, nungmoq wó yu é nghut le gi, ² nungmoq gi, haù i-myit hui é hkyô rahkat za, chyyitdap myit rajung za, myit nhikhum eq myit é hkyô má ralhum za kut nyi é dng, ngá é gabú hkyô lé, bying jup nhâng keq. ³ Yhumsing é wuizat é dng le, akôm gyáng pyâm é dng le, haù le a kut é za, myit lhoq nyhum nyi mù, góbang gi, nungmoq htoq má je gyaù lhê nghú myit yu nyi keq. ⁴ Nungmoq yuq hkangmó gi, yhumsing eq sêng é lé za a nghut, góbang eq sêng é lé le, myit byi rã lhê.

⁵ Hkrisduq Yesuq má bo é myit yhang, nungmoq chyáng bò rà dut lhê.

⁶ Yhang gi, Garai Gasang su roq za nghut nyi kôlhang, Garai Gasang eq rawuí za nghut é hkyô lé lú zing nyi rã matú a myit é za,

⁷ Yhânggùng lé lhoq gôm pyám luí, dui-nhâng zôshang é gunghkyâng lé yu chùng mù, xângzo byù gùng roq lé dut bê nghut ri.

⁸ Xângzo byù rayuq dng nghut nyi é hkùn, Yhânggùng lé Yhang lhoq nyhum pyám luí,

haù tapzing htoq má lháng tap sat pyâm é hui shoq jino gyô ri.

⁹ Haù mù luí, Garai Gasang gi, Yesuq é mying lé mauhkung htoq má é hkyihput, myidàm htoq má é hkyihput eq moming má é hkyihput hkangmó htuq pai luí,

¹⁰ haù Íwa Garai Gasang é hpungwup shingkâng é matú, Yesuq Hkrisduq gi, Yhumsing nghut lhê nghú,

nhut shô hkangmó yin yù sháng gaq ga,

¹¹ myhang htâng é jowò má Yhang lé lhoq toq tô é eq, mying lhunglhâng é htoq má gyaù é mying haù,

Yhang lé byi to bê nghut ri.

Kyi Pé Su Duqbó Nyi Rã Hkyô

¹² Haù mù luí, ngò chyyitdap é luzúm wuí é, nungmoq gi, hkã-nhâm le jino gyô nyi é eq rajung za, ngò, nungmoq eq rahá nyi é u lé su za a nghut, ngò eq wê gâng tô é hkùn le, nungmoq hkyi yù hui bê hkyô lé, gyaì yuq hkunggá é myit eq je riyhang lhoq htoq nyi keq. ¹³ Hkãsu mù gà le, Garai Gasang gi, Yhang ô nau é hkyô lé, kut nau rã myit eq wó kut rã hkyô lé nungmoq má lhoq htoq byi nyi é sù nghut lhê.

¹⁴ Haù kut kôlhang, taí put lhùm é dng, haù a nghut jáng, dang jet jet lhùm é dng hkákut kó. ¹⁵ Haù jáng sheq, myit goí é, agè ashop é pyat hkaù má, nungmoq gi, mara a bo é, sãn-yúng é, shut hkyô a bo é, Garai Gasang é yhangzô pé dut kó rã nghut lhê. ¹⁶ Hau htoq agó, nungmoq gi, asak mungdang lé chung htoq uchyang, mauhkung má é kyí pé su, yhangmoq chyáng wó duqbó nyi kó rã nghut lhê. Haù hkùn, ngò gi, ajé a din pyâm é, a nghut jáng, muzó lé akôm a zui pyâm é yanmai, Hkrisduq é buinyi má gumrông jowò wó berã nghut lhê. ¹⁷ Nghut kôlhang, ngò gi, shuq jung hkunggá* ralhum su, nungmoq é lumjng myit mai hongjaù byi é shigu hkungga ahtoq má hut gyún pyâm é hui le lháng, gabú luí, nungmoq banshoq bang eq rahá chôm gabú nyi lhê. ¹⁸ Haù eq rajung za, nungmoq le gabú luí, ngò eq rahá chôm gabú nyi rã dut lhê.

Timohti Eq Epahprodi Nhik Lé Nhang Kat Rã Gà É Hkyô

¹⁹ Ngò gi, nungmoq chyáng Timohti lé hân za wó nhang kat rã lé, haù Yhumsing Yesuq má myit myoqbyu nyi lhê; haù hktún sheq, nungmoq eq sêng é ludang lé ngò wó sé jáng, ngò myit ngon rã nghut lhê. ²⁰ Nungmoq é hkyô lé, yhang su hkyak za ge myit chiq byi é byù gotú rayuq le ngò a wó. ²¹ Hkãsu mù gà le, yuq du jup gi, Yesuq Hkrisduq eq sêng é hkyô lé a nghut é za, ó le ó eq sêng é hkyô lé za ho nyi bum akô nghut ri. ²² Yhang kúm gi, zo rayuq mai íwa lé htuqbàng é su, haù gabú danglù hkyô má ngò eq rahá dojaù é yanmai, yhâng lumluq é hkyô tún shit é lé, nungmoq sé nyi lhê. ²³ Haù mù luí, ngò gi, ngò má hkãsu dut rã lé sé é hkùn yhang, yhang lé nhang kat rã matú ngò myit myoqbyu nyi lhê. ²⁴ Hau htoq agó, hkã-myháng a myáng má, ngò yhang le nungmoq chyáng wó je nhâng rã nghut lhê nghú, haù Yhumsing má hkyak lum nyi lhê.

²⁵ Nghut kôlhang, ngò gi, ngá é gumang hpó le nghut mù, mù zui luzúm eq sarhé luzúm nghut é, ngò rã é hkyô má wú gon byi rã matú nungmoq nhang kat é, nungmoq é gunglik le nghut é sù, Epahprodi lé

* **2:17** Shuq jung hkungga gà é gi, tsibiyiq wing ragóm lé myi htoq má hut pyâm é dng Garai lé gyuq hkunggá é hkyô lé tún shit é nghut lhê. Bun zo shí má shí hkãm é hkyô lé taí nau é nghut lhê.

nungmoq chyáng dum nhang taù kat byi rá lhê nghù, ngò myit hpyit to bê nghut lhê. ²⁶ Hkâsu mù gà le, yang gi, nungmoq lunglhang bang lé myàng nau nyi é za a nghut, yang no é hkyô lé nungmoq wó gyo bekó nghut é yanmai, gyai yang myit myo myit chiq nyi ri. ²⁷ Gè gè yang, yang gi, aluq shoí shí shoq no pyâm é nghut lhê. Nghut kôlhang, Garai Gasang gi, yang lé shogyo nhikmyin yu ri; yang lé baú a nghut, ngò yón htoq yón a dut nyi rá matú, ngo lé le shogyo nhikmyin yu ri. ²⁸ Haù mù lui, yang lé nungmoq lhom dum myàng jáng, nungmoq myang gabú rá matú le, ngò yón é hkyô yom ló byuq rá matú le, yang lé ngò hân hân nhang kat byi nau ri. ²⁹ Nungmoq gi, gyai yang gabú é myit èq, haù Yhumsing má yang lé lhom hkúlum yù mù, yang su dut é bang lé hkungga keq. ³⁰ Hkâsu mù gà le, yang gi, ngo lé nungmoq a wó garúm é hkyô lé garúm rá matú, yhang é asak lé lhang a ha loshoq kut mù, haù Hkrisduq é muzó é yanmai, aluq shoí shoí shí é hui zô ri.

3

Gungsho Má Lumhkaù Rà Hkyô A Joq

¹ Hau htoq agó, ngá é gumang wui è, haù Yhumsing má gabú nyi keq! Rajung zâ é hkyô lé, nungmoq é matú dum puq ká byi rá gi, ngò má wui é hkyô haí a joq, nungmoq é matú akyú dut rá matú sheq ru nghut lhê.

² Haù, hkuí pé lé le; agè ashop é muzó jizó kut é bang lé le; gungsho yâm é bang lé le; sidiq nyi keq.* ³ Hkâsu mù gà le, Garai Gasang é Woi-nyí èq noqkuq é bang, Hkrisduq Yesuq má gabú gumrong nyi é bang, gungsho má a lumhkaù é bang, nga-nhung gi, ahpyo-kuq hpyit hkam yu é bang akying† nghut lhê. ⁴ Ngò kúm gi, gungsho má lumhkaù rá hkyô wó ang sù nghut lhê.

Góbang rayuq yuq, haù gungsho má lumhkaù rá hkyô wó áng lhê ga myit é nghut le gi, ngò gi, je riyhang wó sù nghut lhê. ⁵ Ngò gi, hkú lé é htàng shit nyí nghù rá nyi má ahpyo-kuq hpyit bê sù; Israelaq amyú mã é, Ben-yamyin é awut ashín nghut sù, Hebre byú mã é Hebre rayuq nghut lhê; jep é tará dong ga jang, ngò gi, Hparishe rayuq nghut lhê; ⁶ shirong é hkyô eq séng lui ga jang, ngò gi, haù noqkuq hpúng lé zing-ri wú bê nghut lhê; jep é tará mã é dingmán hkyô eq séng lui ga jang, ngò gi, shut é hkyô a bo wú sù nghut lhê.

⁷ Nghut kôlhang, ngá é amyat nghu é pé lunglhang gi, ahkuí, Hkrisduq é yanmai sùm byuq é chyat nghut bê nghù myit yù bê nghut lhê. ⁸ Hau htoq agó, ngò gi, ngá é

Yhumsing Hkrisduq Yesuq lé wó sê é ko dik é jeju lé sôn kat jang, jung hkangmó lé buzaq dong myit yù bê. Hkâsu mù gà le, lunglhang lé ngò tó pyâm é gi, Yang é yanmai nghut lhê. ⁹ Ngò gi, Hkrisduq lé wó yù rá eq, Yang eq rahá wó nghut nyí rá matú, haù jung hkangmó lé buzaq nghù myit yu pyâm bê. Garai Gasang chyáng mai lo é dingmán hkyô lé ngò jep é tará dong wó ho yu é a nghut, Hkrisduq lé lumjing é yanmai za wó yu é ru nghut lhê; haù gi, lumjing myit mai wó é nghut lhê. ¹⁰ Ngò gi, Hkrisduq lé le, Yang dui toq hkyo é hpungwup a-tsam lé le, Yang hpuzó é hkyô má wó zùm yap rá le le, Yang shí hkâm é hkyô lé wó cháng rá le le, sé nau ri. ¹¹ Haù jang gi, ngò le, shí byuq bê mai dum dui toq é hkyô lé wó myoqbyu rá nghut lhê.

Myit Myoqbyu Tô É Jowò Shut Din Nyi Rá Hkyô

¹² Ngò gi, haù pé banshoq lé wó gú bê le a nghù nau, ngò gumjup gú bê le a nghù nau. Nghut kôlhang, Hkrisduq Yesuq gi, ngo lé lhom yù bê eq rajung za, ngò gi, haù lé wó lhom yù sháng gaq nghù, châng hkat nyi lhê. ¹³ Gumang wui è, ngò yang ngò gi, haù lé wó hap yù bê nghù a myit; nghut kôlhang, ngò kut é muzó ralhüm gi, nunghtáng mã é lé tô-myhi pyám mù, myoq hí mã é lé wó yù shoq nghù shikut lui, ¹⁴ Hkrisduq Yesuq má Garai Gasang èq ngò lé ahtoq shut ji yu é chyunghuq lé wó yù rá matú, myoqbyu tô é jowò shut châng hkat din nyi lhê.

¹⁵ Gumjup bê bang nga-nhung lunglhang gi, haù sù é myit bò rá lhê. Rajung jung má nungmoq myit é hkyô shai nyi kô é nghut le gi, haù lé le, Garai Gasang gi, nungmoq lé san za tún shit rá nghut lhê. ¹⁶ Hká dong nghut kôlhang, nga-nhung gi, ahkuí je shoq châng nyi bê hkyô eq rajung za châng kut nyi sháng.

¹⁷ Gumang wui è, nungmoq gi, ngò kut é dong chôm kut nyi keq, ngamoq mai nungmoq lé kut shit é alik eq rajung za châng é bang lé wú yù keq. ¹⁸ Hkâsu mù gà le, hí hkún ngò, nungmoq lé anum num tai kyô wú lui, ahkuí lhang, ngàu byí èq dum tai kyô é eq rajung za, Hkrisduq é tapzing lé gye kut é bang myo myo nyi bum akó nghut ri. ¹⁹ Yangmoq é jih túm gi, htên byoq hkyô nghut ri; yangmoq é garai gi, yangmoq é wam dau nghut ri; yangmoq é aróng gi, yangmoq hoq phu hkyô nghut ri. Yangmoq é i-myt gi, mingkan zè htoq má za nghut ri. ²⁰ Nghut kôlhang, nga-nhung é yhummau gi, mauhkung mingdán má nghut lhê. Nga-nhung gi, haù mã é Yhumsing Yesuq Hkrisduq gá é hkyi yù Sù lé, myoqbyu

* 3:2 Bun zo shi lhum gi, ahpyo-kuq hpyit hkyô má noqzuq nyi é bang lé tai nau é nghut lhê. † 3:3 Ahpyo-kuq hpyit hkam yu é bang akying gá é gi, Garai Gasang é yangzho hkyak nghut bê bang lé gá lhê.

láng nyi é bang nghut lhê. ²¹ Yhang gi, jung hkgangmó lé, Yhang uphkan é a-ô má wó kut tô é Yhâng é a-tsâm êq nga-nhông é htên boyoq sê é gungdu lé htai lhik pyám byi lui, Yhâng é hpungwup bo é gungdu su dut nhâng rá nghut lhê.

4

¹ Haù mù lui, chyitdap é luzúm wui le nghut mù, ngò chyitdap bün nghâm nyi é, ngá é gabú jowò eq janmaù nghut nyi é, ngá é gumang wui é, haù gi, Yhumsing má nungmoq hkâsu kut yap gíng nyi rá hkyô nghut lhê.

Lhoq Pun Lhoq Kyíng É Hkyô

² Ngò gi, Uodia eq Suntuiki nhik lé, haù Yhumsing má rayuq eq rayuq myit lui lhúm nyi rá matú, gyai yhang pying kat lhê. ³ Ngá é mù wùn luzúm kyíng é, ngò gi, myiwe shí nhik lé garúm yú laq nghù, nang lé le dúng tóngbán kat lhê; yhangnhik gi, Klemen eq le, asak jhpán laiká buk má mying bo é, ngá é mù wùn luzúm wui góbang eq le, haù gabú danglú hkyô má ngò eq rahá gyai shikut wú bê sú nhik nghut lhê.

⁴ Haù Yhumsing má hkâ-nhám le gabú nyi keq! Ngò dum tai lhê, gabú nyi keq! ⁵ Nungmoq nú-nhâm é hkyô, byù banshoq bang lé sé nhâng keq. Haù Yhumsing gi, chyáng bê nghut ri. ⁶ Hai eq séng lui le, myit hkâ-myo hkâchiq kó; hkyô hkgangmó má jeju hkya-on uchyang, kyúdúng é eq dúng tóngbán é dúng, nungmoq dúng é hkyô pé lé, Garai Gasang chyáng shit kyô nyi keq. ⁷ Haù hkún, sé gyô é nyan banshoq htoq má gyaù é, Garai Gasang é nguóngón hkyô gi, nungmoq é myit nhikhlum eq nungmoq myit é hkyô lé, Hkrisduq Yesuq má upzúng byi nyi rá nghut lhê.

⁸ Jihtùm má, gumang wui é, tengmán é, hpautap gíng é, dúngmán é, sansêng é, wó chyitdap é, hkungga gíng é, hai má nghut kóhlang, aróng wó dik é hkyô rajung jung, a nghut jáng, hkya-on gíng é hkyô rajung jung bo é nghut le gi, haù sú é hkyô pé lé myit nyi keq. ⁹ Nungmoq gi, ngá chyáng mai wó mhoq hkam yú bê hkyô pé, wó gyo wó myang yú bê hkyô pé, hai lé le châng kut nyi keq. Haù hkún, nguóngón hkyô byi é Garai Gasang gi, nungmoq eq rahá nyi nyi rá nghut lhê.

Jeju Bün É Hkyô

¹⁰ Ahkuí kúm gi, ngá é hkyô lé nungmoq dum myit chiq byi kó é yanmai, ngò gi, haù Yhumsing má gyai yhang gabú nyi lhê; gè gè yhang, nungmoq myit chiq byi nyi kóhlang, haù lé tún shit rá ahkáng a wó kó nghut ri. ¹¹ Ngò ísu nghù tai nyi é gi, ngò má rá é hkyô bo tô é yanmai tai é a nghut, hkâsu mù gá le, ngò gi, ngò hui mihui má, nhik dik nyi rá matú mhoq yú bê nghut lhê. ¹² Ra

châ tô u lé, hkâsu kut rá ngò sê lhê; agùn agó wó u lé, hkâsu kut rá ngò sê lhê; hkyô hkgangmó eq dut tô é ahkyo lhum jup má, wam gyi kóhlang, zòmut kóhlang, agùn agó wó tô nyi kóhlang, ra châ to kóhlang, myit dik nyi rá hpaqchyí lé ngò wó mhoq yú bê nghut lhê. ¹³ Ngò gi, ngò lé wum-o a-tsam byi sú Hkrisduq é yanmai, hkyô hkat hkgangmó wó kut lhê.

¹⁴ Nghut kóhlang, ngò wuihke jamjau hui nyi é hkún, nungmoq garúm yú kó é gi, ge é hkyô kut bekó nghut ri. ¹⁵ Hau htoq agó, Hpilipi byu pé nungmoq sê é eq rajung za, haù gabú danglú lé, ngò hkò mù nungmoq wó gyô yu hi é buinyi pé má, ngò Makedoni mau mai htoq ló rá hkún, haù byi é hkyô eq lhom yu é hkyô má, nungmoq mai lai lui, noqkuq hpung gotú ralhúm lháng, ngò lé garúm kat é hkyô a bo é nghut lhê. ¹⁶ Ngò Htesaloni wá mó má nyi tô é hkún lé lháng, nungmoq gi, ngò ra chá é hkyô lé adám dàm hün byi bekó nghut ri. ¹⁷ Ngò gi, chyunghuq chyunghtâng lé ho nyi é a nghut, nungmoq mai ashí je myo zuí jat rá matú lé za sheq ho nyi é nghut lhê. ¹⁸ Ngò gi, hai le gúm shoq myang yu é htoq agó, chyán shoq lháng nghut bê. Ahkuí, haù nungmoq hün kat é chyunghuq lé, Epahprodi chyáng mai ngò lhom myang yú lui, ngò má agùn agó nghut nyi bê. Haù pé gi, namngón jung hkungga su, Garai Gasang lé gabú nhang é, hap yú gíng é hkungga ralhúm nghut ri. ¹⁹ Ngá é Garai Gasang gi, Yhang agùn agó wó sùt nyi é eq rajung za, nungmoq rá é hkyô banshoq lé, Hkrisduq Yesuq má lhoq gúm lhoq jup byi rá nghut lhê.

²⁰ Hpungwup shíngkang gi, nga-nhông é íwa Garai Gasang chyáng pyat dedu ahtum abyuq ru joq nyi sháng gaq ô! Amen.

Shi-kyám Dang

²¹ Hkrisduq Yesuq má sân-yúng bê bang banshoq lé bo shi-kyám byi keq. Ngò eq rahá nyi é gumang wui gi, nungmoq lé shi-kyám kat akó nghut ri. ²² Sân-yúng bang banshoq gi, nungmoq lé shi-kyám kat akó; Kehtaq é yhùm mà é sân-yúng bang gi, je riyhang shi-kyám kat akó nghut ri.

²³ Yhumsing Yesuq Hkrisduq é jeju gi, nungmoq banshoq bang eq rahá ru joq nyi sháng gaq ô!

KOLOSE Pê Chyang Hun Kat é Laiká (Colossians)

¹ Garai Gasâng êq hkyin yù mù, Hkrisduq Yesuq é lagyo dut sù, ngò Poluq eq nga-nhùng é gumang Timohtú gi, ² Kolose wà mó má nyi bang nghut é, Hkrisduq má chyoiyúng bang nghut é, lhumzuí é gumang wui chyang dang kyô kat lhê. Nga-nhùng é Íwa Garai Gasâng chyang má é jeju eq nguingón hkyô gi, nungmoq chyang ru joq nyí sháng gaq.

Jeju Hkya-ôn É Eq Kyúdung É Dang

³ Ngamoq gi, nungmoq é matú kyúdung byí é hkùn, nga-nhùng é Yhumsing Yesuq Hkrisduq é Íwa nghut é Garai Gasang lé ayang jeju hkya-ôn lhê. ⁴ Hai mù gà le, Hkrisduq Yesuq má nungmoq lumjing hkyô eq Yhâng é sán-yúng bang banshoq lé nungmoq chytidap é hkyô lé, ngamoq wó gyô é yanmai nghut lhê. ⁵ Lumjing myit eq chytidap myit haú gi, nungmoq é matú mauhkúng htoq má hkong to byí é myit myoqbyù hkyô* mai lo é nghut lhê. Myit myoqbyù hkyô haú lé gi, nungmoq chyang jé to bê gabú danglù nghut é tengmán mungdang mai, nungmoq wó gyô to gũ nghut lhê. ⁶ Nungmoq gi, gabú danglù haú lé wó gyo lui, Garai Gasâng jeju eq sêng é tengmán hkyô lé sê hkyang é buinyi mai, nungmoq chyang ashí zuí é eq kô myhang nyi bê nghut é eq rajung za, gabú danglù haú gi, mingkan gón má ge é ashí zuí nyi é eq kô myhang nyi bê nghut ri. ⁷ Nungmoq gi, haú hkyô lé, ngamoq é chytidap byinzum Epahpra chyang mai mhoq yu é nghut lhê. Yhang gi, ngamoq é gunglik dong, Hkrisduq é lhumzuí é hpung mù wùn sù nghut lhê. ⁸ Yhang gi, haú Woi-nyí eq nungmoq lé byí tô é chytidap hkyô lé, ngamoq lé tai kyo sù le nghut ri.

⁹ Haú nghut é yanmai, ngamoq gi, nungmoq eq sêng é hkyô lé wó gyô é nyí mai, nungmoq é matú ayang kyúdung byí nyi lhê. Garai Gasang ô nau é hkyô lé sé rá hpaqchyí lé, woi-nyí eq sêng é hpaqchyí byéng-yá eq sé gyô é nyan banshoq dong mai nungmoq chyang lhoq pying byi sháng gaq ngù, Yhâng chyang kyúdung byí nyi lhê. ¹⁰ Haú su kut kyúdung byí é gi, haú Yhumsing ô nau é hkyô eq gingdán é dong nungmoq asak wó dut lui, hkyô hkangmó má Yhang lé wó gabú nhâng rá matú nghut lhê. Hau dong mai, nungmoq gi, ge é muzó hkangmó má ashí zuí nyi lui, Garai Gasang lé sé é hpaqchyí má kô myhang nyi kó rá nghut lhê. ¹¹ Hau htoq agó, nungmoq gi, Yhâng é hpungwup

a-tsam dong mai a-tsam banshoq eq wum-o lhoq kng byí é huí nyi kó rá nghut lhê. Haú mù, nungmoq gi, gyai hkam jân é hkyô eq myit hing é hkyô lé, gabú myit mai wó yù kó rá nghut lhê. ¹² Maubó é mingdán má, sán-yúng bang eq sêng é muizè lé wó bo hkam yù rá matú, nungmoq lé gingdán nhang é sù haú Íwa lé le, jeju wó hkya-on kó rá nghut lhê. ¹³ Hkásu mù gà le, Íwa haú gi, nga-nhùng lé, mauchut eq up é hkaú mai hkyi htoq yù lui, Yhang chytidap é Yhang Zô é mingdán má shuí hâng é Sù nghut lhê. ¹⁴ Nga-nhùng gi, haú Yhang Zo dong mai, hkyi xe yu é huí mù, yubak mara hkyut pyám byí é huí bê nghut lhê.

Jung Hkangmó É Ushuq, Hkrisduq

¹⁵ Hkrisduq gi, myoq eq a byu-myàng é Garai Gasâng é gunghkyang isám nghut lui, zomún dong hpan tô é lungghang htoq má gyaú é sù nghut ri. ¹⁶ Hkásu mù gà le, mauhkúng eq myigùng htoq má joq é azing zê pé, myoq eq byu-myang é eq a byu-myang é pé nghut kôle, hkohkâm ayá pé, a-tsam pé, uphkang bang, ahkang ayá wó bang nghut kôle, lungghang gi, Yhâng eq hpan to huí é chyat nghut lhê. Lungghang gi, Yhâng é matú, Yhâng eq hpan to huí é chyat nghut ri. ¹⁷ Yhang gi, lungghang é hí má é nghut mù, lungghang gi, Yhâng é yanmai joq ging bum é chyang matú, ¹⁸ Yhang gi, noqkuq hpúng nghu é gungdú é ulhum nghut ri; Yhang gi, jung hkangmó má gyaú dik é ushuq dut sháng gaq ga, sâng-hi awang nghut sù eq shi é bang má é hí duí toq é zomún dut sù nghut ri. ¹⁹ Hkásu mù gà le, Garai Gasang gi, Yhâng é bying jup hkyô banshoq, Yhang Zo má joq nyi rá lé myit ngui ô nau é nghut mù, ²⁰ haú tapzing má htoq byí é Yhang Zô é sui dong mai nguingón hkyô kut byí é eq, myigùng htoq má é azing zê nghut nghut, mauhkúng má é azing zê nghut nghut, lungghang lé, Yhang Zo dong mai, Yhang eq nguingón simsaq hkyô xoq yù bê nghut ri.

²¹ Nungmoq gi, Garai Gasang eq wê gâng é bang dut wó kólú, nungmoq é agé ashop nyi yap sâmlai é yanmai, nungmoq i-myyit má, Yhâng é gyè dut wú bekò nghut lhê. ²² Nghut kólhang, ahkuí, Garai Gasang gi, nungmoq lé, rá é hkyô a bo é eq mara hùn rá hkyô a bo é za, chyoiyúng é dong Yhâng é hí má shit rá matú, Hkrisduq é gungsho gungdu shí hkâm é dong, nungmoq eq nguingón simsaq hkyô xoq yù bê nghut ri. ²³ Haú gi, gabú danglù mai wó yu tô é myoqbyù hkyô mai a htot byuq é za, kô myhang nyi é eq gingtng nyi mù, nungmoq é lumjing hkyô má xoq nyi nyi é nghut jáng sheq dut rá nghut lhê. Gabú danglù shí gi, nungmoq wó gyô wú bê

* 15 Bun zo shí má bo é myit myoqbyù hkyô gi, Yesuq lé tai é nghut lhê.

nghut é htoq agó, mauhkûng ô má hpan tô é jung hkangmó lé hko kyô nyi bê nggut lhê. Ngó, Poluq le, gabú danglù hau é dui-nhâng zoshâng dut é nggut lhê.

Noqkuq Hpúng É Matú Poluq Wùn Waq É Hkyô

²⁴ Ahkuí, ngó gi, nungmoq é matú jamjau huí é má gabú lhê; hau htoq agó, Hkrisduq é gungdu nggut é, noqkuq hpúng é matú, rá tô ashí nggut é, Yhang hpuzó é hkyô lé, ngá é gùng má ngó lhoq gumjup yu nyi lhê. ²⁵ Ngó gi, Garai Gasâng é mungdang lé, nungmoq chyáng gumjup shoq hko kyo rá matú, Garai Gasang, ngo lé hun tô é wò mai, noqkuq hpúng hau é mù wùn sù dut é nggut lhê. ²⁶ Mungdang haú gi, gohkûn mai apyat pyat haq tó gyô lo é záu tô é hkyô nggut kôlháng, ahkuí gi, haú sân-yúng bang lé hpóng shit bê nggut ri. ²⁷ Garai Gasang, haú su kut é gi, záu tô é hkyô hau é agùn agó hpungwup shing kang, tûngbau pé chyáng hkâsu nggut é hkyô, yhangmoq lé sé nhâng rá matú nggut lhê. Záu tô é hkyô haú gi, hpungwup shing kang lé myoqbyù é hkyô nggut é, nungmoq má Hkrisduq dui nyi bê hkyô lé gá é nggut lhê.

²⁸ Hkrisduq má gumjup é dông, byù yuq hkangmó lé wó shuí jé sháng gaq nggù, ngamoq gi, Hkrisduq é hkyô lé tai pyô lui, yuq hkangmó lé, hpaqchyí byéng-yá banshoq èq tai pun tai kyíng é eq mhoqshit nyi é nggut lhê. ²⁹ Ngó, haú-i yhang wó wùn waq shikut é gi, ngó má wum-o a-tsam byíng byíng mù zúi nyi Su é wum-o banshoq èq wùn waq shikut nyi é ru nggut lhê.

2

¹ Ngó gi, nungmoq é matú le, Ladoki wà mó bâng é matú le, ngó eq myoqdong hkyûm a huí wú shí é bang banshoq é matú le, hkâ-i yhang awui ahke shikut nyi é hkyô lé, nungmoq lé sé nhâng nau ri. ² Haú su awui ahke shikut é hkyô gi, yhangmoq, myit má wum-o byí é huí rá eq chyitdap myit má rading ralhú má wó tú rá matú nggut lhê. Haú hkûn, yhangmoq gi, Garai Gasâng é záu tô é hkyô nggut é, Hkrisduq lé wó sé rá matú, sê gyô é nyan lunglhang é isut byíng shoq lé wó yú kó rá nggut lhê. ³ Haú Hkrisduq má kúm gi, hpaqchyí byéng-yá eq sùmsé hpaqchyí gá é sutzè lunglhang lé tsíng tó ri. ⁴ Nungmoq lé ngó hau hkyô tai kyô é gi, ó yuq le, dang ngón dang ngui èq mhoq hpyoq é dông, nungmoq lé a wó mhaú zo rá matú nggut lhê. ⁵ Hkâsu mù gá le, ngá gungdu nungmoq eq rahá a nyi kôlháng, ngá é myit gi, nungmoq eq rahá nggut nyi lui, nungmoq shuq shuq tap tap za nggut nyi kó

é eq Hkrisduq lé lumjíng é má hkâ-i gíngtúng nyi kó é lé myáng mù, ngó gabú nyi lhê.

Hkrisduq Dông Mai Wó É Gumjup É Asak Dui Hkyô

⁶ Haú mù lui, nungmoq gi, Hkrisduq Yesuq lé Yhumsing nggù hap yù bekô nggut é eq rajung za, Yhang má asak xoq dui nyi keq. ⁷ Yhang má apùn amyit chin gíng nyi mù, kó myhang lò lui, nungmoq mhoq yù bê eq rajung za, lumjíng hkyô má wum-o lhoq kíng mù, jeju hkya-ôn é hkyô byíng zan nyi keq.

⁸ Hkrisduq chyáng má é a nggut é za, mینگkan shí má é uphkàng tará pé eq xángzo wui é htúngli cháng lui, mhaú zô é myit són hpaqchyí eq akýu a bo é dang dông, ó yuq èq le, nungmoq lé a wó shuí ngoq yù kó sháng gaq, sidiq nyi keq.

⁹ Hkâsu mù gá le, Garai Gasâng é gumjup hkyô banshoq gi, Hkrisduq é gungdu hkyangmân má lúng nyi mù, ¹⁰ nungmoq gi, a-tsam bo é banshoq eq ahkàng ayá wó é banshoq é ushuq nggut é Hkrisduq eq séng é bang nggut kômù, gumjup é bang dut bekô nggut ri. ¹¹ Yhang má, nungmoq gi, byu loq èq kut é ahpyo-kuq hpyit hkyô dông a nggut é za, ahpyo-kuq hpyit é su, Hkrisduq eq yubak gungsho mara lé hkyut séng pyám é hkyô lé hkam yù bekô nggut ri. ¹² Nungmoq gi, wui-myhup hkâm é hkûn Hkrisduq eq rahá myhup yhúm é huí bekô nggut mù, Yhang lé shi é mai lhoq dui toq yu é, Garai Gasâng é a-tsam lé nungmoq lumjíng kó é yanmai, Yhang eq rahá lhoq dui toq yu é huí bekô nggut ri.

¹³ Nungmoq é yubak mara pé é yanmai le, nungmoq é yubak gungsho mara lé huí séng pyám é a hkam yu é yanmai le, nungmoq shi tô é hkûn, Garai Gasang gi, nungmoq lé, Hkrisduq eq rahá asak dui nhâng bê nggut ri. Yhang gi, nga-nhúng é yubak mara lunglhang lé hkyut pyám byi lui, ¹⁴ nga-nhúng eq shai lhum mù, nga-nhúng lé htuq hting é, tará pé bo é jéyáng rá jilpán lé huí séng pyám byi bê nggut ri. Yhang gi, haú lé tapzíng htoq má dok tap pyám é dông yu pyám byi bê nggut lhê.* ¹⁵ Haú dông mai, a-tsam bò bang eq ahkàng ayá wó bâng a-tsam lé lang hkyut hkyô pyám mù, Yhang gi, tapzíng èq yhangmoq lé ung pyám é dông, byu pé é hí má yhangmoq lé de de kut to bê nggut ri.

¹⁶ Haú mù lui, nàng haí zo haí shuq é yanmai le, noqkuq htúng eq séng é pói buinyi, Lhoxan Lhosik pói, Bánno buinyi eq séng lui le, nungmoq lé, ó yuq èq le a wó jéyáng kó sháng gaq. ¹⁷ Haú pé gi, dut lò rá hkyô pé é wupzo chyat nggut lhê; haú gùng gyíng

* 2:14 Yhang gi, haú lé tapzíng htoq má dok tap pyám é dông yu pyám byi bê nggut lhê gá é gi, Hkrisduq tapzíng má shi hkâm byi é hkûn, nga-nhúng é yubak mara banshoq lé, Garai Gasâng eq hkyut pyám byi é lé tai nau é nggut lhê.

gi, Hkrisduq yhang nghut nyi ri. ¹⁸ Myit lhoq nyhum mhaù é eq maumang lagyô pé lé noqkuq é lé myit ngui é sú ô yuq èq le, nungmoq lé, chyunghuq eq a gingdán rá dông hkâkut nhâng kó. Haù su é yuq gi, yhumsing byu-myang é lé† za taì shikut mù, yhumsing é gungsho myit mai, akôm yhang nghut é lé gyáng dang taì é sú nghut ri. ¹⁹ Yhang gi, Garai Gasang kô myhâng nhang é su, gungdu gón é gungsho showui showang pé eq shogyi pé lé htuqbang byi mù rahá llang tsing tô é haù ulhum nghut é Hkrisduq eq xoq é hkyô lé byoq ló nhâng bê nghut ri.

²⁰⁻²¹ Nungmoq gi, Hkrisduq eq rahá, mingkan shí mã é tará pé eq shí gang bekô nghut le nhing, hai mù, haù eq sêng lhum nyi ashí kó lúh? "Hkâzui, hkâchyâm, hkâzáng." gá é tará ô má nyi nyi ashí kó lúh? ²² Haù pé gi, waxâng zô wui é hknómó pé eq mhogshít hkyô pé nghut é yanmai, jai chung é hkún, htên byuq rá chyat nghut lhê. ²³ Haù sú é tará pé gi, yhumsing yhang noqkuq shikut é, myit lhoq nyhum mhaù é eq gungdu lé gunjâng é pé nghut lui, hpaqchyí byéng-yá bo é su dut kôlhâng, gungshô é agé ashop yut yut ô nau hkyô lé wó hkúm zing pyám rá má, hai akyû a bò nghut ri.

3

Chyoiyung É Dông Asak Dui Râ Hkyô

¹ Haù mù lui, nungmoq gi, Hkrisduq eq rahá lhoq dui toq é hui bekô nghut jâng, Garai Gasâng é loqyo hkyam* má zung tô é Hkrisduq é jowó má joq é, ahtoq mã é azing zê pé lé myit ô nau nyi keq. ² Nungmoq gi, myidám htoq mã é azing zê lé myit tuí é a nghut é za, ahtoq mã é azing zê lé myit tuí nyi keq. ³ Hkâsu mù gâ le, nungmoq gi, shí bekô nghut lui, ahkuí, nungmoq é asak gi, Hkrisduq eq rahá, Garai Gasang má haq tô é hui bekô nghut ri. ⁴ Nungmoq é asak nghut sù, Hkrisduq htoq shít é hkún, nungmoq le, Yhang eq rahá, hpungwup shing kang hkaù má htoq shít kó rá nghut lhê.

⁵ Haù mù lui, nungmoq é mingkan hkyô eq sêng é, ashop é dông gungsho zùm yap é hkyô, agot a-ù nyi zô lhum é hkyô, ye lhai nau é hkyô, agé ashop yut yut ô nau é hkyô eq, hpará noq hkyô nghut é myoqnoq hkyô pé hai lé le sat pyám keq. ⁶ Haù hkyô pé é yanmai, Garai Gasâng é nhikmo-yo hkyô gi, jino a gyo bâng é ahtoq mã† jé rá za nghut lhê. ⁷ Lai lò bê hkún, nungmoq le, haù hkyô pé dông sô wú kô é nghut lhê. ⁸ Nghut kôlhâng, ahkuí, nungmoq gi, nhikjum yô é, nhikmo-yô é, agé ashop é dông nô shoq kut é, lumú gansang é eq, nungmoq é nhutwuí

mai hkunchoq taì é hkyô shí pé banshoq lé, yhumsing gung yhumsing tô pyám rá dut lhê. ⁹ Rayuq eq rayuq hkâ-mhaù lhum kó; hkâsu mù gâ le, nungmoq gi, nungmoq é byù xau eq byù xau é nyi yap hkyô lé hkyut pyám mù, ¹⁰ byù sik lé tú wut yú kô é nghut lhê; byù sik haù gi, sumsé hpaqchyí dông mai, yhang lé hpân Su é gungdu isâm má asik jat lò nhang é hui nyi ri. ¹¹ Byù sik má gi, Grik eq Yudaq byù ngu é, ahpyo-kuq hpyit hkâm bang eq a hkâm bang ngu é, byù bíng eq byù jum ngu é, jùn eq jùn a nghut sù ngu é a nyi lò é za, Hkrisduq gi, banshoq nghut mù, banshoq má nyi nyi ri.

¹² Haù mù lui, Garai Gasâng èq hkyin yù hui é bang, Yhâng èq gyai yhang chyitdap é hui é chyoiyung bang dông, shogyo myit, gè hkyô shít é myit, lhoq nyhum é myit, nú nhâm é myit eq myit hing é hkyô pé lé, yhumsing gung yhumsing mebu su wut to keq. ¹³ Nungmoq yhangchang mara kut shut é hkyô joq é nghut jâng, hkam jan byi lhum lui, rayuq eq rayuq mara hkyut byi lhum keq. Haù Yhumsing gi, nungmoq é mara hkyut pyám byi é su, nungmoq le mara hkyut byi keq. ¹⁴ Haù gè é sâmlai banshoq wó é htoq agó, gumjup é rading ralhum za dut é hkyô má, banshoq lé rahá wó tuí zing tô é chyitdap myit lé puq wut to keq.

¹⁵ Nungmoq gi, nguóngón hkyô wó rá matú ji yu é hui bekô nghut mù, gungdu ralhum mã é bang chyat nghut bekô yanmai, Hkrisduq é nguóngón hkyô lé, nungmoq é myit má up nhang nyi keq. Haù mù, jeju hkyá-ôn nyi keq. ¹⁶ Nungmoq, rayuq eq rayuq, hpaqchyí byéng-yá banshoq eq mhogshít é eq lhoq pun lhoq kyíng lhum é hkún le, Garai Gasang lé nungmoq jeju bún é myit mai, jihkyang dang, hkyá-on mahkôn, woi-nyí eq sêng é mahkôn pé hkon é hkún le, haù Hkrisduq é mungdang lé, nungmoq é myit nhikhlum má agùn agó bò nhang nyi keq. ¹⁷ Nungmoq haí wá kut kut, dang dông nghut nghut, zui sai é dông nghut nghut, banshoq lé Yhumsing Yesuq é myíng mai kut é hkún, haù İwa nghut é Garai Gasang lé Yhang dông mai jeju hkyá-on keq.

Hkristan Ikun Byu Pé Nyi Yap Râ Hkyô

¹⁸ Ikun myhí pé é, ikun hpô pé uphâng é ahkaù má nyi keq. Haù gi, Yhumsing é hí má kut gíng é hkyô nghut lhê.

¹⁹ Ikun hpô pé é, ikun myhí pé lé chyitdap nyi keq. Yhangmoq lé dang htân hkâ-nyô kó.

²⁰ Zo wui é, jung hkangmô má nungmoq é mó wui é jino gyo keq; hkâsu mù gâ le, haù gi, Yhumsing ô nau é hkyô nghut lhê.

† 2:18 Byu-myang é lé gá é gi, yhang myit htoq é shing-rán lé gá lhê. * 3:1 Loqyo hkyam ngu é gi, ahko ahkáng wó é jowó lé gá é nghut lhê. † 3:6 Jino a gyo bâng é ahtoq mã, gá é dang, chyúmding ra-am má a bò nghut lhê.

²¹ Íwâ pé ê, nungmoq é zo wuî lé myit hkânô nhâng kó, nô nhâng jáng gi, yhangmoq, myit wum gyuí byuq kó râ nghut lhê.

²² Jùn pé ê, hkyô hkangmó má nungmoq é myidám htoq má é jùn sîng bang uphkanq é akhâu má nyi nyi keq; yhangmoq é myoq hí má za zui sai luí, myoqdong ho é đông a nghut é za, haú Yhumsîng lé gyuq hkunggâ é eq lhumzui é myit mai zui sai nyi keq. ²³ Nungmoq haí wá kut kôle, byu é matú kut é a nghut, haú Yhumsîng é matú kut nyi é đông, nungmoq é myit nhikhlum banshoq eq zui sai nyi keq. ²⁴ Haí mù gâ le, nungmoq gi, haú Yhumsîng chyáng mai, muizê lé chyunghuq đông wó yú kó râ nghut é lé, sé kô é yanmai nghut lhê. Nungmoq dojaú nyi é sú gi, Yhumsîng Hkrisduq ru nghut lhê. ²⁵ Kut shut sú gi, yhang kut shut é marâ matú dam byí é hui zo râ nghut lhê, haí mù gâ le, Garai Gasang gi, myoqdong hkyin é hkyô a joq.

4

¹ Jùn sîng bang ê, nungmoq é jùn pé lé, tengmán é eq ging âng é đông lajang byí nyi keq; haí mù gâ le, nungmoq le, mauhkung htoq má Yhumsîng rayuq wó é lé sé kô é yanmai nghut lhê.

Xoq Lui Pying Kat Ê Hkyô

² Nungmoq gi, kyûdông é má myit zîng zuq nyi mù, machyâ luí, jeju hkyâ-ôn nyi keq. ³ Ngò, shamtoq-tui hut hui nyi shoq dut é, Hkrisduq é záu tô é hkyô lé ngamoq wó tai pyô sháng gaq, Garai Gasang gi, mungdang lé ngamoq tai rá hkyô hkum hpông byi rá matú kyû bo dung byi kó laq. ⁴ Haú Hkrisduq é záu tô é hkyô lé, ngò tai âng é đông san za wó tai pyô sháng gaq, kyû bo dung byi kó laq. ⁵ Nungmoq gi, a lumjîng bang eq zùm yap é hkûn hpaqchyí bo nyi keq; wó yu é ahkyíng hkangmó lé rago yhang chung jai keq. ⁶ Nungmoq gi, yuq hkangmó lé hkâsu tú tai rá hkyô wó sé kó shoq, dang nyo é má, xô èq nghám nhang é su, hkâ-nhám le jeju byíng é dang bo nyi sháng gaq.

Ló Htâng Ê Shi-kyâm Dang

⁷ Tuhkiku gi, ngá hkyô eq sêng é danglù banshoq, nungmoq lé tai kyo rá nghut lhê. Yhang gi, ngá é chyitdap gumang, haú Yhumsîng má, lhumzui é hpúng mù wùn sù eq byinzùm nghut lhê. ⁸ Ngò, yhang lé nungmoq chyáng nhang kat é hkyô gi, ngamoq chyáng dut nyi é hkyô lé nungmoq wó sé rá eq, nungmoq lé myit wum wó byi rá matú nghut lhê. ⁹ Yhang gi, nungmoq chyáng má é nghut é, ngamoq é lhumzui chyitdap é gumang Onesimu eq rahá lé lo é nghut lhê. Yhangnhik gi, shí má dut nyi é hkyô jung hkangmó lé tai kyo kó râ nghut lhê.

¹⁰ Ngò eq rahá htóng lúng sù Aristakuq gi, nungmoq lé shi-kyâm kat ri. Barnaba

é yhang za-aú Markuq le, nungmoq lé shi-kyâm kat ri. (Markuq eq séng luí pying kat é hkyô lé nungmoq wó yú to bê nghut mù, nungmoq chyáng, yhang jé lé é nghut jáng, lhom hkûlum yú keq.) ¹¹ Yustu le gâ é Yesuq le, nungmoq lé shi-kyâm kat ri. Garai Gasâng é mingdán matú ngá é byinzùm mù zui bang má, haú bang za Yudaq byu pé nghut kômù, yhangmoq gi, ngo lé nhik tîng byí é bang nghut akô. ¹² Nungmoq chyáng má é byù nghut sù eq Hkrisduq Yesuq é mù wùn sù, Epahpra gi, nungmoq lé shi-kyâm kat ri. Nungmoq gi, Garai Gasang ô nau é hkyô lhunglhang má hkyak lùm to mù, gumjup luí wó gingtîng nyi sháng gaq ga, Yhang gi, ayang nungmoq é matú kyûdung shikut byí nyi ri. ¹³ Nungmoq é matú le, Ladoki wá mó eq Herapoli wá mó bang é matú le, yhang gi, gyai yhang mù zui shikut byí é hkyô lé, yhang é matú ngò saksé hkâm lhê. ¹⁴ Ngamoq é chyitdap chi sará Lukaq eq Demaq gi, nungmoq lé shi-kyâm kat akô nghut ri. ¹⁵ Ladoki wá mó má é gumang wui lé le, Numhpa eq yhang yhâm má é noqkuq hpúng lé le, bo shi-kyâm byi keq.

¹⁶ Laiká shí lé, nungmoq lé nghap kyô é htâng má, Ladoki byu pé é noqkuq hpúng má le nghap nhâng mù, Ladoki wá bang chyáng hùn kat é laiká lé le, nungmoq nghap wú keq.

¹⁷ "Haú Yhumsîng chyáng mai nàng hap yú to bê é muzó lé rago za lhoq pán pyám aq." ngû, Arhkipò lé tai kyo keq.

¹⁸ Ngò, Poluq gi, ngá é loq èq yhang shi-kyâm dang shí lé kê kat é nghut lhê. Ngò, shamtoq-tui wut tô é lé bún nyi keq. Jeju gi, nungmoq chyáng ru joq nyi sháng gaq ô.

2

HTESALONI Pê Chyáng Hî Dàm Hun Kat é Laiká (1 Thessalonians)

¹ Ngò Poluq, Sila* eq Timohti pé gi, Íwa Garai Gasang eq Yhumsing Yesuq Hkrisduq má nghut nyí bê bang, haù Htesaloni wà mó byu pé é noqkuq hpúng lé dang kyô kat lhê. Garai jeju eq nguingón hkyô gi, nungmoq chyáng ru joq nyí sháng gaq.

Jeju Hkya-ôn É Hkyô

² Ngamoq gi, hkâ-nhâm le, nungmoq ban-shoq bâng é matú, Garai Gasang lé jeju hkya-on luí, ngamoq é kyúdung dang má nungmoq lé bo dúng lhôm nyi lhê. ³ Nungmoq é lumjúng myit mai zui saí é nungmoq é muzó lé le; chyitdap myit é yanmai, nungmoq shikut é hkyô lé le; nga-nhùng é Yhumsing Yesuq Hkrisduq má myit myoqbyu tô é yanmai, nungmoq hkam jân é hkyô lé le, nga-nhùng é Íwa Garai Gasang é hí má, ngamoq ru bún nyi lhê.

⁴ Garai Gasang chyitdap é gumang wui é, Yhang nungmoq lé hkyin yù bê lé, ngamoq sê lhê. ⁵ Hkâsu mù gâ le, ngamoq é gabú danglù gi, nhutdang đông za nungmoq chyáng jé é a nghut, wum-o a-tsam đông le, Chyoiyúng Woi-nyí đông le, tengmán hkyô bying jup é đông le, jé bê nghut é yanmai nghut lhê. Ngamoq, nungmoq eq rahá nyi é hkùn, nungmoq é matú hkâsu kut lai lo é hkyô lé, nungmoq sé gù nghut lhê. ⁶ Nungmoq gi, wuihke jamjau myo myo hui zo kôlháng, Chyoiyúng Woi-nyí byí é gabú myit mai, danglù haù lé lhom yù kôluí, ngamoq lé le, haù Yhumsing lé le, alik kut yu é bang dut bekô nghut ri. ⁷ Haù mù, Makedoni mau eq Ahkaia mau mâ é lumjúng bang ban-shoq é alik, nungmoq dut bekô nghut ri. ⁸ Nungmoq chyáng mai, Makedoni mau eq Ahkaia mau má, haù Yhumsing é mungdang hú htoq lô e za a nghut, Garai Gasang má nungmoq lumjúng hkyô gi, jowô hkangmó jam lô bê nghut luí, ngamoq gi, haí le taí nó a ra lo nghut ri. ⁹ Hkâsu mù gâ le, ngamoq lé nungmoq hká đông lhom hkulum yu é hkyô lé, yhangmoq yhang, ngamoq lé shit kyo akô. Nungmoq gi, hparà lhô pé lé tô pyám luí, Garai Gasang shut hkâsu kut lhing lô mù, rú dui nyi é eq tengmán é Garai Gasang lé dojaù nyi é hkyô lé le; ¹⁰ mauhkúng má é haù Yhang Zo lé láng nyi é hkyô lé le, yhangmoq taí kyô akô. Yhangzo haù gi, Yhang eq shi é mai lhoq dui toq yu é hui luí, jé lô rá nhikmó yo hkyô mai nga-nhúng lé hkyi yù sù, Yesuq nghut ri.

Poluq, Htesaloni Wà Mó Má Garai Mù Wùn Waq É Hkyô

¹ Gumang wui é, nungmoq chyáng ngamoq lé kúm é hkyô gi, akôm a nghut é lé, nungmoq yhang sê lhê. ² Nungmoq sê é eq rajung za, ngamoq gi, hí hkùn, Hpilipi wà mó má wuihke jamjau eq rhoi é hui wú bê nghut lhê; nghut kôlháng, nga-nhùng é Garai Gasang garúm é yanmai, gyaí lhom htuq htúng é hui kôle, Garai Gasang é gabú danglù lé, a gyuq a kyum nungmoq lé wám taí kyô é nghut lhê. ³ Hkâsu mù gâ le, ngamoq lhoq pun lhoq kyíng é hkyô gi, shut é, a nghut jáng, a sansêng é i-myt đông eq nungmoq lé mhaù zô é đông a nghut e za, ⁴ haù gabú danglù lé chùng gíng é bang ga, Garai Gasang chyáng mai ahkáng wó é đông za, ngamoq taí é nghut lhê. Ngamoq gi, byu pé lé gabú nhâng rá matú a nghut, ngamoq é myit lé chyam wú nyi é Garai Gasang lé, gabú nhâng rá matú shikut é ru nghut lhê. ⁵ Hkâsu mù gâ le, nungmoq sê é eq rajung za, ngamoq gi, lhoq ngón mhaù é dang le hkâ-nhâm a chùng wú, nghop tô é myoqmoq myit le hkâ-nhâm a bô, Garai Gasang gi, ngamoq é saksé nghut lhê. ⁶ Ngamoq gi, byu pé mai le, nungmoq mai le, gotú ó yuq mai le hkya-on rá lé ho nyi é a nghut, Hkrisduq é lagyô pé nghut é eq rajung za, nungmoq lé wôlai hùn naù jáng wó hun lhê; nghut kôlháng, ⁷ ínu rayuq, yhang é zosháng zô pé lé hku baù é su, nungmoq chyáng nú-nhâm é đông nyi lai lò bê nghut lhê. ⁸ Ngamoq gi, nungmoq lé gyaí yhang chyitdap luí, Garai Gasang é gabú danglù za a nghut, ngamoq é asak pé nungmoq lé byí pyám le lháng nhik dik lhê; hkâsu mù gâ le, nungmoq gi, ngamoq chyitdap dik é bang dut bekô nghut é yanmai nghut lhê. ⁹ Gumang wui é, nungmoq gi, ngamoq gyaí yhang mù zui shikut é hkyô lé, gè gè bun kó rá nghut lhê; Garai Gasang é gabú danglù lé, nungmoq chyáng ngamoq hko kyô é u lé, ó yuq lé le, ngamoq mai wôlai a byi sháng gaq nghù, ngamoq gi, nyí lé, myín lé, mù zui é nghut lhê.

¹⁰ Ngamoq gi, lumjúng bê bang nungmoq é hí má, hkâsu chyoyiúng é eq dingmán é, mara hùn rá a bo é bang dut lai lo é hkyô lé, nungmoq le, Garai Gasang le, saksé nghut lhê. ¹¹ Hkâsu mù gâ le, ngamoq gi, íwa rayuq mai yhuising yhangzô pé lé kut byí é su, nungmoq yuq hkangmó lé, myit wum byí nyi é hkyô lé le, nhik taí títng nyi é hkyô lé le, ¹² Yhang é mingdán eq hpungwup shingkgang má, nungmoq lé wut yu é Garai Gasang eq gingdán é đông, nungmoq asak wó dui nyi sháng gaq nghù, nungmoq lé wum byí nyi é hkyô lé le, nungmoq yhang sê nyi lhê.

* 1:1 Sila lé gi, Salwanu le gâ lhê.

¹³ Ngamoq gi, ngamoq chyáng mai nungmoq wó gyó yu é Garai Gasâng é mungdang lé, nungmoq lhom yu é hkûn, byu é dang lé lhom yu é đông a nghut e za, lumjng é bang nungmoq má mù zui nyi é, haù Garai Gasâng é mungdang lé yhang, lhom yù kô é yanmai, Garai Gasang lé xoq xoq jeju hkya-ôn nyi lhê. ¹⁴ Gumang wui ê, nungmoq gi, Hkrisduq Yesuq má nghut nyi é, Yuda mau má joq é Garai Gasâng é noqkuq hpûng pé lé, alik kut yu é bang dut bekô nghut ri. Noqkuq hpûng haù pé gi, Yudaq byu pé zing-ri é lé hui zô é su, nungmoq lé, yhumsing mau má é byu pé zing-ri é lé hui zô akô nghut ri. ¹⁵ Yudaq byu pé gi, haù Yhumsing Yesuq eq myightoi pé lé sat pyám kôluí, ngamoq lé le hkat htoq akô. Yhangmoq gi, Garai Gasang a ô nau é hkyô kut é bang, byù lhunglhang eq gyê dut é bang nghut akô. ¹⁶ Tungbau pé hkyi yù hui rá matú, ngamoq hko kyô é hkyô lé, yhangmoq hkûm akô; yhangmoq gi, hkâ-nhám le, yhumsing é mara lé dik shoq haù đông lhoq jat myô yù akô nghut ri. Haù mù, Garai Gasâng é nhikmo-yô é hkyô gi, yhangmoq ahtoq má jé bê nghut ri.

Htesaloni Byu Pé Lé Poluq Hui Nau Nyi É Hkyô

¹⁷ Gumang wui ê, ngamoq gi, rayoq zo nungmoq eq myoqdong byam gâng to kôle, myit gi, a gâng é nghut lhê; nungmoq lé gyai bun-nghâm nyi lui, wó myang hui shoq nghû, ngamoq gyai yhang shikut nyi lhê. ¹⁸ Ngamoq chyáng ngamoq jé lé nau mù lui, ngô Poluq yhang, adàm dâm shikut wú bê; nghut kôlhang, Tsadán gi, ngamoq lé hkûm tang pyám ri. ¹⁹ Hkâsù mù gâ le, nga-nhung é Yhumsing Yesuq Hkrisduq é hí má, Yhang jé lé é hkûn, ngamoq é myit myoqbyù hkyô, gabú hkyô eq gumrông rá janmau gi, hai jung wá nghut lhê gâ le, nungmoq yhang nghut nyi lhê a nghut kô lhú? ²⁰ Gè gè yhang, nungmoq gi, ngamoq é gumrông jowó eq gabú hkyô nghut nyi ri.

3

¹ Haù mù lui, ngamoq gi, haù lé a wó jân nyi lo jáng, Ahten myuq má ngamoq baù nyi gyó le jé gè rá nghut lhê nghû, myit hpyit yù mù, ² wuihke jamjau shí pé é yanmai, ó yuq le, myit a hten kó sháng gaq nghû, nungmoq é lumjng hkyô má, nungmoq lé wum-o byi rá eq myit wum byi rá matú, ³ Hkrisduq é gabú danglù lé hko kyô é hkyô má, ngamoq é gumang eq Garai Gasâng é mù wùn luzúm nghut é Timohti lé, nhang kat é nghut lhê. Nga-nhung gi, wuihke jamjau pé hui zo rá matú, hkyin to hui é bang nghut é lé, nungmoq yhang rago sê nyi lhê. ⁴ Nga-nhung gi, zing-ri hui zo rá nghut lhê nghû, ngamoq, nungmoq eq rahá nghut nyi é hkûn, noq mai nungmoq lé ngamoq taí kyô nyi gù nghut

bê. Nungmoq rago sê é eq rajung za, haù đông dut bê nghut ri. ⁵ Hau é yanmai, ngô a wó jân nyi lo jáng, haù gunglau sù mai nungmoq lé gunglau yù lui, ngamoq wùn waq bê muzo gi, akôm dut byuq rá lé, myit chiq mù, nungmoq é lumjng hkyô lé wó sê rá matú, yhang lé ngô nhang kat é nghut lhê. Gunglau sù gi, nat Tsadán nghut lhê.

Timohti Lo Shit Kyô É Wum Byi Dang

⁶ Ahkuí kúm, Timohti gi, nungmoq é lumjng hkyô eq chyitdap myit eq séng é gabú danglù pé lé, nungmoq chyáng mai ngamoq chyáng wun jé lô byi bê nghut ri. Nungmoq, hkâ-nhám le, ngamoq lé rago bún nyi é hkyô lé le; ngamoq, nungmoq lé myàng nau nyi é eq rajung za, nungmoq, ngamoq lé myàng nau nyi é hkyô lé le, yhang lo tai kyo bê nghut ri. ⁷ Haù mù lui, gumang wui ê, ngamoq myit myo uhkyí é hkyô eq zing-ri hui é hkyô pé banshoq má, nungmoq é lumjng hkyô é yanmai, nungmoq eq séng lui myit wum byi é hkyô lé ngamoq wó yù bê nghut lhê. ⁸ Ahkuí, ngamoq gi, haù Yhumsing má nungmoq yap gíng nyi kô é yanmai, gè gè nyi ngón bê nghut lhê. ⁹ Nga-nhung é Garai Gasâng hí má, nungmoq é yanmai, ngamoq myang hkam yu é gabú hkyô banshoq lé myit kat wú jáng, ngamoq gi, nungmoq é matú Garai Gasang lé hkâsù kut jeju ùng hkya-on rá lhú? ¹⁰ Ngamoq gi, nungmoq lé dum myàng rá matú eq, nungmoq é lumjng myit má langhpyut é hkyô lé wó lhoq hkúm byi rá matú, nyí, myín, gyai yhang lhumzui lui kyüdüng nyi lhê.

¹¹ Nungmoq chyáng ngamoq lé rá matú, nga-nhung é Yhumsing Yesuq eq nga-nhung é Iwa Garai Gasang yhang ngamoq lé hkyô hpóng byi sháng gaq. ¹² Nungmoq lé ngamoq chyitdap nyi é su, haù Yhumsing gi, nungmoq é chyitdap myit lé, rayuq eq rayuq é ahtoq má le, yuq hkangmó é ahtoq má le, lhoq kô jat, lhoq pying byi sháng gaq. ¹³ Nga-nhung é Yhumsing Yesuq gi, Yhâng é chyoiyung bang banshoq eq rahá lé é hkûn, nga-nhung é Iwa Garai Gasâng é hí má, nungmoq gi, mara hùn jowó a joq é eq chyoiyung é bang dut rá matú, nungmoq é myit nhiklhum má, haù Yhumsing mai wum-o lhoq kóng byi nyi sháng gaq. Yhâng é chyoiyung bang gâ é gi, byù lé, a nghut jáng, maumang lagyó pé lé, taí záng lhê.

4

Garai Gasang Ô Nau É Đông Asak Dui Rá Hkyô

¹ Xoq lui taí nau é gi, gumang wui ê, ngamoq gi, ahkuí nungmoq cháng nyi é eq rajung za, nungmoq hká đông nyi yap lui, Garai Gasang lé gabú nhang rá hkyô nungmoq lé mhoqshit byi bê nghut lhê. Ahkuí le,

ngamoq gi, shí hkyô lé nungmoq hau htoq je wó châng jat rá matú, Yhumsing Yesuq má nungmoq lé dúng tóngbán lui, myit wum byi kat lhê. ² Hkâsu mù gà le, nungmoq gi, hau Yhumsing Yesuq é ahko ahkáng dông, ngamoq mai, nungmoq lé mhoqshit to byí é hkyô pé lé, sê akò nghut ri.

³ Garai Gasang ô nau é hkyô gi, hau nungmoq sân-yúng é hui rá matú le, ashop é dông gungsho zùm yap é hkyô lé koi pyám rá matú le; ⁴ nungmoq yuq hkangmó gi, hau Garai Gasang lé a sê é, a lumjing bang kut é su, gungsho yut yut ô nau é hkyô a châng e za, ⁵ hau chyoyúng é eq hkungga gíng é sú wó dut shoq, yhumsing gung lé wó hkang é hkyô mhoq yú rá matú le; ⁶ shí hkyô eq séng lui, ó yuq le, yhumsing é gumang lé, a ge shut, a ge lhúngzo rá matú le nghut lhê. Ngamoq, nungmoq lé tai kyo mù, lhoq pun lhoq kying gù nghut bê eq rajung za, hau Yhumsing gi, hau hkyô shut é banshoq lé, dam byi rá nghut lhê. ⁷ Hkâsu mù gà le, Garai Gasang gi, nga-nhúng lé a sân-yúng é bang dut rá matú wut yu é a nghut, chyoyúng é dông asak dut nyi rá matú sheq wut yu é ru nghut lhê. ⁸ Hau mù lui, mhoqshit hkyô shí lé he-ngik pyám é sú gi, byú lé he-ngik é a nghut, hau nungmoq lé, Yhâng é Chyoyúng Woi-nyí byí tô é sú, Garai Gasang lé he-ngik pyám é sheq ru nghut lhê.

⁹ Rayuq eq rayuq chiyitdap lhum rá matú, nungmoq yhang, Garai Gasang eq mhoqshit é hui bekò nghut é yanmai, gumang yhangchang chiyitdap lhúm é hkyô eq séng lui, ngamoq gi, nungmoq chyáng kâ kat byi a ra lo nghut ri. ¹⁰ Hau eq rajung za, nungmoq gi, Makedoni mau gón má é gumang wui banshoq lé chiyitdap nyi akò nghut ri. Nghut kôlháng, gumang wui é, hau su je myo kut rá matú nungmoq lé ngamoq wum byí lhê.

¹¹⁻¹² Nungmoq é nyi wui lhê é asak dui hkyô má, gotú byu pé eq hkunggá é wó yú lui, ó yuq lé le, lumhkaú a ra wó dut sháng gaq, hí hkún nungmoq lé ngamoq tai kyô tô é eq rajung za, num num byi zè rá hkyô lé le, yhumsing eq a sêng é hkyô a kut wún rá lé le, yhumsing loq eq zui sai mù nyi rá lé le, nungmoq é myit myoqbyú jowò kut yú keq.

Hau Yhumsing Gyó Lé Rá Hkyô

¹³ Gumang wui é, myit myoqbyú hkyô a wó é byú góbang su, nungmoq, iyon ningtsáng a dut kó sháng gaq, hau yhup ngón byuq é bang eq séng lui, nungmoq a sé rá lé, ngamoq a ô nau é nghut lhê. Yhup ngón byuq é bang gà é gi, lumjing lui shí lo byuq é bang lé gà é nghut lhê. ¹⁴ Hkâsu mù gà le, Yesuq shí lui, dum dui toq bê hkyô lé nga-nhúng lumjing é yanmai, Garai Gasang gi, Yesuq má yhup ngón byuq é bang lé, Yesuq eq rahá shuí lé rá nghut lhê nghú, nga-nhúng lumjing é nghut lhê. ¹⁵ Hau

Yhumsing tai é dang eq rajung za, nungmoq lé ngamoq tai kyo kôlé, hau Yhumsing dum lé é hkún, asak dui nyi é eq myit gyo tô é bang nga-nhúng gi, yhup ngón byuq bê bang htoq ratsuí le wó hí rá a nghut. ¹⁶ Hkâsu mù gà le, hau Yhumsing yhang gi, hte mó hkunmó eq le, maumang lagyo mó é hte eq le, Garai Gasang é tutmó mut hte eq le, mauhkung mai gyó lé lô lui, hau Hkrisduq má shí lo bê bang hí dui toq rá nghut lhê. ¹⁷ Hau htáng, asak dui nyi é eq myit gyo tô é bang nga-nhúng gi, yhangmoq eq rahá mhut htoq má shuí toq yu é hui lui, maulat má hau Yhumsing eq hui rá nghut lhê. Hau hkún, nga-nhúng gi, hau Yhumsing eq ah-tum abyuq nyi nyi berá nghut lhê. ¹⁸ Hau mù lui, nungmoq gi, dang shí pé mai rayuq eq rayuq myit wum byí lhúm nyi keq.

5

¹ Nghut kôlháng, gumang wui é, ahkying buinyi eq séng lui, nungmoq lé ngamoq kâ hún byi a ra lo nghut ri. ² Hkâsu mù gà le, hau Yhumsing é buinyi gi, myín lé hkau sú wang é su je lé rá nghut é hkyô lé, nungmoq rago za sé akò nghut ri. Yhumsing é buinyi gi, Yesuq dum je lé rá buinyi lé tai nau é nghut lhê. ³ Byu pé gi, 'Nguóngon yuqyo ri.' ga tai nyi bùm kô é u lé, gung lai é myiwe rayuq zohkú-nò no lo é su, htên byoq hkyô gi, byodán tung yhangmoq chyáng je lui, hká dông lé yhangmoq wó hpang lut kó rá a nghut.

⁴ Nghut kôlháng, gumang wui é, nungmoq gi, mauchut hkaú má nyi é bang a nghut é yanmai, buinyi hau gi, hkau sú lé é su, nungmoq é matú byodán tung dut rá a nghut. ⁵ Nungmoq lhunglhang bang gi, maubó é yhangzò pé eq nyi é yhangzò pé nghut lhê. Nga-nhúng gi, myín eq mauchut hkaú eq séng é bang a nghut. ⁶ Hau mù lui, nga-nhúng gi, byú góbang su a yhup nyi e za, machyá lui, gyíng gyíng kut nyi sháng. ⁷ Hkâsu mù gà le, yhup é bang gi, myín lé yhup akó; í shuq wut é bang le, myín lé shuq wut akó. ⁸ Nghut kôlháng, nga-nhúng gi, nyi eq séng lhê nghut é yanmai, gyíng gyíng kut nyi lui, lumjing myit eq chiyitdap myit lé gi, wànggò-long lé su gò to, hkyi yú hui rá lé myit myoqbyú tô é hkyô lé gi, shamtoq-muq lé su tsung to, kut sháng. ⁹ Hkâsu mù gà le, Garai Gasang gi, Yhâng nhikmo-yô é hkyô lé hkâm zo rá matú, nga-nhúng lé hkyin tô é a nghut e za, nga-nhúng é Yhumsing Yesuq Hkrisduq mai, hkyi yú hkyô lé nga-nhúng wó yú rá matú hkyin to bê nghut lhê. ¹⁰ Yesuq gi, nga-nhúng yhup bún nyi kôlháng, yhup ngón to kôlháng, Yhang eq rahá wó nyi nyi sháng gaq ga, nga-nhúng é matú shí hkám byi bê nghut ri. ¹¹ Hau mù lui, nungmoq gi, ahkuí, nungmoq kut nyi é eq rajung za, rayuq eq rayuq

myit wum byi lhum mù, htuqluq htuqbáng
kut lhùm nyi keq.

Ló Htàng Lhé É Mhoqshit Hkyô

¹² Gumang wui ê, nungmoq mã é muzó shikut lui, haù Yhumsing má nungmoq lé up nyi é eq lhoq pun lhoq kyíng nyi é bang lé, nungmoq hkungga rà matú le; ¹³ yhangmoq zui saí é muzó jizó é yanmai, yhangmoq lé chyitdap myit dông gyai yhang hkungga rà matú le, nungmoq lé ngamoq sang kat lhê. Nungmoq le, rayuq eq rayuq nguingón lhùm nyi keq. ¹⁴ Gumang wui ê, nungmoq lé ngamoq wum byi kat nau é gi, lagôn é bang lé lhoq pun lhoq kying keq; nhiknge é bang lé myit wum byi keq; wum nyhôm é bang lé htuqluq htuqbáng kut keq; yuq hkanmó lé, i-myit hîng byi nyi keq; ¹⁵ ó yuq lé nghut kôlhang, a ge é hkyo é yanmai, a ge é dông a taù kut rà lé lhoq pun lhoq kyíng nyi keq; nungmoq rayuq eq rayuq le, gôbang banshoq eq le, shikut lui, hkâ-nhâm le, ge é hkyô kut byi lhum nyi keq.

¹⁶ Hkâ-nhâm le, ru gabú nyi keq; ¹⁷ abyit alan kyüdúng nyi keq; ¹⁸ hkyô hkak hkanmó má jeju hkya-ôn nyi keq, hkâsu mù gâ le, haù pé gi, Hkrisduq Yesuq má, nungmoq é matú Garai Gasang ô nau é hkyô pé nghut lhê.

¹⁹ Haù Woi-nyi lé hkâlhoq jôm pyám kó; ²⁰ myiqhtoi htoi é lé, haì su a ngâm hkâkut kó. ²¹ Jung hkanmó lé, chyam wú lui, ge é hkyô lé zui zing nyi mù, ²² agê ashop é hkyô hkanmó lé, koi pyám keq.

²³ Nguingón hkyo é apùn awang nghut é Garai Gasang yhang, nungmoq lé, lhunglhang lhoq sân-yúng pyám byi sháng gaq; nga-nhûng é Yhumsing Yesuq Hkrisduq dum lé é hkûn, nungmoq é woi-nyi, myit nhiklhum, gungdu gi, mara hùn rà hkyô a bò sháng gaq. ²⁴ Nungmoq lé ji yu é Sù gi, lhumzui é Sù nghut lhê mù, Yhang, shí hkyô lé kut rà nghut lhê.

²⁵ Gumang wui ê, ngamoq é matú kyû bo dung byi kó laq. ²⁶ Gumang wui banshoq bang lé, chyoyúng é chyitpuq puq é dông bo shi-kyám byi kó laq. ²⁷ Gumang wui banshoq bang lé, hun kat é laiká shí nghap kyo rà matú, haù Yhumsing é mying mai, ngò, nungmoq lé pying kat lhê.

²⁸ Nga-nhûng é Yhumsing Yesuq Hkrisduq é jeju gi, nungmoq chyáng ru joq nyi sháng gaq ô!

HTESALONI Pê Chyáng Htang Dàm Hun Kat é Laiká (2 Thessalonians)

¹ Ngò Poluq eq Sila, Timohti pé gi, nga-nhùng é Iwa Garai Gasang eq Yhumsing Yesuq Hkrisduq má nghut nyí bê bang, haù Htesaloni wà mó byu pé é noqkuq hpúng lé dang kyò kat lhê.

² Haù Iwa Garai Gasang eq Yhumsing Yesuq Hkrisduq chyáng mã é jeju eq ngu-ingón hkyô gi, nungmoq chyáng ru joq nyí sháng gaq ô!

Jeju Hkya-on É Eq Kyúdung É Hkyô

³ Gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on rà dut ri; haù gi, gíng lhê; hkâsu mù gà le, nungmoq é lumjिंग myit gi, je je kô jat lo nyí luí, nungmoq yuq hkangmó é chyitdap myit le, rayuq eq rayuq é ahtok má je myò jat lo nyí é yanmai nghut lhê. ⁴ Haù mù luí, ngamoq gi, nungmoq zing-ri huí é hkyô pé eq wuihke jamjau huí é hkyô pé banshoq lé, nungmoq wó jân nyí kô é yanmai, nungmoq é hkam jan hkyô eq lumjिंग hkyô lé, Garai Gasang é noqkuq hpúng pé é hí má gumrong nyí lhê.

⁵ Shí hkyô banshoq gi, haù Garai Gasang dingmán é dng jéyáng é hkyô lé saksé tún shit é nghut lhê; haù mù luí, nungmoq gi, Garai Gasang é mingdán é matú wuihke jamjau hui zo bekò nghut é yanmai, mingdán haù eq gíngdán é bang gà é hui kó rà nghut lhê; ⁶ Garai Gasang gi, tengmán Sù nghut lhê; haù mù, nungmoq lé jamjau byí é bang lé, Yhang mai jamjau byí rá eq, ⁷ jamjau huí nyí é bang nungmoq lé le, ngamoq lé le lhoq lhut byí rá nghut lhê. Shí hkyô gi, haù Garai Gasang lé a sê é bang eq nga-nhùng é Yhumsing Yesuq eq sêng é gabú danglú lé a gyo a châng é bang lé, jéyáng rà matú, ⁸ haù Yhumsing Yesuq, wum-o a-tsam bying é Yhâng é maumang lagyó pé eq rahá, myishám eq mauhkung mai htoq shit é hkùn, dut rá nghut lhê. ⁹ Yesuq jé lé lô mù, Yhâng é chyoiyúng bang má hpungwup shing kang wó yu é eq lumjिंग bang banshoq mai mauhong é huí é buinyí má, yhangmoq gi, htên byoq hkyô lé ahtum abyuq jéyáng é hui zo kó rà nghut lhê. ¹⁰ Hau htoq agó, haù Yhumsing é hí mai le, Yhâng é a-tsam kô làm é mai le, lhoq kang pyám é hui kó rà nghut lhê. Ngamoq é saksé dang lé nungmoq lumjिंग bekò nghut é yanmai, haù lumjिंग bang má nungmoq le lóm bekò nghut lhê.

¹¹ Haù mù luí, nga-nhùng é Garai Gasang gi, nungmoq lé, Yhang ji yu é hkyô eq

gíngdán ri ga rá le, haù Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjिंग myit eq sêng é muzó lhunjup lé, lhoq dik byí sháng gaq ngù le, nungmoq é matú, hkâ-nhám le, ngamoq kyúdung byí nyí lhê. ¹² Ngamoq haù su dung byí nyí é hkyô gi, nga-nhùng é Garai Gasang eq Yhumsing Yesuq Hkrisduq é jeju yanmai, haù nga-nhùng é Yhumsing Yesuq é mying gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó rà matú nghut lhê.

2

A Tara É Sù

¹ Gumang wui ê, haù nga-nhùng é Yhumsing Yesuq Hkrisduq dum lé rá hkyô, Yhang eq nga-nhùng rahá zup nyi to rá hkyô eq séng luí, nungmoq lé ngamoq pying kat nau é gi, ² haù Yhumsing é buinyí gi, jé to gù nghut bê gà é myiqhtoi dang, luhkyang, laiká pé rajung jung, ngamoq chyáng mã é nghut lhê ga nungmoq chyáng jé é nghut jáng, nungmoq é myit luí za hkâduí kó, hkâgyuq dàn kó. ³ Hkâsu mù gà le, haù htên byoq é yhangzo nghut é a tará Sù htoq shit luí, haù gumlau toq é hkyô hí a htoq htoq gi, buinyí haù jé rá a nghut, haù mù luí, nungmoq lé, ó yuq èq, hkâ dng mai mhaù kólhang hkâjing kó. ⁴ Haù yuq gi, Garai ga noqkuq huí é zè lhunglhang lé htoq htíng luí, haù pé banshoq é htoq má yhanggung yhang lhoq gyaú yú rá nghut lhê; haù mù luí, Garai Gasang é noqkuq yhùm má zung to luí, yhanggung yhang Garai Gasang nghut lhê ga táí rá nghut lhê.

⁵ Ngò gi, nungmoq eq rahá nyi tô é hkùn, shí hkyô pé lé lhaq táí kyo kyo kut é hkyô lé, nungmoq a bun lo kó lú? ⁶ Haù yuq gi, ahkying yam-yoq jé jáng sheq htoq shit sháng gaq ga, ahkuí, yhang lé hai èq hkùm zing tô é hkyô lé, nungmoq sê lhê. ⁷ Haù a tara é hkyô é haq dá é a-tsam gi, mù zui nyi gù nghut bê; nghut kólhang, haù lé hkùm zing nyi sù gi, hui htot pyám huí é hkùn jé shoq, haù lé hkùm zing nyi shirá nghut lhê. ⁸ Haù hui htot pyám huí é hkùn, a tará Sù htoq shit rá nghut lhê; haù Yhumsing Yesuq kúm gi, Yhâng nhut má é soq èq yhang lé sat pyám rá eq, Yhang gyó lo u lhê é hpungwup mó èq, yhang lé lhoq htên pyám rá nghut lhê. ⁹ Haù a tará Sù lé lo é gi, Tsadán a-tsam dng laklai kumlhá pé, kumlhá pé, mauhpo muzó pé ajung jung kut mhaù é eq, ¹⁰ htên byoq huí nyi é bang lé mhaù zo rá agé ashop é hkyô jung hkangmó lé tún shit rá nghut lhê. Yhangmoq htên byoq é gi, haù tengmán hkyô lé chyitdap luí hkyi yú hui rá nghut é hkyô lé he-ngik pyám kó é yanmai nghut ri. ¹¹ Hau é yanmai, Garai Gasang gi, haù tengmán hkyô lé a lumjिंग e za agé ashop

hkyô má ô nau é lhunglhang bang mara byi é hui kó sháng gaq ga,¹² mhaù é dang lé jing kó rà matú, a-tsam mó bo é lum shut rà hkyô lé, yhangmoq chyáng nhâng byi bê nghut ri.

Mhoqshit é hkyô má ging nyi rà hkyô

¹³ Nghut kôlhang, haù Yhumsing chyitdap é gumang wui ê, ngamoq gi, hkâ-nhâm le, nungmoq é matú Garai Gasang lé jeju hkyonon rà dut ri. Hkâsu mù gà le, haù Woi-nyí eq lhoq sân-yúng nyi é muzó đông le, tengmán hkyô lé lumjing é đông le, hkyi yù hui rà matú, Garai Gasang gi, nungmoq lé, sâng-hi mai hkyin yù bê nghut ri. ¹⁴ Yhang gi, nga-nhung é Yhumsing Yesuq Hkrisduq é hpungwup shinggang má, nungmoq wó bo lôm shoq ga, ngamoq é gabú danglù đông nungmoq lé shí hkyô má jì yù bê nghut lhê. ¹⁵ Haù mù luí, gumang wui ê, nhutdang đông nghut nghut, laiká đông nghut nghut, nungmoq lé ngamoq lhai byí é mhoqshit hkyô lé zui ging nyi luí, ging ging yap nyi keq.

¹⁶ Yhâng é jeju yanmai, nga-nhung lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhung lé chyitdap é, nga-nhung é Iwa Garai Gasang eq nga-nhung é Yhumsing Yesuq Hkrisduq gi, ¹⁷ nungmoq é i-myt má wum byi luí, ge é muzó eq ge é nhutdang lhumjup má, nungmoq lé wum-o lhoq king byi sháng gaq ô!

3

Kyú Dung Byi Rà Matú Lung Kat É Hkyô

¹ Gumang wui ê, je htang má pying kat nau é hkyô gi, nungmoq chyáng dut wú bê eq rajung za, haù Yhumsing é mungdang gi, hân hân byo myín ló mù, lhoq gyaù é hui sháng gaq, ngamoq é matú kyú bo dung byi kó laq. ² Yuq hkangmó gi, lumjing myit bo é a nghut é yanmai, haù achaq achyut agé ashop é byu pè chyáng mai ngamoq wó lut rà matú le, kyú bo dung byi kó laq. ³ Nghut kôlhang, haù Yhumsing gi, lumzui é sù nghut é yanmai, Yhang nungmoq lé wum-o lhoq king byi mù, haù agé ashop su chyáng mai nungmoq lé hung yù rà nghut lhê. ⁴ Nungmoq gi, ngamoq pying tó é dang pé lé kut nyi mù, xoq luí le kut nyí rà nghut lhê nghú, haù Yhumsing má ngamoq hkyak myit lum tó lhê. ⁵ Haù Yhumsing gi, nungmoq lé Garai Gasang é chyitdap hkyô eq Hkrisduq é hkam jân é hkyô má, shuí wàng sháng gaq ô!

Mú Zui Shikut Rà É Hkyô

⁶ Gumang wui ê, ngamoq gi, ngamoq chyáng mai nungmoq hap yù bê ngamoq mhoqshit é hkyô đông a nyi yap é eq lagôn é gumang ó yuq eq le, we we nyi keq nghú, haù Yhumsing Yesuq Hkrisduq é mying mai nungmoq lé hkunmó hkyô kat lhê. ⁷ Hkâsu mù gà le, ngamoq kut é alik lé hká đông

cháng rà dut é gi, nungmoq yhang sê lhê. Ngamoq gi, nungmoq eq rahá nyi tó é hkún, lagôn é hkyô a bo wú é htoq agó, ⁸ ó yuq é zoshuq lé le, ngùn a byí é a zo wú é nghut lhê. Nungmoq má ó yuq lé le wôlai a byi sháng gaq nghú, ngamoq gi, muzó shikut hkyô eq wuihke hkyô má, nyi lé, myín lé, zui saí é nghut lhê. ⁹ Ngamoq gi, nungmoq lé garúm nhâng rà ahkang a wó é a nghut, yhumsing gung lé nungmoq cháng rà matú alik dut sháng gaq nghú sheq, haù su kut é ru nghut lhê. ¹⁰ Hkâsu mù gà le, ngamoq, nungmoq eq rahá nyi é hkún, "Mú a kâm zui sù gi, a zo sháng gaq," nghú, nungmoq lé ngamoq mai sang to bê nghut lhê.

¹¹ Hkâsu mù gà le, nungmoq chyáng má é byu ra-am lagon luí, hai mù le a zui e za, mù châng lhoq yuq byí wún akô gà é hkyô lé, ngamoq wó gyô é yanmai nghut lhê. ¹² Ngamoq gi, haù su kut é bang lé, zim za nyi mù zui saí luí, yhumsing é zoshuq ho nyi kó sháng gaq nghú, haù Yhumsing Yesuq Hkrisduq é mying lé lang luí, hkunmó hkyô kat mù, wum byí kat lhê. ¹³ Gumang wui ê, nungmoq kúm gi, ge é muzó kut é hkyô má, hkâ-nhâm le, hkâ-ngú byuq bùm kó.

¹⁴ Byù rayuq yuq gi, laiká shí má ngamoq mhoqshit é hkyô lé, a châng é nghut jang, haù yuq lé rago chôm matsing yù mù, yhang hoq bun sháng gaq, yhang eq hkâzùm yap kó. ¹⁵ Nghut kôlhang, yhang lé gye rayuq đông a sôn e za, gumang rayuq đông lhoq pun lhoq kying nyi keq.

Ló Htàng Lhê É Shi-kyám Dang

¹⁶ Haù nguingón hkyo é Yhumsing yhang gi, ahkying hkangmó eq hkyô hkat hkangmó má, nungmoq lé nguingón hkyô byí nyi sháng gaq. Haù Yhumsing gi, nungmoq banshoq bang eq ru nyi nyi sháng gaq.

¹⁷ Ngò, Poluq gi, ngá é loq mai yhang shi-kyám dang shí lé kâ kat lhê; shí gi, ngò ká é laiká banshoq má kumlhá nghut lhê. Ngò ká é gi, shí đông chyat nghut lhê.

¹⁸ Nga-nhung é Yhumsing Yesuq Hkrisduq é jeju gi, nungmoq banshoq bang chyáng ru joq nyí sháng gaq ô!

TIMOHTI Chyáng Hí Dàm Hun Kat é Laiká (1 Timothy)

¹ Nga-nhùng é hkyi yù Sù Garai Gasang eq nga-nhùng é myit myoqbyù jang nghut é Hkrisduq Yesuq é hkunmò eq rajung za, Hkrisduq Yesuq é lagyo nghut sù, ngò Poluq gi, ² haù lumjìng hkyò má ngá zo sùng nghut sù, Timohti lé dang kyò kat lhê; haù Iwa Garai Gasang eq nga-nhùng é Yhumsing Hkrisduq Yesuq chyáng má é, jeju eq shogyo nhikmyin hkyò, nguingón hkyò gi, náng chyáng ru joq nyí sháng gaq ô.

Sarà Pyoq Pé Lé Sidiq Râ Hkyò

³ Ngò, Makedoni mau má jé wang ló é hkùn, pying to hkò é eq rajung za, Ehpesu myuq má nyi to shi aq; haù hkùn sheq, náng gi, shut shai é mhoqshit hkyò lé mhoqshit é bang a mhoq xoq lo rà matú le, ⁴ myit htoq mhò-myi dang eq a dat htùm é byù xik labaù má yhangmoq a ap nóng rà matú le, haù bang lé hkunmò wó hkyò rà nghut lhê. Haù hkyò pé gi, lumjìng myit mai kut htoq é Garai Gasang é muzó lé lhoq htoq rà malaì, mabyoq jishùm za sheq lhoq htoq nyi é nghut lhê. ⁵ Haù hkunmò hkyò luí myit myoqbyu tò é hkyò gi, chyitdap myit yhang nghut ri; chyitdap myit haù gi, sansêng é i-myit, mara a bò bún é myit eq lumjìng myit akying mai lo é nghut lhê. ⁶ Byù ra-am gi, haù hkyò pé mai htoq ló kòluí, dangsòm tai é hkyò shut lhing ló byuq bekò nghut ri. ⁷ Haù bang gi, jep é tarà sarà pé dut naù kòlhang, yhangmoq hai tai nyi é hkyò lé le, hkyak, hai lé mhoqshit é hkyò lé le, a sé kò nghut ri.

⁸ Rayuq yuq, jep é tarà lé rago chung é nghut jáng, jep é tarà gi, ge é hkyò nghut é lé, nga-nhùng sê lhê. ⁹ Haù jep é tarà gi, dingmán bâng é matú tò tò é a nghut e za, tarà lu lai é bang eq gumlau toq bâng é matú, tarà a hkunggá é bang eq mara kut bâng é matú, a chyoiyúng é bang eq lumjìng hkyò a cháng bâng é matú, yhangmoq é yhàngwa lé nghut nghut, yhàngnu lé nghut nghut, sat pyám bâng é matú, byù sat bâng é matú, ¹⁰ ashop é đông gungsho zùm yap é bang eq yugè yhangchang nyi zo lhum bâng é matú, jùn đông byù ung zo bang, mhaù é bang eq dakam mhaù bâng é matú, tengmán mhoqshit hkyò eq shai lhum é lhunglhang bâng é matú sheq, jep é tarà tò tò é nghut é lé, nga-nhùng sê lhê. ¹¹ Tengmán mhoqshit hkyò haù gi, hkungsò wó é Garai Gasang eq ngo lé ap byi bê nghut é, Yhàng é hpungwup bo é gabú danglù eq rajung za nghut ri.

Poluq Chyáng Yhumsing É Jeju Joq Nyi É Hkyò

¹² Ngò gi, ngo lé wum-o byi é, nga-nhùng é Yhumsing Hkrisduq Yesuq lé jeju hkya-ôn lhê; hkâsu mù gà le, Yhang gi, ngo lé lhumzui sù rayuq đông sôn yù luí, Yhàng é muzó jizó má hkyin kat yu é yanmai nghut lhê. ¹³ Hí hkùn, ngò gi, Garai Gasang lé tai hpoi sù, zing-ri sù eq byù rhoi sù nghut wú kòlhang, a sé shi mù lumjìng myit a bo e za kut é yanmai, shogyo nhikmyin yu é hkyò lé ngò wó yu é nghut lhê. ¹⁴ Nga-nhùng é Yhumsing é jeju lé le, Hkrisduq Yesuq eq sêng é lumjìng myit eq chyitdap myit lé le, ngá chyáng agùn agó hut hkyò kat byi bê nghut ri.

¹⁵ Yubak dap bang lé hkyi yù rà matú, Hkrisduq Yesuq gi, mingkan má jé lé bê gà é dang gi, lumjìng é mungdang nghut luí, gè gè yhang lhom yù gíng é dang nghut lhê. Haù yubak dap bang má, ngò gi, yubak je ko sù nghut é nghut lhê. ¹⁶ Nghut kòlhang, Hkrisduq Yesuq gi, Yhang lé lumjìng luí ahtum abyuq é asak lé wó yù rà bâng é alik dut rà matú, yubak dap bang má yubak je ko sù nghut é, ngá é ahtog má, Yhàng é hkam jan hkyò lhunglhang wó tùn shit sháng gaq ga, Garai Gasang gi, ngo lé shogyo nhikmyin yu ri. ¹⁷ Haù mù, haù aróng eq hpungwup shingkang gi, ahtum abyuq é, a dat htên byoq é, myoq èq a byu-myang é Hkòhkâm nghut sù, rayuq zâ é Garai Gasang chyáng pyat dedu ahtum abyuq ru joq nyí sháng gaq ô! Amen.

¹⁸ Ngá zo Timohti é, náng eq séng luí myiqhtoì dang joq wú é eq rajung za, ngò gi, náng lé haù đông mhoqshit kat lhê; haù mù, náng gi, haù pé lé chung nyi luí, ge é majan zan mù, ¹⁹ lumjìng myit eq mara a bò bún é myit bo nyi sháng gaq. Byù ra-am gi, haù hkyò pé lé he-ngik pyám kò é nghut luí, yhangmoq é lumjìng myit gi, wui-sanghpo htên byoq ló é su htên byoq byuq bekò nghut ri. ²⁰ Haù bang má, Humenu eq Alesander le bò kòmù, Garai Gasang lé tai hpoi é dang a tai rà matú mhoq yù kó sháng gaq ngù, ngò, yhangnhik lé Tsadán é loq má ap pyám bê nghut lhê.

2

Noquq Hkyò Eq Séng Luí Mhoqshit Byi É Hkyò

¹ Haù mù luí, ngò, hí pying kat nau é gi, tarà hkunggá é eq hkungga gíng é hkyò ban-shoq má, nga-nhùng wó nguingón yuqyo nyi sháng gaq, hkòhkâm pé eq ahkáng ayá wó bang ban-shoq é matú le, ² yuq hkangmó é matú le, dúng tóngbán byi, kyúdung byi, dúng xoq byi, jeju hkya-on byi, kut aq ngù nau ri. ³ Haù gi, ge é hkyò nghut mù, nga-nhùng é hkyi yù Sù Garai Gasang ô nau é hkyò nghut ri. ⁴ Yhang gi, byù lhunglhang bang hkyi yu é hui mù, tengmán é mungdang lé sê gyo rà lé, ô nau nyi ri. ⁵ Hkâsu mù gà le, Garai Gasang

gi, rayuq za nghut lui, Garai Gasang eq byu é goro má sô xoq byi sù le rayuq za nghut lhê; haú yuq gi, xângzo byù nghut é Hkrisduq Yesuq nghut ri. ⁶ Yhang gi, byù lhunglhang bâng é matú shihtá gunglik hkungga dông Yhânggung lé byi pyâm bê nghut ri; haú gi, ahkýing yam-yoq jé é hkùn, saksé htoq shit bê nghut lhê. ⁷ Ngò gi, tũngbaù pé lé, tengmán é lumjúng hkyô mhoqshit rá matú, hkô kyo sù rayuq eq lagyo rayuq dông hkyin tô é hui sù nghut lhê. Ngò, haú su taí é gi, mhaú taí é a nghut, têng é hkyô lé za taí nyi é ru nghut lhê.

⁸ Yuqgè wui gi, nhikjum yô é hkyô eq dang htíng htíng lhùm é hkyô a bo e za, jowò hkangmó má chyoiyúng é loq tú mù kyúdung rá lé, ngò ô nau ri.

⁹ Myiwe wui gi, xâm nik nik é, hĩng zè, palhé, hpaù jung mebù èq a mhôn chung e za, siri bo é mebu wut chũng mù, tap tap za, shuq shuq za kut lui, ¹⁰ Garai Gasang lé noqkuq é myiwe wui eq gĩng shoq, ge é muzó èq yhumsing gũng lé mhôn nyi rá lé le, ngò ô nau ri.

¹¹ Myiwe gi, uphkang tô é dông chãng nyi mù, zim za mhoq yù kó sháng gaq. ¹² Myiwe gi, yuqgè lé mhoqshit rá hkyô lé le, yuqgè lé uphkáng rá hkyô lé le, ngò ahkáng a byi; myiwe gi, zim za kut nyi rá rá nghut lhê. ¹³ Hkásu mù gá le, Adam lé hí hpan to mù, Ewaq lé hpan é ru nghut lhê. ¹⁴ Hau htoq agó, Adam gi, mhaú é hui zo sù a nghut; haú myiwe sheq mhaú é hui zo lui, mara kut shut é ru nghut lhê. ¹⁵ Nghut kôlhang, myiwe wui gi, lumjúng myit, chiytdap myit eq chyoiyúng hkyô má, shuq shuq za kut mù, yhangmoq xoq chãng nyi kô é nghut jáng, zoshâng hku é dông mai hkyi yu é hui kó rá nghut lhê.*

3

Hpúng-up Eq Hpungtê Kut Râ Bàng É Hkyô

¹ Rayuq yuq, hpúng-up ayá lé ô nau nyi é nghut jáng, haú yuq gi, aróng wó é muzó lé ô nau nyi ri gá é dang gi, lumgĩng é dang nghut nyi ri. ² Haú mù lui, hpúng-up rayuq gi, mara hũn rá hkyô a bo é sù, myiwe rayuq za wó é sù, dat sidiq é sù, yhumsing gũng lé wó hkang é sù, hkungga gĩng é sù, byù bíng lé dat hkulum é sù, dat mhoqshit é sù, ³ ihpè é jùn a dut é sù, byoq lhum byoq cheq a kut e za nũm é sù, mabyoq jishũm a lhoq htoq é sù, ngunzè lé a chiytdap é sù, nghut rá lhê. ⁴ Yhang gi, yhâng é ikun lé rago dat uphkáng lui, yhang zô pé mai hkungga myit bo é èq yhâng dang lé gyo byi é sù le, nghut rá lhê. ⁵ Rayuq yuq, yhumsing é ikun lé lhang a dat uphkang é nghut le gi, Garai Gasang é noqkuq hpúng lé gi, hkásu kut wó wú gon

rá lhu? ⁶ Chángzo dut é a myáng shi é sù gi, hpúng-up wó kut rá a nghut, kut é nghut jáng, yhang gi, nghutbũn lò lui, jéyáng é hkyô lé nat Tsadán hui zô é su hui zo abe. ⁷ Hpúng-up rayuq gi, tũngbaù pé hí má ge é mying wó é sù le dut rá lhê; haú jáng, yhang gi, taí hpoi pyâm é lé le a hui, nat Tsadán é tuihkyó má le a myí, dut rá nghut lhê.

⁸ Haú eq rajung za, hpungtê pé gi, hkungga gĩng é bang, shô-kó a xân é bang, ihpè é jùn a dut é bang, a tengmán é amyat lé a ho é bang, nghut rá lhê. ⁹ Yhangmoq gi, lumjúng hkyô má é nik é mauhpo tengmán hkyô pé lé, sansêng é i-myt eq chãng nyi ra rá nghut lhê. ¹⁰ Yhangmoq gi, chyam é lé hí hui wú kó sháng gaq, hau htàng, yhangmoq lé mara hũn rá hkyô haí a bò lo jáng, hpungtê mù lé wùn kó sháng gaq.

¹¹ Haú eq rajung za, yhangmoq é yhumsing myhĩ pé le, myit no nhang é dang a taí e za, dat sidiq é eq hkyô hkangmó má lumgĩng lui, hkungga gĩng é myiwe wui, nghut ra rá dut lhê.

¹² Hpungtê rayuq gi, myiwe rayuq za wó é sù, yhangzô pé eq yhâng ikun lé rago za dat wùn waq é sù, dut rá rá nghut lhê. ¹³ Hpungtê mù lé rago za wùn waq bê bang gi, yhumsing é matú aróng lé le, Hkrisduq Yesuq lé yhangmoq lumjúng hkyô má, gyuq kyum é hkyô a bo é myit mó lé le, hkyak wó yu akò nghut ri.

¹⁴ Ngò gi, hkâ-myháng a myáng má náng chyáng lé jé rá matú, myit myoqbyu to kôlhang, ahkýing du myáng pyâm lé, ¹⁵ Garai Gasang é ikun hkaú má, byu pé hká dông nyi yap rá é hkyô lé, nãng sé sháng gaq ngũ, pying kat é dang shi pé lé ká byi kat lhê; ikun haú gi, rù dui nyi é Garai Gasang é noqkuq hpúng nghut lui, tengmán hkyo é hkungmó-zĩng eq apũn awang nghut ri. ¹⁶ Tará hkungga hkyo é zau tô é hkyô gi, ko dik é nghut é lé, ó yuq le wó he-ngik pyâm é a nghut;

haú gi, Yhang, byù gungsho má htoq shit mù, haú Woi-nyí mai Yhang lé saksé hkám byi lui, maumang lagyó pé gi, Yhang lé myàng bê nghut ri;

byuhú ahú hú má Yhâng é hkyô lé hko kyo mù, Yhang lé mingkan byu pé lumjúng lui, hpungwup shingkaung eq Yhang lé mauhkũng shut shui toq yú bê nghut ri.

4

Timohti Lé Mhoqshit É Hkyô

¹ Jihũm buinyi pé má, byù ra-am gi, lumjúng hkyô mai htak htoq ló lui, mhaú zô é woi-nyí pé htàng cháng kó rá eq nat gang mai lo é mhoqshit hkyô pé lé gyo byi kó rá nghut lhê ga, haú Woi-nyí gi, san za tai

ri. ² Haú sù é mhoqshit hkyô pé gi, gegùn labyoq kut é byù-mhaú pé chyáng mai lo é nghut lhê; haú bâng é myit nhiklhum gi, nyhê nhe tô é shamtoq eq nyhê man tô é su dut byuq bê nghut ri. ³ Haú bang gi, hâng lhùm é hkyô lé hkùm tang é hkyô lé le, haú lumjúng luí tengmán hkyô lé sê é bang mai jeju hkya-on mù hap yù ge é, Garai Gasang hpan to byí é zoshuq lé koi pyám nhang é le, kut akò nghut ri. ⁴ Garai Gasang hpan tô é lhunglhang gi, ge é chyat nghut ri; Garai Gasang é mungdang eq kyúđung é dang đong haú pé lé lhoq sân-yúng nyi é nghut é yanmai, ⁵ jeju hkya-on luí hap yù é nghut le gi, haí jung lé lhang he-ngik pyám rá hkyô a bò nghut ri.

⁶ Haú gumang wui lé, nàng haú hkyô pé lhoq pun lhoq kyíng é nghut le gi, nàng gi, haú nàng cháng bê ge é mhoqshit hkyô eq lumjúng hkyô má é tengmán hkyô má, kò myhâng sù nàng nghut rá htoq agó, Hkrisduq Yesuq é ge é hpungmò wùn sù le dut rá nghut lhê. ⁷ Garai a bo é myit htoq mhò-myi dang eq hpô-myhí mâng pé é mhò-myi dangsóm lé koi pyám luí, tará hkunggá é hkyô má yhumsging gùng lé lhoq kùng yù aq. ⁸ Hkásu mù gá le, gungsho lé lhoq kùng é hkyô gi, akyù shau za htoq é nghut lhê; nghut kôlhang, tará hkunggá é hkyô kùm gi, jung hkangmó é matú akyù bò lhê nghut mù luí, shí ipyat má le, htang pyat má le, akyù bò nyi ri.

⁹ Haú gi, banshoq hap yù gíng é, lumgíng é mungdang nghut lhê. ¹⁰ Haú mù luí, xàngzo byù banshoq bâng é hkyi yù Sù nghut é, je riyhang, lumjúng bâng é hkyi yù Sù nghut é, rú dui nyi é Garai Gasang má, nga-nhúng, myit myoqbyu to bê nghut é yanmai, nga-nhúng gi, gvai yhang shikut nyi lhê.

¹¹ Haú pé lé, hkunmó hkyô luí mhoqshit byí nyi aq. ¹² Náng é zorâm pyat lé, ó yuq eq le a wú tiq pyám sháng gaq, dang tai é má le, nyi yap é hkyô má le, chyitdap é hkyô má le, lumjúng hkyô má le, sansêng é hkyô má le, lumjúng bâng é matú alik kut shit nyi aq. ¹³ Náng chyáng ngò jé lé é buinyi jé shoq, nàng gi, Chyúmdang nghap kyô é má le, hko kyô é má le, mhoqshit é má le, ap nóng nyi aq. ¹⁴ Nàng gi, hpúng suwún wui náng é ahtoq má loq ke byí é hkùn, myiightoi dang đong nang lé Garai Gasang byí to bê nghut é, woi-nyi hkyô eq sêng é chyunghuq lé, haí su a ngàm hkákut pyám.

¹⁵ Haú hkyô pé lé, myit zìng zuq luí zui sai nyi aq; nàng kò myhang lo é hkyô lé, yuq hkangmó byu-myang kò sháng gaq, nàng gúng banshoq haú pé má ap nóng nyi aq. ¹⁶ Náng é asak dui hkyô má le, nàng mhoqshit é hkyô má le, rago sidiq nyi aq. Haú pé má ru gíng nyi aq, hkásu mù gá le, nàng haú su kut é nghut jáng, náng é asak lé le, náng

chyáng mai gyô yu é bang lé le, nàng wó hkyi yù rá nghut lhê.

5

Suwún Wui, Chuimó Pé, Jùn Pé Eq Séng Luí Hpaqchyí Byí É Hkyô

¹ Asak kò sù lé dang htân a tân e za, yhumsging é iwa lé su, yang lé lhoq pun lhoq kying aq. Zorâm wui lé gi, gumang wui lé su, ² asak kò é myiwe wui lé gi, ìnu pé lé su zùm yap luí, zomyi wui lé gi, nhammó wui lé su sansêng é i-myt banshoq eq zùm yap nyi aq.

³ Gè ge yhang garúm rá dut é chuimó myhí pé lé, hkunggá nyi keq. ⁴ Nghut kôlhang, chuimó myhí rayuq yuq gi, zoshâng nghut nghut, gashu nghut nghut, wó é nghut jáng, haú bang gi, yhumsging é ikun lé wú gon luí, ìnu iwa eq ìchyí ìwhoí pé lé jeju taù é đong, yangmoq é lumjúng hkyô lé, zui sai é má lhoq nhân nhâng rá lé hí mhoq yù ra rá nghut lhê; hkásu mù gá le, haú gi, Garai Gasang ô nau é hkyô nghut ri. ⁵ Haú lùm rá ó yuq le a wó mù, gè ge yhang rá tô é chuimó myhí gi, Garai Gasang chyáng myit myoqbyu nyi luí, nyi, myin xoq xoq kyúđung mù, Garai Gasang garúm rá hkyô lé đung nyi ri. ⁶ Nghut kôlhang, ngón hkyô za cháng luí asak dui é chuimó myhí gi, asak dui nyi kôlhang, shí gù nghut bê nghut ri. ⁷ Yhangmoq lé, ó yuq eq le mara a hùn kó sháng gaq, haú hkyô pé lé le mhoqshit byí nyi aq. ⁸ Rayuq yuq, yhâng é buinùm ji-myi wui lé a baú é htoq agó, je luí yhumsging é ikun byù lé a baú é nghut le gi, haú lumjúng hkyô lé he-ngik pyám bê nghut luí, a lumjúng su htoq má je ashop é sù dut bê nghut ri.

⁹ Hkyuq xê zàn byíng bê é chuimó myhí za a nghut jáng, chuimó jìhpán má wó kat rá a nghut; hau htoq agó, yang gi, yuqgè rayuq za wó wú é sù; ¹⁰ zoshâng wui lé hku baú é sù, bíng lé rago dat hkulum é sù, sân-yúng bê bang é hkyi lé chi byí é sù, wuihke huí tô é bang lé garúm luí, ge é muzó junglhang jungmó má yhumsging gùng yang ap nóng nyi ri ga, yangkut é ge é muzó má myíng hù é sù le, nghut rá lhê.

¹¹ Asak tiq é chuimó myhí pé lé, jìhpán haú má hkákut. Hkásu mù gá le, gungsho ô nau é hkyô eq Hkrisduq chyáng yangmoq ap nóng tô é hkyô lé ung pyám é hkùn, yangmoq gi, myi ló naù kó rá nghut lhê. ¹² Haú mù, yangmoq gi, sâng-hi lé yangmoq tò tô é danggidiq lé lhoq hpyoq pyám kò é yanmai, tará dará é hui zo kó rá nghut lhê. ¹³ Hau htoq agó, yangmoq gi, rayhùm htàng rayhùm châng wang wún kômù, lagón mán byuq kó rá nghut lhê. Lagón é bang za dut kó rá a nghut, lumù gansang é bang eq yangmoq tai a ge é pé lé tai kômù, yhumsging eq a sêng é mù má châng wang nyo wún é bang le, dut kó rá nghut lhê.

14 Haù mù luí, gye pé mai lumù gansâng dang a wó tai pyám kó sháng gaq, asak tiq é chuimó myhí pé gi, myi lô mù, zoshâng hkù luí, yhangmoq é ikun lé gôn lajang rá matú, ngò, yhangmoq lé hpaqchyí byí kat lhê. ¹⁵ Hkâsu mù gâ le, ra-am gi, lhing taù lô kôluí, Tsadán é htâng châng nyí lugù nghut bekò nghut ri.

¹⁶ Lumjîng é myiwe rayuq yuq gi, yhang é ikun má chuimó myhí wó é nghut le, haù yuq é matú noqkuq hpúng lé wòlai a hun e za, yhang mai garúm yù ra rá nghut lhê; haù hkùn sheq, noqkuq hpúng gi, gè gè yhang rá tò é chuimó myhí pé lé wó garúm rá nghut lhê.

¹⁷ Haù noqkuq hpúng lé rago za shuí ù é hpúng suwún wui gi, akyù í tú hkam yù gíng lhê; haù mungdang hko é hkyô eq mhoqshit é hkyô má shikut é suwún wui gi, je riyhang hkam yù gíng lhê. ¹⁸ Hkâsu mù gâ le, "Guq nâng nyi é no lé, nhuttsung hkâ-tsung to byi."* ga le, "Mù zui sù gi, yhang é zuihpau wó yù gíng lhê."* ga le, Chyúmdang má tai tò ri. ¹⁹ Hpúng suwún rayuq lé mara hun é hkyô lé, í yuq sum yuq mai saksé hkâm e za a nghut le gi, hkâlhom yí. ²⁰ Nghut kôlháng, lhoq pun lhoq kyîng é hkyô lé góbang wó yù kó sháng gaq, mara kut shut é bang lé, shiwa byu pé hí má tân mhoqshit aq.

²¹ Pying kat é dang shi pé lé, gamhkui myit a bo e za châng nyi rá eq, myoqdong hkyîn luí haí le a kut rá matú, Garai Gasang eq Hkrisduq Yesuq é hí má le, hkyîn yù huí é maumang lagyô pé é hí má le, ngò, nang lé pying kat lhê.

²² Ó yuq é ahtoq má le loq ke* byi rá lé hkâhân; góbâng é mara hkaù má le hkâbo lôm. Yhumsîng yhang yhumsîng sân-yúng shoq kut nyí aq.

²³ Náng é wamdau ra luí, anum num no lò lò dut é yanmai, nang gi, wui za shuq é hkyô lé nô pyám luí, tsibiyiq wing le ratsuí tsuí shuq byi aq.

²⁴ Byù ra-âm é mara pé gi, de de dut é nghut mù luí, tará jéyáng é jang má hí lô jé ri; ra-âm é mara kúm gi, hau é htâng má châng byông htoq lo ri. ²⁵ Haù eq rajung za, ge é muzô pé gi, de de nghut nyí luí, haù su de de a nghut é pé lé le, wó zaù to rá a nghut.

6

¹ Jùn dut é wòlai hkaù má nyi é lhunglhâng bang gi, yhangmoq é yhumsîng wui lé gyai yhang hkungga gíng lhê nghú, myit yù rá dut lhê; haù hkùn sheq, Garai Gasâng é myîng eq nga-nhùng é mhoqshit hkyô gi, lumù gansang é a hui rá nghut lhê. ² Lumjîng é yhumsîng wui é jùn gi, gumang wui nghut é yanmai, yhangmoq lé a wú myuq é za,

yhangmoq dojaù luí akyù myang hkâm zô é bang gi, lumjîng bang eq chyitdap gíng é bang nghut é yanmai, yhangmoq lé je ge é dông dojaù rá lhê. Shí hkyô pé lé, nang gi, yhangmoq lé mhoq byí nyi é eq lhoq pun lhoq kyîng byí nyi aq.

Ngùn Lé Chyitdap É Hkyô

³ Rayuq yuq gi, shut é lumjîng hkyô lé mhoqshit luí, nga-nhùng é Yhumsîng Yesuq Hkrisduq é tengmán mhoqshit hkyô eq tará hkunggá é mhoqshit hkyô lé a myit huí é nghut jáng, ⁴ haù yuq gi, nghutbùn é sù eq haí lé le a sê gyô é sù nghut ri. Yhang gi, htuq htîng lhùm é hkyô pé lé ô nau é, a ge é myit bò luí, dang eq séng mù mabyoq lhoq htoq ri; haù mai, manon é hkyô, byoq lhum byoq cheq é hkyô, lumù gansang é hkyô, agè ashop é dông myit ngam pyám é hkyô eq, ⁵ haù tengmán hkyô lé lhoq hpyuq pyám mù, tará hkungga hkyô gi, ngùn zè wò hkyô za nghut ri ga myit yu é, i-myt lhoq htên pyám bê bâng é gyoro má, byìn a huí é hkyô pé lé, lhoq htoq kat ri.

⁶ Nghut kôlháng, tará hkunggá hkyô má nhik dik é hkyô bo é nghut le gi, amyat mó nghut nyi ri. ⁷ Hkâsu mù gâ le, nga-nhùng gi, mingkan htoq má hai jung le a yu wang lé, haù mai le haí wó yu htoq lô rá a nghut.

⁸ Haù mù luí, nga-nhùng gi, wutbu wutme eq zoshuq wó é nghut jáng, hau eq nhik dik nyi sháng. ⁹ Wó nau sùt nau é byu pé gi, gunglau hkyô eq tuihkyô má le, haù byoq yeq hkyô eq htên byoq hkyô má, byu pé lé myup shí nhang é, ngha é hkyô myo myo eq myit nô nhâng nau é hkyô má le, byit gyô wâng kó rá nghut lhê. ¹⁰ Hkâsu mù gâ le, ngùn lé chyitdap é hkyô gi, agè ashop hkyô ajung jûng é apùn awang nghut nyi ri. Byù ra-am gi, ngùn lé ô nau luí, haù lumjîng hkyô mai sô nghoq lô mù, yhumsîng gùng lé yhumsîng, haù yón kuq hkyo éq htaù rot pyám bekò nghut ri.

Timohti Lé Pying Kat É Dang

¹¹ Nghut kôlháng, Garai Gasâng é byù nang gi, haù pé banshoq lé koi pyám luí, dingmán hkyô, tará hkungga hkyô, lumjîng hkyô, chyitdap hkyô, hkam jan hkyô eq nú-nhâm é hkyô pé lé châng hkat nyí aq. ¹² Lumjîng hkyô eq séng é ge é majan le zân nyi aq. Hap yù lumjîng bê ga, saksé myo myô pé é hí má, ge é dông nang yin yu é hkùn, wut yu é hui luí wó é ahtum abyuq é asak lé, zui zing nyi aq. ¹³ Haù lhunglhâng lé asak byí é Garai Gasâng é hí má le, Pontu Pilat chyáng saksé hkâm nyi é hkùn, ge é dông yin yu é Hkrisduq Yesuq é hí má le, ngò, nang lé pying kat lhê: ¹⁴ Yhâng é ahkyîng yam-yoq jé jáng, Garai Gasang htoq shit nhâng rá nghut

* 5:18 Tará Pun 25:4 * 5:18 Luk 10:7 * 5:22 Haù hkun lhê bang gi, hpúng suwún kut rá matú hkyin to bê bang lé, loq ke kyúdung byí é nghut lhê.

é sũ, nga-nhũng é Yhumsĩng Yesuq Hkrisduq htoq shĩt é buinyi jé shoq, ¹⁵ nãng gi, agot a-u é hkyô eq mara hũn rã hkyô a bo e za, hkunmó shĩ lé chãng nyi aq. Garai Gasang gi, hkungso wó sũ, Yhang za up sũ, hkohkam pẽ é Hkohkãm, yhumsing pẽ é Yhumsĩng, ¹⁶ Yhang za ahtum abyuq dui nyi sũ, a ge chyãng htepe é maubó má dui nyi sũ, ó yuq èq le a myang wú é, a wó myang é sũ nghut nyi ri. Aróng eq hpungwup a-tsam gi, Yhãng chyãng ahtum abyuq ru joq nyi shãng gaq ô! Amen.

¹⁷ Shĩ ipyat má wó sũt é bang gi, a gumrông rã eq a gĩng é sutzẽ má yhangmoq é myit myoqbyu hkyô a tô e za, nga-nhũng nguĩngón yuqyo nyi rã matú jungkhãng jungmó lé agũn agó byĩ é sũ, Garai Gasãng chyãng za, yhangmoq myit myoqbyu nyi rã matú, hkunmó hkyó aq. ¹⁸ Ge é hkyô kut lui, ge é muzó má wó sũt nyi mù, a chum e za, gam chũng nau é myit bò rã matú, yhangmoq lé hkunmó hkyó aq. ¹⁹ Haú dõng mai, yhangmoq gi, jé lô rã ipyat é matú gĩng é apũn awang dõng, yhangmoq é matú sutzẽ wó tsĩng to kó rã nghut lhẽ; haú hkũn sheq, yhangmoq gi, asak kyĩng nghut é asak haú le wó zuĩ zĩng to kó rã nghut lhẽ.

²⁰ Timohti ẽ, nang lé ap to bẽ hkyô lé, zũng nyi aq. Tarã a hkunggã é po-mĩng mĩng bãng èq hpaqchyĩ nghut lhẽ ga myhĩng shut é htuq hĩng lhum lhum kut é hkyô lé, koi pyãm aq. ²¹ Byũ ra-am gi, haú lé hpaqchyĩ nghut lhẽ ga yĩn yũ kólui, haú lumjĩng hkyô mai so nghoq htoq ló byuq bekõ nghut ri.

Jeju gi, nungmoq chyãng ru joq nyi shãng gaq ô.

TIMOHTI Chyáng Htang Dàm Hun Kat é Laiká (2 Timothy)

¹ Hkrisduq Yesuq chyáng má é asak byi rá gá é danggidiq eq rajung za, Garai Gasang ó nau é dōng, Hkrisduq Yesuq é lagyo nghut sū, ngò, Poluq gi, ngò chyitdap é ngá zo Timohti lé, dang kyô kat lhê.

² Haú Íwa Garai Gasang eq nga-nhúng é Yhumsing Hkrisduq Yesuq chyáng má é jeju eq shogyo nhikmyin hkyô, nguingón hkyô gi, ru joq nyi sháng gaq ô!

Lumlug Râ Matú Myit Wum Byí É Hkyô

³ Ngò gi, ngá é kyûdung dang má, nyi, myín, abyit alan nang lé bunn nyi uchyang, sân-yúng é i-myt mai, ngá é íchyí íwâ pé dojaú é su, ngò dojaú nyi é Garai Gasang lé, jeju hkya-ón nyi lhê. ⁴ Ngò gi, ngò má gabú hkyô bying jup sháng gaq nghũ, náng é ngaubyi lé myit bunn nyi mù, nang lé gyai yhang myang nau nyi ri. ⁵ Ngò gi, nang é gyíng é lumjǐng myit lé lhoq pũn yũ mù, náng whoi Lu-i eq náng nu U-ni nhik chyáng má hí bo é lumjǐng myit, ahkuí, náng chyáng le bo ri nghũ, hkyak myit lum nyi lhê. ⁶ Hau é yanmai, ngò loq ke byí é dōng, náng má bo tô é Garai Gasang é chyungluq lé, gyúng nhang nyi rá matú, nang lé ngò lhoq pũn kat lhê. ⁷ Hkásu mù gá le, Garai Gasang gi, gyuq sê é myit nga-nhúng lé a kat byí é za, a-tsam bo é myit, chyitdap sê é myit, yhumsing gũng lé dat hkgang é myit sheq kat byí tô é ru nghut lhê.

⁸ Haú mù luí, náng gi, nga-nhúng é Yhumsing eq séng luí saksé hkâm é hkyô má le, Yhâng é yanmai htōng byú dut to sũ ngá é hkyô má le, hoq myit a bo é za, Garai Gasang é wum-o mai, haú gabú danglu é matú, ngò eq rahá wuĩhke jamjau chòm hui goq. ⁹ Garai Gasang gi, nga-nhúng zui saí é muzó dōng a nghut é za, Yhànggũng yhang myit sôn tô é hkyô eq Yhâng é jeju yanmai za, nga-nhúng lé, hkyi yũ luí chyoiyúng é asak dù hí hkyô má ji yũ bê nghut ri. Ahkyíng nghu é lháng a joq shí mai yhang, jeju haú gi, Hkrisduq Yesuq má nga-nhúng lé byi to gũ nghut bê. ¹⁰ Nghut kólhang, nga-nhúng é hkyi yũ Sũ, Hkrisduq Yesuq pò htoq é dōng, ahkuí, haú lé lhoq htoq shít bê nghut ri. Yhang gi, shí-nò hkyô lé lhoq htên pyám luí, haú gabú danglũ dōng mai, asak lé le, a dat htên byoq é hkyô lé le, lhoq htoq shít bê nghut ri. ¹¹ Ngò gi, gabú danglu é matú hko kyo sũ, lagyo eq mhoqshít sũ dōng, hkyin tô é hui sũ nghut lhê. ¹² Hau é yanmai, ngò gi, wuĩhke jamjau shí lé hui nyi é nghut lhê. Nghut kólhang, ngò gi, ó yuq lé lumjǐng bê

nghut é hkyô lé, sê é htoq agó, Yhang lé ngò ap tô é pé lé, haú buinyi jé shoq, Yhang wó zúng rá nghut lhê nghũ hkyak myit lum tô é yanmai, ngò a hoq.

¹³ Náng gi, ngá chyáng mai wó gyô yu é tengmán dang pé lé, Hkrisduq Yesuq má, lumjǐng myit eq chyitdap myit mai alik kut yu nyi aq. ¹⁴ Náng lé ap byí to bê, haú ge é mungdang lé, nga-nhúng chyáng bo tô é Chyoiyúng Woi-nyi é wum-o mai zúng nyi aq.

¹⁵ Asia mau má é bang yuq hkangmó gi, ngò lé pyám to kô é hkyô lé, náng sê lhê; haú bang má, Hpugelu eq Heramoge nhik le bo akó nghut ri.

¹⁶ Haú Yhumsing gi, Onesihpurú é yhum-byũ lé shogyo nhikmyin é hkyô tún shít sháng gaq; hkásu mù gá le, yhang gi, ngò lé anum num myit lhoq ngón é htoq agó, ngò wut é shamtoq-tuí é yanmai, a hoq é za, ¹⁷ yhang, Romaq myuq má jé nyi é hkũn, ngò lé myang hui shoq, ho shikut é sũ nghut ri. ¹⁸ Haú Yhumsing gi, haú buinyi má, yhang lé haú Yhumsing é shogyo nhikmyin hkyô byi sháng gaq! Ehpesu myuq má, yhang ngo lé hkâ-myhó garũm bê nghut é gi, náng rago yhang sé lhê.

2

¹ Haú mù, ngá zo é, náng gi, Hkrisduq Yesuq má é jeju hkaú má, wum bo nyi aq. ² Náng gi, saksé myo myó é hí má ngá chyáng mai wó gyô yũ bê hkyô pé lé, góbang lé dat mhoqshít é, wó lum é bang lé ap byi aq. ³ Hkrisduq Yesuq é ge é gyezo rayuq su, wuĩhke hkyô lé chòm jan nyi sháng. ⁴ Gyezo rayuq dōng gye mù wũn waq nyi é sũ, ó yuq nghut kôle, gotũ muzó má a bo lom é za, yhang lé hkunmó hkyô nyi é gyezau lé, gabú nhang nau é chyat nghut lhê. ⁵ Haú eq rajung za, shingjóng é sũ rayuq lé, shingjóng lhum pói wang é hkũn, tô tô é tará dōng a châng é nghut le gi, ung é aróng chyungluq lé wó yũ rá a nghut. ⁶ Yo-mũ zui shikut é sũ gi, kyôshí lé sâng-hi myang hkam yũ rá sũ nghut lhê. ⁷ Haú Yhumsing gi, shí pé banshoq lé wó sê é nyan nang lé byi rá nghut é yanmai, ngò taí é hkyô pé lé myit wú aq;

⁸ Haú Dawiq é awut ashín nghut sũ, Yesuq Hkrisduq gi, shí é mai dum dui toq bê hkyô lé myit bun aq; haú gi, ngá é gabú danglũ nghut lhê. ⁹ Gabú danglũ hau é yanmai, mara bô sũ rayuq lé su, ngò gi, kyum hut é hui luí, hpuzó nyi é nghut lhê. Nghut kólhang, Garai Gasang é mungdang gi, kyum hut hui é a nghut. ¹⁰ Haú mù luí, ngò gi, Hkrisduq Yesuq chyáng má é hkyi yũ hkyô eq ahtum abyuq é hpungwup shing kang lé wó yũ kó sháng gaq nghũ, haú hkyin yũ hui bâng é matú, jung hkangmó lé hkam jân nyi lhê.

- 11 A-ô mã é dang gi, lumging é dang nghut lhê:
Nga-nhung gi, Yhang eq rahá shi bê nghut jang, Yhang eq rahá dui rá nghut lhê.
- 12 Nga-nhung gi, hkam jan é nghut jang, Yhang eq rahá up rá nghut lhê.
Nga-nhung gi, Yhang lé he-ngik pyâm é nghut jang, Yhang le, nga-nhung lé he-ngik pyâm rá nghut lhê.
- 13 Nga-nhung gi, lhumzui myit a bò kôlhng, Yhang gi, lhumzui nyi rá nghut lhê. Hkâsu mù gâ le, Yhang gi, yhanggung yhang wó he-ngik pyâm é a nghut.

Garai Gasâng Hí Má Myoqdong Wó É Mú Zui Sú

14 Nang gi, yhangmoq lé, shí hkyô pé xoq lui lhoq pún nyi aq. Dang pé eq séng lui, a byoq lhúm nyi kó sháng gaq, Garai Gasâng hí má yhangmoq lé sidiq byi aq. Haú gi, akyú a bo é htoq agó, wó gyô é bang lé htên byoq nhang é hkyô za nghut lhê. 15 Nang gi, haú tengmán é mungdang lé jo shoq chung jai é eq, hoq nó a rá é mù zui sú rayuq đông Garai Gasâng hí má myoqdong wó shoq, wó dut é myhó shikut aq. 16 Tarâ a hkunggâ é poming ming bang lé koi pyám aq. Hkâsu mù gâ le, haú su kut é bang gi, tarâ a hkunggâ é hkyô má je riyhang wang nân ló byuq é bang dut kó rá nghut lhê. 17 Yhangmoq é mhoqshit hkyô gi, mong ana su byo myín ló rá nghut lhê; haú bang má Humenu eq Hpilitu nhik le bò kôluí, 18 haú tengmán hkyô mai sô nghoq ló byuq akó. Yhangnhik gi, haú dum dui toq hkyô dut lai bê ga tái kômù, raâm é lumjing hkyô lé lhoq htên pyâm byi akó nghut ri. 19 Nghut kôlhng, "Haú Yhumsing gi, Yhang eq séng é bang lé sê lhê."* ga lui le, "Haú Yhumsing é mying lé yín yu é bang yuq hkangmó gi, agè ashop hkyô mai lhing tau ra kó rá nghut lhê." ga lui le, dizik haú htung tap tô é, Garai Gasâng é ging tung é apún awang gi, ging nyi ri.

20 Yhúm mó ralhum má gi, hing auhkoq zè, ngùn auhkoq zè baú za joq é a nghut, sik auhkoq zè, tse auhkoq zè le joq lhê; ra-am gi, aróng hkyo é matú, ra-am gi, aróng hkyo é matú a nghut. 21 Haú mù lui, haú pé mai yhumsing gung lé lhoq sansêng pyâm é sú gi, chyoiyúng lui, haú Yhumsing chung jai ging é sú, ge é muzó hkangmó kut rá hen tô é sú nghut é yanmai, aróng hkyo é matú chungzè dut rá nghut lhê.

22 Zoram é agè ashop é ô naú hkyô lé koi pyám mù, haú sân-yúng é myit mai, Yhumsing lé wut dưng é bang eq rahá, dingmán hkyô, lhumzui hkyô, chyitdap hkyô, nguóngón hkyô pé lé, châng hkat nyi aq. 23 Go é eq ngok é đông dang jet jet lhúm é hkyô gi, mabyoq lhoq htoq é hkyô nghut é lé, nang sê lhê nghut é yanmai, haú hkyô lé

koi pyám aq. 24 Haú Yhumsing é dui-nhang zoshâng gi, mabyoq a lhoq htoq é za, yuq hkangmó lé dat myit tê byi é, wó mhoqshit é, a dat nhik-yô é su dut ra rá nghut lhê. 25 Yhang gi, yhang lé htuq htêng é bang lé, nú-nhâm é đông mhoqshit byi ra rá nghut lhê; haú hkún, Garai Gasang gi, yhangmoq lé myit lhing hkyô byi mù, tengmán hkyô lé sê gyo nhang lui, 26 yhangmoq gi, bûn gyíng lò mù, nat Tsadán ô nau é hkyô lé kut byi rá matú, chyup yú huí é, nat Tsadán é tuihkyó mai wó hpang lut ló kó abe nghú, myit lum kat lhê.

3

Jihtúm Buinyi Pé Má Dut Lò Râ Hkyô

1 Jihtúm buinyi pé má, wuìhké é ahkying pé joq lò rá nghut é lé, nang matsing to aq. 2 Hkâsu mù gâ le, haú u lé, byu pé gi, yhumsing gung lé za chyitdap é bang, ngùn lé myoqnoq é bang, gumrong é bang, nghutbún é bang, góbang lé tái hpoi é bang, ínu iwa nyo é lé a gyô é bang, jeju a dat bûn é bang, a chyoiyúng é bang, 3 chyitdap myit a bo é bang, mara hkyut byi a sê é bang, lumú gansang é bang, yhumsing gung lé hkâng a sê é bang, byuwui pé, ge é hkyô lé a nguí é bang, 4 haq gumlaú é bang, a bun a so dut wún é bang, yhumsing gung lé za hkiik bûn é bang, Garai Gasang lé chyitdap é bang dut rá malaí ngón kún hkyô lé za chyitdap é bang, dut bûm kó rá nghut lhê. 5 Yhangmoq gi, tarâ hkunggâ é bang su dut kôlhng, haú pé é a-tsam lé he-ngik pyâm akó nghut ri; haú sú é bang lé, nang koi pyâm nyi aq.

6 Yhangmoq gi, hpaqchyí da mù yhúm pé má wáng kôluí, mara wôlai lé wun é, agè ashop é ô nau hkyô ajung jung má sô nghoq ló byuq é, 7 hkâ-nhâm le mhoq yu nyi kôlhng, haú tengmán hkyô lé a sê gyô é, myit nyhôm é myiwe wui lé wó làng nghoq yu é bang nghut akó. 8 Yanne eq Yambre nhik gi, Mosheq lé htuq htêng é su, haú bang le, haú tengmán hkyô lé htuq htêng akó nghut ri; yhangmoq gi, myit é hkyô htên byuq kôluí, haú lumjing hkyô má lhum a zui é bang nghut akó. 9 Nghut kôlhng, haú nhik é hkyô byông htoq lo é su, yuq hkangmó é hí má, yhangmoq ngok é hkyô byông htoq lò rá nghut mù, haú mai lai lui yhangmoq wó kut jat kó rá a nghut.

Timohti Lé Pying Kat É Dang

10 Nang kúm gi, ngá é mhoqshit hkyô, ngá é nyiyap hkyô, ngò myit myoqbyu tô é hkyô, ngá é lumjing hkyô, myit hing hkyô, chyitdap hkyô, hkam jan hkyô, 11 zing-ri huí é hkyô eq wuìhke jamjau hkyô pé lé le, Antioku wà mó, Ikoni wà mó eq Lustra wà mó pé má ngò hui zô é, zing-ri hkyô pé lé, ngò hkam jan bê hkyô lé le, nang rago sê

* 2:19 Gyung So 16:5

lhê. Nghut kôle, haù Yhumsing gi, haù pé banshoq mai ngo lé xe yù bê nghut ri. ¹² Gè gè yang, agè ashop é byu pé eq mhaù kut é bang gi, mhaù zô nyi bum é eq mhaù zô é huì nyi bùm kôluì, a ge é hkyô shut je riyhang má yat lò kô é hkùn, ¹³ Hkrisduq Yesuq má tarâ hkunggâ é asak đông nyiyap nau é bang yuq hkangmô gi, zing-rì é huì kó rá nghut lhê. ¹⁴ Nghut kôlhang, nang gi, ô pé chyáng mai nang mhoq yù bê hkyô lé le, Hkrisduq Yesuq lé lumjing jang hkyi yu é huì shoq, ¹⁵ nang lé hpaqchyí byéng-yá wó byí é chyoyúng Chyúmdang pé lé, zoshang hkùn mai nang sê to bê hkyô lé le, nang sê é yanmai, nang mhoq yu to bê hkyô eq hkyak lumjing to bê hkyô má, xoq kut nyi aq. ¹⁶ Chyúmdang hkangmô gi, Garai Gasang é soq hang tô é pé chyat nghut é yanmai, mhoqshit é hkyô, tân mhoq é hkyô, lhoq jo byí é hkyô eq dingmán hkyô lé tân shit byí é hkyô pé é matú, akýù bo ri; ¹⁷ haù mù luì, haù Garai Gasang é byu gi, ge é muzô jizô hkangmô lé kut rá matú, wó gumjup rá nghut lhê.

4

¹ Garai Gasang é hí má le, dui nyi bang eq shi byuq bang lé tarâ dara rá sù Hkrisduq Yesuq é hí má le, Yang htoq shit rá hkyô eq Yhang mingdán é yanmai, ngò, nang lé pying kat é gi, ² haù mungdang lé hko kyo aq; ahkying yam-yoq ang kôlhang, a ang kôlhang, rì rì hen to aq; myit gyaí hing é eq rago za mhoqshit é đông, lhoq jo byí, tân mhoqshit é eq myit wum byi kut nyi aq. ³ Hkâsu mù gâ le, byu pé gi, tengmán mhoqshit hkyô lé a kâm yut é ahkying jé mù, yangmoq ô nau yut yut é hkyô chang luì, yangmoq é no yo bui nau é nohkyap gyô nau é hkyô tái nhâng rá matú, sará pé rajum rayô lé lhinghkyuq má lhoq tsing to kó rá nghut lhê. ⁴ Yangmoq gi, haù tengmán hkyô mai yangmoq é nohkyap lé lhing pyám mù, myit htoq mhô-myi dang shut lhing lô kó rá nghut lhê. ⁵ Nghut kôlhang, nang gi, dut tô é hkyô banshoq má rago sidig nyi aq; wuìhke jamjau hkyô lé hkam jân nyi aq; gabú danglù hko kyô é muzô kut nyi aq; nang é hpungmù banshoq lé wùn waq nyi aq.

⁶ Hkâsu mù gâ le, ngò gi, shuq jung hkungga ralhum đông hut pyám é huì nyi gù nghut mù luì, mingkan mai ngò htoq lô rá ahkying jé bê nghut ri. ⁷ Ngò gi, haù ge é majan le zan bê; din shingjông lhùm é hkyô le bàn bê; haù lumjing hkyô le chang bê nghut lhê. ⁸ Ahkuì, haù tengmán é tarâ Agyi nghut sù, Yhumsing gi, haù buinyi má ngo lé ap byi rá nghut é, haù dingmán hkyô é janmaù lé, ngá matú tô to byi bê nghut lhê.

Haù gi, ngá é matú za a nghut, Yang htoq shit rá hkyô lé myit láng nyi é bang banshoq é matú le nghut lhê.

Timohti Lé Ji Kat É Hkyô

⁹ Nang gi, ngá chyáng wó dut é í hân hân lé lô aq. ¹⁰ Hkâsu mù gâ le, Demaq gi, mingkan shì lé chiyitdap é yanmai, ngo lé pyám to luì, Htesaloni wá mó shut; Krezen gi, Galatiq mau shut; Tituq gi, Dalamati mau shut, e lô byuq bekô nghut é yanmai nghut lhê. ¹¹ Lukaq za ngò eq rahá nghut nyi lhê. Markuq lé, nang eq rahá shuì lé lô aq; yang gi, ngá é hpungmù má wó htugbáng rá sù nghut lhê. ¹² Ngò gi, Tuhkiku lé Ehpesu myuq shut nhang kat bê nghut lhê. ¹³ Nang gi, lé lo é hkùn, Troa myuq má, Karpú chyáng ngò tô tô é buhng haù lé le, ngá é chyúmding lé le, je luì eq haù shokuq chyúmding pé lé le, yù lé lô byi aq.

¹⁴ Haù ningdup hpô Alesander gi, ngo lé a ge é myo myo kut bê nghut ri; haù Yhumsing gi, yang kut é eq rajung za, yang lé dam byi rá nghut lhê. ¹⁵ Yang gi, ngamoq é danglù lé wum kat htug hting bê sù nghut é yanmai, nang le, yang lé sidig ra rá nghut lhê.

¹⁶ Sâng-hi dàm, ngá gung lé ngò tái hung é hkùn, yuq hkangmô gi, ngá é hkyam shut a bo lom e za, ngo lé pyám tô akô. Nghut kôlhang, haù gi, yangmoq ahtoq má mara a dut sháng gaq. ¹⁷ Nghut kôlhang, ngò đông mai danglù haù lé rago wó hko pyo kat luì, tungbaù pé banshoq bang wó gyo kó sháng gaq ga, haù Yhumsing gi, ngá hkyam shut yap to mù, ngo lé wum-o byí é nghut lhê. Haù htoq agô, ngò gi, hkanghkyí é nhut mai le hkyi yù huì bê nghut lhê.* ¹⁸ Haù Yhumsing gi, ngo lé agè ashop é hkyô hkangmô mai hkyi yù luì, Yang é mauhkung mingdán má ngón za shuì jé rá nghut lhê. Hpungwup shingkang gi, Yhang chyáng ahtum abyuq ru joq nyi sháng gaq ô. Amen.

Shi-kyám Dang

¹⁹ Priskila eq Akula nhik lé le, Onesihpuru yhumbyù wuì lé le, bo shi-kyám byi laq. ²⁰ Erastu gi, Korinhthuq myuq má nyi gyô to bê; Trohpimu lé gi, nô luì, Melitu wá mó má ngò nyi pyám to bê nghut lhê. ²¹ Nang gi, wó dut é í, gyoqmyô a wàng shi lé, shi má jé lé lô aq. Ubulu gi, nang lé shi-kyám kat ri; haù eq rajung za, Puden, Linu, Klodia eq gumang wui banshoq bang gi, nang lé shi-kyám kat akô nghut ri.

²² Haù Yhumsing gi, nang é woi-nyí eq rahá nghut nyi sháng gaq. Jeju gi, nungmoq chyáng ru joq nyi sháng gaq ô.

* 4:17 Haù hkùn lé, Romaq byu pé, byù sat lé gi, hkanghkyi lé tsô pyám lhê.

TITUQ Chyáng Hun Kat é Laiká (Titus)

¹ Garai Gasâng é dui-nhâng zoshâng eq Yesuq Hkrisduq é lagyo nghut é sù, ngò Poluq gi, haù ahtum abyuq é asak lé chòm myit myoqbyu é yanmai, Garai Gasang hkyin yu to bâng é lumjǐng hkyô jat rá eq, tengmán hkyô lé wó sé mù, tarâ hkungga sé nhâng rá matú, hkyin yu huí é sù nghut lhê. ² Haù ahtum abyuq é asak hkyô lé, mhaù a sê é Garai Gasang gi, ahkyǐng nghu é lhang a joq shi mai danggidiq byi to mù, Yhang masat tô é ahkyǐng yam-yoq má sheq mungdang hko kyô é dǒng lhoq htoq shit luí, ³ nga-nhúng é hkyi yù Sù, Garai Gasang hkunmó hkyô tô é eq rajung za, haù mungdang hko é hkyô lé ngá é loq má ap byi bê nghut ri.

⁴ Nga-nhúng chòm lumjǐng é hkyô dǒng mai, ngá zo sǐng nghut é Tituq lé laiká ká kat lhê. Íwa Garai Gasang eq nga-nhúng é hkyi yù Sù Hkrisduq Yesuq chyáng má é jeju eq nguǐngón hkyô gi, náng chyáng ru joq nyi sháng gaq ô.

Kreti Zinlóng Má, Tituq Wùn Waq Râ Muzô

⁵ Ngò, nang lé Kreti zinlóng má nyhi hkyô tô é gi, ngò, nang lé pyǐng tô é eq rajung za, ngò a ban zuí saí é loqzó pé lé lhoq pán rá matú eq, wà hkangmó má hpúng suwún ayá dǎng to byi rá matú nghut lhê. ⁶ Haù hpúng suwún kut rá sù gi, mara hún rá hkyô a bo é sù; yhangmyi rayuq za wó é sù; yhang zô pé le, agé ashop é eq jino a gyô é ga, mara hún rá jowó a joq é lumjǐng bang nghut é sù, nghut rá lhê. ⁷ Hkásu mù gá le, hpúng-up rayuq gi, Garai Gasâng é sùt zum sù rayuq dǒng nghut lhê mù, mara hún rá hkyô a bo é sù nghut rá lhê; yhang gi, yhumsing myit a cháng; i-myyit a lúm tot; ihpé é jùn a dut; mabyoq jishúm a kut; a sanséng é ngùn hǐng lé a myit ô nau é sù nghut rá lhê. ⁸ Yhang gi, byú bíng lé dat hkulúm sù; ge é hkyô lé chyitdap sù; nùm é sù, dingmán sù; chyoyúng sù; yhumsing gùng lé wó hkang é sù; ⁹ mhoq yu to bê hkyô eq rajung za, lumjǐng é mungdang lé ging ging zuí zing nyi é sù nghut rá lhê. Haù hkún sheq, yhang gi, góbang lé tengmán é mhoqshit hkyô dǒng myit wum wó byi é eq, haù eq shai lhum é bang lé, shut é hkyô wó tún shit rá nghut lhê.

¹⁰ Hkásu mù gá le, gumlau kut é bang, dangsóm taí é bang eq mhaù zô é bang myo myo nyi ri. Ahpyo-kuq hpyit é hpúng bang je riyhang myo akó. ¹¹ Haù bǎng é nhut shô lé gi, xaù pyám byi rá lhê. Hkásu mù gá le, yhangmoq gi, a tengmán é dǒng sutzè lé wó yù shoq ga luí, mhoqshit a gǐng é hkyô pé

lé mhoqshit mù, rayhum bang bang lé lhoq hpyoq lhoq htên nyi akó nghut ri. ¹² Kreti byu má é myiqttoi rayuq lhang gi, "Kreti byu pé gi, ayang mhaù é bang, tân jung yosô dusak pé, lagôn é zo myoqnoq bang nghut akó." ga tai wú ri. ¹³ Saksé shí gi, tǐng ri. Haù mù luí, yhangmoq gi, Yudaq byu pé é myit htoq mhô-myi dang lé le; tengmán hkyô lé he-ngik pyám é bang pyǐng tô é dang pé lé le, a gyo kô é za, ¹⁴ haù lumjǐng hkyô má gǐng tǐng nyi kó sháng gaq, yhangmoq lé htân htân tân mhoqshit byi nyi aq. ¹⁵ Sǎn-yúng bǎng é matú gi, azǐng zê lhunglhang sǎn-yúng ri; a sǎn-yúng bang eq a lumjǐng bǎng é matú kúm gi, haí le a sǎn-yúng é chyat nghut nyi ri; hkásu mù gá le, yhangmoq é myit nhikhlum eq myit sǒn sê é hkyô pé gi, gè gè yhang, a sǎn-yúng dut byuq bekó nghut ri. ¹⁶ Yhangmoq gi, Garai Gasang lé sê lhê ga kólhang, yhumsing zui saí é loq zó dǒng, Yhang lé he-ngik pyám é bang nghut akó. Yhangmoq gi, achaq achyut é bang, jino a gyô é bang eq, ge é mù joq mijoq eq a htuk é bang nghut akó nghut ri.

2

Hká Dǒng Nyi Yap Râ Hkyô

¹ Náng kúm gi, tengmán é mhoqshit hkyô eq wui é dǒng mhoqshit nyi rá dut lhê. ² Hpô-mǎng pé lé gi, i-myyit shirám sé rá hkyô; hkungga gǐng é byú dut rá hkyô; yhumsing gùng lé wó hkang rá hkyô eq, lumjǐng myit gǐng rá, chyitdap myit gǐng rá, hkam jan hkyô gǐng nyi rá hkyô pé lé, mhoqshit byi nyi aq.

³ Haù eq rajung za, hpô-myhí mǎng pé lé gi, hkungga gǐng é a-kyang bo nyi rá hkyô; lumù gansǎng dang a tai rá hkyô; ihpé é jùn a dut rá hkyô eq ge é hkyô lé za dat mhoqshit é bang wó dut rá matú mhoqshit byi aq.

⁴ Haù hkún, Garai Gasâng é mungdang gi, lumu pyám é a hui sháng gaq, yhangmoq gi, hpô-myhí zô pé lé, yhumsing yhanglǎng eq, yhangzô pé lé chyitdap é, ⁵ yhumsing gùng lé wó hkang é, siri bo é, ikun lé dat wùn waq é, ge é myit wó tún shit é, yhumsing é yhanglǎng uphkang é dǒng dat chǎng é bang dut rá matú, ge mhoqshit é hpô-myhí mǎng pé dut rá nghut lhê.

⁶ Haù eq rajung za, zorám wui lé le, yhumsing gùng lé wó hkang nyi kó sháng gaq, lhoq pun lhoq kyǐng nyi aq. ⁷ Hkyô hkat hkangmó má, yhangmoq lé nǎng yhang ge é muzô alik tún shit nyi aq. ⁸ Náng lé lhom htúq htǐng é bang gi, nga-nhúng é hkyô má mara a wó hún kómù hoq hpú nyi kó sháng gaq, nǎng mhoqshit é hkyô má, taí pyám rá hkyô a bô shoq, tǐng é, siri bo é, eq sanséng é dang taí nyi aq.

⁹⁻¹⁰ Nga-nhúng é hkyi yù Sù Garai Gasang eq sǐng é mhoqshit é hkyô pé hkat hkangmó

yúng nyí sháng gaq, hkyô hkat hkgangmó má, jun pé lé, yhangmoq é yhumsing wui pé é a-ô má nyi mù, yhumsing wui é i-miyit ngón shoq dang a tu rã; a hkau rã; wó lum tô é bang dut rã hkyô pé lé, mhoqshit byi aq.

¹¹ Hkãsu mù gã le, hkgungô wó é myit myoqbyù hkyô ga é, nga-nhúng é kô myhang é Garai Gasang eq hkyi yù Sù, Yesuq Hkrisduq gi, hpungwup shing kang eq htoq shit rã hkyô lé láng nyi é hkũn, ¹² tarã a hkgungã é myit eq mingkan myit ô nau é hkyô koi pyãm luí, shí ipyat má yhumsing gung lé wó hkgang rá, dingmán rã eq, tarã hkgungã é hkyô wó cháng shoq, ¹³ nga-nhúng lé mhoqshit byi rã matú, Garai Gasang jeju chyung huq gi, htoq shit bê nghut mù luí, byù lhunglhang bang lé hkyi yù hkyô hpóng byi bê nghut ri. ¹⁴ Haù Yesuq Hkrisduq gi, agè ashop é hkyô banshoq mai nga-nhúng lé hkyi yù mù, ge é muzó hkgangmó lé cháng kut nau é, Yhànggung yhang sing é byuhù rahù dut rã matú wó lhoq sân-yúng yù shoq ga, nga-nhúng é matú Yhànggung lé ap byi pyãm bê nghut ri.

¹⁵ Nang lé ó yuq èq le, a wú shôm pyãm kó sháng gaq; nang gi, ahko ahkáng banshoq eq, yhangmoq lé shí hkyô pé mhoqshit nyi aq; myit wum byi é eq, tân mhoqshit é hkyô lé le kut nyi aq.

3

Ge É Muzo Zui Sai Rã Hkyô

¹ Nang gi, lumjing bang lé, zau wui eq ahko ahkáng wó bãng é a-ô má nyi mù, jino gyô nyi rã eq, hkã-nhám le ge é muzó hkgangmó zui sai rã lé hen nyi uchyang, ² ó yuq lé le lù a mù rã; nguingón hkyô hô rã; myit tê byi é hkyô tún shit rã eq; byù banshoq lé nũm é i-miyit tún shit nyi kó sháng gaq, lhoq pun lhoq kyng nyi aq.

³ Hkãsu mù gã le, nga-nhúng le, hí hpyang gi, byù ngok pé, jino a gyô é bang, mhaù zo huí é bang eq, gungsho ô nau é hkyô eq mingkan ngón hkyô ajung jùng èq jùn kut é hui bang, dut mù luí, agè ashop é eq manon lhum é hkyô kut nyi mù, rayuq eq rayuq a jú lhum é dong nyi lai lò bê nghut lhê. ⁴ Nghut kôlhang, nga-nhúng é hkyi yù Sù Garai Gasang jeju eq chyitdap myit htoq shit é hkũn, ⁵ nga-nhúng yhang kut é dingmán é muzó èq a nghut é za, Yhàng é shogyo nhikmyin é jeju yanmai sheq, Garai Gasang gi, nga-nhúng lé hkyi yù bê nghut ri. ⁶ Yhang gi, nga-nhúng é hkyi yù Sù Yesuq Hkrisduq é yanmai, nga-nhúng é ahtoq má agùn agó hut hkyô byi é Chyoiyung Woi-nyí èq nga-nhúng lé chí san chí séng pyãm byi mù, woi-nyí má dum hku é hui nhàng luí, myit sik htaí byi é hkyô dong nga-nhúng lé hkyi yù bê nghut ri. ⁷ Haù mù luí, Yhàng é jeju mai mara hkyut san byi é hui bê nghut é yanmai,

ahtum abyuq é asak lé myit myoqbyu nyi é eq rajung za, nga-nhúng gi, silí wunli wó hkam yu é bang dut lò rã nghut lhê. ⁸ Dang shí pé gi, lumjing é dang nghut lhê mù luí, Garai Gasang lé lumjing é bang gi, ge é muzó lé myit lòm luí rago zui sai nyi kó sháng gaq, haù hkyô pé lé nang wum zuq tung mhoqshit byi rã lé, ngò ô nau nyi lhê. Shí pé gi, byù lhunglhang bãng é matú ge é eq, akyù bo é hkyô nghut lhê.

⁹ Nghut kôlhang, ana apã ga luí tai htung lhum é hkyô lé le; byùxik labaù gôn é hkyô lé le; nyo byoq lhum é hkyô lé le; jep é tarã eq séng mù byoq lhum é hkyô pé lé le koi pyãm nyi aq, hkãsu mù gã le, haù pé gi, akyù a bo é hkyô eq chùng a ge é hkyô pé nghut ri. ¹⁰ Gam hkuí é myit bò sù lé gi, í dãm mhoqshit wù mù, a wó jang, yhang lé baù tô pyãm aq. ¹¹ Haù su kut sù gi, yhang kut é muzó má mara wó to bê nghut mù, yhumsing gung lé yhumsing mara hun é sù nghut é lé, nang sé to lo aq.

Je Htàng Má Pying É Dang

¹² Ngò gi, Nikopoli wá má gyoqmyô lhoq lhai rã dong myit hpyit tô é yanmai, Artima lé, a nghut jang Tuhkiku lé, nang chyáng nhang kat byi rã, jé eq yhang, nang gi, shikut luí, haù wá shut ngá chyáng lé lô aq. ¹³ Nang gi, tarã sè é sù Zena eq Apolo nhik lé, yhangnhik é hkyowui má rã é hkyô banshoq, shikut luí garum kat aq. ¹⁴ Nga-nhúng é byu pé gi, nyi wui rã é hkyô lé wó htuq é eq ashí zui é bang dut kó sháng gaq, ge é muzó lé myit lòm mù zui sai nyi rã hkyô lé mhoq yù rã lhê.

¹⁵ Ngò eq rahá nyi é bang yuq hkgangmó gi, nang lé shi-kyâm kat akó. Lumjing hkyô má ngamoq lé chyitdap é bang lé, bo shi-kyâm byi aq.

Garai é jeju gi, nungmoq eq rahá joq nyi sháng gaq ô!

HPILEMON Chyáng Hun Kat é Laiká (Philemon)

¹ Hpilemon ê, Hkrisduq Yesuq é yanmai htóng lúng nyi sù, ngò Poluq eq nga-nhùng é gumang Timohti nhik gi, ngá-nhik chyitdap é mù wùn luzúm nghut é sù nang lé le, ² ngá-nhik é gu-nhá Ahpiaq lé le, ngá-nhik é sarhé luzúm Arhkipò lé le, náng é yhùm má huí lhum lhum kut é noqkuq hpúng lé le, dang kyô kat lhê.

³ Nga-nhùng é Íwa Garai Gasang eq Yhumsing Yesuq Hkrisduq chyáng má é, jeju eq nguigón hkyô gi, nungmoq chyáng ru joq nyi sháng gaq ô!

Jeju Hkya-ôn É Hkyô Eq Kyûdung Dang

⁴⁻⁵ Ngò gi, Yhumsing Yesuq lé náng lumjing é hkyô lé le, sân-yúng bang banshoq lé náng chyitdap é hkyô lé le, wó gyô é yanmai, ngò kyûdung é hkùn, nang lé myit bün nyi lui, hkâ-nhám le ngá é Garai Gasang lé jeju hkya-ôn nyi lhê. ⁶ Ngò gi, Hkrisduq é matú nga-nhùng chyáng bo tô é ge é mù lhumjup lé sé gyô é hkyô lé, náng wó yù sháng gaq nghù, náng é lumjing hkyô lé, náng saksé hkâm é má akyû htoq râ matú, kyûdung byi nyi lhê. ⁷ Náng é chyitdap myit gi, ngo lé gyai gabú nhang é eq wum-o wó yù nhang ri; hkâsu mù gâ le, gumang hpó ê, náng é yanmai, sân-yúng bang é i-myt má nguigón yuqyo é hkyô wó yù bekô nghut ri.

Onesimu É Matú Tôngbán Byi É Hkyô

⁸ Haù su mù, náng kut ging é muzô hkyô, ngò, nang lé pying kat lhê. Hkrisduq má, ngò gi, a gyuq a kyum é za nang lé haù wó kut nhang lhê nghut kôlhang, chyitdap myit đông za nang lé pying kat lhê. ⁹ Ngò, Poluq gi, mang bê htoq agó, ahkuí Hkrisduq Yesuq é yanmai htóng lúng sù le nghut lui, ¹⁰ ngò kyum hut huí nyi é u lé ngá zo dut lo é Onesimu é matú nang lé ngò dúng tôngbán kat lhê. ¹¹ Yhang gi, hí hpyang náng é matú akyû a bo é nghut kôlhang, ahkuí gi, náng é matú le, ngá é matú le, akyû bò bê nghut ri.

¹² Ngò nhik htúng é Onesimu lé náng chyáng dum taù nhang kat lhê. ¹³ Haù gabú danglu é yanmai, ngò htóng lúng nyi é má náng é malai ngo lé garúm râ matú, yhang lé ngò shuí nyi to naù kôlhang, ¹⁴ ngò gi, náng myit a huí le haí le a kâm kut. Hau é yanmai, ngò, nang lé kut nhang é đông a nghut e za, náng ô nau é đông kut é san za nghut sháng gaq. ¹⁵ Hkâsu mù gâ le, náng chyáng mai yhang rayoq rabun zo gâng nyi é gi, yhang dum taù lò mù hkâ-nhám le náng eq rahá dum wó nyi nyi râ matú nghut lhê abe. ¹⁶ Yhang gi, htàng hpyang, jùn rayuq đông a nghut e za, jùn htoq má

je ge é chyitdap gumang hpó dut râ nghut bê; ngá matú, yhang gi, ngò chyitdap dik é sù nghut lhê; náng matú kùm gi, byu rayuq đông le, Yhumsing Yesuq má gumang hpó rayuq đông le, je riyhang chyitdap râ sù dut bê nghut ri.

¹⁷ Haù mù lui, náng, ngo lé luzúm rayuq sù ngam é nghut le gi, ngo lé hap yu é su, Onesimu lé le lom hap yù aq. ¹⁸ Yhang, nang lé rajung jung shut pyâm é nghut le le, chyín dap tô é nghut le le, haù gi, ngá chyáng dap é chyín nghù sôn yù aq. ¹⁹ Ngò, Poluq gi, chyín haù xap râ nghù lui, ngá loq èq yhang kâ kat kôlhang, náng yhang lháng, ngo lé asak chyín xap râ sù nghut é lé bün nham aq. ²⁰ Nghut bê, gumang hpó é, nang é yanmai, haù Yhumsing má ngò gabú é hkyô wó yu nyi sháng gaq, Hkrisduq má ngá é i-myt lé lhoq ngui lhoq ngón byi é đông, shí, ngò pying kat é dang lé gyo byi laq. ²¹ Náng gi, ngò tai kat é htoq má je lhom kut râ nghut é lé, hkyak za sé lui, ngò kâ kat é nghut lhê.

²² Hau htoq agó, ngá é matú nyi râ gok lajang láng aq. Hkâsu mù gâ le, nungmoq kyûdung byi é yanmai, ngò gi, nungmoq chyáng dum wó je râ lé myit myoqbyu nyi lhê.

²³ Hkrisduq Yesuq é yanmai, ngá é htóng lúng luzúm nghut é sù Epahpra gi, nang lé shi-kyâm kat ri. ²⁴ Ngá é htuq luq htuq bang nghut é Markuq, Aristakuq, Demaq, Lukaq pé le, náng lé shi-kyâm kat akô.

²⁵ Yhumsing Yesuq Hkrisduq é jeju gi, nungmoq é woi-nyi eq rahá za ru joq nyi sháng gaq ô!

HEBRE Pê Chyang Hun Kat é Laiká (Hebrews)

Garai Yhangzo Gi, Maumang Lagyô Pé Htoq Je Gyaú É Hkyô

¹ Lai lô bê ipyat pé má, Garai Gasang gi, nga-nhung é ichyí iwá pé lé myiqhtoi pé đông alhng lnhng eq adông đông mai dáng nyo wú bê nghut lhê. ² Nghut kôlhang, lô htâng é buinyi shí pé má, Yhang gi, Yhâng Zo đông mai nga-nhung lé dang nyô bê nghut ri; Yhang gi, lhungháng lé sng sù dut rá matú hau Zo lé masat to mù, Zo đông mai, nyi mi-nyl, joq mijoq lé hpan to bê nghut ri. ³ Hau Zo gi, Garai Gasang é hpungwup shingkang duqbô é hkyô eq Yhâng é gungghyang isâm roq nghut nyi mù, lhungháng lé Yhâng é a-tsam bying é dang eq zui zing tô ri. Yhang gi, yubak mara lé lhoq sân-yúng é hkyô lé ban kut é htâng, mauhkung htoq má Hkikhkam dik Sù Garai Gasang é loqyo hkyam má zung to bê nghut ri. ⁴ Hau mù lui, Yhang gi, maumang lagyô pé é mying htoq gyaú é mying lé wó sing yù bê nghut é eq rajung za, yhangmoq htoq je riyhang gyaú sù dut bê nghut ri.

⁵ Hkâsu mù gâ le, Garai Gasang gi, "Nàng gi, Ngá Zo nghut ri. Hkû-nyl, Ngò gi, Náng Wa dut bê nghut lhê."^{*} ga le, dum,

"Ngò gi, Yhâng Wa dut rá nghut mù, Yhang gi, Ngá Zo dut rá nghut lhê."^{*}

ga le, maumang lagyo hká yuq lé hkâ-nhâm wá tai wú é nghut lhê lú? ⁶ Dum, Garai Gasang gi, Yhâng é zomún lé mingkan shut nhang hâng kat é hkûn,

"Ngá é maumang lagyô pé banshoq gi, Yhang lé noqkuq kó sháng gaq."^{*}

ga tai ri. ⁷ Maumang pé eq séng lui Garai Gasang tai é má,

"Yhang gi, Yhâng é maumang lagyô pé lé lai su dut nhâng mù, Yhâng é dui-nhâng zoshâng wui lé, myishâm pé su dut nhang é nghut ri."^{*}

gâ ri. ⁸ Nghut kôlhang, hau Zo eq séng lui, Yhang gi,

"Garai Gasang é, Náng é hkohkâm-tanghkuq gi, pyat dedu ahtum abyuq gng nyi mù,

Náng é dingmán hkyô gi, Náng é mingdán lé uphkan é hkyô dut rá nghut lhê.

⁹ Nàng gi, dingmán hkyô lé chyitdap bê nghut mù, agè ashop é hkyô lé a ngui byuq lô é nghut lhê.

Hau mù lui, Garai Gasang, náng é Garai Gasang gi, Nang lé, gabú nhang é xú but byí é đông, Náng é luzúm wui htoq je lhoq gyaú to bê nghut ri."^{*}

ga tai ri. ¹⁰ Hau htoq agó, Yhang gi, "Yhumsing ê, Nàng gi, a-nham sâng-hi má myidàm é apùn awang lé hi tô é nghut mù,

mauhkung pé gi, Náng é loqmú chyat nghut ri.

¹¹ Hau pé gi, htên byoq byuq rá nghut lhê; nghut kôlhang, nàng gi, ru gng nyi rá nghut lhê; hau pé banshoq gi, mebu su xau byuq rá nghut lhê.

¹² Nàng gi, hau pé lé, bumó lé su ding yup rá nghut lhê; Nàng gi, hau pé lé, mebu su htaí pyám rá nghut lhê.

Nghut kôlhang, Nàng gi, rajung za ru gng nyi rá nghut mù, Náng é zanwut pé gi, hkâ-nhâm le htúm rá a nghut."^{*}

ga le tai ri. ¹³ Garai Gasang gi,

"Ngò, náng é gye pé lé, náng é hkyi nang tanghkuq kut pyám byí é hkying jé shoq,

Ngá é loqyo hkyam shut zung nyi shi aq."^{*} ga maumang lagyo hká yuq lé hkâ-nhâm wá tai wú é lú? ¹⁴ Maumang pé banshoq gi, hkyi yù hkyô lé hkam yù rá nghut é bang lé dojaú rá matú, nhang kat lui é mù wùn woi-nyí pé chyat za nghut akó, a nghut kó lú?

2

Sadiq Byí É Hkyô

¹ Hau mù lui, nga-nhung gi, châng nghoq lô byuq é a hui zo sháng gaq, hau nga-nhung wó gyô yu to bê hkyô lé je riyhang rago châng nyi rá dut lhê. ² Hkâsu mù gâ le, maumang lagyô pé eq tai bê mungdang gi, gng nyi mù, shut shai lu lai é hkyô eq jino a gyô é hkyô hkangmó kut é sù gi, yhumsing eq gng le mara dam byí é hui zo kô é nghut le gi, ³ nga-nhung gi, hau-í yhang gyaú é hkyi yù hkyô lé hai su a ngam kut é nghut jâng, nga-nhung hkâsu wó hpang lut rá lú? Hkyi yù hkyô hau gi, hau Yhumsing eq hí tai pyo htoq é nghut mù, Yhâng chyang mai wó gyô yu é bang gi, hau hkyô têng é lé, ngamoq chyang saksé shit bekó nghut ri. ⁴ Garai Gasang le, kumlhá pé, mauhpo muzó pé, laklai kumlhá myo myo eq, Yhang ô nau é eq rajung za Chyoiyung Woi-nyí chunghuq pé lé gâm byí é đông mai, hau hkyô lé saksé shit bê nghut ri.

Hkyi Yù Hkyô Hpóng Byi Sù

⁵ Garai Gasang gi, maumang lagyô pé lé, ngamoq tai nyi é jé lô rá mingkan lé, uphkan nhâng rá a nghut. ⁶ Rayuq yuq mai, rawó má saksé hkâm tô é gi,

* 1:5 Hkya-on 2:7 * 1:5 2 Sam 7:14 * 1:6 Tará Pun 32:43 * 1:7 Hkya-on 10:44 * 1:9 Hkya-on 45:6-7
* 1:12 Hkya-on 102:25-27 * 1:13 Hkya-on 110:1

"Byù gi, hai wá nghut mù, Nàng, yang lé bûn nyi lhê lhu?

Byu Yhangzo gi, hai wá nghut mù, Nàng, yang lé wú gôn nyi lhê lhu?

⁷ Nàng gi, yang lé, maumang lagyô pê htoq ratsuí lhoq nyhum to bê nghut ri.

Nàng gi, yang lé, hpungwup shingkang eq aróng bò nhâng mù,

⁸ jung hkanmó lé, yhâng é hkyiwa ô má tô to bê nghut ri.*

gâ ri. Jung hkanmó lé yhâng é a-ô má tô to bê gâ é gi, Garai Gasang, hai lhang a myhit to loshoq yang uphkang é a-ô má tô to bê nghut é lé gâ lhê. Nghut kôlhang, yang é a-ô má tô tô é jung hkanmó lé, ahkuí, nga-nhung a myàng shí é za nghut lhê. ⁹ Nghut kôlhang, nga-nhung gi, maumang lagyô pê htoq ratsuí zo lhoq nyhúm huí é sù Yesuq lé myang é nghut lhê. Yhang gi, Garai Gasang jeju mai, yuq hkanmó é matú shí hkâm byí é hui zo sháng gaq ga, shí-nò jamjau hkyô lé hkâm zo bê nghut é yanmai, ahkuí, Yhang lé hpungwup shingkang eq aróng bò nhâng bê nghut ri.

¹⁰ Zo wuí myo myo lé hpungwup shingkang wó hkam yù nhâng sháng gaq ga, jung hkanmó lé Yhang é matú chyat eq Yhang đông mai chyat joq nyi nhang é Garai Gasang gi, wuìhke jamjau hui nhang é đông, yangmoq é hkyi yù Sù lé lhoq gumjup byi rá matú htuk âng nyi ri. ¹¹ Hâu byu pé lé chyoiyúng nhang é Sù eq lhoq chyoiyúng huí é bang gi, ikun ralhum za má é bang chyat nghut lhê. Hâu mù, Yesuq gi, yangmoq lé, gumang wui nghù rá lé a hoq é nghut lhê.

¹² "Ngò gi, Nàng mying lé, Ngá gumang wui chyáng tai pyô rá nghut hui;

Ngò gi, shiwa hpông é myoq hí má, Nang lé hkya-on mahkôn hkôn rá nghut lhê.*

ga, Yhang tai ri. ¹³ Yhang gi,

"Ngò gi, Yhang lé lumhkau nyi rá nghut lhê.*

ga le dum tai ri. Hâu htoq agó,

"Ngò gi, Garai Gasang ngo lé byí é zoshâng wui eq shí má nyi nyi lhê.*

ga, Yhang dum tai ri.

¹⁴ Hâu zoshâng wui gi, sui sho eq nghut é yanmai, Yhang le, yangmoq é xângzo gùng bo hkam yù bê nghut ri. Hâu é yanmai, Yhang gi, Yhâng é shí-nò hkyô đông mai, shí-nò hkyô é a-tsam lé zui zing é sù nghut é nat Tsadán lé wó lhoq htên pyám rá eq, ¹⁵ yangmoq é shí-nò hkyô lé gyuq é eq, yangmoq é asak gón lé jùn đông zui zing to huí é bang lé, wó lhoq lhut rá nghut lhê. ¹⁶ Gê gè yang, Yhang gi, maumang lagyô pé lé garúm é a nghut é za, Abraham é awut ashín pé lé garúm é sheq ru nghut lhê. ¹⁷ Hâu

nghut é yanmai, Yhang gi, Garai Gasang lé dojaú é má shogyo nhikmyin é eq lhumzui é hkyangjong mó wó dut rá eq, byu pé é yubak mará é matú shíhtai gunglik hkungga wó kut rá matú, hkyô hkanmó má Yhâng é gumang yuq eq dù shoq kut é hui rá dut é nghut lhê. ¹⁸ Yhang gi, gunglau huí é hkún, Yhânggùng yang jamjau hui zo bê nghut é yanmai, gunglau huí nyi é bang lé wó garúm yu é nghut lhê.

3

Yesuq Gi, Mosheq Htoq Gyaú É Hkyô

¹ Hâu mù luí, mauhkùng mai wut yù huí é, chyoiyúng é gumang wui ê, lagyo eq hkyangjong mó nghù nga-nhung yin yu é Yesuq é hkyô lé rago myit wú keq. ² Mosheq, Garai Gasang é yhúm gón má lhumzui é su, Yesuq le, Yhang lé masat yù sù Garai Gasang chyáng lhumzui sù dut bê nghut ri.*

³ Yhúm kut sù gi, yhúm htoq je gyaú é aróng lé wó é su, Mosheq htoq, Yesuq gi, je gyaú é aróng lé wó gíng é lé myàng ri. ⁴ Hkâsu mù gâ le, yhúm hkanmó gi, rayuq yuq eq saí é chyat nghut ri. Nghut kôlhang, Garai Gasang gi, jung hkanmó lé saí é sù nghut lhê. ⁵ Mosheq gi, Garai Gasang é yhúm gón má dui-nhâng zoshâng rayuq đông lhumzui mù, Garai Gasang tai rá nghut é lé saksé hkâm bê nghut ri. ⁶ Nghut kôlhang, Hkrisduq gi, lhumzui é zo rayuq đông Garai Gasang é yhúm lé up ri. Nga-nhung kúm gi, nga-nhung lé wám é myit bò nhang é hkyô eq nga-nhung gumrong nyi é myoqbyù hkyô lé myhik zing nyi é nghut jáng, Yhâng é yhúm nghut nyi bê.

A Lumjng Bang Lé Sidiq Byí É Hkyô

⁷ Hâu mù luí, hau Chyoiyúng Woi-nyi tai é eq rajung za,

"Hkú-nyi, nungmoq gi, Yhâng é dangtê lé wó gyo kô é nghut jáng, ⁸ yoso má Yhang lé chyâm kô é u lé,

gumlau toq é hkún nungmoq é íchyí iwâ pé kut kô é su, nungmoq é i-myyit lé hkálhoq htan tó kó.

⁹ Nungmoq é íchyí iwâ pé gi, myi xê zàn yang Ngò kut é muzó lé myàng kôle, yoso hau má Ngo lé chyam lik bekò nghut ri.

¹⁰ Hâu nghut é yanmai, Ngò gi, ipyat hau lé nhikjum yo mù,

'Yhangmoq é myit nhikhlum gi, hkâ-nhám le hkyô ngoq byuq akó; yangmoq gi, ngá é hkyô pé lé a sé kômù nghut ri.' nghù tai é nghut lhê.

¹¹ Hâu mù, 'Ngá é bánno jowò má yangmoq hkâ-nhám le wó wáng kó rá a nghut.'

* 2:8 Hkya-on 8:4-6 ✧ 2:12 Hkya-on 22:22 ✧ 2:13 Esai 8:17 ✧ 2:13 Esai 8:18 * 3:2 Bun zo shí eq bun zo 5, 6 lhum má é Garai Gasang é yhúm gâ é gi, Garai Gasang é byu pé lé gâ é nghut lhê. ✧ 3:11 Hkya-on 95:7-11

ngû, Ngò, nhikjum yô é eq dakâm dang tai bê nghut lhê."[✧]
gâ ri.

¹² Gumang wui ê, nungmoq mâ é ó yuq le, haù rû dui nyi é Garai Gasâng chyáng mai, lhing taù ló byuq sê é, yubak mara bying é, a lumjing é i-mytit a bò sháng gaq, sidiq nyi keq. ¹³ Nungmoq gi, ó yuq le, yubak marâ é mhaù zô é hkyo eq i-mytit lhoq htan pyâm é a hui kó sháng gaq, "hkû-nyí" ngû ru wó tai nyi nyi gi, nyi wui, rayuq eq rayuq myit wum byi lhùm nyi keq. ¹⁴ Nga-nhúng gi, sâng-hi mai wó to bê myit lùm hkyô lé, ló htang shoq zuí gíng nyi é nghut jáng, Hkrisduq eq chòm zùm yap nyi é bang dut bê nghut ri. ¹⁵ Haù gi,

"Hkû-nyí, nungmoq, Yhâng é dangtê lé wó gyô é nghut jáng, gumlau toq é hkûn, nungmoq é ichyi iwâ pé kut kô é su, nungmoq é i-mytit lé hkâlhoq htan to kó."[✧]

ga tai é eq rajung za nghut ri.

¹⁶ Wó gyô yù mù, gumlau toq é bang gi, ô pé nghut akò lhú? Haù bang banshoq gi, Egotuq ming mai Mosheq eq shui htoq lo é bang nghut bum lhê, a nghut kó lhú? ¹⁷ Myi xê zàn yhang Garai Gasang lé nhikjum yô nhang é bang gi, ô pé nghut akò lhú? Haù bang gi, mara kut shut mù, yoso má shi leq byuq é bang nghut bum lhê, a nghut kó lhú? ¹⁸ Jìno a gyô bùm kô é nghut jáng, Yhâng é bánno jowò má yhangmoq hkâ-nhám le wó wàng kó rà a nghut ga, Garai Gasâng eq dakâm é bang gi, ô pé nghut akò lhú? ¹⁹ Haù mù, yhangmoq a lumjing kô é yanmai, a wó wàng kô é lé, nga-nhúng myang é nghut lhê.

4

Garai Gasâng É Byu Pé É Matú Bánno Buinyi Đông Nghut É Bánno Jowò

¹ Haù nghut mù lui, Garai Gasâng é bánno jowò má wàng rà danggidiq ru gíng nyi ashí nghut é yanmai, nungmoq mâ é ó yuq le, haù má a hkyit hkap é a dut rà matú, nga-nhúng sidiq nyi sháng. ² Hkâsu mù gâ le, yhangmoq lé gabú danglù haù hko kyo bê su, ngamoq lé le hko kyo bê nghut lhê; nghut kôlháng, yhangmoq wó gyô é mungdang gi, yhangmoq é matú akýu a bò, haù mù gâ le, haù wó gyô é bang gi, lumjing myit mai a lhom hap yù kô é yanmai nghut ri. ³ Nga-nhúng lumjing bê bang za, bánno jowò haù má wó wang é nghut lhê. Haù hkyô gi, "Haù mù, 'Ngá é bánno jowò má yhangmoq hkâ-nhám le wó wàng kó rà a nghut.' ngû, Ngò, nhikjum yô é eq dakâm dang tai bê nghut lhê."[✧]

ga Garai Gasang tai bê eq rajung za dut é nghut ri. Nghut kôlháng, Yhâng é muzó

gi, mau htoq xâng hkun mai ban kut to bê nghut lhê. ⁴ Hkâsu mù gâ le, "Garai Gasang gi, nyhit nyi ngû rà buinyi má Yhâng é muzó banshoq mai bánno bê nghut ri."[✧] gâ é dang pé má, haù nyhit nyi ngû rà buinyi eq séng é hkyô lé rawò má Yhang tai tô ri. ⁵ Bánno jowò joq é eq séng lui, Yhang dum tai tô é gi, "Ngá é bánno jowò má yhangmoq hkâ-nhám le wó wàng kó rà a nghut."[✧] gâ ri.

⁶ Bánno jowò haù má wàng rà bang ra-am nyi é danggidiq joq tô ashí nghut ri; hí hkûn, gabú danglù haù wó gyô wú bê bang kúm gi, yhangmoq jìno a gyo kô é yanmai, a wàng kô é nghut lhê. ⁷ Haù mù lui,

"Hkû-nyí, nungmoq, Yhâng é dangtê lé wó gyo kô é nghut jáng, nungmoq é i-mytit lé hkâlhoq htan kó."[✧]

gâ é lé, ngò hí lé tai bê eq rajung za, Garai Gasang gi, gyai myáng é htàng má Dawiq đông mai tai é hkûn, "Hkû-nyí" gâ é buinyi ra-nyí dum masat to bê nghut ri. ⁸ Hkâsu mù gâ le, yhangmoq lé, Yosuq eq bánno jowò byi bê ru nghut le gi, Garai Gasang gi, htàng má, gotú buinyi eq séng lui tai rà a nghut lo. ⁹ Haù mù lui, Garai Gasâng é byu pé é matú gi, Bánno buinyi đông nghut é bánno jowò ru joq tô ashí nghut lhê. ¹⁰ Hkâsu mù gâ le, Garai Gasang gi, Yhâng é muzó mai bannô é su, Garai Gasâng é bánno jowò má wàng é sù gi, yhumying é muzó mai bánno rà nghut lhê. ¹¹ Haù nghut mù, yhangmoq é jìno a gyo hkyo é alik lé cháng mù leqbat é, ó yuq le a bò sháng gaq, nga-nhúng gi, bánno jowò haù má wó wàng shoq, a-tsam bo é í shikut sháng.

¹² Hkâsu mù gâ le, Garai Gasâng é mungdang gi, rû dui nyi é eq a-tsam bo é nghut lhê. Haù gi, shamsó ishut dap é sham htoq má je htoq é nghut mù, myit nhikhum eq woi-nyí lé le, wuimyoq pé eq wui-nyún lé le, wó gam hkoq hkyang rot é nghut lhê; haù gi, nga-nhúng myit é hkyô pé eq myit sôn é hkyô pé lé wó jéyáng é nghut lhê. ¹³ Hpan tô é lhunglhang gi, Garai Gasâng é hí mai wó haq pyâm é hai le a joq é nghut lhê. Jung hkanmó gi, nga-nhúng, jihpán shit rà Ru é myoq hí má a wó nghop tô é hkyô, de de dut é nghut lhê.

Je Gyaú É Hkyangjong Mó Yesuq

¹⁴ Haù mù lui, nga-nhúng gi, Garai Gasâng é Yhangzo Yesuq nghut sù, mauhtung pé shut hkyang doq ló bê nghut é gyaú é hkyangjong mó lé wó é nghut é yanmai, nga-nhúng yin yu to bê lumjing hkyô lé ging ging myhik zing nyi sháng. ¹⁵ Hkâsu mù gâ le, nga-nhúng gi, nga-nhúng wum nyhôm é hkyô pé lé a sê gyo byi é hkyangjong mó wó é a nghut é za, nga-nhúng su hkyô hkanmó má gunglàu é huí wú kôlháng mara a bo é

sû hkyangjong mó lé sheq wó é ru nghut lhê. ¹⁶ Haù mù luí, nga-nhúng gi, shogyo nhikmyîn é hkyô wó yú rá eq, nga-nhúng ra châ é u má nga-nhúng le wó garúm rá jeju lé myang hô sháng gaq, hkyak lum é myit mai Garai jeju tanghkuq shut chyâng htep ê sháng.

5

¹ Hkyangjong mó yuq hkgangmó gi, byu pé chyáng mai hkyin htoq yú huí é nghut mù, mara pé é matú, chyunghuq pé eq hkungga pé nhông byi hkyô nghut é, Garai Gasang eq séng é muzó pé má, yhangmoq é gunglik dông, hkyin masat to huí é bang nghut akô. ² Yhânggùng yhang gi, wum nyhóm hkyo é a-ô má nghut nyi é yanmai, yhang gi, bun a bóng é eq hkyô nghoq ló é bang lé nú-nhâm é dông wó shuí-û é nghut lhê. ³ Wum nyhóm é yanmai, yhang gi, byu pé é mará é matú le, yhânggùng yhang é mará é matú le, hkungga nhông byi rá dut é nghut lhê.

⁴ Ó yuq le, yhumsing gùng yhumsing aróng haù lé wó yu é a nghut; Arun lé su, Garai Gasang êq wut yu é huí jáng sheq wó é nghut lhê. ⁵ Haù eq rajung za, Hkrisduq le, hkyangjong mó dut lo é hpungwup shingkang lé, Yhânggùng yhang kut yu é a nghut. Garai Gasang sheq, Yhang lé, "Nàng gi, Ngá Zo nghut ri; Ngó, hkú-nyí Náng Wa dut bê nghut lhê."[✧]

ga taí é nghut lhê. ⁶ Hau htoq agó, "Nàng gi, Melahkizedek wó é hkyangjong ayá hkyô dông mai ahtum abyuq hkyangjong rayuq nghut nyi ri."[✧] ga, gó wó má le, Yhang taí to ashí nghut ri.

⁷ Yesuq gi, myidám htoq má asak dui nyi é buinyi pé má, Yhang lé, shi é mai wó hkyi yú Su chyáng, ngaubyi ngau-nhap eq wut garú é eq, kyúdung é eq dung tóngbán bê nghut mù, Yhâng é hkungga gíng é ap nóng hkyo é yanmai, gyo byí é huí bê nghut ri. ⁸ Yhang gi, Zo rayuq nghut to kôle, Yhang huí zô é wuìhke jamjau hkyô mai jìno gyo hkyô wó mhoq yú bê nghut ri. ⁹ Yhang gi, lhoq gumjup huí é hkún, Yhang é jìno gyo bang banshoq é matú, ahtum abyuq é hkyi yú hkyo é awang dut byuq bê nghut é eq. ¹⁰ Melahkizedek wó é hkyangjong ayá hkyô dông mai hkyangjong mó dut rá matú, Garai Gasang eq hkyin masat é huí bê sù nghut ri.

Woi-nyí Má Wáng Ra Bê Hkyô

¹¹ Ngamoq gi, shí hkyô eq séng luí taí rá gyai joq lhê; nghut kôlháng, nungmoq gi, ra luí za a sé gyô é bang nghut kô é yanmai, taí sán kyo wuì ri. ¹² Gê gè ga jáng, ahkuì lhê ahkyíng má, nungmoq gi, sará dut gíng bê bang nghut lhê; nghut kôlháng, Garai Gasang é mungdang má é tengmán hkyo é awang lé, rayuq yuq eq nungmoq lé dum taú mhoq

byi rá ru dut nyi akô nghut ri. Nungmoq gi, htan é zoshuq rá é bang a nghut, naú wing rá é bang ru nghut nyi ashí kó myhi-nhung! ¹³ Naú wing shuq rá é sù ó yuq le, zonú nghut nyi ashí mù, dingmán é hkyô lé mhoqshit é má a mán shí nghut ri. ¹⁴ Nghut kôlháng, htan é zoshuq gi, ge é hkyô eq agè ashop é hkyô lé wó sê gam hkoq yú shoq, hká-nhám le yhumsing gùng yhumsing lhoq mhân yu nyi é, kô ding bê bâng é matú ru nghut lhê.

6

¹ Haù mù luí, nga-nhúng gi, Hkrisduq eq séng é mhoqshit hkyô awang lé tô to mù, myit kô ding é hkyô shut xoq sô é sháng. Nga-nhúng gi, shí-nò hkyô shut shuí jé é muzó mai myit lình hkyo é, Garai Gasang lé lumjáng hkyo é, ² baptsima pé, loq ke byi hkyô, shi é mai dum dui toq hkyô eq ahtum abyuq jéyáng hkyô eq séng é mhoqshit hkyo é, apùn awang dum hì nó a ra lô é nghut lhê. ³ Garai Gasang gyô é nghut jáng, nga-nhúng gi, myit kô ding hkyô shut xoq so rá nghut lhê.

⁴ Myoq lhoq bóng é radám huì bê bang, mauhkúng chyunghuq lé myang hap yú bê bang, haù Chyoiyung Woi-nyí lé chóm hkam yú bê bang, ⁵ Garai Gasang é mungdang é gè hkyô eq jé lo nyi é ipyat é a-tsam pé lé myang chyam wú bê bang, ⁶ yhangmoq hpuq lhik ló byuq é nghut le gi, hká dông lé myit lình dum ge wó rá a nghut lo, haù mù gá le, yhangmoq gi, Garai Gasang é Yhangzo lé dum jén sat pyám é dut mù, Yhang lé de de rhoi pyám kô é nghut lhê.

⁷ Yhâng ahtoq má wo gyún é mau wuì lé shuq yú mù, yò mù sai bâng é matú akyú bo é hōwa nuqppyí lhoq htoq byí é maumyí gi, Garai Gasang é shímán jeju myang hap yu é nghut ri. ⁸ Nghut kôlháng, zu gám eq myoq gám yuq htoq nhang é maumyí gi, akyú a bò mù, nhing pyám é huì zo rá lé chiq rá ri. Haù gi, ló htáng má nyhê hkyô pyám é huì rá nghut lhê.

⁹ Nghut kôlháng, chyitdap é gumang wuì é, ngamoq gi, haù su ngú taí é nghut kôlháng, nungmoq é hkyi yú hkyô eq séng é je ge é jung pé, nungmoq wó bekô rá ngú hkyak myit lum tô lhê. ¹⁰ Garai Gasang gi, a tara é sù a nghut. Yhang gi, nungmoq é muzó lé le, Yhâng é byu pé lé nungmoq garúm bê eq xoq luí garúm nyi é dông, Yhang lé nungmoq chyitdap é myit shit kô é hkyô lé le, a tô-myhi rá nghut lhê. ¹¹ Ngamoq gi, nungmoq é i-myt myoqpyù hkyô wó bying jup rá matú, nungmoq yuq hkgangmó ipyat htum shoq xoq shikut nyi kô rá lé gyai ô nau ri. ¹² Ngamoq gi, nungmoq lagon bang dut byuq rá lé a ô nau é za, Garai danggidiq byí

to bê é lé, lumjing myit eq myit hîng hkyô dông mai hkam yu é bang su châng kut kô rà lê ô nau é ru nghut lhê.

Garai Gasâng É Danggidiq Gîng Nyi É Hkyô

¹³ Garai Gasang gi, Abraham lé danggidiq tô é hkûn, Yhâng htoq gyaú é dakâm myîng lang rà rayuq lhâng a nyi é nghut mù, Yhânggûng lé Yhang kut mù, dang-rhâng é gi, ¹⁴ "Ngô gi, nang lé teng yhang shimân byi mù, nang lé awut ashîn myo myo byi rà nghut lhê."^o gâ ri. ¹⁵ Haù mù, Abraham gi, myit hîng hîng láng yu é htâng má, byi tô é danggidiq lé wó yû bê nghut ri.

¹⁶ Byu pé gi, yhangmoq htoq gyaú su é myîng lé lang luí, dakâm kô é eq, yhangmoq dakâm é dang lé saksé kut mù, dang-rhâng é hkyô pé banshoq lé lhoq pân pyâm akô nghut ri. ¹⁷ Garai Gasang gi, Yhang myit hpyit tô é hkâ-nhâm le a htaí lhik é hkyô lé, danggidiq byi tô é lé hkam yu rà bâng chyáng san za shit nau ri; haù mù luí, dakâm dang eq lhoq gîng to bê nghut ri. ¹⁸ Garai Gasang gi, mhaù a ge é yanmai, hkâ-nhâm le a htaí lhik é hkyô í hkat nghut é danggidiq eq dakâm dang joq é nghut mù, Yhang haù su kut é gi, nga-nhûng hí má tô to byi é myit myoqbyu hkyô lé myhik zîng rà matú gaú é jowò shut hpang wâng bê bang nga-nhûng lé wum mó byi é dut rà matú nghut lhê.

¹⁹ Nga-nhûng gi, myit nhikhûm é shamtoq goknghe dông myit myoqbyu hkyô haù lé wó é nghut mù, haù gi, gîngtîng é eq gaú é hkyô nghut ri. Myit myoqbyu hkyô haù gi, mauhkûng noqkuq yhûm má é pân-gyang ahkaù má é sân-yúng gok má jé wang é nghut ri. ²⁰ Jowò haù gi, nga-nhûng é akyu é matú, nga-nhûng é hí má wâng byi é sú Yesuq wang jé é jowò nghut ri. Yhang gi, Melahkizedek wó é hkyangjong ayá hkyô dông mai, ahtum abyuq é hkyangjong mó dut bê nghut ri.

7

Hkyangjong Melahkizedek É Hkyô

¹ Melahkizedek gi, Salem myuq é khokhâm eq Myhang Htâng é Garai Gasâng é hkyangjong nghut ri. Yhang gi, khokhâm pé lé sat ûng pyâm luí dum taù lo é Abraham lé hui mù, shimân byi bê nghut ri. ² Haù mù, Abraham gi, wó lo é jung hkangmó má é, xê gambùm má é ragambùm, yhang lé byi bê nghut ri. Sâng-hi lhê é Melahkizedek é myîng lichyúm gi, "dingmán hkyo é khokhâm" gâ é nghut mù, htâng lhê é "Salem é khokhâm" gâ é gi, "nguîngón hkyo é khokhâm" gâ é nghut lhê. ³ Yhâng é ìnu ìwa é hkyô eq byùxik labaù lé, hi é buînyì eq asak htúm é hkyô lé a kâ to nghut ri. Yhang gi,

Garai Gasâng é Yhangzo su, ahtum abyuq hkyangjong ru nghut nyi ri.

⁴ Yhang hkâ-í hkik lhê nghû é lé, myit wú keq. Haù ìchyí ìwa Abraham lhâng gi, wó lo é má é xê gambùm má é ragambùm, yhang lé byi ri-nhung! ⁵ Hkyangjong dut bang Lewiq é awut ashîn pé gi, yhangmoq é gumang wui, Abraham mai nyi gyó lo é bang nghut kôle, tará má bo é eq rajung za, haù bâng chyáng mai xê gambùm má é ragambùm lé hkyui yù rà dut é bang nghut akô. ⁶ Nghut kôlhâng, Melahkizedek gi, Lewiq mai gyó lo é amyú a nghut kôle, danggidiq pé wó to sú nghut é Abraham chyáng mai xê gambùm má é ragambùm hap yù mù, shimân byi ri. ⁷ Shimân byi sú gi, shimân byi é lé hkam yù sú htoq je gyaú sú nghut é lé, ó yuq lé ùng-áng rà hkyô a joq é nghut lhê. ⁸ Hkyangjong pé eq séng luí ga jang, shi byuq sê é byu eq, xê gambùm má é ragambùm lé hkyui yu é nghut lhê; nghut kôlhâng, Melahkizedek eq séng luí nghut jáng, asak dù nyi é ga taí pyô byi é hui su eq hkyui yu é nghut lhê. ⁹ Xê gambùm má é ragambùm hkyui yù sú, Lewiq lhâng gi, Abraham dông mai xê gambùm má é ragambùm byi bê nghû wó taí ri. ¹⁰ Haù mù gâ le, Melahkizedek gi, Abraham lé hui é hkûn, Lewiq gi, yhâng é ìchyí ìké é gungdu hkaù má ru bo tô ashî nghut ri.

Melahkizedek Eq Dù É Yesuq

¹¹ Haù Lewiq hkyangjong amyú pé é ipyat má, byu pé gi, jep é tará lé wó yu bùm kô é nghut mù, hkyangjong ayá haù mai gumjup hkyô wó yú kô é nghut le gi, haù mù luí, Arun wó é hkyangjong ayá hkyo dông a nghut é za, Melahkizedek wó é hkyangjong ayá hkyo dông lo é sú gotú hkyangjong rayuq ra shirà lhú? ¹² Hkâsu mù gâ le, hkyangjong amyú htaí é hkûn gi, tará le htaí yhang htaí rà dut é nghut lhê. ¹³ Haù su nghû taí é hkyô pé eq séng é Sú gi, gotú byuhú má é sú nghut mù, byuhú haù mai gi, ó yuq lé hkungga gyap má dojaú wú é a nghut. ¹⁴ Hkâsu mù gâ le, nga-nhûng é Yhumsîng gi, Yudaq byuhú mai gyó lo é awut ashîn nghut é hkyô, san za nghut nyi ri. Mosheq kúm gi, byuhú haù eq séng é hkyô má, hkyangjong pé eq séng luí haí lé a taí é nghut lhê. ¹⁵ Melahkizedek eq dù é gotú hkyangjong rayuq pô htoq bê nghû, ngamoq taí bê hkyô gi, je riyhang san za dut bê nghut ri. ¹⁶ Yhang gi, ìwa rayuq é awut ashîn pé nghut rà lhê gâ é tará dông hkyangjong rayuq lé dut é a nghut é za, a wó lhoq htên é asak é a-tsam eq rajung za lé dut é ru nghut lhê. ¹⁷ Hkâsu mù gâ le, "Nâng gi, Melahkizedek wó é hkyangjong ayá hkyô dông mai, ahtum abyuq hkyangjong rayuq nghut nyi ri."^o ga Yhang eq séng luí taí pyo tô é nghut lhê.

¹⁸ Haù hí lhê é cháng rã tarã gi, wum nyhôm é eq akyû a bo é yanmai, tô pyám bê nghut lhê. ¹⁹ Hkâsu mù gà le, haù jep é tarã gi, gumjup hkyô haì a wó kut byì é nghut lhê. Haù mù, je ge é myit myoqbyù hkyô lajang byì é nghut luí, nga-nhúng gi, myit myoqbyù hkyô haù mai Garai Gasâng chyáng wó chyâng htep é é nghut lhê.

²⁰ Myit myoqbyù hkyô haù gi, dakâm hkyô a bo é a nghut myhi-nhung! Góbang gi, dakâm hkyô a bo é za hkyangjông pé wó dut bekô nghut ri. ²¹ Nghut kôlhang, Yesuq kúm gi,

""Nàng gi, ahtum abyuq hkyangjong rayuq nghut lhê."

ga haù Yhumsing dakâm bê nghut mù, Yhang myit é hkyô htai rã a nghut."

²² Yhang eq séng luí Garai Gasang taí é hkûn, dakâm dang haù mai hkyangjong rayuq dut bê nghut ri. ²³ Dakâm dang hau é yanmai, Yesuq gi, je ge é dangshikaq é pahkám wò yù sù dut bê nghut ri.

²⁴ Hkyangjông pé myo myo nyi rã dut é gi, yhangmoq é muzó a wó xoq zui shoq shi byuq hkyô èq hkûm zing pyám kô é yanmai nghut ri. ²⁵ Nghut kôlhang, Yesuq gi, ahtum abyuq dui nyi sù nghut é yanmai, Yhang gi, hkyangjong mù ayang ru zui nyi rã nghut lhê. ²⁶ Haù mù luí, Yhang gi, Yhang đông mai Garai Gasâng chyáng lé jé é bang lé, hkâ-nhám le wó hkyi yu é nghut lhê; haì mù gà le, Yhang gi, yhangmoq é matú dúng tóngbán byi nyi rã matú, ru dui nyi é sù nghut lhê.

²⁷ Yesuq gi, chyoiyung é sù, mara hùn rã hkyô a bo é sù, sân-yung é sù, yubak dap bang eq rahá a nghut shoq gotù san kut huí é sù, mauhkung pé ahtoq má htoq toq lhoq gyaù yu huí é sù nghut ri. Haù sù é hkyangjong mó gi, nga-nhúng rã é lé lajang byi rã htuk ang ri. ²⁸ Nyí nyi bui bui, yhumsing é mará é matú hí hkungga nhông byi mù, byu pé é mara matú le hkungga nhông byi é gotù hkyangjong mó pé su, Yhang gi, a kut rã é sù nghut lhê. Yhang gi, Yhânggung lé Yhang nhông byi é hkûn, yhangmoq é yubak mará é matú banshoq radám za hkungga nhông byi pyám bê nghut ri. ²⁹ Hkâsu mù gà le, haù jep é tarã gi, wum nyhôm é byu pé lé hkyangjong mó pé đông masat é nghut ri. Nghut kôlhang, Garai Gasang gi, haù jep é tarã é htâng má lé jé é dakâm dang èq, Yhâng é Yuqzo lé masat to bê nghut mù, Yhang gi, ahtum abyuq lhoq gumjup huí bê nghut ri.

8

Dangshikaq Asik É Hkyangjong Mó Yesuq

¹ Ngamoq taí nyi é dangkàng gi, shí đông nghut lhê: Nga-nhung gi, haù sù é hkyangjong mó lé wó é bang nghut lhê.

Yhang gi, mauhkung htoq má, Hkikhkam dik Sù Garai é hkohkâm-tanghkuq é loqyò hkyam shut zùng to mù, ² byu èq saí é a nghut é za, haù Yhumsing èq saí é saksé zúm akying hkaù mâ é, sân-yung dik gok má dojaù é sù nghut ri.

³ Hkyangjong mó hkangmó gi, chyunghuq pé eq hkungga pé lé nhông byi rã matú wò hun to huí é chyat nghut lhê. Haù mù luí, hkyangjong mó shí yuq le, rajung jung nhông byi ra rã nghut lhê.

⁴ Yhang gi, mingkan htoq má nyi tô é ru nghut le gi, hkyangjong dut rã a nghut; hkâsu mù gà le, jep é tarã đông ga jung, chyunghuq nhông jaù é byu pé nyi to gè bè nghut lhê. ⁵ Yhangmoq, sân-yung dik gok má dojaù é hkyô gi, mauhkung htoq má joq é azong eq wupzo đông nghut ri. Haù nghut é yanmai, Mosheq gi, saksé zúm saí rã nghut é hkûn, "Nàng lé, bùm má tũn shit é azong eq rajung za jung hkangmó wó saí shoq kut aq." ⁶ ga sidiq byi huí é nghut lhê.

⁷ Nghut kôlhang, Yesuq, ggoro sô xoq byi é dangshikaq gi, axaù lhùm htoq má je gyaù é eq rajung za Yhang hap yu tô é dojaù hkyô gi, yhangmoq é dojaù hkyo htoq má je gyaù é nghut lhê. ⁸ Haù mù, dangshikaq haù gi, je ge é danggidiq pé htoq má awang hi tô é nghut lhê.

⁹ Hkâsu mù gà le, sân-hi lhê é dangshikaq má rã é hkyô haì a bo é ru nghut le gi, gotù ra rã a nghut lo. ¹⁰ Nghut kôlhang, Garai Gasang gi, byu pé chyáng mara bo é myàng mù, taí é gi,

"Haù Israelaq é yhumbyù wuì eq le, Yudaq é yhumbyù wuì eq le,

Ngò, dangshikaq asik to rã ahkying jé lo nyi ri ga haù Yhumsing tai pyo ri.

¹¹ Haù gi, Ngò, yhangmoq é ichyí iwá pé lé loq èq zui mù, Egutuq ming mai shuí htoq lo é hkûn,

yhangmoq eq tô tô é dangshikaq su dut rã a nghut.

Haì mù gà le, yhangmoq gi, Ngá é dangshikaq lé a xoq cháng kô é nghut mù,

Ngò gi, yhangmoq chyáng mai ling ló byuq é nghut lhê ga haù Yhumsing tai pyo ri.

¹² Shì gi, ahkying haù lai é htâng má, Israelaq é yhumbyù wuì eq Ngò to rã nghut é dangshikaq nghut lhê ga haù Yhumsing tai pyo ri.

Ngò gi, Ngá é tarã pé lé, yhangmoq é i-myit má kat byi mù, yhangmoq é myit nhikhlum má kã to byi rã nghut lhê.

Ngò gi, yhangmoq é Garai Gasang nghut mù, yhangmoq gi, Ngá é byu pé dut kó rã nghut lhê.

¹³ 'Haù Yhumsing lé sé keq.' ga, yhâng é gumang hpó lé nghut nghut,

yhâng é chyangnâm mâ é sù lé nghut nghut, mhoqshít é byù nyi rà a nghut lo, hai mù gà lé, yhangmoq lhunglhâng bang gi, tiq htâng sù mai kò htâng sù jé shoq Ngo lé sé kò rà nghut lhê.
 12 Hkâsu mù gà le, Ngô gi, yhangmoq é agê ashop hkyô lé mara hkyut pyâm byi mù, yhangmoq é mara pé lé dum a bun byi lo rà nghut lhê."^{*}
 gà ri.

13 Dangshikaq haù lé, Yhang "asik" gà é gi, sâng-hi lhum lé, axau kut pyâm é nghut ri; xau ló byuq é haù le, hkâ-myhâng a myáng má byuq ló byuq rà nghut lhê.

9

Myidàm Saksé Zúm Má Noqkuq É Hkyô

1 Sâng-hi lhê é dangshikaq gi, noqkuq rà htúngtarà pé eq noqkuq rà myidàm sân-yúng dik gok bo é nghut ri. 2 Saí tò é saksé zúm é sâng-hi gok má gi, haù myibung tsúng jang, siboí eq haù nhông byí é muk joq mù, haù gok lé gi, Chyoiyúng Jowò ga myhông ri. 3 Í dang nghú rà gok pân-gyang é ahkaù má é gok lé gi, Chyoiyúng Htâng é Jowò gà é nghut lhê. 4 Gok haù má gi, namngón jung nyhé é hng hkungga gyap eq hng sidex dangshikaq sidek joq ri. Dangshikaq sidek haù má gi, mannaq muk bo é hng yam, ahaq nyún tò é, Arun é dumbáng eq, dangshikaq luqlong pé bo tò ri. 5 Dangshikaq sidek é ahoq má gi, shíhtai gunglik hkungga byi jang htoq má wup tò é, Hpungwup shing kang bò Sú é hkerubim* pé joq tò ri. Nghut kôlhâng, ngamoq gi, ahkuí haù pé lé jikhúm nuqguq a wó tai san kyo é nghut lhê.

6 Haù đông jung hkangmó ban lajang tò é hkún, hkyangjong pé gi, ayang sâng-hi gok má wàng mù, yhangmoq é dojaù muzò lé wùn waq bekò nghut ri. 7 Nghut kôlhâng, ahkaù gok má gi, hkyangjong mó za, yhânggùng é matú le, a sé é za byu pé kut shut é marà é matú le, nhông byi rà sui chung mù, razàn má radàm za wang é nghut lhê. 8 Haù Chyoiyúng Woi-nyí gi, haù pé đông mai, sâng-hi é saksé zúm ru joq nyi nyi, haù Chyoiyúng Htâng é Jowò wàng hkyô a hpông shít shi é lé, tún shít nyi ri. 9 Haù gi, ipyat shi é matú tún shít é azòng nghut mù, nhông byí é chyunghuq pé eq shigu hkungga pé gi, dojaù sù é i-myt lé a wó lhoq sân-yúng byí é hkyô lé tai nau é nghut lhê. 10 Haù pé gi, zojung, shuqjung eq chí san chí séng hkng ahú hú eq za séng é nghut mù, htúngli asik, lé joq é ahkýng jé shoq za tò tò é gungsho eq séng é tará pé nghut ri.

Hkrisduq É Sui

11 Hkrisduq gi, shí má joq to gù nghut é gè hkyô pé é hkyangjong mó đông lé jé é hkún, hpan tò é má a lom nghú nau é, byu eq saí é a nghut é, je kò é eq je gumjup é saksé zúm mai wang lai bê nghut lhê. 12 Yhang gi, Chyoiyúng Htâng é Jowò má wang é hkún, bainám eq nojúng zo pé é sui lé chung mù wang é a nghut é za, Yhâng é suí eq yhang banshoq é matú radàm za ahtum abyuq é hkyi yù hkyô wó yù bê nghut ri. 13 Htúngli đông agot a-ù dut é bang lé lhoq sân-yúng rà matú, bainám eq nohtò zo pé é sui eq no-pyá é myi-mhop lé, yhangmoq é ahoq má hpyun gyun é hkún, yhangmoq gi, ahoq gungsho pyâm wó lhoq sanséng é hui kò é nghut lhê. 14 Haù nghut jáng, Garai Gasâng é hí má ra a bo é Yhânggùng lé, ahtum abyuq é Woi-nyí đông mai nhông byí é Hkrisduq é sui gi, rù dui nyi é Garai Gasang lé nga-nhúng wó dojaù sháng gaq ga, shi é hkyô shut shuí jé é nyi yap sâmlai mai nga-nhúng é myit sôn sé é hkyô lé, je riyhang wó lhoq sanséng yu ri-nhung mhai!

15 Haù nghut é yanmai, Hkrisduq gi, dang-gidiq byi tò é ahtum abyuq é muizé lé, ji yù hui é bang wó hap yù kò sháng gaq ga, dangshikaq asik é gyoro sò xoq byi sù nghut nyi ri. Haù su wó kut é gi, sâng-hi lhê é dangshikaq ahkaù má mara kut shut é bang lé lhoq lhut yù rà matú, yubak chyín xap zé ralhum đông, Yhang shí hkám byi yanmai nghut ri.

16 Madat dang eq séng luí ga jang, madat dang tai sù haù shí bê hkyô saksé shít rà lhê. 17 Haù mù gà le, madat dang gi, rayuq yuq shí jáng za sheq lichyúm htoq é nghut lhê. Madat dang tai sù rù dui nyi nyi, haù gi, hkâ-nhám le lichyúm htoq rà a nghut. 18 Haù nghut é yanmai, sâng-hi lhê é dangshikaq lháng gi, sui a bo lóm jáng lichyúm a htoq é nghut lhê. 19 Mosheq gi, haù jep é tará má bo é hkunmó hkangmó lé, shiwa byù banshoq bang lé ban tai pyo é hkún, zam zam ne é saumaù eq jam kyâng lé yù mù, nojúng zò é sui eq bainám sui eq wù nyhò tò é lé, chyúmding má le, shiwa byù banshoq bang lé le, hpyun gyún é nghut ri. 20 Yhang gi, "Sui shí gi, nungmoq cháng rà matú, Garai Gasang, hkunmó hkyô tò bê nghut é, dangshikaq tò tò é sui nghut lhê."^{*} ga tai ri. 21 Yhang gi, saksé zúm eq dojaù é má chung é zè pé má le, haù eq rajung za sui haù hpyún gyún ri. 22 Gè gè gi, haù jep é tará má bo é đông ga jang, azing zé aluq banshoq gi, suí eq lhoq sân-yúng é hui rà dut é nghut mù, sui htoq hkyô a joq jáng, mara hkyut byi hkyô le joq é a nghut.

23 Haù mù, mauhkúng zè pé é azòng pé gi, hkungga haù pé eq lhoq sân-yúng é hui rà é

* 8:12 Yer 31:31-34 * 9:5 Hkerubim gà é gi, byù su su, dusak su su dut é, ðùng dap é maumang lagyo rahú nghut lhê.
 * 9:20 Htoq Ló 24:8

nghut lhê. Nghut kôlhang, mauhkông zè pé yhang gi, haù pè htoq je ge é hkungga pé eq lhoq sân-yúng é hui rà dut é nghut lhê. ²⁴ Hkâsu mù gà le, akying lhùm é azông za nghut é, byu eq saí é chyoyúng dik é jowò má Hkrisduq wang é a nghut é za, Yhang gi, mauhkông má yhang wang é nghut mù, ahkuí gi, nga-nhung é matú Garai Gasâng é hí má bo yap byí nyí é nghut lhê. ²⁵ Yhang gi, haù hkyangjong mó mai yhumsing é sui a nghut é sui lé chùng mù, Chyoyúng Htâng é Jowò má zàn wui wàng lui kut é su, yhanggùng lé dum nhông byi byi kut rà matú mauhkông má wang é le a nghut. ²⁶ Haù đông ru nghut le gi, Hkrisduq gi, mau htoq xâng hkùn mai shí hkâm é adam myo myo nghut berâ nghut lhê. Nghut kôlhang, ahkuí, Yhang gi, yubak mara hui sêng pyám byi rà matú, yhanggùng lé hkungga nhông byi rà ga ipyat pé ló htâng ló nyí é má, banshoq é matú radàm za htoq shit bê nghut ri. ²⁷ Byù gi, radá za shí rà nghut mù, hau htâng má tará jéyáng é hui rà nghut é eq rajung za, ²⁸ Hkrisduq gi, byù myo myô é yubak mara lé yu pyám byi rà matú, radá za hkungga nhông é hui bê nghut ri. Haù mù, Yhang gi, yubak mara wun pyám byi rà a nghut lo é za, Yhang lé lánng nyí é bang lé hkyi yù hkyô yu lé byi rà matú, htâng má í dâm nghù rà dâm htoq shit rà nghut lhê.

10

Hkrisduq É Gùng Lé, Banshoq É Matú Radàm Za Nhông Byí É Hkyô

¹ Haù jep é tará gi, jé lô rà nghut é gè hkyô pé é akýng a nghut é za, wupzo za nghut ri. Haù nghut é yanmai, jep é tará gi, zàn wui ru nhông byi byi kut nyí é eq rajung zá é shigu hkungga pé đông mai, noqkuq rà matú chyàng lé é bang lé hkâ-nhám lé wó lhoq gumjup é a nghut. ² Tará haù wó lhoq gumjup byí é ru nghut le gi, yhangmoq nhông byí é hkyô nô pyám kó rà a nghut lí? Hkâsu mù gà le, haù noqkuq é bang gi, banshoq é matú radàm za lhoq sanséng hui é nghut jáng, yhangmoq é yubak mará é matú, hkâ-nhám le mara a bò bun lo kó rà nghut lhê. ³ Nghut kôlhang, shigu hkungga haù pé gi, zàn wui yubak mara pé lé lhoq pun byí é zè nghut ri. ⁴ Haù mù gà le, nohtó pé eq bainám pé é sui gi, yubak mara le hui sêng pyám é hkyô wó dut é a nghut.

⁵ Haù mù lui, Hkrisduq, mingkan má lé jé é hkùn, Yhang taí é gi,

"Shigu hkungga eq hkungga lé Nàng a o é nghut mù,

Nàng kúm gi, Ngá é matú gungdu hen to byi bê nghut ri.

⁶ Myi nyhé hkungga pé eq mara hkyut hkungga pé gi, Nang lé gabú nhang é a nghut.

⁷ Hau htâng, Ngò gi, 'Garai Gasang é, Ngò eq séng lui chyúmding má kâ tô é eq rajung za,

Nàng ô nau é hkyô kut rà matú, Ngò, shí má nyi lhê.' nghù taí é."⁶

gã ri. ⁸ Sâng-hi má, Yhang gi, "Shigu hkungga eq hkungga pé, myi nyhé hkungga eq mara hkyut hkungga pé lé, Nàng a o é htoq agó, haù pé lé Nàng a gabú é nghut lhê." ga taí ri. Haù jep é tará đông haù pé lé kut rà dut kôlhang taí é nghut ri. ⁹ Hau htâng má, Yhang gi, "Nàng ô nau é hkyô kut rà matú, Ngò, shí má nyi lhê." ga taí ri. Haù gi, Yhang, htang lhum dangshikaq lé htaí masat to rà matú, sâng-hí lhum lé tô pyám é nghut ri. ¹⁰ Myit ô nau hkyô hau é yanmai, Yesuq Hkrisduq, Yhâng é gungdu lé hkungga đông banshoq é matú radàm za nhông byí é đông mai, nga-nhung gi, lhoq chyoyúng é hui bê nghut ri.

¹¹ Hkyangjong hkangmó gi, nyí nyí bùi bùi, yap mù, yhâng é hkyangjong muzó lé zui saí é nghut lhê. Yhang gi, yubak mara lé hkâ-nhám lhang a wó lui sêng pyám byí é, rajung zá é shigu hkungga lé, dum nhông byi byi kut é nghut lhê. ¹² Nghut kôlhang, hkyangjong mó nghut é Hkrisduq gi, yubak mara hkyut byi rà hkungga ralhul lé za, ahkyíng banshoq é matú ban nhông byí é hkùn jáng, Garai Gasâng é loqyo hkyam shut zung to bê nghut ri. ¹³ Haù hkùn mai, Yhang gi, Yhâng é gye pé lé, Yhâng é hkyi nang jang kut byi rà lé lánng nyí é nghut ri. ¹⁴ Haù mù gà le, Yhang gi, lhoq chyoyúng é hui nyi bang lé, hkungga ralhul eq za, pyat dedú é matú lhoq gumjup byi bê nghut ri.

¹⁵ Haù Chyoyúng Woi-nyí le, haù hkyô eq séng lui nga-nhung lé saksé hkâm kyô ri. Sâng-hi má, Yhang taí é gi,

¹⁶ "Haù Yhumsing taí ri, shí gi, ahkyíng haù lai htâng má, Ngò, yhangmoq eq to rà dangshikaq nghut lhê.

Ngò gi, Ngá é tará pé lé, yhangmoq é myit nhikhlum hkaù má kat byi mù, yhangmoq é i-myt má kâ to byi rà nghut lhê."⁶

gã ri. ¹⁷ Hau htâng, Yhang taí jat é gi,

"Ngò gi, yhangmoq é yubak mara pé eq tará a chung é muzó pé lé, bùn lô rà a nghut."⁶

gã ri. ¹⁸ Haù mù, mara haù pé lé hkyut pyám byi bê nghut jáng, yubak mará é matú hai hkungga le a ra lo nghut ri.

Hkam Jan Râ Hkyô

¹⁹ Haù mù lui, gumang wui é, nga-nhung gi, Yesuq é sui eq, haù Chyoyúng Htâng é Jowò má wàng rà matú hkyak wó lum to bê nghut lhê. ²⁰ Haù gi, Yesuq é gungdu

nghut é pán-gyang dông mai, nga-nhung é matú hpóng byi bê nggut é asik eq rú dui nyi é hkyô nggut lhê. ²¹ Haù nggut é yanmai le, Garai Gasâng é yhùm lé up é gyaú é hkyangjong lé nga-nhung wó é yanmai le, ²² nga-nhung gi, gíngtíng é lumjng hkyô mai sansêng é i-myt eq, Garai Gasâng chyáng ê mù, mara bò bún é myit sôn sê é hkyô mai, nga-nhung lé lhoq sansêng rà matú nga-nhung é i-myt lé hpyun gyún é hui nhâng luí, nga-nhung é gungdu gi, sân-yúng wui eq chí byi é hui yù sháng. ²³ Nga-nhung gi, nga-nhung yín yu é myit myoqbyu hkyô lé zúí gíngtíng nyi sháng; hkâsu mù gâ le, dang-gidiq byi to bê Sù gi, lhumzui Sù nggut lhê. ²⁴ Chyitdap hkyô eq ge é muzó pé má, nga-nhung gi, rayuq eq rayuq hkâsu kut myit nhaù toq byi lhum rà hkyô lé, dat myit nyi sháng. ²⁵ Chôm huí zup lhùm nyi é hkyô lé, ra-am lhaq tô pyám nyi kô é su, nga-nhung gi, a tô pyám é za, haù Buinyi chyáng lò bê nggut é lé nungmoq sê é eq rajung za, rayuq eq rayuq je riyhang myit wum byi lhùm nyi sháng.

²⁶ Nga-nhung gi, tengmán hkyô lé sê yu é htâng má, shi-ngé ngé mara dum kut shut shut kut é nggut jáng, mara hkyut byi rà hkungga a joq lo. ²⁷ Tará jéyáng hkyô eq Garai Gasâng é gyê pé lé nyhê hkyô pyám rà nggut é nhikmo-yô é myi lé za, gyuq chíq myit mai láng nyi rà dut bê nggut lhê. ²⁸ Mosheq é tará lé he-ngik é sú ó yuq le, saksé í sum yuq é dang é yanmai, shogyo nhikmyin a huí é za sat pyám é hui bê nggut lhê. ²⁹ Haù jáng, Garai Gasâng é Yhangzô lé hkyiwa ô má nâng pyeq bê sú, yhumsing lé lhoq sân-yúng byi bê nggut é dangshikaq é sui lé a chyoiyúng é zê dông kut pyám bê sú eq, jeju byi é Woi-nyí lé rhoi é sú gi, hkâ-í yhang gyaú é mara dam byi é hui gíng rà nggut lhê ngù, nungmoq wó myit akó lú? ³⁰ Hkâsu mù gâ le, "Lató hpuq rà gi, Ngò ru nggut lhê; Ngò lató hpuq rà."* ga le, "Haù Yhumsing gi, Yhâng é byu pé lé tará jéyáng rà nggut lhê."* ga le, tai é Sù lé, nga-nhung sê lhê. ³¹ Haù rú dui nyi sù Garai Gasâng é loq hkaù má byit gyó wang é gi, gyuq chíq jung yhang nggut ri.

³² Nungmoq, haù maubó lé hap yu é* htâng, wuihke jamyam huí é má gyai yhang shikut kólui wó jân pyam bê nggut é, hí lhê buinyi pé lé myit bun keq. ³³ Ra-u u má, nungmoq gi, byu pé hí má de de rhoi shit é eq zing-rí é hui zo bekò nggut ri; ra-u u má, nungmoq gi, haù su hui zo bang eq rahá bo hui zo bekò nggut ri. ³⁴ Nungmoq yhang, je ge é eq ru gíng nyi é zê pé wó é lé sé kô é yanmai, nungmoq gi, htóng lúng bang lé shogyo nhikmyin bekò eq, nungmoq é sutzè

pé lé sing yu pyám byi é bang lé, gabú myit eq jân pyám bekò nggut ri.

³⁵ Haù mù luí, nungmoq é hkyak myit lum tô é hkyô lé hkádú pyám kó; agùn agó chyunghuq shigyaú é hui kó rà nggut lhê. ³⁶ Nungmoq gi, Garai Gasâng é ô naù hkyô lé kut é hkún, Yhâng danggidiq byi tô é lé wó hap yù rà matú, nungmoq hkam jan rà dut é nggut lhê. ³⁷ Hkâsu mù gâ le, razup zo nggut jáng,

"Haù lé lô rà Sù gi, jé lé rà nggut mù, ahkyíng lhoq myáng rà a nggut.

³⁸ Nggut kôlháng, Ngá é dingmán sù gi, lumjng myit mai asak dui rà nggut lhê.

Yhang nungzut zut é nggut le gi, Ngò, Yhang lé myit nguí rà a nggut."*

ga tô ri. ³⁹ Nggut kôlháng, nga-nhung gi, nungzut zut mù htên byoq huí é bang a nggut é za, lumjng mù hkyi yù huí é bang ru nggut lhê.

11

Lumjng Myit Mai

¹ Lumjng myit ngu é gi, nga-nhung myit myoqbyu tô é lé hkyak wó rà ngu é eq nga-nhung a myàng shí é lé joq lhê ngu hkyak sê é hkyô nggut lhê. ² A-nham lhê bang gi, lumjng myit haù mai Garai eq owaq é hui kô é nggut lhê.

³ Lumjng myit mai, nga-nhung gi, nyi mi-nyi, joq mijoq lhunglháng lé Garai Gasâng é hkunmó eq hpan tô é hkyô sê gyô é nggut lhê. Haù mù, myoq eq wó myang é pé gi, byu-myang é pé mai saí htoq tô é a nggut.

⁴ Lumjng myit mai, Abelaq gi, Ka-in kut é htoq je ge é hkungga, Garai Gasang lé nhóng byi é nggut ri. Lumjng myit mai, yhang gi, yhâng é hkungga eq séng luí Garai Gasang hkyá-ón é hkún, dingmán sù rayuq dông owaq é hui bê nggut ri. Haù mù, lumjng myit mai, yhang gi, shi byuq bê nggut kôlháng, dang rú nyo nyi ashí nggut lhê.

⁵ Lumjng myit mai, Enuq gi, shi é a hui zo shoq, asak shí mai mauhkúng shut shuí yu é hui bê. Yhang lé, Garai Gasang shuí lo byuq bê nggut é yanmai, yhang lé a wó myàng lo nggut ri. Hkâsu mù gâ le, yhang gi, shuí yu é a hui shí é hí má, Garai Gasang lé nguí nhâng sù rayuq dông owaq é hui sù nggut ri. ⁶ Lumjng myit a bo é nggut le gi, Garai Gasang lé a wó nguí nhang é nggut lhê. Haí mù gâ le, Yhâng chyáng shikut luí lé jé é sú gi, Yhang nyi é hkyô lé le, lhumzui myit mai Yhang lé hó bang lé, Yhâng eq shigyaú é lé le, lumjng rà dut é nggut lhê.

⁷ Lumjng myit mai, Noaq gi, a myang wú shí é hkyô pé eq séng luí sidiq byi huí é

* 10:30 Tará Pun 32:35

* 10:30 Tará Pun 32:36

* 10:32 Haù maubó lé hap yu é gâ é gi, gabú danglù lé sâng-hi

wó hap yu é lé gâ lhê.

* 10:38 Hbk 2:3-4

hkùn, yhâng é yhumbyù wui lé hkyí rã matú, gyuq hkunggã é dõng mai wui-sanghpo sai bê nghut ri. Yhâng é lumj́ing myit mai, mingkan lé mara byí é nghut mù, lumj́ing myit mai lo é dingmán hkyo é jeju lé hkam yu sù dut bê nghut ri.

⁸ Lumj́ing myit mai, Abraham gi, yhâng é muizè dõng, htàng má yhang hap yù rã nghut é, Garai Gasang byí é jowò shut e ló rã matú ji yu é huí é hkùn, jìno gyo mù, yhang hká shut e ló é a sé kólhang, ê bê nghut ri.

⁹ Lumj́ing myit mai, yhang gi, gó ming má nyi é byù bíng rayuq su, danggidiq byi tó é mau má nyi bê nghut ri. Yhang gi, zúm pé má lúng é nghut mù, rajung za é danggidiq é muizè lé hkam yu é Isak eq Yakup le, zúm pé má lúng bekò nghut ri. ¹⁰ Hkásu mù gã le, Abraham gi, Garai Gasâng eq azòng hên mù sai tó é, gng é apùn awang pé eq mu é myuq lé myit myoqbyu nyi é nghut ri.

¹¹ Lumj́ing myit mai, Abraham gi, yhâng é asak ipyat laí ló byuq é eq, Sarah le baùdng nghut to kólhang, haù danggidiq byi Sù, lhumzui sù nghut lhê ga myit sôn yu é yanmai, ìwa rayuq wó dut é huí bê nghut ri.

¹² Haù mù luí, yhang gi, shí gùng dõng nghut kòle, yhang rayuq mai lo é awut ashín pé gi, mauhkúng má é kyí pé eq wuimau yàm má é a ung nghap é semuí myhó myò lò bê nghut ri.

¹³ Byù haù bang banshoq gi, yhangmoq shi é hkùn jé shoq lumj́ing myit mai asak dui nyi kó é nghut lhê. Yhangmoq gi, danggidiq byi tó é pé lé a hap yù kó nghut ri; nghut kólhang, haù pé lé myàng za myàng kòmù, we mai te yu akò. Yhangmoq gi, myidàm htoq má gó ming byu pé eq byù bíng pé nghut é lé yín yù bekò nghut ri. ¹⁴ Haù su yín yu é byu pé gi, yhangmoq yhumsing é ming lé ho nyi é bang nghut é lé tìn shit é nghut akò. ¹⁵ Yhangmoq htoq lo é ming lé, yhangmoq myit tui nyi kó é ru nghut le gi, dum tau ló rã ahkáng wó kó rã nghut lhê.

¹⁶ Ahkuí kúm, yhangmoq gi, je ge é ming nghut é, mauhkúng mingdán lé myit tui nyi akò nghut ri. Haù mù luí, Garai Gasang gi, yhangmoq é Garai Gasang nghu é huí rã lé a hoq é nghut lhê. Hkásu mù gã le, Yhang gi, yhangmoq é matú myuq ralhú lājàng to byi bê yanmai nghut ri.

¹⁷ Lumj́ing myit mai, Abraham gi, Garai Gasâng eq yhang lé chyam é hkùn, Isak lé hkungga ralhú dõng nhõng byi bê nghut ri. Haù gi, danggidiq pé lé hap yu to bê sù gi, yhâng é yuqzo zote lé nhõng byi rã dá é nghut lhê. ¹⁸ Garai Gasang gi, "Isak dõng mai lo é lé, náng é awut ashín nghù sòn byi rã nghut lhê."^{*} ga yhang lé danggidiq byi to bê nghut kòle, yhang haù su kut é nghut ri.

¹⁹ Abraham gi, shi é mai Garai Gasang wó lhoq dui toq lhê ga myit yu ri. Tai sháng ga jáng, Isak lé, shi byuq bê mai, yhang dum wó hap yu é nghut ri.

²⁰ Lumj́ing myit mai, Isak gi, Yakup eq Eso nhik é htàngnùng lhê é matú, shimán byi bê nghut ri.

²¹ Lumj́ing myit mai, Yakup gi, yhang shi ló rã u má, Yosep é yhangzò nhik lé shimán byi mù, yhâng é dumbáng-u má ngè luí, noqkuq bê nghut ri.

²² Lumj́ing myit mai, Yosep gi, yhâng asak htúm ló rã u lé, Israelaq byu pé Egotuq ming mai htoq lò rã eq séng luí tai mù, yhâng é showui pé eq séng luí hkásu kut rã hkyò lé pying to bê nghut ri.

²³ Lumj́ing myit mai, Mosheq é yhàngnu eq yhàngwã nhik gi, yhang hku lé é htàng má, yhang lé lhamó sum hkyap haq to bekò nghut ri. Haí mù gã le, yhangnhik gi, zoshàng haù yùng é myàng kòmù, hkohkam é mungdang lé a gyuq kó nghut ri.*

²⁴ Lumj́ing myit mai, Mosheq gi, yhang kó lo é hkùn, Hpara-uq é byizò é yhangzo ga rã lé he-ngik pyám ri. ²⁵ Yhang gi, yubak marà é ngón hkyò má rayoq zo ngón kún rã malaí Garai Gasâng é byu pé eq rahá hpuzò é huí rã lé sheq hkyin yù bê nghut ri. ²⁶ Yhang gi, haù Hkrisduq é matú rhoí huí é lé, Egotuq ming má é sutzè htoq má je riyhang hpaudap lhê ga myit sôn yu ri. Haí mù gã le, yhang gi, yhâng é shigyau chyunghuq lé myit myoqbyu nyi sù nghut ri. ²⁷ Lumj́ing myit mai, yhang gi, hkohkâm hpó nhikjum yó é lé a gyuq é za, Egotuq ming mai htoq ló byuq bê nghut ri. Yhang gi, myoq eq a wó myang é sù Garai lé wó myang é sù dõng, hkam jân é nghut ri. ²⁸ Lumj́ing myit mai, yhang gi, haù zomún lé sat é maumang lagyò eq Israelaq byu pé é zomún lé a wó zàng sháng gaq ga, Lhoqlhai Poí eq sui hpyùn é hkyò le kut hí bê nghut ri.

²⁹ Lumj́ing myit mai, haù shiwa byu pé gi, Nhõng Nè lé kyuq huí é myigùng htoq mai su laí byit bekò nghut ri; nghut kólhang, Egotuq byu pé le, haù dõng laí shikut wú kó é hkùn, yhangmoq gi, myup shi byuq bekò nghut ri.

³⁰ Lumj́ing myit mai, shiwa byu pé, Yerihko myuq xêwâm lé nyhit nyi sò lhing é htàng má, xêwâm haù leq gyop byuq bê nghut ri.

³¹ Lumj́ing myit mai, shiwa myhí Rahap gi, haù Israelaq jó wú bang lé nguigón é eq lhom hkulum yu é yanmai, jino a gyo bang eq rahá sat pyám é a huí é nghut lhê.

³² Haù htoq lai luí, ngò hai tai jat ra shirá lhú? Gidon, Barak, Samson, Yephtha, Dawiq, Samuelaq pé eq myightoi pé é hkyò lé tai rã ahkying ngò a wó. ³³ Haù bang gi, lumj́ing

* 11:18 Apùn 21:12 * 11:23 Haù-u lé, hkohkâm hpó gi, Israelaq pé é yuqzo zonú wui lé sat pyám rã hkunmó hkyò tò é nghut lhê.

myit mai mingdán pé lé wó zân ung yù bekô, tengmán hkyô lé chung jai bekô, danggidiq byi to bê lé wó hap yù bekô, hkanghkyi pé é nhut lé wó myhí pyám bekô, ³⁴ myidug myishâm lé wó sat pyám bekô, shamsó mai lé wó hpang lut bekô nghut ri. Yhangmoq é wum nyhóm hkyô gi, wum taù bo byuq é dut bekô nghut ri. Yhangmoq gi, majan má a-tsam mó bò bang dut mù, maigan gyè pé lé wó ung pyám kô é nghut lhê. ³⁵ Myiwe wui gi, yhangmoq eq sêng é shi byuq bê bang asak dum lhoq tuí huí é lé, wó yù bekô nghut ri. Góbang gi, je ge é dui toq hkyô wó yù kó sháng gaq ga, lhoq lhut é hui rá lé he-ngik pyám kômù, zing-rí é gyai yhang hui zo bekô nghut ri. ³⁶ Ra-am gi, wuizui kut pyám byí é eq nhuq bat é hui bekô, góbang gi, shamtoq kyum hut huí é eq htóng lhúng é hui bekô nghut ri. ³⁷ Yhangmoq gi, luggok eq dú sat é, í tím dut shoq yik hpyit é, sham eq sat pyám é hui bekô nghut ri. Yhangmoq gi, sau-kuq eq bainám-kuq wut mù, htot lhing wún lui, myung kyuq é, zing-rí é eq rhoi pyám é hui bekô nghut ri. ³⁸ Yhangmoq lhumzui nyi kô é yanmai, mingkan gi, yhangmoq eq a gingdán nghut ri. Yhangmoq gi, yoso pé má, bùm pé má, luqhkýung pé eq myidong pé má nyi lhing wún bekô nghut ri.

³⁹ Haù bang banshoq gi, yhangmoq é lumjing myit é yanmai, owaq é hui bê nghut kôle, yhangmoq ó yuq le, danggidiq byi tô é lé a myang hkam yù kó nghut ri. ⁴⁰ Hai mù gà le, nga-nhúng eq rahá za nghut jáng sheq, yhangmoq lhoq gumjup é wó hui kó sháng gaq ga, Garai Gasang gi, nga-nhúng é matú je ge é hkyô lajang to byi bê nghut ri.

12

Garai Gasang, Zo Wui Lé Mhoqshit É Hkyô

¹ Haù mù lui, nga-nhúng gi, haù myhò é saksé pé mhtudùm su nga-nhúng é lhinghkyuq má joq to bê nghut é yanmai, nga-nhúng lé hkâm tang é hkyô pé jung hkangmó eq, lui za lhoq nhúng byí é yubak mara lé dú pyám mù, nga-nhúng òn ra matú tô tô é hkyô lé, hkam jan lui òn é ló sháng. ² Nga-nhúng gi, nga-nhúng é lumjing hkyo é apùn awang lé hí sù eq lhoq gumjup byi sù nghut é Yesuq lé wú tsuq nyi sháng. Yhang gi, Yhâng é hí má joq tô é gabú hkyo é yanmai, hoq hpú é hkyô lé hai su a ngam é za, tapzing má shí hkâm é hkyô lé jân pyám lui, Garai Gasang é hkohkâm-tanghkuq é loqyo hkyam shut zung to bê nghut ri. ³ Nungmoq gi, a ngu byuq râ eq myit wum a gyui byuq kó sháng gaq, yubak dap bâng chyáng mai haù su htuq htung é hkyô lé jân pyám é Yesuq chyáng mai myit wum yù keq.

⁴ Nungmoq gi, yubak mara lé htuq htung shikut é hkyô má, nungmoq é sui shun pyám shoq yhang a kut shí kó nghut ri. ⁵ Hau htoq agó, nungmoq gi, zo wui lé òng Garai Gasang nungmoq lé wum byí é dang lé tô-myhí pyám bekô lhú? Wum byí dang haù gi, "Ngá zo é, haù Yhumsing mhoqshit é hkyô lé agya alhá hkâkut pyám,

Yhang, nang lé tân é hkún, myit wum hkâgyui,

⁶ hai mù gà le, haù Yhumsing gi, Yhang chyitdap é bang lé mhoqshit mù, zo rayuq lé òng,

Yhang hap yu é bang yuq hkangmó lé dam byí é nghut lhê."^{*}

gá é nghut ri.

⁷ Mhoqshit huí é hkyô má, wuìhkê é lé hkam jan keq. Garai Gasang gi, nungmoq lé, zo wui lé òng kut é ru nghut lhê. Hkâsu mù gà le, yhumsing é yhângwâ eq a mhoq é zo gi, ó wá nyi lhê lhú? ⁸ Nungmoq gi, yuq hkangmó huí lai é mhoqshit hkyô lé, a hui kô é nghut jáng, dezò pé òng nghut byuq mù, zo sîng wui a nghut lo kó. ⁹ Nga-nhúng banshoq bang gi, nga-nhúng lé mhoqshit é xângzo íwâ pé wó é bang chyat nghut mù, yhangmoq lé hkunggâ é nghut lhê. Haù nghut jáng, je riyhang, nga-nhúng é woi-nyí eq sêng é íwâ é a-ò má nyi mù, asak òn ra dut ri myhi-nhung! ¹⁰ Nga-nhúng é xângzo íwâ pé gi, yhangmoq je ge dik bün é lé, nga-nhúng lé rayoq zo mhoqshit é nghut ri. Nghut kôlháng, Garai Gasang gi, Yhâng é chyoiyung hkyô má nga-nhúng wó bo lóm shoq, nga-nhúng é gè hkyô é matú, nga-nhúng lé mhoqshit ri. ¹¹ Mhoqshit é hkyô hkangmó gi, mhoqshit u lé ngón hkyô a nghut é za, nò hkâm hkyô nghut nyi ri. Nghut kôle, mhoqshit hkyô haù lé hkam yù bê bâng é matú gi, htàng má, nguóngón hkyô eq dingmán hkyo é ashi lhoq htoq byí ri.

¹² Haù mù lui, myung byuq é nungmoq é loq pé eq wum nyhóm byuq é nungmoq é hkyihput pé lé wum-o lhoq kîng keq. ¹³ Hkyi hten bang a wó sô é a dut shoq, lhoq gè byí é wó hui kó sháng gaq, nungmoq so rá matú, hkyô lhoq nyhang nyi keq.

Garai Lé He-ngik Bang Dàm Byi Hui Râ Hkyô

¹⁴ Byù banshoq bang eq nguóngón shoq nyi rá eq chyoiyung rá matú wó dut é í shikut keq. Hkâsu mù gà le, ó yuq le, chyoiyung hkyô a bo é gi, haù Yhumsing lé myàng rá a nghut. ¹⁵ Ó yuq le, Garai Gasang jeju lé a tô pyám rá matú, sidiq keq. Haù, yuq htoq lô mù, wuìhke hkyô lhoq htoq é eq byù myo myo lé agot a-ù dut nhang é nui hko su, ó yuq lé le hkâdut nhâng kó. ¹⁶ Ó yuq le, ashop é òng gungsho zùm yap é hkyô nghut

* 12:6 Sânghkyang 3:11-12

nghut, zang radún é matú, yhang wó tô é yuqzo zomún muizê ahko ahkáng lé ung zô pyâm é, Garai a lom é Eso su nghut nghut, a kut rà matú sidiq keq. ¹⁷ Nungmoq sê é eq rajung za, Eso gi, htâng má, shimân jeju haù lé hkam yù nau é hkùn, he-ngik pyâm é hui bê. Yhang gi, shimân jeju haù lé ngaubyi ngau-nhap eq hô kôlhang, yhang kut é hkyô lé a wó htaì byi lo nghut ri.

¹⁸ Nungmoq gi, wó záng é eq myi duq nyi é Sinaq Bùm má le, mauchut tuq é, noq-singkyi dut é eq laidun lo é má le, ¹⁹ tut htê mying é eq, dang tai htê mying é má le, a jé é kó nghut ri. Dang htê haù lé wó gyô é bang gi, yhangmoq lé, dang a tai jat lo rà matú dung tóngbán akô nghut ri. ²⁰ Haù mù gà le, yhangmoq gi, "Bùm haù má dusak pé záng jáng lhang, luqgok eq dú sat rà dut lhê."* ga Garai Gasang hkyô tô é hkunmó lé a wó hkâm kô é yanmai nghut ri. ²¹ Haù byu-myang hkyô gi, lúm wú gyuq hpo dut é yanmai, Mosheq lhang gi, "Ngò, gyuq nán ri."* ga tai é nghut ri.

²² Nghut kôlhang, nungmoq gi, Zi-un Bùm eq rú dui nyi é Garai Gasang é myuq nghut é mauhkúng Yerusalem má, maumang lagyô pé ajùm ayò gabú ratung zup zing é jang eq, ²³ mauhkúng htoq má mying ká to hui é, zomún pé é noqkuq hpúng joq jang má, jé lé bekò nghut ri. Haù mù, nungmoq gi, byù banshoq é tarà agyi nghut sù Garai Gasang chyáng le, lhoq gumjup hui é dingmán bang é woi-nyí pé chyáng le, ²⁴ dangshikaq asik é gyoro so sù Yesuq chyáng le, Abelaq é sui htoq má je ge é danglú tai é, hpyùn gyùn é sui má le, jé lé é nghut bekò.*

²⁵ Nungmoq gi, dang nyô Sù lé a gyo a kut rà matú, sidiq keq. Myidám htoq má sidiq byi é sù lé he-ngik pyâm é bang, a lut kô é nghut lhê. Haù mù, mauhkúng mai nga-nhung lé sidiq byi é Su chyáng mai, nga-nhung lhing ló byuq é ru nghut le gi, je riyhang nga-nhung a wó lut rà a nghut kó hí? ²⁶ Haù Garai dang tai é u má, Yhâng é htê gi, mingkan lé lhoq nhùn kat ri, ahkúi kúm gi, "Ngò, mingkan lé za a nghut, mauhkúng pé lé le radám dum lhoq nhùn rà nghut lhê."* ga Yhang danggiq byi to bê nghut ri. ²⁷ "Radám dum" gà é dang gi, haù a wó lhoq nhùn é pé wó myit to sháng gaq ga, hpan to hui é zè pé nghut é, wó lhoq nhùn é pé lé hui sêng pyâm rà lé gà é nghut lhê.

²⁸ Haù mù luí, nga-nhung gi, a wó lhoq nhùn é mingdán lé hap yu to bê nghut mù, jeju bun luí, hpautap é eq gyuq hkunggá é myit mai Garai Gasang hap yù gíng é đông noqkuq sháng. ²⁹ Hkásu mù gà le, nga-nhung

é "Garai Gasang gi, nyhê jôm é myi nghut ri".*

13

Ló Htáng Má Lhoq Pun Kyiêng É Hkyô

¹ Rayuq eq rayuq, gumang yhangchang đông chyitdap lhum nyi keq. ² Byù bíng pé lé hkulum rà hkátô-myí kó, hkásu mù gà le, ra-am gi, haù su kut nyi kô é yanmai, a sê é za maumang lagyô pé lé hkulum záng bekò nghut ri. ³ Nungmoq gi, htóng lúng bang eq rahá htóng lúng luzúm wui đông, htóng lúng bang lé le, nungmoq yhang jamjau hui zô nyi é đông, hpuzô é bang lé le, myit bun keq.

⁴ Myiháng hkyô gi, lhunglhang bang eq hpautap é hui rà dut é nghut mù, myiháng yhpuphú gi, sân-yúng rà dut lhê. Hkásu mù gà le, Garai Gasang gi, su-myi sulàng lú é bang eq ashop é đông gungsho zùm yap é bang banshoq lé jéyáng rà nghut lhê. ⁵ Nungmoq é asak dui hkyô má, ngùn lé chyitdap é myit tô pyâm mù, nungmoq wó é lé nhik dik nyi keq, haù mù gà le, Garai Gasang gi,

"Hkâ-nhâm le, Ngò, nàng eq a gang rà; hkâ-nhâm le, Ngò, nang lé a tô pyâm rà."*

ga tai é nghut lhê. ⁶ Haù mù, nga-nhung gi, hkyak lum é myit mai,

"Haù Yhumsing gi, ngo lé garúm sù nghut lhê yanmai, ngò, gyuq rà a nghut. Ó yuq wá, ngo lé hai wó kut rà lú?"* nghu tai é nghut lhê.

⁷ Nungmoq lé Garai Gasang é mungdang tai kyô é, nungmoq é hkyô-u shê bang lé, myit bun keq. Yhangmoq asak htum shoq nyi lai lo é sâmlai lé myit wú mù, yhangmoq é lumjing myit lé alik kut yù keq. ⁸ Yesuq Hkrisduq gi, a-nyí nap, hkù-nyí, htàngngùn pyat dedu rajung za nghut nyi ri.

⁹ Maù nhô zà é mhoqshit hkyô ajung jung mai eq shuí ngoq hui é bang hkátut kó. Zo bang lé hai akyú a byi é, htungli zoshuq eq a nghut é za, Garai jeju eq nga-nhung é myit nhiklum lé wum-o lhoq king yu é gi, gè hkyô nghut lhê. ¹⁰ Nga-nhung gi, saksé zóm má dojaú é hkyangjong pé zô ahkáng a wó é hkungga gyap ralhum wó é nghut lhê.

¹¹ Haù hkyangjong mó gi, dusak pé é sui lé, yubak mara hkungga đông Choyoiyung Htâng é jowò má yu wang ri; nghut kôlhang, gungsho pé lé gi, byù nyi jowò shinggan má nyhê hkyô pyâm ri. ¹² Haù eq rajung za, Yesuq le, Yhâng é sui đông mai byu pé lé wó lhoq choyoiyung rà matú, myuq hkum shinggan má jamjau hpuzo mù shi hkám bê nghut ri. ¹³ Haù mù luí, nga-nhung gi, byù nyi jowò shinggan má Yhâng chyáng é mù, Yhang hui zô é rhoi hkyô lé ê bo hui

* 12:20 Htoq Ló 19:12-13 * 12:21 Tarà Pun 9:19 * 12:24 Abelaq lé gi, yhangmang Ka-in eq sat é nghut luí, yhâng é sui gi, latò-hpuq rà matú nghut ri; nghut kôlhang, Hkrisduq é sui kúm gi, hkyi yù hkyô lajang byi ri. * 12:26 Hagi 2:6

* 12:29 Tarà Pun 4:24 * 13:5 Tarà Pun 31:6 * 13:6 Hkya-on 118:6-7

zo sháng. ¹⁴ Hkâsu mù gâ le, nga-nhúng gi, mingkan shí má ru gíng nyi é myuq wó bang a nghut é za, jé lé lô râ myuq lé ho nyi é bang ru nghut lhê.

¹⁵ Haû mù luí, nga-nhúng gi, Garai Gasâng é myíng lé yín yu é nhutwui é ashi nghut é, hkya-on hkungga lé, Yesuq dông mai, Garai Gasâng chyáng xoq xoq nhông byí nyi sháng. ¹⁶ Ge é hkyô kut râ eq góbang lé shuí gam chùng râ hkyô lé, hkâtô-myhí kó; hkâsu mù gâ le, Garai Gasang gi, haû sù é hkungga pé lé ô ngui nyi ri.

¹⁷ Nungmoq é hkyô-u shê bâng é jìno gyo mù, yhangmoq é ahko ahkáng ô má nyi keq. Yhangmoq gi, jihpán shit râ dut é bang dông mai nungmoq lé upzúng nyi é nghut lhê. Yhangmoq é muzó pé gi, nungmoq é matú akyú a bo é wòlai a dut é za, gabú hkyô ralhum wó dut sháng gaq, yhangmoq é jìno gyô nyi keq.

¹⁸ Ngamoq é matú kyûdung byi kó laq. Ngamoq gi, sân-yúng é myit sôn sê é hkyô wó mù, hkyô hkangmó má ge é dông asak duì râ lé ô nau lhê nghú, hkyak wó myit ri. ¹⁹ Ngò gi, nungmoq chyáng hân za wó dum jé sháng gaq, hau é matú je riyhang kyûdung byi keq nghú wum tai tsuq kat lhê.

²⁰ Sau hpúng pé é sau zúng Sù mó nghut é, nga-nhúng é Yhumsing Yesuq lé, haû ahtum abyuq é dangshikaq é sui dông, shí bê mai dum lhoq dui toq é sù, nguingón hkyo é Garai Gasang gi, ²¹ Yhang ô nau é hkyô kut râ matú ge é hkyô jung hkangmó nungmoq lé lhoq gumjup byi mù, Yesuq Hkrisduq dông mai Yhang lé gabú nhang é hkyô lé, nga-nhúng chyáng kut nyí sháng gaq. Hpungwup shingkan gi, Yesuq Hkrisduq chyáng pyat dedu ahtum abyuq ru joq nyí sháng gaq. Amen.

²² Gumang wui è, ngò lhoq pún kyíng é dang lé nungmoq wó hkam jan kó sháng gaq nghú, wum tai tsuq kat lhê; hkâsu mù gâ le, ngò gi, nungmoq lé, laiká ratot za kê kat é nghut lhê.

²³ Ngò gi, nga-nhúng é gumang Timohti lhoq lhut kat é hui bê hkyô lé, nungmoq lé sé nhâng nau ri. Yhang shí má myap jé lé é nghut le gi, ngò, yhang eq rahá nungmoq lé, lé hui râ nghut lhê.

²⁴ Nungmoq lé shuí-u bang banshoq eq Garai Gasâng é byu pé banshoq lé bo shí-kyâm byi keq. Itali ming mã é gumang wui gi, nungmoq lé shí-kyâm kat akó nghut ri.

²⁵ Jeju gi, nungmoq banshoq bâng chyáng ru joq nyí sháng gaq ô.

YAKUQ Hun Kat é Laiká (James)

¹ Garai Gasang eq Yhumsing Yesuq Hkrisduq é jùn, ngò Yakuq gi, byo myin tó é Israelaq raxe í myú lé, nuingón dang shit kyó kat lhê.

Lumjng Myit Lé Chyam É Hkyô Eq Hpaqchyí Byéng-yá

² Ngá gumang wui ê, nungmoq é lumjng myit lé chyam wú é hui jáng, shikut shirang sê é myit jat nyi é lé, nungmoq sê nyi lhê nghut mù, ³ wuihke jamjau ajung jung lé htung hui é hkún, gaù jowò mó nghut nyi lhê nghu luí myit yù keq. ⁴ Hau htoq agó, nungmoq banshoq gúm gumjup jup dut mù luí, hai le a langhpyut shoq, shikut shirang é myit gi, yhumsing kut nyi é muzó lé wó lhoq gumjup nyi sháng gaq. ⁵ Nungmoq má rayuq yuq hpaqchyí byéng-yá langhpyut tó é nghut le gi, hau banshoq bang lé, mara a hun é za, agùn agó byí nyi é Garai Gasang chyáng dúng nyi sháng gaq, hau jáng, Garai gi, yang lé byi rá nghut lhê. ⁶ Nghut kólhang, lum shut é myit a bo é za, lumjng é myit eq dúng nyi sháng gaq, hkásu mù gá le, lum shut é sú gi, laidún eq hik luí toq lo é nhóng má é wuihêng eq wui nyi ri. ⁷ Háu yuq gi, Yhumsing Garai chyáng má é hai le wó yú rá su a ngam nyi sháng gaq. ⁸ Yhang gi, myit-kó xan sú nghut luí, yhang é hkyô hkat hkangmó má, mù htàng a nyang é sú nghut nyi ri.

Myung Sù Eq Wó Sù

⁹ Myung é gumang hpó gi, waq toq hui é má, wó sú gi, lhoq nyhúm hui é má, gabú gumrong nyi sháng gaq. ¹⁰ Hkásu mù gá le, wó sú gi, wáhu banbó su woi byuq ló rá nghut lhê. ¹¹ Bui gi, nyé é lai eq toq lô jáng, hau wáhu nyhui byuq ló mù, abó le yoq gyó byuq é eq, hau é yung sâm pé gi, htên byuq é su; wó sú le hau eq rajung za, yhang kut nyi é muzó má woi byuq ló rá nghut lhê.

Gunglaú É Hkyô

¹² Wuihke jamjau hui le, wó shikut shirang nyi sú gi, hkungsó wó nyi ri; hkásu mù gá le, chyam wú é ban hui jáng, yang gi, Garai Gasang lé chyitdap é bang lé, byi tó é danggidiq asak janmaú lé, wó yú rá nghut lhê.

¹³ Gunglaú hui é sú ó yuq nghut kólhang, gunglaú hui é hkún lé, "Garai Gasang, ngo lé gunglaú nyi ri." nghu luí, a tai sháng gaq, hkásu mù gá le, agé ashop é hkyó gi, Garai Gasang lé wó gunglaú é a nghut, ó yuq lé le Garai Gasang gunglaú rá a nghut. ¹⁴ Nghut

kólhang, ó yuq nghut le le, yhumsing é gungsho ô nau é dng, shuí llang nghoq ló é nghut le gi, agúng alau hui bê. ¹⁵ Gungsho ô nau é hkyó kúm gi, zogúng dut jáng, mara lé hku htoq lo ri. Mara kô dng jáng, shi é má jé rá nghut lhê.

¹⁶ Ngò chyitdap é gumang wui ê, i-myit hkyó nghoq hkâ-nghoq nyi kó. ¹⁷ Gè réng é eq byíng jup é chyunghuq lhunglhang gi, ahtoq shut má é nghut mù luí, maubó gung pé* é Yhângwa Garai chyáng mai gyó lo é nghut ri. Yhang gi, ahpuc alik atau ahú dut é buishúm su dut rá a nghut. ¹⁸ Yhang hpan tó é amyú pé má, nga-nhung gi, sâng-hi myhng é ashi pé dut lo sháng gaq ga, Yhang gi, Yhang ô nau é hkyó cháng luí, hau tengmán é mungdang mai, nga-nhung lé hkú to bê nghut ri.

Gyo Yu É Eq Cháng Kut É Hkyô

¹⁹ Ngò chyitdap é gumang wui ê, shi hkyó lé nungmoq sê nyi akó. Byú ó yuq nghut kólhang, gyó yú rá lé han nyi sháng; dang tai rá lé a hân sháng gaq; nhik-yo rá lé le hkâhân kó. ²⁰ Hkásu mù gá le, byú nhik-yô é hkyó gi, Garai Gasang ô nau é dngmán é dng asak dui hkyó wó lhoq htoq rá a nghut. ²¹ Háu mù luí, achaq achyut é banshoq eq ladu lai agé ashop é pé lé lhoq san lhoq sèng pyám luí, nungmoq é i-myit lé wó hkyi yú rá matú, i-myit unghkau má Garai Gasang hô tó é mungdang lé, nú-nhâm é myit eq hkam yu nyi keq.

²² Nungmoq gi, yhumsing gung lé a mhaú pyám sháng gaq, hau mungdang lé wó gyó yu é bang za a nghut, hau dng cháng kut é bang le nghut nyi sháng gaq. ²³ Mungdang hau lé wó gyó yú mù, a cháng kut é sú ó yuq le, yhumsing é gungdu lé myoqjam má wú sú eq wui ri. ²⁴ Yhang gi, yhang é gungdu lé wú yú mù, myoqdong lhik é eq, yhumsing gungdu hkásu dut é lé tô-myhí pyám ri. ²⁵ Nga-nhung lé wó lhoq lhut yu é gumjup é tará má, rago za wú tsuq nyi sú kúm gi, wó gyó yú mù tô-myhí pyám é sú a nghut, muzó eq tún shit é sú nghut é yanmai, hau yuq gi, yang cháng kut é muzó má shimán jeju wó rá nghut lhê.

²⁶ Byú rayuq yuq, "Ngò gi, noqkuq htung lé lhoq dik sú nghut lhê." ga luí, myit to kólhang, yhumsing nhut shò lé a wó hkang mù, yhumsing myit lé mhaú pyám é nghut le gi, hau yuq é noqkuq htung gi, akóm za nghut nyi ri. ²⁷ Iwa Garai Gasang é hí má sansèng é eq, rá é hkyó a bo é noqkuq htung gi, wuihke jamjau hui é chuimó chuizó pé lé, cháng wú garúm é hkyó eq, mingkan htoq má é achaq achyut é hkyó lé koi pyám é hkyó nghut ri.

* 1:17 Maubó gung pé gá é gi, bui, kyi, lhamó lé gá lhê.

2

Myoqdong A Wó Hkyin Lhum

¹ Ngá é gumang wui ê, hpungwup shingkang bo é nga-nhùng é Yhumsing Yesuq Hkrisduq lé lumjǐng hkyô má, byu é myoqdong lé hkáhkyn lhum kó. ² Dangké, hǐng loqchyp chyp luí, réng é mebu wut é sú rayuq eq ajeq amyha é mebu wut é asho awuí é sú rayuq gi, nungmoq é tarajong má wanglò kó é nghut le, ³ haú réng é mebu wut é sú lé, nungmoq lhom wú mù je hkunggá é èq, "Shí aróng wó é jowú má zùng aq." dum, haú asho awuí é sú lé nghut jǎng gi, "Mhó má yap to aq." haú su a nghut jǎng, "Ngá é hkyí htàng má zùng aq." ga tái kó é nghut le gi, ⁴ nungmoq rayuq eq rayuq gamhkuí lhum luí, a ge é i-myt eq doqđán é bang dut lò bekô a nghut kó lúh?

⁵ Ngò chyitdap é gumang wui ê, gyô yù keq, lumjǐng hkyô má wó sùt nyi luí, gidiq tò tò é mingdán é silí wunlí lé, Yhang lé chyitdap bang wó hkam yù shǎng gaq ga, Garai Gasang gi, myigỳng htoq má é asho awuí é bang lé hkyin yù bê a nghut kó lúh? ⁶ Nungmoq kúm gi, asho awuí é sú lé a hpau a yùm kut pyám bekô nhung; wó bang sùt bang kúm gi, nungmoq lé zik zo mù luí, yhumsing é loq èq yhang, tará tingnyang shut she hkyut lò bekô, a nghut kó lúh? ⁷ Nungmoq eq sêng é kó dik é myǐng lé lǎng, yhangmoq yhang rhoi dang tái bum akô, a nghut kó lúh?

⁸ Haú mù luí, Chyúmdang má, "Náng gũng lé náng chyitdap é su, náng é chyangnám má é bang lé le chyitdap aq." ga luí, tái tò é hkohkam tará lé, nungmoq tsuq za chǎng é nghut le gi, nungmoq ge é hkyô lé kut nyi bê. ⁹ Nghut kólhang, byu é myoqdong lé nungmoq hkyin nyi kó é nghut le gi, nungmoq mara kut nyi gũ nghut bê yanmai, haú tará lé shut é bang lé su tará jéyǎng é huí nyi bekô rǎ nghut lhê. ¹⁰ Byù ó yuq nghut le le tará banshoq lé chǎng kólhang, haú má é ralhum lhum lé shut pyám jǎng gi, tará banshoq lé shut pyám sù dut byuq rǎ nghut lhê. ¹¹ Hkásu mù gǎ le, "Su-myi sulǎng hkálu." ga luí, hkang tò é sú gi, "Byù lé hkásat." ga luí le, tái tò ashí. Náng su-myi sulǎng a lú kólhang, byù sat é sú nghut le gi, tará lé shut é sú nghut bê.

¹² Haú su mù luí, nungmoq lé lhoq lhut kat é tará dǒng jéyǎng doqđán é huí rǎ bang su, ru tái nyi keq; ru chǎng kut nyi keq. ¹³ Hkásu mù gǎ le, shogyo myit a bô sú gi, a shogyô é dǒng jéyǎng doqđán é huí rǎ nghut lhê. Shogyo nhikmýn é hkyô kúm gi, jéyǎng doqđán é hkyô lé wó òng lut rǎ nghut lhê.

Lumjǐng Myit Eq Zui Saí É Hkyô

¹⁴ Ngá gumang wui ê, byù rayuq yuq, "Ngò gi, lumjǐng myit bo lhê." ga tái nyi kólhang, muzó a bo lom é nghut le gi, haí akyú bò rǎ lúh? Lumjǐng myit haú gi, yhang lé wó hkyi yù rǎ lúh? ¹⁵ Gumang, gu-nhá rayuq yuq a chǐn dut nyi é eq, nyi wui é zoshuq langhpyut tò é nghut le, ¹⁶ nungmoq chyáng má é rayuq yuq gi, yhangmoq é gungsho má rǎ é hkyô haí le a byi é za, yhangmoq lé, "Nungmoq wut é gũng lúm shǎng gaq, zô é ùng gyi shǎng gaq, ngui ngui ngón ngón ló keq." ga tái é nghut le gi, hai akyú bò kó rǎ lúh? ¹⁷ Haú eq rajung za, lumjǐng myit má muzó a bo é nghut le gi, shí é eq rajung za nghut nyi ri.

¹⁸ Dum rahkyô gi, "Nàng gi, lumjǐng myit bo ri, ngò gi, muzo bo lhê. Muzó a bo é nǎng é lumjǐng myit ngo lé tũn shit wú aq, haú hkũn, ngá muzo èq ngá lumjǐng myit lé, nang lé ngò tũn shit rǎ nghut lhê." ga luí, rayuq yuq tái rǎ nghut lhê. ¹⁹ Garai Gasang rayuq za nghut é lé nǎng lumjǐng ri-nhung! Nghut bê, haú gi, jô é hkyô nghut nyi ri, nat gǎng pé le haú su yhang lumjǐng mù gyuq nán nyi akô nghut ri.

²⁰ Kyoq a bo é byù bam ê, lumjǐng myit má muzó a bo le akôm za nghut é hkyô lé, nǎng sé nau lhê a nghut lúh? ²¹ Nga-nhùng é Iwa Abraham gi, hkungga gyap htoq má yhangzo Isak lé shigu hkungga kut é hkũn lé, zui saí é muzó mai dǐngmán é sú gǎ é lé wó yù bê a nghut lúh? ²² Haú mù luí, yhang é lumjǐng myit gi, yhang é muzó eq rahá za e ló é yanmai, lumjǐng myit gi, jup byǐng lo é lé, nǎng wú myǎng bê nghut ri. ²³ Haú su mù, "Abraham gi, Garai Gasang lé lumjǐng é nghut mù luí, yhang lé dǐngmán sú ga sǒn byi bê." ga luí, kǎ tò é Chyúmdang gi, dik to bê. Dum, yhang lé Garai Gasang é buinùm hpó ga luí le myhǐng byi bê. ²⁴ Haú mù luí, byù gi, lumjǐng é myit eq baú za a nghut, zui saí é muzó èq mara hkyut san byi huí é lé, nungmoq bũn sé nyi akô.

²⁵ Haú eq rajung za, Rahap gǎ é shiwa myhí gi, jowú su nhik lé lhom te yù mù luí, hkyô gó hkat dǒng nhang kat pyám é hkũn le, yhang zui saí é muzó mai dǐngmán é sú gǎ é wó yù bê a nghut lúh? ²⁶ Haú su mù, gungdu má woi-nyí a bo le gi, shí é eq rajung za, haú lumjǐng myit má muzó jizó a bo le gi, shí gũ nghut bê nghut ri.

3

Mhé Wui É Shó

¹ Ngá é gumang wui ê, byù myo myo sará hkákut nau kó. Hkásu mù gǎ le, ngamoq sé é eq rajung za, sará pé gi, je riyhang htan é dǒng jéyǎng doqđán é huí zo rǎ nghut lhê. ² Nga-nhùng banshoq bang gi, hkyô myo

myo má myit lingbat é bang chyat nghut ri. Byù rayuq yuq dâng èq a lingbat é nghut le gi, yhang gi, jup byíng sù eq yhumsing é gùng lé wó hkang é sù nghut ri.

³ Nga-nhúng myang lé nhutkyáng kyáng byi jáng, myang hau é gungdu gón lé, nga-nhúng ô nau é dông wó cháng nhang lhê. ⁴ Haù mai gotú, wui-sanghpo pé lé wú wú keq, haù-i kô é sanghpo lé htan é laidùn èq mut é hui kôhlang, sanghpo hkàng sù gi, gyai tiq é sanghpo shap èq za, yhang ô nau é dông, haù pé lé wó hkang yu ri. ⁵ Haù eq rajung za, shô gi, tiq é gungsho za nghut kôhlang, gyai gumrông nghutbùn nyi ri; wú keq, tiq dik é myizik zo gi, yoso mhanpúng mó lé wó nyé gyó nhang ri-nhung. ⁶ Shô haù gi, myi eq wui nyi ri. Nga-nhúng é gungsho má, shô haù gi, agè ashop é mingkan dut lò mù, nga-nhúng é gungsho asak lé achaq achyut dut nhang luí, gungsho asak lé nyhê tuq kat ri. Haù gi, ngaraí myi èq nyhê tuq kat é nghut bê.

⁷ Dusak ajung jung, nghoq ahú hú, myi má yé é jung eq wui hkaù má nyi jung banshoq gi, wó mhê yu é jung chyat nghut mù, byu pé gi, haù pé lé mhê yu nyi akó. ⁸ Nghut kôhlang, shô lé kúm gi, byú ó le a wó mhê yú kó nghut ri. Haù gi, apyí abat, agè ashop, uphkàng a wó é eq, shí é jung duq èq byíng tô é jung nghut nyi ri.

⁹ Nga-nhúng gi, shô hau èq nga-nhúng é Yhumsing eq Iwa Garai lé hkya-on nyi lhê; hau èq za, Garai Gasâng é gunglho dông hpan tô é waxâng zo wui lé le nhing pyám nyi ri. ¹⁰ Nhut ralhun za mai, hkya-ôn é dang eq nhing é dang htoq lo ri. Ngá é gumang wui è, haù su kut é gi, a gè. ¹¹ Wuibum radong za mai, chui nghâm é wui eq hkó é wui wó htoq rá lhú? ¹² Ngá gumang wui è, maihpáng gam mai tsanlun shi, tsibiyiq núi mai maihpáng shi, wó zui rá lhú? Haù eq rajung za, xô ngam é wui gi, chui nghâm é wui lé wó lhoq htoq byi rá a nghut.

Ahtoq Mai Lo É Hpaqchyí

¹³ Nungmoq má, hpaqchyí byéng-yá bo é sù eq sê é dat é sù, ó nghut lhê lhú? Haù yuq gi, yhang hpaqchyí bo é hkyô lé, hpaqchyí mai wó yu é, myit lhoq nyhum é hkyo èq, yhumsing zui sai é ge é muzó dông tún shít nyi sháng gaq. ¹⁴ Nghut kôhlang, nungmoq é myit má ladu lai é manon é i-myt eq, lú lhum bat zik é i-myt bo é nghut le gi, hkâ-nghutbun kó, haù tengmán hkyô lé le hkâ-mhaù pyám kó. ¹⁵ Haù sù é hpaqchyí byéng-yá kúm gi, mauhkung htoq mai gyó lo é hpaqchyí byéng-yá a nghut, haù gi, myigùng htoq má é, gungsho ô nau é eq, nat é hpaqchyí byéng-yá chyat nghut nyi ri. ¹⁶ Hkâsu mù gá le, manon é eq lú lhum bat

zik é dut nyi le gi, ruk ruk rak rak é hkyô eq agè ashop é mù ajung jung jup hkùm nyi ri.

¹⁷ Mauhkung htoq má é hpaqchyí byéng-yá kúm gi, sâng-hi awang má sanséng nyi ri; hau htang má gi, nguingón hkyô lé ô nau é, myit nùm é, jino gyô é, shogyo nhikmyin sê é eq ge é ashi zui nyi mù luí, gamhkuai a bò, ahpuq alik a dut é eq, kut mhaù a sê é hpaqchyí byéng-yá nghut nyi ri. ¹⁸ Hau htoq agó, nguingón é hkyô dat sô xoq é bang gi, nguingón é shiji lé sân kat é bang nghut mù, ge é ashi wó yú kó rá nghut lhê.

4

Yhumsing Gùng Lé, Garai Gasâng Chyáng Ap To Rá Hkyô

¹ Nungmoq má gyè dut lhùm é eq mabyoq jishùm gi, hkâmai htoq lo é lhú? Nungmoq ahkaù má gungsho ô nau é hkyô pé ngón hkyô hô mù, majan zân lhùm é yanmai, dut htoq lo é a nghut kó lhú? ² Nungmoq yut yut myit ô nau nyi kôhlang, hai le a wó yú kó. Nungmoq sat nyi é eq manon nyi kôhlang, a wó yú kó. Nungmoq byoq lhùm nyi é eq majan htoq lhùm nyi kôhlang, hai le a wó yú kó; hkâsu mù gá le, nungmoq, Garai Gasang lé a dung kô é yanmai nghut ri. ³ Nungmoq dung kôhlang, a myang yú kó nghut ri; hkâsu mù gá le, nungmoq é ngón kún hkyô má jai chùng langsá pyám rá matú, shut é dông dúng nyi kô é yanmai nghut ri.

⁴ Su-myi sulàng lú é bang su gidic a gíng é bang è, mingkan ô nau é hkyô lé buinùm du é myit gi, Garai lé a ngui é myit nghut é hkyô lé, nungmoq a sé kó lhú? Haù mù luí, mingkan ô nau é hkyô eq buinùm dù nau sù ó nghut kôhlang, Garai Gasâng é gyè nghut nyi ri. ⁵ Dum ralhun, nga-nhúng má Garai Gasang kat lhùng tô é woi-nyí gi, manon é myit lúng nyi ri ga luí, Chyúmdang má tai é gi, akóm nghut ri nghú, nungmoq myit ngam nyi akó lhú? ⁶ Nghut kôhlang, Yhang gi, je kô é jeju ru byí nyi lhê. Haù eq rajung za, Chyúmdang má,

"Garai Gasang gi, nghutbùn é bang lé hkùm zing pyám kôhlang, myit lhoq nyhum é bang lé jeju byi ri."*

ga tai tò ri.

⁷ Haù mù, Garai uphkàng é a-ô má ru nyi nyi keq; Nat Tsadán lé hkùm tang pyám keq; haù hkùn, yhang nungmoq chyáng mai hpang byuq rá nghut lhê. ⁸ Garai Gasâng chyáng huí é keq, haù hkùn, Yhang, nungmoq chyáng huí lé lô rá nghut lhê. Yubak kut é bang è, nungmoq é loq pé lé chí san chí sêng pyám keq. Myit koq xân é bang è, nungmoq é myit nhikhlum lé lhoq chyoi lhoq yúng to keq. Yudaq htùng dông loq lé chí san chí sêng pyám keq gá é lichyúm gi, i-myt, gungdu lé lhoq san lhoq sêng pyám

é lé gâ lhê. ⁹ Nungmoq gi, myit yón é, iyon yón é eq ngaubiyi ngau-nhap é kut nyi keq. Nungmoq é wuihâ é hkyô lé gi, iyon dông, nungmoq é gabú é hkyô lé gi, yón kuq é dông htaí pyám keq. ¹⁰ Haú Yhumsing Garai é hí má i-myit lhoq nyhum nyi keq, haú hkún, Yhang gi, nungmoq lé lhoq toq râ nghut lhê.

¹¹ Gumang wui é, nungmoq yhangchang a ge é dông hkâtaí hpoi lhum kó. Yhumsing é yhangyu yhangmang lé a ge é dông tai hpoi nyi é sù, haú a nghut jáng, jéyáng é sù gi, haú tará lé a ge é dông tai hpoi nyi mù luí, jéyáng é sù nghut nyi ri. Haú tará lé nàng jéyáng nyi é nghut le gi, tará lé châng é sù a nghut é za, tará jéyáng sù nàng dut nyi ri. ¹² Garai Gasang za tará byí tô é eq tará dara sù, wó hkyi yu é sù eq, wó lhoq htên é sù nghut nyi lhê. Haú é yanmai, nàng é yhumkyo hpó lé jéyáng é sù nàng gi, ó yuq wa nghut lhê lú?

Gyang Dang A Tai Ra Hkyô

¹³ "Ngamoq, hkú-nyí napmá ra-nyí nyí, wa rawà wà shut ê mù, haú má razàn kó é nyí luí, hpugá wuiloq gá mù amyat wó myang yù rá." ga tai nyi é bang ê, gyô wú keq. ¹⁴ Napmá hai dut lô rá lé lhang, nungmoq gi, a sé ko. Nungmoq é asak gi, hai nghut nyi lhê lú? Haú gi, razup rahtang za htoq shit luí dum byuq byuq lô mù é, nghansoq eq rajung za nghut nyi ri. ¹⁵ Haú mù luí, nungmoq haú su ga tai nyi rá malaí gi, "Yhumsing Garai dông é nghut le gi, ngamoq le ru wó dui nyi mù, shí le, mhô le, wó kut rá nghut lhê." nguí luí, wó tai rá nghut lhê. ¹⁶ Ahkuí kúm gi, nungmoq é gyáng é dang dông gumrong nyi akó; haú su gumrong é hkyô banhoq gi, agé ashop é jung chyat nghut nyi ri. ¹⁷ Haú mù luí, ge é mù sê kut to luí, a kut é sù gi, mara kut sù dut bê nghut ri.

5

Sùt Wó Bang Lé Sidiq Byí É Dang

¹ Sùt wó é bang ê, gyo keq, nungmoq chyáng jé lé lô rá é wuihke jamjau hkyo é yanmai, ngau garú nyi keq. ² Nungmoq é sutzé gi, htên bup byuq bê nghut ri; nungmoq é wutbu wutmé le manot èq zô pyám bê nghut ri. ³ Nungmoq é hing eq ngùn má lhang, jogyik zui byuq mù luí, haú jogyik gi, nungmoq é mara hkyam shut saksé dut byí é eq, nungmoq é gungsho lé myi su zô pyám rá nghut lhê. Nungmoq gi, jìhtùm buinyi shí pé má, sutzé lé za hkong to bekò nhung! ⁴ Wú keq, nungmoq é yohtung dùng yò yam nhâng mù luí, ahpau a byí é za, nungmoq mhaú zô tô é ahpau pé garú nyi é htê pé eq, mù zui bang garú é htê pé lé gi, haú a-tsam dik shoq bo é Garai wó gyo byi bê nghut ri. ⁵ Nungmoq gi, myigùng htoq má hkik

hkik hkâm hkâm wó nyi é eq, i-myit ô nau é dông ngón hkyô chyat châng nyi bum akó. Nungmoq gi, sat rá buinyi matú yhumsing é gùng lé tsò myum to bekò nghut ri. ⁶ Haú dingsmán é sù* lé, nungmoq mara hùn mù, sat pyám bekò. Yhang kúm gi, nungmoq lé a lhom hkúm zing nghut ri.

Myit Hing Hkam Jan Ra Râ Hkyô

⁷ Haú mù luí, gumang wui é, haú Yhumsing dum jé lé é buinyi jé shoq myit hing é eq láng nyi keq ô! Hkyâm sai sù lé wú wú keq, yhang gi, myihpùn mai ahpau dán é ashí lé wó yú shoq ga mau mún eq wò htàng htàng é mau wo gyùn é jé shoq myit hing hing láng nyi ri. ⁸ Haú eq rajung za, nungmoq le, Yhumsing Yesuq dum jé lé rá gi, chyáng lo nyi bê nghut é yanmai, myit hing é eq, i-myit lé lhoq ging lhoq tng to keq. ⁹ Gumang wui é, nungmoq jéyáng a hui sháng gaq, nungmoq yhangchang hkâ-nyung nyâng lhum nyi ko. Wú keq, Tará agyi gi, hkúmdong má jé nyi to bê nghut ri.

¹⁰ Gumang wui é, haú Yhumsing Garai é mying eq hko kyô é myihtoí pé wuihke jamjau hui é hkún, jân pyám é myit lé, nungmoq gi, ge é alik agàn kut yú keq. ¹¹ Wú keq, shikut shirang é bang lé, nga-nhung gi, hkungsô wó é bang nghu é nghut lhê. Yobaq hkâm jân é yanmai, Yhumsing Garai gi, yhang lé htàng má myo myo dum shimân byí é hkyô lé, nungmoq wó gyô wú bê nghut lhê. Hai mù gâ le, haú Yhumsing Garai gi, gyai shogyo nhikmyín é sù nghut nyi ri.

¹² Ngá é gumang wui é, banshoq má ahkyak dik é gi, hai le le hkâdakâm kó. Mauhkúng lé a nghut jáng, myigùng lé lang luí le hkâdakâm kó. Dakam é dang gotú lé le hkâtaí nyi kó. Nungmoq doqđán é a hui sháng gaq, nungmoq gi, nghut é le gi, "nghut lhê", a nghut é le gi, "a nghut", nguí za, tai keq.

Lumjing Myit Eq Kyúdung Râ Hkyô

¹³ Nungmoq má rayuq yuq wuihke jamjau hui é nghut le gi, kyúdùng nyi sháng gaq; rayuq yuq myit ngón nyi é nghut le gi, hkyá-on mahkón hkon nyi sháng gaq. ¹⁴ Nungmoq má rayuq yuq nôhpyo hui é nghut le gi, no-qquq hpúng má é nhik bô suwún wui lé ji yù mù, haú bang gi, Yhumsing Yesuq é mying mai yhang lé xú but byi luí, kyúdùng byi kó sháng gaq. ¹⁵ Haú su mù, lumjing myit èq kyúdùng é dang gi, haú nô sù lé lhoq gè luí, Yhumsing Garai gi, haú yuq lé lhoq toq yú rá nghut lhê. Yhang gi, yubak mara kut shut é nghut kôlhang, hkyut pyám byí é hui rá nghut lhê. ¹⁶ Haú mù luí, nungmoq lhoq ge é hui kó sháng gaq, nungmoq é yubak mara lé rayuq eq rayuq yin lhum mù, kyúdùng byi lhum nyi keq. Dingsmán su é kyúdùng dang

* 5:6 Dingsmán é sù gâ é danghkun lé, Chyúlaiká ra-am má gi, dingsmán é bang gâ ri.

gi, wó dut nhâng râ a-tsam wum-o myo myo
bo nyi ri.

¹⁷ Eliyaq gi, nga-nhúng su i-myt unghkaû
bo é xângzo byù za nghut lhê. Nghut kôlhang,
yhang gi, mau a wò sháng gaq ga, wum kat
o kat kyûdung jáng, sùm zan eq lhamó hkyuq
hkyap tup myigùng htoq má mau a wò shoq
dut byuq é nghut lhê. ¹⁸ Kyû dum dúng kat
jáng, mauhkúng gi, mau wo hkyô kat byi mù,
myigùng gi, yhâng é kyô shi mui shi lé lhoq
htoq byi wú bê nghut lhê.

¹⁹ Ngá é gumang wui ê, nungmoq chyáng
mâ é rayuq yuq, haû tengmán hkyô mai
nghoq ló byuq é hkún, rayuq yuq gi, yhang
lé tengmán hkyô shut dum wó shuí taû lo
é nghut le kúm gi, ²⁰ haû shuí taû yù sù gi,
yubak mara kut é sù lé, shut shai é hkyô
mai tengmán hkyô shut shuí taû yù mù,
myit woi-nyí lé shi é mai hkyi yù bê nghut
é yanmai, yubak mara myo myo lé shuí
nghop pyám byí é sù dut berâ lé, bûn nyi keq
ô!

PETRUQ Hĩ Dàm Hun Kat é Laiká (1 Peter)

1 Yesuq Hkrisduq é lagyo nghut sũ, ngò Petruq gi, Pontuq, Galatiq, Kapadokia, Asia eq Bihtuni mau pé má byo myín tô bum é, Yesuq Hkrisduq é jino gyo rá matú le, Yhâng é suĩ eq hpyún gyún é hui* rá matú le, haũ Woi-nyĩ é lhoq sân-yúng nyĩ é muzó đông mai, Iwa Garai Gasâng é hĩ te sê tô é hpaqchyĩ má cháng luĩ, hkyin yũ huĩ é bang nghut é, ² Garai Gasâng eq hkyin htoq yũ luĩ, mingkân é byúbíng dut bâng chyáng dang kyô kat lhê. Jeju eq nguingón hkyô gi, nungmoq chyáng agùn agó joq nyĩ sháng gaq.

Dui Nyĩ É Myit Myoqbyũ Hkyô

³ Hkya-on kungtón hkyô gi, nga-nhúng é Yhumsing Yesuq Hkrisduq é Yhângwa nghut sũ Garai Gasang chyáng nghut nyĩ sháng gaq! Yhang gi, Yesuq Hkrisduq, shi é mai dum dui toq é hkyô đông, Yhâng é gyai shogyo nhikmyín é yanmai, nga-nhúng lé, asik hku é dum hui nhâng mù, rú dui nyĩ é myit myoqbyũ hkyô lé wó nhang é htoq agó, ⁴ nungmoq é matú mauhkúng htoq má tô to byi bê nghut é, hkâ-nhám le, a hten a byoq é, agot a-ũ a dut é, a hpoi byuq é muĩ lé le wó nhang é nghut lhê. ⁵ Nungmoq gi, lumjíng kô é yanmai, ló htâng é ahkyíng má lhoq htoq shit rá rí rí nghut é hkyi yũ hkyô jé shoq, Garai é hpungwup a-tsâm eq upzúng é hui bang nghut akó. ⁶ Haũ mù, nungmoq gi, ahkuĩ razup zo, wuĩhke hkyô junghkang jungmó má yón hpuzô é hui kó rá nghut kólhang, gyai yhang gabú nyĩ keq. ⁷ Wuĩhke hkyô haũ pé mai, nungmoq é lumjíng myit gi, jet é hkyô lé wó chyam htoq mù, myi mai jên yũ kólhang htên byoq sê é hĩng htoq je gyaũ luĩ, Yesuq Hkrisduq htoq shit é hkũn, hkya-on kungtón hkyô, hpungwup shing kang eq aróng sitang lé, nungmoq wó kó rá nghut lhê. ⁸ Nungmoq gi, Yesuq lé a myang wũ kólhang, Yhang lé chyitdap bum akó; Ahkuĩ, nungmoq, Yhang lé a myàng kólhang, Yhang lé lumjíng kô é nghut mù, a ung htoq tai é eq hpungwup bo é gabú hkyô gi, nungmoq chyáng byíng jup nyĩ ri. ⁹ Hkâsu mù gá le, nungmoq gi, nungmoq é asak woi-nyĩ lé hkyi yũ hkyô ngu é, nungmoq é lumjíng myit é akyũ lé wó yu nyi kô é nghut ri.

¹⁰ Hkyi yũ hkyô haũ eq séng luĩ, nungmoq chyáng jé bê nghut é jeju hkyô lé tai é myiqhtoi pé gi, gyai yhang sidiq myit eq jí jí chyun chyun ho gon wũ bekô nghut ri.

¹¹ Yhangmoq gi, Hkrisduq wuĩhke jamjau hui luĩ, hpungwup shing kang wó rá nghut é hkyô lé, yhangmoq má lúng nyi é, Hkrisduq é Woi-nyĩ mai te tai é hkũn, hkâ-nhám nghut rá eq hkasũ é u má nghut rá hkyô lé ho gôn wũ bekô nghut ri. ¹² Mauhkúng mai nhang kat é Chyoiyúng Woi-nyĩ eq, nungmoq lé gabú danglũ hko kyo bê bang mai, ahkuĩ nungmoq lé tai kyo bê nghut é hkyô pé lé, yhangmoq tai kô é gi, yhumsing matú dojau é a nghut é za, nungmoq matú nghut é hkyô lé, yhangmoq gi, htoq shit sé nhang é hui bekô nghut ri. Maumang lagyo pé lháng gi, haũ hkyô pé lé gyai wũ nau bum akó nghut ri.

Chyoiyúng Nyi Rá Hkyô

¹³ Haũ mù luĩ, zui sai rá matú nungmoq é i-myt lé hen to keq; yhumsing gùng yhumsing hkang nyi keq; Yesuq Hkrisduq htoq shit é hkũn, nungmoq lé byi rá nghut é jeju lé, hkyak za myit myoqbyu nyi keq. ¹⁴ Jino gyô é zoshâng wui su, myoq a búng shĩ é pyat má nungmoq nyi tô é hkũn, nungmoq é agé ashop ó nau hkyô lé a châng kut é za, ¹⁵ haũ nungmoq lé jí yu é Sũ gi, chyoiyúng é su, nungmoq zui sai é hkyô banshoq má chyoiyúng nyi keq. ¹⁶ Hkâsu mù gá le, "Ngò gi, chyoiyúng Sũ nghut é yanmai, nungmoq le chyoiyúng nyi keq."* ga ká tô ri.

¹⁷ Byũ yuq hkangmó é muzó lé, myoqdong a hkyin é za tará jéyáng é sũ Iwa lé, nungmoq wut dung kô é yanmai, byúbíng đông shĩ má nyi é u lé, Garai lé gyuq hkunggá é myit mai asak dui keq. ¹⁸ Hkâsu mù gá le, nungmoq gi, nungmoq é ichyĩ iwá pé chyáng mai bo gyô lo é hpaũ a dap é asak dui hkyô mai, htên byoq sê é ngùn, hĩng eq hkyi yũ huĩ é a nghut é za, ¹⁹ gumjup é eq mara a bo é sauzo nghut sũ, Hkrisduq é hpaũ dik é suĩ eq sheq hkyi yũ huĩ é ru nghut é lé, nungmoq sê lhê. ²⁰ Yhang gi, mau htoq xâng hkun mai hkyin yu é hui bê nghut kólhang, jiltùm ahkyíng shi pé má sheq, nungmoq é matú htoq shit nhang é hui bê nghut ri. ²¹ Yhang lé, shi é mai lhoq dui toq yũ mù, hpungwup shing kang bò nhang é Garai Gasang lé, nungmoq gi, Hkrisduq đông mai lumjíng kô é nghut luĩ, nungmoq é lumjíng myit eq myit myoqbyũ hkyô gi, Garai Gasâng chyáng nghut nyĩ bekô nghut ri.

²² Ahkuĩ kúm, nungmoq gi, haũ tengmán hkyô lé châng é đông mai, yhumsing gùng yhumsing lhoq sân-yúng yũ bekô nghut mù, nungmoq é gumang wui lé, lumzuĩ é đông chyitdap bekô nghut luĩ, myit nhikhum mai, rayuq eq rayuq gyai yhang chyitdap lum keq. ²³ Hkâsu mù gá le, nungmoq gi, htên byoq sê é amyui mai dum hkũ huĩ é a nghut é za, Garai Gasâng é, rú dui nyi é eq

* 1:1 Yhâng é suĩ eq hpyún gyún é hui gá é gi, Yhâng é suĩ eq mara chí sân pyám byi é lé gá lhê. ✱ 1:16 Nhong 11:44-45; 19:2; 20:7

ru gíng nyi é mungdang dông, htên byoq a sê é amyui mai dum hku é hui bang ru nghut lhê. ²⁴ Hkâsu mù gà le,

"Byù lhunglhang bang gi, wàhu mhan eq pung ri, yhangmoq banshoq bâng é hpungwup shing kang gi, yò mã é banbó pé eq pung ri;

wàhu mhan gi, nyhuí kyuq byuq luí, banbó pé gi, yoq gyó byuq lhê;

²⁵ nghut kólhang, haù Yhumsing é mungdang gi, ahtum abyuq gíng nyi lhê."[✧] gà tô ri. Haù gi, nungmoq lé hko kyo bê mungdang nghut lhê.

2

¹ Haù mù luí, i-myt dù é hkyô banshoq eq mhaù zô é hkyô banshoq, gegùn labyoq kut é hkyô, manon é hkyô eq lumú gansang é hkyô jung hkangmó pé lé tô pyám keq.

² Asik hku é zonú pé nau lé ô nau gadaù é su, woi-nyí eq sêng é jet é nau* lé ô nau gadaù nyí keq, haù jâng, nungmoq gi, hau é yanmai, nungmoq é hkyi yù hkyô mã wó kô myhâng kó rá nghut lhê. ³ Hkâsu mù gà le, haù Yhumsing gi, gè sù nghut é lé, nungmoq chyam wú bekô nghut ri.

Rù Dui Nyi É Luqgok Eq Hkyin Yù Huí É Byù Myù

⁴ Byu pé mai hkyin htoq pyám kólhang, Garai Gasang é matú hpaudap luí, Yhâng èq hkyin yù huí é, rù dui nyi é Luqgok nghut sù, haù Yhumsing chyáng nungmoq jé lé é hkùn, ⁵ nungmoq le, rù dui nyi é luqgok pé su, woi-nyí eq sêng é yhùm† saí nyi é hui luí, Yesuq Hkrisduq dông mai, Garai èq hap yù gíng é, woi-nyí eq sêng é hkungga nhông byi rá matú, chyoiyúng é hkyangjong amyù dut bekô nghut ri. ⁶ Hkâsu mù gà le, Chyúmdang mã,

"Wú keq, hkyin yù huí é eq hpaudap é htungchyùn luqgok racham lé, Zi-un bùm mã ngò lhez tô é nghut lhê;

Yhang lé lumhkau é sù gi, hkâ-nhám le hoq hpù é hui rá a nghut."[✧]

ga tai tô ri. ⁷ Haù mù, lumjìng bang nungmoq é matú gi, luqgok haù hpaudap é nghut lhê. Nghut kólhang, a lumjìng bâng é matú gi,

"Haù yhùm saí bang hkyin htoq pyám é luqgok gi, htungchyùn mã é ahkyak dik é luqgok‡ dut bê nghut ri."[✧]

ga le,

⁸ "Byu pé lé, htùng leng rá luqgok eq myit leqbat nhâng rá luq mó cham dut bê nghut ri."[✧]

ga le, tai tô ri. Yhangmoq gi, mungdang lé a châng kô é yanmai, myit leqbat kô é nghut

lhê. Haù dut rá lé, yhangmoq é matú masat to gù nghut bê nghut ri.

⁹ Nghut kólhang, nungmoq gi, mauchut hkaù mai Yhâng é mauhpo maubó shut nungmoqlé wut htoq yù Su é mauhpo muzó lé wó tai pyô kó sháng gaq, hkyin yù huí é byuhú, hkòhkâm hkyangjong amyù, chyoiyúng é byù myù, Garai Gasang eq sêng é byu pé nghut akô nghut ri. ¹⁰ Nungmoq gi, hí lé byù ra-myù a nghut wú kólhang, ahkuí gi, Garai Gasang é byù myù nghut bekô nghut ri; nungmoq gi, hí lé shogyo nhikmyin hkyô lé a wó yu wú kólhang, ahkuí gi, shogyo nhikmyin hkyô lé wó yù bekô nghut ri.

¹¹ Chyitdap é luzúm wui é, nungmoq é asak woi-nyí lé majan zân nyi é, yubak mara byíng jup é ô nau gadaù hkyô lé koi pyám keq nghú, gó ming byu pé eq byúbíng pé dông mingkan htoq mã nyi é bang nungmoq lé, ngò, wum tai tsuq kat lhê. ¹² Haù a lumjìng shí é byu pé gi, nungmoq shut nyi ri ga, nungmoq lé mara hun bùm kòle, nungmoq é ge é muzó lé myàng kómù, nga-nhúng lé Garai Gasang èq lé kúm é buinyi mã Garai lé shigyaù kó sháng gaq, a lumjìng shí é byu pé é ahkaù mã haù su ge é asak dui hkyô dông nyi yap keq.

Uphkâng Bang Eq Yhumsing Wui É A-ô Má Nyi Rà Hkyô

¹³ Haù Yhumsing é yanmai, byu pé mã é ahko ahkàng wó bang banshoq é a-ô mã nyi keq: kô dik é ahkàng ayá wó é hkòsêng é a-ô mã nghut kòle, ¹⁴ shut é hkyô kut bang lé dam byi rá matú eq jô é hkyô kut bang lé shigyaù rá matú, hkòsêng èq nhang tô é mauzaù pé é a-ô mã nghut kòle, nyi nyi keq. ¹⁵ Hkâsu mù gà le, ge é hkyô kut é dông, byù nâ pé é a sé a dat é dang lé nungmoq lhoq zím pyám é gi, Garai Gasang ô nau é hkyô nghut lhê. ¹⁶ Lut bê bang dông nyi keq, nghut kólhang, agè ashop é hkyô lé nghop pyám rá matú nungmoq é luthkyô lé hkâchúng kó; Garai Gasang é dui-nhâng zoshâng wui dông nyi keq. ¹⁷ Yuq hkangmó lé rago za hkunggá é hkyô shit keq; lumjìng é gumang wui lé chyitdap keq; Garai Gasang lé gyuq hkunggá nyi keq; hkòsêng lé hkungga keq.

¹⁸ Dui-nhâng zoshâng wui é, hkungga myit banshoq èq, nungmoq é yhumsing wui é a-ô mã nyi keq; ge é eq nù-nhám bâng é a-ô mã za a nghut, byuwuú pé é a-ô mã le nyi keq. ¹⁹ Hkâsu mù gà le, byù rayuq gi, Garai Gasang lé bún nyi sù nghut é yanmai, mara dông a nghut kólhang, wuúhke jamjau huí é hkyô lé hpuzô é lé, jân pyám é nghut

✧ 1:25 Esai 40:6-8 * 2:2 Woi-nyí eq sêng é jet é nau gà é gi, Garai Gasang é mungdang lé tai é nghut lhê. † 2:5

Woi-nyí eq sêng é yhùm gà é gi, noqkuq hpúng lé tai nau é nghut lhê. ✧ 2:6 Esai 28:16 ‡ 2:7 Ahkyak é luqgok gà é gi, Hkrisduq lé tai é nghut lhê. ✧ 2:7 Hkya-on 118:22 ✧ 2:8 Esai 8:14

le gi, hkyá-on gíng é sù nghut lhê. ²⁰ Nghut kôlhang, nungmoq gi, mara kut shut é yan-mai, nhuq bat é hkâm zo lui, haú lé jân nyi é nghut le gi, hai arông wó kó rà lúh? Nghut kôlhang, nungmoq gi, ge é hkyô kut lui, wuihke hui zô é lé jân pyám é nghut jáng, haú gi, Garai Gasâng hí má hkyá-on gíng é hkyô nghut lhê. ²¹ Nungmoq gi, haú hkyô é matú ji yù hui é nghut lhê; haí mù gâ le, Hkrisduq gi, nungmoq é matú wuihke hkyô hui é má, nungmoq lé alik đông tô to byi bê nghut mù, nungmoq gi, Yhâng é hkyô-kâm pé lé cháng rà dut lhê.

²² "Yhang gi, hai mara le a kut shut, Yhâng é nhut mai mhaú é lé a myàng."^{*}

²³ Yhang gi, rhoi é hui é hkûn, yhangmoq lé a dum tau rhoi; wuihke hkyô hui é hkûn, kyuq é dang a tai. Haú kut rà malaí, tengmán é đông jéyáng é Su chyáng, Yhânggùng lé ap pyám ri. ²⁴ Nga-nhùng gi, yubak mara eq wó shi gang mù, dingmán hkyô é matú asak wó dúi kó sháng gaq ga, Yhang gi, sik zing má, Yhânggùng eq yhang, nga-nhùng é yubak mara lé Yhânggùng má wun pyám byi bê nghut ri; Yhâng é dâm pé é yanmai, nungmoq gi, lhoq gê byi é lui bekô nghut ri. ²⁵ Hkâsu mù gâ le, nungmoq gi, hkyô nghoq byuq é sau pé su dut wú kôlhang, ahkuí, nungmoq gi, haú sau zúng Sù eq nungmoq é asak woi-nyí lé upzúng Su chyáng lhing tau lò bekô nghut ri.

3

Ikun Myhí Pé Eq Ikun Hpô Pé

¹ Ikun myhí pé ê, haú eq rajung za, yhum-sing é ikun hpô uphkan é a-ô má nyi keq; haú hkûn, yhangmoq mã é rayuq yuq, haú mungdang lé a lumjing kôlhang, ² yhum-sing é asak dui hkyô mã é sansêng é hkyô eq hkunggâ é hkyô lé myàng kôjáng, dang đông a nghut é za, yhâng é yhum-sing myhí é nyi yap é sâmlai đông mai yhang lé wó lhoq lhih yú rà nghut lhê. ³ Nungmoq yung é hkyô gi, ahtoq pyám za nghut é, xâmban nik é đông, hing zê mhôn chung é eq réng é mebu wut é đông mai lo é a ge nghut. ⁴ Hau é malaí, haú gi, Garai Gasâng é hí má gù bo é, nú-nhâm é eq zim za dut é woi-nyí é, a dat hpoi é yung hkyô nghut é nungmoq é i-myt unghkaú mã é su é yung hkyô sheq dut rà lhê. ⁵ Hkâsu mù gâ le, gô hkûn, Garai Gasâng chyáng myit myoqbyu bang nghut é, chyoiyung é myiwe wui gi, yhangmoq gùng lé haú đông mhôn yù yú kut kô é nghut lhê. ⁶ Sarah gi, Abraham é jino gyo lui, yhang lé yhâng é yhum-sing ga wut é su, yhangmoq gi, ó le ô é yhum-sing é ikun hpô uphkan é a-ô má nyi akô nghut ri. Nungmoq gi, jô é hkyô lé kut mù, gyuq é hkyô a bo é nghut jáng, Sarah é byizô pé nghut bê.

⁷ Ikun hpô pé ê, haú eq rajung za, yhum-sing é ikun myhí eq rahá nyi yap e lo é hkûn, sê gyo byi mù, nungmoq htoq wum nyhôm é bang eq, nungmoq eq rahá asak jeju chyunghuq wunli wó é bang đông, yhang-moq lé hkungga keq. Haú hkûn, nungmoq é kyûdung dang lé a he-ngik pyám byi rà nghut lhê.

Ge É Kut Lui, Jamjau Hkam É Hkyô

⁸ Dang htang sat é má, nungmoq banshoq bang gi, rayuq eq rayuq myit hui lhum nyi keq; myit wú nô mù, gumang nhiktang wui su chyitdap lhum nyi keq; shogyo nhikmyin myit bò lui, i-myt nyhum nyi keq. ⁹ Agê ashop é lé, agê ashop é đông lató a hpuq é eq rhoi é lé rhoi é đông lató a hpuq é za, shimân byi keq; haí mù gâ le, nungmoq gi, haú pé é matú, shimân jeju muí wó hkam yú kó sháng gaq ga, ji yu é hui kô é ru nghut lhê. ¹⁰ Hkâsu mù gâ le,

"Asak dui rà lé chyitdap é eq ge é buinyi pé lé myàng nau é sù ó yuq le, yhâng é shô lé, agê ashop é mai, yhâng é nhutwui lé, mhaú dang tai é mai, lhoq kâng pyám ra rà nghut lhê.

¹¹ Yhang gi, agê ashop hkyô mai lhing tau mù, ge é kut ra rà nghut lhê; yhang gi, nguóngôn simsaq hkyô lé hô mù, châng hkat nyi ra rà nghut lhê.

¹² Hkâsu mù gâ le, haú Yhum-sing é myoqji gi, dingmán bang lé wú nyi é nghut lui, yhangmoq é kyûdung dang lé, Yhâng é nohkyap eq gyo byi ri; nghut kôlhang, haú Yhum-sing é myoqdong gi, agê ashop hkyô kut bang lé gyê đông myang pyám ri."^{*}

gâ tô ri.

¹³ Ge é hkyô lé, nungmoq gyai yhang kut nau nyi é nghut le gi, ó yuq wá nungmoq lé wó gunjang rà lúh? ¹⁴ Nghut kôlhang, dingmán hkyô é matú, nungmoq wuihke jamjau hui le lhang, nungmoq gi, hkungsô wó nyi ri. "Yhangmoq gyuq é hkyô lé hkâgyuq kó; hkâgyuq dàn kó."^{*} ¹⁵ Nungmoq kúm gi, myit nhiklhum má, Hkrisduq lé, Yhum-sing đông jowô byi keq. Nang wó é myit myoqbyu hkyô lé myi é sù yuq hkanmó lé, haí mù wó é hkyô tú tai kyo rà matú, ayang hen to aq. Nghut kôlhang, nú-nhâm é eq hkunggâ é đông haú lé kut nyi aq; ¹⁶ nungmoq é unghkaú myit san za dut nyi keq, haú hkûn, Hkrisduq đông mai nungmoq wó é ge é a-kyang lé rhoi dang tai é bang gi, yhangmoq lumú gansang é yanmai hoq hpô é hui kó rà nghut lhê. ¹⁷ Garai Gasang ô nau é nghut le gi, agê ashop kut lui jamjau hkâm rà htoq má, ge é kut lui jamjau hkam le gi, ge é nghut lhê. ¹⁸ Hkâsu mù gâ le, nungmoq lé Garai Gasâng chyáng shui jé shoq, Hkrisduq gi, byu pé é

yubak marâ é yanmai, radàm za shí hkâm pyâm bê nghut ri; haù gi, dingmán Sù, a dingmán bàng é matú shí hkâm byí é nghut lhê. Yhang gi, gungdu shí bê nghut kôhlang, haù Woi-nyí má lhoq dui é hui bê nghut ri.¹⁹ Yhang gi, Woi-nyí dông, htông lúng tô é woi-nyí pé lé ê hko kyô ri.²⁰ Woi-nyí haù pé gi, a-nham lé, Noaq é ipyat má wui-sanghpo lé Noaq tsuq nyi é hkùn Garai Gasang myit hng hng láng nyi é u lé, jino a gyô é bang nghut akô. Wui-sanghpo má wàng mù, wui mai hkyi yù hui é byù shau luí, shit yuq za nghut akô.²¹ Wui haù gi, ahkúi nungmoq lé le hkyi yu é nghut é baptisma é azông nghut ri; haù gi, gungdu má é agot a-ù lé hui sêng pyâm byí é a nghut é za, sansêng é unghkaú myit mai Garai Gasâng é hí má gidiq tô é ru nghut lhê. Yesuq Hkrisduq é dum dui toq hkyô dông, nungmoq gi, baptisma hkâm yù luí, hkyi yu é hui kô é nghut lhê.²² Yesuq Hkrisduq gi, mauhkung má doq ló luí, Garai Gasâng é loqyô hkyam má nyi tô é nghut mù, maumang lagyô pé, ahkáng ayá pé eq a-tsam pé gi, Yhâng uphkan é a-ô má nghut nyi bum akô.

4

Garai Gasâng É Matú Asak Dui Râ Hkyô

¹ Haù mù luí, Hkrisduq gi, Yhâng é gungdu má hpuzo bê nghut é yanmai, nungmoq le, Yhang i-myt sâmlai hau eq yhumsing gung má gyecking dông wut to keq, haù mù gà le, yhâng é gungdu má hpuzo bê sù gi, mara eq gang bê nghut ri.² Haù nghut é yanmai, yhang gi, yhang nyi tùm tô é mingkan asak dui hkyô má, agé ashop é xângzo byù ô nau é dông a nghut é za, Garai Gasang ô nau é dông asak dui é ru nghut lhê.³ Hkâsu mù gà le, nungmoq gi, laí lò bê ahkying má, a lumjing shí é byu pé hkyin kut nau é hkyô nghut é, shut é dông nyi zô lhúm nau é i-myt, agé ashop é yut yut ô nau é hkyô, i shuq wut é hkyô, zo yê shuq yê mù achaq achyut kut é hkyô, ye lhai rá wut jung zoshuq lé yut yut ô nau é hkyô, achaq achyut é hparâ noq hkyô pé má, ahkying luq shoq nyi laí lò bê bang nghut akô.⁴ Nungmoq gi, ladu lai shoq achaq achyut kut é hkyô má, yhangmoq eq rahá a bo châng kut wún lo kô é nghut mù, yhangmoq gi, maù byuq luí, nungmoq lé lumú gansang pyâm akô nghut ri.⁵ Nghut kôhlang, yhangmoq gi, dui nyi é bang eq shí bê bang lé tarâ jéyáng rá rì rì nghut to Sù lé jhpan shit kyo ra kó rá nghut lhê.⁶ Hau é yanmai, ahkúi shi byuq bê bang lé lhang gabú danglù hko kyô é hui bekô nghut lhê; haù gi, gungdu eq séng luí ga jang, yhangmoq gi, byù dông mai tarâ jéyáng é hui rá eq, woi-nyí eq séng luí ga jang, Garai

Gasang dông mai asak wó dui rá matú nghut lhê.

⁷ Lhunglhang htum rá ahkying gi, chyáng bê nghut ri. Haù mù luí, nungmoq kyú wó dung kó sháng gaq, bún gying luí, yhumsing gung yhumsing hkanq nyi keq.⁸ Banshoq htoq má ahkyak é gi, rayuq eq rayuq gai yhang chyitdap lhúm é hkyô nghut lhê, haù mù gà le, chyitdap myit gi, yubak mara myo myo lé wó nghop pyâm é nghut lhê.⁹ Rayuq eq rayuq, tai nyung nyang é hkyô a bo é za, rago hkulum lhum keq.¹⁰ Yuq hkanq mó gi, yhumsing wó hkanq yù bê chyunghuq eq rajung za, góbang lé dojàu rá lhê; Garai Gasâng jeju chyunghuq ajung jung lé, lhumzui é eq rago chung jai rá lhê.¹¹ Rayuq yuq tai é nghut jáng, Garai Gasâng é mungdang haù eq yhang rajung za tai rá rá nghut lhê. Garai Gasang gi, lhunglhang má Yesuq Hkrisduq é yanmai hkya-ôn é hui sháng gaq, rayuq yuq dojàu é nghut jáng, Garai Gasang byí é wum-ô eq dojàu ra rá nghut lhê. Haù hpungwup shingkanq eq a-tsam gi, Yesuq Hkrisduq chyáng pyat dedu ahtum abyuq joq nyi sháng gaq ô. Amen.

Hkristan Dut É Yanmai Jamjau Hui É Hkyô

¹² Chyitdap é luzúm wui é, wuihke hkyô dông chyam é lé nungmoq hkâm zô nyi é hkùn, nungmoq chyáng maù nhô zá é hkyô dut htoq bê dông, hkâgyuq dàn kó.¹³ Hkrisduq é jamjau hkyô pé lé bo hui zô é yanmai kúm gi, nungmoq gabú keq, haù hkùn sheq, Yhang é hpungwup shingkanq eq rahá Yhang htoq shit é hkùn, nungmoq gi, gabú dik é hui kó rá nghut lhê.¹⁴ Hkrisduq é mying yanmai, nungmoq gi, rhei é hui zô é nghut jáng, hkungsó wó nyi ri; hkâsu mù gà le, hpungwup shingkanq bo é Woi-nyí ngu é, Garai Gasâng é Woi-nyí gi, nungmoq chyáng nyi nyi ri.¹⁵ Nungmoq má é rayuq yuq jamjau hui é nghut le gi, byù sat sù, hkau sù, gotú agé ashop kut sù, góbang é mù má cháng gunjang sù dông jamjau hui é a dut sháng gaq.¹⁶ Nghut kôhlang, Hkristan rayuq dông nungmoq jamjau hui é nghut le gi, hkâhoq nyi kó, Garai Gasang lé kúm gi, mying hau é yanmai hkya-ôn nyi keq.¹⁷ Hkâsu mù gà le, tarâ jéyáng rá ahkying gi, jé bê nghut luí, Garai Gasâng é ikun byu pé mai hí rá nghut lhê; haù gi, nga-nhung mai hí é nghut jáng, Garai Gasâng é gabú danglù lé a châng é bang gi, hkâsu wá dut lò rá nghut lhê lhú?

¹⁸ "Haù dingmán sù, hkyi yù hui rá wui é nghut le gi, tarâ a hkunggá é eq yubak dap é sù gi, hkâsu wá dut rá nghut lhê lhú?"*

gá tô ri.

¹⁹ Haù nghut mù luí, Garai Gasang ô nau é dông jamjau huí é bang gi, yhumsing gùng lé, lhumzui é Hpân Su chyáng ap byi mù, ge é lé xoq kut nyi ra rà nghut lhê.

5

Suwún Wuí Êq Zorâm Wuí

¹ Nungmoq mà é hpúng suwún wuí lé, ngò, nungmoq é byinzùm suwún, Hkrisduq é jamjau hkyô pé é saksé nghut sù eq lhoq htoq shit rà nghut é Yhâng é hpungwup shing kang lé bo hkâm rà nghut sù dông mai sang kat kôlé: ² Nungmoq lé ap to bê nghut é Garai Gasâng é sau hpúng* lé zúng rém bang dut mù, shuí u bang dông dojaù nyi keq; zúng rém é hkùn, a kut a ge luí kut é a nghut é za, Garai Gasang, nungmoq lé dut nhâng nau é su, yhumsing kâm é myit mai kut é nghut rà lhê; ngunzè lé a myoqnoq é za, shirông myit mai dojaù rà lhê. ³ Nungmoq é loq má ap byi to bê bang lé a up zô é za, yhangmoq é hí má alik dut nyi keq. ⁴ Haù jáng, Sau zúng Agyi mô† htoq shit é hkùn, nungmoq gi, hpungwup shing kang bo é, hkâ-nhám le a shum a byuq é janmaù lé myang hap yù kó rà nghut lhê.

⁵ Zorâm wuí ê, nungmoq le, nungmoq htoq ipyat ko bâng é a-ô má nyi keq. Nungmoq lhunglhâng bang gi, myit lhoq nyhum é hkyô lé mebu su wut to mù, rayuq eq rayuq dojaù nyi keq, hkâsu mù gâ le, "Garai Gasang gi, nghutbùn é bang lé hkùm zing pyám kôlhâng, myit lhoq nyhum é bang lé jeju byi ri."[✠]

ga tô ri. ⁶ Haù mù luí, ahkyíng jé jáng Garai Gasang nungmoq lé waq toq sháng gaq, nungmoq gi, Yhâng é hpungwup a-tsam mó bo é loq hkaù má, yhumsing myit lé yhumsing lhoq nyhum nyi keq. ⁷ Nungmoq é myit chiq hkyô banshoq lé, Yhâng htoq má dú kê pyám to keq, hai mù gâ le, Yhang gi, nungmoq é matú chiq byi nyi sù nghut lhê.

⁸ Yhumsing gùng lé yhumsing hkâng mù, machya nyi keq. Nungmoq é gyè nghut é nat Tsadán hpó gi, rayuq yuq lé wó zô myui pyám shoq ga, mying wún é hkanghkyi su hkat gadaù jón wún ri. ⁹ Yhang lé htuq htíng pyám mù, lumjíng myit má gíngtíng nyi keq, hai mù gâ le, mینگkan gón mâ é nungmoq é gumang wuí le, rajung zâ é jamjau hkyô pé hui zô nyi kô é lé, nungmoq sê lhê.

¹⁰ Haù mù, jeju banshoq é Garai Gasang gi, Hkrisduq má ahtum abyuq joq nyi é Yhâng é hpungwup shing kang matú nungmoq lé jì yù bê nghut luí, nungmoq razup zo jamjau huí é htâng má, Yhang yhang nungmoq lé gumjup nhâng mù, wum bô nhâng luí, gíng gíng tíng tíng dut nhâng rà nghut lhê. ¹¹ Haù hpungwup a-tsam banshoq gi,

Yhâng chyáng pyat dedu ahtum abyuq rú joq nyi sháng gaq. Amen.

Ló Htâng É Shi-kyám Dang

¹² Lhumzui é gumang nghù ngò sôn yu é Sila èq garúm luí, ngò gi, nungmoq lé myit wum byi dang eq, myit wum byi dang haù pé gi, Garai Gasâng é tengmán é jeju nghut é lé saksé hkâm é dang pé lé, tot za kâ kat é nghut lhê. Tengmán é jeju haù má yap gíng nyi keq.

¹³ Babelon má nyi é, nungmoq eq rahá hkyin yù huí é Hpúng gi, nungmoq lé shi-kyám kat ri; ngá zo dông nghut sù Markuq le, nungmoq lé shi-kyám kat ri. ¹⁴ Rayuq eq rayuq, chyitdap popuq puq é èq shi-kyám lhum keq.

Nguingón hkyô gi, Hkrisduq má nghut nyi é nungmoq banshoq bâng chyáng ru joq nyi sháng gaq ô.

* 5:2 Sau hpúng gâ é gi, lumjíng bang lé gâ lhê. † 5:4 Sau zúng Agyi mó gâ é gi, Hkrisduq lé gâ é nghut lhê. ✠ 5:5 Sânghyang 3:34

PETRUQ

Htang Dàm Hun Kat é Laiká (2 Peter)

¹ Yesuq Hkrisduq é dui-nhâng zoshâng eq lagyo nghut sù, ngò Simun Petruq gi, nga-nhùng é Garai Gasang eq hkyyi yù Sù nghut é Yesuq Hkrisduq é dngmân hkyô dông, ngamoq su, hpaù dik é lumjing hkyô lé hap yù bê bang chyáng dang kyô kat lhê.

² Garai Gasang eq nga-nhùng é Yhumsing Yesuq lé, nungmoq sê jat nyi é hkyô má, jeju eq nguigón hkyô gi, nungmoq chyáng agùn agó ru joq nyi sháng gaq.

Ji Yu É Eq Hkyn Yu É Hkyô Lé Lhoq Ging Lhoq Ting Rá Hkyô

³ Yhâng é hpungwup shingkang eq ge é hkyô dông nga-nhùng lé ji yù Sù lé nga-nhùng sê é dông mai, Garai Gasang é hpungwup a-tsam gi, asak dui hkyô eq tará hkungga hkyô é matú nga-nhùng rá é jung hkangmó lé byi bê nghut ri. ⁴ Haù pé dông mai, Yhang gi, Yhâng é kô dik, hpaù dik é danggidiq pé nga-nhùng lé byi bê nghut ri; haù hkùn, nungmoq gi, haù danggidiq pé dông mai, Garaí é myit sâmlai lé wó bo hkam yù rá eq agê ashop hkyô lé yut yut ô nau é yanmai htoq lo é, mingkan má joq é htên byoq hkyô mai wó lut kô rá nghut lhê.

⁵ Hau é yanmai yhang, nungmoq gyai yhang shikut lui, nungmoq é lumjing hkyô má ge é hkyô lé jat yu keq; ge é hkyô má sumsé hpaqchyí lé, ⁶ sumsé hpaqchyí má yhumsing gung yhumsing hkang é hkyô lé, yhumsing gung yhumsing hkang é hkyô má jân shirang é hkyô lé, jân shirang é hkyô má tará hkunggá é hkyô lé, ⁷ tará hkunggá é hkyô má gumang chyitkâng myit lé, gumang chyitkâng myit má chyitdap myit lé, jat yu keq. ⁸ Hkâsu mù gà le, hau pé lé nungmoq wó sing myô jat lo é nghut jáng, hau pé gi, nga-nhùng é Yhumsing Yesuq Hkrisduq lé nungmoq sê é hkyô má, nungmoq lé akôm a dut nhang é htoq agó, ashí a zui lé dut nhang rá a nghut. ⁹ Nghut kôlháng, rayuq yuq gi, hau pé lé a wó é nghut jáng, chyáng é lé za myang é eq myoqjit é sù nghut lui, lai lò bê yhâng é yubak mara pé mai lhoq sanséng byi é hui bê hkyô lé, tô-myhí pyám bê sù nghut ri.

¹⁰ Haù mù lui, ngá é gumang wui é, nungmoq lé ji yu é hkyô eq hkyn yu é hkyô lé, je riyhang lhoq gingting nyi keq. Hkâsu mù gà le, hau hkyô pé lé nungmoq kut nyi é nghut jáng, hkâ-nhám le nungmoq myit leqbat kó rá a nghut; ¹¹ hau htoq agó, nga-nhùng é Yhumsing eq hkyyi yù Sù nghut é Yesuq Hkrisduq é ahtum abyuq é mingdán

má agùn agó lhom pang yu é lé, nungmoq myang hap yù kó rá nghut lhê.

Chyúmdang Mâ É Myiqhtoi Dang

¹² Haù mù lui, nungmoq gi, hau pé lé sé kô é htoq agó, nungmoq wó tô é tengmân hkyô má gingting nyi kô é nghut kôlháng, ngò, nungmoq lé hkâ-nhám le hau pé lé ru lhoq pùn nyi rá nghut lhê. ¹³ Shí gungdu má ngò rù dui nyi nyi gi, nungmoq lé lhoq pùn kying byi le ge ri nghù, ngò wó myit ri; ¹⁴ hai mù gà le, nga-nhùng é Yhumsing Yesuq Hkrisduq gi, ngo lé san za sé nhâng bê eq rajung za, hkâ-myháng a myáng má, ngò gi, gungdu shi lé tô pyám to rá nghut é lé sé lhê. ¹⁵ Ngò htoq ló byuq é htàng má, nungmoq, hkâ-nhám le hau pé lé ru wó bân nyi rá lé myàng naù mù, ngò, wó dut é í shikut nyi rá nghut lhê.

¹⁶ Nga-nhùng é Yhumsing Yesuq Hkrisduq é a-tsam eq lé lo é hkyô eq séng lui, nungmoq lé ngamoq tai kyô wú é hkùn, ngamoq gi, kut htoq yu é labyoq mhô-myi lé a châng é za, Yhâng é kô làm hkikhkâm hkyô lé myoq eq myang é saksé pé nghut lhê. ¹⁷ Hkâsu mù gà le, haù Kô Lâm Hkikhkâm Hkyô é Hpungwup Shingkang mai, "Shí yuq gi, Ngò chyitdap é Ngá zo nghut lhê; Yhang má Ngò nhik dik nyi lhê."^o ga tai é htê, Yhâng chyáng jé é hkùn, haù Iwa Garai Gasang chyáng má é aróng eq hpungwup shingkang lé Yhang wó hap yù bê nghut ri. ¹⁸ Ngamoq yhang, chyoyúng bùm má Yhang eq rahá nyi tô é hkùn, htê haù mauhkung mai htoq lo é lé wó gyô é nghut lhê.

¹⁹ Haù mù lui, myiqhtoi pé dang lé je lhoq ging bê hkyô, ngamoq wó é nghut lhê; haù mù, maubó lô lui, nungmoq é myit má bô-myhù htoq lo é hkùn jé shoq, mauchut tuq dut é jowò má duq nyi é myibung lé su, myiqhtoi dang haù lé, nungmoq gyo mù rago châng kut rá dut lhê. ²⁰ Banshoq htoq má, Chyúmdang má é myiqhtoi dang gi, haù myiqhtoi pé mai ó le ó lichyúm lhoq htoq yu é dông a nghut é lé, nungmoq sê to rá dut lhê. ²¹ Hkâsu mù gà le, myiqhtoi dang gi, byù ô nau é dông hkâ-nhám lé a htoq wú é za, haù Chyoyúng Woi-nyí eq shuí u huí é bang mai, Garai Gasang chyáng má é dang tai é ru nghut lhê.

2

Sará Apyoq Pé É Hkyô

¹ Nghut kôlháng, myiqhtoi pyoq pé gi, Israelaq byù haù bang é ahkaù má nyi wú bê nghut lhê, haù eq rajung za, nungmoq é ahkaù má le sará apyoq pé nyi rá za nghut lhê. Yhangmoq gi, htên byoq hkyô nghut é byoq gang rá mhoqshit hkyô pé lé, haq lhoq pyo é htoq agó, yhangmoq lé wui yu é,

Yhumsing lé lhang he-ngik pyám kó rá ngut lhê. Haù mù, yangmoq gi, yhumsing gùng yhumsing byòdàn tung htên byoq hkyô jé nhâng bekô rá ngut lhê. ² Byù myo myo gi, haù bâng é ahoq ahí hkyô má cháng kó rá eq, tengmán hkyô lé tai hpoi pyám nhâng kó rá ngut lhê. ³ Sarà apyoq haù bang gi, yangmoq myoqnoq é hkyô má, yangmoq kut htoq tô é mhô-myi dông nungmoq lé mara dam byi hkyô gi, gohkùn mai yangmoq ahtoaq má lhang to gù bè ngut é htoq agó, yangmoq é htên byoq hkyô gi, yhup myhí tò nyi é a ngut.

⁴ Hkâsu mù gà le, Garai Gasang gi, mara kut shut é maumâng pé lé lhang a ha bún é za, ngaraí ming má hkyô pyám luí, tarâ jéyáng é hui rá hkùn jé shoq, yangmoq lé tuq tuq chut é dong hkaù má kat tô é ngut lhê. ⁵ Yang gi, tarâ a hkunggâ é byu pé lé dowuí tít é hkùn, gohkun lhê é mingkan lé a ha bun ngut ri, ngut kôlhang, dingmán é hkyô lé hko kyô lé sú Noaq eq gotú nyhit yuq lé hung yu é ngut ri; ⁶ Yang gi, Sodom eq Gomoraq myuq lé, myi-mhop dut shoq nyhê hkyô pyám é dông mara dam byi luí, tarâ a hkungga bâng chyáng dut tô rá hkyô é azòng kut tô é ngut ri; ⁷ ngut kôlhang, tarâ a chùng bâng é ahaq achyut asak ùi hkyô é yanmai myit wui myit hke huí é, haù dingmán sú Lot lé hkyi htoq yu é ngut ri; ⁸ (hkâsu mù gà le, dingmán sú haù gi, nyi hkanmó yangmoq akhaú má nyi nyi é ngut luí, tarâ a chùng é mazó hkyô lé, yang wó myâng wó gyô é yanmai, yhang é dingmán myit má gunjâng é hui sú ngut ri.) ⁹ Haù su ngut é ngut jáng, Yhumsing gi, tarâ hkunggâ é byu pé lé, wuihke hkyô mai hkâsu kut hkyi htoq yú rá eq, a dingmán é bang lé, tarâ jéyáng é buinyi jé shoq, dam byi é hkyô lé xoq kut nyi é u má hkâsu kut zú zing to rá lé sê lhê. ¹⁰ Haù yubak gungshô é htên byoq sê é yut yut ô nau hkyô châng é eq ahko ahkáng lé wú tiq bâng chyáng, haù hkyô hkyak dut rá ngut lhê.

Byù haù bang gi, ngegáng-htu é eq ngutbùn é bang ngut kôluí, mauhkung bang lé lumù gansáng rá lé a gyuq kó ngut ri; ¹¹ ngut kôlhang, maumang lagyo pé lhang gi, wum je bo é eq a-tsam je bo é ngut kôle, haù Yhumsing é hí má, haù mauhkung bang lé mara hun é dông lumù gansáng hkyô a wám kut kó ngut ri. ¹² Ngut kôlhang, haù sará apyoq pé gi, yhumsing a sê gyô é hkyô pé lé rhoi dang tai akô. Yangmoq gi, haù chyup yu é hui luí, lhoq htên pyám é hui rá matú za hku lé lo é, nhik a bo é tân jung dusak dông ngut akô; dusak haù pé su, yangmoq le, htên byoq byuq kó rá ngut lhê.

¹³ Yangmoq gi, nò shoq kut bekô ngut é yanmai, nò shoq kut é hui zo kó rá ngut lhê. Yangmoq é ngón kún nau é myit gi, nyí mó káng lé lhang gungsho yut yut ô nau hkyô lhoq dik rá matú ngut ri. Yangmoq gi, nungmoq eq ráhã zoshuq poi kut kó é hkùn, mhaù é lé yangmoq é ngón hkyô kut kômù, agè agau é eq ahaq achyut é bang ngut akô. ¹⁴ Yangmoq é myoqjí pé má gi, sumyi sulàng lú hkyô bying zan to kômù, mara kut é hkyô lé hkâ-nhám le a hkying kó ngut ri; yangmoq gi, a gingtít é bang lé mhoq hpyoq yu akô; yangmoq gi, myoqnoq é hkyô má kung é bang ngut kômù, nhing pyám é hui bang ngut akô. ¹⁵ Yangmoq gi, haù ding é hkyô lé tô pyám to kômù, Beora é yangho ngut é, agè ashop hkyô é ahpaù lé chyitdap sú Balam é hkyô má châng yong wún bekô ngut ri. ¹⁶ Ngut kôlhang, Balam gi, yang kut shut é hkyô é yanmai, logúng eq tân mhoqshit é hui ri; dang a dat nyo é logúng haù gi, byu é htê dông dang tai lò mù, myiqhtoi hó a gyíng é hkyô lé hkùm tang pyám ri.

¹⁷ Byù hau bang gi, wui a bo é wuítung eq, laidín eq mut táng ló é nghansoq eq púng kômù, yangmoq é matú gi, tuq tuq chut é mauchut hkaù lé lajang to bè ngut ri. ¹⁸ Hkâsu mù gà le, yangmoq gi, asôm gyáng dang lé tai mù, yubak gungshô é yut yut ô nau é hkyô dông mai, haù shut shai é hkyô má asak ùi nyi é mai asik za hpang htoq lo é bang lé, mhoq hpyoq yu akô ngut ri. ¹⁹ Yangmoq gi, haù bang lé luthkyô byi rá gidiq byi kô é ngut kôle, yangmoq gùng gi, htên byoq hkyô lhoq htoq é gungsho yut yut ô nau hkyô é jùn dut nyi akô; hai mù gà le, byù rayuq gi, yhumsing lé hai eq up sing le, hai é jùn ngut lhê. ²⁰ Byu pé gi, nga-nhùng é Yhumsing eq hkyi yù Sú ngut é Yesuq Hkrisduq lé sê é dông mai, mingkân é agè ashop hkyô mai wó hpang lut htoq bè ngut kôle, yangmoq lé hau eq tuí yup tô é dum hui luí, ung pyám é hui kô é ngut jáng, yangmoq é matú, hí lhê htoq má je wui byuq kó rá ngut lhê. ²¹ Haù dingmán é hkyô lé yangmoq sé luí, yangmoq lé ap byi to bè ngut é chyoiyung hkunmó lé tô pyám to mù lling taù ló byuq kô é htoq má, haù hkyô lé a sê é gi, yangmoq é matú je gè kó rá ngut lhê. ²² "Hkui gi, yang hpat tô é lé dum taù zô lhê." gà é eq, "Waq gi, chí pyám byi é htang, yhang é galhu htum má dum taù lhù lhê."²³ gà é sanghkyang gi, yangmoq chyáng dik bè ngut ri.

3

Haù Yhumsing Jé Lé Rà Buinyi

¹ Chyitdap é luzúm wui ê, shí gi, nungmoq lé ngò í dá ngù rá òam gà byi kat é laiká

nghut lhê. Laiká shí í lhum má, nungmoq é sansêng é i-myt lé lhoq toq rá matú tai pún kat é laiká nghut lhê. ² Haú gi, chyoyúng myightoi pé mai lai lò bê hkún tai tô é dang pé eq, nga-nhúng é Yhumsing eq hkyi yú Sú mai, nungmoq é lagyo pé dng byí to bê nghut é hkunmó lé, ngò, nungmoq lé bun nhâng nau luí nghut lhê.

³ Sâng-hi má, ló htâng é buinyi pé má yhumsing é agè ashop ô nau hkyô má cháng luí tai hpoi bang htoq lô rá nghut é lé, nungmoq sê gyô to ra rá nghut lhê. ⁴ Haú bang gi, "'Dum jé lé rá' ga Yhang gididq byí é gi, hkámá lhú? Nga-nhúng é ichyí iwâ pé gi, shi byuq ló bekò nghut mù, jungkháng jungmó gi, mau htoq xâng hkun mai dut é su roq dut nyi ri." ga tai kó rá nghut lhê. ⁵ Nghut kôlhang, yhangmoq gi, a-nham lé, Garai Gasâng é hkunmó mai, mauhkúng pé joq é eq, myigùng gi, wui mai dut htoq nhâng mù, wui dng hpan tô é hkyô lé, a sé gún kut pyâm akò nghut ri. ⁶ Wui hau é sheq, haú hkun lhê é mingkan lé dowui tng mù, lhoq htên pyâm é nghut lhê. ⁷ Ahkuí lhê é mauhkúng pé eq myigùng lé gi, tará a hkungga bang htên byoq hui rá nghut é, tará jéyáng é buinyi jé shoq, myi má nyhé rá matú, hkunmó hau eq Yhang hkong to bê nghut ri.

⁸ Nghut kôlhang, chyitdap é luzúm wui é, haú Yhumsing é hí má, ra-nyí gi, zanwut rahkying dng, zanwut rahkying gi, ra-nyí dng nghut é hkyô shí lé, hkátô-myhí kó. ⁹ Haú Yhumsing gi, Yhâng é danggididq lé hân a lhoq dik ga byú ra-am myit ngam pyâm é su, nyhâm é Sú a nghut. Yhang gi, ó yuq le htên byoq byuq rá lé a ô nau é yanmai, yuq hkangmó myit lhing rá lé za ô nau mù, nungmoq lé myit hng byí nyi é nghut lhê.

¹⁰ Nghut kôlhang, haú Yhumsing é buinyi gi, hkau sú su a bún nùng má jé rá nghut lhê. Haú buinyi má, mauhkúng pé gi, mying hum htê eq byuq byuq rá nghut lhê; duqbó-gùng pé gi, myí eq lhoq htên pyâm é hui luí, myigùng eq haú má é joq mijoq gi, nyé gyó byuq rá nghut lhê.

¹¹⁻¹² Joq mijoq gi, haú hkyô dng lhoq htên pyâm é hui rá nghut é yanmai, nungmoq gi, hkású é byu pé dut ra rá lhú? Nungmoq gi, haú Garai Gasâng é buinyi lé ho nyi é eq buinyi haú hân za jé rá lé ô nau nyi é hkún, chyoyúng é eq tará hkunggá é asak dui hkyô dng nyi ra rá nghut lhê. Buinyi haú gi, mauhkúng pé lé, myí eq lhoq htên pyâm luí, duqbó-gùng pé le, lúm nyé luí, nyé yui pyâm é buinyi dut rá nghut lhê. ¹³ Nghut kôlhang, nga-nhúng gi, Garai é danggididq nghut é, dingmán hkyô é yhúm, mauhkúng asik eq myigùng asik lé, myoqbyu nyi é bang nghut lhê.

¹⁴ Haú nghut mù luí, chyitdap é luzúm wui é, nungmoq gi, haú hkyô lé myoqbyu

é bang nghut kó é yanmai, Yhang é hí má achag achyut a dut é eq mara hng rá hkyô a bo é za, Yhang eq nguóngón nyí rá hkyô lé gyai yhang shikut nyi keq. ¹⁵ Nga-nhúng é chyitdap gumang Poluq gi, yhang lé, Garai Gasang byí tô é hpaqchyí byéng-yá eq, nungmoq chyáng ká byí bê eq rajung za, nga-nhúng é Yhumsing é myit hng hkyô gi, hkyi yú hkyô nghut é lé matsing to keq. ¹⁶ Poluq gi, yhang ká é laiká pé banshoq má, haú hkyô pé eq séng luí rajung za ká shit tô ri. Yhang é laiká hkaú pé má, ra-am gi, sê gyo wui é hkyô pé bo é yanmai, a mhoq wú é bang eq a gingtng é bang gi, gotú Chyúmdang pé lé lichyúm htaí lhik pyâm kó é su, yhangmoq lichyúm htaí lhik pyâm kômù, yhumsing htên byoq hkyô kut yu nyi akò nghut ri.

¹⁷ Haú mù luí, chyitdap é luzúm wui é, nungmoq gi, shí hkyô lé sê to gù nghut é yanmai, tará a chùng bâng é shut shai hkyo eq nungmoq lé a wó shuí ngoq yú rá eq, nungmoq é gaú é jowò mai a wó byit gyó byuq sháng gaq, yhumsing gung yhumsing upzúng nyi keq. ¹⁸ Nga-nhúng é Yhumsing eq hkyi yú Sú nghut é Yesuq Hkrisduq é jeju eq hpaqchyí hkyô má, nungmoq kó myhang lò kó sháng gaq. Hpungwup shingkanq gi, Yesuq Hkrisduq chyáng, ahkuí le, ahtum abyuq le, ru joq nyí sháng gaq ó! Amen.

YOHAN Hí Dàm Hun Kat é Laiká (1 John)

Asak Mungdang

¹ Ngò gi, haù sâng-hi mai joq nyi mù, ngamoq wó gyô wú bê é, ngamoq é myoq eq myang wú bê é, ngamoq rago za wú wú bê é, ngamoq é loq eq zàng wú bê é, asak mungdang eq sêng é hkyô lé, nungmoq lé tai kyô kat lhê. ² Asak haù gi, htoq shit bê nghut mù, ngamoq gi, haù lé myang wú lui, saksé hkám bê; haù Íwa eq rahá nyi wú é, ngamoq chyáng htoq shit bê nghut é ahtum abyuq é asak haù lé nungmoq lé tai kyô lhê. ³ Ngamoq eq zùm yap é hkyô lé, nungmoq le wó sháng gaq nghù, ngamoq gi, myang wú bê eq wó gyô wú bê hkyô lé, nungmoq lé tai kyô lhê. Ngamoq gi, haù Íwa eq le, Yhâng zo Yesuq Hkrisduq eq le, zùm yap nyi é bang nghut lhê. ⁴ Ngamoq é gabú hkyô bying jup sháng gaq nghù, ngamoq gi, nungmoq lé shí hkyô ká byi kat lhê.

Maubó Hkaù Má Sô Nyi Râ Hkyô

⁵ Garai Gasang gi, maubó nghut lhê; Yhâng chyáng mauchut ratsuí lháng a bò nghut ri. Shí hkyô gi, Yhangzô chyáng mai ngamoq wó gyô yù lui, nungmoq lé tai kyô é danglù nghut lhê. ⁶ Nga-nhúng gi, Yhang eq zùm yap nyi lhê nghù tai kôlháng, mauchut hkaù má ru sô nyi bum é nghut jáng, nga-nhúng gi, mhaù é bang dut mù, haù tengmán hkyô dòng asak a dui é bang nghut ri. ⁷ Nghut kôlháng, Yhang gi, maubó má nghut nyi é eq rajung za, nga-nhúng le haù maubó má sô nyi é nghut le gi, nga-nhúng rayuq eq rayuq zùm yap nyi bê nghut lui, Yhang zo Yesuq é sui gi, nga-nhúng é mara banshoq lé lhoq sân-yúng pyám byi rá nghut lhê.

⁸ Mara a bò nghù nga-nhúng tai é nghut le gi, yhumsing gùng yhumsing mhaù pyám lui, haù tengmán hkyô gi, nga-nhúng chyáng a bò nghut ri. ⁹ Nghut kôlháng, nga-nhúng gi, yhumsing é mara lé yín yu é nghut jáng, Yhang gi, wó lum é sú eq tengmán é sú nghut é yanmai, nga-nhúng é mara lé hkyut pyám byi lui, a dting a mán é hkyô banshoq mai le, nga-nhúng lé lhoq sân-yúng byi rá nghut lhê. ¹⁰ Nga-nhúng gi, mara a kut shut nghù tai é nghut jáng, nga-nhúng mai Yhang lé mhaù sú nghù chyo pyám é nghut lui, Yhâng é mungdang gi, nga-nhúng má a bò nghut ri.

2

Hkrisduq Gi, Nga-nhúng Lé Garúm Sú

¹ Ngò chiyitdap é zo wuí ê, ngò gi, nungmoq mara a kut shut kó sháng gaq nghù, nungmoq lé shí hkyô ká byi kat lhê. Nghut

kôlháng, rayuq yuq mara kut shut é nghut le gi, nga-nhúng é matú haù Íwá chyáng bo tai xoq byi é, Yesuq Hkrisduq gá é Dingmán Sú lé, nga-nhúng wó lhê. ² Yhang gi, nga-nhúng é yubak mará é matú, shíntai gunglik hkungga nghut nyi ri. Nga-nhúng é yubak mará é matú baù za a nghut, mingkan gón má é byu pé é yubak mará é matú le nghut nyi ri.

³ Nga-nhúng gi, Yhang hkyô tô é hkunmó pé lé châng kut é nghut jáng, Yhang lé nga-nhúng rago sé bê nghut é hkyô lé, wó sé bê nghut ri. ⁴ Byù rayuq yuq mai, "Ngò gi, Yhang lé rago sé lhê." ga tai kôlháng, Yhang hkyô tô é hkunmó lé a châng kut é nghut jáng, haù yuq gi, byù mhaù nghut lui, tengmán hkyô gi, yhang má a bò nghut ri. ⁵ Ó yuq nghut kôlháng, Garai Gasâng é mungdang lé châng kut nyi é nghut jáng, Yhang lé chiyitdap é myit gi, haù yuq má gè bying jup bê nghut ri. ⁶ Yhang má asak dui nyi lhê ga tai é sú ó yuq nghut kôlháng, Yesuq kut bê eq rajung za, châng kut rá lhê. Haù hkùn sheq, nga-nhúng gi, Yhang má nghut nyi bê hkyô lé, wó sê lhê.

Hkunmó Asik

⁷ Chiyitdap é luzúm wuí ê, ngò gi, nungmoq lé hkunmó asik ká byi kat é a nghut é za, haù sâng-hi mai nungmoq wó to bê hkunmó axau sheq ru nghut lhê. Hkunmó axau shí gi, nungmoq wó gyô wú bê mungdang nghut nyi ri. ⁸ Nghut kôlháng, ngò gi, nungmoq lé hkunmó asik ká byi kat lhê; hau é tengmán hkyô lé, Yhang má le, nungmoq má le, byu myàng ri; hkásu mù gá le, haù mauchut gi, lai ló byuq lui, haù tengmán é maubó gi, duq nyi gù bê nghut ri.

⁹ Ngò gi, maubó hkaù má nghut nyi lhê ga lui, yhumsing é gumang lé a jú é sú ó yuq nghut kôlháng, haù mauchut hkaù má ru nghut nyi ashí. ¹⁰ Yhumsing é gumang lé chiyitdap é sú ó yuq nghut kôlháng, haù maubó má asak dui nyi é nghut mù lui, yhang má myit leqbat nhâng rá hkyô hai le a bò nghut ri. ¹¹ Nghut kôlháng, yhumsing é gumang lé a jú é sú kúm gi, haù mauchut hkaù má nghut nyi lui, haù má sô lhing jón wún ri; haù mauchut gi, yhang lé myoq lhoq chit to byi é yanmai, yhang gi, hká shut é ló nyi é hkyô lé a sé nghut ri.

¹² Chiyitdap é zo wuí ê, Yhâng mying é yanmai, nungmoq é mara pé hkyut pyám byi hui bekô nghut lui, nungmoq lé ngò ká kat é nghut lhê.

¹³ Íwá pé ê, nungmoq gi, haù sâng-hi mai nyi é Sú lé sé bekô nghut é yanmai, nungmoq lé ngò ká kat é nghut lhê.

Zorâm wuí ê, nungmoq gi, haù agè ashop sú lé ùng pyám bekô nghut é yanmai, nungmoq lé ngò ká kat é nghut lhê.

Chyitdap é zo wui ê, nungmoq gi, haù Íwa lé sé bekô nghut é yanmai, nungmoq lé ngò kâ kat é nghut lhê.

¹⁴ Íwa pé ê, nungmoq gi, haù sâng-hi mai nyi é sú lé sé bekô nghut é yanmai, nungmoq lé ngò kâ kat é nghut lhê.

Zorâm wui ê, nungmoq gi, wum-o bo é eq, haù Garai Gasâng é mungdang nungmoq chyáng dui nyi é nghut mù, haù agê ashop sú lé ung pyâm bekô nghut é yanmai, nungmoq lé ngò kâ kat é nghut lhê.

Mingkan Lé A Chyitdap Râ Hkyô

¹⁵ Mingkan eq mingkan htoq mã é haì le lé, hkâchyitdap kô. Byù rayuq yuq, mingkan lé chyitdap é nghut le gi, haù Íwa lé chyitdap é myit, yhâng chyáng a bò nghut ri. ¹⁶ Hkâsu mù gâ le, mingkan htoq má joq é lhunglhang gi, gungsho ô nau é hkyô, myoqji yut yut ô nau é hkyô, yhumsing wó é eq kut é hkyô lé gumrong é pé chyat nghut ri. Haù gi, Íwa chyáng mai htoq lo é a nghut, haù mingkan mai htoq lo é ru nghut lhê. ¹⁷ Mingkan eq mingkan ô nau hkyô pé gi, lai lo byuq rá nghut lhê; nghut kôlhang, haù Garai Gasang ô nau é hkyô lé kut é sú gi, ahtum abyuq dui nyi rá nghut lhê.

Hkrisduq É Gye Pé

¹⁸ Chyitdap é zo wui ê, shì gi, ló htâng é ahkyíng nghut bê; haù anti-hkrisduq* gi, lé lo nyi ri gâ é lé, nungmoq wó gyô wú bê eq rajung za, ahkuí lhang, anti-hkrisduq myo myo gi, jé lé bekô nghut ri. Hau é yanmai, nga-nhung gi, ló htâng é ahkyíng nghut bê hkyô lé wó sé bê nghut ri. ¹⁹ Yhangmoq gi, nga-nhung é hpung mai htoq ló byuq bê bang nghut kôle, gè gè ga jang, nga-nhung eq a sêng é bang nghut akô. Hkâsu mù gâ le, nga-nhung eq sêng é nghut jáng, yhangmoq gi, nga-nhung eq nyi to rá nghut lhê, nghut kôlhang, yhangmoq htoq ló byuq bekô nghut é yanmai, yhangmoq rayuq lhang nga-nhung eq a sêng é hkyô lé tún shit bê nghut ri.

²⁰ Nghut kôlhang, nungmoq gi, haù Chyoiyúng Sú mai xù but byí é hui† bekô nghut mù lui, nungmoq banshoq bang haù tengmán hkyô lé sé akô nghut ri. ²¹ Haù tengmán hkyô lé nungmoq a sé kôluí, nungmoq lé ngò kâ kat é a nghut; haù hkyô lé nungmoq sé gù nghut lui le, haù mhaù é hkyô gi, tengmán hkyô mai lo é a nghut é lé nungmoq sé gù nghut lui le, nungmoq lé ngò kâ kat é nghut lhê. ²² Mhaù é sú gi, ó yuq nghut lhê lhu? Haù Yesuq gi, Hkrisduq a nghut ga he pyâm é sú nghut ri. Haù Íwa eq Yhangzo lé he-ngik é sú gi, anti-hkrisduq

yhang nghut nyi ri. ²³ Haù Yhangzo lé he-ngik sú ó yuq nghut kôle, haù Íwa lé sé sú a nghut. Haù Yhangzo lé hap yu é sú kúm gi, haù Íwa lé le sé bê sú nghut lhê.

²⁴ Haù sâng-hi mai nungmoq wó gyô wú bê é hkyô pé lé, nungmoq i-myt má ru bo nyi keq. Haù nghut jáng, nungmoq gi, haù Yhangzo eq Íwa chyáng nyi nyi rá nghut lhê. ²⁵ Haù gi, nga-nhung lé Yhang byí tô é ahtum abyuq é asak wó yú rá gâ é danggidiq nghut ri.

²⁶ Ngò gi, nungmoq lé hkyô shuí nghoq shikut nyi bâng é hkyô eq séng lui, nungmoq lé shí gú kâ kat é nghut lhê. ²⁷ Nungmoq chyáng kúm gi, Yhâng chyáng mai xù but jeju lé nungmoq wó yú bekô nghut mù lui, mhoqshit rá góyuq a ra lo nghut ri. Nghut kôlhang, haù Yhâng é xù but jeju gi, hkyô hkangmó má nungmoq lé mhoqshit byi mù, haù gi, tengmán nyi é nghut lui, mhaù é hkyô haì le a bo é za, nungmoq lé mhoqshit byi nyi é eq rajung za, Yhâng chyáng nungmoq nyi nyi keq.

²⁸ Chyitdap é zo wui ê, nga-nhung gi, Yhang jé lé mù htoq shit é hkûn, Yhâng é hí má a gyuq a kyum é, hoq a hpu é, wó dut rá matú Yhâng chyáng ru nyi nyi keq.

²⁹ Yhang gi, dingmán sú nghut é lé, nungmoq sé bê yanmai, dingmán hkyô lé kut é sú ó yuq nghut kôle, Garai Gasang mai hkû kat é sú nghut é hkyô lé, nungmoq sé akô nghut ri.

3

Garai Gasâng É Yhangzô Pé

¹ Nga-nhung gi, haù Garai Gasâng é yhangzô pé ga wut rá hui bê nghut é yanmai, haù Íwa é chyitdap myit gi, nga-nhung ahtoq má hkâ-í yhang ko nyi ri myhi-nhung! Nga-nhung gi, yhangzô pé yhang nghut bu-nhung! Mingkan gi, Yhang lé a sé é yanmai, nga-nhung lé le a sé nghut ri. ² Chyitdap é luzúm wui ê, ahkuí, nga-nhung gi, Garai Gasâng é yhangzô pé nghut nyi to kôlhang, nga-nhung hkâsu dut rá hkyô lé, a tún shit shi nghut ri. Nghut kôlhang, Hkrisduq htoq shit é hkûn, nga-nhung gi, Yhang su dut rá nghut é hkyô lé, nga-nhung sé lhê; hkâsu mù gâ le, Yhang hkâsu nghut é hkyô lé roq yhang, nga-nhung myang rá nghut lhê. ³ Myit myoqbyù hkyô shí lé, Yhâng chyáng má wó tô é bang ó yuq nghut kôle, Yhang sân-yúng é eq rajung za, yhumsing gùng lé lhoq san lhoq yúng nyi ri.

⁴ Mara kut é sú ó yuq nghut kôle, tarâ lu lai é sú nghut ri; gè gè ga jang, mara gi, tarâ lu lai é hkyô nghut nyi ri. ⁵ Nghut kôlhang, Yhang gi, nga-nhung é yubak mara

* **2:18** Anti-hkrisduq nghù é lichyùm gi, Hkrisduq lé gyè kut é sú lé gâ lhê † **2:20** Xù but byí é hui gâ é lichyùm gi, Hkrisduq chyáng mai, Chyoiyúng Woi-nyi lé myang hap yu é lé gâ lhê.

lé hkyot pyám byi rá matú, pô htoq bê hkyô lé nungmoq sé akô; Yhâng chyáng mara a bò nghut ri. ⁶ Yhang má dui nyi é sù ó yuq nghut kôle, mara a xoq kut nyi nghut ri; mara xoq kut nyi sù ó yuq nghut kôle, Yhang lé a myàng, a sé shi nghut ri.

⁷ Chyitdap é zo wui ê, nungmoq lé ó yuq eq le hkyô a shui nghoq kô sháng gaq; Yhang gi, dǐngmán é eq rajung za, dǐngmán é hkyô lé kut é sù ó yuq nghut kôle, dǐngmán nyi ri. ⁸ Mara kut nyi é sù gi, nat Tsadán chyáng mã é nghut nyi ri; hkâsu mù gà le, Tsadán haù gi, sâng-hi mai yhang mara kut nyi bê nghut ri. Haù Garai Gasâng é Yhangzo gi, Tsadán é muzó lé lhoq hpyoq lhoq hten rá matú pô htoq le é nghut lhê. ⁹ Garai Gasâng chyáng mai hku kat é sù ó yuq nghut kôle, Yhâng é amyui bo to é nghut é yanmai, mara a xoq kut lo nghut ri; haù yuq gi, Garai Gasang chyáng mai hku kat é hui bê nghut é yanmai, mara wó xoq kut lo rá a nghut. ¹⁰ Ó yuq nghut kôle, dǐngmán é hkyô a kut é eq, yhâng gumang lé a chyitdap é sù gi, Garai Gasâng yhangzo a nghut. Haù é yanmai, ó pé gi, Garai Gasâng é yhangzô pé nghut é, ó pé gi, nat Tsadán é yhangzô pé nghut é hkyô lé, san za nga-nhúng wó sé yu ri.

Rayuq Eq Rayuq Chyitdap Lhum Râ Hkyô

¹¹ Nga-nhúng rayuq eq rayuq chyitdap lhum rá lhê gà é hkyô haù gi, sâng-hi mai nungmoq wó gyô yù bê danglú nghut ri. ¹² Haù agê ashop sù eq le sêng é, yhanggu lé sat pyám é Ka-in su a ge kut. Yhang gi, haù mù luí yhanggu lé sat pyám lhê lú ga le, yhâng é muzó pé gi, agê ashop hkyô, yhanggu é muzó pé gi, dǐngmán é hkyô nghut é yanmai nghut ri. ¹³ Ngá é gumang wui ê, nungmoq lé mǐngkân eq a ngui a jú kut kôlhang, hkâmau kô. ¹⁴ Nga-nhúng gi, nga-nhúng é gumang wui lé chyitdap é yanmai, shi byuq é mai wó lut luí asak dui é hkyô lé, wó sé é nghut lhê. Chyitdap myit a bò sù gi, shi é hkyô má lúng tó ashí nghut ri. ¹⁵ Yhâng é gumang lé a ngui a jú é sù gi, byu sat sù dut rá nghut lhê; byu sat sù ó yuq chyáng nghut kôle, ahtum abyuq é asak a bo é hkyô lé, nungmoq sé nyi akô.

¹⁶ Yesuq Hkrisduq gi, nga-nhúng é matú Yhâng é asak byi pyám bê lé wú jáng, chyitdap myit hkasú é nghut é hkyô lé, nga-nhúng wó sé ri. Nga-nhúng le, gumang wui é matú, nga-nhúng é asak lé byi pyám gǐng ri.

¹⁷ Ó yuq nghut kôlhang, mǐngkân sutzè wó to luí, yhâng gumang hpó asho awui dut nyi é lé myàng kôlhang, a shogyô yu é nghut jáng, haù Garai Gasâng é chyitdap myit gi, yhâng chyáng hkâsu wó bò rá lúh? ¹⁸ Chyitdap é zo wui ê, nga-nhúng gi, dang nhut shò mai za a nghut, muzó eq tengmán é dǐng

le chyitdap nyi sháng. ¹⁹ Haù hkùn, nga-nhúng gi, tengmán hkyô eq sêng bê bang nghut é lé wó sé é eq, nga-nhúng é i-myt mai nga-nhúng lé mara hun lò hkangmó, Garai Gasâng é hí má nga-nhúng i-myt wó ngón nyi bê nghut ri. ²⁰ Hkâsu mù gà le, Garai Gasang gi, nga-nhúng myit é htoq má je kô é sù nghut mù, jung hkangmó lé sé nyi ri.

²¹ Chyitdap é luzúm wui ê, nga-nhúng é i-myt mai nga-nhúng lé mara a hun é nghut le gi, Garai Gasâng hí má nga-nhúng gyuq kyúm rá hkyô a joq lo nghut ri. ²² Nga-nhúng gi, Yhang hkyô tó é hkunmó pé lé châng kut é eq Yhang lé gabú nhang é hkyô haù lé le kut é yanmai, nga-nhúng dǐng é hkyô lhunglhang lé, Yhâng chyáng mai wó yù rá nghut lhê. ²³ Yhang hkunmó hkyô tó é eq rajung za, Yhâng zo Yesuq Hkrisduq é mying má lumjǐng é eq, rayuq eq rayuq chyitdap lhum é hkyô gi, Yhang hkyô tó é hkunmó yhang nghut bê. ²⁴ Yhang hkyô tó é hkunmó pé lé, châng kut é bang gi, Yhang má dui nyi bê nghut mù, Yhang le haù bâng chyáng dui nyi bê nghut ri. Yhang nga-nhúng chyáng dui nyi bê hkyô lé, nga-nhúng lé Yhang byi tó é Woi-nyí dǐng nga-nhúng wó sé yu é nghut lhê.

4

Woi-nyí Pé Lé Gôn Wú Râ Hkyô

¹ Chyitdap é luzúm wui ê, woi-nyí hkangmó lé hkâlumjǐng ko, woi-nyí haù pé gi, Garai Gasâng chyáng mã é nghut é, a nghut e lé gôn wú keq; hkâsu mù gà le, myiqhtoi pyoq pé myo myo gi, mǐngkân htoq má jón wún beko nghut ri. ² Garai Gasâng é Woi-nyí lé nungmoq wó sé yù rá hkyô gi, shí dǐng nghut lhê; haù Yesuq Hkrisduq gi, gungsho dǐng jé lé bê ga, yín yu é woi-nyí hkangmó gi, Garai Gasâng chyáng mã é nghut lhê. ³ Nghut kôlhang, Yesuq Hkrisduq lé a yín yu é woi-nyí hkangmó gi, Garai Gasâng chyáng mã é a nghut. Woi-nyí haù gi, lé lo nyi ri ga nungmoq wó gyô wú bê; ahkuí lhang mǐngkân htoq má nyi to gù nghut é anti-hkrisduq é woi-nyí nghut ri.

⁴ Chyitdap é zo wui ê, nungmoq gi, Garai Gasâng chyáng mã é nghut mù luí, yhangmoq lé ung pyám beko nghut ri. Hkâsu mù gà le, nungmoq má lúng to Sù gi, mǐngkân má nyi to su htoq je kô ri. ⁵ Yhangmoq gi, mǐngkân eq sêng é bang nghut lhê mù luí, mǐngkân hkyam dǐng tai bum akô; mǐngkân zo wui le yhangmoq é dang lé gyo byi akô nghut ri. ⁶ Nga-nhúng gi, Garai Gasang eq sêng é bang nghut lhê; Garai Gasang lé sé é sù ó yuq nghut kôle, nga-nhúng é dang lé gyô ri; nghut kôlhang, Garai Gasang eq a sêng é sù gi, ngamoq é dang lé a gyo nghut ri. Shí hkyô lé wú jáng, tengmán hkyô é Woi-nyí eq

hkyô shuí ngoq é woi-nyí lé, nga-nhúng sé gam hkoq yú bê nghut ri.

Garai Gasang Gi, Chyitdap Myit

⁷ Chyitdap é luzúm wuí ê, nga-nhúng gi, rayuq eq rayuq chyitdap lhùm nyí sháng; hkâsu mù gâ le, chyitdap myit gi, Garai Gasang chyáng má é nghut ri. Chyitdap myit bò sù ó yuq nghut kôle, Garai Gasang chyáng mai hku kat é hui bê sù nghut lui, Garai Gasang lé sé sù nghut ri. ⁸ Chyitdap myit a bo é sù ó yuq nghut kôle, Garai Gasang lé a sé sù nghut ri; hkâsu mù gâ le, Garai Gasang gi, chyitdap myit nghut lhê. ⁹ Garai Gasang gi, Yhang Zô é yanmai nga-nhúng asak wó dú sháng gaq ga, Yhang Zo zote lé mingkan htoq má nhang kat byi bê nghut ri. Haù gi, Garai Gasang mai nga-nhúng lé, Yhâng é chyitdap myit tûn shit é hkyô nghut ri. ¹⁰ Nga-nhúng gi, Garai Gasang lé chyitdap é a nghut, Garai Gasang sheq nga-nhúng lé chyitdap lui, nga-nhúng é yubak marâ é matú, shíhtai gunglik hkungga dut sháng gaq ga, Yhang Zo lé nhang kat byi é nghut ri; haù gi, chyitdap myit yhang nghut bê. ¹¹ Chyitdap é luzúm wuí ê, Garai Gasang gi, nga-nhúng lé haù-í yhang chyitdap é nghut jáng, nga-nhúng le rayuq eq rayuq chyitdap lhùm rá dut lhê. ¹² Garai Gasang lé ó yuq èq le, hkâ-nhám lháng myang wú é a nghut; nghut kôlháng, nga-nhúng rayuq eq rayuq chyitdap lhùm nyi é nghut jáng, Garai Gasang gi, nga-nhúng má nyi nyi bê nghut lui, Yhâng é chyitdap myit gi, nga-nhúng má gumjup rá nghut lhê.

¹³ Garai Gasang gi, nga-nhúng lé, Yhâng é Woi-nyí byí to bê nghut é yanmai, Yhâng chyáng nga-nhúng dui nyi bê hkyô lé le, Yhang nga-nhúng má nyi nyi bê hkyô lé le, nga-nhúng sé bê nghut ri. ¹⁴ Haù Iwa gi, Yhang Zo lé mingkan é hkyi yú Sú dut sháng gaq ga nhang kat é hkyô lé, ngamoq myàng lui, saksé hkâm lhê. ¹⁵ Ó yuq nghut kôlháng, Yesuq gi, Garai Gasang é Yhangzo nghut ri ga yin yu é nghut le gi, yhang má Garai Gasang nyi nyi bê nghut lui, yhang le Garai Gasang chyáng dui nyi bê nghut ri. ¹⁶ Nga-nhúng gi, Garai Gasang eq nga-nhúng lé chyitdap é hkyô lé, sé lui lumjîng nyi lhê; Garai Gasang gi, chyitdap myit nghut lhê; chyitdap myit má nyi nyi é sù ó yuq nghut kôle, Garai Gasang chyáng dui nyi bê nghut lui, Garai Gasang le haù yuq má nyi nyi bê nghut ri. ¹⁷ Haù đông mai, chyitdap myit gi, nga-nhúng chyáng gumjup bê nghut lui, nga-nhúng gi, tarâ jéyáng é buinyi má a gyuq a kyum é myit wó yú rá nghut lhê; hkâsu mù gâ le, nga-nhúng gi, mingkan shí má Yhang su dut nyi bê nghut ri. ¹⁸ Chyitdap myit má gyuq é hkyô a bò nghut ri; gyuq é hkyô gi,

mara dam byí é hkyô eq sêng é nghut mù lui, gumjup é chyitdap myit gi, gyuq é hkyô lé hkat htoq pyâm ri. Haù gyuq é myit bò sù gi, chyitdap myit má gumjup sù a nghut.

¹⁹ Yhang hí nga-nhúng lé chyitdap bê nghut é yanmai, nga-nhúng le chyitdap nyi lhê. ²⁰ Byù rayuq yuq gi, "Ngò, Garai Gasang lé chyitdap lhê." ga tái kôlháng, yhâng é gumang lé a jú é nghut jáng, haù yuq gi, byù mhaù rayuq nghut ri; hkâsu mù gâ le, yhumsîng byu-myang é gumang lé lháng a chyitdap é sù gi, a byu-myang é Garai Gasang lé wó chyitdap rá a nghut. ²¹ Garai Gasang lé chyitdap é sù ó yuq le, yhumsîng gumang lé le chyitdap rá lhê gâ é dang haù gi, nga-nhúng é matú, Yhang mai hkyô tô é hkunmó nghut lhê.

5

Garai Gasang É Yhangzo Lé Lumjîng Hkyô

¹ Yesuq gi, haù Hkrisduq nghut ri ga lumjîng é sù ó yuq nghut kôle, Garai Gasang chyáng mai hku kat bê sù nghut ri; Iwa lé chyitdap é sù ó yuq nghut kôle, yhang zo lé le chyitdap é nghut bê. ² Garai Gasang lé chyitdap nyi mù, Yhang hkyô tô é hkunmó pé lé châng kut nyi é nghut le gi, Garai Gasang é yhangzô pé lé le, chyitdap nyi é hkyô lé, nga-nhúng wó sê yu é yanmai, ³ Garai Gasang hkyô tô é hkunmó pé lé châng kut é gi, Yhang lé chyitdap é hkyô nghut ri. Yhang hkyô tô é hkunmó pé gi, wôlai mó a nghut. ⁴ Hkâsu mù gâ le, Garai Gasang chyáng mai hku kat bê sù ó yuq nghut kôle, mingkan lé ung pyâm bê nghut ri. Nga-nhúng é lumjîng myit gi, mingkan lé nga-nhúng ung pyâm é ong dang hkyô nghut ri. ⁵ Yesuq gi, Garai Gasang é Yhangzo nghut é lé lumjîng é sù mai lai lui, mingkan lé wó ung pyâm é sù gi, ó yuq wá nghut lhê lhú?

⁶ Haù yuq gi, wui eq sui* mai lé é sù, Yesuq Hkrisduq yhang nghut nyi ri. Yhang gi, wui mai za lé é a nghut, wui mai le, sui mai le, lé é sù nghut lhê. Woi-nyí gi, tengmán hkyô nghut é yanmai, shí hkyô lé saksé hkâm byí ri. ⁷ Hkâsu mù gâ le, Woi-nyí le, wui le, sui le, haù sùm lhùm é saksé hkâm akò nghut ri; ⁸ haù sùm lhùm gi, rajung za nghut akò. ⁹ Nga-nhúng gi, byu é saksé lé lhòm yu lhê; nghut kôlháng, Garai Gasang é saksé gi, haù htoq je kô nyi ri. Hkâsu mù gâ le, Garai Gasang gi, Yhang Zo eq sêng é hkyô lé saksé byí é yanmai nghut ri. ¹⁰ Garai Gasang é Yhangzo lé lumjîng é sù gi, saksé haù lé yhâng é i-myit má wó bê nghut ri; Garai Gasang lé a lumjîng é sù kúm gi, Yhang lé byù mhaù rayuq ga chyô pyâm bê nghut ri; hkâsu mù gâ le, Garai Gasang mai Yhang

* 5:6 Wui eq sui nghu é gi, Yesuq baptisma hkam yu é hkyô eq shí hkâm é hkyô lé tái nau é nghut ri.

Zo eq sêng é hkyô saksé hkâm é lé, yhang a lumjǐng é yanmai nghut ri. ¹¹ Nga-nhúng lé, Garai Gasang byi é ahtum abyuq é asak gi, saksé haù nghut nyi ri. Asak haù gi, Yhang Zô chyáng bo ri. ¹² Garai Gasâng é Yhangzo lé wó sù gi, asak haù lé wó bê; Yhang Zo lé a wó sù gi, asak haù lé le a wó nghut ri.

Ahtum Abyuq Asak

¹³ Garai Gasang é Yhangzô é mying lé lumjǐng é bang nungmoq gi, ahtum abyuq é asak wó bê hkyô lé, nungmoq sé kó sháng gaq nghù, shí hkyô pé lé ngò ká byi kat é nghut lhê. ¹⁴ Nga-nhúng hai dúng le le, Garai Gasang ô nau é dông nghut jǎng gi, Yhang gyo byi rà nghut lhê; haù gi, Yhâng é hí má nga-nhúng a gyuq a kyum wó wâng rà matú nghut ri. ¹⁵ Haù mù, nga-nhúng hai dung kólhang, Yhang gyo byi é lé nga-nhúng sê é nghut le gi, Yhâng chyáng nga-nhúng dúng é hkyô lé, nga-nhúng wó yu é lé, nga-nhúng sê lhê.

¹⁶ Ó yuq nghut kôle, yhumsing é gumang hpó mai shí a gǐng é mara kut shut é lé, myang é nghut le gi, haù yuq é matú kyúdung byi rà lhê. Haù hkún, Garai Gasang gi, haù yuq lé asak byi rà nghut lhê. Haù gi, shí a gǐng é mara wó bǎng é matú tai é nghut lhê. Shí gǐng é mara le joq lhê; nghut kólhang, hau é matú dung rà lhê nghù, ngò tai nyi é a nghut. ¹⁷ A dingmán é hkyô lhunglǎng gi, mara nghut lhê; nghut kólhang, shí a gǐng é mara le joq lhê.

¹⁸ Garai Gasâng chyáng mai hku kat bê sù ó yuq nghut kôle, mara a xoq kut lô é hkyô lé nga-nhúng sê lhê; hkâsu mù gà le, haù Garai Gasâng é Yhangzo gi, haù yuq lé wú zúng nyi é nghut mù luí, haù agè ashop sù gi, haù yuq lé wó zǎng htung rà a nghut. ¹⁹ Nga-nhúng gi, Garai Gasâng é yhangzô pé nghut é lé le, mingkan gón lé haù agè ashop su èq up tó é hkyô lé le, sê lhê. ²⁰ Hau htoq agó, Garai Gasâng é Yhangzo jé lé luí, haù tengmán Sù lé sé sháng gaq ga, nga-nhúng lé sé gyô é nyan byi bê hkyô lé le, nga-nhúng sê lhê. Nga-nhúng gi, Yhang Zo Yesuq Hkrisduq má nghut nyi bê eq rajung za, haù tengmán Sù má le nyi nyi bê nghut lhê. Yhang gi, haù tengmán é Garai Gasang eq ahtum abyuq é asak nghut nyi lhê.

²¹ Chyitdap é zo wui ê, hparà ló pé lé koi pyâm nyi keq.

YOHAN Htang Dàm Hun Kat é Laiká (2 John)

eq myoqdong hkyûm kut nyo lhum râ lé myit myoqbyu nyi lhê.

¹³ Hkyin yù huí é náng nhâ é yhangzô pé gi, nang lé shi-kyâm kat akò nghut ri.

¹ Ngò suwún hpó gi, tengmán hkyô má ngò chyitdap é, hkyin yù huí é náng hpô-myhí eq nung zô pé lé, dang kyô kat lhê; ngò baú za a nghut, haú nga-nhúng chyáng lúng to luí, ² nga-nhúng eq ahtum abyuq ru joq nyí râ nghut é tengmán hkyô é yanmai, haú tengmán hkyô lé sê é lhunglhâng bang le, nungmoq lé chyitdap nyi lhê.

³ Haú Íwa Garai Gasang eq Íwâ é Yhangzo Yesuq Hkrisduq chyáng mã é jeju, shogyo nhikmyin hkyô eq nguingón hkyô gi, haú tengmán hkyô eq chyitdap hkyô mã, nga-nhúng eq rahá joq nyí sháng gaq.

⁴ Haú Íwa mai nga-nhúng lé hkunmó hkyô tô é eq rajung za, nung zô pé ra-am gi, haú tengmán hkyô mã châng nyi é hkyô lé, ngò wó sê é yanmai, gyai yhang gabú nyi lhê. ⁵ Chyitdap é hpô-myhí é, nga-nhúng rayuq eq rayuq chyitdap lhum sháng nghú, ahkuí, ngò, nang lé dúng kat lhê; shí gi, sâng-hi mai nga-nhúng wó gyô yù bê hkunmó lé sheq, nang lé ngò ká byí kat é nghut lhê; hkunmó sik ralhú a nghut. ⁶ Yhang hkyô tô é hkunmó eq rajung za, nga-nhúng châng kut é nghut jáng gi, chyitdap é hkyô nghut bê. Sâng-hi mai nungmoq wó gyô yù bê eq rajung za, Yhang hkyô tô é hkunmó gi, nungmoq chyitdap myit bo nyi râ matú nghut lhê.

⁷ Hkâsu mù gâ le, Yesuq Hkrisduq gi, gungsho dông jé lé é hkyô lé a yín yu é, mhaú zô é byù myo myo gi, mingkan htoq má jón wún bekò nghut ri; haú sù é byù gi, haú mhaú zo sù eq anti-hkrisduq dut râ nghut lhê.

⁸ Nungmoq zui sai bê muzó é akyú lé a lhoq hpyuq é za, gumjup é shigyaú chyunghuq lé, nungmoq wó hkam yù kó sháng gaq, yhumsing gùng sidiq nyi keq. ⁹ Hkrisduq mhoqshit é dang lé a châng é za, laí chyan é sù ó yuq nghut kòle, Garai Gasang lé a wó é sù nghut ri; haú mhoqshit é dang lé ru châng nyi é sù kúm gi, haú Íwa lé le, Yhangzo lé le, wó bê sù nghut ri. ¹⁰ Mhoqshit é dang haú lé a wun é byù rayuq yuq, nungmoq chyáng jé lé é nghut le gi, haú yuq lé nungmoq é yhúmhaú má hkâwâng nhâng kó; yhang lé hkálhom xoq yù kó. ¹¹ Hkâsu mù gâ le, haú yuq lé lhom xoq yu é sù gi, yhâng é agè ashop é muzó má lòm bê sù nghut ri.

¹² Ngò gi, nungmoq lé ká byí kat râ hkyô myo myo joq kôlhâng, laiká hkyap eq kajung-chi lé a kâm chùng naù. Nga-nhúng é gabú hkyô wó gumjup sháng gaq, ngò, nungmoq chyáng tsuq za lé jé mù, nungmoq

YOHAN
Súm Dam Dàm Hun Kat é
Laiká
(3 John)

¹ Ngò suwún hpó gi, haù tengmán hkyô má ngò chyitdap é, ngá é chyitdap luzúm Ge-u lé dang kyô kat lhê.

² Chyitdap é luzúm hpó ê, ngò gi, haù náng é asak woi-nyí nyí-ngón yuqyo nyi é eq rajung za, nàng nguingón wángzán rà eq hkyô hkat hkangmó má, nyi-ngón yuqyo nyi sháng gaq nghú, kyúdung byí kat lhê. ³ Hkásu mù gá le, ngò gi, gumang wui ra-am, ngá chyáng lé jé mù, haù tengmán hkyô má nàng lhumzui é hkyô lé le, haù tengmán hkyô má nàng hkásu kut xoq châng nyi é hkyô lé le, lé tai kyo kó é hkún, gyai yhang gabú é yanmai nghut lhê. ⁴ Haù tengmán hkyô má, ngá zò pé châng nyi é hkyô lé, ngò wó gyó é hkún gabú é í, gotú gabú hkyô a wó lo nghut ri.

⁵ Chyitdap é luzúm hpó ê, haù gumang wui gi, mau we bíng pé nghut to kôlhang, nàng yhangmoq lé lhom garúm yu é hkyô má, nàng gi, lhumzui nyi ri. ⁶ Yhangmoq gi, haù noqkuq hpúng má é bang lé, náng é chyitdap myit eq séng lui tai kyo bekô nghut ri. Nàng gi, Garai Gasâng hí má gingdán é dông, yhangmoq é hkyowui matú garúm lui, dé kat é nghut jáng, ge é muzó jizó kut é nghut bê. ⁷ Hkásu mù gá le, yhangmoq gi, Hkrisduq é mying hau é matú htoq ló kólui, a lumjing bâng chyáng mai hai háng a hap yù kó nghut ri. ⁸ Haù mù lui, nga-nhúng gi, haù tengmán hkyô é matú rahá za wó chôm zui sai sháng gaq, haù sù é byu pé lé lhom hkúlum yù rá lhê.

⁹ Ngò gi, haù noqkuq hpúng lé laiká ká byí kat bê nghut lhê; nghut kôlhang, haù ushuq kut nau é sù Diotrehpi gi, ngamoq lé a lhom hap yù nghut ri. ¹⁰ Haù mù lui, ngò lé jé jáng gi, ngamoq lé a jo a âng é dang tai é eq lumù gansang é, yhang kut é muzó lé, tai hpyí kyo rá nghut lhê; yhang gi, haù hkyô lé myit a dik shí é nghut mù lui, yhang yhang le gumang wui lé a lhom hkúlum yù, lhom hkúlum yù nà bang lé le, yhang mai hkúm zing pyám lui, yhangmoq lé haù noqkuq hpúng mai hkat htoq pyâm ri.

¹¹ Chyitdap é luzúm hpó ê, agè ashop hkyô lé alik a yu é za, ge é hkyô lé yù aq; ge é hkyô kut é sù gi, Garai Gasâng chyáng má é nghut bê; agè ashop é hkyô kut é sù gi, Garai Gasang lé a myàng shí é sù nghut ri.

¹² Demetri ge é hkyô lé, yuq hkangmó mai le, haù tengmán hkyô èq le, saksé hkám byí akó nghut ri; ngamoq le, yhang ge é hkyô lé saksé hkám byí lhê; haù ngamoq hkám é saksé gi, têng é hkyô nghut é lé, nàng sê lhê.

¹³ Ngò gi, nang lé ká kat ra hkyô myo myo joq kôlhang, kâjung eq kâjung-chi dông a ká kat nà lo. ¹⁴ Ngò gi, a myàng má, nàng eq myang huí lhum rá lé myit myoqbyu tô lhê. Haù hkún sheq, ngá-nhik myoqdong hkyúm myang nyo lhum rá nghut lhê.

¹⁵ Nàng nguingón yuqyo nyi sháng gaq; shí má é luzúm wui gi, nang lé shi-kyâm kat akó nghut ri. Nàng le, haù má é luzúm wui lé, mying du htau lui bo shi-kyâm byi laq.

YUDE Hun Kat é Laiká (Jude)

¹ Yesuq Hkrisduq é dui-nhâng zoshâng nghut sù eq Yakuq é yhanggu, ngò Yude gi, haù lwa Garai Gasâng eq ji yù mù, chyitdap é hui luí, Yesuq Hkrisduq eq upzúng é hui bâng chyáng dang kyô kat lhê.

² Shogyo nhikmyin hkyô, nguingón hkyô eq chyitdap hkyô gi, nungmoq chyáng agùn agó joq nyi sháng gaq ô!

Garai A Wó Bâng É Yubak Mara

³ Chyitdap é luzúm wuí ê, ngò gi, nga-nhúng chôm wó é hkyi yù hkyô haù eq séng luí, nungmoq lé gyai yhang kâ kat byi nau é nghut lhê wá, haù sân-yúng bang lé, radá dâm jâng ap byi to bê nghut é lumjing hkyo é matú nungmoq htuq htíng rá dut é lé, myit wum byi rá hkyô ká rá dut é lé, ngò byu-myang ri. ⁴ Hkâsu mù gâ le, haù mara dam byi é hui zo rá hkyô lé, a-nham pyat mai kâ matsing tô é hui bê bang ra-am gi, nungmoq chyáng hkaù wang lò bekô nghut ri. Yhangmoq gi, Garai a wó é bang nghut luí, haù nga-nhúng é Garai Gasâng jeju lé, mingkan ngón hkyo eq htai lhik pyám kô é htoq agó, Yhang za nga-nhúng é Yhumsing nghut sù eq Akho ahkáng lhunglháng wó sù, Yesuq Hkrisduq lé he-ngik pyám akò nghut ri.

⁵ Nungmoq kúm gi, shí pé banshoq lé sê to gù nghut kôlhang, ngò mai nungmoq lé tai pún nau é hkyô gi, a-ô mâ é pé nghut lhê: Haù gi, Yhumsing Garai mai, Yhâng é byu pé lé, Egutuq ming mai hkyi htoq yù kôlhang, a lumjing é bang lé gi, htang má dum lhoq htên pyám é nghut lhê. ⁶ Hau htoq agó, haù yhumsing é ayá lé tô pyám luí, yhumsing é nyi jowó lé pyám tô é maumâng pé lé, Yhang gi, haù tará jéyáng é hui rá Buinyi mó jé shoq, ahtum abyuq é toqjâng tui eq tui luí, mauchut hkaù má lhung tô é nghut lhê. ⁷ Haù eq rajung za, Sodom eq Gomoraq myuq eq hau é awui ayám má é wà pé má é bang gi, ashop é đông gungsho zùm yap é hkyô shut é eq myiwe yhangchang yuqgê yhangchang nyi zô lhùm é hkyô kut kô é nghut mù, yhangmoq gi, ahtum abyuq é myi má dam byi é hpuzo bâng é alik dut bekô nghut ri.

⁸ Haù eq rajung za yhang, yhupmoq moq é byù shí bang gi, yhumsing é gungsho lé agot a-ù kut kômù, ahkáng ayá wó sù lé he-ngik pyám kôluí, mauhkung bang lé lumú gansang akò nghut ri. ⁹ Nghut kôlhang, haù

maumang lagyo agyi Mihkaelaq lháng gi, Mosheq é gùng eq séng luí, haù nat zau eq dang rhâng lhùm é hkùn, yhang lé rhoi é đông mara hùn dang a wám tai é za, "Nang lé, haù Yhumsing nhik-yo sháng gaq!" ga za tai ri. ¹⁰ Nghut kôlhang, byù hau bang gi, yhangmoq a sê gyô é hkyô pé lé rhoi dang tai pyám akò nghut ri; yhangmoq gi, haù myit woi-nyí a bo é dusak pé su, yhumsing myit mai sê gyô é hkyô pé má lháng, yhumsing gùng lé lhoq htên yu akò nghut ri.

¹¹ Yhangmoq gi, dingnyé wó rá! Hkâsu mù gâ le, yhangmoq gi, Ka-in* kut é agê ashop é hkyô đông cháng kô é yanmai le, akyú wó rá matú, Balam† shut é đông bo shut kô é yanmai le, Kora‡ é gumlau toq hkyô kut kômù, yhang su htên byoq byuq é hui kô é yanmai le nghut ri.

¹² Yhangmoq gi, nungmoq é chyitdap zoshuq poi má nungmoq lé agot a-ù wó dut nhang é bang nghut mù, gyuq hoq a bo é za, nungmoq eq rahá chôm zoshuq kô é hkùn, yhumsing gùng lé za yhumsing lhoq gyi yu é sau zúng bang nghut akò; yhangmoq gi, lai eq mut tâng wún é, mau a bo é mhut pé su nghut é htoq agó, ashí a zui mù, amyit eq roq hpùn pyám luí, í dâm shi é, xung nám lhê é siggâm pé su nghut akò. ¹³ Yhangmoq gi, yhumsing é hoq jung lé, tsù-myup su htoq nhang é, haù wuimau má é kô é wuilhêng pé eq, tuq tuq chut é mauchut hkaù má tará jéyáng hui rá matú, ahtum abyuq tô to hui é, yông wún é kyí pé su nghut akò.

¹⁴ Byù hau bang eq séng luí, Adam mai byuxik nyhit xik má nyi é Enuq, myiqhtoi htoi tô é gi, "Wú keq, haù Yhumsing gi, Yhâng é chyoiyúng bang mun mun sen sen eq rahá gyó lé lo nyi bê nghut ri. ¹⁵ Yhang gyó lé lo é gi, yuq hkangmó lé tará jéyáng rá matú eq, haù tará a hkunggá é lhunglháng bang, tará a hkunggá é đông kut é muzó pé banshoq lé le, tará a hkunggá é yubak byu pé, Yhang lé tai shut é dang htên pé banshoq lé le, mara byi rá matú nghut lhê." gâ ri. ¹⁶ Byù hau bang gi, put dang tai é bang eq mara hùn dang tai é bang nghut akò; yhangmoq gi, yhumsing ô nau é agê ashop hkyô cháng kô é htoq agó, yhumsing gùng yhumsing nghutbùn é dang tai é eq yhumsing maiwáng zat é đông, góbang lé owaq é bang nghut akò.

Hkam Jân Râ Hkyô

¹⁷ Nghut kôlhang, ngò chyitdap é luzúm wuí ê, nungmoq gi, haù nga-nhúng é Yhumsing Yesuq Hkrisduq é lagyo pé mai te tai tô é dang lé, bün nyi keq. ¹⁸ Hkâsu mù gâ le, yhangmoq gi, "Haù ló htang é ahkying

* 1:11 Ka-in gi, yhanggu lé sat sù nghut lhê. Apún 4:1-8 † 1:11 Balam gi, myiqhtoi nghut lhê, nghut kôlhang, ngunzê lé myoqnoq mù, Garai lé shut sù nghut lhê. Gyung So 22:1-35 ‡ 1:11 Kora gi, Garai byù nghut é hkyô-u shê sù Mosheq lé gumlau toq é hkyangjong nghut lhê. Gyung So 16:1-33

† 1:11 Balam gi, myiqhtoi nghut lhê, nghut kôlhang, ngunzê ‡ 1:11 Kora gi, Garai byù nghut é hkyô-u shê sù Mosheq

pé má, tarâ a hkunggâ é yhumsing ô nau é hkyô đông châng é, rhoijap-dap dang tai é byu pé nyi to rá nghut lhê." ga, nungmoq lé tai wú kô é nghut lhê. ¹⁹ Byù haù bang gi, nungmoq lé gam hkoq é bang, mingkan hkyô lé baù za châng é bang, haù Woi-nyí a bo é bang nghut akó.

²⁰ Nghut kôlhang, ngò chyitdap é luzúm wui ê, nungmoq gi, haù Chyoiyúng Woi-nyí má kyúđung é đông, nungmoq é chyoyúng é lumjing hkyô má, yhumsing gùng yhumsing lhoq kô yu nyi keq. ²¹ Ahtum abyuq é asak lé wó yú rá matú, haù nga-nhùng é Yhumsing Yesuq Hkrisduq é shogyo nhikmyin hkyô lé lánq uchyang, nungmoq gi, Garai Gasâng é chyitdap myit má, yhumsing gùng yhumsing nyi nyi keq.

²² Lumjing hkyô má úng-âng é bang lé, shogyo nhikmyin nyi keq; ²³ góbang lé gi, myi mai she htoq yú mù, hkyi yù keq; dum, góbang lé gi, sidiq myit èq shogyo nhikmyin hkyô tún shit mù, haù gungshó é achag achyut dap é yhangmoq é mebu lé chaq nyi keq.

Hkya-on Kungtôn Dang

²⁴⁻²⁵ Nungmoq lé, a lingbat shoq wó upzúng luí, nungmoq lé, mara hùn rá hkyô a bo é za, gabú dik é đông mai Yhang é hpungwup shingkang bo é myoq hí má wó shuí shit é, nga-nhùng é hkyi yù Sù, rayuq za nghut é Garai Gasâng chyáng, hpungwup shingkang, hkikhkam hkyô, hpungwup a-tsam eq ahkáng ayá gi, nga-nhùng é Yhumsing Yesuq Hkrisduq đông mai, lai lò bê ipyat pé má le, ahkuí pyat má le, pyat dedu ahtum abyuq má le, rujoq nyi sháng gaq ô! Amen.

YOHAN É SHING-RÁN Laiká (Revelation)

Dang-hi Hpóng

¹ Yesuq Hkrisduq é shing-rán shí gi, adé myáng má dut lò rà hkyô pé lé, Yhâng é dui-nhâng zoshâng wui lé tún shit nhâng rà matú, Garai Gasâng eq Yesuq Hkrisduq Yhang lé byí tò é nghut lhê. Yhang gi, Yhâng é maumang lagyo lé nhang kat lui, Yhâng é dui-nhâng zoshâng Yohan lé, shing-rán haú sé nhang ri. ² Yohan gi, Garai Gasâng é mungdang eq Yesuq Hkrisduq é saksé lé, yhang myang é gú banshoq eq rajung za saksé hkâm kyô é nghut ri. ³ Haú ahkyíng gi, chyáng lò bê nghut é yanmai, myiqhtoi dang shí pé lé, nghap kyô é sù eq, gyô yù lui, haú má ká tò é gú lé châng kut é bang gi, hkungsô wó nyi akò.

Noqkuq Hpúng Nyhit Lhum Lé Dang Kyô Kat É Hkyô

⁴ Ngò Yohan gi, Asia mau mà é noqkuq hpúng nyhit lhum lé dang kyô kat lhê. Ahkui pyat le, a-nham pyat le, htang pyat má le rú nyi nyi é Su chyáng mai le, Yhâng é hkohkâm-tanghkuq hí mà é nyhit woi-nyi chyáng mai le, ⁵ lhumzuí é saksé nghut sù, shí byuq é mai sâng-hi dui toq é zomún dut sù, myidám htoq mà é hkohkam pé lé up sù, Yesuq Hkrisduq chyáng mai le, jeju eq nguingón hkyô gi, nungmoq chyáng joq nyi sháng gaq.

Nga-nhúng lé chytidap lui, Yhâng é suí eq, nga-nhúng lé, nga-nhúng é mara pé mai lhoq lhut byí é eq, ⁶ Yhâng é Garai Gasang eq Íwa lé dojaú rà matú, nga-nhúng lé, mingdán byu pé eq hkyangjông pé* dut nhang é Su chyáng, duqwup shinggang eq hpungwup a-tsam gi, pyat dedu ahtum abyuq ru joq nyi sháng gaq ô! Amen.

⁷ Wú keq, Yhang gi, mhut mai lé lo nyi é nghut lui, myoqjí hkangmó gi, Yhang lé myàng kó rà nghut lhê;

haú Yhang lé htaú rot bang† lháng, myàng kó rà nghut lhê;

haú myidám htoq mà é byù lhunglhang bang gi, Yhâng é yanmai, yón ngau é hui zo kó rà nghut lhê.

Haú dòng nghut sháng gaq! Amen.

⁸ "Ngò gi, Alpha eq Omega‡ nghut lhê. Ahkui pyat le, a-nham pyat le, htang pyat má le rú nyi nyi é, wum-o a-tsam dik shoq

bò Sù nghut lhê." ga, haú Yhumsing Garai Gasang tai ri.

Byu Yhangzo Su Dut Su É Hkyô

⁹ Yesuq é, wuihke jamjau hkyô má le, mingdán má le, jân shirang é hkyô má le, nungmoq é byinzùm nghut sù, ngò nungmoq é gumang hpó, Yohan gi, Garai Gasâng é mungdang eq Yesuq é saksé é yanmai, Patmo zinlóng má nyi nyi é nghut lhê. ¹⁰ Haú Yhumsing é Buinyi§ má, ngò gi, Woi-nyi eq shuí moq byuq lò é nghut mù, "Nàng myang é eq rajung za, chyúmding ralhüm má ká lui, Ehpesu, Samurna, Pergamu, Htuatira, Sardi, Hpiladehpi eq Ladoki wà pé má joq é, ¹¹ noqkuq hpúng nyhit lhum chyáng hun kat aq," ga, tut htê su gâ é htê mó, ngá é nunghtáng má mying é lé, ngò wó gyô ri.

¹² Haú ngo lé nyo nyi é htê yhumsing lé wú rà matú, ngò, gùng lhing kat é nghut lhê. Ngò gi, gùng lhing kat é hkùn, hìng myi-kok tsungjang nyhit lhum lé le, ¹³ myi-kok tsungjang haú pé é agùng má, byu yhangzo su dut é Sù rayuq nyi tò é lé le, myang kat ri; haú yuq gi, hkyigoq htoq jé é buhìng wut to lui, wànggàng má hìng wànggò le wut tò ri. ¹⁴ Yhâng é ulhum eq xám gi, sau hpyú mau eq gyo su hpyu zan tò ri; Yhâng é myoqjí gi, myishâm su duq nyi ri. ¹⁵ Yhâng é hkyí gi, myi bungghkyúng má jên yu é jet é gyi su dut ri; Yhâng é htê gi, wui myo myo mying hüm é htê su gâ ri. ¹⁶ Yhâng é loqyo loq má gi, kyí nyhit cham chung tò ri; Yhâng é nhut mai gi, shamsó í shut dap é shâm htoq lo ri. Yhâng é myoqdong gi, htan dik é nyi gùng bui su tso nyi ri.

¹⁷ Yhang lé myang é hkùn, ngò gi, shí gùng su, Yhâng é hkyí wang má lèng leq tò é nghut lhê. Haú hkùn, Yhang gi, Yhâng é loqyo loq ngá ahtoq má ke byi mù, tai é gi, "Hkâgyuq, Ngò gi, Sâng-hi eq Jihtùm nghut lhê. ¹⁸ Ngò gi, dui nyi Sù le nghut lhê; Ngò gi, shí bê nghut kôle, wú keq, pyat dedu ahtum abyuq dui nyi é nghut lhê! Hau htoq agó, Ngò gi, shí hkyô eq momìng é zoqshi pé lé chùng Su nghut lhê.

¹⁹ Haú mù, nàng myang é lé le, ahkui dut é hkyô eq htàngnùng le dut lò rà hkyô lé le, ká to aq. ²⁰ Nàng myang é, Ngá é loqyo loq mà é kyí nyhit cham eq hìng myi-kok tsungjang nyhit lhum é záu tò é hkyo é lichyúm gi, isu nghut lhê. Kyí nyhit cham gi, noqkuq hpúng nyhit lhum é maumang lagyo nyhit yuq nghut ri; myi-kok tsungjang nyhit lhum gi, noqkuq hpúng nyhit lhum nghut ri.

* 1:6 Htoq Lô 19:6 † 1:7 Htaú rot bang gâ é gi, Yesuq tapzing má jén to hui é hkùn, Yhâng é namcham má lham eq htaú é bang lé gâ lhê. ‡ 1:8 Alpha eq Omega gi, Grik laiká myí mà é sâng-hi cham eq lò htàng cham nghut lhê; haú tai nau é gi, rú dui nyi sù gâ é nghut lhê. § 1:10 Yhumsing é Buinyi gâ é gi, yuban nyi lé gâ lhê.

2

Ehpesu Myuq Mã É Noqkuq Hpúng Lé Kâ Kat É Laiká

¹ Ehpesu myuq mã é noqkuq hpúng é maumang lagyo lé isu nghú kâ kat aq:

Haù yhang é loqyo loq mã kyí nyhit cham chùng luí, húng myi-kok tsungjang nyhit lhum é gyoro mã sô nyí Su é dang gi, ² Ngò gi, nang é a-kyang, nang shikut é hkyô, nang hkam jân é hkyô pé lé, sê lhê. Agè ashop é byu pé lé, nang a jân pyám é hkyô lé le, haù lagyo a nghut kôlháng, lagyo pé nghut lhê gâ é bang lé, nang chyam wú mù, yhangmoq lagyo apyoq pé nghut é lé wó sê yù kô é hkyô lé le, Ngò sê lhê. ³ Nang gi, shikut shirâng bê nghut é htoq agó, Ngá mying é yanmai, wuìhke hkyô lé hkam jân bê nghut kôle, ngú byuq é hkyô a bò nghut ri.

⁴ Nghut kôlháng, nang gi, nang é sâng-hi lhê é chyitdap myit lé tó pyám é yanmai, ngò, nang lé mara hún rá hkyô joq ri. ⁵ Nang hká mai byit gyó é lé, myit bun aq! Myit lhung luí, sâng-hi nang kut é muzó pé lé, kut aq. Nang myit a lhung é nghut jáng, ngò, nang chyáng lé jé mù, nang é myi-kok tsungjang lé, hau é jowò mai huí pyám byi rá nghut lhê. ⁶ Nghut kôlháng, Ngò a jú é, Nikola é chángzô pé kut é hkyô lé, nang le a jú kut é yanmai, nang chyáng ge é hkyô ralhum bo ashí nghut ri.

⁷ Gyo rá nohkyap dap sù gi, haù Woi-nyí mai noqkuq hpúng pé lé tai é hkyô lé, gyô yù sháng gaq. Wó ung é sù lé gi, haù Garai Gasâng é hparadisú mã joq é asak siggâm mã é ashi zo rá ahkáng, Ngò byi rá nghut lhê! gâ ri.

Samurna Myuq Mã É Noqkuq Hpúng Lé Kâ Kat É Laiká

⁸ Samurna myuq mã é noqkuq hpúng é maumang lagyo lé isu nghú kâ kat aq:

Haù Sâng-hi eq Jihútum nghut é eq, shi byuq luí, asak dum dui Su é dang gi, ⁹ Nang hui zô é wuìhke jamjau hkyô eq nang myung é hkyô lé, Ngò sê lhê; nghut kôlháng, nang gi, wó sù nghut ri! Tsadán é tarajong bang nghut to luí, Yudaq byu pé a nghut kôlháng, Yudaq byù nghut lhê gâ é bang tai hpoí é hkyô lé le, Ngò sê lhê. ¹⁰ Nang hui zo rá nghut é wuìhke hkyô lé, hkâgyuq. Ngò, nungmoq lé tai kyo kôle, haù nat Tsadán gi, nungmoq lé chyam wú é dông, nungmoq chyáng mã é ra-am lé, htóng mã hkyô pyám rá nghut lhê; hau htâng, nungmoq gi, raxé nyí tup zing-rí é hui zo kó rá nghut lhê. Shí shoq lhumzú nyi aq, haù hkún, Ngò, nang lé, asak janmaù byi rá nghut lhê.

¹¹ Gyo rá nohkyap dap sù gi, haù Woi-nyí mai noqkuq hpúng pé lé tai é hkyô lé, gyô yù sháng gaq. Í dâm nghú rá shi é hkyô* gi, wó ung é sù lé, wó záng htung rá a nghut.' gâ ri.

Pergamu Myuq Mã É Noqkuq Hpúng Lé Kâ Kat É Laiká

¹² Pergamu myuq mã é noqkuq hpúng é maumang lagyo lé isu nghú kâ kat aq:

Haù shamsó í shut dap é shâm wó Su é dang gi, ¹³ 'Nang nyi é jowò lé, Ngò sê lhê; haù gi, Tsadán é hkohkâm-tanghkuq joq é jang nghut ri. Nghut kôlháng, nang gi, Ngá myíng mã lumhkau nyi é nghut luí, Tsadán nyi é jang nghut é nungmoq é myuq mã, Ngá é lhumzú é saksé hpó Antipa sat huí é hkún lhang, nang Ngo lé lumjúng é hkyô lé, a he-ngik pyám nghut ri.

¹⁴ Nghut kôlháng, Ngò, nang lé mara hún rá hkyô ratsuí joq ashí; hkásu mù gâ le, hparà lhò pé lé títng byi é zoshuq zô é eq, ashop é dông gungsho zùm yap é mara kut shut rá matú, Israelaq byu pé lé mhoq hpyoq rá hpaqchyí, Balak lé mhoq byi é Balam é mhoqshít hkyô lé myhik zing é byu pé, nang chyáng nyi ri. ¹⁵ Haù eq rajung za, haù Nikola é chángzô pé mhoqshít é hkyô lé myhik zing é byu pé le, nang chyáng nyi ri. ¹⁶ Haù mù luí, myit lhung aq! Haù a nghut jáng, Ngò gi, nang chyáng hân jé lé mù, haù Ngá nhut mai htoq é sham eq yhangmoq lé zan rá nghut lhê.

¹⁷ Gyo rá nohkyap dap sù gi, haù Woi-nyí mai noqkuq hpúng pé lé tai é hkyô lé, gyô yù sháng gaq. Wó ung é sù lé gi, haq tó é mannaq muk lé le, mying asik kâ tô é luqgok hpyù racham lé le, Ngò byi rá nghut lhê, lhom hap yu é sù za sheq, mying haù lé sé rá nghut lhê.' gâ ri.

Htuatira Myuq Mã É Noqkuq Hpúng Lé Kâ Kat É Laiká

¹⁸ Htuatira myuq mã é noqkuq hpúng é maumang lagyo lé isu nghú kâ kat aq:

Haù myishâm su duq nyi é myojjí eq jet é gyi su dut é hkyí dap é Sù, Garai Gasâng é Yhangzô é dang gi, ¹⁹ 'Nang é a-kyang, chyitdap myit, lumjúng myit, dojaú é hkyô, hkam jân é hkyô pé lé le, nang gi, hí lhê htoq mã ahkuí je myò zui sai é hkyô lé le, Ngò sê lhê.

²⁰ Nghut kôlháng, yhumsing gùng yhumsing myightoi myhí nghut lhê gâ é myiwe Yezebulaq lé, nang nyi nhang tó é yanmai, Ngò, nang lé mara hún rá hkyô joq ri. Yhang gi, Ngá é dui-nháng zosháng wuì lé, ashop é dông gungsho zùm yap rá

* 2:11 Í dâm nghú rá shi é hkyô gâ é gi, ngarai ming wang é lé gâ lhê.

eq hparâ lhô pé lé tîng byî é zoshuq zo râ hkyô lé mhoqshit luî, yhangmoq lé hkyô shuî ngoq ri. ²¹ Ngò gi, yhang lé, ashop é dông gungsho zùm yap é hkyô mai myit lhîng râ ahkyîng byi kôhlang, yhang gi, a myit lhîng nau nghut ri. ²² Haù mù, Ngò gi, yhang lé, jamjau hui râ yhupchong má dù lheq pyám râ nghut é htoq agó, yhang eq su-myi sulàng lú hkyô kut é bang, yhangmoq kut é hkyô lé myit lhîng kô é za a nghut jâng, wuîhke jamjau mó hui zo nhâng râ nghut lhê. ²³ Ngò gi, yhang zô pé lé sat pyám râ nghut lhê; haù hkûn, Ngò gi, myit nhikhlum eq myit é hkyô lé sé Sù nghut é lé le, nungmoq kut é muzó eq rajung za, nungmoq yuq hkgangmó lé, Ngò tau byi râ nghut é lé le, haù noqkuq hpûng pé banshoq wó sé kó râ nghut lhê. ²⁴ Mhoqshit hkyô haù lé a châng é eq Tsadán é nik é hkyô lhaq gâ é lé a mhoq yu é, Htuatira myuq má myit gyó tô é bang nungmoq lé, Ngò tái kôlê, nungmoq lé gotù wôlai Ngò jat byi râ a nghut. ²⁵ Ngò jé lé é jé shoq, nungmoq wó tô é lé za myhik zing nyi keq.

²⁶⁻²⁷ Wó ung é eq Ngò ô nau é hkyô lé jìhtùm jé shoq châng é sú lé gi,
 "Yhang gi, yhangmoq lé, shamtoq dumbáng èq up† râ nghut lhê;
 Yhang gi, tso-au hkoq pé lé su, yhangmoq lé bat hkyop pyám râ nghut lhê."^{*}

gâ tô é eq rajung za, Ngò, Ngá Wâ chyáng mai ahko ahkáng wó yu é su, mingdán pé lé up râ ahko ahkáng, Ngò byi râ nghut lhê. ²⁸ Ngò gi, yhang lé, haù bó-myhû byi râ nghut lhê. ²⁹ Gyo râ nohkyap dap sù gi, haù Woi-nyí mai noqkuq hpûng pé lé tái é hkyô lé, gyô yù sháng gaq.' gâ ri.

3

Sardi Myuq Mã É Noqkuq Hpûng Lé Kâ Kat É Laiká

¹ Sardi myuq mã é noqkuq hpûng é mau-mang lagyo lé isu nghû kâ kat aq:

Haù Garai Gasâng é woi-nyí nyhit woi-nyí eq kyí nyhit cham lé chûng Su é dang gi, 'Ngò gi, náng é a-kyang lé sé lhê; náng gi, asak dui nyi sù ga kôhlang, shi byuq sù nghut ri. ² Gyîng lò aq! Myit gyó tô é, shi byuq râ za nghut é pé lé, wum-o lhoq kîng yù aq; hkâsu mù gâ le, Ngá é Garai Gasâng é hí má, náng é a-kyang a gumjup é hkyô lé, Ngò myang ri. ³ Haù mù, náng hkâsu kut wó hap yu é eq wó gyô yu é hkyô lé, myit bun aq; haù dông châng luî, myit lhîng aq. Náng a bûn gyîng é nghut le gi, Ngò hkau sù su lé râ nghut luî, náng gi, Ngò hká u lé rá lé, sé râ a nghut.

⁴ Nghut kôhlang, Sardi myuq mã, yhum-sing é mebu lé agot a-ù a kut é byù ram nyi akô. Haù bang gi, hpyu é mebu wut luî, Ngò eq rahá sô wún kó râ nghut lhê; hkâsu mù gâ le, yhangmoq gi, gingdán é bang nghut akô. ⁵ Wó ung é sú gi, haù bang su, hpyu é mebu myang wut râ nghut lhê. Ngò gi, haù yuq é myîng lé, hkâ-nhám le, asak jihpán laiká buk mai yu pyám râ a nghut; hau htoq agó, Ngá Wâ é hí má le, Yhâng é maumang lagyo pé é hí má le, haù yuq é myîng lé, Ngò yin yù râ nghut lhê. ⁶ Gyo râ nohkyap dap sù gi, haù Woi-nyí mai noqkuq hpûng pé lé tái é hkyô lé, gyô yù sháng gaq.' gâ ri.

Hpiladehpi Myuq Mã É Noqkuq Hpûng Lé Kâ Kat É Laiká

⁷ Hpiladehpi myuq mã é noqkuq hpûng é maumang lagyo lé isu nghû kâ kat aq:

Haù chyoiyung é eq tengmán é, Dawiq hkohkam é zoqshi chung é, ó yuq le a wó myhi loshoq hpông é eq, ó yuq le a wó hpóng loshoq myhí é Su é dang gi, ⁸ 'Nàng kut é muzó pé lé, Ngò sê lhê. Wú aq, ó yuq le a wó myhí é hkum ralhum, Ngò náng hi má hpông to byi lhê. Náng gi, wum-o rat-sui za bò kôhlang, Ngá é dang gyo luî, Ngá é myîng lé a he-ngik pyâm é hkyô lé, Ngò sê lhê. ⁹ Haù tarajong má noqkuq kôhlang, Tsadán lé dojaù bang nghut é, Yudaq byu a nghut kôhlang, nghut lhê gâ é byù mhaù pé lé, Ngò, náng é hkyí wang má, lé paî gop nhâng luî, Ngò, náng lé chyitdap é hkyô, yhangmoq lé sé nhâng râ nghut lhê. ¹⁰ Náng gi, myit hîng hîng hkam jan rá é Ngá é hkunmó lé châng nyi bê nghut é yanmai, myidám htoq má nyi é bang lé chyam lik wú râ matù, mingkan gón má jé râ nghut é wuîhke jamjau ahkyîng mai, Ngò, nang lé lhoq lhut yù râ nghut lhê.

¹¹ Ngò gi, a myáng má jé lé lô râ nghut lhê. Náng é janmaù lé, ó yuq èq le a wó yu pyám byi sháng gaq, náng wó tô é pé lé myhik zing nyi aq. ¹² Wó ung é sú lé gi, Ngá é Garai Gasâng é noqkuq yhum mã é hkungzing mó dut nhâng râ nghut lhê. Haù yuq gi, hkâ-nhám le haù mai dum htoq lô rá a nghut. Ngò gi, Ngá é Garai Gasâng é myîng lé le, Ngá é Garai Gasâng chyáng mai htoq luî, mauhkung mai gyó lé lo é, Yerusalem wà mó Asik ga é, Ngá é Garai Gasâng é myuq myîng lé le, Ngá é myîng sik lé le, yhâng chyáng kâ tap byi râ nghut lhê. ¹³ Gyo râ nohkyap dap sù gi, haù Woi-nyí mai noqkuq hpûng pé lé tái é hkyô lé, gyô yù sháng gaq.' gâ ri.

Ladoki Myuq Mã É Noqkuq Hpûng Lé Kâ Kat É Laiká

¹⁴Ladoki wà mó mà é noqkuq hpùng é mau-mang lagyo lé isu nghũ kâ kat aq:

Haù lhumzuí é eq tengmán é saksé nghut é, Garai Gasang hpan tó é lé up é, Amen gá Su é dang gi, ¹⁵Ngò gi, nang kut é muzò lé sê lhê; nang gi, gú le a nghut, nye le a nghut dut ri. Nang gi, gú jáng jáng gú, nye jáng jáng nye dut rà lé, Ngò ô nau ri. ¹⁶Nghut kôhlang, nang gi, gú le a nghut, nye lé a nghut, lumnye nghut é yanmai, Ngò gi, nang lé, Ngá é nhut mai byé htoq pyám rà za nghut bê. ¹⁷"Ngò gi, wó sù nghut lhê; ngò gi, sutzè gyai wó bê nghut luí, haí lháng a ra lo." ga nang taí ri. Nghut kôhlang, nang gi, wuihke jamjau hui sù, asho awui dut sù, myùng sù, myoqjit sù eq achin dut sù nghut é lé, nang a sé myihin-hng. ¹⁸Haù mù luí, nang gi, wó sù sùt sù wó dut sháng gaq, myi má jên yu é hng lé le, nang achin dut é hoq hpu hkyô lé, wó nghop pyám sháng gaq, wut rà matú, mebu hpyú lé le, nang myoq wó myáng sháng gaq, náng é myoqjí má kat rà matú, myoq chí lé le, nang, Ngá chyáng mai wui yú rà matú, Ngò, nang lé hpaqchyí byí lhê.

¹⁹Ngò chytidap é bang lé gi, tan luí, mhoqshít lhê. Haù mù, nang gi, hân bûn gying luí, myit lhing aq. ²⁰Wú aq! Ngò gi, hkum yâm má yap to luí, hkum lé kok nyi lhê. Rayuq yuq, Ngá é hté lé wó gyo luí, hkum hpóng byí é nghut jáng, Ngò gi, wàng mù, haù yuq eq rahá zo shuq rà nghut lhê; haù yuq le, Ngò eq rahá zo shuq rà nghut lhê.

²¹Ngò gi, ùng luí, Ngá Wa eq rahá Yhâng é hkohkâm-tanghkuq má zung é eq rajung za, wó ung é sù lé gi, Ngò eq rahá Ngá é hkohkâm-tanghkuq má zùng rà ahkáng, Ngò byi rà nghut lhê. ²²Gyo rà nohkyap dap é sù gi, haù Woi-nyí mai noqkuq hpùng pé lé taí é hkyô lé, gyô yù sháng gaq.' gá é nghut ri." gá ri.

4

Mauhkûng Htoq Má Hkohkâm-tanghkuq Joq É Hkyô

¹Hau htàng má, ngò wú kat le, mauhkûng má hkum ralhum bòng tó é lé myang ri. Ngò sâng-hí dâm wó gyô é tut hté su gá é danghté ngo lé taí é gi, "Shí má doq lò aq, htàngnùng má dut lò rà hkyô pé lé, Ngò, nang lé tûn shit bá." gá ri. ²Haù hkûn jáng yhang, ngò gi, Woi-nyí má moq byuq lò luí, mauhkûng htoq má hkohkâm-tanghkuq ralhum joq é lé myàng ri; tanghkuq haù má, byù rayuq zung tó ri. ³Haù má zung to Su é isâm gi, hupé eq ne yúng lungsêng su dut ri. Húi nyùi lungsêng su dut é woqgan síng-yang gi, haù hkohkâm-tanghkuq má hkông lhing tó ri. ⁴Hkohkâm-tanghkuq hau é lhinghkyuq má, hkohkâm-tanghkuq gotú í xe myí lhum

le joq to luí, hpyu é mebu wut mù, ulhum má hng janmaù tsùng tó é suwún í xe myi yuq gi, haù má zung tó bum akô. ⁵Haù hkohkâm-tanghkuq mai, lhap hpyat é, mying hûm é eq maugum gûm é pé dut htoq lo ri. Haù hkohkâm-tanghkuq hí má, myi-kok nyhit lhum le duq tó ri; haù pé gi, Garai Gasang é woi-nyí nyhit woi-nyí nghut ri. ⁶Hau htoq agó, san zâ é myoqjâm su dut mà é wui-nhông le, haù hkohkâm-tanghkuq hí má dng tó ri.

Haù hkohkâm-tanghkuq agùng má le, lhinghkyuq má le, hí-u nunghtàng lhinghkyuq myoqjí dap é dui é dusak myí du yí tó ri. ⁷Dui é dusak sâng-hí du gi, hkanghkyi su dut ri; í du nghũ rà du gi, nohtó su dut ri; sùm du nghũ rà dù é myoqdong gi, byu myoqdong su dut ri; myí du nghũ rà du gi, dng wún é zung su dut ri. ⁸Dui é dusak myí du haù gi, du hkangmó dng hkyuq lhum lhum dap é htoq agó, lhinghkyuq má myoqjí kôm dap luí, dng hkaù má lháng dap ri. Yhangmoq, nyí myín hkâ-nhám a no lohoq taí nyi kô é gi,

"A-nham pyat le, ahkuí pyat le, htang pyat má le, rû nyi nyí é, haù wum-o a-tsam dik shoq bò Sù Yhumsing Garai Gasang gi,

chyoiyúng, chyoiyúng, chyoiyúng nyi ri."

gá akô. ⁹Haù dui é dusak myí du gi, hkohkâm-tanghkuq má zung é, pyat dedu ahtum abyuq dui nyi Su chyáng, hpungwup shinggang, aróng eq jeju bun hkyô byí é hkangmó, ¹⁰haù suwún í xe myí yuq gi, hkohkâm-tanghkuq má zung é, pyat dedu ahtum abyuq dui nyi Su é hí má, ngóm gop luí, Yhang lé noqkuq akô. Yhangmoq gi, yhangmoq é hkohkâm-janmaù lé, haù hkohkâm-tanghkuq hí má hkyut to mù, taí kô é gi,

¹¹"Ngamoq é Yhumsing eq Garai Gasang é, nyi mì-nyí, joq mijoq lé, Nang hpan to bê nghut luí,

haù pé gi, Nang ô nau é dng hpan tó é hui bê nghut mù, nyi to joq tó bùm bê nghut é yanmai,

Nang gi, hpungwup shinggang, aróng eq hpungwup a-tsam lé, hap yù gng Sù nghut ri."

gá akô.

5

Chyúmding Eq Sauzo

¹Hau htàng, ngò gi, hkohkâm-tanghkuq má zung to Su é loqyo loq má, í shut é laiká kâ to é, dizik nyhit lhum tap tó é chyúmding le myang ri. ²Hau htoq agó, a-tsam mó bo é maumang lagyo rayuq gi, "Haù dizik pé lé hí pyám rà eq chyúmding lé hpóng rà gi, ó yuq wá gingdán lhê lhú?" ga luí, hté mó eq wut taí nyi é lé le, ngò myang ri. ³Nghut kôhlang, mauhkûng htoq má le, myigùng htoq má

le, myigùng ô má le, haù chyúmding lé wó hpóng rà eq akkaù má wó wú rà byù rayuq lháng a nyí nghut ri. ⁴ Haù chyúmding lé hpóng mù, akkaù má wú rà gingdán é byù rayuq hkálháng a nyí é yanmai, ngò gyai yhang ngau pyám é nghut lhê. ⁵ Haù hkùn, haù suwún wú má é rayuq, ngo lé taí é gi, "Hkâ-ngaù! Wú aq, haù Yudaq byuhú má é Hkanghkyi nghu é, haù Dawiq é Amyit nghut Sù gi, ùng bê nghut luí, haù chyúmding eq haù má é dizik nyhit lhum lé wó hpóng lhê." gá ri.

⁶ Hau htàng, haù dui é dusak myí du eq suwún wui é agùng má é, hkohkâm-tanghkuq agùng má, sat hui bê su dut é Sauzo radu yap tô é lé, ngò myang ri. Sauzo haù gi, hkyú nyhit lhum eq myoqjí nyhit lhum dap ri. Myoqjí haù nyhit lhum gi, myidàm htoq gón má nhang htoq kat é, Garai Gasàng é woi-nyí nyhit woi-nyí nghut ri. ⁷ Haù Sauzo gi, lé mù, hkohkâm-tanghkuq má zung to Su é loqyò má é chyúmding lé yu ri. ⁸ Haù chyúmding lé yu é hkùn jàng, haù dui é dusak myí du eq suwún í xe myi yuq gi, Sauzô é hí má ngóm gop akò. Yhangmoq yuq hkangmó gi, ting eq sân-yúng bàng é kyúdung dang gá é namngón jung byíng mui tô é hìng góm pé le chung bum akò nghut ri. ⁹ Yhangmoq gi, "Nàng gi, haù chyúmding lé yu rà eq hau é dizik pé lé hpóng rà gingdán Sù nghut ri.

Haí mù gá le, Nàng gi, sat hui bê nghut luí, byuhú hkangmó mai le, myíng hkangmó mai le, byù myú hkangmó mai le, mingdán hkangmó mai le, Garai Gasàng é matú, Nàng é suí eq byù pé lé wui hpyit yú bê nghut ri.

¹⁰ Nga-nhùng é Garai Gasàng lé dojaú rà matú, Nàng gi, yhangmoq lé, mingdán byu pé eq hkyangjông pé dut nhâng bê nghut luí, yhangmoq gi, myidàm htoq má up kó rà nghut lhê."

ga luí, mahkôn sik ralhum hkôn akò nghut ri.

¹¹ Haù hkùn, ngò wú kat le, haù hkohkâm-tanghkuq lhínghkyuq má le, dui é dusak pé eq suwún wui é lhínghkyuq má le, nyí tô bum é maumang lagyo ajùm ayò mun mun sen sên é htê lé wó gyò ri. ¹² Yhangmoq gi,

"Haù sat hui bê Sauzo gi, hpungwup a-tsam, sutzê, hpaqchyí byéng-yá, wum-o, aróng sitang,

hpungwup shing kang eq hkya-on kungtôn hkyò lé, hap yù gíng ri."

ga luí, htê mó eq ton bum akò nghut ri. ¹³ Hau htoq agó, mauhkùng htoq má nyí é, myigùng htoq má nyí é, myigùng ô má nyí é, wuiming má nyí é, hpan to huí é lhunglháng gi,

"Hkya-on kungtôn hkyò, aróng sitang, hpungwup shing kang eq hpungwup a-tsam gi,

haù hkohkâm-tanghkuq má zung tô é Sù eq Sauzô chyáng,

pyat dedu ahtum abyuq ru joq nyí sháng gaq ô!"

ga luí, ton nyí bùm kô é lé, ngò wó gyò ri. ¹⁴ Haù dui é dusak myí du gi, "Amen" ga taí jang, haù suwún wui gi, ngóm gop luí noqkuq akò nghut ri.

6

Dizik Nyhit Lhúm É Hkyò

¹ Haù Sauzo gi, dizik nyhit lhum má é sâng-hí lhum lé hpóng kat é hkùn, ngò myang é nghut lhê. Hau htàng, haù dui é dusak myí du má é radu gi, maugum su gá é htê mó eq, "Lé aq." gá é lé, ngò wó gyò ri. ² Ngò wú kat é hkùn, ngá é myoq hí má myang hpyú radu nyí tô é lé myang ri! Haù má jì to sù gi, lai rahpu chung tô é htoq agó, yhang lé, janmaù ralhum tsùng to byí luí, ùng budang wó rà matú ùng sù rayuq dòng htoq ló ri.

³ Haù Sauzo gi, í lhum nghù rà dizik lé hpóng kat é hkùn, haù í du nghù rà dui é dusak gi, "Lé aq." ga taí é lé, ngò wó gyò ri. ⁴ Hau htàng, myang nè radu htoq ló ri; haù má jì tô é sù gi, myidàm htoq má é nguínngón simsaq hkyò lé wup yù rà eq, byù yhangchang rayuq eq rayuq sat lhum nhâng rà a-tsam byí é hui sù nghut luí, yhang lé shâm mó rahkyam le byí to bê nghut ri.

⁵ Haù Sauzo gi, sùm lhum nghù rà dizik lé hpóng kat é hkùn, haù sùm du nghù rà dui é dusak gi, "Lé aq." ga taí é lé, ngò wó gyò ri. Ngò wú kat le, myang noq radu ngá myoq hí má nyí tô é lé myang ri! Haù má jì tô é sù gi, yhâng é loq má jàng rahpu chung to ri. ⁶ Haù hkùn, "Ra-nyí é zuihpau gi, sungso rabyé, ra-nyí é zuihpau gi, muk-yo guq sum byé nghut lhê; haù tsanlun xù eq tsibiyiq wing lé kúm gi, hkálhoq hten kó." gá é htê, haù dui é dusak myí du hkaù mai htoq ló é sù gá é lé, ngò wó gyò ri.

⁷ Haù Sauzo gi, myí lhum nghù rà dizik lé hpóng kat é hkùn, haù myí du nghù rà dui é dusak gi, "Lé aq." ga taí é lé, ngò wó gyò ri. ⁸ Ngò wú kat é hkùn, ngá é myoq hí má, myang muí radu nyí tô é lé myang ri! Haù má jì to su é myíng gi, Shí hkyò gá ri; Moming le, yhâng é htàng má châng tô ri; yhanghnik gi, sham eq, mutmó gyó é eq, wúm gyó é eq, tân é yosô-ze eq, myidàm htoq myí tú má é ratú má nyí é bang lé sat pyám rà ahkáng wó yu to beko nghut ri.

⁹ Sauzo gi, ngo lhum nghù rà dizik lé hpóng kat é hkùn, Garai Gasàng é mungdàng é yanmai le, yhumsing hkâm é saksê é yanmai le, sat hui bàng é sobyò pé gi, hkungga

gyap a-ô má nyi tô bùm kô é lé, ngò myang ri.
¹⁰ Yhangmoq gi, "Choyoyúng é eq tengmán é, ahko ahkáng lhunglháng wó é Yhumsing ê, myidàm htoq má nyi é byu pé lé, ngamoq é sui manglat dam a byí é eq tarâ a jéyáng é za, hkâ-myháng jé shoq nyi nyi râ lúhú?" ga, htê mó èq garu bum akô. ¹¹ Haú hkûn, yhangmoq yuq hkangmó gi, bu hpyû hng radung dung hut é hui lui, yhangmoq su sat hui râ bang, yhangmoq é byinzùm dui-nhâng zoshâng wui nghut é gumang wui sat hui ngap é hkûn jé shoq, razup zim za nyi shí keq ga tai é lé wó gyô akô nghut ri.

¹² Hkyuq lhum ngûr râ dizik lé, Yhang hpông kat é hkûn, ngò myang ri; haú u lé, layàng mó le nún lo ri; haú búi gi, saumaú noq eq woq é pán su noq byuq ri; haú lhamó lhum gón gi, sui su ne byuq ri; ¹³ maihpáng gâm lé, lai mó èq lo mut nhûn kat é hkûn, a myhng shí é maihpáng-shi yoq gyó é su, mauhkung má é kyí pé gi, myidàm htoq má byit gyó lo bum ri. ¹⁴ Haú mauhkung gi, laiká lé dng lhum é su htot pyâm é hui lui, bùm hkang bùm mó eq zinlóng lhumjup pé gi, yhang é jowô mai hui pyâm é hui ri.

¹⁵ Haú hkûn, haú myidàm htoq má é hkohkam pé, uphkâng bang, gyezaú pé, sut wó bang, wum-o a-tsam bò bang, jun pé eq luthkyô wó é lhunglhâng bang gi, bùm dong pé eq bùm pé má é luqgok gyoro pé má haq tô bùm uchyang, ¹⁶ haú bùm pé eq luqgok pé lé, "Ngamoq é gung htoq má gyó ke kó laq! Haú hkohkâm-tanghkuq má zung to Su é myoq hí mai le, haú Sauzô é nhikmo-yô é hkyô mai le, ngamoq lé haq pyám kó laq. ¹⁷ Hkâsu mù gâ le, haú Yhangnhik nhikmo-yô é buinyi mó gi, jé bê nghut ri; ó yuq wá wó jân yap nyi râ lúhú?" ga garû tai bum akô nghut ri.

7

144,000 Yuq Masat Lhô Tap Hui Kô É Hkyô

¹ Hau htâng má, maumang lagyo myi yuq gi, maumyí myi chyûn má yap to mù, myigùng htoq má le, wui ming htoq má le, siggâm pé má le, lai a hik sháng gaq ga, myi shut má é lai lé zui zing to kô é lé, ngò myang ri. ² Haú hkûn, haú dui nyi é Garai Gasâng é masat lô chung é maumang lagyo gotû rayuq gi, buihtoq hkyam mai htoq lé lo é lé, ngò dum myang ri. Yhang gi, haú myigùng eq wui ming lé lhoq hten râ ahkáng wó tô é maumang lagyo myi yuq haú lé, ³ "Nga-nhûng é Garai Gasâng dui-nhâng zoshâng wui é ngelang má, ngamoq mai masat lô a tap byi byi gi, haú myigùng, wui ming eq siggâm pé lé hkâlhoq hten shí kó." ga htê mó èq wut tai kat ri. ⁴ Haú hkûn, masat lô tap

hui é bang byû hkâ-myhó yuq nghut é lé, ngò wó gyô ri. Israelaq byuhú banshoq má é 144,000 yuq nghut ri.

⁵ Masat lô tap hui yu é,
 Yudaq up má é bang gi, 12,000 yuq,
 Rubin up má é bang gi, 12,000 yuq,
 Gat up má é bang gi, 12,000 yuq,
⁶ Ashe up má é bang gi, 12,000 yuq,
 Nahtali up má é bang gi, 12,000 yuq,
 Manase up má é bang gi, 12,000 yuq,
⁷ Simeon up má é bang gi, 12,000 yuq,
 Lewiq up má é bang gi, 12,000 yuq,
 Yishahka up má é bang gi, 12,000 yuq,
⁸ Zebulun up má é bang gi, 12,000 yuq,
 Yosep up má é bang gi, 12,000 yuq,
 Ben-yamyn up má é bang gi, 12,000 yuq,
 nghut bum akô.

Bu Hpyû Hng Wut Bâng É Hkyô

⁹ Hau htâng, ngò wú kat é hkûn, mingdán hkangmó mai le, byuhú hkangmó mai le, byû myû hkangmó mai le, mying chângjup mai le, lé é bang, ó yuq lháng a ung nghap é byû moq mó gi, haú hkohkâm-tanghkuq é hí má le, Sauzô é hí má le, yap nyi bùm kô é lé myang ri; yhangmoq gi, bu hpyû hng wut lui, yhangmoq é loq má byùm-haq chung tô bùm kômu,

¹⁰ "Hkyi yû hkyô gi, haú hkohkâm-tanghkuq má zung tô é nga-nhûng é Garai Gasang eq Sauzo chyáng má é nghut ri ô!"

ga lui, htê mó èq garû bum akô nghut ri.

¹¹ Haú maumang lagyo lhunglhâng bang gi, haú hkohkâm-tanghkuq é lhinghkyuq má le, suwún wui eq dui é dusak myí du é lhinghkyuq má le, yap tô akô nghut ri. Yhangmoq gi, hkohkâm-tanghkuq hí má myoqdong ngóm gop mù, Garai Gasang lé noqkuq uchyang,

¹² "Amen! Hkya-on kungton hkyô eq hpung-wup shing kang,

hpacchyí byéng-yá eq jeju bun hkyô, aróng, hpungwup a-tsam eq wum-o gi, nga-nhûng é Garai Gasâng chyáng pyat dedu ahtum abyuq ru joq nyí sháng gaq ô! Amen!"

ga tai bum akô.

¹³ Haú hkûn, suwún wui má é rayuq gi, "Shí bu hpyû hng wut é bang gi, ô pé lúhú? Yhangmoq gi, hkâmai lé é bang nghut akô lúhú?" ga ngo lé myí ri.

¹⁴ Ngò gi, "Suwún hpô é, nàng sê lhê." ngûh tú tai jâng, yhang gi, "Shí bang gi, haú wuihke jamjau mó mai wó lut htoq lô lui, yhangmoq é bu hng lé, haú Sauzô é sui má chí hpyû yû bê bang nghut akô. ¹⁵ Haú mù, yhangmoq gi, Garai Gasâng é hkohkâm-tanghkuq hí má nyi mù, Yhâng é noqkuq yhûm má, nyi, myin Yhang lé dojaú nyí kô é nghut lhê; haú

* 7:15 Yhâng é jonghpang lé, yhangmoq é ahtoq má nghop byi râ, gâ é gi, yhangmoq eq rahá nyi mù, yhangmoq lé upzúng nyi râ gâ é nghut lhê.

hkhokâm-tanghkuq má zùng Sù gi, Yhâng é jonghpang lé, yhangmoq é ahtoq má nghop byi rá* nghut lhê. ¹⁶ Yhangmoq gi, hkâ-nhâm le, zòmut wuìshit hui rá a nghut lo; bui lhap é le, hkyíng hkyíng nyé é le, yhangmoq lé wó záng rá a nghut. ¹⁷ Hkâsu mù gá le, hau hkhokâm-tanghkuq agùng má é Sauzo gi, yhangmoq é sau-rém sù dut rá nghut lui, Yhang gi, yhangmoq lé, asak wuìbúm jé shoq shui é rá nghut lhê. Hau htoq agó, Garai Gasang gi, yhangmoq é ngaubyi sháng shoq sut pyám byi rá nghut lhê." ga tai ri.

8

Nyhit Lhum Nghû Râ Dizik Eq Namngón Jung Nyhê É Hing Góm

¹ Hau Sauzo gi, nyhit lhum nghû rá dizik lé hpông kat é hkún, mauhkúng htoq má hkyíng hkum rawuí kò zim byuq ri.

² Hau hkún, Garai Gasang é hí má yap tô é maumang lagyo nyhit yuq lé, ngò myang ri; yhangmoq lé, tut nyhit lhum byi tô ri.

³ Namngón jung nyhê é hing góm chung é maumang lagyo gotú rayuq gi, hau hkungga gyap yàm má lé yap tô ri. Hau hkhokâm-tanghkuq hí má é hing hkungga gyap má, sân-yúng bang banshoq é kyúdung dang eq rahá nhóng byi rá matú, namngón jung gyai myo shoq, yhang lé byi tô ri. ⁴ Hau namngón jung é myihkau gi, sân-yúng bâng é kyúdung danghtê eq rahá, maumang lagyo hau yuq é loq mai Garai Gasang chyáng hkyang rot lô bê nghut ri. ⁵ Hau htâng, maumang lagyo hau yuq gi, góm lé yù mù, hkungga gyap má é myi lhoq pyíng yù lui, myidàm htoq má dú hkyô kat é hkún, maugum mó gúm é, mying hùm é, lhap hpyat é eq layàng nún é pé dut htoq lo ri.

Tut Mut É Hkyô

⁶ Hau htâng, tut nyhit lhum wó é maumang lagyo nyhit yuq gi, tut mut rá hen akò nghut ri.

⁷ Sâng-hi yuq nghû rá maumang lagyo gi, yhâng é tut lé mut kat ri; hau hkún, sui nyó é likwò eq myi htoq lô mù, hau lé myidàm htoq má lhoq hkyô kat jáng, maumyí sum tú má é ratú eq siggâm sum tú má é ratú nyé gyó byuq é htoq agó, wàhu mhanzo banshoq le nyé gyó byuq bê nghut ri.

⁸ Í yuq nghû rá maumang lagyo gi, yhâng é tut lé mut kat ri; hau hkún, myi dap tô é bùm mó su é lé, wuìshuq lung-aù má dú hkyô kat ri. Wuìshuq lung-aù sum tú má é ratú gi, sui dut byuq bê nghut ri; ⁹ wuìshuq lung-aù má é dui jung sum tú má é ratú gi, shi byuq lui, wui-sanghpo pé sum tú má é ratú gi, htên byuq bê nghut ri.

¹⁰ Sum yuq nghû rá maumang lagyo gi, yhâng é tut lé mut kat ri; hau hkún, myihui dùm su duq é kyí mó racham gi, mauhkúng

mai byit gyó lô mù, wuìlàng sum tú má é ratú eq wuìbúm pé htoq má lo gyó záng ri. ¹¹ Kyí hau é myíng gi, Kyí Kyí Hko gá é nghut ri. Wuìlàng sum tú má é ratú hkò byuq lui, wui hau hkò byuq é yanmai byù myo myo shi byuq bekò nghut ri.

¹² Myi yuq nghû rá maumang lagyo gi, yhâng é tut lé mut kat ri; hau hkún, bui sum tú ratú, lhamó sum tú ratú, kyí sum tú ratú gi, hten lui, hau pé é sum tú ratú gi, mauchut byuq bê nghut ri. Hau htoq agó, nyí sum tú má é ratú le, myín sum tú má é ratú le, maubó a joq dut byuq ri.

¹³ Ngò wú nyi le, zunbung radu gi, maulat má dang wún mù, "Gotú maumang lagyo sum yuq eq mut rá nghut é, tut hte é yanmai, myidàm htoq má nyi bâng é matú, dingnyé, dingnyé, dingnyé nghut ri." ga lui, htê mó eq garú tai ri.

9

¹ Ngo yuq nghû rá maumang lagyo gi, yhâng é tut mut kat é hkún, mauhkúng mai myidàm htoq má byit gyó tô é kyí racham lé, ngò myang ri. Hau nik dik htúm é Lasang-dông é zoqshi gi, kyí hau lé byi tô ri. ² Kyí hau gi, nik dik htúm é Lasang-dông lé hpông kat é hkún, myi bunghkyúng mó mai htoq lo é myihkau dùm sù é myihkau gi, dong hau mai htoq lo ri. Nik dik htúm é Lasang-dông hau má é myihkau dum é yanmai, bui eq maulat gi, mauchut byuq bê nghut ri. ³ Myihkau dùm hau mai dinggám pé htoq lô mù, myidàm htoq má gyó lé akò; myidàm htoq má é gogok é a-tsam sù é a-tsam le, yhangmoq lé byi to bê nghut ri. ⁴ Myidàm htoq má é wàhu pé lé le, mhan-haq hpoqnoq pé lé le, siggám pé lé le a lhoq htên é za, yhumsing é ngelang má Garai Gasang é masat lhò a dap é byu pé lé baú zing-ri rá matú, yhangmoq lé tai tô ri. ⁵ Nghut kólhang, hau bang lé sat pyám rá ahkáng kúm gi, yhangmoq a wó e za, lhamó ngo hkyap tup hau bang lé zing-ri rá ahkáng za ru wó akò nghut ri. Hau bang hui zô é shí-nò jamjau gi, gogok eq pat hkún no hpú é su yhang nghut ri. ⁶ Hau buinyi pé má, byu pé gi, shí hkyô hò kólhang, myàng kó rá a nghut; shí nau dik kólhang, hau shí hkyô gi, yhangmoq chyáng mai hpang byuq rá nghut lhê.

⁷ Dinggám hau pé gi, majan zan rá matú bui tô é myang pé su dut akò. Yhangmoq é ulhum má gi, hing janmaù sù é tsung tô é htoq agó, yhangmoq é myoqdong gi, byu myoqdong su dut bum akò nghut ri. ⁸ Yhangmoq é xám gi, myiwe wui é xám su dut lui, yhangmoq é zui gi, hkanghkyi zui su dut ri. ⁹ Yhangmoq é wànggò-long gi, joqtoq wànggò-long su dut ri; yhangmoq é dùng mying é htê gi, majan pá shut din yán wang lô é myang jùm eq myanghêng pé mying hùm é htê su gá ri. ¹⁰ Yhangmoq é

sho-myi gi, nyin dap é gogok é sho-myi su dut ri; yhangmoq é sho-myi má, lhamó ngo hkyap tup byu pé lé zing-ri rá a-tsam bo ri.

¹¹ Yhangmoq é hkohkâm gi, nik dik htúm é Lasang-dong má é maumang nghut ri; haú é mying gi, Hebre myíng dong Abadon ga, Grik myíng dông Apolion* gâ ri.

¹² Sâng-hî lhum dingnyé gi, lai ló byuq bê nghut ri; nghut kôlhâng, dingnyé í lhum jé ló shirâ nghut lhé.

¹³ Haú hkyuq yuq nghû rá maumang lagyo gi, yhâng é tut mut kat ri. Haú hkûn, Garai Gasâng é hí má joq é hîng hkungga gyap é hkyuî myî lhum mai hté htoq lo é gi, ¹⁴ "Uhrpat wui mô llang má tui lhûng tô é maumang myi yuq lé, nhang pyám aq." ga tut chung tô é hkyuq yuq nghû rá maumang lagyo lé tai é lé, ngò wó gyô ri. ¹⁵ Haú hkûn, xângzo byû sum tú mâ é ratú lé sat pyám rá matú, ahkyíng, buinyi, lhôhkyap, zanwut lé, ri ri hen tô bê nghut é haú maumang myi yuq lé nhang kat bê nghut ri. ¹⁶ Myang ji jí é gyé jum gi, byû du sen í hkyíng bo é hkyô lé, ngò wó gyô ri.

¹⁷ Ngò, shing-rán myang é má, myang jûm eq haú pé má jí bâng é wânggò-long pé gi, myi su ne é, shing shing nyui é eq hang su hui é nghut ri. Myáng jum é ulhum gi, hkanghkyî pé é ulhum su dut luí, yhangmoq é nhut mai, myi, myihkau eq hang pé htoq lo ri. ¹⁸ Haú yhangmoq é nhut mai htoq lo é myi, myihkau eq hang gâ é wúm ihkyup sùm jûng é yanmai, xângzo byû sum tú ratú gi, sat hui bekò nghut ri. ¹⁹ Myang haú jum é sho-myi gi, lhangmúi su dut luí, ulhum dap mù, hte sé é yanmai, yhangmoq é a-tsam gi, nhut eq sho-myi pé má nghut ri.

²⁰ Wúm ihkyup haú sùm jung mai wó lut luí, myit gyô tô é xângzo byu pé gi, yhangmoq é loq pé èq zui sai é muzò mai, myit a lhîng shi kô é htoq agó, nat gâng pé lé le, a wó myáng, a wó gyo, a wó só é, hîng, ngùn, gyi, luqgok, sik pé é alhò lé le, noqkuq é hkyô lé a tô pyám shi kó nghut ri. ²¹ Haú htoq agó, yhangmoq gi, byû sat é mù mai le, myoqheq hpaqchyî mù mai le, ashop é dông gungsho zùm yap é hkyô mai le, hkaú é mai le, myit a lhîng shi kó nghut ri.

10

Maumang Eq Laiká Ding É Hkyô

¹ Hau htâng, ngò gi, wum-o bo é maumang lagyo gotú rayuq, mauhkûng mai gyó lé lo é lé myang é nghut lhé. Yhang lé gi, mhut eq htup yup to luí, yhâng é u htoq má woqgan sîng-yang gyân tô ri; yhâng é myoqdong gi, bui su dut luí, yhâng é hkyí gi, myi zîng su dut ri. ² Yhâng é loq má gi, hpông tô é laiká ding zo ralhum chung tô ri; yhâng é loqyo

hkyí gi, wuîshuq lung-aú má nang, yhâng é loqpaî hkyí gi, myigùng htoq má nang to luí, ³ hkanghkyi mying é hté su ga, hté mó èq garú kat ri. Yhang garu kat jáng, maugum hté nyhit lhum tú gûm kat ri. ⁴ Haú maugum hté nyhit lhum tú gûm kat é hkûn, ngò ká rá da jáng, "Haú maugum hté nyhit lhum tú gûm é hkyô lé záu pyám aq; haú pé lé hkâkâ to." ga, mauhkûng mai danghté htoq lo é lé ngò wó gyô kat ri.

⁵ Haú hkûn, wuîshuq lung-aú eq myigùng htoq má nang yap tô é lé, ngò myang é maumang lagyo haú gi, yhâng é loqyo loq lé mauhkûng shut tu toq kat ri. ⁶ Haú mù, yhang gi, mauhkûng eq haú má nyi é lhunglháng lé le, myidàm htoq eq haú má nyi é lhunglháng lé le, wuîshuq lung-aú eq haú má nyi é lhunglháng lé le, hpan tô é, pyat dedu ahtum abyuq dui nyi Su é myîng lé lang luí, dakam é gi, "Ahkyíng ratsui le, lhoq myáng nyi lo rá a nghut!" ⁷ Nghut kôlhâng, Garai Gasâng mai Yhâng é dui-nhâng zoshâng wui nghut é myiqhtoi pé lé tai to bê é danglù eq rajung za, Yhâng é záu tô é hkyô gi, nyhit yuq nghû rá maumang lagyo eq yhâng é tut lé mut myhîng é buinyi pé má, shit rá nghut lhé." gâ ri.

⁸ Hau htoq agó, ngò wó gyô wú bê mauhkûng má é hté, ngò lé dum tai é gi, "Haú wuîshuq lung-aú eq myidàm htoq má nang yap tô é maumang lagyo loq má hpông tô é laiká ding lé, è yù aq." gâ ri.

⁹ Haú mù, ngò gi, è luí, laiká ding zo haú, ngo lé byi rá matú maumang lagyo haú lé é dung le, yhang gi, "Shî lé yù mù, zo kat aq. Náng é wam má hko rá nghut lhé; nghut kôle, náng é nhut má gi, byo-í su yhang chui rá nghut lhé." gâ ri. ¹⁰ Haú mù, ngò gi, laiká ding zo haú lé, maumang lagyo é loq mai yù mù, zó é nghut lhé; haú hkûn, ngá é nhut má gi, byo-í su yhang chui ngâm ri; nghut kôle, bàn zò kat é hkûn, ngá é wam hkaú má hkò bê nghut ri. ¹¹ Haú hkûn, "Nâng gi, byû myû myo myo eq séng luí le, mingdán myo myo eq séng luí le, myíng ahú hù eq séng luí le, hkohkam pé myo myo eq séng luí le, myiqhtoi dum htoi ra rá nghut lhé." ga, ngo lé tai kyô ri.

11

Saksé Í Yuq É Hkyô

¹ Ké rá jung dumbáng su dut é jàm-yang rahkat ngo lé byi luí, ngo lé tai é gi, "È mù, haú Garai Gasâng é noqkuq yhâm lé le, hkungga gyap lé le, kè wú luí, haú má noqkuq é bang lé nghap wú aq. ² Nghut kôlhâng, shinggan má é wâng lé gi, a kè é za lhai pyám to aq; hkâsu mù gâ le, haú gi, túngbaù pé lé byi to bê nghut lhé. Yhangmoq gi, haú chyoiyúng myuq lé, lhamó myixe í

* 9:11 Apolion gâ é lichyúm gi, lhoq hten lhoq hpyoq sù gâ é nghut ri.

hkyap tup chôm nang kó rá nghut lhê. ³ Hau htoq agó, ngò gi, ngá é saksé í yuq lé a-tsam byi rá nghut lui, yhangnhik gi, ji mebu wut* mù, buinyi 1260 nyi tup myiqhtoi htoi kó rá nghut lhê." gá ri. ⁴ Yhangnhik gi, haú myidám Yhumsing é hí má yuq tó é tsanlun gám í gám eq myibung tsunging í lhum nghut ri. ⁵ Byù rayuq yuq, yhangnhik lé zing-ri nau é nghut jáng, yhangnhik é nhut mai myi htoq lô mù, yhangnhik é gye pé lé nyhê hkyô pyám rá nghut lhê. Yhangnhik lé kâm zing-ri é sù gi, haú su kut sat pyám é hui zo rá nghut lhê. ⁶ Yhangnhik gi, yhangnhik myiqhtoi htoi nyi é buinyi pé má mau a wò rá matú, mauhkúng lé myí pyám rá a-tsam wó akò; hau htoq agó, wui pé lé sui dut nhâng rá eq, nau é hkún, wúm ajung júng eq myidám htoq lé ihkyup hkyô byi rá a-tsam le, wó akò nghut ri.

⁷ Yhangnhik gi, saksé ban hkâm é hkún, haú nik dik htúm é Lasang-dong mai htoq lo é tân jung dusak gi, yhangnhik lé htim mù, úng lui, sat pyám rá nghut lhê. ⁸ Yhangnhik é mâng lé gi, danglhang dông Sodom eq Egutuq gá é, yhangnhik é Yhumsing lé le, tapzing má jén sat pyám é myuq mó é hkyô gùng má, leq to rá nghut lhê. ⁹ Haú hkún, byù myú hkangmó má é bang, byuhú hkangmó má é bang, mying hkangmó má é bang, mingdán hkangmó má é bang gi, yhangnhik é mâng lé myhup pyám rá matú a gyo kò é za, sum nyi èq rahkyuí tup chôm wú nyi kó rá nghut lhê. ¹⁰ Myidám htoq má nyi é bang gi, yhangnhik shi byuq é yanmai gabú nguóngn lui, rayuq eq rayuq chyunghuq byi lhúm é dông ngón poi kut kó rá nghut lhê. Hkásu mù gá le, myiqhtoi haú nhik gi, myidám htoq má nyi nyi é bang lé, wuihke jamjau byi lai bê su nhik nghut akò.

¹¹ Nghut kôlhang, sum nyi èq rahkyuí tup lai é htâng má, Garai Gasâng chyáng má é asak soq gi, yhangnhik chyáng wàng mù, yhangnhik gi, toq yap tó kò é nghut lui, yhangnhik lé myang é bang gi, gayi yhang gyuq nán bùm bekò nghut ri. ¹² Haú hkún, "Shí má doq lô keq." ga, mauhkúng mai yhangnhik lé wut é htê mó lé wó gyo kômù, yhangnhik é gye pé wú tó é u lé, mhut ji mù mauhkúng shut doq lô bekò nghut ri.

¹³ Haú u lé yhang, layàng mó nún lô lui, myuq hkaú raxé tú má é ratú gi, htén gyop byuq bê nghut ri. Hau htoq agó, byù nyhit hkying yuq shi byuq bê nghut lui, myit gyó tó é bang gi, gayi yhang gyuq nán bùm kômù, mauhkúng má é Garai Gasang lé hkyá-on shigyaú bum akò nghut ri.

¹⁴ Í lhum nghú rá dingnyé gi, lai byuq bê nghut ri; sùm lhum nghú rá dingnyé gi, jé rá za nghut bê.

Nyhit Lhum Nghú Rá Tut Mut É Hkyô

¹⁵ Nyhit yuq nghú rá maumang lagyo gi, yhâng é tut mut kat ri; haú hkún, mauhkúng htoq má htê mó pé htoq lo é gi,

"Mingkan htoq má é mingdán gi, nga-nhùng é Yhumsing eq Yhâng é Hkrisduq é mingdán dut bê nghut lui,

Yhang gi, pyat dedu ahtum abyuq up nyi rá nghut lhê."

gá ri. ¹⁶ Haú hkún, yhumsing é hkohkâm-tanghkuq má zùng mù, Garai Gasâng é hí má nyi tó é suwún í xe myi yuq gi, yhangmoq é myoqdong ngóm gop mù, Garai Gasang lé noqkuq uchyang tai kò é gi,

¹⁷ "Ahkuí pyat, a-nham pyat rú dui nyi é, wum-o a-tsam dik shoq bò Sú Yhumsing Garai Gasang é!

Nàng gi, hpungwup a-tsam mó chùng mù, up nyi bê nghut é yanmai, ngamoq, Nang lé jeju hkyá-on lhê.

¹⁸ Byù myú pé gi, nhikjum yo bùm kôlui, Náng é nhikmo-yo hkyô gi, jé bê nghut ri.

Shi bê bang lé, tará yéyáng rá eq, Náng é dui-nhâng zoshâng myiqhtoi pé lé le,

Náng é sân-yúng bang lé le, Náng é mying lé gyuq hkunggá é tiq ko lé le,

shigyaú chyunghuq byi rá eq, myidám htoq lé lhoq hten bang lé lhoq hten rá, ahkying gi, jé bê nghut ri."

gá akò.

¹⁹ Haú hkún, mauhkúng htoq má, Garai Gasâng é noqkuq yhúm hpông to lui, Yhâng é noqkuq yhúm hkaú má, Yhâng é dangshikaq eq sêng é saksé sidek lé byu-myang ri. Haú hkún jáng, lhap hpyat é, mying hùm é, mau-gum gùm é, layàng nún é, likwò mó gyó é pé dut htoq lo ri.

12

Myiwe Myhi Eq Manjung É Hkyô

¹ Hau htoq agó, mauhkúng má limik kumlhá mó htoq shit é gi: myiwe myhi rayuq gi, bui lé wut chùng mù, lhamó má hkyi ke lui, kyi raxé í cham dap é janmaú lé, yhâng é ulhum má tsùng tó ri. ² Yhang gi, zogùng dut tó é nghut lui, zo hkú rá matú, zohkú-nò no nyi é yanmai, gayi yhang ngau garú nyi ri. ³ Hau htâng, mauhkúng má gotú kumlhá dum htoq shit é gi: gayi kò é manjung nè mó* radu gi, ulhum nyhit lhum eq hkyuí raxé lhum dap lui, yhâng é ulhum hkangmó má janmaú tsùng tó ri. ⁴ Yhâng é sho-myi gi, mauhkúng má é kyí sum tú má é ratú lé shúm tsing yù mù, myidám htoq má he hpyit hkyô kat ri. Manjung haú gi, zoshâng hku htoq kat eq wó myui hâng kat shoq ga, haú myiwe myhi é hí má láng yap

* 11:3 Ji mebu wut gá é gi, iyon yón é lé gá lhê.

* 12:3 Manjung nè mó gá é gi, Tsadán lé tai nau é nghut lhê.

tô ri. ⁵ Myiwe myhí hau gi, mingdán ban-shoq lé shamotoq dumbáng eq up râ nghut é yuqzo rayuq lé hkû bê nghut ri; yhang é zoshâng lé gi, Garai Gasâng é hí má le, Yhâng é hkohkâm-tanghkuq hí má le bún toq yû bê nghut ri. ⁶ Myiwe myhí hau gi, yhang é matú Garai Gasang lajâng to byí é yoso hkaû má h pang wang é bê nghut ri; hau jowò má, yhang gi, 1260 nyí tup lhom baú é hui râ nghut lhê.

⁷ Mauhkûng htoq má majan htoq bê nghut ri. Mihkaelaq eq yhang é maumang lagyô pé gi, manjung lé majan é zan kôluí, hau manjung eq yhang é maumáng pé le, tau zân akò. ⁸ Nghut kôlhang, yhangmoq gi, a ùng kômù, mauhkûng má é yhangmoq nyí jowò lhoq hpyuq pyám bekò nghut ri. ⁹ Hau mingkan gón lé hkyô shuí ngoq é, natzau eq Tsadán ga é, a-nham lhê é lhangmuí nghut é manjung mó hau gi, yhang é maumang pé eq rahá myidám htoq má dú hkyô pyám é hui bê nghut ri.

¹⁰ Hau hkûn, mauhkûng htoq má htê mó đông tái é lé, ngò wó gyô é gi,

"Ahkuí gi, nga-nhûng é Garai Gasâng é hkyí yû hkyô, hpungwup a-tsam eq mingdán le,

Yhâng é Hkrisduq é ahko ahkáng le, je bê nghut ri.

Hkâsu mù gâ le, nga-nhûng é Garai Gasâng é hí má, nga-nhûng é gumang wui lé, nyí, myín mara hun nyi é sú gi, dú hkyô pyám é hui bê nghut ri.

¹¹ Yhangmoq gi, hau Sauzô é suí é yanmai le, yhangmoq saksé hkâm é mungdâng é yanmai le,

yhang lé ung pyám bekò nghut lui, shi byuq é je shoq yhumsing asak lé a ha kò nghut ri.

¹² Hau mù lui, mauhkûng eq hau má nyi é bang é, gabú nyí keq!

Nghut kôlhang, myidám htoq eq wuishuq lung-aú gi, dingnyé wó ri;

hkâsu mù gâ le, hau natzau gi, yhang é ahkyíng yâm-yoq tot za ru joq alò nghut é lé sê é yanmai,

nhikmo-yô é eq, nunghnik chyáng gyô lé lô bê nghut ri."

gâ ri.

¹³ Hau manjung gi, myidám htoq má dú hkyô kat huí é lé myàng lui, hau yuqzo hku é myiwe myhí lé zing-rí ri. ¹⁴ Myiwe myhí hau gi, lhangmuí chyáng mai wó lut lui, yhang é matú lajâng tô é yoso má wó dang je mù, ahkyíng ralhuh, ahkyíng í lhum, ahkyíng rawuí hkup[†] lhom baú nyi é hui sháng gaq ga, zùn mó é dùng í lhum byí é hui ri. ¹⁵ Hau hkûn, hau lhangmuí gi, myiwe myhí hau lé wó lhoq myhú pyám shoq ga, myiwe myhí

é nunghtáng má, yhang é nhut mai wui mó làng í é wui lhoq htoq kat ri. ¹⁶ Nghut kôlhang, manjung nhut mai lhoq htoq kat é wui mó làng hau lé, myigùng gi, yhang é nhut há mù myui pyám byí é đông, myiwe myhí hau lé garúm yu ri. ¹⁷ Hau mù, manjung hau gi, myiwe myhí hau é yanmai, gyai yhang nhikmo-yo lui, Garai Gasâng é jep é tará lé châng é bang eq Yesuq é saksé lé myihk zing nyi é bang nghut é, myit gyô tô é, myiwe myhí é awut ashín pé lé, majan zan râ matú htoq e ri. ¹⁸ Manjung hau gi, wuishuq lung-aú yâm má yap tô ri.

13

Tân Jung Dusak Radu Wuishuq Lung-aú Mai Htoq Lo É Hkyô

¹ Hau hkûn, hau wuishuq lung-aú mai tân jung dusak radu htoq lo é lé, ngò myàng ri. Dusak hau má, hkyuí raxê lhum eq ulhum nyhit lhum dap to lui, yhang é hkyuí pé má gi, janmaú raxê lhum tsúng to mù, ulhum hkangmó má gi, Garaí aróng lhoq hpoi é mying dap to bum ri. ² Ngò myang é tân jung dusak hau gi, bauze-lo su dut ri; nghut kôlhang, hkyí gi, wâm hkyí su dut lui, nhut gi, hkanghkyí nhut su dut ri. Hau manjung gi, yhang é a-tsam eq yhang é hkohkâm-tanghkuq lé le, ahko ahkáng mó lé le, tân jung dusak hau lé ap byí ri. ³ Tân jung dusak hau é ulhum ralhuh gi, shí rá í é dâm dap huí é su dut kôlhang, damhkò hau gi, yâ ge pyám bê nghut lui, mingkan gón gi, mauhong byuq kômù, yhang htang châng bùm bekò nghut ri. ⁴ Manjung gi, tân jung dusak lé ahko ahkáng ap byí é yanmai, byu pé gi, manjung hau lé noqkuq é htoq agó, tân jung dusak hau lé le, noqkuq kômù, "Ó yuq wá, tân jung dusak shí du su dut ri lhu? Ó yuq wá, yhang lé wó zan ùng rá lhu?" ga bum akò.

⁵ Gyáng dang tái râ eq Garaí aróng lhoq hpoi dang tái râ nhut gi, tân jung dusak hau lé byi to bê nghut é htoq agó, lhamó myí xe í hkyap tup, yhang é ahko ahkáng lé chúng rá ahkáng wó bê nghut ri. ⁶ Yhang gi, yhang nhut hpông mù, Garaí Gasâng aróng lé lhoq hpoi dang tái é htoq agó, Garaí Gasâng é myíng eq nyí jowò lé le, mauhkûng htoq má nyi é bang lé le, lumù gansang é sú nghut ri. ⁷ Hau sân-yúng bang lé majan zân ung yû rá a-tsam, yhang lé byi bê nghut ri. Hau htoq agó, byuhú hkangmó lé le, byu myú hkangmó lé le, myíng hkangmó lé le, mingdán hkangmó lé le, up rá ahkáng, yhang lé byi bê nghut ri. ⁸ Hau sat huí bê Sauzo eq sêng é asak jihpán laiká buk má, mau htoq xâng hkun mai, myíng a kâ lhôm é, myidám htoq má nyi é lunglhang bang

[†] 12:14 Ahkyíng ralhuh, ahkyíng í lhum, ahkyíng rawuí hkup gâ é gi, "razán, í zân, lhamó hkyuq hkyap" lé gâ é nghut lhê; hau gi, 1260 nyí nghut ri.

gi, haù tân jung dusak lé noqkuq kó rà nghut lhê.

⁹ Gyo rà nohkyap dap sù gi, gyô yù sháng gaq.

¹⁰ Shúm zung é hui rà sù gi, shúm zung é hui rà za nghut lhê.

Sham èq sat é hui rà sù gi, sham èq sat é hui rà za nghut lhê.*

Haù mù, sân-yúng bang gi, hkam jân é hkyô eq lhumzui hkyô bò kó rà nghut lhê.

Tân Jung Dusak Radu Myigùng Mai Htoq Lo É Hkyô

¹¹ Hau htâng, ngò gi, tân jung dusak gotù radu† myigùng mai htoq lo é lé myang ri. Yhang gi, sauzô é hkyuì su dut é hkyuì í lhum yuq ri; nghut kôlhng, yhang gi, man-jung su ga dang nyo ri. ¹² Yhang gi, tân jung dusak hí lhê dù é ahko ahkáng lhunglhang lé, haù du é hí má chùng mù, shí rà í é damhkò ge byuq é tân jung dusak haù lé, haù mingkan eq mingkan htoq má nyi é bang lé noqkuq nhang ri. ¹³ Hau htoq agó, yhang gi, byu pè é myoq hí má, mauhkúng mai myigùng shut myi lé lhàng wó lhoq hkyô é, mimik kumlhá mó kut shít ri. ¹⁴ Yhang gi, tân jung dusak hí lhê dù é hí má, kumlhá haù pé kut rà ahkáng wó é yanmai, myidàm htoq má nyi é bang lé mhoq hpyoq yù luì, haù shâm damhkò dap kôlhng, dui nyi é tân jung dusak haù lé, hkunggá é dông, yhang-moq lé, yhang é alhò saí nhang ri. ¹⁵ Yhang gi, haù tân jung dusak hí lhê dù é alhò lé, soq wó mut kat byí é a-tsam lé wó yù sù nghut ri; haù mù, alhò haù gi, dang wó tái luì, yhang lé a noqkuq é bang lé, sat hui nhang ri. ¹⁶ Hau htoq agó, yhang gi, byu mó byu zo, wó sú myùng sù, luthkyô wó bang eq jùn pé, yuq hkangmó lé, yhumsing é loqyo loq má nghut nghut, ngelang má nghut nghut, masat lhò zik tap yù nhang ri. ¹⁷ Haù hkùn, haù tân jung dusak é mying, a nghut jáng, yhang mying é masat nambat dap sù mai lai luì, ùng é, wui é hkyô, ó yuq le wó kut rà a nghut.

¹⁸ Hpaqchyí byéng-yá gi, shí má bo rà ri. Hpaqchyí bò sù gi, haù tân jung dusak é nambat lé sôn wú sháng gaq; hkásu mù gá le, haù gi, byu rayuq é nambat nghut lhê. Yhâng é nambat gi, 666 nghut ri.

14

Sauzo Eq 144,000 Yuq É Hkyô

¹ Hau htâng, ngò wú kat le, haù Sauzo gi, Zi-un bùm má yap tó é lé myang ri; Yhâng mying eq Yhâng Wá é mying lé, yhumsing é ngelang má ká tap tó é byù 144,000 yuq le, Yhang eq rahá yap tó bùm ri. ² Haù hkùn,

* **13:10** Chyúmding ra-am má gi, Byù rayuq yuq lé, shúm kut é sù gi, shúm zung é hui rà nghut lhê. Sham èq byù sat é sù gi, sham èq sat é hui rà nghut lhê, ga bo tô ri. † **13:11** Tân jung dusak gotù radu gá é shí gi, myiqtoi pyoq lé gá nau é nghut lhê.

* **14:8** Mingdán pé gá é gi, a lumjng bang lé gá é nghut lhê.

ngò gi, wui pé mying hùm é hté eq maugum mó gùm é hté su gá é hté, mauhkúng mai htoq lo é lé wó gyô ri. Ngò wó gyô é hté haù gi, ting bat bang, yhangmoq é ting lé bat myhng é hté su gá ri. ³ Yhangmoq gi, haù hkohkâm-tanghkuq é hí má le, dui é dusak myí du eq sawún wui pé hí má le, mahkôn sik lé hkon akò nghut ri. Haù myidàm htoq mai hkyi yù huì é byù 144,000 yuq mai lai luì, ó yuq le, mahkôn haù lé a wó mhoq sè yù kó nghut ri. ⁴ Haù bang gi, myiwe wui eq gungsho a zum é bang nghut luì, yhangmoq gi, zorâm jet pé nghut bum akò. Yhangmoq gi, haù Sauzo hká shut é le hká shut châng é bang nghut akò. Yhangmoq gi, byu pè chyáng mai wui yu é hui luì, sâng-hi myhng é ashí lé su, haù Garai Gasang eq Sauzo lé ap byí é hui akò nghut ri. ⁵ Yhangmoq é nhut má, mhaù é hkyô haì le a tái kó; yhangmoq chyáng mara hùn rà hkyô le a bò kó nghut ri.

Maumang Sum Yuq É Hkyô

⁶ Hau htâng, maumang lagyo gotù rayuq gi, maulat má dang wún é lé ngò myang ri; yhang gi, haù mingkan htoq má nyi é, mingdán hkangmó má é bang, byuhú hkangmó má é bang, mying hkangmó má é bang, byu myù hkangmó má é bang lé, hko kyo rà ahtum abyuq é gabú danglù wó ri. ⁷ Yhang gi, "Garai Gasang, tará jéyáng rà ahkying jé bê nghut é yanmai, Yhang lé gyuq hkungga luì, Yhâng é hpungwup a-tsam lé shigyaú keq. Haù mauhkúng eq myigùng, wuìshuq lung-aù eq wuìbùm pé hpan tó é Sù lé, noqkuq keq." ga luì, hté mó èq tái ri.

⁸ Í yuq nghù rà maumang lagyo gi, htâng má châng lé mù, "Haù mingdán pé* lhunglhang lé, yhang kut shut é ashop é dông gungsho zùm yap é hkyô, nhik lhoq yô é tsibiyiq wing shuq nhang é, Babelon myuq mó gi, lèng gyop bê! Lèng gyop bê!" ga tái ri.

⁹ Sum yuq nghù rà maumang lagyo gi, yhangnhik é htâng má châng lé mù, "Haù tân jung dusak eq yhâng é alhò lé, noqkuq luì, yhumsing é ngelang má nghut nghut, loq má nghut nghut, yhâng é masat lhò lé tap yu é sù, ó yuq nghut kòle, ¹⁰ Garai Gasang é nhikmo-yo nghu é góm má hut kat tó é, nhik-yô é tsibiyiq wing jet lé shuq rà nghut lhê. Hau htoq agó, haù chyoyúng maumang lagyo pé hí má le, Sauzo é hí má le, yhang gi, duq nyi é myi eq hang èq zing-ri é hui zo rà nghut lhê. ¹¹ Yhangmoq zing-ri huì é myihkau gi, pyat dedu ahtum abyuq htoq nyi rà nghut lhê. Haù tân jung dusak eq yhâng é alhò lé, noqkuq é bang eq yhâng mying é masat lhò tap yù sù é matù gi, nyi,

myín, no rã ahkýing wó rã a nghut." ga lui, htê mó èq taí ri. ¹² Garai Gasàng é jep é tarã cháng lui, Yesuq lé lhumzui nyi é bang nghut é, sân-yúng bang gi, hkam shirang é hkyô bò rã lhê.

¹³ Hau htàng, "Ahkuí mai gi, hau Yhumsing má shí é sù, hkungsô wó nyi ri nghù kã to aq." gã é htê, mauhkung mai htoq lo é lé, ngò wó gyô ri.

Hau hkún, hau Woi-nyí gi, "Nghut rô, yhangmoq kut é muzó é akyú gi, yhangmoq htàng cháng rã nghut é yanmai, yhangmoq gi, yhumsing zui nú é muzó mai myang hkying bekó rã nghut lhê." ga taí ri.

Myidàm Htoq Mã É Kyôshi Shù É Hkyô

¹⁴ Ngò dum wú kat le, mhut hpyú rahtui ngá hí má joq tô é lé myang ri; mhut hpyú htoq hau má Byu Yhangzo su dut é byú rayuq zung tô ri; Yhàng é ulhum má gi, hng janmaú tsúng to lui, Yhàng é loq má gi, htoq é zaiyik ralhum chung tô ri. ¹⁵ Hau hkún, gotú maumang lagyo gi, noqkuq yhúm mai htoq lô mù, "Hau myidàm htoq mã é kyôshi gi, myhng zan to bê nghut lui, kyôshu yoq jé bê nghut é yanmai, náng é zaiyik chùng mù, yik shù yù aq." ga, hau mhut htoq mã zung tô é Sù lé, htê mó èq taí garú kat ri. ¹⁶ Hau mù, mhut htoq mã zung tô é Sù gi, Yhàng é zaiyik lé, myigùng htoq mã dú hkyô kat lui, myidàm htoq mã é kyôshi lé, ban shù yù bê nghut ri.

¹⁷ Maumang lagyo gotú rayuq gi, mauhkung htoq mã é noqkuq yhúm mai htoq lo ri; hau yuq le, htoq é zaiyik ralhum chung tô ri. ¹⁸ Hau, myi lé up é maumang lagyo gotú rayuq gi, hkungga gyap mai htoq lô mù, htoq é zaiyik chùng sù lé, "Myidàm htoq mã é tsibiyiq shi gi, myhng bê nghut é yanmai, náng é htoq é zaiyik yù mù, tsibiyiq shipaú hau pé lé, yâm tsing yù aq." ga, htê mó èq taí garú kat ri. ¹⁹ Maumang lagyo hau gi, yhàng é zaiyik lé, myidàm htoq mã dú hkyô kat mù, hau mã é tsibiyiq shi pé lé yâm tsing yù lui, Garai Gasang nhikmo-yô é tsibiyiq wing pyik jang mó mã hut kat bê nghut ri. ²⁰ Myuq shinggan mã é tsibiyiq wing pyik jang hau mã, tsibiyiq shi hau pé lé náng nyhoq lui, tsibiyiq wing pyik jang hau mai sui yui htoq lo é gi, myang lunghtung myháng jé shoq jé lô mù, 180 déng† kô we shoq yui lô bê nghut ri.

15

Ló Htàng É Wúm Nyhit Lhum Chung É Maumang Lagyo Nyhit Yuq É Hkyô

¹ Ngò gi, mauhkung mã gotú limik kumlhá joq é lé, dum byu-myang ri; hau gi, wúm nyhit lhum chung é maumang lagyo nyhit yuq nghut ri; wúm hau pé gi, lô htàng é wúm

pé nghut ri; hkâsu mù gã le, Garai Gasang nhikmo-yô é hkyô gi, hau gú mai bàn rã nghut lhê. ² Hau htoq agó, myi eq nyhò tô é myoqjâm wui-nhông su dut é lé le, ngò myang ri; hau tân jung dusak eq yhàng é alhò lé le, yhàng mying é nambat lé le, wó ung pyám bê bang gi, wui-nhông yâm hau má yap tô bum akó; yhangmoq gi, Garai Gasang byí é ting pé lé chung to kôlui, ³ Garai Gasàng é dui-nhâng zoshâng Mosheq é mahkôn eq hau Sauzô é mahkôn lé hkôn kô é gi,

"Wum-o a-tsam dik shoq bò Sù Yhumsing Garai Gasang ê, Nang kut é muzó gi, hkai é eq mauhpo yhang nghut ri.

Pyat pyat zai zai é Hkohkâm ê, Nang é hkyô gi, dingmán é eq tengmán é nghut ri.

⁴ Yhumsing ê, Nang lé a gyuq a hkungga rã eq Nang mying lé a lhoq gyaú rã gi, ó yuq wá nyi rã lúh?

Hkâsu mù gã le, Nang za choyoyúng é Sù nghut ri.

Nang kut é dingmán hkyô gi, tân shit bê nghut é yanmai,

byú myú lhunglhang gi, Nang hí má lé noqkuq kó rã nghut lhê."

gã akò nghut ri.

⁵ Hau htàng, ngò wú kat le, mauhkung mã, saksé zúm joq é noqkuq yhúm bóng tô é lé, myang ri. ⁶ Hau wúm nyhit jung chung é maumang lagyo nyhit yuq gi, noqkuq yhúm hau mai htoq lo ri; yhangmoq gi, sân-yúng duqbó é nú nhám mebu wut lui, yhangmoq é wànggàng mã hng hpyihit baiyup tô akò nghut ri. ⁷ Hau hkún, hau dui é dusak myí du mã é radu gi, pyat dedu ahtum abyuq dui nyi é Garai Gasàng é nhikmo-yo hkyô bying tô é hng góm nyhit lhum, hau maumang lagyo nyhit yuq lé byí ri. ⁸ Garai Gasàng é hpungwup shingkan eq hpungwup a-tsam é yanmai, hau noqkuq yhúm gi, myihkau bying zan to bê nghut lui, hau maumang lagyo nyhit yuq é wúm nyhit jung za a bàn bàn gi, noqkuq yhúm hau mã ó yuq le a wó wàng kó nghut ri.

16

Garai Gasàng É Nhikmo-yo Hkyô Bo É Góm Nyhit Lhum

¹ Hau htàng, maumang lagyo nyhit yuq lé, "Htoq é mù, hau Garai Gasàng é nhikmo-yo hkyô bo é góm nyhit lhum lé, myigùng htoq mã hut hkyô kat keq." ga, noqkuq yhúm mai htê mó èq taí é lé, ngò wó gyô ri.

² Hau hkún, sàng-hí yuq nghù rã maumang lagyo gi, htoq é mù, yhàng é góm lé, myigùng htoq mã hut hkyô kat jang, hau tân jung dusak é masat lhò dap é eq yhàng é alhò lé noqkuq é bàng chyáng, achaq achyut é eq hkê-nho dik é, yapjeq ana dap tô bùm bê nghut ri.

† 14:20 180 déng gi, Grik pé é stadia 1600 kô bo ri.

³ Í yuq nghù rã maumang lagyo gi, yhang é góm lé, wuìshuq lung-aù má hut hkyô kat ri; haù gi, shí bê byù rayuq é sui su dut byuq é htoq agó, haù má lúng é dui jung lhunglhang gi, shi byuq bê nghut ri.

⁴ Sum yuq nghù rã maumang lagyo gi, yhang é góm lé, wuìlàng pé eq wuìbúm pé má hut hkyô kat jáng, haù pé gi, sui dut byuq bê nghut ri. ⁵ Haù hkùn, haù wui lé upzúng é maumang lagyo taí é lé, ngò wó gyô é gi,

"A-nham pyat le, ahkui pyat le, rù nyi nyi é Chyoiyúng Sù ê,

Nàng haù su kut jéyáng bê nghut é yanmai, Nàng gi, tengmán Sù nghut ri;

⁶ hkásu mù gá le, yhangmoq gi, Náng é sân-yúng bang eq myiqtói pé é sui lé, lhoq htoq pyám bekô nghut lui,

Nàng gi, yhangmoq lé sui shuq nhang é nghut ri; haù gi, yhangmoq hui zo gíng é hkyô nghut ri."

gá ri. ⁷ Haù hkùn, haù hkungga gyap mai,

"Nghut rô! Wum-o a-tsam dik shoq bò Sù Yhumsing Garai Gasang ê, Nàng jéyáng é hkyô pé gi, tengmán é eq dingmán é nghut ri."

ga le, taí kat é hté lé, ngò dum wó gyô ri.

⁸ Myi yuq nghù rã maumang lagyo gi, yhang é góm lé, bui é ahtaq má hut hkyô kat é hkùn, bui gi, byu pé lé myí eq nyhê kyuq rá ahkáng wó bê nghut ri. ⁹ Haù mù, yhangmoq gi, nyé dik é eq nyhê kyuq é hui zo lui, wúm shí pé lé up nyi é Garai Gasang é mying lé nhing akò; haù-í yhang hpuzo kôlhang, yhangmoq gi, myit le a lhing kó, Garai Gasang lé le a shigyaù kó nghut ri.

¹⁰ Ngo yuq nghù rã maumang lagyo gi, yhang é góm lé, tân jung dusak é hkohkâm-tanghkuq htoq má hut hkyô kat jáng, yhang é mingdán gi, mauchut tuq dut byuq bê nghut ri. Mingbyù wui gi, yhumsing é shò lé lhang, ngat tân bùm shoq shí-nò jamjau hui zo kôluí, ¹¹ yhangmoq no hpù é eq jeq é ana dap é yanmai, mauhkung má é Garai Gasang lé nhing akò; haù-í yhang hpuzo kôlhang, yhangmoq gi, yhangmoq kut é hkyô mai myit a lhing shi kó nghut ri.

¹² Hkyuq yuq nghù rã maumang lagyo gi, yhang é góm lé, Uhprat wui mó láng má hut hkyô kat jáng, wuìlàng haù gi, kân byuq lui, haù buihtoq hkyam má é hkohkam pé, lé lô rá hkyô dong bê nghut ri. ¹³ Haù hkùn, po su dut é, agè ashop é byò sum woi-nyí lé, ngò myang ri; haù pé gi, manjung, tân jung dusak, myiqtói pyoq pé é nhut mai htoq lô kô é bang nghut akò. ¹⁴ Woi-nyí haù pé gi, nat gâng pé é woi-nyí nghut lui, limik kumlhá pé kut shit kômù, haù wum-o a-tsam dik shoq bò Sù Garai Gasang é buinyi mó má majan zan rá matù, mingkan góm má

é hkohkam pé lé lhoq tsing yù rá ga, htoq é ló akò nghut ri.

¹⁵ "Wú keq, Ngò gi, hkau sù su jé lé é nghut lhê! Su hí má gungchín a so rá eq hoq hpu hkyô a lhoq htoq shit sháng gaq ga, yhumsing é wutbu wutmé lé, zúng nyi lui, gyíng gyíng kut nyi é sù gi, hkungso wó nyi ri."*

¹⁶ Haù mù, nat haù bang gi, hkohkam pé lé, Hebre mying dong Armagedon gá é jowò má, rahá ji tsing tó akò nghut ri.

¹⁷ Nyhit yuq nghù rã maumang lagyo gi, yhang é góm lé, maulat má hut hkyô kat ri; haù hkùn, haù noqkuq yhúm má é hkohkâm-tanghkuq mai, "Bàn bê!" gá é hté mó htoq lo ri. ¹⁸ Haù htoq agó, lhap hpyat é, mying hùm é, maugum gúm é eq layàng mó nún é pé dut htoq lo ri. Myidám htoq má, xângzo byù lé nyi é hkùn mai, layàng haù su nún é eq haù-í htan é gi, a joq wú shí é nghut lhê. ¹⁹ Haù mù, haù myuq mó gi, sùm hkyam byak goq byuq lui, mingdán pé má é myuq pé le, goq byuq bê nghut ri. Garai Gasang gi, Babelon myuq mó lé le myit bun lui, Yhang é nhikmo-yô é tsibiyiq wíng byíng shoq bo é góm lé shuq nhang bê nghut ri. ²⁰ Zinlóng hkangmó gi, hpang byuq bê nghut lui, bùm pé le byuq byuq bê nghut ri. ²¹ Haù hkùn, myi xê jói kô lai é likwò mó gi, mauhkung mai byu pé htoq má wó gyó gyún ri; likwò wúm gi, gayi yhang wuìlke jamjaù é wúm nghut é yanmai, byu pé gi, Garai Gasang lé nhing bum akò nghut ri.

17

Shiwa Myhi Mó É Hkyô

¹ Haù góm nyhit lhum chung tó é maumang lagyo nyhit yuq má é rayuq gi, lé lô mù, "Lé aq, haù wui myo myô pé htoq má zung tó é shiwa myhi mó lé dam byi rá hkyô, ngò, nang lé tân shit bá. ² Myidám htoq má é hkohkam pé gi, yhang eq rahá ashop é dong gungsho zùm yap é hkyô kut shut kôluí, myidám htoq má nyi é bang gi, yhang kut shut é myiwe yuggé nyi zò lhum hkyo é tsibiyiq wíng lé shuq wut bùm bekô nghut ri." ga lui, ngo lé taí ri.

³ Haù mù, maumang lagyo haù gi, Woi-nyí má, ngo lé yoso shut shui wang e lô ri. Haù ulhum nyhit lhum eq hkyuí raxê lhum dap lui, taí hpói é mying kóm dap tó é, zam zam ne é tân jung dusak htoq má zung tó é myiwe myhi rayuq lé, ngò myang ri. ⁴ Myiwe myhi haù gi, me me dut é eq zam zam ne é mebu wut lui, hing, lungsêng, palhé pé eq mhôn chung ri; yhang é loq má gi, yhang é myiwe yuggé nyi zò lhum hkyo é agot a-ù hkyô eq achau achyut é zè pé byíng tó é hing góm ralhuh chung tó ri.

* 16:15 Dang shí hkun gi, Yesuq taí é dang nghut lhê.

⁵ NIK DIK É HKYÔ, MYIDÂM HTOQ MÂ É ACHAQ ACHYUT HKYÔ PÉ EQ SHIWA MYHÍ PÉ É YHÂNGNU, BABELON MYUQ MÓ.

gâ é mying gi, yhâng é ngelang má kâ tap tô ri. ⁶ Myiwe myhí haû gi, sân-yung bâng é sui eq Yesuq é saksé hkâm bâng é sui shuq wut tô é lé, ngò myang ri.

Haû mù, ngò gi, gayai yhang maú byuq é nghut lhê. ⁷ Haû hkûn, maumang lagyo haû ngo lé tai é gi, "Nàng, haí mù maú lhê lú? Myiwe myhí haû eq, yhang jî tô é, ulhum nyhit lhum eq hkyuî raxê lhum dap é tân jung dusak é záu tô é hkyô lé, ngò, nàng lé tai kyo rá nghut lhê. ⁸ Nàng myàng é tân jung dusak haû gi, hí hkûn nyi wú bê, ahkuî a nyi lo, nghut kôlhang, nik dik htúm é Lasang-dong mai htoq lô mù, htên byoq é hui rá nghut lhê. Mau htoq xâng hkun mai, asak jihpán laiká buk má mying a kâ tô é, myidâm htoq má nyi é bang gi, tân jung dusak haû lé myàng kô é hkûn, maú byuq bùm kó rá nghut lhê. Hkâsu mù gâ le, haû gi, nyi wú bê, ahkuî a nyi lo, nghut kôlhang, dum lé rá nghut é yanmai nghut ri.

⁹ Hpaqchyî byéng-yá bo é nyan gi, shî má rá ri. Haû ulhum nyhit lhum gi, myiwe myhí zung é bùm nyhit lhum nghut ri; hau htoq agó, hkohkâm nyhit yuq le nghut ri. ¹⁰ Ngo yuq gi, byit gyó byuq bê; rayuq gi, ahkuî nyi to ashî; myit tô é rayuq gi, a jê lé shî nghut ri; haû yuq jê lé é hkûn, yhang gi, ahkying razup zo za wó nyi rá nghut lhê. ¹¹ Hí hkûn nyi wú bê, ahkuî a nyi lo dut é tân jung dusak haû gi, shit yuq nghú rá hkohkâm nghut ri. Yhang gi, haû nyhit yuq eq sêng é yanmai, yhâng é htên byoq hkyô shut e ló rá nghut lhê.

¹² Haû nàng myàng é hkyuî raxê lhum gi, mingdán a myang yù shî é hkohkâm raxê yuq nghut ri; nghut kôlhang, yhangmoq gi, haû tân jung dusak eq rahá za, hkying hkum rahkum kô hkohkâm ayá lé wó yú kó rá nghut lhê. ¹³ Yhangmoq gi, myit myoqbyu hkyô ralhum za nghut kômù, yhangmoq é a-tsam eq ahko ahkáng lé, haû tân jung dusak lé byi kó rá nghut lhê. ¹⁴ Yhangmoq gi, haû Sauzo lé majan chôm zan kó rá nghut lhê; nghut kôlhang, Sauzo haû gi, yhumsing pé é Yhumsing eq hkohkâm pé é Hkohkâm nghut é yanmai, yhangmoq lé ung pyám rá nghut lhê. Haû Sauzo eq rahá nghut é bang gi, ji yù huí é bang, hkyin yù huí é bang eq lhumzui é bang nghut akô." gâ ri.

¹⁵ Hau htâng, maumang lagyo haû ngo lé dum tai é gi, "Nàng myang é, shiwa myhí zung tô é wui pé gi, byù myú pé, byù ajùm ayó pé, mingdán pé eq mying lhumjup nghut ri. ¹⁶ Haû nàng myang é tân jung dusak eq hkyuî raxê lhum gi, shiwa myhí haû lé a jú kut kó rá nghut lui, yhâng é sutzè banshoq shang yu pyám byi mù, mebu lhang a dap

loshoq achindum kut to kó rá nghut lhê; hau htoq agó, yhâng é sho lé zo lui, myí eq nyhê hkyô pyám kó rá nghut lhê. ¹⁷ Hkâsu mù gâ le, Garai Gasang gi, haû bang mai, i-miyit rahkat zá êq, yhumsing é a-tsam, haû tân jung dusak lé byi rá myit, yhangmoq lé kat byi Sù nghut ri. Haû mù, yhangmoq gi, Garai Gasang é mungdang lhoq dik é hkûn jê shoq, haû su kut kó rá nghut lhê. ¹⁸ Nàng myang é myiwe myhí haû gi, myidâm htoq mâ é hkohkâm pé lé up zô é myuq mó nghut ri." gâ ri.

18

Babelon Lêng Gyop É Hkyô

¹ Hau htâng, maumang lagyo gotú rayuq mauhkung mai gyó lo é lé, ngò myang ri. Yhang gi, ahko ahkáng mó wó é nghut lui, haû myidâm htoq lé, yhâng é hpungwup eq duqbó to byí ri. ² Yhang, hté mó o mó eq garú tai kat é gi,

"Babelon myuq mó gi, lêng gyop bê, lêng gyop bê!

Myuq haû gi, nat gâng pé é yhùm eq agè ashop é nat hkingmó é hkyung dut byuq é htoq agó,

a sansêng é eq achaq achyut é nghoq pé nyi é sùt dut byuq bê nghut ri.

³ Hkâsu mù gâ le, haû byù myù lunglhang gi, yhang kut shut é ashop é dng gungsho zùm yap é hkyo é nhik lhoq yô é tsibiyiq wing shuq wut bùm bekó nghut ri.

Haû myidâm htoq mâ é hkohkâm pé gi, yhang eq myi shut làng shut hkyô kut bekó nghut é htoq agó,

myidâm htoq mâ é hpugá wuiloq gá bang gi, yhâng é ladu lai shoq ngón kùn é hkyo é yanmai, sutzè wó bôm bekó nghut ri."

gâ ri.

⁴ Hau htâng, mauhkung mai htoq lo é hté gotú lé ngò dum wó gyó é gi,

"Ngá é byu pé ê, myuq hau é mara pé má nungmoq a bo lóm rá matú le,

yhâng é wúm pé lé nungmoq a hui zo kó rá matú le, haû mai hân hpang htoq lò keq;

⁵ hkâsu mù gâ le, yhâng é mara gi, mauhkung htung shoq bum zang to bê nghut lui, Garai Gasang gi, Yhâng é a dingmán é hkyô lé myit bun bê nghut ri.

⁶ Yhang kut byí é eq rajung za, yhang lé tau kut byi keq; Yhang kut bê muzó eq rajung za, yhang lé í tú tau kut keq. Yhang nyhó byí é góm má, í tú tau nyhó byi keq.

⁷ Yhang gi, yhumsing gung lé yhumsing lhoq gyaú yù lui, ladu lai shoq ngón kùn nhang é í,

wuñke jamjau hkyô eq iyon hkyô myo myo, yhang lé taù byi keq.

Hkâsu mù gà le, yhang gi, yhâng é myit má, 'Ngò gi, hkohkâm myhí nghut lhê; ngò gi, chuimó a nghut;

hkâ-nhâm le iyon hui rà a nghut.' ga gumrong nyi ri.

⁸ Haù mù luí, yhâng é wúm nghu é shí hkyô, iyon hkyô eq mutmó gyó hkyô gi, ra-nyí bui má za, yhâng chyáng jé rà nghut lhê.

Hau htoq agó, yhang gi, myí èq nyhê hkyô pyâm é lé hui rà nghut lhê;

hkâsu mù gà le, yhang lé jéyáng é, haù Yhumsing Garai Gasang gi, wum-o a-tsam bò Sù nghut ri.

⁹ Haù yhang eq rahá myiwe yuggè nyi zô lhum hkyô kut shut é eq yhâng é ladu lai shoq ngón kún hkyô má bo lom é, haù myidàm htoq mã é hkohkam pé gi, yhang lé nyhê hkyô é myihkau lé myàng kôjáng, ngaubyi ngau-nhap eq iyon yôn é hui bùm kó rà nghut lhê. ¹⁰ Yhangmoq gi, yhang no jamjaù nyi é lé wú gyuq kôluí, we we má yap to kômù,

'Hkik é myuq mó, a-tsam bo é Babelon gi, dingnyé wó ri-nhung!

Dingnyé wó ri-nhung! Hkyíng hkum rahum má za, dam byí é hkyô gi, náng chyáng jé bu-nhung!

ga luí, taí garu kó rà nghut lhê.

¹¹ Myidàm htoq mã é hpugá byu pé gi, yhang é yanmai, ngaubyi ngau-nhap é eq iyon yôn é hui kó rà nghut lhê; hkâsu mù gà le, yhangmoq é gài zè lé, ó yuq le a wuì byi lo kô é yanmai nghut ri. ¹² Gai zè haù pé gi, hng, ngùn, lungêng eq palhé, nú-nhâm é pán, me me dut é pán, lai hkyíng eq zam zam ne é pán; namngón jung sik ajung jung, maguí zuí lé saí é, gùloq hpaù jung sik lé saí é, gyi lé saí é, shamtoq lé saí é, luq hpyú lé saí é jung ajà jà nghut ri. ¹³ Hau htoq agó, changhpyik gâm, xunmân, namngón jung, mura, loban, tsibiyiq wing, tsanlun xú, mún eq sungsô, nojùng eq sau, myang eq myanglhêng pé; byú é gungdu eq asak pé nghut ri.

¹⁴ Yhangmoq gi, 'Náng myit ô nau nyi é hkyô pé gi, náng chyáng mai gâng ló byuq bê nghut ri. Náng wó é sùt é hkyô eq hkikhkam é hkyô pé banshoq gi, byuq byuq bê nghut luí, hkâ-nhâm le dum wó taù yù rà a nghut.' ga taí kó rà nghut lhê. ¹⁵ Gai zè haù pé lé ung luí, yhâng chyáng mai sutzè wó yu é byú pé gi, yhang hpuzó é jamjau hkyô lé wú gyuq kó é yanmai, we we má yap to kômù, ngaubyi ngau-nhap eq iyon yon uchyang,

¹⁶ 'Nú-nhâm é pán, me me dut é pán eq zam zam ne é mebu wut luí, hng, lungêng eq palhé pé lé

mhôn tó é myuq mó gi, dingnyé wó ri-nhung! Dingnyé wó ri-nhung!

¹⁷ Hkyíng hkum rahkum má za, haù-í yhang wó é sutzè pé htên byoq byuq bu-nhung!

ga taí kó rà nghut lhê.

Wuì-sanghpo agyí yuq hkgámó eq wuì-sanghpo mai jón wún é bang banshoq, wuì-sanghpo hkâng bang eq wuìshuq lung-aù mai wam baù hkyô wó yu é bang banshoq gi, we we má yap to kômù, ¹⁸ myuq haù nyé gyó nyi é myihkau lé myàng kôjáng, 'Myuq mó shí eq pùng é myuq gi, hkâmá joq shirá lhú?' ga taí garu kó rà nghut lhê. ¹⁹ Yhangmoq gi, yhumsing é ulhum má hpuilhup kyaq gyun mù, ngaubyi ngau-nhap eq iyon yon uchyang,

'Myuq mó gi, dingnyé wó ri-nhung! Dingnyé wó ri-nhung!

Wuìshuq lung-aù má wuì-sanghpo pé wó é bang gi, yhâng é sutzè pé é yanmai, sutzè wó bum akò.

Nghut kôlhng, hkyíng hkum rahkum má za, htên byoq hkyô gi, yhâng chyáng jé bu-nhung!

²⁰ Mauhkàng è, yhang é yanmai hkye gabú aq! Sân-yúng bang, lagyo pé eq myiqhtoi pé è, hkye gabú keq!

Hkâsu mù gà le, yhang, nungmoq lé kut é eq rajung za, Garai Gasang gi, yhang lé jéyáng bê nghut ri.'

ga taí kó rà nghut lhê." gâ ri.

²¹ Hau htàng, wum-o a-tsam mó bo é mau-mang lagyo rayuq gi, luqluí long mó sù é luqgok racham waq toq yú mù, wuìshuq lung-aù má dú hkyô kat luí, taí é gi,

"Hau Babelon myuq mó gi, haù su kut wum kat dú hkyô pyâm é hui rà nghut luí, hkâ-nhâm le dum myàng rà a nghut lo.

²² Haù tíng bat é bang, dat gó dat ye é bang, sampyí mut é bang eq tut mut é bang é htê lé,

náng chyáng hkâ-nhâm le dum wó gyo lo rà a nghut.

Loq hpaqchyí ajung jung kung é byú lé, náng chyáng hkâ-nhâm le dum myàng lo rà a nghut.

Luqluí luí é htê lé, náng chyáng hkâ-nhâm le dum wó gyo lo rà a nghut.

²³ Haù myibung duq é myishâm lé, náng chyáng hkâ-nhâm le dum wó duq lo rà a nghut.

Myisik lusik é htê lé, náng chyáng hkâ-nhâm le dum wó gyo lo rà a nghut.

Náng é hpugá byú pé gi, mingkân é byú mó pé nghut ri.

Náng é myoqheq hpaqchyí èq mingdán banshoq mã é bang lé, hkyô shuí nghoq bê nghut ri.

²⁴ Haù myiqhtoi pé é sui, sân-yúng bâng é sui eq myidàm htoq má sat hui bang banshoq é sui pé gi,

yhâng chyáng chyat byu-myàng bê nghut ri."

gâ ri.

19

Haleluya!

¹ Hau htâng, mauhkung htoq má, byù ajùm ayo garú é htê mó su gâ é lé, ngò wó gyô é gi, "Haleluya!"

Hkyi yù hkyô eq hpungwup shingkang, a-tsam gi, nga-nhùng é Garai Gasang eq sêng é nghut lhê.

² Hkâsu mù gâ le, Yhang tarâ jéyáng é hkyô gi, tengmán é eq dingmán é yanmai nghut ri.

Yhang gi, myidàm htoq má é bang lé, hau yhang é ashop é đông gungsho zùm yap é hkyo eq mara kut shut nhang é shiwa myhí mó lé, mara byi lui,

Yhang é dui-nhâng zoshâng wui é sui yuichyîn dam byi bu-nhung ô!"

gâ ri.

³ Dum radàm, yhangmoq taí garu kô é gi, "Haleluya!"

Myuq hau é myihkau gi, pyat dedu ahtum abyuq ru ìng doq nyi sháng gaq ô!" gâ bum akò nghut ri.

⁴ Hau suwún í xe myi yuq eq dui é dusak myi du gi, hau hkohkâm-tanghkuq má zung tô é Garai Gasang lé paí gop lui, noqkuq uchyang,

"Amen, Haleluya!"

ga, taí garú bum akò.

⁵ Hau hkûn,

"Garai Gasâng é dui-nhâng zoshâng wui nghut é, yhang lé gyuq hkunggá é tiq ko banshoq bang ô!"

Nga-nhùng é Garai Gasang lé, hkya-on kungtôn keq ô."

gâ é htê, hau hkohkâm-tanghkuq mai htoq lo ri.

⁶ Hau htâng, byù ajùm ayo é htê su ga, wui myo myo mying hùm é htê su ga, maugum mó é htê su ga, taí garú é htê lé ngò wó gyô é gi,

"Haleluya!"

Hkâsu mù gâ le, wum-o a-tsam dik shoq bò Sù nga-nhùng é Yhumsing Garai Gasang gi, up nyi ri.

⁷ Nga-nhùng gi, ngón gabú lui, Yhang é hpungwup shingkang lé lhoq gyaú sháng ô!"

Hkâsu mù gâ le, hau Sauzo myiháng poi gi, jé bê nghut lui, Yhang é myisik gi, ri ri mhôn to bê nghut ri.

⁸ Sân-yúng duq wik nú-nhâm é mebu le, wut rá matú, Yhang lé byi to bê nghut ri." gâ ri. (Nú-nhâm é mebu hau gi, sân-yúng bang kut é dingmán é muzó nghut ri.)

⁹ Hau htâng, maumang lagyo gi, ngo lé, "Hau Sauzô é myiháng zoshuq poi má ji yu

é hui bang gi, hkungsô wó nyi ri.' nghu ká aq." ga taí lui, "Dang shí pé gi, Garai Gasâng é tengmán mungdang yhang nghut lhê." ga xoq taí ri.

¹⁰ Hau hkûn, ngò gi, yhang lé noqkuq rá nghu, yhang é hkyi wang má paí gop kat é nghut lhê. Nghut kôlhâng, yhang gi, "Hau su hkâkut! Ngò gi, nàng eq hau Yesuq é saksé lé hkâm é nàng gumang wui eq rahá, byinzùm dui-nhâng zoshâng ru nghut lhê. Garai Gasang lé noqkuq aq! Hkâsu mù gâ le, Yesuq é hkyô lé saksé hkâm é gi, myiqhtoi htoí é Woi-nyí é myit đông nghut ri." ga, ngo lé taí hkùm ri.

Myang Hpyù Jì To Su É Hkyô

¹¹ Hau htâng, ngò gi, mauhkung bóng tô é lé le, ngá é myoq hí má myang hpyù radu nyi tô é lé le, myang ri. Myang hpyù hau má jì tô é gi, Lhumzui eq Tengmán gâ é Sù nghut ri. Yhang gi, tengmán é đông tarâ jéyáng lui, majan zan Sù nghut ri. ¹² Yhang é myoqji gi, myishâm su dut mù, Yhang é ulhum má gi, janmau myo myo tsung tô ri. Yhang mai lai lui, ó yuq le a bo sê é mying, Yhang chyáng ká tap tô ri. ¹³ Yhang gi, sui má jum yù bê nghut é buhng radung wut to lui, Yhang é mying gi, Garai Gasâng é mungdang gâ ri. ¹⁴ Hau mauhkung gye pé gi, hpyù é eq sanséng nú-nhâm é mebu wut mù, myang hpyù ji kólui, Yhang htâng má châng bum akò nghut ri. ¹⁵ Byù myù hau pé lé zan rá matú, htoq é shâm gi, Yhang é nhut mai htoq lo ri. Yhang gi, yhangmoq lé, shamtoq dumbáng eq up rá nghut lhê. Yhang gi, wum-o a-tsam dik shoq bò Sù Garai Gasâng é nhikmo-yô é tsibiyiq shi pyik jang má, yhangmoq lé pyik rá nghut lhê. ¹⁶ Hkohkam pé é Hkohkam eq yhumsing pé é Yhumsing gâ é mying gi, Yhang é buhng eq Yhang é tangbau má ká tap tô ri.

¹⁷ Dum, maumang lagyo rayuq gi, bui má yap tô é lé ngò myang ri; yhang gi, maulat má é ngoqzô pé banshoq lé, "Lé keq. Garai Gasâng é zoshuq poi mó matú, lé zup zing keq; ¹⁸ hau hkûn, nungmoq gi, hkohkam pé é, gyezaú pé é, wum-o a-tsam mó bò bâng é, myang jum eq ji bâng é gungsho, luthkyô wó bang eq jùn pé é, byù mó byù zo pé lhunglhang é gungsho pé lé, myáng zo kó rá nghut lhê." ga, htê mó eq wut garú taí ri.

¹⁹ Hau htâng, hau tân jung dusak eq myidàm htoq má é hkohkâm eq yhangmoq é gyezô pé gi, hau myang htoq má jì to Sù eq Yhang é gyezô pé lé, majan zan rá matú chôm zing bùm kô é lé, ngò myang ri. ²⁰ Nghut kôlhâng, hau tân jung dusak gi, chyup yu é hui beko nghut ri; hau htoq agó, hau tân jung dusak é masat lhô lé hkam yù lui, yhang é alhô lé noqkuq é bang lé, mhaú

* 19:1 Haleluya gâ é gi, Hebre mying đông, "Yhumsing Garai Gasang lé hkya-on kungton lhê" gâ é dang nghut ri.

zo rá matú, tân jung dusak hau é gunglik dông limik kumhá pé kut shit é myiqhtoi pyoq le, chyup yu é hui bê nghut ri. Yhangnhik gi, hang myi duq nyi é myi nhông má dù gi dù hkyô kat é hui bêkô nghut ri. ²¹ Haú myit gyô tô é bang gi, myang gung má jì to Su é nhut mai htoq lo é sham êq sat pyâm é hui bêkô nghut luí, ngoq pé lhunglhang gi, haú bang é gungsho lé, gyi gyi dau dau myâng zô bùm bêkô nghut ri.

20

Rahkying Zàn

¹ Dum, maumang lagyo rayuq gi, nik dik htùm é Lasang-dông é zoqshi eq joqtoq tui mó lé, yhang é loq má chùng mù, mauhkung mai gyó lé lo é lé, ngò myang ri. ² Yhang gi, natzau eq Tsadán nghut é, a-nham lê é lhangmui gá é manjung lé, zanwut rahkying lhung to rá matú, chyup tui yù bê nghut ri. ³ Haú mù, maumang lagyo haú gi, rahkying zàn a bying shí é gyo-ro má, manjung haú, byù myù pé lé a wó mhaú zo sháng gaq ga, nik dik htùm é Lasang-dong má yhang lé dù hkyô hâng kat luí, zoq myhi to mù, hau é ahtoq má dizik htung tô ri. Haú rahkying zàn lai eq, yhang lé, ra yoq zo hpông htoq kat ra rá nghut lhé.

⁴ Ngò gi, haú tará jéyáng rá ahko ahkáng wó é bang zung tô bum é hkohkâm-tanghkuq pé lé, dum myang ri. Haú htoq agó, haú Yesuq é hkyô lé saksé hkâm é yanmai le, Garai Gasâng é mungdâng é yanmai le, ulhum hpyit hui bang é sobyo pé lé, ngò myang ri. Haú bang gi, haú tân jung dusak eq yhang é alhó lé a noqkuq é htoq agó, yhumsing é ngelang eq loq má hau é masat lhó lé a htung tap yù bang é sobyo pé nghut ri. Yhangmoq gi, dum dui toq mù, zanwut rahkying tup Hkrisduq eq rahá up nyi bekô nghut ri. ⁵ Haú gi, sâng-hi dàm dum dui toq é hkyô nghut ri. (Shi byuq bê myit gyô tô bang gi, rahkying zàn haú a bying bying wó dum dui toq kó rá a nghut.) ⁶ Sâng-hi dàm dum dui toq é hkyô má lom é bang gi, hkungsó wó bang eq chyoyiung bang nghut ri. Í dâm nghú rá shi é hkyô gi, haú bang lé up rá ahkáng wó é a nghut; haú bang gi, Garai Gasang eq Hkrisduq é hkyangjông pé dut rá nghut é htoq agó, Hkrisduq eq rahá zanwut rahkying tup up kó rá nghut lhé.

Tsadán Htên Byoq Huí É Hkyô

⁷ Rahkying zàn haú lai jáng, Tsadán gi, htóng mai nhang htoq kat é hui luí, ⁸ majan zan rá matú, myidàm htoq myi chyün má nyi é, Goga eq Magoga gá é byù myù pé lé mhaú shuí tsing yù rá ga, htoq é rá nghut lhé. Byù haú bang gi, wuishuq lung-aú yàm má é semui myhó myo kó rá nghut lhé. ⁹ Yhangmoq gi, maumyí htunghtáng hkap shoq chôm yán doq lò kómù, haú Garai Gasâng é byu pé

nyi é dap nghut é, Garai Gasang chyitdap é myuq lhinghkyuq má, lé lóm tô bùm bêkô. Nghut kôlhang, mauhkung mai myi gyó lô luí, yhangmoq lé nyhê hkyô pyám bê nghut ri. ¹⁰ Haú tân jung dusak eq myiqhtoi pyoq pé lé dù hkyô kat jang nghut é, hang myi duq nyi é nhông má, yhangmoq lé mhoq hpyoq yu é natzau haú le dù hkyô pyâm é hui bê nghut ri. Yhangmoq gi, nyi, myín, pyat dedu ahtum abyuq wuñke jamjau hui zô nyi kó rá nghut lhé.

Ló Htâng É Tará Doqdan Hkyô

¹¹ Haú htâng, hkohkâm-tanghkuq hpyù mó ralhüm eq haú má zung tô é Sù lé, ngò myang ri. Haú mauhkung eq myigung gi, Yhâng é hí mai hpang lô bê nghut mù, yhangnhik é matú jowò a joq lo nghut ri. ¹² Haú htoq agó, shi byuq bê nghut é, tiq é kô é bang gi, hkohkâm-tanghkuq hí má yap tô bum é eq laiká buk pé hpông é lé, ngò myang ri. Asak jihpán laiká buk gá é gotú laiká buk le, hpông tô ri. Haú shi byuq bê bang gi, yhumsing kut é eq rajung za, laiká buk pé má kâ tô é dông, tará doqdan é hui bùm bêkô nghut ri. ¹³ Haú hkùn, wuishuq lung-aú gi, yhang má lúng tô é, shi byuq bê bang lé ap byi luí, haú shi é hkyô eq Moming le, yhangnhik chyáng lúng tô é, shi byuq bê bang lé ap byi akò nghut ri; yuq hkangmó gi, yhumsing kut é eq rajung za tará doqdan é hui bekô nghut ri. ¹⁴ Haú htâng, shi é hkyô eq Moming gi, myi nhông má dù hkyô kat é hui bekô nghut ri. Myi nhông haú gi, í dâm nghú rá shi é hkyô nghut lhé. ¹⁵ Asak jihpán laiká buk má, mying a bo é sù ó yuq nghut kôle, myi nhông haú má dù hkyô kat é hui bekô nghut ri.

21

Yerusalem Asik

¹ Haú htâng, mauhkung asik eq myigung asik lé, ngò myang ri; hkásu mù gá le, hí lhé é mauhkung eq myigung gi, lai lo byuq bê nghut luí, wuishuq lung-aú le, dum joq rá a nghut lo. ² Haú hkùn, Chyoyiung Myuq gá é Yerusalem asik gi, lusik é matú mhôn yung tô é myisik su, hen lajáng yù luí, Garai Gasang chyáng mã é nghut mù, mauhkung mai gyó lé lo é lé, ngò myang ri. ³ Haú htoq agó, hkohkâm-tanghkuq mai htoq lo é danghté mó lé, ngò wó gyô é gi, "Ahkuí, Garai Gasâng é nyi jowò gi, xângzo byu pé eq rahá nghut luí, Yhang gi, yhangmoq eq rahá nyi nyi rá nghut lhé. Yhangmoq gi, Yhâng é byu pé dut rá nghut luí, Garai Gasang yhang, yhangmoq eq rahá nyi mù, yhangmoq é Garai Gasang dut rá nghut lhé. ⁴ Garai Gasang gi, yhangmoq é myoq mã é ngaubyi lhunglhang lé, sut pyám byi rá nghut lhé. Htângnung má gi, shí-nò hkyô, iyon hkyô, ngaubyi ngau-nhap hkyô eq no hpu hkyô

ngû é joq râ a nghut lo; hkâsu mù gâ le, hí nhê é hkyô pé gi, lai lô byuq bê nghut ri." gâ ri.

⁵ Hâu khokâm-tanghkuq má zung to Sû gi, "Wú aq, jung hkangmó lé, Ngò asik kut nyí bê nghut lhê." ga tai lui, "Shí lé kâ to aq, hkâsu mù gâ le, dang shí pé gi, lumging é dang eq tengmán é dang nghut lhê." ga tai ri.

⁶ Hâu htoq agó, Yhang gi, "Háu pé gi, ban kut bê. Ngò gi, Alhpa eq Omega nghut lhê; Sâng-hi Awang eq Lô Htâng Sû le nghut lhê. Wui shit sù lé gi, ahpau a dúng é za, asak wuibúm má é uchyam lé, Ngò byi huq râ nghut lhê. ⁷ Wó ung é sù ó yuq nghut kôle, Garaí é silí wunlí háu pé banhoq lé sîng râ nghut mù, Ngò gi, yhang é Garaí Gasang dut lui, yhang gi, Ngá zo dut râ nghut lhê. ⁸ Nghut kôhang, gyuq myit bò bang, a lumjing bang, achag achyut dut bang, byù sat bang, ashop é dông gungsho zùm yap é hkyô shut é bang, myoqheq hpaqchyí kut é bang, hparà noq é bang eq mhaú bang lunglhang é jowò gi, háu hang myi duq nyi é nhông nghut râ nghut lhê. Háu gi, í dâm ngû râ shí é hkyô nghut ri." ga ngo lé tai ri.

⁹ Lô htâng é wúm nyhit jung bying tô é góm nyhit lhum chung tô é maumang lagyo nyhit yuq má é rayuq gi, lé mù, "Lé aq, háu Sauzô é yhangmyí gâ é myisik lé, ngò tân shit râ nghut lhê." ga ngo lé tai ri. ¹⁰ Hâu htâng, yhang gi, ngo lé Woi-nyí mai bùm myhâng mó ralhum má shuí jé lui, Garaí Gasâng chyáng má é nghut mù, mauhkung mai gyó lé lo é, háu Chyoiyung Myuq gâ é Yerusalem lé tân shit ri. ¹¹ Myuq háu gi, Garaí Gasâng é hpungwup shing kang hú é htoq agó, háu maubó gi, hpau dik é huhpé lungsensu su dut lui, myoqjâm su sán-yung ri. ¹² Myuq xêwâm gi, kô myhang é htoq agó, hkum raxe í lhum hpông tô ri; hkum háu pé má, maumang lagyo raxe í yuq zung tô ri. Hâu htoq agó, Israelaq byù myú raxe í hu é mying lé, hkum háu pé má kâ tap to bum ri. ¹³ Hkum háu pé gi, buihtoq hkyam shut sùm lhum, buiwang hkyam shut sùm lhum, maupyí shut sùm lhum, mautsung shut sùm lhum kut hpông tô ri. ¹⁴ Myuq xêwâm háu gi, awang raxe í lhum eq hí tô é nghut lui, awang háu pé má, Sauzô é lagyo raxe í yuq é mying dap tô bum ri.

¹⁵ Hâu ngo lé nyo é maumang lagyo gi, myuq lé le, hau é hkum pé lé le, xêwâm pé lé le, ké râ matú, kê é jung hing jam-yang ralhum chung tô ri. ¹⁶ Myuq háu gi, myi chyún dut má é nghut lui, hing hpyang làm hpyang rawúi wui za dut má é nghut ri. Maumang háu gi, myuq lé jam-yang hau eq kê wú é hkûn, hing hpyang, làm hpyang, myhâng hpyang banhoq 1400 dêng* kô bo

ri; ¹⁷ yhang gi, háu byù kê é jung eq wui é maumang lagyo é kê jung lé chung mù, myuq xêwâm lé kê wú é hkûn, rasho myí xê myi dúng bo ri. ¹⁸ Myuq xêwâm háu gi, huhpé lungsens eq sai é nghut ri; myuq gi, hing gyíng eq sai é nghut mù, myoqjâm su yhang sán-yung ri. ¹⁹ Myuq xêwâm háu é awang pé gi, hpau jung lungsens ajung jung eq mhôn tô é nghut ri. Sâng-hi lhum gi, huhpé lungsens eq, í lhum ngû râ gi, nila (mauhkung nyui su dut jung) lungsens eq, sùm lhum ngû râ gi, mahuya (noq é isâm myo jung) lungsens eq, myí lhum ngû râ gi, myaq (huí nyui nyui é jung) lungsens eq, ²⁰ ngo lhum ngû râ gi, nyháu myoqjî su dut jung lungsens eq, hkyuq lhum ngû râ gi, pate-mya (nè é jung) lungsens eq, nyhit lhum ngû râ gi, lui múi múi é su dut jung lungsens eq, shit lhum ngû râ gi, myek-yoi (wuimau nyui su dut jung) lungsens eq, gaú lhum ngû râ gi, utohpaya (bó lui hui é jung) lungsens eq, raxé lhum ngû râ gi, mahuya nyui lungsens eq, raxe ralhú ngû râ gi, wakintu (mhan-haq nyui eq mauhkung nyui nyhò tô é su dut é jung) lungsens eq, raxe í lhum ngû râ gi, (me me dut é jung) htihntu-nila lungsens eq mhôn tô ri. ²¹ Hâu myuq hkum raxe í lhum gi, palhé raxe í cham nghut ri; hkum ralhum gi, palhé rachâm eq sai é nghut ri. Hâu myuq é hkyô mó gi, hing jet eq sai é nghut lui, myoqjâm su duq san é hkyô nghut ri.

²² Ngò gi, myuq háu má noqkuq yhùm joq é lé a myang, hkâsu mù gâ le, háu wum-o a-tsam dik shoq bò Sû Yhumsing Garaí Gasang eq Sauzo gi, myuq hau é noqkuq yhùm nghut nyi é yanmai nghut ri. ²³ Hâu Garaí Gasâng é hpungwup shing kang gi, myuq háu má duqbó byí é htoq agó, Sauzo gi, myuq hau é myibung nghut é yanmai, myuq háu má gi, bui eq lhamó tsô byi a ra nghut ri. ²⁴ Hâu byù myú pé gi, myuq háu duqbó é hkaú má hkyô wó so kó râ nghut lhê; háu myidâm htoq má é hkohkam pé gi, yhangmoq é hkikhkâm hkyô lé, myuq háu má yù lé kó râ nghut lhê. ²⁵ Myuq háu má gi, myín ngû é a joq é yanmai, myuq hkum myhí é le joq râ a nghut lo. ²⁶ Hâu byù myú pé é hpungwup shing kang eq aróng lé, myuq háu má yù lé kó râ nghut lhê. ²⁷ Myuq háu má, a sansêng é hkyô hái le wó wàng râ a nghut é htoq agó, hoq hpu hkyô eq mhaú zô é hkyô kut é sù ó yuq le wó wàng râ a nghut; háu Sauzô é asak jihpán laiká buk má mying bo é bang za wó wàng râ nghut lhê.

22

Asak Wui Mó Lâng

¹ Hâu htâng, Garaí Gasang eq Sauzô é khokâm-tanghkuq mai yui htoq lô lui, myuq

* 21:16 1400 dêng gi, Grik pé é stadia 12000 kô nghut ri.

hkaú má é hkyô mó gûng dông yui lô é, myoqjâm su sân-yûng é asak wui mó làng lé, maumang lagyo haú, ngo lé tún shit ri.
 2 Wuilàng í hpoq é má, ashí raxe í myû zui é asak shigâm yuq tô é nghut luí, lhohkyp hkangmó ashí zui ri. Hau htoq agó, shigâm haú pé má é ahaq pé gi, byû myû pé lé yâ gè râ matú nghut ri.
 3 Nhing é hái le a joq lo râ nghut lhê. Garai Gasang eq Sauzô é hkohkâm-tanghkuq gi, myuq hkaú haú má joq nyi râ nghut mù, Yhâng é dui-nhâng zoshâng wui gi, Yhang lé noqkuq dojaú kó râ nghut lhê.
 4 Yhangmoq gi, Yhâng é myoqdong lé myàng kó râ nghut é htoq agó, yhangmoq é ngelang má, Yhâng é mying kâ tap é hui kó râ nghut lhê.
 5 Myin nghû é le joq râ a nghut lo. Myibung duqbó byí é le, bùi tsô byí é le, yhangmoq ra kó râ a nghut lo, hkâsu mù gâ le, haú Yhumsing Garai Gasang gi, yhangmoq lé duqbó byí nyi râ nghut lhê. Hau htoq agó, yhangmoq gi, pyat dedu ahtum abyuq up nyi kó râ nghut lhê.

6 Maumang haú gi, ngo lé, "Dang shí pé gi, lumging é dang eq tengmán é dang nghut lhê. Myiqhtoi pé é woi-nyi lé up é Yhumsing Garai Gasang gi, adê myáng má dut lò râ hkyô pé lé, Yhâng é dui-nhâng zoshâng wui lé tún shit râ matú, Yhâng é maumang lagyo lé nhang kat é nghut ri." ga tai ri.

Yesuq Jé Lé Lô Râ Hkyô

7 "Wú keq, Ngô gi, a myáng má jé lé lô râ nghut lhê! Laiká shí má bo é myiqhtoi dang pé lé châng kut é sù gi, hkungsô wó nyi ri."* gâ é lé, ngô wó gyô ri.

8 Haú hkyô pé lé wó myâng wó gyô é sù gi, ngô Yohan nghut lhê. Ngô gi, haú hkyô pé lé wó myâng wó gyô é hkûn, ngo lé, shí hkyô pé tún shit é maumang lagyo é hkyí wang má noqkuq râ matú pai gop é nghut lhê.
 9 Nghut kôlhang, yhang gi, ngo lé, "Haú su hkâkut! Ngô gi, nâng eq le, nâng é gumang myiqhtoi pé eq le, laiká shí má é mungdang pé lé châng kut é lhunglhang bang eq le raha, byinzûm dui-nhâng zoshâng ru nghut lhê. Garai Gasang lé noqkuq aq!" ga tai ri.

10 Hau htâng, yhang gi, "Laiká shí má bo é myiqhtoi dang pé lé, hkâzaú to lo, hkâsu mù gâ le, haú ahkying gi, chyâng lò bê nghut

ri. 11 A dingmán é sù gi, a dingmán é dông xoq kut nyi sháng gaq; a sansêng é sù gi, a sansêng é dông xoq dut nyi sháng gaq; dingmán é sù gi, dingmán é dông xoq kut nyi sháng gaq; chyoiyúng é sù gi, xoq chyoiyúng nyi sháng gaq." ga ngo lé tai kyô ri.

12 "Wú keq, ngô gi, a myáng má jé lé lô râ nghut lhê! Ngô gi, yuq hkangmó lé, yhumsing kut é eq rajung za byi râ shigyau chyunhuq chung tô lhê. 13 Ngô gi, Alpha eq Omega nghut lhê, Sâng-hi eq Jihâm nghut lhê, Sâng-hi Awang eq Lô Htâng Sù le nghut lhê.

14 Asak shigâm má jé râ eq myuq hkaú shut hkúmdong mai wó wang jé râ ahkáng wó yû shoq, yhumsing é buhng lé chí sân é bang gi, hkungsô wó nyi ri. 15 Shinggan má gi, hkui dông nyi é bang, myoqheq hpaqchyí kut é bang, ashop é dông gungsho zûm yap é hkyô shut é bang, byû sat é bang, hparà noq é bang eq mhaú é hkyô lé ô nau luí châng kut é bang lhunglhang nyi bum akô nghut ri.

16 Ngô, Yesuq gi, haú noqkuq hpûng pé lé, shí hkyô pé saksé hkâm shit sháng gaq nghû, Ngá é maumang lagyo lé, nungmoq chyáng nhang kat bê nghut lhê. Ngô gi, Dawiq é Amyit eq Awut Ashín le, haú duqbó é Bó-myhû le nghut lhê."† gâ é lé, ngô wó gyô ri.

17 Haú Woi-nyi eq myisik gi, "Lé aq!" gâ akô. Haú wó gyô é sù gi, "Lé aq!" ga sháng gaq. Wui shit sù ó yuq nghut kôle, lé sháng gaq; shuq nau é sù ó yuq nghut kôle, ahpau byí a ra é asak wui lé, shuq sháng gaq.

18 Laiká shí má bo é myiqhtoi dang pé lé wó gyô é bang yuq hkangmó lé, ngô sidiq byí é gi: dang haú pé má, rajung jung kat jat é sù ó yuq chyáng nghut kôle, Garai Gasang gi, laiká shí má kâ tô é wúm pé lé jé nhang râ nghut lhê. 19 Myiqhtoi laiká shí má bo é dang pé lé, yu pyâm é sù ó yuq lé nghut kôle, Garai Gasang gi, laiká shí má kâ tô é asak shigâm eq chyoiyúng myuq mâ é yhang eq séng é gû lé, yu pyâm byi râ nghut lhê.

20 Shí hkyô pé lé saksé hkâm byí é Sù gi, "Nghut bê, Ngô gi, a myáng má jé lé lô râ nghut lhê." ga tai ri.

Amen. Yhumsing Yesuq é, lé lô aq ô!

21 Haú Yhumsing Yesuq é jeju gi, Garai Gasang é byu pé chyáng joq nyi sháng gaq ô! Amen.

* 22:7 Dang shí hkun gi, Yesuq tai é nghut lhê. † 22:16 Dang shí hkun gi, Yesuq tai é nghut lhê.